

imp.


2484/

3 Bde

404010

Mercurius

M. 18.098



Breuis & perspicua
explicatio Psalmorum
Dauidis.

AVTORE

Ioanne Brentio.

DECAS PRIMA.



TVBINGÆ,
Apud viduam Vlrici Morhardi.
Anno 1567.

PSALMI PRIMÆ
Decadis.

1. *Beatus vir, qui non abiit, etc.*
2. *Quare fremuerunt gentes.*
3. *Domine quid multiplicati sunt.*
4. *Cum inuocarem, exaudiuit.*
5. *Verba mea auribus percipe.*
6. *Domine ne in furore tuo arguas me.*
7. *Domine Deus meus in te speraui.*
8. *Domine, Dominus noster, quàm admirabile est
nomen tuum.*
9. *Confiteor tibi Domine.*
10. *Vt quid Domine recessisti.*



Uti, quum varias & dissimiles sacra Scriptura, ac praesertim Psalterij Davidis, quod omnium ferè manibus teritur, & in quo illustrando non pauci elaborarunt, explicationes vident, teneri non possunt, quin exclament, Quid? An non sacra Scriptura est obscura, dubia, incerta, flexiloqua, & indiget hominum traditionibus, ut aliquid certi ex ea definiatur? Sed iniquissimum est, de coelestibus oraculis, ex hominum sententia pronunciare, & iudicium de splendore solis, noctuae subijcere. De qua re aliàs copiosè dictum est. Nos igitur, hoc argumento suis locis & scriptis relicto, persequemur, quod instituimus. Visum enim est, hanc breuem Psalterij explicationem in lucem dare, non quòd in aliorum vel veterum, vel recentiorum interpretum reprehensionem, noua cudamus, & sentiamus pias aliorum insignium virorum cogitationes, quibus Psalterium, in ecclesia filij Dei, singulari industria exponere conati sunt, damnandas & reiiciendas, sed quòd huius nostri instituti longè aliam habeamus occasionè,

quàm fortassis alijs hæcenus exhibita fuit. Quod dum commemorauero, pius Lector, quæso, æquum se & beneuolum præbeat. In Ducatu Wirtenbergensi, præter multa præclara decora, & ornamenta, quibus eum Deus, pro summa sua clementia, præ multis alijs Germaniæ regionibus insigniuit, illud inter præcipua meritò numerandum est, quòd iam inde à septingentis annis, excitata fuerint in eo illustria & frequentia *μοναστήρια*, quæ Monasteria vocant. Non mihi iam sermo est, de mendicantium, vt vocarunt, conuentibus, de syluestrium fraterculorum, quos Hieronymus vocat Remoboth, mandris, de nobilium & ingenuarum puellarum septis, & de Monialium, quas dixerunt Beguttas, lustris, quæ ubiq; in singulis ferè saltibus, oppidis, & pagis obuia fuerunt: sed de illis loquor Monasterijs, quæ & pietatis specie, & opum affluentia, & dignitatis excellentia præstabant. Etsi autem non est obscurum, quòd Maiores, in ijs instituendis delectu, vt illa erant tempora, errarint, tamen affectus eorum non est temerè damnandus. Et extant certa adhuc vestigia, quibus haud obscurè notatur, fuisse ibi à prima sua origine, magna piæ doctrinæ studia. Certè exercitium sacrarum literarum fuit assiduum: ac si quis

recens

recens in contubernia illa receptus esset, necesse habuit primo anno, quem vocarunt, probationis, vniuersum Psalterium Dauidis memoriter ediscere: non hoc tantum consilio, vt priuatas suas preculas expeditius absoluerent, sed vt accessuri ad docendam ecclesiam, (ex hoc enim choro, ecclesiarum Pastores petebantur) haberent in Psalterio totius Propheticae & Apostolicae Scripturae epitomen. Nec dubito, quin eodem consilio, Leo Pontifex, (quo tempore Romanus Episcopatus nondum erat cathedra pestilentiae) nulli manum imposuerit, qui esset Psalterij ignarus. Hoc autem institutum, etsi videtur initio ecclesijs eorum temporum non inutile, tamen in quantam superstitionem, imò impietatem, sub regno Pontificio degenerauerit, notius est, quàm vt me hoc loco oporteat, & tristius, quàm vt libeat commemorare. Quare, cum Illustrissimus Princeps ac Dominus, D. Christophorus, Dux Wirtenbergensis ac Theccensis, & Comes Montbeliardenensis, &c. Dominus meus clementissimus, adiret auitam & paternam suam haereditatem, ac susciperet gubernacula eius, primam omnium curam, pro pij Principis officio, in eo collocauit, non solum, vt ecclesiae in praesentia haberent Pastores, qui ipsas in verè pia doctrina erudirent, verum etiam, vt esset se-

minarium, quo posteritati consuleretur. Itaq;
ordinauit, vt in singulis Monasterijs, (quæ vulgò
Abbatia aut Prælaturæ vocabantur) singula in-
stituerentur Scholæ, in quibus adolescentes bo-
næ spei in bonis & sacris literis discendis, ad fun-
ctionem ecclesiastici Ministerij, à teneris, vt
aiunt, vnguibus, præpararentur, id est, vt Mona-
stera illa ad verum & legitimum vsum, quo ad
eius fieri posset, & deberet, reuocarètur. Et quia
plurimum refert, quibus magistris, &, vt episto-
la ad Hebræos vocat, *ἡγουμένοις*, seu, vt hactenus di-
cti sunt Abbatibus, hoc est, Patribus, adolescen-
tia, præsertim ad ecclesiam accessura, ab ineun-
te ætate vtatur, diligenter curat Illustriss. Prin-
ceps, vt ijs, viri ætate venerabiles, autoritate
graues, eruditione excellentes, & pietate insi-
gnes præficiantur, qui ita præsent, vt quantum
humanitus prouideri potest, adolescentibus ni-
hil desit, quod vel ad vitæ alimenta, vel ad insti-
tutionem honestorum morum, vel ad eruditio-
nem piæ doctrinæ necessarium videatur. Ac vt
hoc institutum inuiolatum conseruaretur, &
progrediretur, curauit etiam Celsitudo eius, vt
in ijs Scholis annuæ fierent studiorum inspe-
ctiones, quibus non solum profectus adolescen-
tum exploraretur & cognosceretur, verum
etiam adolescentes intelligerent, quantæ curæ
studia

studia ipsorum Illustrissimo Principi, atq; adeo ecclesiæ ipsi essent, quo officio ad afferendā meliorem frugem excitarentur. Nec vanum fuit cōsiliū, quippe quod hisce etiam temporibus, aliquot in illis Scholis educati, ecclesiam, diuino beneficio, vtiliter administrant. Cū igitur ego vnā cum reuerendo & clarissimo viro D. Doctore Iacobo Andreæ, Præposito ecclesiæ, & Cancellario Scholæ Tubingensis, collega in Christo amicis. ad hanc inspectionē, autoritate & mandato Illustris. Principis vocarer, suscepi in singulis illis Monasticis Scholis, singulos Psalmos, pro mea tenuitate, explicandos, quibus nouum hoc institutū, quasi cōsecrarem, & ecclesiæ congratularer, ac cœlestem opem implorare, vt quod Illustris. Principi, optimo consilio, & officio, Christo ipsi filio Dei, gratissimo, instituire visum est, hoc diuina clemētia, ad posteritatē sacrosanctū & inuiolatū transmitteretur, & cōseruaretur. Quod enim aliud vel cōsecrationis vel congratulationis, vel precationis officium Deo præstare, quàm quod Spiritus ipse sanctus præscripsit? Laudabo, inquiens, nomē Dei cum cantico, & magnificabo eum laude. Et placebit Deo super vitulum nouellū, cornua producentem & vngulas. Nec potest adolescentibus, ministerio ecclesiæ destinatis, quicquā vtilius, in hoc quidē doctrinæ

doctrinae genere, tradi, quàm vt habeant Psalmos non solum commendatissimos, sed etiam maximè omnium familiares. Linguam, fateor, discent è lectione & vsu aliorum scriptorum formare, iuxta humanæ carnis sapientiam, elegantius: quæ pars studij, ne ipsa quidè, in suo gradu, præsertim ijs, à quibus exigitur, vt fiant ὁδονομοί, negligenda est. Sed vt lingua hominum, ad docendos homines, vtiliter loquaris, linguam prius Spiritus sancti cognoscas, necesse est, qua & Deus tecum è cœlo, & tu vicissim cum Deo è terra, imò ex ipso inferni hiatu, colloqui possis. Hoc tibi liber Psalmorum insigniter præstabit. Cōtinentur enim in eo partim conciones, quas DOMINVS Deus noster è cœlesti diuinæ Maiestatis suæ throno ad humanum genus, de sua voluntate, habet, & nunc, quid à nobis exigat, nūc, quid nobis in vnigenito filio suo præstare velit, dilucidè exponit: partim præcationes & obsecrationes, quibus nos vicissim exponimus Deo omnes nostros affectus, & pericula, in quibus versamur, & ope eius indigemus: vt liber Psalmorum nihil aliud sit, quàm mutuum colloquium, quod Spiritus sanctus inter Deum & homines instituit. Etsi autem adolescentia, nec ætate, nec rerum vsu eò progressa est, vt in animo suo afficiatur maximis illis & atrocissimis tempestatibus,

pēstatibus, quæ ex agnitione peccati, è sensu iræ
diuinæ, ac ex obiectu mortis & dolorum inferni
oriri solent, & quarum cœlestia omnis generis
remedia in Psalmis, tanquam in pharmacopo-
lio proponuntur: tamen quia illi, qui quasi pub-
lica ecclesiæ electione in his Scholis erudiuntur,
eò destinati sunt, vt veram pietatem, tam ipsi
discant, quàm ecclesiam suo tempore doceant,
necessarium est, vt parent sibi hac tenera sua æ-
tate promptuariū, quale est Psalmorum liber, è
quo, cū res postulat, quæ ad sedandas cū su-
as priuatas, tūm publicas Ecclesiæ tempestates
conducunt, proferre queant. Ac antè quidem,
quàm publicus esset psalmorum vsus, videbatur
doctrina pietatis, in sacrificijs tantū, & in pau-
culis Leuitarum sermonibus, ac in tabernaculo
cōtineri, & quasi condita ac sepulta iacere. Post-
quàm autem ea doctrina collata est, singulari
Spiritus sancti consilio, in Psalmos, (hoc est) in
formulas publicarum & priuatarum cantionū,
educta est tam è sacrificijs, quàm è tabernaculo,
& introducta ad vsum hominum, in ciuitates,
in fora, in vicos, in domos, in officinas, in cubi-
cula, in agros, in eremos, imò & in carceres, &
in penetralia quæq;. Hoc enim illud est, quod
Paulus ad Ephesios scribēs: Impleamini, inquit,

B Spiritu.

Spiritu. Sed quo modo, aut quo organo? Loquētes, inquit, vobismetipsis per Psalmos & hymnos, & cantiones spirituales: canentes & psallentes in corde vestro DOMINO: gratias agentes semper de omnibus, in nomine DOMINI nostri Iesu Christi. Nullum potest encomium de Psalmorum seu recitatione, seu meditatione illustrius dici, quàm quòd sint organa, quibus impleamur coelesti Spiritu, non quia recitentur, aut cogitentur, sed quia rectè intelligantur. Quare, ut ediscantur, & cōmemorentur, (quod in his monasticis Scholis ab adolescentibus, tam ex veteri, quàm ex nouo instituto exigitur) utiliter percurrere eos breui & aperta explicatione. Ac in praesentia quidem viginti priores trado, daturus etiam aliās, DOMINO volente, & vitam concedente, reliquos. Oro autem & obtestor Dominos Abbates, ut quod faciunt, diligenter facere pergant, ac meminerint, se tot ecclesias, filio Dei honestas & pudicas sponfas adducere, quot adolescentes ad ministerium ecclesiasticum accessuros, in sana pietatis doctrina, erudiendos suscipiunt. Deus pater DOMINI nostri Iesu Christi, det coeleste incrementum, ut hoc institutum per Spiritum sanctum felicissimè promoueat.

Psalmus

Psalmus primus.

Beatus vir, qui non abiit, &c.

In Monasterio Diui Georgij in Hercinia sylua,

Anno 1556. die 10. Iunij,

explicatus.



Necquàm ad primum Psalmum, quem institui in præsentia explicare, accedamus, visum est initio cōmendationem vniuersi Psalterij Davidis paucis percurrere. Etsi enim nonnulli existimant, de præclaris rebus melius esse silere, quàm pauca dicere, tamen cum multitudo verborum sæpè obscuritatem pariat, & multa breuibus comprehendere possint, habet breuitas suam quoq; laudem & vtilitatem. Quare dicamus quædā de Psalterij autoritate, vt intelligamus, ipsum in prima commendatione ponendum esse. Ac initio si de autore Psalterij dicendum est, etsi non est dubium, quin David Propheta & rex Israël, ac nonnulli alij, quorum nomina in Psalmorum inscriptionibus extant, tradiderint Ecclesiæ Dei hos Psalmos tractandos, tamen præcipuus eorum autor est Spiritus ipse sanctus, qui eos Davidi & alijs in Ecclesia vulgaris dictauit: Spiritus DOMINI (inquit David) locus
2. Reg. 23.
tus est per me, & sermo eius per linguam meam. Sed ne quis existimet, Davidem sui ipsius tibicinem esse,

- Matt. 22.* Christus Filius Dei apud Matthæum affirmat, Davidem non humano sed diuino spiritu, Psalmos composuisse. Quomodo (inquiens) David vocat eum Dominum in spiritu. Et apud Mar. Ipse David dixit a flatu Spiritu sancto: Dixit Dominus Domino meo, sede à dextris meis. Et Petrus in Actis Apostolicis: Oportuit, inquit, impleri scripturam, hanc, quā prædixit Spiritus sanctus, per os David. Sed nihil opus est in re manifesta colligere multum testimoniorum.

Inspiciamus Psalmos ipsos, & cognoscamus, quod sicut vniuersa pia doctrina collata est in tria breuia compendia, in Decalogum videlicet & Symbolum Apostolicum, & Orationem dominicam: ita summa totius sacre Scripturæ collata sit in Psalmos, vt Psalterium recte & congruenter vocaueris sacrorum Bibliorum epitomen.

- Porro quanti Christus & Apostoli eius, Psalmos fecerint, vel ex hoc perspicuum est; quod ex Psalmis insignes conciones texuerint; & eas autoritate Psalmorum confirmauerint: Necesse fuit (inquit Christus) impleri omnia: quæ scripta sunt in lege Mosi, & Prophetis, & Psalmis de me. Et Petrus in prima sua concione, quam accepto Spiritu sancto Hierosolymis in die Pentecostes habuit, probat è Psalmis resurrectionem Christi à mortuis. Paulus tanta frequentia vtitur Psalmorum testimonijs, vt videatur haud obscure significare, se librum Psalmorum omnibus reliquis veteris Testamenti scriptis anteferre. Sequamur igitur auctoritatem Apostolorum, adeoque Christi filij Dei: & versemus Psalterium diurna nocturnaq; manu, vt ex eo vera Spiritus sancti oracula cognoscamus.

Non

Non est autem sentiendum, quod nostro officio si-
mus defuncti, si Psalmos lectione, aut cantione per-
turramus. Danda enim est opera, ut quæ legimus aut
cantamus, recte quoque intelligamus: Volo, inquit *1. Cor. 14.*
Paulus, in Ecclesia quinque verba mente mea loqui, ut
& alios instituam, potius quam decem millia verborum
lingua. Et iterum: Quæcunque præscripta sunt, *Rom. 15.*
in nostram doctrinam præscripta sunt, ut per patien-
tiam & consolationem Scripturarum spem habeas-
mus. Ac rursus: Omnis Scriptura diuinitus inspirata, *2. Tim. 3.*
ta, utilis est ad doctrinam, ad redargutionem, ad cor-
rectionem, ad institutionem, quæ est in iustitia, ut in-
teger sit Dei homo ad omne opus bonum apparatus.
Quomodo autem potest sacra Scriptura, cuius præci-
pua pars sunt Psalmi, nos erudire, ædificare, consolari,
docere, corrigere, & instituere, si sermonem, quem
legimus, non intelligimus. Quare in hoc studium no-
bis incumbendum est, ut rectam & veram Psalmos-
rum sententiam cognoscamus. Sed accedamus nunc
ad primum Psalmum.

Et si autem hic Psalmus aut non computatur in nu-
mero reliquorum Psalmorum, aut cum sequenti: Quas
re fremuerunt gentes, &c. pro vno habetur, quia Paulus *A. 70. 13.*
in ea concione, quam habuit in synagoga Antio-
chiæ Pysidiæ, allegat illud dictum secundi Psalmi:
Filius meus es tu, ego hodie genui te, & dicit, hoc
scriptum esse in primo Psalmo: tamen habet ex hoc
suam autoritatem, quod sit velut præfatio Psalterij, &
cohortatio ad studium verbi Dei, quod in Psalmis
nobis commendatur. Constat autem sex versiculis:
& continet duas partes, exhortationem ad pietatem,

& dehortationem ab impietate. Ac profecto, si argumentum eius diligenter expendimus, voluit Spiritus sanctus in hoc breue carmen conferre duo illa capita, de benedictione piorum, & maledictione impiorum, quorum alterum extat in Leuitico cap. 6. alterū in Deuteronomio cap. 28. Si audieris vocem DOMINI Dei tui, vt facias atq; custodias omnia mandata eius, &c. Nam quod hīc canitur: Beatus vir, qui non abiit in consilio impiorum, &c. hoc apud Moſen dicitur: Si audieris vocem DOMINI Dei tui, benedictus tu in ciuitate, benedictus in agro, &c. Prior ergo pars huius Psalmi conſtat tribus verſiculis, quibus admonemur, vt ſequamur veram doctrinam pietatis, & fugiamus tām doctrinam quām mores & ſtudia impiorum.

1. *Beatus vir, qui non abiit in conſilio impiorum, & in via peccatorum non ſtetit, & in cathedra deriſorum non ſedit.*

Vtitur pro more Hebræorum verbis præteriti temporis pro præſenti, abiit, ſtetit, ſedit, pro abit, ſtat & ſedet. Vtitur etiam phraſi ac modo loquendi Hebræo. Nam cum dicitur: Non abiit in conſilio impiorum, non ſtetit in via peccatorum, non ſedit in cathedra peſtilentiæ, verba quidem Latina ſunt, phraſis autem eſt Hebræa. Latinus diceret: Qui non ſequitur impia facta ſeu decreta malorum, qui non adhæreſcit iniuſtitia, & qui non commoratur in contubernio peſtiferorum ciuium: Cathedra enim peſtilentiæ eſt conſeſſus ſeu conuiſtus ſcleratorum hominum, qui prauis ſuis moribus & colloquijs quoſuis conuiſctores quaſi contagione inſiciant. Vbi eſt in vulgata verſione,

versione : In cathedra pestilentiae non sedit , ibi Hebraeus , pro pestilentia habet לִזְמִי Lezim, à verbo לָזַח Loz, quod significat , deridere , illudere , nugari. Apparet autem septuaginta interpretes legisse לִזְמִי Lezom, & transulisse λιμῶν, (hoc est) famis seu ieiuniorum : Scribas autem vertisse λιμῶν, in λοιμῶν, quod significat , pestilentiarū. Quod autem in Hebræo habetur לִזְמִי Lezim, conuenit ferè cum teutonico vocabulo, lose Leut, hoc est, vntüchtig / vnnützig Spötter. Et quod in hoc primo versiculo dicitur : Qui nō abiit in consilio impiorum, &c. hoc Teutonicus, pro sua loquendi phrasi, ita diceret : Der nicht in der Büblers haut umblaufft / vnd nicht in dem Linder ligt / vnd an keiner losen Gesellschaft hängt. Discamus ergo ex hoc versiculo, nihil esse perniciosius conuictu hominum eorum, qui vel impia docent, vel turpem & nefariam vitam ducunt. Cum enim natura simus corrupti, fieri non potest, quin si accesserit impia doctrina, aut sceleratum exemplum, corruptiores & sceleratiores fiamus. Hinc sunt dicta illa sacrae Scripturae & aliorum scriptorum : Cauete à fermento Pharisaeorum, quod est hypocrisis. Et : Si cæcus cæcum ducit, ambo in foueam cadunt. Et : Qui tetigerit picem, inquinabitur ab ea, & qui communicauerit superbo, induet superbiam. Ac alias : Corruptunt bonos mores colloquia praua. Et : Si iuxta claudum habitaueris, discas & ipse claudicare.

2. *Sed in lege DOMINI voluntas eius, & in lege eius meditabitur die ac nocte.*

Sicut

Sicut in primo versiculo vsus est Psalmus præterito tempore pro præsentī, ita nunc vitur futuro pro præsentī, meditabitur pro meditatū. Voluntatem autem habere in lege DOMINI, & meditari in lege eius, non est simpliciter in corde cogitare, sed toto mentis affectu ferri in obseruantiam verbi Dei, & sese noctu diuq; exercere, vt diuinæ legi obsequium præstetur. Quod aliās dicitur, Facias & custodias omnia mandata, quæ ego tibi præcipio. Et iterum: Diliges DOMINUM Deum tuum ex toto corde tuo, ex tota anima tua, & ex omni fortitudine tua. Admonemur ergo ex hoc versiculo, vt in colendo Deo & præstando ei obsequio, non sectemur commenta humanæ rationis, nec exempla prauorum hominum, sed præscriptum verbi Dei. Non respiciamus ad consilia impiorum, ad viam peccatorum, & ad doctrinam & exempla sceleratorum, qui solent verbum Dei irridere: sed ad legem DOMINI, Hæc sit cogitatio, hæc meditatio, hoc exercitium nostrum, hæc sint delitiæ nostræ.

Quid ergo fiet nobis, si non sectati fuerimus doctrinam impiorum & exempla sceleratorum, sed legem ac verbum DOMINI? Sequitur.

3. *Et erit tanquam lignum, quod plantatum est iuxta rivum aquarum, & dat fructum suum, tempore suo, ac folium eius non marcescit, & quæcūq; facit, prospera erunt.*

Lignum more Hebræo significat arborem, iuxta illud Gene. 1. Germinet terra lignum pomiferum, hoc est, arbore pomiferam, & Gene. 2. Ex omni ligno Paradisi

radissi comedere, hoc est, ex omni arbore. Et Luca 23. Si hoc faciunt in ligno viridi, hoc est, in arbore viridi & fertili. Quod igitur beneficium consequatur pius, qui pendet è solo verbo Dei, hic tertius versiculus similitudine exponit. Sicut enim arbor viridis, & fertilis, quæ plantata est in loco irriguo, non sic arefcit ante tempus, vt folijs destituatur, sed profert suo tempore copiosum fructum: ita homo pius, qui comparat vitam suam è solo verbi Dei præscripto, teneri non potest, quin quauis occasione insignes quasque virtutes autore Spiritu sancto præstet. Nunc enim promissioni seu Euangelio Dei tam constantem adhibet fidem, vt nullis aduersis patiatur se ab ea diuelli. Nunc ex fide inuecat Deum ardentissimis votis: nunc patienter suffert afflictiones: nunc magna charitate complectitur, non amicum tantum, sed etiam inimicum: nunc prosequitur hominem proximum quoquo officiorum genere potest: denique eò tantum spectat, eò tendit, vt nihil, nisi quod rectum & honestum, & cum virtute est, faciat. Hic est huius bonæ arboris fructus. Porro autem hic fructus non tantum in hoc consistit, quod pius piam & honestam ducat vitam, sed etiam quod habeat felicem rerum suarum successum: Omnia, inquit, quæcunque faciat, prosperabuntur. Hoc prorsus illud est, quod Moyses dicit: Si audieris vocem DOMINI Dei tui, atque custodias omnia mandata eius, benedictus eris in ciuitate, benedictus in agro, benedictus fructus ventris tui, & fructus terræ tuæ, &c. Sed cur prius accidant etiam maledictiones & afflictiones, alias erit expendendum. Nunc in hoc Psalmo pergemus. Et hætenus absoluta est prior pars Psalmi.

C

Posterior

POSTERIOR PARS.

Constat & hæc pars tribus versiculis, quibus Spiritus sanctus dehortatur nos à sectanda impietate. Sicut autem antea cohortatus est nos ad sectandam pietatem, argumento ab vtilitate ducto, ita nunc dehortatur nos ab impietate, argumento ducto ab aduersis, & supplicijs, quæ sectatores impietatis manent.

4. *Non sic impij, sed sunt sicut palea, quam proijcit ventus.*

Pij habent prosperum rerum suarum euentum, & sunt benedicti. Impij autem non sic prosperabuntur nec benedicentur. Quid autem de ipsis fututum sit, explicat similitudine. Sicut enim magnus cumulus pulueris, aut palarum, & quisquiliarum, videtur quidem quasi constans quispiam & firmus monticulus, qui non possit loco suo dimoueri: sed si adoriatur eum ventus, ita disijcitur, vt nescias, quò vel minimus puluisculus peruenerit: ita se habet res impiorum, videntur quidem aliquandiu florere, videntur felices esse, sed postquam Deus patefacit aduersus ipsos iram suam, & insufflauerit in eos vento seueritatis suæ, tanto turbine inuoluuntur, vt conijciantur in perpetuum exitium. Porro quo certius nobis interitus impiorum ob oculos ponatur, solenne est Spiritui sancto, infelicem impiorum euentum comparisonibus & similitudinibus adumbrare. Iob. 21. Erunt (impij) sicut palea ante faciem venti, & sicut fauilla, quam turbo dispergit. Et Psal. 36. Tanquam fœnum velociter arescent, (facientes iniquitatem,) & quemadmodum ossa herbarum cito decident. Psal. 67. Sicut deficit fœ-

mus,

mus, deficiant, sicut fluit cera à facie ignis, sic pereant peccatores à facie Dei. Psal. 128. Fiant (peccatores,) sicut fœnum tectorum, quod priusquam euellatur, exaruit, de quo non implebit manum suam, qui metet. Esa. 29. Sicut somniat esuriens & comedit, cum autem fuerit expergefactus, vacua est anima eius: & sicut somniat sitiens & bibit, & postquam fuerit expergefactus, lassus adhuc sitit, & anima eius vacua est, sic erit multitudo omnium gentium, quæ dimicauerit contra montem Zion. His autem & id genus alijs similitudinibus, Spiritus sanctus idcirco utitur, ut eo efficacius à sectandis impiorum exemplis deterreamur, & in officio pietatis contineamur.

5. *Ideo non resurgent impij in iudicio, neq; peccatores in consilio iustorum.*

Quid igitur dicemus? Num soli pii resurgent in notissimo iudicio, à morte, non aut impij? Certè & pii & impij resurgent: Veniet hora, inquit Christus, in *Ioan. 6.* qua omnes, qui in monumentis sunt, audient vocem filij hominis: & prodibunt, qui bona fecerunt, in resurrectionem vitæ, qui verò mala egerunt, in resurrectionem condemnationis. Et iterum: Cum venerit *Matth. 25.* filius hominis in gloria sua, & omnes sancti Angeli eius cum eo, tum sedebit super sedem gloriæ suæ: & congregabuntur ante eum omnes gentes, &c. Quid ergo est, quod hic versiculus dicit: Non resurgent impij in iudicio? Rectius iuxta Hebræam veritatem sic legitur: Non cōsistent impij in iudicio. Etsi enim impij resurgent à morte, tamen non consistent erecti,

non constabunt coram seuerō tribunali Dei, nec manebunt in Concilio, seu cœtu & cōgregatione iustorum, sed separabuntur ab eis ac deſcientur, & audient: Discedite à me maledicti in ignem æternum, qui paratus est diabolo & angelis eius. Sic & aliàs Psal. 5. Non habitabit iuxta te malignus, neq; permanebunt iniusti ante oculos tuos. Iob. 11. Oculi impiorum deficiunt, & effugium peribit ab eis, & spes illorum abominatio animæ. Et cap. 18. Vndique terrebunt eum (impiū) formidines, & inuoluent pedes eius. 2. Thes. 1. Qui non obediunt Euangelio Domini nostri Iesu Christi, pœnam luent, interitum æternum à facie Domini, & à gloria fortitudinis illius, &c.

6. *Quoniam nouit DOMINVS viam iustorum, via autem impiorum perit.*

Breuis epilogus vtriusq; partis, hoc enim vult dicere. Quid pluribus opus est? Meditandum est in lege DOMINI, & sectanda iustitia. Quamobrem? Quia DOMINVS nouit viam iustorum: & nō est ambulandum in impietate. Quamobrem? quia iter impiorum peribit. Nōsse autem viam iustorum, hoc loco non est simpliciter scire, sed curare, conseruare & tueri. Et via seu iter significat conatum, studia, consilia, actiones & vitam. Cum igitur dicitur, DOMINVM nōsse viam iustorum, significat, DOMINO curæ esse omnia studia piorum, & DOMINVM tueri eos in omnibus periculis & aduersis: impios autem, quia non habent Deum tutorem, & protectorem, vnā cum studijs, & consilijs suis perire.

Vfus

VSVS HVIVS PSALMI.

Habes breuem huius Psalmi primi explicationem. Sicut autem nondum satisfacimus nostro officio, si Psalmum lectione percurramus, sed etiam exigitur, vt sententiam eius recte intelligamus: ita non sufficit, vt recte eum intelligamus, nisi etiam in nostrum vsum transferamus, & ex ipso verum Dei cultum discamus. In hoc enim sumus nati, in hoc sumus renati, vt verum Deum agnoscamus & colamus. Præcipui autem cultus Dei sunt, timere Deum, agnoscere iram Dei, agnoscere misericordiam Dei, per Christum filium eius, inuocare Deum in nomine Christi, bene de clementia Dei sperare, in aduersis Deo patienter obsequi, item, proximum diligere, & eum siue amicum siue inimicum officiis nostris iuuare. Hi sunt cultus, hæc sunt sacra quæ Deo placent. Et vt ad hæc facienda & præstanda excitemur, Psalmus tum legitur tum explicatur. Nam si quis sentit, se ad singulare quoddam genus sceleris procliuem, & non admodum requirere aut curare gravitatem iræ Dei, is legat hunc Psalmum, & sententiam eius diligenter consideret, vt Spiritus sanctus habeat organon, quo excitet in ipso timorem Dei, & compescat furorem peccati. Audit enim impios, & sceleratos projici à Domino, quem admodum ventus dissipat paleas: audit sceleratos non posse coram Deo constare, sed necesse habere perire: timeat igitur DOMINUM, & fugiat scelera atque impietatem. Si alius quispiam grauibz aduersis ita tentatur, vt deliberet de deferenda sua vocatione, & officio pietatis, legat hunc Psalmum, & inspiciat senten-

tiam eius, vt Spiritus sanctus habeat organon, quo mentem ipsius ad constantiam inflammet, & in officio contineat. Audit enim DOMINVM tueri iustos, hoc est, ambulantes in lege DOMINI, & perseverantes in vocatione Dei. Audit Deum dare prosperum euentum ijs, quorum est voluntas in lege eius, & qui meditantur in verbo eius diu noctuq. Expectet igitur DOMINVM, & pergat constanter, aduersis nihil deterritus, in sua vocatione.

Alius quispiam videt impios, & sceleratos homines ducere felicem, & iucundam vitam, & sollicitatur exempla ipsorum, deserta pietate, sectari, quò se vertat, vt malis exemplis non seducatur? Sumat in manus hunc Psalmum, legat & intelligat eum. Et cum audit illum esse beatum, & habiturum felicem rerum suarum successum, non qui sequitur exempla impiorum, & sectatur peccata sceleratorum, sed qui delectatur lege DOMINI, & exercet se in obsequio verbi Dei: tunc Spiritus sanctus habet organon, quo moueat cor eius, vt nihil offensus malis aliorum exemplis, pergat in studio veræ pietatis. Hic est verus vsus Psalmorum, ad quem & lectio, & cantio, & interpretatio eorum omnis est referenda.

Psalmus

Psalmus secundus.

Quare fremuerunt gentes, &c.

*Hirsangia die 19. Iulij, Anno 1556.
explicatus.*



Psi non est in ordinem Psalmorum curiosè inquirendum, sunt enim vel ab Esdra, vel ab alio quodam, vt fortè in manum venerunt, collecti, & in vnum librum collati: tamen hic Psalmus priori cōmodè statim subiungitur. In priori enim fit mentio iustorum, & impiorum: ac illis quidem promittitur beatitudo & rerum prosperitas, hi verò deſciantur & pereunt. Nullus autem hominum verè est coram Deo iustus: Non iustificatur (inquit) in conspectu tuo omnis viuens. Quare si quis in priori Psalmo legerit de iustis, quòd omnia quæcuncq; faciunt, prosperentur, & nouit DOMINVS viam iustorum, sentiat autem se nondum verè esse in suo carne iustum, existimabit fortassis has iustorum felicitates, & benedictiones, ad se nihil pertinere. Rectè igitur & opportunè additur hic secundus Psalmus, qui est concio de Christo: vt cognoscamus, quæ sit nostra coram Deo iustitia, & vnde ea sit petenda.

Primum omnium non est dubium, quin hic Psalmus concionetur de Christo filio Dei vnico nostro
seruas

E X P L I C A T I O

serua autore. Quamquam enim Hebræi interpretes, qui post aduentum Christi scripserunt in Psalmos, torquent eum ad Dauidem: tamen alij Hebræi manifestè interpretantur eum de vero Messia. Et habemus certiora & firmitiora testimonia, quòd hic Psalmus nō sit, nisi de Christo DOMINO nostro intelligendus. Apostoli enim, qui Spiritu sancto in hunc vsum donati sunt, vt cœlestem doctrinam in orbe terrarum diuulgarent, & veras sententias Prophetarum Ecclesię traderent, exponunt hunc Psalmum perspicuè de Iesu Christo, filio Dei, seruatore nostro. Act. 4. orant Apostoli, & texunt precationem suam ex hoc Psalmo: DOMINE, inquiunt, tu es Deus, qui fecisti cœlum & terram, & omnia quæ in eis sunt. Qui per os Dauid pueri tui dixisti: Quare fremuerunt gentes, &c. Et mox: Conuenerunt enim verè aduersus sanctum filium tuum Iesum, quem vnxeras, Herodes simul & Pontius Pilatus, cum Gentibus & populis Israël, &c.

Acto. 13. Paulus concionatur in Antiochia Pisidiæ: Deus, inquit, adimpleuit filijs eorum, nimirum nobis resuscitato Iesu, sicut & in Psalmo primo scriptum est: Filius meus es tu, ego hodie genui te. Heb. 1. Cui dixit vnquam Angelorum: Filius meus es tu, ego hodie genui te? Et cap. 5. Christus non semetipsum glorificauit, vt fieret Pontifex, sed is, qui dixerat illi: Filius meus es tu, ego hodie genui te.

Cum igitur habeamus Apostolica testimonia, quæ sunt fundamentum Ecclesiæ, quòd hic Psalmus intelligendus sit, de Christo filio Dei, ne Angelus quidem, nedum impius Rabinus, qui diuersum doceat, audirendus erit.

Constat

Constat autem hic Psalmus 12. versiculis. Et summa eius hæc est. Etsi Reges, Principes & vulgus persequuntur Christum & Euangelion eius, tamen Deus tuebitur Christum suum, & propagabit Euangelion eius in vniuersum orbem terræ, ac opprimit impios persecutores: quare Principes & Reges in hoc studium incumbant, vt & ipsi Christum & Euangelion eius agnoscant, & veram salutem consequantur.

1. *Quare cumultuantur gentes, & populi meditantur euagationem.*
2. *Conueniunt Reges terræ, & Principes conferunt inter se consilia, aduersus DOMINVM, & aduersus Mes-
siam eius.*
3. *Dirumpamus vincula eorum, & proiciamus à nobis iugum
ipforum.*

Initium huius Psalmi figuratum est interrogatio-
ne: occasio igitur eius perspicua est. Dauid enim Spi-
ritu sancto excitatus, cogitauit de regno Christi, & de
Euangelio eius propagando in orbem terræ: & in-
telligit, quanta beneficia Christus afferat, per Euan-
gelium suum vniuerso mundo. Interea videt etiam,
demonstrante Spiritu sancto, quanto odio, quanto fu-
rore, grassaturi sint in Christum & Euangelium eius,
non tantum homines infimæ sortis, sed etiam Princi-
pes & Reges. Cum igitur talibus cogitationibus alis
quando occuparetur secum, erumpit tandem in hanc
manifestam vocem. Cum tanta (inquiens) sint benefi-
cia Christi, cum tanta sit eius maiestas, quid obsecro
est, quod tam virulento odio inuehantur in eum gens

D tes,

tes, populi, Principes & Reges? cur tam ardenti desiderio cupiunt eum vnà cum Euangelio eius extingui? Inducunt magno tumultu comitia, instituunt concilia & synodos, consociantur inter se, iungunt foedera, profitentur se collaturos omnes suas facultates, vires, sanguinem & vitam, vt doctrinam Euangelij radicitus extirpent: palàm affirmant, se nec velle, nec posse Christi & Apostolorum eius vincula, iuga, doctrinam, leges, excommunicationes, & condemnationes ferre. Hoc, inquit, noui isti concionatores quarunt, vt nobis è nostra dominatione proturbatis, ipsi rerum gubernacula arripiant. Dirumpamus igitur vincula eorum, quibus nos coërcere volunt, & proiciamus à nobis iugum, quod nobis imponere conantur.

Hæc vides, quæ sit fortuna regni Christi, & Euangelij eius in hoc seculo. Solent ei obsistere & exitium eius moliri, non vnus tantum & alter homo, sed totæ nationes & gentes: & inter gentes non infimi tantum homines, sed etiam Principes & Reges. Ac impij à fatana excitati, persecuti quidem sunt Christum & Euangelium eius in sanctis Patriarchis & Prophetis, ab initio orbis terræ. Postquam autem Christus ipse venit in hanc terram, & emisit Apostolos suos in mundum, satan effundit omne virus suum, per populos & Principes eorum, in Christum & Ecclesiam eius. Notæ sunt persecutiones Principum Iudaicorum aduersus Christum ipsum: nota est crudelitas Gentium aduersus Apostolos & Euangelion eorum. In actis Apostolicis Iudæi dicunt ad Paulum de Euangelio: De se scita ista notum est nobis, quod ubiq; ei contradicitur.

Et

Et in Iconio fit impetus Gentium pariter, & Iudæorum *Acto. 14.*
 rum, vnà cum Principibus suis, vt lapidarent Paulum
 & Barnabam.

Notæ sunt & historiæ, quæ testantur, quanta im-
 manitate Ethnici & Arriani sæuerint aduersus Eu-
 angelion Christi. Nota sunt etiam exempla horum
 temporum, quæ consilia, quæ comitia, quæ synedria,
 quæ bella, ad extinguendam veram lucem piæ doctri-
 næ suscepta sint. De quibus idcirco admonemur, vt
 non offendamur persecutionibus, sed vt in fide Euan-
 gelij, & officio pietatis contineamur: Hæc (inquit *Ioan. 16.*
 Christus) locutus sum vobis, vt non offendamini:
 alienos à synagogis facient vos. Et veniet tempus, vt
 quisquis interficiat vos, videatur cultum præstare
 Deo, &c.

Deinde considera, quàm peruersè iudicent impij
 de vera doctrina Euangelij. Hæc enim doctrina eò
 spectat, vt liberet homines à vinculis peccati, & sa-
 tanæ, & à iugo mortis ac inferni. Impij autem, & hos-
 tes Euangelij, vocant ipsum vinculum & iugum: si-
 cut & hoc tempore piam doctrinam vocant hæresim,
 & autorem omnis seditionis, & rerum perturbatio-
 nis. Quis igitur erit iudex de doctrina, inter pios &
 impios? num quia impij hostes & persecutores con-
 stant ex gentibus, populis, Regibus, & Principibus,
 & superant pios magnitudine, multitudine, sapientia,
 potentia, & autoritate, idcirco Christus deturbabitur
 è suo regno, & Euangelion eius extirpabitur, & Ec-
 clesia eius opprimetur? De hac re audiamus versicu-
 los, qui sequuntur.

4. *Qui habitat in cœlis, irridet eos, & DOMINVS sub-*
fannat eos.
5. *Tunc loquetur ad eos in ira sua, & in furore suo conturba-*
bit eos.

Mirandum spectaculum. Gentes fremunt, populi meditantur euagationem, seu arma exerta, Reges ineunt societatem & fœdera, Principes celebrant comitia & concilia, vt Christum DOMINI opprimant, & Euangelion eius aboleant. Iterea aut DOMINVS, qui habitat in cœlis, irridet conatus & studia eorum, & illudit consilijs atq; fœderibus illorum. Nec hoc tantum loco, sed & alias Spiritus sanctus docet, Deum ridere consilia & minas impiorum.

Psal. 36. Obseruabit peccator iustum, & stridebit super eum dentibus suis. DOMINVS autem irridebit eum, quoniam prospicit, quod veniet dies eius.

Psal. 82. Ecce inimici tui sonuerunt, & qui oderunt te, extulerunt caput. Et mox: Pone illos vt rotam, & sicut stipulam ante faciem venti. Sicut ignis, qui comburit syluam, & sicut flamma comburens montes: ita persequeris illos in tempestate tua, & in ira tua turbabis eos.

Esa. 8. Confortamini & vincemini, accingite vos, & superabimini, inite consilium, & dissipabitur, loquimini verbum, & non fiet, quia nobiscum Deus. Sed quomodo risus Dei in tanta impiorum sæuitia & crudelitate percipi potest? Petrus & Ioannes, cum in Actis Apostolicis cap. 4. conficerentur in carceres, quod adnuntiarent Christum, non viderunt nisi horrores carceris, & minas Pontificum: nec potuerunt sibi aliquid
quod

quod mitius supplicium à Pontificum ira polliceri, quàm quòd Christo DOMINO erat illatum. Quomodo tunc percipi potuit ab eis, quòd Deus irrideat impiorum consilia? Non potuit percipi sensu carnali, sed FIDE & EXPECTATIONE spiritali. In scuitia enim & immanitate impiorum, primum intueudum est FIDE in promissionem verbi Dei: & considerandum est, non quid aut effutiant aut efficiant impij, sed quid loquatur, quid polliceatur verbum Dei. Hoc autem affirmat, quòd Deus derideat consilia impiorum, quòd Deus præsto adsit in tribulationibus, inuocantium ipsum in veritate: quòd etsi multæ sint tribulationes piorum, Deus tamen eripiat eos, ex omnibus aduersis, & multa id genus alia. Postquam enim Deus reconciliatus est nobiscum, per Christum filium suum, teneri non potest, quin afflictum, inuocantem ipsum in nomine Christi, summo fauore complectatur, & ipsum in aduersis conseruet. Quare cum Deus non possit esse mendax, & Christus filius Dei non fallat, dubitari non debet, quin scuitia impiorum non queat vllum veræ salutis incommodum asferre. Deinde non est præscribendum Deo tempus, aut modus liberationis, sed patienter EXPECTANDVM. vnde & in alio Psalmo: Expecta DOMINVM, virilis *Psal. 26.* ter age, confortetur cor tuum, & sustine DOMINVM. Et apud Esaiam: In silentio & spe erit fortitudo vestra. *Esa. 30.* Fieri enim non potest, vt spes & expectatio piorum pudeat, quippe quòd fundata sit in certitudine verbi Dei. Hoc est quod versiculus huius Psalmi ait: Tunc (videlicet cum DOMINVS reuelaturus est densum & iudicium suum) loquetur ad impios persequen-

tores : in ira sua , & in furore suo conturbabit eos.

Porro autem , quò certius cognoscamus , sæuitiam impiorum aduersus DOMINVM , & aduersus Christum eius , esse vanam , & derisu potius quàm metu dignam , introducit Spiritus sanctus , Deum ipsum Patrem , de regno filij sui , & filium de mandato patris sui loquentes. Sic enim sequitur.

6. *Ego autem constitui regem meum , super Zion montem sanctum meum.*
7. *Prædicabo præceptum : DOMINVS dixit ad me , filius meus es tu , ego hodie genui te.*
8. *Postula à me , & dabo tibi gentes hereditatem tuam , & possessionem tuam , terminos terræ.*
9. *Conteres eos virga ferrea , & tanquam vas figuli confringes eos.*

Quod dicitur : Ego autem constitui regem meum , &c. vox Dei patris est , concionantis de certitudine & stabilitate regni Christi filij sui. Fremunt quidẽ gentes , tumultuantur populi , iungunt Reges & Principes fœdera aduersus Christum meum , & Euangelion eius , nihil autem conatu suo promouebunt. Non enim homo quispiam , siue Patriarcha , siue Monarcha , non angelus quispiam , siue Gabriel , siue Raphael , sed EGO , EGO , inquam , ipse constitui , ordinaui , & consecraui meum filium Christum , vt esset rex super Zion montem sanctum meum. Ego ipse decreui , vt Christus filius meus regnum suum suscipiat , concionibus , & miraculis administrandum in vrbis Hierusalem , & in monte Zion , & ex eo loco diuulgetur in vniuersum mundum.

mundum. Quis autem poterit meam constitutionem,
meam ordinationem, & meum decretum abolere?
DOMINVS exercituum (inquit Esaiás) decreuit: & *Esa. 14.*
quis poterit infirmare? & manus eius extenta: & quis
auertet eam? Et iterum: Consilium MEVM stabit, & *Esa. 46.*
omnis voluntas MEA fiet,

Hæc, de Zione & ratione regni Christi, aliquid discendum est. Nam Zion collis fuit in vrbe Hierusalem, in quo ædificata fuit arx Davidis, quemadmodum scriptum est 2. Reg. 5. & postea extructum est templum, vnde & mons sanctus vocatur. Dicitur ergo Christus ordinatus à Deo, in Regem super montem sanctum Zion, non quod dominaturus esset eo loco, pro more mundani regis: Regnum meum, inquit, non est de hoc mundo: sed quod in eo loco concionaturus esset Euangelion suum, & confirmaturus multis miraculis: Futurum quoque erat, vt ibi absolueret passionem & resurrectionem suam, qua humanum genus redimeretur à peccatis, tyrannide mortis, & satanæ, ac reconciliaretur cum Deo, & vt in eo etiam loco mitteret Spiritum sanctum discipulis, ac diuulgaret per eos Euangelion suum in vniuersum orbem terræ. Vnde in alio Psalmo dicitur: Virgam virtutis tuæ emittet *Psal. 109.*
DOMINVS ex Zion, dominare in medio inimicorum tuorum. Et Esaiás: De Zion exhibet lex, & verbum *Esa. 2.*
DOMINI de Hierusalem. Cum igitur Euangelion Christi sparsum sit, primum omnium ex Zion, in omnem orbem, & per Euangelium illud collectæ atque constitutæ sint Ecclesiæ gentium, manifestum est, quod non Roma, sed mons Zion seu vrbs Hierusalem discenda sit mater Ecclesiarum.

Quod

Quod autem dicitur: Prædicabo præceptum: **DOMINVS** dixit ad me, &c. vox Christi filij Dei est, recipientis, se obsecuturum vocationi & ordinationi Dei Patris. Tu, ô sancte Pater, præcipis mihi, vt sim Rex ille Messias, qui in monte Zion, in vrbe Hierusalem, absolutam expiationem peccatorum, & redemptionem humani gentris, ecce igitur tibi obsequentem Filium, adnunciabo hoc tuum præceptum, prædicabo hanc tuam ordinationem inter homines, dicam me non elegisse me ipsum, vt sim tuus filius, & verus Messias, sed te ipsum hoc constituisse, & dixisse ad me: Filius meus es tu, ego hodie genui te. Hoc autem non sic intelligendum est, quòd Christus tum primum sit genitus filius Dei, cum suscepit in his terris hominem: sed quòd ab æterno sit à Deo Patre suo verus Deus genitus, (hodie enim in hac locutione significat æternitatem, quippe quòd coram Deo æterno, non sit nec præteritum, nec futurum, sed omnia sint hodie, hoc est, præsentia) & quòd suo tempore assumpserit hominem ex virgine, ac declaratus sit publicè, se verum esse Messiam seu Christum, qui humanum genus cum Deo patre reconciliaret, & impetraret hominibus ius adoptionis filiorum Dei. Quod ergo in hoc Psalmi versiculo recitatur, hoc postea cum Christus baptisaretur, & in monte transfigureretur, Deus pater, de ipso palam concionatus est: Hic est, inquit, filius meus dilectus, in quo mihi complacitum est: *Matth. 3.* hunc audite. Et Christus: **MEA**, inquit, doctrina non *Matth. 17.* est mea, sed eius qui misit me. Et iterum: Sermo quem *Ioan. 7.* loquutus sum, iudicabit cum in extremo die, quia ego ex me ipso non sum locutus, sed qui misit me Pater, ipse

ipse mihi mandatum dedit, quid dicam, & quid loquar, &c. Ac rursus: Sermo quem audistis, non est *Ioan. 14.* meus, sed eius, qui misit me, Patris. Prædicaui me esse æternum filium Dei, prædicaui me esse verum illum Messiam, qui sit redempturus humanum genus. Hoc autem non ex me ipso finxi, nec mihi temerè usurpavi, sed iam antè hoc mihi mandatum fuit à patre meo datum, in secundo Psalmo, ut prædicarem, me esse diuinitus in regem Zionis constitutum, & esse vnigenitum filium Dei ab æterno.

Habes in his duobus versiculis, tria epitheta Christi. Vnum, quod sit verus ab æterno filius Dei. Alterum, quod sit Rex sancti montis Zion, hoc est, Ecclesiæ Dei. Tertium, quod sit prædicator, seu concionator, hoc est, sacerdos: sacerdotis enim est concionari & docere. In filio Dei agnoscenda est omnipotentia, in Rege agnoscenda est gubernatio & defensio, in sacerdote agnoscenda est placatio & expiatio peccatorum, atq; reconciliatio cum Deo. Quare si credimus in Christum, habemus omnipotentem gubernatorem & defensorem, ac propitiatorem, ut iam nihil nobis metuendum sit, etiamsi fractus illabatur orbis. Quod verò amplius additur: Postula à me, & dabo tibi Gentes, &c. iterum vox patris est, excipientis vocem filij, & promittentis ei pro obedientia eius regnum omnium gentium. Cum enim filius Dei receperit se in præcedenti versiculo obsecuturum præcepto Dei patris sui, & suscepturum officium prædicandi Evangelij, & redimendi humani generis, teneri non potest pater, quin vicissim compenset ei hanc obedientiam. Sicut ergo quondam, cum Abraham susceperet, ad obse-

E quendum

quendum vocationi Dei, filium suū faciendum. Deus tanta obedientia delectatus, exclamat: Per memetipsum iuravi, quia fecisti hanc rem, benedicentur in semine tuo omnes gentes: ita & in hoc loco, postquam audit tam promptam filij Dei obedientiā, continuo effundit in ipsum beneficia sua, plenis manibus, & promittit ei hæreditatem omnium gentiū: Postula, inquit,

Pal. 71. à me, & dabo tibi pro hac insigni tua obedientia, hæditario iure regnum omnium gentiū: Dominare à mari (vt alius Psal. dicit) vsq; ad mare, & à flumine vsq; ad terminos orbis terrarum. Quod si Gentes fuerint tibi inobedientes, nec agnoscent te verum ipsarum Dominum, iubeo, opprimas, & conteras eas ferro sceptri: & sicut lutea vasa, à figulis facta, pedibus conculcari, & facile confringi solent, ita tu rebelles

Esa. 60. Gentes confringes. Gens enim & regnum, (vt Esaias postea ait) quod non seruiert tibi, peribit: & Gentes (tibi repugnantes) solitudine vastabuntur. Hæc ita recitantur, perinde ac si Christus dominaturus esset inter Gentes, mundano more, & oppressurus inobedientes, corporalibus armis, & externo bello. Sic & in alio

Psal. 109. Psalmo, de victoria Christi dicitur: DOMINVS à dextris tuis confregit in die iræ suæ Reges, iudicabit in nationibus, implebit ruinas, conquassabit in terra capita multorum. De torrente in via bibet, hoc est, tantum sanguinis hostium effundet, vt ex eo fiat torrens, ex quo bibere posses. Ideo exaltabit caput tanquam

Esa. 63. victor & triumphator. Et apud Esaiam: Saluauit mihi brachium meum, & indignatio mea ipsa auxiliata est mihi, & conculcaui populos in furore meo, & inebriaui eos in indignatione mea, & detraxi in terram vir-

tutem

rum eorum. Quid hæc aliud crepare videntur, quam externa bella & cædes? Sed Christus interpretatur cum dicit: Regnum meum non est de hoc mundo. Sicut ergo Christus rex quidem est, non est autem mundanus, ita accipit dominationem gentium hæreditario iure, non mundano, sed cœlesti modo; & bellum gerit, contra aduersarias gentes, non corporalibus, sed spiritualibus armis. Tunc enim accepit hæreditatē Gentium, & tunc gessit bellum contra Gentes, cum misit Apostolos suos in orbem terræ, & collegit Ecclesiam suam, per Euangelion, ex omni natione, quæ sub cœlo est. Euangelion enim de Christo, sceptrum illud ferreum, & gladius est, quo Christus Gentes ita debellauit, & expugnauit, vt nullum regnum in terris fuerit, ex quo non reportauerit sua spolia: Euangelion (in *Colos. 1.* quit Paulus) prædicatum est apud vniuersam creaturam, quæ sub cœlo est. Et paulo antè: Euangelion fructificat in toto mundo. Hoc certè est in regno Christi, capere Gentes, & terminos terræ in hæreditatem, & conterere hostes, videlicet prædicare Euangelion inter Gentes, & colligere ex eis Ecclesiam Christi, vt quotquot crediderint in Christum, salutē consequantur: qui verò non crediderint, pereant. Sic Petrus & alij Apostoli, cōmiserunt in die Pentecostes magnum prælium, cum collegerunt ad Ecclesiam Christi circiter ter mille homines. Sic Paulus magnum fecit prælium in vrbe Corinthiorum, cum in ea Euangelion Christi ita prædicaret, vt multi agnoscerent Christum per fidem, & ditarentur per eum omni genere cœlestium donorum. Quare cum Prophetæ concionantur, de bellis per Christum gerendis, intelligamus ea

gerenda, non gladio corporali, sed spirituali, qui est verbum DOMINI: & Gentes in hæreditatem accipiendas, non armis corporalibus, sed cœlestibus, quæ sunt Euangelion de DOMINO nostro Iesu Christo. Cum autem talis ac tantus sit Christus filius Dei, sicut nunc Spiritus sanctus commemorauit, quid faciant Reges, Principes, & Gentes, ne & ipsi conterantur, & tanquàm vasa figulina confringantur? Sequitur.

10. *Et nunc Reges intelligite, erudimini iudices terra.*
11. *Seruite DOMINO in timore, & exultate in tremore.*
12. *Osculamini filium, ne quando irascatur, & pereatis subito: quia exardescet breui ira eius. Beati omnes qui confidunt eo.*

Apostrophe, ad Reges & Principes, qua admonentur, vt non insaniant aduersus Christum, & Euangelium eius: sed vt sapiant, & discant Christum filium Dei rectè cognoscere. Seruite, inquit, DOMINO in timore, & exultate ei in tremore. Hoc versiculo nonnulli abutuntur, ad stubiliendam dubitationem de gratia & fauore Dei erga credentes in ipsum. Existimant enim ita seruiendum esse Deo, vt interea timeamus, & dubitemus de voluntate eius erga nos. Time re autem & tremere, hoc loco non est dubitare, sed est colere, reuereri, & obedire. Vnde Gen. 31. vocat Iacob Deum timorem Isaac, hoc est, Deum quem Isaac colit, & reueretur. Et Psal. 29. Timent me mandato hominum, hoc est, colunt & reuerentur. Et cap. 11. dicit, Christum repleri Spiritu timoris DOMINI. Nunquid vt Christus dubitet de fauore patris erga se? Nihil minus, sed vt colat patrem, & obediat vocationi eius
summa

summa reuerentia. Quare cū Psalmus hortatur Reges & Principes, vt seruiant DOMINO in timore, & exultent ei cū tremore, exigit, vt colant DOMINVM prompta obedientia, & venerentur eum magna animi reuerentia. Nam quemadmodum pius filius parentem ita veneratur, vt non dubitet quidem de paterno erga se affectu: interea autem magno studio curat, vt non offendat animum parentis, inobedientia aut sceleribus, hoc enim est timere parentem, & ad sermones eius tremere, non seruili, sed filiali affectu: ita Spiritus sanctus exigit à Regibus & Principibus, imò ab omnibus hominibus, vt concipiant certissimam fiduciam de misericordia Dei propter Christum, & accedant ad thronū gratiæ, alacri animo, & hilari mente: sed ita, vt timeant, & tremant, hoc est, non dubitent de clementia Dei, sed obediant vocationi Dei, magna cura & reuerentia: ne ignauia & inobedientia sua tam clementem Deum, & indulgentem patrem ad iracundiam prouocent. Reges autem & Principes tunc dicuntur Deo seruire in timore, & exultare ei cum tremore, primum cū ipsi Christum & Euangelion eius agnoscunt. Deinde cū aperiunt portas suarum regionum prædicationi Euangelij: & curant, vt Ecclesia recte doceatur: ac summam operam dent, ne vel ipsi, vel subditi eorum aduersus Deum peccent. Et additur: Osculamini filium, sic enim legi debet, pro eo quod vetus translatio habet: Apprehendite disciplinam. Osculari autem hoc loco significat, approbare, fauere, & grato animo excipere: Osculetur me (inquit canticum Salomonis) osculo oris sui, hoc est, approbet regnum meum, & faueat ei. Sic & hoc

loco, cum Spiritus iubet Reges & Principes osculari filium, iubet eos agnoscere Christum filium Dei, & fauore suo prosequi Euangelium eius, ac omnem suam operam eò conferre, vt gloria Dei promoueat, & Ecclesia Christi salutem consequatur. Etsi enim Ecclesia conseruatur diuinitus, nec sustentatur humana ope, tamen Spiritus sanctus vult, vt & Principes populorum, conferant studium suum, ad conseruandam Ecclesie salutem, ne audiant, quod Mardocheus Regine Esther recitat: Si nunc silueris, liberabuntur Iudæi per aliam occasionem: tu autem & domus patris tui peribitis: Non enim dubito, quin ad hunc vsum ad regnum veneris, &c.

Esth. 4.

Vides autem ex his versiculis, non tantum Episcoporum, verumetiam Regum & Principum officium esse, vt cognoscant de vera doctrina in ecclesia Christi: & curent, vt non tantum priuatim ipsi pietatem sectentur, sed etiam vt populus Deum recte colat, & summa eum reuerentia veneretur.

Porro quod additur: Ne pereatis subito, quia exarscet breui ira eius. Beati omnes qui confidunt eo, planè illud ipsum est, quod Christus ipse postea, cū in hunc mundum venisset, exposuit: Nō misit, inquiens, Deus filiū suum in mundū, vt condemnet mundū, sed vt mundus seruetur per eum. Qui credit in eum, habet vitam æternam, qui non credit, iam condemnatus est.

Ioan. 3.

Et Ioannes Baptista: Qui credit Filio, habet æternam vitam, qui non credit, ira Dei manet super eum. Et Paulus Rom. 10. Qui confidit in eum, non pudebit.

VSVS HVIVS PSALMI.

Etsi suus singulorum penè versiculorum vsus iam aliquo

aliquo modo ostensus est, tamē addamus etiā generalem Psalmi huius vsum. Concionatur autē Psalmus de persecutionibus aduersus Christum & Euangelion eius, ac docet, regnum Christi constare, etiā in medio inimicorum eius. Utamur igitur hoc Psalmo

1. Aduersus offendiculum, quo perturbamur, cum audimus, Iudeos horrendis blasphemijs insectari Christum, & cupere nomen eius extinctum. Quid enim est, quod Deus tolerat in Iudæis tantas blasphemias? Non tolerat, quod approbet, sed tolerat, quod scriptum sit: Gentes & populos seuituros aduersus Christum, donec veniat nouissimus dies.

2. Contra offendiculum, quo imbecilles sollicitantur approbare impietatem Mahumeticam seu Turcicam, propterea quod Turca reportet multas insignes victorias à Christianis, & insultet victis: Vbi est, inquit, Christus tuus? cur non te adiuvat? Cogitant igitur imbecilles fide, quod si religio Mahumetica non esset verè pia, professores eius non essent tam fortunati. Sed huic offendiculo medetur hic Psalmus. Sic enim olim à Spiritu sancto definitum est, fore, vt Christus & Euangelion eius conculcentur à Gentibus, populis, Regibus & Principibus.

3. Contra offendiculum, quo abiecti homines excitantur, vt existiment, Euangelion Christi, non esse verum Euangelion, propterea quod vident Pontifices, & magnum numerum Principum, non solum non agnoscere, verumetiam persequi Euangelion: & magnam partem Christianorum non tantum contemnere, sed etiā abominari piam Euangelij doctrinam, & turpissimam vitam ducere.

Et

Et omnino generaliter prodest hic Psalmus, aduersus omnia offendicula, quæ oriri solent ex cruce, passione & aduersis, quæ acciderint in hoc seculo, tam Christo ipsi, quam Ecclesiæ eius. Sic enim iam olim dictum & definitum est, quod oporteat, & Christum, & Ecclesiam eius pati, Sed quemadmodum Christus est victor omnium passionum, ita & vera eius Ecclesia erit victrix. Quare feramus passiones obedienter, & perduremus in officio pietatis, vt vnâ cum Christo triumphemus.

Psalmus tertius.

DOMINE quid multiplicati sunt, &c.

In Monasterio ad blauum fontem, die 29.

Augusti, Anno 1556.

explicatus.



Aria sunt Psalmorum argumenta. Alius est doctrina Decalogi, alius doctrina Euangelij, alius exhortatio vel ad fidem, vel ad aliud genus virtutis, alius gratiarum actio, alius precatio, alius querela. Hic autem Psalmus tertius est confessio fidei constantis in afflictionibus: & precatio pro defensione aduersus hostes, siue corporales, siue spirituales. Quanquam enim inscriptio significat, Dauidem tum primum ad hanc precationem excitatum esse, cum à filio suo Absolone

solone è regno eijceretur, & in exilium proficisceretur, quæ historia scripta est 2. Reg. 15. tamen res ipsa testatur, quòd Dauid non dissimilia precatus sit, cum circumdatus est, vel à satellitibus Saulis, vel à Philistinis, aut alijs stoltis: & quòd sit precatio vniuersæ Ecclesiæ, tam publicè quàm priuatim, qua petitur defensio contra omnes hostes pietatis, siue illos externos & mundanos, siue rectores tenebrarum, & spirituales astutias in coelestibus. Summa enim huius Psalmi hæc est. Multi quidem impij hostes affligunt me, multi aduersarij adoriuntur me crudeliter, & minantur mihi, non solum temporarium, sed etiam perpetuum exitium: ego verò nihil mihi metuo ab eis, etiamsi essent multæ myriades. Quid ita?

1. Quia DOMINVS Deus scutum meum est.
2. Gloria mea est.
3. Exaltat caput meum.
4. Exaudit me cum inuoco eum.
5. Sustentat me, siue eam cubitum, & dormiam, siue iterum surgam: siue viuam, siue moriar.
6. Percutit in maxilla omnes aduersarios meos, & conterit dentes eorum.

Quare non dubito, quin DOMINVS sit me in medio omnium inimicorum meorum conseruaturus.

1. DOMINE quàm multi sunt, qui affligunt me? quàm multi insurgunt aduersum me?
2. Quàm multi dicunt animæ meæ: Non est ei salus in Deo.

Descriptio grauissimæ tentationis. Primum enim persequuntur me, nō vnus aut alter tantum, sed MVL-

TI. Et cum ter faciat mentionē **MULTORVM**, significat se affligi, non à decem tantum aut viginti aduersarijs, sed à multis myriadibus, quasi diceret, Persequuntur me non vnum tantum genus hominum, sed comitia Principum, synodi seu concilia Pontificum, coetus populorum, adeoque supremi & infimi. Deinde non simpliciter dicit: Multi habent me odio, sed, affligunt me, & insurgunt aduersum me. Si essent homines abiectionis sortis, & prosequerentur me ira, & odio, possem fortassis contemnere: cogitarem enim vanam esse sine viribus iram, & negligerem caniculæ latratum, aut muscæ infestationem. Nunc autem qui me odio habent, tanta sunt potentia, vt quod animo instituunt, rebus perficere queant. Sic enim me odio habent, vt etiam me persequantur, & affligant: Eiciunt me in exilium, armati quærunt me ad necem: nec dubium est, quin si me caperent, dissecarent. Postremo rebus per se asperis, addunt verba asperiora, & grauiora. Dicunt animæ meæ: Non est ei salus in Deo. Non solum enim proscribunt me, vt nusquam habeam tutum locum in terris, verum etiam condemnant me publicis decretis, tanquam hæreticum, & affirmant, me abiectum esse à Deo: ac non homines tantum, verum etiam Deum ipsum ita me odisse, vt non pateat mihi aditus in regnum cœleste. Hæc aduersariorum meorum vox & sententia, non sonat mihi tantum in auribus corporis, sed etiam in auribus animæ. Hæc ita dicunt, vt penetrent intimos recessus, & latebras cordis. Sic enim tristis animus affectus est, vt si ei interdicitur terra, existimet sibi etiam cœlo interdictum: & quod homines potentes, sapientes, docti & sancti asseuerant, putet esse

esse oraculum Spiritus sancti, & à Deo ipso pronunciatum.

Quod autem David in his duobus versiculis conqueritur, hoc etiam potuit conqueri Dominus noster Iesus Christus, qui ut est caput Ecclesiæ, ita expertus est omnia genera hostium: hoc possunt conqueri omnes credentes in Christum. Habes tentationem seu afflictionem. Audiamus nunc fiduciam, & consolationem.

3. *Sed tu DOMINE, scutum meum, gloria mea, & exaltator capitis mei.*
4. *Voce mea ad DOMINVM clamo, & exaudit me de monte sancto suo.*
5. *Ego eo cubitum, & dormio, & surgo, quia DOMINVS sustentat me.*
6. *Non timeo myriades populorum, qui undiq; me circumdant.*

Quas tentationes & afflictiones, in superioribus versiculis commemoravit Psalmus, sunt ignita iacula satanæ. Inspiciamus igitur, quo scuto, quo clypeo hæc iacula excipiat: Tu DOMINE, inquit, scutum meum. Non in hoc tantum loco, sed etiam alias sæpè tribuitur DOMINO Deo nostro cognomen scuti seu clypei, ut 2. Reg. 22. DOMINVS scutum meum, & cornu salutis meæ. Et iterum: Scutum est omnium sperantiũ in se. Et Psal. 27. DOMINVS adiutor meus, & protector meus: pro (protector,) Hebræus habet scutum. Sicut & Psal. 143. Misericordia mea & refugium meum, susceptor meus, &c. hoc est, scutum meum. Sciamus igitur, quod DOMINVS Deus noster dicatur scutum.

tum, non solum hoc nomine, quia suscepit credentes & sperantes in ipsum, tuendos & protegendos, verum etiam, quia tuente, & protegente eo, nihil est nec in coelis, nec in terris, nec in inferis, quod nocere, & veræ salutis incommodum afferre possit: Si Deus (inquit Paulus) pro nobis, (hoc est) si Deus est scutum nostrum, quis contra nos? Contorqueat in nos satan tela, vel paupertatis, vel infirmitatis, vel mortis, vel etiam perpetuæ condemnationis, Deus est scutum nostrum: quia Deus est qui dicit, qui sanitati restituit, qui vivificat, qui & perpetuo saluat. Quare cum obijcitur aduersis, assumendum est hoc scutum per fidem, ut possimus, sicut Paulus loquitur, omnia ignita tela nequissimi extinguere.

Ephes. 6. Deinde vocat Deum gloriam suam. Gloria alias dicitur vel honor, quo benemeritus afficitur: vel fama, quæ de homine virtutibus ornato, & benemerito spargitur. In hoc autem loco gloria pro virtutibus ipsis gloriosis sumitur. Dicit ergo Deum esse gloriam suam, propterea quod quas Deus habet virtutes, eas omnes in usum & salutem piorum ita conferat, ut ipsis confidere, & de ipsis gloriari queant. Magna virtus Dei est clementia & misericordia: hæc virtus pijs ita exposita est, ut possint gloriari, se habere Deum misericordem & clementem. Insignis Dei virtus est omnipotentia: hæc virtus est gloria piorum, quia Deus hæc ita utitur, ut pii in omnibus suis aduersis, mirabiliter seruentur, & gloriose liberentur. Egregia virtus Dei est iustitia: sed hæc virtus non est tantum gloria Dei, verum etiam gloria piorum, quod Deus reputet etiam ipsos iustos. Denique Deus est omne bonum, unde

de & nomen *ἡ ἀγάπη* sortitus est : quæ etsi propria est gloria Dei, (nemo enim bonus, nisi solus Deus) tamen *corrupta distinctio* hanc gloriam cum pijs ita communicat, vt possint & *ab ἀγάπῃ.* debeant sibi de bonitate Dei, bona quæuis polliceri & sperare, eoque nomine gloriari.

Præterea Dauid vocat Deum exaltatorem capitis sui. Fuerat enim Dauid fratrum suorum minimus, (hoc est) abiectus, & quasi capite diminutus: & tamē Deus exaltauit caput eius, ac prætulit eum omnibus fratribus suis. Agebat pastorem ouium, quod videbatur officium vilissimum: Deus autem abduxit eum ab ouium caula, ad regis aulam. In aula citharam pulsabat: sed Deus deducit eum à plectro ad sceptrum. Vagabatur in exilio incertis sedibus: sed Deus reuocat eum ad thronum Regium. Hoc verè est deiectum caput exaltare. Nam hoc est ingenium Dei, quòd deiciat superbos, & exaltet humiles ac deiectos. Quare cum Dauid antea sæpè reipsa expertus sit, Deum esse exaltatorem deiectorum, sperat se in præsentī quoque afflictione, qua vel à suo ipsius filio è regno eiiciebatur, vel alio calamitatis genere opprimebatur, diuinitus liberandum & exaltandum. Talis exaltator est Deus erga filium suum DOMINUM nostrum Iesum Christum, sic militèr omnium credentium in Christum.

Deinde sperat etiam hoc nomine salutem in medio inimicorum suorum, quòd habeat Deum tam propiciū, vt quoties eum inuocat, exaudiat eum de monte sancto suo. Montem sanctum vocat, vel cælum, in quo Deus habitare dicitur, iuxta illud 2. Paral. 6. Tu exaudies de cœlo, firmissimo habitaculo tuo. Et Psal. 56. Clamabo ad Deum altissimum, Deum qui benefecit

cit mihi. Misit de cœlo, & liberauit me, &c. Vel montem Zion, in quo arca propitiatorij à Dauide collocata, & postea templum à Salomone excitatum fuit. Arca enim propitiatorij erat in populo Israël diuinitus instituta, quemadmodum scriptum est Exod. 25. vt & DOMINVS ex eo oracula daret, & publica sacrificia in eo loco, in quo erat arca posita, celebrarentur, & Israëlita Deum publicè inuocaturi, ad eum locum in exilio respicerent, 3. Reg. 8. Adumbrauit autem DOMINVM nostrum Iesum Christum, sicut Paulus Rom. 3. exponit. Quare cum dicitur, precaturos Deum, debere inuocare eum Deum, qui habitat in monte sancto Zion, & Deum precantes exaudire in monte sancto, vbi erat arca propitiatorij, significat, Deum inuocandum esse in nomine Iesu Christi, & Deum exaudire inuocantes propter Christum: adeoque planè illud est, quod Ioannis 16. dicit Christus ipse: Amen, amen dico vobis, si quid petieritis Patrem in nomine meo, dabit vobis.

Ioan. 16.

Adhæc, Dauid consolatur se in medio inimicorum suorum ex eo, quod habeat DOMINVM sustentantē & conseruantem ipsum, siue eat cubitum & dormiat, siue euigilet & cubitu surgat: siue viuat, siue moriatur, hoc est, in omnibus vñs & actionibus suis, in omnibus prosperis & aduersis. Pij enim DOMINO Deo ita curæ sunt, vt etiam capilli capitis eorū, sint coram eo numerati, & sicut passer non cadit super terram sine Deo patre, ita Deus omnia, quæ pñs accidere solent, gubernat: Siue viuimus, inquit Paulus, siue morimur, DOMINI sumus. Quare etsi Dauid tenetur compræhensus in medio inimicorum suorum, tamē cum DOMINVS sit scutum

Rom. 14.

scutum & gloria eius, & exaltator capitis eius, atq; exaudiat ipsum cum inuocat eum, tueaturq; eum in omnibus actionibus eius, verè exclamat, quod additur & sequitur: Non timeo myriades populorum, qui vndique me adoriuntur, & in me grassantur. Sed quomodo putat (inquit quispiam) Dauid sic de Deo gloriari, & in medio inimicorum confidere, cum fuerit peccator, qua fronte audet sibi polliceri de Deo, quod sit scutum, & gloria sua, cum sciat, se odium inimicorum, exilia, & alias calamitates, propter peccata sua meritum? exulat ab aula Regis Saulis, & quæritur ad necem. Et si autem non designauerat aduersus Saulem tantum malum, cur exularet & occideretur: tamen fas tetur ipse: Non iustificatur in conspectu tuo omnis uiuens. Et: Si iniquitates obseruaueris DOMINE, DOMINE quis sustinebit? Ejicitur è regno à suo ipsius filio, & nouit, se hoc supplicium propter adulterium & homicidium esse meritum. Quomodo ergo potest confidere in medio inimicorum suorum, quod DOMINVS sit protector, exauditor & sustentator eius? Et si in hoc studium semper cuiq; incumbendum est, ne patiatur, ut homicida, aut fur, aut maledicus, aut ἀνομιώτατος, quemadmodum Petrus loquitur, tamen siue quis innocens coram hominibus, siue nocens patiatur, non est in inuocatione Dei confidendum humana iustitia, & innocentia, sed tantum iustitia DOMINI nostri Iesu Christi, qui factus est nobis sapientia, iustitia, sanctificatio & redemptio. Quare Dauid, etsi conceptus est in peccato, & meritis est sceleribus suis supplicia, tamen quia resipiscit, agnoscit peccata, & rejicit expiationem eorum in semen Abraham, & in filium sibi promissum,

missum, hoc est, in Christum, idcirco inuocat Deum, vt scutum, vt protectorem, vt sustentatorem suum, alacri & plena fiducia. Accedit ad Deum non inebriatus opinione suæ ipsius iustitiæ, qui sunt mores Hypocritarum, sed fide iustitiæ Christi, qui ex posteritate sua venturus erat: & confidit Deum patrem cœlestem esse scutum, gloriam, exaltatorem, exauditorem & sustentatorem suum, non propter vlla sua ipsius merita, sed tantum propter Christum, quem solum agnoscit suam expiationem, & propitiationem, de quo in alio Psalmo dicit: Tu es sacerdos in æternum secundum ordinem Melchisedech.

7. *Exurge DOMINE, serua me Deus meus, quoniam percutis omnes inimicos meos, in maxilla dentes impiorum conteris.*

In hoc versiculo, vbi nos vertimus: Percutis omnes inimicos meos in maxilla, pro (in maxilla,) vetus translatio habet (sine causa.) Existimo autem interpretem, pro לִי Lehi, quod significat maxillam, legisse לִיִּי Leriq, quod significat in vanum, aut frustra, seu sine causa. Ac fortassis interpres putauit, se virgulam supra Iod videre, quæ significet deesse literam Quiff: & Heth non habere appendicem, sed esse literam Res, hoc videlicet modo לִי.

Querelam ergo, & confessionem fidei sequitur precatio. Non potest enim precatio ad thronū gratiæ peruenire, nisi ex fide. Fidē autē confirmant promissiones, quas subiūciunt, & in memoriā reuocant epitheta, scuti, exaltatoris, exauditoris, sustentatoris, & alia, quæ
in sus

in superioribus versiculis de Deo sunt recitata. Et ut precator fidem suam amplius confirmet, addit: Quoniam percutis omnes inimicos meos in maxilla, & dentes impiorum conteris. Intelligit autem nomine maxillæ & dentium, potentiam, & crudelitatem, & immanitatem suorum aduersariorum. Sicut enim sæuæ, & iratæ bestię, Leo (exempli gratia) aut Vrsus, aut Lupus, grassantur, præsertim famelici, aperto risu, diductis maxillis, & exertis dentibus in obuios seu homines seu bestias, ut eas crudeliter dilanient: ita hostes piorum expediunt omnem suam potentiam, & immanitatem ad opprimendos pios.

Psal. 21. Aperuerunt super me os suum, sicut Leo rapiens & rugiens.

Et iterum: Salua me ex ore Leonis, & à cornibus vnicornium humilitatem meam.

Promisit autem Deus, se fore tutorem piorum in omnibus aduersis, & contra omnes ipsorum hostes.

Deut. 20. DOMINVS Deus vester in medio vestri est, & pro vobis contra aduersarios dimicabit, ut eruat vos de periculo.

Deut. 28. Dabit DOMINVS inimicos tuos, qui cõsurgent aduersum te, corruentes in conspectu tuo.

Leuit. 26. Ponam tabernaculum meum in medio vestri, & non abijciet vos anima mea. Ambulabo inter vos, & ero Deus vester, vosq; eritis populus meus.

Quare cum Dauid addit precationi suæ, quod DOMINVS percutiat inimicos suos in maxilla, & conterat impiorum dentes, cõmonefacit se harum promissionum, ut maiori animi fiducia Deum inuocet. Conscipit autem fiduciam non tantum ex promissionibus

G Dei,

Dei, verum etiam ab exemplis, quæ Deus in ipso clarescènter hæcenus ediderat. In 1. Reg. 17. dicit **DOMINVS**: Qui eripuit me de manu Leonis, & de manu Vrsi, ipse me liberabit de manu Philistæi huius. Et 2. Reg. 7. ait **DOMINVS** ad Dauid: Fui tecum in omnibus, vbicunq; ambulasti: & interfeci vniuersos inimicos tuos è facie tua, &c. Sic & Paulus 2. Cor. 1. concipit fiduciam de futura liberatione, ab exemplis priorum liberationum: Deus est, inquit, qui ex tanta morte eripuit nos, & eripit, in quo spem fixam habemus, quòd & posthac erepturus sit.

Cæterum cum dicitur **DOMINVS** percutere maxillas hostium, & contere Dentes impiorum, non sic intelligendum est, quòd impij in quavis persecutio ne, qua sæuiant in pios, conterantur, & opprimantur semper diuinitus, externo, mundano, aut etiam coram mundo admirando modo, sicut perijt Pharaon cum exercitu in mari rubro, & conciderunt muri Iericho, & oppressus est Goliath à Dauide: aut sicut manus Regis Ieroboam exaruit, cum extenderet eam, & iuberet Prophetam **DOMINI** comprehendere: aut sicut descendit ignis de cœlo, & deuorauit quinquagenarios, qui instituerant capere Prophetam Eliam. Etsi enim Deus solet aliquoties mirando modo pios è manibus impiorum in hoc seculo liberare, & impios horribiliter punire, tamen solet & hoc euenire, quod Hieremias admiratur: Via, inquit, impiorum prosperatur, bene est omnibus, qui præuaricantur, & iniquè agunt. Et Abacuc: Quare, inquit, respicis contemptores, & taces conculcante impio iustiore semper? Non est igitur sentiendum, quòd Deus dentes impiorum

rum

rum semper ita conterat, vt pii reportent externam, & visibilem seu mundanam victoriam: sed quod pii semper spiritali & cœlesti modo, in medijs aduersis liberentur: vt etiamsi impij opprimant ipsos externa crudelitate, & adimant eis hanc corporalem vitam, tamen pii in morte ipsa, ad veram & æternam vitam seruentur, & impij perpetuò intereant. Sic Abel seruatus est, cum trucidaretur à fratre suo Cain. Sic seruati sunt Prophetæ & Apostoli, cum occiderentur ab impijs suis persecutoribus. De hac re Christus dicit: Ne metuatis vobis ab his, qui occidunt corpus, animam verò occidere non possunt.

8. *DOMINI est salus, & super populum suum benedictio
tua.*

Epiphonema, quo David accommodat priuatum suum exemplum vniuersæ ecclesiæ Dei. Sententia enim eius hæc est: Ego hætenus professus sum, quod Deus sit scutum meum, gloria mea, exaltator capitis mei, exauditor precum mearum, & sustentator ac defensor meus, Non est autem sentiendum, quod Deus sit tantum erga me talis, tamq̃ liberalis seruator, sed est etiam talis erga vniuersum populum suum. DOMINI enim, siue apud DOMINUM, est salus, apud DOMINUM est benedictio. Nec est ita apud DOMINUM, vt eam sibi tantum retineat, aut cū paucis tantum communicet: sed communicat salutem & benedictionem suam cum vniuerso populo suo. Primum ergo nomine benedictionis, hoc loco intelligas non tantum bonam optionem, quæ verbis fieri solet, sed maxime omnium

eam benedictionem, de qua extat promissio ad Abrahamum: In semine tuo benedicentur omnes gentes. Hic per benedictionem intelligenda sunt omnia cœlestia bona, quæ Christus nobis impetrauit, videlicet, Deus propitius, remissio peccatorum, iustitia, liberatio ex omnibus periculis, conseruatio in morte, & hæreditas cœlestis regni.

Deinde cum dicitur, apud DOMINUM esse salutem & benedictionem, admonemur, vt non quæramus salutem, & benedictionem nostram, vel apud homines in his terris, vel apud sanctos in cœlis: sed tantum apud DOMINUM Deum nostrum, in nomine Christi filij sui.

Postremo cum additur, super populum suum, significat, salutem & benedictionem Dei, non ad vnum tantum & alterum hominem, sed ad vniuersam ecclesiam Dei pertinere. Quare in hoc vnum studium incumbendum est, vt simus membra veræ ecclesiæ Dei, per fidem in Christum filium Dei. Sic enim fiet, vt & Deus nobis faueat propter Christum, & audeamus firma fiducia, atq; alacri mente, inuocatione nostra ad thronum gratiæ eius accedere, & certam ab ipso salutem & benedictionem expectare.

VSVS HVIVS PSALMI.

Hic Psalmus utilis est ad consolandum imbecillum animum in omnibus aduersis & afflictionibus. Sunt enim varia genera hostium, quibus affligimur. Vnum genus est externorum hostium, ac eorum hominum, qui insidiantur non fortunis tantum nostris, sed etiam
vitæ

vita nostra. Si quis ergo hoc genere hostium affligitur, properet ad hunc Psalmum, & inueniet in eo consolationem.

Alterum genus est externarum calamitatum, vt morborum, egestatis, direptionis facultatum, incensdiorum, & aliarum id genus ærumnarum. Quisquis ergo his aduersis perturbatur, sumat hunc Psalmum in manus, & recitet eum ex fide, vt perturbationi animi sui medeatur.

Tertium genus est spiritualium hostium, videlicet peccati, satanæ, mortis, & dolorum inferni. Hæc est afflictio longè omnium grauissima. Quare si quis tenetur in conscientia sua, quod peccata sua sint maiora, quàm quæ à Deo remittantur, quod propter peccata sua tradendus sit potestati satanæ, vt æterna morte pereat, & in ignem inferni cōiciatur, is suscipiat hunc

Psalmum orandum, vt Spiritus sanctus habeat organon, quo fidem eius confirmet,
& eum in officio pietatis
conseruet.

G , Psalmus

Psalmus quartus:

Cum inuocarem exaudiuit, &c.

*In Monasterio Bebenhusen, die 8. Nouemb.**Anno 1556. explicatus.**Ephes. 4.*

Hic Psalmus habet auctoritatem, non solum hoc nomine, quod contineatur in scriptis Prophetis, & inscribatur Dauidi, verum etiam quod mentio eius fiat in scriptis Apostolicis. Paulus enim hortaturus Ephesios, ut non laxent frenata cupiditati iracundiæ, utitur testimonio & versiculo huius Psalmi: Irascimini, & nolite peccare.

Inchoatur autem & concluditur precatione. Sed interea reprehendit Epicureos, qui omnes vitæ suæ rationes eo dirigunt, ut ducant in bonis, sicut Iob loquitur, dies suos, & fruantur mundana felicitate: ac si quid aduersi inciderit, non quærunt inuocatione sua diuinam opem, nec expectant auxilium cœleste, sed erumpunt in execrationes, properant in paupertate aut negotiatione ad imposturas, & ad periuria: in morbis ad magiam & incantationem: in repulsa ad amarulentiam, & virulentiam: in malorum affectiones, ne ad priuatam vindictam, denique vel ad satanam ipsum potius, si modo spes aliqua liberationis ab ipso affulgeat, quam ad DOMINUM Deum confugiunt.

Repre

Reprehendit igitur Psalmus hanc Epicureicam impietatem, & commemorat, quæ officia in aduersis sint præstanda, vt veram habeamus tranquillitatem.

1. *Cum inuoco, exaudi me Deus iustitia mea, in angustia dilata me, miserere mei, & exaudi orationem meam.*

Precationes Psalmorum non sunt tam oscitanter inspicendæ, vt existimemus, eas esse tantum personas les, & pertinere duntaxat ad Dauidem, vel alium vnum & alterum Psalmi autorem: sed sentiamus, singulas preces esse singulas promissiones Dei, & confortationes, quibus Spiritus sanctus instituit etiam nos excitare, vt confidamus clementia Dei in aduersis, & inuocemus nomen Dei. Sic enim Psal. 49. dicitur: Inuoca me in die tribulationis, & eruam te, & honorificabis me. Et apud Ioëlem cap. 2. Omnis qui inuocauerit nomen DOMINI, saluus erit. Et Christus Matth. 7. Quisquis petit, accipit: & quicumque quaerit, inuenit, & pulsanti aperietur. Quare cum initio huius Psalmi Dauid dicit: Cum inuoco, exaudi me, &c. idem est, ac si diceret: Deus exaudit inuocantem, dilatat angustum, miseretur miseri, & exaudit orantem.

Deinde precator vocat Deum iustitiam suam. Sciamus igitur Deum esse nostram iustitiã, primum quod iustificat, hoc est, absoluit nos à nostra iniustitia, propter Christum filium suum, si in eum credimus, & tunc etur nos propter ipsum iuste ac probe in omnibus aduersis, atque exaudit propter eum preces nostras. Promisit enim, se in semine Abrahamæ, quod est Christus, benedicturum omnes gentes: quo dicto promisit, se omnes

se omnes eos, qui credunt in Christum, summa fauore profecuturum: vt & remittat eis peccata, & exaudiat eorum preces, ac defendat ipsos in omnibus afflictionibus propter Christum. Iusti autem & probi est, seruare quod promisit. Quare Deus rectè dicitur nostra iustitia, quòd quæ in Christo promisit, fideliter & cōstanter impleat. Deinde dicitur etiam nostra iustitia, quòd cum credimus in Christum, donat nos Spiritu sancto, vt pugnemus cum peccato, & obediamus iustitiæ. Et si enim non possumus in hac mortali vita perfectam in operibus nostris iustitiam præstare, tamen grata est Deo obedientia nostra propter Christum, in quæ credimus, & in quo habemus non tantum condonationem imperfectionis nostræ, verum etiam abundantiam omnis iustitiæ coram Deo. De plenitudine eius, inquit Ioannes, nos omnes accepimus. Et. 1. Cor. 1. Christus factus est nobis à Deo sapientia, iustitia sanctificatio, & redemptio.

Ioan. 1.

Præterea cum dicitur: In angustia dilata me, sumpta est metaphora ab externis locis. Sicut enim qui sit captiuus, constringitur vinculis, & conijcitur in angustum locum, si verò è captiuitate liberatur, deducitur ex angusto loco, in loca spaciōsa & latè patentia: ita qui in animo suo affligitur, dicitur esse animo angusto, hoc est, exiguo & contracto: cum autem accipit consolationem, & afficitur gaudio, tunc animus dicitur dilatari, & quasi ex angusto carcere in latum, & liberum campum deduci. Latini dicunt, in tristitia contrahi frontem, in lætitia autem exporrigi frontem. Phrasis autem sacre Scripturæ, vtitur verbo dilatandi, & latitudinis, pro lætari & lætitiā. Esa. 60. Dilatabitur,

bitur, hoc est, lætabitur cor tuum, quando fuerit ad te conuersa multitudo maris. Et Psal. 17. Eduxit me in latitudinem, hoc est, lætitiā.

Sed nec hoc oscitanter considerandum est, quod additur in hac precatione: Misere mei. Quoties enim Psalmi appellant misericordiam Dei, sentiendum est, quod abijciant omnia hominum merita, & celebrent gratuitam tantum clementiam Dei. Itaq; mentione misericordię diuinę in precibus, semper subintelligendum est illud apud Daniele cap. 9. Non in iustificationibus nostris prosternimus preces ante faciem tuam, sed in miserationibus tuis multis.

2. *Filij hominum quousq; gloria mea erit opprobrio?
Diligetis vanitatem? Quæretis mendacium?*

Pro (filij hominum) Hebræus habet, filij viri, seu filij Principum, vt filij hominum sint homines vulgares: filij autem viri sint Principes populi, iuxta Psal. 48. Quicq; terrigenę, & filij hominum. Pro quo in Hebręo habetur, siue filij hominum, siue filij viri, hoc est, siue vulgares homines, siue Principes. Est & hæc Hebræa phrasis, filij hominum, pro hominibus: filius mortis, pro morti destinato: filius iniquitatis, pro homine iniusto. Cum autem Christus Dominus noster vocatur filius hominis, mutuatum est à Daniele cap. 7. Ecce in nubibus cœli quasi filius hominis veniebat, &c.

Vbi nos transtulimus: Quousq; gloria mea erit opprobrio, ibi vetus æditio habet: Usquequò graui corde, vt quid diligitis, &c. Hæc autem lectionis varietas venit ex eo, quod pro מְבֹרָא לִימָא Cebodi Lich

H limma,

limma, quod significat, gloria mea ad ignominiam, vetus interpres diuinit vocabulum לִחְלִימָא Lichlimma, in duas dictiones, & pro לֵב legit לֵב Leb, quod significat cor. Nam כָּבוֹד Cabod, significat tam gloriam, quam grauitatem, & postea לָמָּה Lamma, significat quare. Itaq; pro quousq; gloria mea ad ignominiam, translatum est, vsq; quo graui (vel graues) corde, quare diligitis, &c.

Facit autem Psalmus in hoc secundo versiculo Apostrophē, à precatione ad exprobrationem impietatis Epicuræorum. Hi enim, vt non agunt gratias Deo in rebus prosperis, ita non inuocant Deum in aduersis: sed contemnunt Deum, & loquuntur contumeliose de verbo Dei, siue voce annuntietur, siue Psalmis recitetur, siue Psalterijs, aut alijs instrumentis Musicis cantetur. Interea autem si prospera acciderint, confidunt sua potentia, sapientia, opulencia, sanitate, amicitia, & societate: quæ etsi sunt dona Dei, nobis in legitimum vsum concessa, tamen si quis ijs confidat, non sunt nisi vanitas & mendacium, quæ non possunt hominem à periculis liberare. Si verò aduersa contigerint, confugiunt vel ad humana auxilia, vel ad illegitima ac satanica sacra, quæ & ipsa sunt vanitas & mendacium, quippe quod tantum absit, vt hominem in aduersis iuuent, vt potius eum in grauiora aduersa, adeoq; in perpetuum exitium coniiciant. Reprehendit ergo Psalmus impietatem eorum, & damnat studia ipsorum: Filij hominum, (inquiens) hoc est, vos Principes populi, quousq; gloria mea erit vobis opprobrium? Gloriam suam vocat, vel Deum ipsum, sicut in superiori Psalmo: Tu DOMINE scutum meum

um es, & gloria mea: vel verbum Dei, quod Deus magna gloria, & multis miraculis in populo Israël patefecit: vel etiam Psalterium, quo Dauid Psalmos ad gloriam Dei, & eruditionem atq; consolationem afflictorum cecinit. Sic Psal. 29. Vbi cantet tibi gloria mea, hoc est, Psalterium meum. Et Psal. 56. Exurge gloria mea, exurge Psalterium & Cythara. Sensus igitur est: Quousq; tandem vos Principes contumeliosè loquimini de verbo Dei? Quousq; fastiditis & deprauatis pia carmina, quæ ex verbo Dei ad doctrinam & consolationem hominum cantari solent? Et quis tandem erit aut finis aut modus vestræ vanitatis ac mendaciæ? si quid aduersi acciderit pijs, rideatis fiduciam eorum, quam habent in promissiones Dei: & applauditis vestræ felicitati, perinde ac si Deus deseruisset pios, & à parte tantum vestra staret. Si verò vobis aliquid aduersi acciderit, non est ibi vlla vel fiducia, vel inuocatio nominis Dei, sed sollicita inuestigatio aut humani aut diabolici auxilij. Hoc enim est diligere vanitatem & quærere mendacium. Quid ergo faciant amatores vanitatis, & sectatores mendaciæ? Sequitur.

3. *Agnosceite, quod mirabiliter gubernat DOMINVS spiritum suum: DOMINVS exaudit me, cum clamo ad eum.*
4. *Ira scimini & non peccetis: loquimini in cordibus vestris, & super cubilibus vestris, & silete.*
5. *Sacrificate sacrificia iusta, & sperate in DOMINVM.*

Reprehensionem sequitur doctrina. Reprehendens enim cuiusvis est, & facillimum: ostendere autem

viam & rationem, qua quod est reprehensione dignū, emendetur, hoc demum est prudentis consultoris. Docet igitur Psalmus his tribus versiculis, & recitat officia, quæ amatores vanitatis, & sectatores mendaciū præstare debent, vt faciant cultus Deo gratos, & probent Deo obsequium suum. Ac primum in aduersis & afflictionibus non est murmurandum aduersus Deum: sed est agnoscendum, quòd Deus mirabiliter gubernet pios, & exaudiat inuocantes ipsum ex fide. Hic enim est mos, hæc est consuetudo Dei, quòd conuincat quidem vt pii affligantur, conseruet autem eos mirando modo: ac videatur quidem preces eorum fastidire, exaudiat autem eos clementissimè. Et si enim pii non statim sentiunt exauditionem & salutem, pro sua ipsorum voluntate, tamen liberatio, & salus eorum reposita est apud Deum, & suo tempore ita pateat fiet, vt omnibus sit admirationi & stupori. Intuere exempla. An non Deus mirabiliter gubernauit ac seruauit Iosephum, Dauidem, Daniele, & Christum ipsum filium suum? Hic orat patrem suum: Pater, iniquiens, venit hora, glorifica filium tuum, vt & filius tuus glorificet te. Sed mox post hanc orationem rapitur ad tribunalia Pontificum, & Pilati, atq; crucifigitur. Quis igitur diceret, orationem eius esse exauditam, & non potius à Deo spretam atq; contemptam? sed Deus conseruat eum, pro more suo, mirabiliter, non tantum in libertate, verumetiam in captiuitate, in cruce, in morte. Resurgit enim tertia die, & effertur in tantam maiestatem, vt in nomine eius omne genus flectat, coelestium, terrestrium ac infernorum. Quare si quid aduersis inciderit, non sunt diligenda vana auxilia,

auxilia , nec sunt sectanda mendacia : sed agnoscendum est consilium Dei , quo solet aduersa immittere , videlicet non vt perdat , sed vt seruet & glorificet : & inuocandum est nomen DOMINI , certa fiducia concepta , quod , qui percussit , idem & sit sanaturus , quem admodum Propheta loquitur.

Osee 6.

Deinde : Irascimini , inquit , & nolite peccare. Hoc est alterum officiũ , quod afflicti præstare debent. Lex Dei exigit quidem , vt diligamus Deum , ex toto corde , & nihil sit in omnibus humanis viribus , quod pugnet cum voluntate Dei. Sed quia concipimur & nascimur in peccato , & natura nostra corrupta est per peccatum originale , quod abluitur quidem per Baptismum REATV , manet autem ACTV , idcirco exigatur , vt affectui huius peccati non obsequamur. Sententia igitur huius quarti versiculi est : Si in aduersis exurgunt in vobis prauis affectus , vel incredulitatis , vel impatientiæ , vel blasphemiar , vel iracundiæ , & indignationis tam aduersus Deum , quam aduersus homines , date operam , vt compescantur , & non indulgeatis cupiditatibus eorum. Non est quidem virus lenter irascendum contra Deum , & homines : Si autem caro suggerit iram aut virulentiam , non est peccandum , non est peccato obsequendum. Nec est in cordibus & in cubilibus noctu loquendum , seu murmurandum , & cogitandum de vindicta , de referenda iniuria , de sectanda vanitate & mendacio. Si verò hyperuerſi motus exoriuntur in cordibus , non est eis respondendum , aut obsequendum , sed tacendum , & in silentio ac spe auxilium Dei expectandum. Vetus interpres pro (silete) habet compungimini. Vocabus

lum enim *an* Dom, vtrunq; significat. Sed eadem est sententia. Si aduersa excitauerint in vobis iratum & virulentum animum, nolite ei locum dare, sed cōpungimini, hoc est, dolere de peccato, pœniteat vos peccati, & expectate tranquillo ac quieto animo cœlestem opem. Ac planè idem vult hic versiculus, quod alias dicitur, Gen. 4. Sub te sit appetitus eius (peccati) & tu domineris ei. Et Rom. 6. Ne regnet peccatum in mortali vestro corpore, vt obediatis cupiditatibus eius. Et cap. 8. Debitores sumus, non carni, vt secundum carnem viuamus. Sed quid faciendum est, vt si irascimur, non peccemus, aut non obediamus cupiditati iræ? Hic primum reuocandum est in mentem Euangelion Christi, videlicet, quod Christus reconciliauerit nos sanguine suo, cum Deo Patre eœlesti, & impetrauerit nobis condonationem peccati, ac adoptauerit nos in cohæredes suos. Deinde inuocandus est Deus, vt donet nos Spiritu sancto suo, quò furorem peccati, quod nobis condonatum quidem est, adhuc autem hæret in carne nostra, compescamus. Interea quoq; cogitandum est, quanto periculo, quanto salutis nostræ dispendio, indulgeremus affectui iræ: Qui in carne sunt, inquit Paulus, Deo placere non possunt. In carne autem esse, est affectui carnis morem gerere. Et iterum: Si secundum carnem, inquit, vixeritis, moriemini. Hæc & alia id genus, si serio cogitauerimus, exhibebimus Spiritui sancto suum organon, quo in nobis affectum iræ compescat. Sed de hac re concionatur etiam quintus huius Psalmi versiculus, qui sequitur.

Sacrificate (inquit) sacrificia iusta, & sperate in DOMINO.

Hoc enim est præcipuum officium, quod Deus in aduersis à nobis exigit, videlicet, vt sacrificemus sacrificia iusta. Et quæ sunt hæc sacrificia? An non ea omnia, quæ lege DOMINI præscribuntur, sunt iusta? An non holocausta, & quæ vocant pacifica, fuerunt suis temporibus, quibus & hic Psalmus initio scriptus est, Deo grata, ideoq; iusta? Quod ad ipsorum quidem ordinationem attinet, fuerunt diuinitus instituta, non autem peragebantur à quibusuis diuinè & iustè. De nonnullis enim Esaias dicit: Quò mihi multitudo vi- *Esai. 1.*
ctimarum vestrarum? Et Hieremias: Nō sum locutus *Hier. 7.*
cum patribus vestris, & non præcepi eis, in die qua eduxi eos de terra Ægypti, de verbo holocaustorum & victimarum. Quid ergo est, quòd idem sacrificium holocausti, nunc sit iustum, nunc iniustum? Discrimen huius rei exponit Paulus ad Rom. 9. Israël, inquit, qui sectabatur legem iustitiæ, ad legem iustitiæ non peruenit. Propter quid? quia non ex fide, sed tanquàm ex operibus legis. Sacrificia igitur legis tunc sunt iusta, cum fiunt ex fide. Iustus enim ex fide sua uiuit. Et tunc sunt in nobis iniusta, cum fiunt tanquàm ex operibus legis. Sacrificare autem holocaustum ex fide, est credere in Christum, cuius vmbra fuit holocaustum: & confirmare hanc fidem externo sacrificio holocausti, & sacrificare tanquàm ex operibus legis, est confidere merito huius operis, & polliceri sibi benedictionem Dei, propter opus sacrificij. Cum igitur Psalmus iubet nos sacrificare sacrificia iusta, iubet nos credere in Christum, quem sacrificia legis adumbras

runt, & confidere, quòd propter hunc Christum Deus pater cœlestis sit nobis propitius, & adoptet nos in hæredes regni sui. Vnde quod in hoc versiculo additur, est iusti sacrificij explicatio: Sperate, inquit, in DOMINO. Hoc est, sacrificate sacrificium iustum, videlicet credere in Christum DOMINUM nostrum, & confidere clementia eius, atq; ex hac fide, sperare & expectare in aduersis cœlestem opem.

6. *Multi dicunt, quis ostendet nobis bonum? leua super nos lumen vultus tui DOMINE.*
7. *Da letitiam in corde meo, dum frumentum eorum, & mustum eorum multiplicantur.*
8. *In pace simul cubo & dormio, quia tu DOMINE solus in spe constituis me.*

Redit Psalmus ad Epicuræos seu contemptores verbi Dei, & confert eos *cōcedō*, cum affectu piorum, vt exponat, vnde vera animi tranquillitas & felicitas veniat: Multi, inquit, dicunt. Non enim pauci sunt, qui contemnunt Deum & Verbum eius, sed multi, iſq; insignes, & in hoc mundo tam autoritate & doctrina, quàm sapientia & potentia præstantes: Videtis, inquit Paulus, vocationem vestram, quòd non multi sapientes, &c. Et Christus: Introite per arctam portam, quoniam lata est porta, multiq; ingreditur per eam. Hi ergo multi, cum audiunt confidendum esse diuina clementia, in omnibus aduersis, & in Deo sperandum, Deum enim esse liberalissimum omnium bonorum datorem, continuo solent tales conclusiones rejicere. Quid? inquit, quis est ille Deus, a quo

quo mihi esset bonum expectandum? Putas ne Deum in cœlis tam ociosum esse, vt curam tui habeat in terris? Existimas ne ab ore altissimi, sicut in Threnis Hier *Tbren. 3.* remiæ dicitur, egredi bona ac mala? Ego mallem, inquit, abundare frumento & musto, quàm multa gratia & fauore Dei tui. Det vitam, det opes, animum mihi æquum ipse parabo. Hæc & id genus aliæ sunt impiorum Epicureorum voces, qui contempto Deo, student tantum externæ & mundanæ tranquillitati. Sed nihil est magis impium. Non enim conditi sumus ad imaginem terrenorum bonorum, sed ad imaginem Dei, vt Deum cognoscamus, & cœlestibus bonis ornemur. Longè autem aliter affecti sunt pii. Hi enim non contemnunt Deum, sed inuocant eum: non inhiant terrenis, sed cœlestibus bonis: nō quærunt tranquillitatem & felicitatem suam in externis facultatibus, sed in gratia & fauore Dei. Leua, inquit, super nos lumen vultus tui DOMINE. Illi Epicuræi quærunt frumentum & mustum, putant se felices, si his rebus in hoc seculo abundauerint. Nos autem quærimus felicitatem nostram tantum in lumine vultus tui. Si tu respexeris nos benigno vultu, si tu faueas nobis, & fueris nobis propitius & misericors, nihil prorsus deerit nobis. Non quærimus lætitiā carnalem, qualem mundus sectatur, sed lætitiā conscientię. Latentur illi propter suas diuitias, propter abundantiam frumenti & vini sui. Da tu mihi lætitiā in corde meo, exhilara conscientiam meam tuo fauore, & sufficiet mihi gratia tua: fieri enim non potest, quin in pace simul cubem & dormiam, parato & tranquillo sim animo, si tu tuo spiritu spem & fiduciam meam firmaueris.

I Obserua

Obserua igitur ex his versiculis. Primum, quale sit ingenium Epicuræorum, quod contemnant verum Deum, & sectentur ventrem suum pro Deo. Cū enim collocent omnem suam felicitatem in terrenis bonis, & ventri tantum studeant, non sunt cultores veri Dei, etiamsi Deum ore profiteantur, sed sunt Idolatræ. Deinde obserua etiam piorum ingenium. Hi enim hoc præcipuè quærunt, vt habeant Deum propitium, & tranquillam conscientiam coram Deo. Non possumus autem habere Deum propitium, nisi propter Christum per fidem. Quare hoc est studium piorum, vt cognoscant, & credant in Christum, & habeant propter Christum pacem erga DOMINVM Deum nostrum. Dubium autem non est, quin Paulus nonnulla ex his versiculis mutuatus sit, cum ad Rom. ca. 5. scriberet: Iustificati, inquit, ex fide, PACEM habemus erga Deum per DOMINVM nostrum Iesum Christum. Et mox: Gloriamur sub spe gloriæ Dei. Spes autem non pudefacit. Hoc enim illud est, quod Psalmus dicit: In pace dormiam, & requiescam, quia tu solus constituis me in spe, videlicet, vt non pudeam. Et alias: In te DOMINE speravi, non confundar in æternum.

VSVS HVIVS PSALMI.

Magnum est offendiculum, quod in hoc seculo bene est impijs, & abundant frumento & vino: male autem pijs, qui ne panem quidem quotidianum parare possunt. Cum igitur cor nostrum offensum impiorum felicitate, & nostra infelicitate, irritatur ad amarum
lentiam,

lentiam, indignationem & conuitia, accipiamus hunc Psalmum in manus, recitemus eum magna animi attentione: vt exhibeamus Spiritui sancto organon, quo turbulentos motus animi compescat, & nos in officio pietatis contineat.

Psalmus quintus.

Verba mea auribus percipe, &c.

*In Monasterio Maulbrunens. in die Andrea Apostoli,
Anno 1556. explicatus.*



Hic Psalmus est precatio aduersus sycophantas, & calumniatores. Et quantum ex Psalmo ipso colligi potest, excitatus est Dauid ad istam precationem hac occasione.

Postquam enim factus est ex pastore ouium aulicus apud Regem Saulem, addidit insignia stratagemata, & consecutus est tantam nominis claritudinem, vt etiam fieret gener Saulis. Sed quia virtutem solet comitari inuidia, & Deus exercet pios varijs periculis, Rex ipse Saul inflammatus odio & inuidia, insidiatur vitæ Dauidis. Metuebat enim, ne se eiecto, Dauid rerum Israëlitarum potiretur. Quod cum sycophantæ aulici animaduernerent, addunt oleum camino, augent suspiciones Saulis, & calūniantur Dauidem tãquam regni affectatorem. Quare

Dauid necesse habuit salutem sibi fuga querere, & in exilio aliquot annis magno vitæ suæ periculo incertis sedibus vagari. Itaq; cum varijs ærumnis exilijs affligeretur, & meminisset calumniarum, quibus sycophantæ animum regis Saulis, sua sponte ad suspicionem affectati regni procliue inflammabant, suscipit hanc precatorem coram Deo effundendam, qua petit, vt Deus ipsum ab impijs calumniatoribus tueatur.

Potest & huius Psalmi occasio orta esse ab eo exilio, in quod Dauid à suo ipsius filio Absolone eiectus est, & non solum coram audijs, vir sanguinum, & vir Belial, verumetiam traducebatur à calumniatoribus, apud vniuersum Israël, quod esset cessator, & administrandæ iustitiæ neglector.

Constat autem hic Psalmus syllogismo, cuius propositio, quam Dialectici vocant Maiorem, recitatur in priori parte Psalmi, videlicet.

Deus non delectatur iniquitate: non commoratur apud Deum maligni: & odio habet omnes operantes iniquitatem: perdit omnes qui loquuntur mendacium: abominatur viros sanguinum & dolosos, sycophantas & calumniatores. Hæc est Maior propositio. Sequitur deinde in altera parte Psalmi Assumptio, quam vocant propositionem Minorem, videlicet.

Mei inimici sunt viri iniqui, sunt maligni, sunt mendaces, non est in ore ipsorum veritas, cor eorum vanum est, guttur eorum est sepulchrum patens, linguis suis dolose agunt, hoc est, sunt sycophantæ & calumniatores. Hæc est Assumptio seu propositio Minor, cui postremo additur complexio seu conclusio syllogismi, videlicet,

Ergo

Ergo iudicabis seu punies illos Deus, & abijcies eos secundum multitudinem impietatum eorum. Sed audiamus nunc Psalmum ipsum.

1. *Verba mea auribus percipe Domine, intellige musitationem meam.*
2. *Intende ad vocem clamoris mei, rex meus, & Deus meus, quoniam te oro.*
3. *DOMINE mane exaudi vocem meam, mane asto tibi, & respicio (ad te) vel expecto (à te auxilium.)*

His tribus versiculis non continetur nisi propositio precationis, quam sequitur postea syllogismus. Ac propositio precationis repetitur quater, alijs quidem verbis, sed eadem semper sententia. Satis enim fuisset, si dixisset: Verba mea auribus percipe DOMINE, sed addidit secundo: Intellige musitationem seu murmur meum, hoc est, tacitas meas preces. Nec hac appendice contentus, addit tertio: Intende ad vocem clamoris mei, rex meus, &c. Sed & quarto adiicit: DOMINE exaudi mane, hoc est, cito seu tempestiue vocem meam. Non est autem ociosa repetitio, sed significatio ardentis desiderij, quo inuocatur Deus, vt exauditionem harum precum non rejiciat in longum tempus, sed properet ad conferendam opem, aduersus virulentos calumniatores, & impios persecutores.

Porro autem Psalmus non simpliciter inuocat Deum, vt preces suas exaudiat, verumetiam addit rationes exauditionis. Magna enim est imbecillitas fidei nostræ, & cum respicimus peccata nostra, vix audeamus oculos nostros ad Deum attollere. Quare in in-

uocatione considerandæ & intuendæ sunt rationes, quibus fides nostra confirmetur, & Deus ad exaudiendas preces excitetur.

In hoc autem Psalmo recensentur duæ rationes ex auditionis. Vna interferitur in propositione inuocationis: Quoniam te, inquit, oro, & tibi asto, atq; ad te respicio. Hæc est enim vna e præcipuis causis, cur Deus preces afflictorum exaudiat. Iussit enim, vt in aduersis non alium vel Deum vel hominem, sed ipsum verum DOMINUM Deum nostrum inuocemus. Non habebis, inquit, alienos Deos coram me. Et: DOMINUM Deum tuum timebis, & illi soli serues. Non ibitis post Deos alienos. Et: Inuoca me in die tribulationis, eruiam te, & honorificabis me. Per quem autem & cuius nomine Deus velit inuocari, exposuit Christus filius Dei Ioan. 16. Amen dico vobis, quæcunq; petieritis patrem in nomine meo, dabit vobis. Quare cum Deus mandauerit, se in nomine Christi filij sui, non alium, nec alio nomine inuocari, confirmatur fides, si in inuocatione admonuerimus nos ipsos huius mandati, & expectemus certa fiducia opem ab eo, qui & sic inuocari voluit, & sic inuocanti auxilium promissit.

Sequuntur alij tres versiculi, in quibus altera ex auditionis causa, & Maior propositio syllogismi continetur.

4. Quoniam non es Deus, cui placeat impietas, nec commoratur tecum malus.
5. Non consistunt iniusti ante oculos tuos: odio habes omnes facientes iniquitates.

6. Perdis

6. *Perdis loquentes mendacium: virum sanguinum, & dolosum abominatur DOMINVS.*

Hæc est altera causa, cur petat & speret exauditionem. Precor DOMINE, vt me citò exaudias, & aduersus calumniatores, ac insidiatores vitæ meæ defendas. Quia mei calumniatores sunt viri iniqui, maligni, iniusti, mendaces, viri sanguinum, & dolosi, & non habent erga me iustam causam, sed iniustam & iniquam: calumniantur me, & accusant affectati regni, sed faciunt mihi luculentam iniuriam. Deus autem non delectatur hominibus iniquis, non approbat, nec adiuuat iniustas causas impiorum aduersus pios: non committit, vt mali habeant locum apud ipsum: non potest ferre, vt prauī & peruersi homines diu ob oculos ipsius versentur. Magno enim odio persequitur iniquos, & solet perdere, non iuuare mendaces sycophantas, ac prorsus detestatur homines vafros, dolosos, virulentos, & sanguinarios. Reliquum igitur est, quod cum mei calumniatores sint viri iniusti, iniqui, mendaces, & sanguinarij, nec habeant aduersum me iustam causam, certam spem concipiam, Deum non ipsos, sed me adiuturum, & in periculis conseruaturum.

Sunt autem hi tres versiculi testimonium, quod peccatum non sit Deo imputandum. Deus enim non est, nec autor, nec approbator peccati, sed diabolus, quemadmodum Christus apud Ioannem, cap. 8. conuincitur. Deinde observa ex hoc loco, quod qui versantur non in vocatione Dei, sed in malis & iniustis causis, non possint Deum inuocare: nec preces eorum
exaudi

exaudiuntur, nisi resipiscant. Vnde Ioannis 9. dicitur: Deus non audit peccatores, videlicet impœnitentes, qui non ambulant in vocatione eius. Audit verò pœnitentes, qui periculis obruti, conuertunt se ad Deum, & inuocant nomen eius, per Christum filium Dei.

7. *Ego autem in multitudine misericordiæ tuæ, introibo in domum tuam, adorabo ad templum sanctum tuum, in timore tuo.*
8. *DOMINE deduc me in iustitia tua, propter inimicos meos: dirige in conspectu meo viam tuam,*

Priusquam Psalmus recitat Assumptionem seu Misericordiam, repetit Propositionem precationis, in qua respondet tacitæ obiectioni. Dixit enim Deum non approbare iniquitatem, sed odisse homines iniquos, perdere mendaces & malignos, Obijciat ergo quispiam. Quid ergo tu? An non & tu es iniquus & malignus? An non & tu es peccator? Quid igitur facies? Num orabis, & inuocabis Deum fiducia tuæ ipsius iustitiæ, æquitatis & bonitatis? Nihil certè minus: sed introibo, inquit, in domum tuam secundum multitudinem misericordiæ tuæ, non iustitiæ aut bonitatis meæ. Et adorabo te, versa ad templum seu tabernaculum tuum facie, in timore tuo, hoc est, in agnitione peccati mei, & clementiæ tuæ. Deduc ergo me in iustitia tua, non mea. Et dirige coram me viam tuam, non meam, gubernam, rege & tuere me, secundum iustitiam, bonitatem, probitatem, constantiam, & veritatem tuarum promissionum, & ostende mihi tuam viam, qua ambulem, & vocationem tuam sequi pergam.

Docent

Docent autem hi duo versiculi, quod in optimis etiam causis non debeamus fidere bonitate causæ, nec ex fiducia eius Deum inuocare, sed tantum fidere bonitate & clementia Dei, & è sola misericordiæ eius fiducia orare. Et si enim nihil nobis mali in nostra causa conscij sumus, tamen non sumus in hoc, sicut Paulus ait, iustificati. In libro Iudicum cap. 19. Israelitæ habuerunt optimam causam aduersus Beniamitas: sed quia confidebant bonitate causæ, & suis viribus, infelicitè belligerati sunt. In Deut. cap. 9. Israël itæ habent optimam causam aduersus gentes Cananæas, sed audiunt: Ne dicas in corde tuo, propter iustitiam meam introduxit me Dominus, &c. Iob 9. Si iustificare me voluero, ipse me condemnabit. Si innocentem ostendero, prauum me comprobabit. Huc etiam pertinent dicta illa Psalmorum: Non intres in iudicium cum seruo tuo, &c. Et: Si iniquitates obseruaueris DOMINE, &c. Et: Delicta quis intelligit? Ab occultis meis munda me. Hæc in quauis inuocatione habenda sunt ob oculos, vt discamus verum Dei timorem, videlicet, non vt dubitemus de misericordia & clementia Dei erga nos, nam hac certò est confidendum, in hac sola omnis fiducia nostra est collocanda: sed vt non confidamus nostra vel iustitia, vel fortitudine.

9. *Quoniam non est in ore eorum veritas, cor eorum vanum est. Sepulchrum patens est guttur eorum, linguis suis dolosè agunt.*

Hic nonus versiculus est assumptio, seu Minor propositio Syllogismi: Inimici mei (inquit) sunt homi-

K nes

nes mendaces, vani, sycophantæ, calumniatores, qui loquuntur abominanda, detestanda & dolosa. Hæc est imago & exemplar calumniatorum. Corde enim sunt vani, ore sunt mendaces, gutture sunt sepulchra patentia, hoc est, exhalantia foetidos, abominabiles, & detestandos sermones, qui vel ipsum aërem, sicut sepulchrorum foetor, inficere possent: lingua sua sunt veteratores & impostores. Quid autem hac imagine horribilius? Alias in Psalmo 56. collocantur calumniatores in catalago homicidarum. Filij hominum, dentes eorum arma & sagittæ, lingua eorum gladius acutus. Calumniatores igitur tanquam homicidæ & latrones, imò tanquam Satan ipse, qui & a calumniando nomen διαβόλος habet, fugiendi sunt.

10. *Iudica illos Deus, decidant à consilijs suis. Secundum multitudinem impietatum eorum expelle eos, quia sunt tibi rebelles.*

Complexio seu conclusio Syllogismi. Sed est iuxta Psalmorum rationem collata in formam precationis. Nam simpliciter ita diceretur. Cum Deus odio habeat impios, mei autem inimici sunt homines impij, sequitur, quod Deus, cui sunt rebelles, sit ipsos iudicaturus seu condemnaturus ac puniturus: & sicut multa est impietas eorum, ita etiam longè proſcientur à Deo in imum tartarum. Sed maluit David hanc conclusionem efferre forma precandi, quàm simpliciter recitare. Quid ergo dicemus? An non hoc præceptum: Diliges proximum sicut teipsum, iubet diligere tam amicum, quàm inimicum? Inter opera autem dilectionis etiam

etiam illud continetur, vt bene precemur deuouentibus nos, oremus pro ijs, qui lædunt & infectantur nos. Quid est igitur, quod Dauid non in hoc tantum Psalmo, verumetiam in multis alijs Psalmis imprecatur inimicis suis quæuis dira? Erubescant (inquit in sequenti Psalmo,) & conturbentur vehementer omnes inimici mei. Et Psal.30. Erubescant impij, & deducantur in infernum. Et Psal.34. Auertantur retrorsum, & confundantur cogitantes mihi mala: Fiant tanquam puluis ante faciem venti,&c. Sed facilis est responsio. Alia enim est maledictio seu execratio carnis, & illegitima, ac virulenta: alia execratio Spiritus & legitima. Sicut enim in genere homicidij aliud est legitimum, quod fit à magistratu secundum leges, & ordinationes diuinas: aliud est heroicum, vt homicidium, quo Moyses interfecit Ægyptium. Exod.2. aliud est priuatum, illegitimum, & e sola carnis vindicta, qualia sunt vulgaria priuatorum hominum homicidia, quæ in hac lege: Non occidas, sunt prohibita. Ita & in genere maledictionis seu execrationis: aliud est legitimum, quod fit publice, secundum legem diuinam, quale est, quod Deut.27. & 28. recensetur: aliud est heroicum, quod fit singulari quodam Spiritu Dei, qualis est maledictio Elisæi, qua execratus est pueros illosos, 4. Reg.2. Aliud est illegitimum & priuatum, quo homines priuatis, & carnalibus affectibus se inuicem execrantur. Et hoc est peccatum aduersus dilectionem proximi. Execrationes autem Psalmorum pertinent ad legitimum & heroicum genus: & non sunt execrationes carnis, sed Spiritus sancti. Voluntas enim & ordinatio Dei est, vt impij puniantur, ne

nomen Dei male audiat. Id quod & vetus versiculus docet, *ὁ θεὸς ὀνειδίζεται καὶ ἔνδοξος ἐν δαίμονι ἔμψυχοις*, Probrū est Deo, si res malis sint prosperæ. Quare non sunt trahendæ in generale exemplum, nec sunt imitandæ hominibus priuata temeritate: sed sunt habendæ pro cœlestibus vaticinijs, quibus excitamur ad timorem DOMINI, & ad obedientiam Deo præstandam.

11. *Latentur autem omnes qui sperant in te, in æternum exultent: & protegas eos, atq; glorientur in te, qui diligunt nomen tuum.*
12. *Quoniam tu benedices iusto DOMINE, sicut scuto bona voluntate coronas nos.*

Solenne est in Psalmis, quod cū recitantur supplicia impiorum, adiſciantur antithesi quadam beneficia piorum: vt illi quidem grauitate & magnitudine suppliciorum deterreantur ab impietate, hi autem promissione beneficiorum cœlestium in officio pietatis contineantur. Sicut ergo impij calumniatores iudicantur, puniuntur, & eijciuntur à DOMINO ex æterna cœlestium bonorum hæreditate, ita pij, qui sperant in DOMINVM, & diligunt verbum DOMINI, habent perpetuam lætitiā in conscientia sua, & defenduntur à DOMINO in omnibus aduersis: atq; gloriantur, non de sua iustitia, sed de iustitia filij Dei, gloriantur de certa & gratuita clementia Dei. Certum enim est, quod DOMINVS effundat benedictionem, hoc est, remissionem peccatorum, conseruationem in periculis, & omnia genera bonorum, super iustos, qui sunt credentes in Christum, & ambulantes in vocatio-

ne Dei:

ne Dei: ac tueatur pios gratia & clementia sua, in omnibus afflictionibus ad æternam vitam. Hoc enim est coronare pios bona voluntate, sicut scuto. Vnde & Paulus dicit: Si Deus pro nobis, quis contra nos? Benevolentia enim, & fauor Dei, est optimum scutum, quo tuti sumus aduersus omnia genera malorum.

VSVS HVIVS PSALMI.

Hoc Psalmo licebit vti, primum, aduersus sycophantas & calumniatores politicos. Itaq; potuit tali forma precandi Achimelech, & reliqui sacerdotes aduersus Doeg Idumæum vti, qui calumniabatur ipsos apud Saulem, quod conspirassent cum Davide aduersus Saulem, & essent seditiosi, 1. Reg. 22. Potuit & hoc Psalmo vti Hieremias aduersus Hieriam, qui accusabat ipsum defectionis ad Chaldæos, & coniectus est in carcerem, Hier. 37.

Deinde licebit eo vti aduersus calumniatores Spirituales, videlicet eos, qui pios doctores accusant impiæ doctrinæ, vt Apostoli contra Iudæos & Gentes, Athanasius contra Arrianos, &c.

Psalmus sextus.

DOMINE ne in furore tuo arguas me, &c.

*Hirsaugia, die 18. Decemb. Anno 1556.
explicatus.*

Tſi hic Psalmus vulgò videtur eſſe precatio pro remiſſione peccatorum, nec dubium eſt, quin ex peccatorum agnitione oriantur, non ſolum grauiffimæ tentationes, verum etiam dolores mortis & inferni: tamē quia facit mentionem inimicorum ſuorum, ac ſi *in* inſpicias, magis videtur loqui de externis ſuis perſequentoribus, quam de ſpiritualibus inimicis: Idcirco ſentiamus, quòd iuxta literam ſit precatio pro liberatione ex ijs ærumnis & perturbationibus, quibus Dauid ab aulicis ſycophantis, & ab alijs ſuis perſequentoribus affligebatur. Nam cum Dauid in exilium eiectus eſſet à Saule, magnas ibi & multas vidit miſerias. Nunc ducitur captiuus ad Regem Paleſtinarum, & periclitatur de vita: nunc audit famam, quòd Saul interfecerit octoginta Sacerdotes, & deſolauerit urbem Nobe, propterea quòd Dauidi hoſpitiū exhibuiſſent: nunc veniunt ad eum in exilium parentes & cognati eius, qui & ipſi propter eum neceſſe habebant in exilium abire: nunc exercitus Saulis ita includitur, vt de liberatione animum deſpondeat: ac breuiter,
neceſſe

neceſſe habet ſingulis momentis in exilio de vita ſua periclitari. Hæc cum veniunt ei in mentem, grauiffimè perturbatur, & ſollicitatur metuere, ne Deus tam aduerſus ipſum iram conceperit, vt non ſolum conuiueat ad externas & corporales ærumnas ipſius, verumetiam abſiciat ipſum in æternos cruciatus. Quare inſtituit precationem huius Pſalmi, & petit, vt cum ſit miſerrimus, Deus ipſum pro clementia ſua erga miſeros, tueatur.

Habet & hic Pſalmus autoritatem ſuam, non ex eo tantum, quod continetur in corpore reliquorum Pſalmorum Dauidis, ſed etiam quod Chriſtus filius Dei vſus ſit verſiculo eius: Diſcedite à me omnes, qui operamini iniquitatem, in memorabili illa concione, quam apud Matthæum cap. 5. 6. & 7. habuit.

Diuidemus autem eum in duas partes. Prior conſtat quinq; verſiculis, & eſt precatio: poſterior conſtat ſimiliter quinq; verſiculis, & eſt conſolatio.

1. *DOMINE ne in furore tuo arguas me, neq; in ira tua corripas me.*
2. *Miſerere mei DOMINE, quoniam infirmus ſum. Sana me DOMINE, quoniam conturbata ſunt oſſa mea.*
3. *Et anima mea turbata eſt valdè. Sed tu DOMINE uſq; quo?*
4. *Verite te DOMINE, & eripe animam meam. Saluum me fac propter miſericordiam tuam.*
5. *Quoniam non eſt in morte, qui memor ſit tui, in inferno autem quis conſitebitur tibi?*

In his quinq; verſiculis continetur propoſitio precationis,

cationis, & interseruntur etiam rationes precandi. Repetitur autem propositio penè septies, alijs quidem verbis, sed eadem sententia. Ne arguas me in furore. Ne corripas me in ira. Miserere mei. Sana me. Verte te ad conferendam mihi opem. Eripe animam meam. Saluum me fac. Hæc autem non est ociosa *ταυτολογία*, seu *βαρβολογία*, sed est testimonium animi valde perturbati, & cupientis opem Dei serio ac vehementissimo affectu.

Principio igitur docet nos primus versiculus, quæ modestia & obseruantia Deus sit inuocandus. Non enim simpliciter dicit: Peto DOMINE, vt nullo modo me arguas, aut corripas, sed arguas me, non autem in furore tuo. Postquam enim peccatū intrauit in mundum, intrauerunt etiam vnà cum peccato omnia genera afflictionum, Ac firma est sententia Dei: In sudore vultus tui vesceris pane tuo. Et: Terra germineabit tibi spinas & tribulos. Et Christus de Ecclesia quoque sua dicit: In mundo habetis afflictionem. Ac rursus: Si me persecuti sunt, & vos persequentur. Quare magna esset impudentia, si quis peteret à Deo, vt nullis prorsum aduersis & afflictionibus in hoc seculo corripereetur: sed siquidem ea est hominis conditio, vt in hoc seculo varijs æumnis obijciatur, petendum est, ut Deus tales æumnas non immittat nobis ex ira & furore suo, ne in ijs in æternum pereamus, sed ex clementia & misericordia sua, vt cedant nobis in salutem: sicut & Hieremias cap. 10. precatur: Corripe me DOMINE: veruntamen in Iudicio (hoc est) vsitato more, vt ferre queam, & non in furore tuo, ne forte in nihilum redigas me.

Deinde

Deinde considerandæ sunt in his versiculis rationes precandi. Recensentur autem duæ. Vna est cum dicit: Infirmus sum, conturbata sunt ossa mea. Anima mea turbata est valde, Et: Propter misericordiam tuam. Deus enim pollicitus est misericordiam, clementiam, & opem suam, ijs qui perturbato & afflicto sunt animo, & inuocant eum.

Iuxta est DOMINVS (inquit Psal. 33.) his qui recto sunt corde, & humiles spiritu, (hoc est) afflictos saluabit. Et alias: Sacrificium Deo spiritus contribulatus, cor contritum, & humiliatum, Deus, non despiciet. Cum igitur Dauid sit contrito, & humiliato corde, Deus autem sua ope, & conseruatione propinquus sit humiliatis & afflictis, iustissima causa est, cur Dauid inuocet DOMINVM, & petat cœleste ac diuinum auxilium.

Altera precandi ratio: Quoniam, inquit, non est in morte, qui memor sit tui, &c. Deus enim condidit hominem, non vt ociosus in terra vagetur, sed vt DOMINVM agnoscat, & nomen DOMINI celebret. Creauit Deus (inquit) hominem ad imaginem & similitudinem suam, videlicet in hunc vsum, vt cuius imaginem gestat, eius etiam gloriam illustret. Quid ergo, inquit prelator, me argueres & corripes, vt perirem morte, & conijcerer in infernum seu sepulchrum, cum nullus amplius mei mortui & sepulti esset vsus? Nō enim mortui, non terra obruti laudant nomen DOMINI, sed qui hac præsentī vita fruuntur. Sic & Ezechias orat: Quia non infernus inquit, (hoc est) sepultus in infimas partes terræ, confitebitur tibi, neq; mors (hoc est) mortuus laudabit te. Non expectabunt, qui des-

L scendunt

scendunt in lacum, veritatem tuam, viuens, viuens ipse confitebitur tibi, &c. Et Psal. 28. Quæ utilitas in sanguine meo, dum descendo in corruptionem? Nunquid confitebitur tibi puluis, aut annuntiabit veritatem tuam? Dicitur autem, quòd mortui & sepulti, ac in terra putrefacti, non laudent DOMINVM, nec celebrant nomen DOMINI, non quòd sancti qui sunt in coelo, non laudent Deum, omnis enim spiritus laudat DOMINVM: sed quòd mortui nullam amplius conferant externis suis officijs utilitatem, in ecclesiam Dei, quæ est in hoc mundo, nec prosint superstitibus in hac vita, vel prædicatione verbi Dei, vel alijs operibus charitatis.

6. *Laborabam gemitu meo, lauabam per singulas noctes lectum meum, lacrymis meis stratum meum rigabam.*
7. *Turbabatur à cruciatu oculus meus, canescebam inter omnes inimicos meos.*
8. *Discedite à me omnes, qui operamini iniquitatem, quoniam exaudit DOMINVS vocem fletus mei.*
9. *Exaudit DOMINVS deprecationem meam, DOMINVS orationem meam suscipit.*
10. *Erubescant, & conturbentur vehementer omnes inimici mei, vertantur in fugam, & erubescant valde velociter.*

Precationem sequitur consolatio. Psalmi enim non sunt compositi in ipsis afflictionum paroxysmis: sed postquam afflicti diuina adiuti clementia, victoriam ex afflictionibus reportarunt. Quare solent initio describere, qualis fuerit affectus ipsorum in paroxysmis: deinde addere, quanta secuta sit consolatio. Sententia igitur

igitur horum quinque versiculorum, hæc est. Ego quidem in aduersis meis tanto laboraui dolore, ut tempore paroxyfmi, singulis noctibus lectum meum lacrymis perfunderem, ac stratum meum rigarem. Tanta quoque animi ægritudine excruciatum sum ab inimicis meis, ut & lumen oculorum meorum deficeret, & capilli mei canescerent. Sed bene habet. Et si enim vos inimici mei, qui me iniquè persequimini, scœuitis in me crudeliter & immaniter, tamen necesse habetis pudefacti discedere: nihil vobis est in me iuris: non potestis me opprimere. DOMINVS enim exaudit preces meas, DOMINVS agnoscit orationem meam, & tuetur me aduersus omnes hostes meos. Reliquum igitur est, quòd necesse habeant in consilijs suis, aduersum me pudefieri & perturbari, ac sese longè à me proripere, ac extremo pudore suffundi. Ex his quinque versiculis obseruemus duos præcipuos locos. Alter est, quòd quò grauior est afflictio, quò profundior est gemitus, quò ardentiores & copiosiores sunt lacrymæ eorum, qui Deum inuocant, eò propinquius, eò etiam illustrius est auxilium Dei. Deut. 32. Ego occidam, & ego viuere faciam, percutiam, & ego sanabo, hoc est, cum Deus percutit aut occidit, tunc meditatur sanitatem, & vitam: & quò grauior est plaga, eò propior & certior est sanitas: Et 1. Sam. 2. DOMINVS deducit ad in- *Cum dupli-*
feros, & reducit, hoc est, Quò quis est deiectionis, eò *cantur la-*
propinquior est exaltatio eius. Bene igitur speremus *teres, tunc*
in aduersis, quòd quò grauiora & molestiora sunt, eò *venit Mo-*
certior est liberatio. Alter locus est antithesis *ses.*
piorum & impiorum, quæ in Psalmis est vtitissima. Pij
exaudiuntur & liberantur ex afflictionibus: impij autē

etſi aliquandiu videantur felices, tamen vel tandem pudeſcent, & peribunt in æternum. Hæc autem antithetiſis piorum & impiorum eò ſpectat, vt & pii, qui videntur infelices in hoc ſeculo, non offendantur felicitate impiorum, ſed contineantur in officio: impij autem terreantur, & reſipiſcant. Non enim vult Deus mortem impij, ſed magis, vt conuertatur & viuat.

VSVS HUIVS PSALMI.

Sicut ſunt varia genera noſtrorum hoſtium, ita eſt & multus vſus huius Pſalmi. Alij enim ſunt hoſtes noſtri, homines. Etſi enim vulgò dici ſolet: Homo hoſtini Deus, tamen tanta eſt corruptio humanæ naturæ, vt alter alterum hoſtiliter perſequi ſoleat. Quare vulgatum illud dictum ſic mutatur: Homo homini diabolus. In perſecutione igitur hominum licebit pio ex hoc Pſalmo petere formulam precandi & inuocandi DOMINVM, vt & conſolationem & liberationem allequatur. Sic potuit hoc Pſalmo vti Iofaphat in inſurſione Moabitarum & Ammonitarum. Et Ezechias in inſurſione Sennacherib. Et Paulus in perſecutione Iudæorum.

Alij hoſtes noſtri ſunt afflictiones corporales, vt morbus, paupertas, fames, ignominia. Hæc & id genus alia, cum minantur nobis exitium, & excitant in nobis perturbationem animi, ſuſcipiendus eſt hic Pſalmus in manum, imò in mentem, vt ex eo petamus conſolationem.

Alij ſunt noſtri hoſtes, nōq̃ grauiffimi & pernicioſiſſimi, peccatum & ſatan. Hi enim hoſtes minantur nobis

nobis non solum mortem, sed etiam infernum. Et si autem *ᾠδὴ* huius Psalmi loquitur de corporalibus hostibus, tamen Spiritus sanctus respicit etiam in spirituales. Quare si quis propter peccata sua perturbatur animo, & conijcitur in metum mortis & inferni, sumat hunc Psalmum precandum, ut obfirmet animum suum aduersus omne genus inimicorum.

Psalmus septimus.

DOMINE, Deus meus, in te speraui, &c.

In Alba Dominorum, die 6. Februarij.

Anno 1556. explicatus.



Causa huius Psalmi, tam ex inscriptione, quam ex narratione eius intelligi potest. Inscriptio enim habet, quod Dauid ceciderit hunc Psalmum, excitatus verbis seu factis Chusi filij Iemini. Siue autem nomine Chus, quod alias Æthiopem significat, intel-

ligatur Saul, qui in priori libro Samuelis cap. 9. vocatur filius Iemini: siue intelligatur Simei, qui & ipse in posteriori libro Samuelis cap. 16. vocatur filius Iemini, & incessit Dauidem in exilium proficiscentem grauissimis conuiitijs: siue alius quispiam de cognatione Saulis, hoc nomine vocatus sit, certe ipsa Psalmi

recitatio docet, hanc precationem institutam esse aduersus calumnias & falsas criminationes. Postquam enim David factus est aulicus regis Saulis, & confectus est illustrem famam nominis, propter stratagemata, quod in Goliathe designauerat, metuit rex Saul, ne se abiecto (quemadmodum etiam in quinto Psalmo dictum est) David rerum Israëlitarum potiretur: quare prosequitur Dauidem magna inuidia, & accusat eum affectati imperij. Quod cum animaduertissent sycophantæ & adulatores Regis, seruiunt affectui eius, addunt oleum camino, & interpretantur apud regem, omnia tam dicta quam facta Dauidis in pessimam partem, vt necesse habuerit David fuga sibi salutem quærere, & in exilium abire. In priori libro Samuelis cap. 22. accusat Doeg Idumæus Dauidem, quod conspirauerit cum summo sacerdote Ahimelech, aduersus Saulem. Et, cap. 26. David ipse cum Saule colloquens, significat se à sycophantis in exiliū eiectum: Si filij hominum (inquit) incitant te aduersum me, maledicti sint in conspectu DOMINI, qui eiecerunt me hodie, &c. Et in posteriori libro Samuelis, cum David eijceretur e regno à filio suo Absolome, factus est ei obuius Simei de cognatione Saulis: ac exprobrauit ei affectationem regni, ac tyrannidem: Egredere, inquit, vir sanguinum, & vir Belial. Reddit tibi DOMINVS vniuersum sanguinē domus Saul, quoniam inualisti regnum pro eo, &c. His ergo & alijs id genus calumnijs excitatur David. Et quia non habet in terris, cui hanc iniuriam conquereretur, & à quo auxilium peteret, vertit se ad DOMINVM Deum nostrum, & inuocat eum hoc Psalmo, vt in tantis ærumnis

erumnis ab ipso cœlestem opem consequatur.

1. *DOMINE Deus meus in te spero, Saluum me fac & omnibus persequentibus me, & libera me.*
2. *Ne quando rapiat vt Leo animam meam, dilaniet, nec sit qui eripiat.*

In his duobus primis versiculis, continetur propositio precationis: DOMINE saluum me fac, & libera me à persecutoribus & calumniatoribus meis. Hic est status huius Psalmi, ad quem statum omnes rationes & argumenta petitionis, quæ sequuntur, referenda sunt. Sicut enim in supplicationibus, quæ fiunt erga homines, solent enumerari rationes, quibus homines permoueantur, vt voluntati & petitioni nostræ morē gerant, ita & in precationibus, quæ fiunt erga Deum, commemorandæ sunt causæ, quibus Deus excitetur, vt nos exaudiat. Non est autem sentiendum, quòd Deus permoueatur humana eloquentia: sed recitantur causæ precationis, propter nos, vt ex ijs fidem nostram confirmemus, & Deum maiori ac certiori spe inuocemus. In his duobus primis versiculis, in quibus continetur propositio, interseruntur etiam duæ rationes precationis, quibus precator animum suum ita confirmat, vt polliceatur sibi certam exauditionem.

Vna ratio est: In te spero. Precor te DOMINE, vt saluum me facias, vt liberes me à calumniatoribus. Quid ergo causæ affers, cur te exaudiam & seruem? Quia (inquit) in te spero. Non spero, non confido humana potentia, non carnali sapientia, nō meritis meorum operum, sed tantum in te spero. Non igitur dubito

bito de exauditione. Deus enim iussit fiduciam salutis in se tantum, non in alienis Dijs collocare, & recepit se seruaturum sperantes in ipsum: Non habeas, inquit, alienos Deos coram me. Et Psal. 16. Saluos facis sperantes in te. Et Psal. 83. Beatus homo, qui sperat in te. Et Psal. 90. Quoniam sperauit in me, liberabo eum. Et Psalm. 146. Beneplacitum est DOMINO super timentes eum, & in eis qui sperant super misericordia eius.

Altera ratio est. Ne sycophanta rapiat, seu mordicus apprehendat animam meam, sicut leones facere solent, & dilaniet eam, nec sit quisquam, qui seruet me. Hæc est expositio magnitudinis periculorum, in quibus Dauid versatur. Non enim simpliciter & leuiter affligitur, sed à calumniatoribus & persecutoribus suis ita perturbatur, vt non aliter sit affectus, quàm si famelicus, & crudelis quispiam leo aperiat rictum suum, vt apprehendat ipsum, & dilaniet, ac deuoret: nec ullus hominum sit, qui opem ferre queat. Est autem hæc commodissima ratio, qua Deus ad ferendam opem excitatur, hoc est, qua fides nostra in inuocatione confirmatur. Deus enim promisit, se tum proximè affuturum, cum pericula ad summum peruenerunt, & de reliquis omnibus auxilijs desperatum est. Esa. 57. Habitat cum contrito & humili spiritu, vt uiuificet spiritum humilium, & cor contritorum. Sed de hoc loco supra in Psalmo sexto.

3. *DOMINE Deus meus, si feci istud, si est iniquitas in manibus meis.*
4. *Si retribuui malum ei qui mecum pacem habebat, & spoliavi aduersarium meum illegitimè.*

Persequatur

5. *Persequatur inimicus animam meam, & comprehendat (me) & conculcet ad terram vitam meam, & gloriam meam in puluerem deducat.*

Tertia ratio precationis: Serua me DOMINE, & libera me à hostibus meis, quia faciunt mihi luculentam iniuriam. Saul & sycophantæ eius, accusant me affectatè regni, spargunt publicè, me coniurasse aduersus Regem, vt ego ipso expulso, aut occiso, regnum eius occupem. Dicunt me esse virum sanguinum & tyrannum, qui consecutus sim regnum Israëliticum malis artibus. Sed si feci istud, quod inimici de me vociferantur, si quicquam in regni occupatione iniquè aut illegitimè egi, si oppressi hostes aut aduersarios meos iniuste, & contra officium atq; vocationem meam, nō recuso, quin tu DOMINE Deus meus, stes à parte aduersariorum meorum, & des eis vt me capiant & occidant, ac siue vitam, siue maiestatem meam omnem deficiant, ac è medio tollant. Allegat ergo David innocentiam suam, coram Deo, contra aduersarios suos. Et quia Deus promissit innocentibus, & rectis corde liberationem, idcirco sperat se certam salutem consecuturum, sicut & mox sequitur: Adiutorium meum à DOMINO, qui saluos facit rectos corde, DOMINVS iudex iustus. Et Psal. 33. Oculi DOMINI super iustos, & aures eius in preces eorum. Et Psal. 36. Salus iustorū à DOMINO, & protector eorum in tempore tribulationis. Et Psal. 72. Quia bonus Deus Israël his, qui recto sunt corde. Sed quid est, quòd David vociferetur se innocentem, & petat sicut postea sequitur, se iudicari à Deo secundum iustitiam suam: cū manifestum sit, quòd non solum in carne sua gestauerit peccatum oris

ginale, ex quo alias exclamat: Peccatum meum coram me est semper, Et: Si iniquitates obseruaueris Domine, Domine quis sustinebit? verum etiam multa alia peccata, vt adulterium & homicidium, designauerit: Sciamus igitur quod aliud sit coram Deo, iuxta diuinam iustitiam, ex lege Dei iudicari, aliud coram Deo, iuxta humanam iustitiam contra aduersarios iudicari. Nam qui statuerit se ad tribunal Dei, iuxta seueritatem legis eius, fieri non potest, quin causa cadat, & iudicetur peccator: non enim iustificatur in conspectu Dei omnis viuens. Qui autem statuerit sese ad tribunal Dei, aduersus hostes & calumniatores suos, sæpe ac multum fieri solet, vt homines iustissimam habeant, etiam coram Deo, causam. Sic Ioseph, etsi coram Deo iuxta legem eius fuit peccator, tamen collatus cum muliere adultera & calumniatrice, fuit innocens, & potuit alacri conscientia ad Deum dicere: Iudica me, Domine, secundum iustitiam meam, & secundum innocentiam meam super me. Sic & Dauid collatus cum seueritate diuinæ legis fuit iniustus & peccator: collatus autem in causa affectationis regni & tyrannidis, cum hostibus suis & sycophantis, fuit innocentissimus. Sic Paulus conferens se ad legem Dei: Video, inquit, aliam legem in membris meis, rebelantem legi mentis meæ, & captiuum reddentem me legi peccati. Sed conferens se cum Israëlitis suis, qui insidiabantur vitæ ipsius, & cum Pseudoapostolis: Non versantes, inquit, per astutiam, neque dolo tractantes verbum Dei, sed manifestatione veritatis commendantes nos ipsos apud omnem conscientiam, in conspectu Dei. Vnde & alias complectitur vtrumque:

Nihil

Nihil (inquiens) mihi conscius sum : sed in hoc non sum iustificatus.

6. *Exurge DOMINE in ira tua, exaltare contra furores inimicorum meorum, & expergiscere ad me iudicio quod mandasti.*
7. *Et cæcus populorum circumdabit te, & propter hunc in altum regredere.*

Vbi nos transtulimus , contra furores , ibi vetus translatio habet, In finibus. Dictio enim Hebræa, אבר אבר, significat vtrunq; , videlicet , transitum seu finem, & iram ac furorem.

Repetit autem Psalmus hoc sexto versiculo precationem , vt hac occasione adiiciat alia argumenta exorandi : Exurge, inquit, DOMINE, in ira tua. Videris tu nunc obdormisse, & stertere , videris quasi e throno tuo deiectus, ac in humum prostratus esse. Inimici autem mei videntur non vigilare tantum , verumetiam suæ felicitati applaudere, & potenter dominari. Obsecro igitur te , ne pergas ad iniquitatem, & calumnias eorum conniuere : sed expergiscere tandem , declara iram tuam , qua sæpè ac multum significasti, syncophantas & calumniatores tibi ex animo displicere. Compesce furorem eorum, quò in me grassantur. Regredere in altum. Nunc enim humilis, & in imum proiectus appares : sed quaeso te , vt redeas in sublimem tuam maiestatem , & illustres gloriam nominis tui, vt palam fiat , te iustum & æquum illud iudicium tueri ac seruare, quod iubes omnes Reges & Principes colere, vt & ego ab hostibus meis seruatus, possim tem-

plum tuum excitare, ac ecclesiam tuam mirificè nunc afflictam & perturbatam, in vnum recolligere, atq; ad cultum nominis tui reuocare.

Habes iterum duas rationes persuadendi: Vna est, quod Deus admonetur præcepti sui, quo exigit ab omnibus rerum gubernatoribus, vt iustum iudicium exerceant. Deut. 1. Audite illos, & quod iustum est, iudicate: siue ciuis sit ille siue peregrinus, nulla erit distantia personarum, ita paruum audietis, sicut magnū, nec accipietis cuiusq; personam, quia DEI IUDICIUM est. Et cap. 16. Iudices & magistros constitues in omnibus portis tuis, vt iudicent populum iusto iudicio, nec in alteram partem declinent, &c. Et Paulus officium Magistratus ita describit. Rom. 13. Dei minister est tibi in bonum. Quod si feceris id quod malum est, time. Cum igitur Deus mandauerit hominibus, vt iuste inter partes litigantes iudicent, quomodo fieri posset, vt ipse non esset inter Dauidem & calumniatores eius iustus iudex? Absit à te, inquit Abraham ad DOMINUM, vt hanc rem facias, & occidas iustum cum impio, fiatq; iustus sicut impius: non est hoc tuum, qui iudicas omnem terram.

Gen. 18.

Altera ratio est: Coetus populorum circumdabit te. Dauid enim, postquam designatus est diuinitus in Regem Israël, non cogitauit ociari, & genio suo indulgere, sed potius ecclesiam DOMINI, iam inde ab ingressu in terram Canaan varijs doctrinis, & impijs sacris corruptissimam, instaurare ac reformare. Et postquam publicè creatus est Rex, nihil prius habuit, quam vt Hierosolymis templū excitaret, in quo Aram propitiatorij collocaret, & pia sacra iuxta legem restitueret.

restitueret. Vnde Psal. 131. dicitur: Sicut iuravit (Dauid) Domino, votum vouit Deo Iacob: si introiero in tabernaculum domus meæ, si ascendero &c. Petit igitur diuinitus ab inimicis & calumniatoribus suis defendi, si non propter causæ suæ iustitiam, & suam innocentiam, certè propter ecclesiam, vt quod de ipsa instauranda & reformanda instituit, absolvere & persicere possit. Huc respexit etiam Paulus, Philip. 1. Coartor (inquiens) ex his duobus: desiderans dissolui, & esse cum Christo, multo longèq; melius est. Manere autem in carne, magis necessarium propter vos.

8. *DOMINVS iudicat populos, iudica me DOMINE secundum iustitiam meam, & secundum innocentiam meam, quæ est in me.*
9. *Desinat queso malitia impiorum, & dirige iustum, scrutans corda, & renes Deus iustus.*
10. *Adiutorium meum à Domino, qui saluos facit rectos corde.*
11. *Deus iudex iustus, & Deus detestans (iniquitatem) toto die.*

Alia precationis repetitio, qua quasi gradu quodam accedit ad commemorandum, quod in hac causa est præcipuum, & quo in precatione maximè omninuitur. Recensuit enim suprâ: ac nunc quoq; iterum commemorat suam iustitiam & innocentiam, si conferatur cum aduersarijs & calumniatoribus suis. Cum igitur sciat se innocentem, calumniatores autem suos iniustos & impios, addit nunc, qua potissimum fiducia Deum inuocet, & speret opem eius, videlicet, non sua ipsius iustitia & innocentia, sed iustitia & probitate,

& æquitate solius DOMINI Dei nostri. Deus enim, inquit, iudicat populos. Et Deus, qui est scrutator cordium & renum, est iustus iudex. Similiter Deus saluos facit rectos corde, Et detestatur iniquitatem non vna tantum aut duabus horis, sed omnibus diebus, perpetuo. Conferamus ergo sententiam Psalmi in syllogismum, vt perspicue intelligamus, quò Dauid præcipue in hac precatone respiciat.

Propositio cum sua probatione.

Iusti defenduntur à Deo, quia Deus est iustus iudex. Et quemadmodum pius Magistratus, laudi est bene agentibus, & terrori male agentibus, ita Deus iuste iudicat, defendit innocentes, & punit nocentes, seruat rectos corde, & detestatur ac opprimit prauos ac iniquos.

Assumptio.

Dauid autem est iustus & innocens, non quidem nec natura, nec operibus suis, si conferatur ad seueritatem legis Dei: sed collatione cum hostibus & calumniatoribus suis. Non enim fuit affectator regni, nec gessit iniusta & illegitima bella, sicut aduersarij calumniabantur eum.

Complexio.

Ergo Deus defendet Dauidem, & adiuuabit eum, ne à calumniatoribus opprimatur.

Collocat igitur Dauid fiduciam suam non in causæ suæ iustitia ac bonitate, sed tantum in bonitate & iustitia Dei, videlicet, quòd Deus sit iustus iudex, qui teneri non possit, quin eos tueatur, qui inique opprimuntur,

muntur, & eos puniat, qui iustos & pios affligunt. Nec illud est oscitanter prætereundum, quòd Deus dicatur scrutator renum & cordium. Hoc enim eò pertinet, vt sciamus, Deum posse verè iustum esse iudicem, propterea quòd non intueatur tantum externa hominis, verumetiam scrutetur latebras & recessus cordium. Etsi autem inuenit etiam in Dauidis corde quòd condemnnet, ex corde enim egrediuntur cogitationes malignæ, tamen cùm confert causam eius, cum causa calumniatorum, & cum sententia cordis eorum, videt eos, non nisi mendacium & internitionem aduersus Dauidem meditari. Quare videt Dauidem iustum & pium, calumniatores autem eius iniustos & impios.

12. *Si non conuersus fuerit, (sed) gladium suum vibrauerit, arcum suum tetenderit, & instruxerit eum.*
13. *Et parauerit sibi vasa mortis, ac sagittas suas flagrantibus (inuidia) fabricauerit.*
14. *Ecce parturiet iniustitiam, concipiet dolorem, & pariet mendacium.*
15. *Foveam fodiet, & perfodiet eam, & incidet in foveam, quam fecit.*
16. *Conuertetur dolor eius in caput eius, & in verticem ipsius iniquitas eius descendet.*

Precationi subiicitur, seu comminatio, seu vaticinium, de certissimo interitu eorum, qui non agunt poenitentiam, sed pergunt in sua impietate & calumnijs. Quod & ipsum idcirco recitatur, vt precator confirmet ex eo fidem suam, & patienter ferat persecutionem impiorum, ac calumnias sycophantarum.

Est

Et si autem vulgò, inter hos versiculos, duo priores, exponi solent de Deo, quòd ipse vibret gladium, & tendat arcum suum, aduersus impios calumniatores, si non resipuerint, quæ sententia per se non est impia: tamen si ea quæ præcedunt & sequuntur, diligenter consideras, videntur illa ad impœnitentiam potius, quàm ad Deum referenda, vt hæc sit sententia: Si calumniator & persequutor meus, siue Saul, siue Doeg, siue Chus, siue Simeel, siue alius quispiam ex aulicis, non conuersus fuerit ad **D O M I N U M**, & non egerit pœnitentiam, sed perrexerit gladium suum aduersus me expolire, & arcum suum in me tendere, ac me conari sagittis suis confodere, hoc est, calumniari, & vitæ meæ nugis & calumnijs insidiari, tunc certò sciat, quòd frustretur suo conatu, & iugulaturus se sit suo ipsius gladio.

Duo autem hæc obseruanda sunt. Alterum est descriptio calumniæ. Calumnia enim est velut gladius, qui vibratur in innocentem: & arcus, è quo emitti solent letifera iacula, quæ dicuntur vasa seu instrumenta mortis: & sagittæ, quibus alter alterum ad odium & inuidiam inflammat, vnde & Psal. 56. dicitur: Filij hominum, dentes eorum arma & sagittæ, lingua eorum gladius acutus. Quare calumniator ab homicida nihil differt, nisi quòd ille tantò nocentior est, quanto minus caueri potest, iuxta proverbium: Aduersus scophantæ (hoc est) calumniatoris morsum non est remedium. Alterum est supplicium calumniatoris. Quod enim alteri machinatur, hoc in suum ipsius caput recidere solet. Parturiet, inquit, iniquitatem, & concipiet laborem, hoc est, etiam si iniqua cogitauerit aduersus

aduersus proximum, & cupiat ei molestiam, laborem, iniuriam, & exitium inferre, tamen pariet mendacium, hoc est, nihil efficiet, nihil incommodi inferet ei, sed potius seipsum offendet, & cadet in eam foueam, quam alteri parauit. Exempla sunt Saul, Achitophel, Absolon, Aman, Satrapæ Persarum apud Daniele, cap. 6.

17. *Laudabo DOMINVM secundum iustitiam eius, & psallam nomini DOMINI Altissimi.*

Hic vltimus versiculus, est testificatio gratitudinis, quam precator recipit se pro beneficijs Dei declaraturum. Et pertinet hæc quoq; inter rationes persuadendi seu exorandi. Significatio enim grati animi excitat tam Deum quàm homines ad beneficentiam. Inter opera autem gratitudinis erga Deum, non postremum locum obtinet, celebratio nominis Dei, vt & alij ad fidem & inuocationem Dei inuitentur.

Psal. 21. Salua me ex ore Leonis, & à cornibus vnus cornium humilitatem meam. Narrabo nomen tuum fratribus meis: in medio ecclesiæ laudabo te.

Psal. 68. Salus tua suscepit me, laudabo nomen Dei cum cantico, & magnificabo eum laude. Et placebit Deo super vitulum nouellum.

VSVS HVIVS PSALMI.

Nihil grauius posse honesto homini accidere, calumnia, testatur dictum illud Psalmi: Filij hominum dentes eorum, arma & sagittæ, & lingua eorum gladius
N diu

dus acutus. Adscribam autem huc exemplum ex Hieronymo, quo cognoscamus, quantam afflictionem pariat calumnia in animo innocentis.

Hiero. ad Rusticum Monachum, Tom. 1.

Græcus adolescens (inquit) erat in cœnobio, qui nulla continentia, nulla operis magnitudine flammam carnis poterat extinguere. Hunc periclitantem pater Monasterij hac arte seruauit. Imperat cuidam viro graui, vt iurgijs atq; conuitijs insectaretur hominem, & post irrogatam iniuriam, primus veniret ad querimoniam. Vocati testes, pro eo loquebantur, qui contumeliam fecerat. Flere ille contra mendacium, Nullus alius credere veritati, Solus pater defensionem suam callide opponere, ne abundantiori tristitia absorberetur frater. Quid multa? ita annus ductus est. Quo expleto interrogatus adolescens, super cogitationibus pristinis, an adhuc molestiæ aliquid sustineret. Papæ (inquit) viuere mihi non licet, & fornicari libeat.

Ex hac historiola manifestum est, calumniam tantum afferre animo dolorem, vt non solum excutiat alios affectus, verumetiam inijciat mortis desiderium. Quare si senseris te peti calumnijs & mendacijs, non est vicissim calumniandum, conuitiandum, & contumelijs grassandum, sed sumendus est hic Psalmus in manum, petendum est auxilium à Deo, vt ipse nos conseruet, & à moribus sycophantarum tutos reddat.

Itaq; hoc Psalmo licuit vti Hieremiæ, cum accusaretur fugæ & defectionis ad Chaldaeos: & Apostolis, cum

cum accusarentur seditionis & hæreseos: & discipulis eorum, cum à Gentibus accusarentur infanticidij, quemadmodum Tertullianus scribit in Apologetico, aduersus Gentes cap.7.

Psalmus octauus.

DOMINE DOMINVS noster, quàm admirabile est nomen tuum, &c.

*In Monasterio Murrharde, ad fluvium
Murr, explicatus.*



Cratus Psalmus non est precatio, sed encomium, in quo collatis operibus creationis & redemptionis, extollitur, & præfertur redemptio humani generis, quæ facta est per filium Dei, DOMINVM nostrum Iesum Christum. Et si enim hic Psalmus vulgò exponi solet, de excellentia & dominatione hominis, quæ initio creatus est à Deo, ut præesset terræ, & dominaretur orbi, tamen extant in literis nostri Testamenti haud obscura testimonia, quod intelligendus sit de regno Christi, & de gloria ac maiestate, qua Christus à Deo patre suo ornatus est. Apud Matth. cap. 21. cum pueri acclamarent Christo in templo: Osanna filio David, & Pharisei indignarentur,

ac iuberent cos prohiberi, Respondit Christus ex hoc Psalmo : Quid ni, inquit, Nunquid legistis : Ex ore infantium & lactentium perfecisti laudem; Et ad Heb. cap. 2. testatus est alicubi quidam dicens : Quid est homo, quod memor es eius, aut filius hominis, quod visitas eum. Minuisti eum paulo minus ab angelis, gloria & honore coronasti eum, &c. Et mox : Eum, qui pusillum quiddam diminutus fuerat infra angelos, cernimus Iesum, propter cruciatum mortis, gloria & honore coronatum. Ex his testimonijs manifestum est, quod hic Psalmus sit commendatio, non humanæ naturæ in genere, sed potius Christi DOMINI nostri, qui passionem, & mortem suam, non ipse tantum peruenit in summam maiestatem, sed secum etiam in cœlestem gloriam euexit omnes homines, qui fiduciam salutis suæ in ipso collocant.

1. *DOMINE, Domine noster, quàm admirabile est nomen tuum in vniuersa terra, & das laudem tuam vsq; ad cœlos.*

Primus versiculus est propositio, quæ maioris vehementiæ gratia figuratur admiratione. Simpliciter enim ita diceretur : DOMINE Deus, fama nominis tui spargitur mirabiliter in vniuersa terra, & laus tua pertingit vsq; ad cœlos. Manifestum autem est, quod quo tempore Dauid hunc Psalmum in literas contulit, gloria Euangelij Dei nondum fuerit in orbem terrarum diuulgata. Etsi enim prædicatio de vero Deo, nunquam defuit orbi terrarum, tamen perspicua annuntiatio de clementia Dei, per Christum filium eius,

rum

cum demum diuulgata est in terris, inter omnes gentes, cum Christus emisit Apostolos suos, vt prædicarent Euangelion omni creaturæ. Quare Spiritus sanctus in hoc versiculo respicit maximè omnium in illud tempus, quo Apostoli circumtulerunt Euangelion Christi inter omnes gentes, & annunciauerunt orbi terrarum, Deum esse placatum per Christum filium suum, vt quotquot in ipsum credunt, recipiantur à Deo in gratiam, adoptentur in filios & hæredes cœlestium bonorum. Itaq; Dauid hunc versiculum sic enunciat, perinde ac si coram videret (quemadmodum & vidit, non quidem corpore sed Spiritu) Apostolos tam inter Iudæos, quàm inter Gentes circumire, & gloriam nominis Dei, per Christum patefactam, prædicatione sua illustrare.

2. *Ex ore infantium & lactentium perficis fortitudinem propter aduersarios tuos, vt destruas inimicum, & vindictæ cupidum.*

Condemnationes seu laudationes, vel Dei, vel hominum, solent duci à virtutibus, à potentia, industria, clementia, misericordia, iustitia, & id genus alijs. Cum igitur Psalmus affirmat in primo versiculo, admirandam esse in toto orbe terrarum gloriam nominis Dei, subiicit nunc rationes, quibus gloria Dei probatur. Vna continetur in hoc secundo versiculo, videlicet, quòd Deus per os, per sermonem infantium, lactentium, hominum abiectorum, indoctorum, & in eloquentium perficiat, & stabiliat in vniuerso orbe magnifica, fortia, firma, & nunquam euertenda. Quod est

go hic versiculus commemorat, hoc impletum est, suo modo, in pueris Hierosolymitanis, qui apud Matth. cap. 21. tacentibus, imò indignantibus Scribis & Phariseis, agnoscunt, Iesum esse verum Christum, & acclamant ei: Osanna filio Davidis. Hæc acclamatio, etsi videbatur puerilis, tamen erat à Spiritu sancto excitata, & veritas eius ita stabilita est, vt ne portæ quidem inferorum aduersus eam præualeant. Possumus etiam testimonio huius versiculi vti aduersus Anabaptistas, qui cum falso existiment, Deum non esse efficacem in pueris, nec conferre in eos fidem, sentiunt, eos non esse in pueritia baptisandos. Deinde impletum est in Apostolis, qui & ipsi, si conferantur doctis, Philosophis ac oratoribus, dicuntur infantes, lactentes, rudes & balbi. Sed per hos infantes & balbos, Deus tam fortia, tam firma in toto orbe terrarum perfecit, vt quam doctrinam Euangelij diuulgarunt, nulla sapientia, nulla potentia, nulla industria, nulla astutia, vel Satanæ, vel hominum euertere ac delere queat: & ecclesia quæ prædicatione eorum fundata est, perpetuò conseruetur. Vnde & apud Matth. cap. 11. gratias agit Christus Deo patri, quòd absconderit hæc à sapientibus & prudentibus, ac reuelarit ea paruulis.

Sed quid causæ est, quòd Deus maluerit tam magnifica & stabilia, per infantes & abiectos, quàm per eloquentes, doctos & potentes perficere? Additur: Propter aduersarios tuos, vt destruas inimicum & virulentum. Hoc planè illud est, quod Paulus ad Corinthios scribens: Videtis, inquit, vocationem vestrâ, quòd non multi sapientes iuxta carnem, non multi potentes, non multi claro genere nati, verum quæ
stulta

stulta erant secundum mundum, delegit Deus, ut puer defaceret sapientes. Et quæ erant imbecillia in mundo, ut PUDERET EA, QUAE SVNT ROBUSTA, & quæ ignobilia erant in mundo, contempnitur, delegit Deus, & ea quæ non erant, ut ea quæ sunt, obliteraret, UT NE GLORIARETUR VLLA CARO CORAM IPSO. Præcipui enim aduersarii, inimici & hostes Dei sunt, sapientes, potentes, & honesti iuxta hunc mundum: quales inter Iudæos erant Pontifices, Scribæ & Pharisei, inter Gentes Philosophi, Reges, Principes & Sacrificuli Deorum. Visum igitur est Deo, Evangelion filij sui divulgare, & sibi æternam Ecclesiam, ex omnibus gentibus colligere, non per sapientes, doctos & potentes huius seculi, sed per infantes, lactentes, indoctos & abiectos homines, ut sapientes aduersarios suos, & potentes inimicos suos puderetur, & ut nulla caro, nulla carnis prærogatiua possit in conspectu suo gloriari. Huc pertinet & illud, quod 2. Corin. 4. scribit Paulus: Habemus, inquit, thesaurum hunc in vasis testaceis, ut virtutis eminentia sit Dei, & non ex vobis. Virtus enim Dei tunc illustratur, cum per imbecilles, magnifica & stabilia perficit.

Ex hoc loco petenda est consolatio ijs, qui legitime vocantur ad officia, quæ præ tenuitate & imbecillitate ingenij sui, non posse præstare videntur. Si enim non potes in sparta, ut vocant, quam nactus es, manere, sed ad maiorem administrationem vocaris, obsequendum est voluntati Dei, confidendum est in DOMINUM, qui cum soleat ex ore infantium & lactentium perficere grandia, dabit etiam incrementum

& euentum, vt qui legitimè vocatus est, suo munere vtiliter defungatur.

3. *Video (quidem) cœlos tuos, opus digitorum tuorum, Lunam & stellas, quæ præparasti.*
4. *Quid est (autem) homo ille, quod memor sis eius, & filius ille hominis, quod curas eum?*
5. *Minuisti eum pauco tempore à Deo, gloria & honore coronas eum.*
6. *Constituis eum super opera manuum tuarum, omnia subijcis sub pedibus eius.*
7. *Oves & boues vniuersas, insuper & pecora campi.*
8. *Volucrem cœli & pisces maris, & quod perambulat semitas maris.*

Pro (cœlos tuos) Hebræus habet שֶׁמֶשׁ Schemecho, sed quia sequitur, (Lunam & stellas, quæ præparasti) & non fit mentio Solis, qui tamen inter stellas cœli præcipuus est, idcirco aut per cœlos intelligendus est sol, aut pro שֶׁמֶשׁ scriptum fuit ab initio שֶׁמֶשׁ Schemescho, quod significat solem tuum: vt hic versiculus sic legatur: Video quidem solem tuum, opus digitorum tuorum, Lunam & stellas, &c.

Est autem in his versiculis altera ratio, propter quam gloriam nominis Dei illustratur in toto orbe terrarum. Et est collatio, quæ opus redemptionis antefertur operi creationis: ut sit sententia. Cum aspicio cœlos, solem, lunam, & stellas, quæ tu, Deus meus, verbo tuo creasti, agnosco quidem summam tuam potentiam, bonitatem, & maiestatem: sed cum intueor filium tuum hominem ex muliere factum, & legi obnoxium,

noxium, vt eos qui sub lege erant, redimeret, ac daret eis ius adoptionis filiorum Dei, ibi tum magnitudo tuæ industriæ, omnipotentia, clementia, & misericordia, excedit omnem humanum captum. Hoc humana redemptionis opus longissime superat opus creationis. Consideret enim mihi quispiam, quanto studio, quanta cura complectaris hunc hominem, hunc filium hominis, quem ad redimendum humanum genus, in has terras misisti. Etsi enim visus fuit aliquanto tempore à Deo abiectus & inglorius, ac ædidiit quidem in his terris aliquot miracula, sed raptus ad tribunalia Pontificum, & Pilati, & adactus in crucem, tanta apparuit imbecillitate, vt exclamaret, se à Deo desertum, ac moreretur etiam in cruce: tamen tantæ tibi curæ fuit, o Deus, vt non solum excitares eum à morte, verumetiam collocares eum ad dexteram tuam, ac subiiceres ei omnia tam in cœlo quàm in terra. Habes paraphrasin horum versiculorum. Ac plane hoc ipsum est, quod Paulus Philip. 2. exposuit: Iesus Christus, inquit, cum esset in forma Dei, nō rapinam arbitratus est, vt esset æqualis Deo: sed semetipsum inaniuit, forma serui sumpta. Et mox: Humilem præbuit semetipsum, factus obediens vsq; ad mortem, mortem autem crucis: quapropter & Deus extulit illum in summam sublimitatem, &c. Et Ephes. 1. Cum suscitaret Deus Iesum à mortuis, sedere fecit eum ad dexteram suam in cœlestibus, supra omnem principatum. Et mox: Omnia subiecit sub pedes illius, & eum dedit caput super omnia ipsi ecclesiæ. Et Heb. 2. **EV M**, qui pusillum quiddam diminutus fuerat infra angelos, cernimus Iesum, propter cruciatum mortis,

O gloria

gloria & honore coronatum, &c. Ac breuiter : Christus ipse cum resurrexisset à mortuis, & ascensurus esset in cœlum, ac emissurus Apostolos suos in orbem terræ, dicit : Data est mihi omnis potestas, in cœlo & in terra. Hanc Christi potestatem & maiestatem intelligit Psalmus, cum recenset, Christum constitutum super opera manuum Dei, & omnia subiecta sub pedibus eius : & commemorat oues, boues, pecora campi, volucres cœli, pisces maris, & omnia quæ in mari degunt. Regnum autem Christi, non esse mundanum, sed cœleste, copiose alias explicatum est.

9. *DOMINE, Dominus noster, quàm admirabile est nomen tuum in vniuersa orbe.*

Hæc est Psalmi conclusio, eadem cum propositione. Cum enim Deus tanta sit industria, vt perficiat in terris grandia, magnifica & stabilia per infantes & abiectos homines, ac non solum creauerit Solem, Lunam, & stellas, verumetiam miserit filium suum in has terras, factum filiū hominis, & reduxerit eum à morte, collocaueritq; eum in throno summæ maiestatis ac dominationis, certè ex his stratagematis gloria nominis Dei ita illustratur, vt admirabilis splendor eius in vniuersum orbem terrarum spargatur.

VSVS HVIVS PSALMI.

In hoc Psalmo prædicatur passio, mors, resurrectio Christi, & sessio eius ad dextram Dei patris, ac diuulgatio Euangelij ipsius in orbem terræ. Idem ergo vsus est

est huius Psalmi, qui est eorum articulorum nostræ religionis, quos nunc recensuimus. His enim Prophetis vaticinijs de regno Christi, non solum confirmatur certitudo religionis nostræ, quæ est in Christum, verumetiam confirmamur in conscientia, de vera & æterna nostra salute: propterea quod cum Christus mortem euaserit, & sedeat ad dextram Dei in cœlestibus, nos quoq; qui in Christum credimus, euademus mortem, & fruemur cum Christo ea maiestate & felicitate, quam habet apud Deum patrem suum, æternam & nunquam interituram.

Psalmus nonus.

Confitebor tibi DOMINE, &c.

*Adelbergæ, die 6. Aprilis, Anno 1557.
explicatus.*



B hoc nono Psalmo, variant numeri Psalmorum apud Hebræos, & Latinos. Illi enim diuidunt hunc Psalmum in duos: nonum enim numerant vsq; ad hunc versiculum: *Vt quid DOMINE, recessisti longè, &c.* & ab hoc versiculo incipiunt Psalmum decimum.

Latini autem hos duos Psalmos in vnum conferunt. Itaq; qui est apud Latinos decimus, is est apud Hebræos

bræos vñdecimus, & sic deinceps, vsq; ad Psalmum 147. Laudate DOMINVM, quoniam bonus est Psalmus Deo nostro, &c. Hic enim Latini faciunt ex vno, duos Psalmos, vt tàm apud Hebræos, quàm Latinos constet certus Psalmorum numerus, qui est 150.

Continet autem nonus Psalmus duas partes. Prior est laudatio seu gratiarum actio, pro beneficio liberationis ab aduersarijs. Posterior est precatio, qua petit, vt Deus etiam deinceps tueatur, & defendat ipsum in omnibus suis aduersis & afflictionibus.

1. *Laudabo DOMINVM toto corde meo, narrabo omnia mirabilia tua.*
2. *Latabor & exultabo in te, Psallam nomini tuo, Altissime.*

Hic est status prioris partis huius Psalmi. Recipit enim se laudaturum DOMINVM totis viribus, & cõmemoraturum admiranda beneficia, quæ DOMINVS in ipsum contulit. Affirmat autem se hoc facturum, non simplici affectione, sed magno animi gaudio & lætitia: nec nudis tantum verbis, sed Psalmo & carmine: Latabor, inquit, & exultabo in te. Quid ergo est lætari, & exultare in DOMINO? Non est sibi applaudere, de suis meritis gloriari, & præ se contemnere alterum, propter diuina beneficia: sed est gaudere propter gratuitam Dei clementiam, quam Deus tàm promissis, quàm beneficijs testificatur. Qui gloriatur, inquit Paulus, in DOMINO gloriatur. Non ait in donis DOMINI, sed in DOMINO ipso, hoc est, in gratuita eius clementia & misericordia, qua nos immeritos complectitur. Et hanc Dei clementiam prædicare, de
hac

hac psallere & cantare, opus est secundi præcepti in Decalogo, & cultus Deo gratissimus, qui placet ipsi, vt Psal. 68. loquitur: Super vitulum nouellum, produs centem cornua & vngulas. Placet autem Deo, non propter actionis meritum aut dignitatem, sed vt illustrato nomine Dei, homines excitentur ad agnitionem Dei, ad fidem, ad spem, ad inuocationem, ad charitatem. Hi enim sunt præcipui cultus, quibus Deo officia, & obedientiam nostram probare debemus. Nunc manet, inquit Paulus, fides, spes, charitas, &c.

3. *Propterea, quod conuertisti inimicos meos retrorsum, corruerunt & perierunt à facie tua.*
4. *Quoniam fecisti iudicium meum, & causam meam, sedisti super thronum, qui iudicas iustitiam.*
5. *Increpasti gentes, perdidisti impium, nomen earum deleuisti in æternum & perpetuò.*
6. *Framea inimici defecerunt in perpetuum, & ciuitates destruxisti: perijt memoria eorum vnâ cum ipsis.*
7. **DOMINVS** autem in æternum sedet, parans ad iudicium thronum suum.
8. *Et ipse iudicat orbem in iustitia, iudicat populos in rectitudine.*
9. **DOMINVS** est refugium afflictò, refugium opportunis temporibus in tribulatione.

Recipit Psalmus in primis duobus versiculis, se laudaturum & commendaturum gloriam nominis Dei. Nunc igitur recenset laudes, hoc est, virtutes & beneficia Dei, quæ faciunt nomen Dei laudabile. Ac primum commemorat victorias, quas diuino beneficio,

ab hostibus reportauit. Verisimile enim est, quod Dauid excitatus sit ad hunc Psalmum scribendum, postquam vnctus esset in Regem Israël in Hebron, & Philistini incurrisserent in regnum eius, vt eum statim ab initio opprimerent, quemadmodum scriptum est 2. Sam. 5. ac postea Moabitæ quoq; , & Syri, & Idumæi, grassarentur in ipsum, vt regnum eius delerent, sicut testatur Scriptura 2. Samuel. 8. Sed **DOMINVS** contulit ei admirandas victorias aduersus omnes illos hostes: & seruauit (inquit Scriptura) **DOMINVS** Dauidem, in omnibus ad quæcunq; profectus est. Hoc igitur beneficium Dei commemorat Dauid, vt gloriam nominis eius, & clementiam eius, in vniuerso mundo illustret. Non facit autem mentionem eius vno tantum & altero verbo, & quasi aliud agens, sed explicat atq; amplificat quatuor versiculis: Conuertisti (inquit) inimicos meos, Philistinos, Moabitas, Idumæos, Syros, & alios, retrorsum: necesse habuerunt dare fugam, corruerunt & perierunt. Tu enim **DOMINE**, qui iuste iudicas, sedisti super thronum, sedisti pro tribunali, & diiudicasti iudicium atq; causam meam, aduersus hostes meos. Ego enim electus & vnctus sum in Regem Israël, non mea priuata cupiditate, aut malis artibus, sed diuina vocatione & ordinatione. Gentes autem finitimæ hostes mei, imò tui, cogitauerunt, hanc tuam ordinationem euertere, & me cum regno meo opprimere, itaq; habui ego causam iustam, ipsi autem iniustam. Ego accepi regnum legitimè, ipsi acceperunt arma aduersus me, & regnum meum illegitimè. Quare tu **DOMINE** Deus noster, non existimasti amplius cessandum, sed sedisti pro tribunali, & causam

causam nostram ita dijudicasti, vt ego tuo beneficio victoriam reportauerim, hostes autem perierint, Nec perierunt mea fortitudine, aut prudentia, sed tua ipsius potentia, industria, & increpatione. Sic enim dicebat oraculum Dei ad Dauidem: Cum audieris sonitum clamoris, grandientis in cacumine pij eorum, tunc inibis praelium, quia tunc egredietur DOMINVS ante faciem tuam, vt percutiat castra Philistinorum. Hac est increpatione illa, cuius hoc loco facit mentionem, cum dicit: Increpasti gentes. Et additur: Perdidisti impium Philistinum, Moabitam, & alios hostes: deleuisti nomen eorum in aeternum, & perpetuo. Hoc non est intelligendum, quod nomen Philistinorum & aliorum hostium Dauidis ita extinctum sit, vt non amplius fiat mentio eius: sed quod gloria & maiestas eorum ita sit obscurata, vt nullam amplius honestam inter reliquas gentes famem habeant. Eodem sensu & illud, quod sequitur, accipiendum est: Frameae seu gladij inimici defecerunt in perpetuum. Ciuitates eorum destruxisti: perijt memoria eorum, vna cum ipsis. Et si enim Moabitae, Syri, & alij hostes, sauiuerunt postea iterum in regnum Israelis, tamen nunquam recuperarunt pristinam maiestatem: & necesse habuerunt vel tandem prorsus interire. Sciamus igitur ex his versiculis, victoriam non esse humanarum virium, sed donum Dei: Benedictus, inquit alias, DOMINVS Deus meus, qui docet manus meas ad praelium, & digitos meos ad bellum. Et: Nisi DOMINVS custodierit ciuitatem, &c.

Deinde DOMINVS Deus noster, non ob hanc tantum causam commendatione dignus est, quod contus

lerit illustres victorias in Dauidem, quemadmodum iam aliquot versiculis commemoratum est, verum etiam quod perpetuò sibi similis, non vni tantum Dauidi sit iustus iudex contra aduersarios eius, nec in vni tantum Dauidem conferat sua beneficia: sed quòd in æternum sedeat (sicut habet septimus versiculus) & paret thronum suum ad iudicium, hoc est, Deus semper est iustus iudex, qui in vniuerso orbe iustè, & inter omnes populos rectè iudicet: atq; adeò sit refugium ac munimentum afflictorum & oppressorum, quos etiam opportuno suo tempore, ex omnibus aduersis ac liberationibus liberet.

Tribuuntur autè hæc DOMINO Deo nostro obseruanda epitheta, videlicet, quòd sit iustus iudex orbis, & quòd sit refugium atq; adiutor afflictorum, tempore necessitatis. Cum autè Deus prædicatur esse iustus iudex, non intelligamus eum talem esse iudicem, qualem eum fingunt hypocritæ, videlicet, quòd respiciat tantum humana merita, nec sit alia via placandæ iræ Dei, & placendi Deo, quàm si quis aut legi Dei perfectè satisfecerit, aut peccata aduersus legem Dei designata, operibus suis expiauerit. Hæc est Ethnica & hypocritica, de iustitia Dei cogitatio. Deus enim idcirco vocatur iustus iudex, quòd sicut nō respicit personas hominum, nec corrumpitur muneribus eorum, ita non respicit personarum merita, nec corrumpitur operibus earum: sed respicit tantum causæ ipsius iustitiam, vel iniustitiam, quæ verbo eius est patefacta. Ac siquidem iudicat inter Cainum & Abelem, inter Iudæos & Hieremiam, inter Herodem & Ioannem Baptistam, inter Pharisæos & Christum, inter Scribas &

& Stephanum, inter Gentes & Martyres. Etsi conuictus, ut hi trucidentur, illi autem felicem consiliorum suorum euentum habeant, tamē est iustus iudex, quod seruet innocentes & pios in media morte, nocentibus autem & impijs rependat suo tempore iniquitatem & impietatem, grauissimis supplicijs. Deinde cum iudicet inter Israëlitas & Cananæos, inter Dauidem & Goliathem, ac finitimas Gentes, inter Iosaphat & Moabitas, inter Ezechiam & Assyrios, iustus est iudex: quod efficiat, ut illi reportent victoriam, quia habent iustam causam, hi autem pereant, quia habent causam iniustam. Quid ergo est, quod non eodem modo seruat Abelem à Caino, & martyres à tyrannis, quo modo seruauit Dauidem à Goliathe, & Iosaphatum à Moabitis? Hic considerandum est, quod Deus promiserit quidem in afflictione salutem, quam & credentibus & inuocantibus ipsum præstat: modum autem & viam seruandi, suæ sibi œconomiae reseruauit. Ac alios quidem pios seruat, non tantum spirituali, sed etiam corporali salute: alios autem spirituali tantum & æterna. Quare cum Deus sit iustus iudex, bene in quauis afflictione sperandum est: quod cum credimus, nihil certius sit salute, si non corporali, certe spirituali, hoc est, vera, cœlesti, & æterna. Quod si autem Deus non iudicauerit de homine collato ad alios homines, sed inter hominem & seipsum, ac legem suam, ibi tum iterum iustus est iudex, propterea quod ferat sententiam, iuxta sententiam legis suæ. Lex enim Dei ostendit quidem peccatum, & damnat peccatorem: non autem damnat eum, ut retineat eum in peccato & damnatione, sed ut remittat eum ad Christum

P filium

filium Dei, qui peccatum expiauit, & damnationem sustulit.

Finis (inquit Paulus Rom. 10.) legis est Christus, ad iustificationem omni credenti. Et Gal. 3. Conclusit Scriptura omnia sub peccatum, ut promissio ex fide Iesu Christi daretur credentibus. Quare quisquis ad tribunal Dei vocatus, crediderit in Christum, absoluitur ab omni peccato & damnatione propter Christum: quia Deus est iustus iudex, quod iudicet iuxta veram sententiam legis, quæ nullam habet accusationem, aduersus eum, qui credit in Christum. Si autem vocatus ad iudicium Dei, non crediderit in Christum, merito condemnatur, quia Deus iustus est iudex, quod iudicet secundum sententiam legis suæ, quæ occidit, quotquot non credunt in Christum. Cum igitur dicitur, Deum esse iustum iudicem, non abijciamus fiduciam in aduersis, sed conuertamur ad Christum: ut cum in Christo consequimur remissionem peccatorum per fidem, certam expectemus liberationem, propterea quod Deus sit iustus & probus iudex, qui pronuncietur sit sententiam suam de nobis, iuxta veritatem legis & Evangelij sui, qua hi, qui credunt in Christum, absoluntur à peccatis, & seruantur.

Deinde tribuitur Deo etiam illud epitheton, quod sit refugium afflictorum, & liberator eorū, opportuno tempore. Admonet autem nos hoc epitheton, ut coloremus quidem in Deum omnem nostram fiduciam in aduersis, non autem præscribamus Deo certum tempus & modum liberationis, sed reijciamus in ipsius voluntatem & sapientiam. Non enim semper est opportunum tempus adiuuandi & liberandi, quando nobis,

nobis, sed quando DOMINO Deo nostro, qui est omnium rerum administrator sapientissimus, videtur. Quare certa quidem in quavis afflictione, fiducia salutis concipienda est. Sed quia Deus constituit, tam tempora & articulos temporum, quam modum & viam conferendi auxilij sui, expectemus DOMINUM, & feramus interea crucem obedienter.

10. *Sperent igitur in te, qui nouerunt nomen tuum, quoniam non deseris quærentes te DOMINE.*
11. *Pfallite DOMINO, qui habitat in Zion, adnunciate inter gentes studia eius.*
12. *Quoniam requirent sanguinem eorum, recordatur, non obliuiscitur clamoris pauperum.*

Conclusio prioris partis, in qua conclusione, eos hortatur Psalmus auditores suos ad spem, ad inuocationem, & gratiarum actionem : Sperent (inquit) in te, hoc est, inuocent te magna spe & fiducia, quotquot agnoscunt nomen tuum. Et : Pfallite Deo, adnunciate inter gentes, beneuolentiam & promptitudinem Dei, in conferendo auxilio suo. Repetuntur & causæ cohortationis, Deus non deserit quærentes, hoc est, inuocantes ipsum : Deus non negligit iniuriam pijs & afflictis illatam, non obliuiscitur, sed recordatur gemituum, & clamoris eorum, ac requirit sanguinem ipsorum : non sinit inultum, quicquid vel iniuriæ vel contumeliæ pijs ab impijs contigerit. Et si sanguis piorum effusus est, & videtur à terra absorptus, tamen Deus requireret eum, & vindicabit, sicut de sanguine Abelis dicitur : Vox sanguinis fratris tui clamat ad

me de terra, &c. Obseruanda sunt & hoc loco epitheta Dei, Deus non est desertor quærentium ipsum. Deus non est neglector aut contemptor precum. Deus requirit sanguinem suorum. Hæc epitheta vt sunt comprobata, tam promissis, quàm exemplis & miraculis, ita diligenter recitata & considerata, excitant fiduciam inuocandi Dei, in omnibus aduersis, & alunt spem liberationis.

13. *Miserere mei DOMINE, vide afflictionem meam, (qua afficior) ab ijs, qui me odio habent, exalta me de portis mortis.*
14. *Idcirco adnunciabo omnes laudes tuas in portis filie Zion, exultabo in salute tua.*
15. *Demergantur Gentes in foueam, quam faciunt in laqueo, quem abscondunt, capiatur pes eorum.*
16. *Cognoscatur DOMINVS, iudicium faciens, in opere manuum suarum comprehendatur impius.*
17. *Conuertantur impij ad infernum, omnes gentes, quæ obliuiscuntur Dei.*
18. *Quoniam Deus non obliuiscetur pauperis in æternum, expectatio afflictorum non peribit perpetuò.*
19. *Exurge DOMINE, non praualeat homo, iudicentur gentes in conspectu tuo.*
20. *Constituë DOMINE doctorem super eos: discant gentes quòd sint homines.*

Hæc est posterior pars huius Psalmi. Constat autem precatione, qua petit, vt quemadmodum Deus antea liberauit ipsum mirando modo, ex omnibus prioribus afflictionibus, ita pergat deinceps ipsum seruare, & aduersarios suos opprimere.

Respice

Respice obsecro DOMINE clementer ærumnas meas, in quas me inimici mei coniiciunt : attolle me de portis mortis, serua me, ne tyrannide mortis opprimar, pro quo beneficio, referam quas possum gratias. Celebrabo enim nomen tuum, non in priuato angulo, sed in portis filiæ Zion, in publicis ecclesijs, in præcipuis ciuitatibus populi Dei, & prædicabo magna animi exultatione, salutem & opem, quam mihi exhibebis. Precor autem vt gentes, quæ in me sunt hostili animo, deijciantur in eam foueam, quam mihi instar venatorum parant : & capiantur in eo laqueo, quem mihi abscondunt, suo se iugulent gladio, suo, quod mihi intendunt, periculo intereant : ac peto, vt seueritas diuini iudicij in meis hostibus illustretur, ac palam cognoscatur, DOMINVM esse iustum iudicem. Quam afflictionem impius in me cogitat, quod malum in me architectatur, hoc in caput eius recidat, vt suo ipsius dolo pereat. Hoc supplicium contingat, non illi tantum impio, qui mihi malefacit, verum etiam omnibus impijs gentibus, quæ nõ agnoscunt Deum, vel si agnouerint, deficiunt à Deo. Nec dubito quin hæc certissimè fiant. Scio enim Deum non obliuisci semper miseræ afflictorum, nec permittere, vt hi perpetuò spe sua frustrentur, ac in expectatione sua pudeant, sed efficere vel tandem, vt mirando modo ab afflictionibus suis liberentur, & in æternum seruentur. Quare obsecro DOMINE, expergiscere, ac effice, ne impiorum hominum consilia promoueant, sed vt palam supplicijs afficiantur : Et quæso te DOMINE, vt seueritate tua des documentum, quo impiæ gentes sciant, se non esse quasi Deos, quales in persequendo populo tuo vis

deri volunt, sed esse miseros, fragiles, & abiectos homines. Hæc aut præcatio non pugnat, sicut supra ostendimus, cum lege diuina, qua nobis mandatur, vt diligamus proximum, benè precemur deuotibus nos, beneficiamus ijs, qui nos odio prosequuntur, oremus pro ijs, qui nos lædunt & insectantur: in hoc enim præcepto prohibetur priuata, illegitima, & carnalis vindicta. Precatio autem huius Psalmi recitat ex Spiritu sancto, publicam & legitimam vindictam, quam lex ipsa Dei in impios pronunciat, vt sit tanquam vastitium de eo supplicio, quod in impios (nisi resipiscant) certò est venturum. Porro in his versiculis, precipuè obseruandæ sunt illæ sententiæ: Impius incidit in foueam, quam facit. Et: Deus non obliuiscitur afflicti. Et: Expectatio afflictorum non perit. Hæ enim sententiæ magnam afferunt consolationem, & certam spem liberationis, ijs, qui in afflictione sua conuertuntur ad Deum, & inuocant eum ex fide in Christum.

VSVS HUIVS PSALMI.

Sicut duplex est argumentum Psalmi, gratiarum actio, & præcatio, ita vtendum est eo, tam pro accipitis, quam pro accipiendis à Deo beneficijs. Neque enim commodior, neque certior est ratio impetrandorum beneficiorum à Deo, quam si antè pro acceptis beneficijs gratum te exhibueris. Nam & hæc locum habet vulgatum prouerbium: Qui egent lucerna, infundunt oleum. Quo significatur, eos, qui cupiunt beneficia accipere, necesse habere, pro beneficijs antea acceptis, gratitudinem suam testificari.

Psalmus

Psalmus decimus.

Ut quid DOMINE recessisti, &c.

*Lorchæ, die 8. Aprilis, Anno 1557.
Explicatus.*



Tsi hic Psalmus generalis est precatio aduersus tyrannos & persecutores ecclesiæ Dei, tamen si circumferas oculos in ea tempora, quibus Saul in Israël regnauit, non est dubium, quin, cum miserrima, tum & fœdissima fuerit facies ecclesiæ populi

Dei, David ea occasione excitatus sit diuinitus, ad meditandam & componendam huius Psalmi precationem. Postquam enim Saul creatus est rex Israël, videbatur quidem initio veræ pietatis & honestatis studiosissimus: sed cum intelligeret regnum ad Davidem transferendum, palam impium suum & crudele, ac tyrannicum ingenium prodidit. Primum enim non solum persecutus est Davidem extremo furore, verum etiam iussit ob leuem tantum suspiciunculam, summum sacerdotem Achimelech, vnâ cum reliquis *1. Reg. 22.* octoginta quinque Sacerdotibus, crudeliter occidere, ac vniuersam ciuitatem eorum, vnâ cum omnibus ciuibus, mulieribus, pueris, infantibus, bobus, asinis & ouibus, immaniter vastare, & contrucidare. Quæ autem potuit esse ecclesiæ Dei in tam fœda & immani innocenti

innocentum sacerdotum strage, tranquillitas & incolumitas? Deinde, etsi Samuel Propheta, qui Saulem in regem vnixerat, adhuc vitam in terris agebat, & non occidebatur à Saule, tamen versabatur in magnis vitæ suæ periculis: & necesse habebat ipse quoq; propter tyrannidem & impietatem Saulis quasi exulare. Et cum Saul non potuerit ignorare, Dauidem à Samuele in Regem designatum, non pepercisset ne Samuelem quidem, nisi metu Israëliti populi à cæde eius retractus fuisset. Itaq; necesse habuit vniuersus tam Sacerdotum quàm Prophetarum, (hoc est) studiosorum verbi Dei ordo, in maximo semper discrimine esse. Vnde & in priori libro παραπομπῶν, cap. 13. dicitur: Non requisiiuimus Arcam DOMINI Dei nostri, in diebus Saul. Quæ res testimonium dicit, quòd ecclesia Dei temporibus Saulis, mirificè fuerit afflicta & deformata. Cum igitur Dauid reputaret cum animo suo tantam ecclesiæ suorum temporum sceditatem & vastitatem, excitatur & inflammatur rei indignitate, ac erumpit in hanc vocem.

1. *Ve quid DOMINE consistis à longè, occultas (te) in tempore tribulationis.*

Hæc quidem expositulatio videtur, non autè impia, sed pietatis plena. Quod enim dicit, hanc habet sententiam. Cum & ego & vniuersa ecclesia, videmur in maximis periculis, propter impietatem & tyrannidem Saulis versari, videtur quidem nobis, te à parte aduersarij nostri stare, ac à nobis faciem tuam abscondisse, nosq; deseruisse. Sed bene habet, quòd longius videris

dere à nobis recessisse, eò nobis propinquior es. Quare non murmuro aduersus te : sed ad te confugio, te inuoco, vt nobis in tanta afflictione succurras. Itaq; Daud format propositionem huius Psalmi, interrogatione, non quòd accuset Deum ignauitæ, aut desertionis, sed vt hac figura loquendi exprimat vehemens tiam affectus sui, quo petiturus est cœlestem opem. Nam & eodem consilio commemorat ingenium impiorum, sicut sequitur.

2. Cum exaltatur impius, persecutionem patitur pauper, mordicus tenent (impij) consilia, quæ excogitant (aduersus pios.)
3. Gloriatür impius de sua petulantia, & tyrannus applaudens (sibi) blasphemat DOMINVM.
4. Impius præ superbia ira sua non requirit (Deum,) omnes cogitationes ipsius (còspectant,) quòd non sit Deus.
5. Prosperum habent successum viæ eius, quouis tempore, longè sunt iudicia tua ab ipso, contra omnes inimicos suos inflatus est.
6. Dicit in corde suo : Non mouebor à generatione, in generationem, quia ero sine malo.
7. Os eius plenum est execratione, dolo & fraude : sub lingua eius labor & dolor.
8. Sedet insidiando in atrijs, in abscondito interficit innocentem, oculi eius in pauperem intenti sunt.
9. Insidiatur in abscondito, sicut Leo in spelunca, insidiatur vt rapiat pauperem, adeoq; rapit pauperem cum attrahit eum laqueo suo.
10. Percutit, humiliat, & deijcit violenter pauperes.

Q

11. Dicit

11. *Dicit in corde suo, oblitus est Deus, abscondit faciem suam, ut perpetuo non videat.*

Memorabilis ὑπερηφανία, qua exponitur, & sub oculos subijcitur ingenium & mores impiorum. Siue enim David intelligat Saulem, siue alios notet, certe his versiculis impij ita adumbrantur, vix ut alias imago eorum magis perspicua extet.

Primum enim, cum exaltatur, inquit, impius, persecutionem patitur pauper, impius eo est ingenio, ut si quando consequitur gloriam, sapientiam, potentiam, regnum & maiestatem, non conferat ea ad celebrandum nomen DOMINI, & ad iuuandam miseram atque afflictam ecclesiam Dei, sed potius ad persequendam & opprimendam eam. Exempla sunt Saul, Hierobosam, Iulianus, &c.

Deinde impij, si quæ consilia aduersus pios capiunt, non facile mutant, sed tenent ea mordicus, & exequuntur ea quoquo modo possunt. Sicut Cain non potuit ne diuina quidem admonitione à fratricidij sui instituto auerti: sicut Pharaon nullis potuit miraculis cohiberi, quo minus opprimeret Israëlitas: sicut Saul non potuit ullis vel amicorum, vel etiam dilectissimi filij sui Ionathæ precibus permoueri, ut consilium occidendi Davidis abijceret. Tanta enim est pertinacia impiorum, in persequendis pijs, ut malint ipsi quoque perire, quam pios non perdere.

Adhæc impius tanta est impudentia & procacitate, ut etiam si afficiat DOMINUM blasphemia, & prociocet eum manifesta sua tyrannide ad iram, tamen applaudat sibi, ac glorietur se Deo gratissimum prestare cultum.

cultum. Sic Saul, contrucitatis sacerdotibus & ciuibus in Nob, exultat, quasi re optimè gesta, quòd pro sua opinione, seditiosi, dignum factis supplicium recepiissent. Sic Pharisei & Pontifices applaudunt sibi, cum Christum crucifixissent: quòd cogitarent, se hominem longè omnium sceleratissimum de terra sustulisse. Et Christus ad Apostolos ait: Veniet tempus, vt quisquis interficiat vos, videatur cultum præstare Deo.

Præterea impij tanta sunt arrogantia, tanto animi tumore, vt in negotijs suis nullam prorsus habeant rationem Dei, aut verbi eius: sed contemnant Deum, vnà cum verbo, præceptis & mandatis eius, adeoq; haud obscurè vniuersis suis consilijs & institutis significent, quòd non credant Deum esse: tantum abest, vt Deum sibi ob oculos ponant & timeant. Ac profectò mirandum est impiorum ingenium, quòd etsi non verè credunt Deum esse, tamen semper habeant Deum in ore, glorientur de Deo, & iactent, se in actionibus suis, solam nominis Dei gloriam querere: Dicit insipiens (inquit alius Psalmus) in corde suo, non est Deus. Et Paulus ad Titum: Deum, inquit, profitentur se scire, cæterum factis negant: cum sint abominabiles, dicto non audientes, & ad omne opus bonum reprobi.

Deinde impij sunt inflati, & omnium hominũ contemptores. Hoc autem inde accidit, quia habent in hoc seculo felicem rerum suarum euentum. Iudicia Dei longè sunt ab eis, (hoc est) nō affliguntur à Deo, & vt alius Psalmus dicit, in labore hominum non sunt, & *Psal. 72.* cum hominibus non flagellantur. Et Iob, cap. 21. Impij

Q 2 viuunt,

viuunt, subleuati sunt, confortatiq; diuitijs, semen eorum permanet coram eis. Et mox: Domus eorum securæ sunt, & pacatæ, & nō est virga Dei super illos. Et Hier. 12. Quare via impiorum prosperatur, benè est omnibus, qui prauaricantur & iniquè agunt. Vnde & vulgò prouerbiū iactatur: Quò peior homo, eò melior fortuna. Cum ergo impij sint in hoc mundo felices, idcirco inflantur aduersus omnes inimicos suos, & contemnunt præ se omnes homines. Sic Ecclesiast. cap. 8. Quia non profertur citò contra malos sententia, absq; timore vllō filij hominum perpetrant mala.

Adhæc impij sunt securi: pollicentur sibi magnam & diuturnam felicitatem: Non mouebor, inquit, impius, à generatione in generationem, hoc est, nulla vnquam accidet mihi calamitas, semper perdurabo in mea felicitate: nec est qui mihi eam adimere queat. Sic dicit impius apud Mosen, Deut. 29. Pax erit mihi, & ambulabo in prauitate cordis mei. Et Esa. 28. dicunt impij: Percussimus fœdus cum morte, & cum inferno fecimus pactum, flagellum inundans, cum transierit, non veniet super nos.

Insuper, quæ docent aut loquuntur impij, non sunt nisi impia, execranda, fraudulenta, dolosa, & afferunt laborem ac dolorem, coniiciunt homines in exitium & interitum. Non enim docent verbum Dei, sed humanas tantum traditiones: & nisi quis eas approbasuerit, ac sequatur, deuouent eum diris execrationibus. Quod si verò eas fueris secutus, ducunt te in perpetuas ærumnas, vnde Esa. cap. 59. de doctoribus humanarum traditionum ait: Conceperunt laborem, & pepererunt

pepererunt iniquitatem. Oua aspidum ruperunt, & telas araneæ texuerunt. Qui comederit de ouis eorum, morietur, & quod conforium est, erumpet in regulum. Telæ eorum non erunt in vestimentum, &c.

Præterea impij insidiantur alienæ felicitati, fortunis & vitæ. Ac præsertim in aulis principum, casum niantur innocentes, ac obseruant sicut Leones in speluncis suis, omnes occasiones, quibus miseros homines capiant & opprimant. Exemplum est Doeg 1. Reg. 22. Deinde impij sunt crudeles, & viri sanguinum. Exempla sunt Cain, Saul, Achab, Caiphas, Pharisæi, &c.

Ac breuiter, impij sunt Epicuræi, hoc est, contemptores Dei: multa quidem concionantur de Deo, sed in corde suo non agnoscunt Deum: aut enim non credunt esse Deum, aut existimant eum non curare humana. Sperant se impune laturos, quicquid mali aduersus pios designauerint, propterea quod putent Deum non requirere, quid in terris inter homines fiat, aut obliuisci scelerum. Iob. 22. Quid nouit Deus? Et quasi per caliginem iudicat. Nubes latibulum eius, nec nostra considerat, & circa cardines cœli perambulat. Hierem. Thre. 3. Ex ore altissimi non egrediuntur, nec bona, nec mala. Ezech. 8. & 9. Dicunt impij: Non videt DOMINVS nos, dereliquit DOMINVS terram.

Habes ingenium & mores impiorum: sed quo consilio, & in quem usum recitat ea Dauid? Num vt exponat ea Deo ignoranti? Nihil minus, Deus enim est scrutator cordium, & patent coram eo, non homines tantum siue pij, siue impij, verum etiam vniuersæ creaturæ:

turæ: sed recitat, vt seipsum admoneat periculorum, quæ sibi ab impijs impendent, & excitet in se maiorem precationis vehementia & ardorem, vnde & sequitur.

12. *Exurge DOMINE Deus, exaltetur manus tua, ne obliuiscaris pauperum.*
13. *Propter quid blasphematur impius Deum? Dicit in corde suo, quod non requiras.*
14. *Certè vides, quoniam tu laborem & dolorem afficis, vt recipias in tuam manum, in te reijcitur pauper, orphanus tu es adiutor.*
15. *Contere brachium impij, inquire in malignum, tunc impietas eius non inuenietur.*
16. *DOMINVS regnat in æternum & perpetuò, pereunt gentes de terra sua.*
17. *Desiderium pauperum exaudi DOMINE, confirmas cor eorum, accendit auris tua.*
18. *Vt vindices pupillum & oppressum, ne deinceps committat homo de terra, vt conterat (eos.)*

Post descriptionem ingenij impiorum, subiicit precationem, in qua non solum petit defensionem aduersus insidias & crudelitatem impiorum, verumetiam refutat antithesi, Epicuræam opinionem eorum, qui sentiunt, Deum non curare humana, & non respicere miseros & afflictos homines. Cum ergo tanta sit impiorum superbia, tyrannis, crudelitas, securitas, & iniquitas, quanta nunc enumeravi, exurge quæso DOMINE, & illustra manum seu potentiam tuam: ac effice, ne impij nomen tuum impune blasphemant.

Ostende

Ostende reipsa, proba factis, quod & corde impie de te sentiant, & verbis pura puta mendacia, & execrandas blasphemias de te spargant. Dicunt te obliuisci pauperum & afflictorum, tu autem non obliuisceris. Dicunt te non requirere, nec videre, aut curare, quid orphano & pupillo in his terris accadat, tu autem requiris & vides, tu es ille qui verè nouit, & animaduertit, quantos labores, quantas ærumnas, quantos aduersariorum furores & impetus sustineant pī homines, & vt alius Psalmus habet, tu passus fugæ eorum *Psal. 55.* numeras, & lacrymas eorum in virem tuam colligis, ac gemitus ipsorum in registro tuo consignas. Dicunt, pios esse à te desertos, tu autem tunc maximè omnium, in manum, & tutelam tuam recipis eos, cum videntur esse abiectissimi. Dicunt miseros & orphanos non habere vllum adiutorem. Hi autem tunc maximè omnium à te respiciuntur, & conseruantur, cum nulum vsquam auxilium apparet. Dicunt sibi nullam vnquam posse calamitatem accidere, & pollicentur sibi perpetuam felicitatem. Quæso autem te DOMINE, vt quod potes, brachium seu potentiam eorum contemas, & in impietatem eorum inquiras, ac eam iudicandam & puniendam suscipias. Sic enim fiet, vt reipsa cognoscatur, impiam eorum securitatem, & felicitatem non constare, nec perdurare. Dicunt regnum orbis terrarum ad se pertinere, & instantur erga omnes homines, qui se ipsis opponunt. Ego autem dico, quod DOMINVS regnet, idq; non vno tantum & altero anno, sed in æternum & perpetuò: & quod regnum impiarum gentium, necesse habeat, vel tandem perire. Dicunt Deum non respicere gemitus pauperum, nec

curare

curare agritudinem cordis eorum, nec arrigere aures suas ad preces eorum, vt supplicium sumat de ijs, qui ipsos violenter & crudeliter opprimunt. Tu autem DOMINE, tantò magis exaudis gemitus, & curas afflictiones cordis, atq; animaduertis preces eorum, quantò crudelius ab impijs tractantur. Itaq; statues in impios tam horribile exemplum, vt hoc alij homines admoniti & exterriti, nihil deinceps mali aduersus pios meditentur. Pestilente enim flagellato, stultus sapientior erit.

Habes in hac posteriori parte huius Psalmi, refutationem sententiæ impiorum Epicuræorum, qui negant Deum habere curam rerum humanarum, ac præsertim miseræ & afflictæ suæ Ecclesiæ. Etsi autem verba tantum verbis simpliciter opponuntur, tamen manifestum est testimonium eorum, quòd Psalmi non sint somnia hominum, sed oracula Spiritus sancti. Et extant etiam alia testimonia in libris Moysi, in Iobe, in Iosua, in historijs Iudicum, in cantico Deborahæ, & in cantico Hannæ matris Samuelis, quæ scripta extabant in ecclesia Dei, priusquàm Psalmi Davidis conscripti, & in vnum volumen collati fuerunt. Exempla quoq; & miracula, quibus sententiæ huius Psalmi probantur, non erant illis temporibus ignota.

Accedit & hoc, quòd Psalmi non sunt hoc consilio scripti, vt essent proluxa commentaria, sed tantum indices, & compendia rerum gestarum, ac breuia piæ doctrinæ capita. Quare non est mirandum, quòd in hoc Psalmo nudæ tantum sententiæ Spiritus sancti, nudis sententijs Epicuræorum opponantur.

tur. In explicatione autem Psalmi conferenda sunt, quæ aliàs ad confirmandas has Spiritus sancti sententias, & ad confutandam Epicuræorum impietatem extant. Genes. 12. Benedicam benedicientibus tibi, maledicam maledicentibus tibi. Hæc promissio testificatur, Deum defendere pios, & opprimere aduersarios eorum. Exod. 15. Ego sum D O M I N V S Deus, medicus tuus. In hac promissione recipit Deus se curaturum omnia aduersa piorum. Num. 9. Nubes per diem, & species ignis per noctem supra tabernaculum D O M I N I, testabantur, D O M I N V M populo suo ab omnibus deserto, præsentem esse, & tueri eum. Deutero. 4. Non est alia natio tam grandis, quæ habeat Deos appropinquantes sibi, sicut Deus noster adest cunctis obsecrationibus nostris. Hoc quid est? Nisi illud Psalmi: Desiderium pauperum exaudis D O M I N E, &c. Et Deuteron. 10. D O M I N V S Deus vester facit iudicium pupillo & viduæ, amat peregrinum, & dat ei victum atq; vestitum. Iudic. 5. Sic pereant omnes inimici tui D O M I N E, Qui autem diligunt te, sicut Sol in ortu suo splendet, ita rutilent. Huc etiam pertinent miracula, quæ in his libris, vnde & petenda sunt, recensentur, ac probant, Deum respicere afflictos, & punire impios, ac securos Dei contemptores.

R

VSVS

VSVS HVIVS PSALMI.


Sicut David hoc Psalmo vsus est, non solum contra Regem Saulem & aulicos, qui erant impij Hypocritæ, & crudeles persecutores piorum, ac contemptores Dei & verbi eius, verumetiam aduersus finitimas gentes, quæ tam insidijs, quàm bellis populum Dei persequabantur, ita nobis eo vtendum est, primum aduersus Turcas, qui sperant felicitatem suam, quam habent in opprimendis Christianis, perpetuam fore: & blasphemant Christum filium Dei, tanquam imbecilliorē, quàm qui possit populum suum defendere. Tales enim sunt Turcæ ingenio & impietate, quales impij in hoc Psalmo describuntur.

Deinde vtendum est eo aduersus tyrannos & hypocritas, persecutores Euangelij, qui noctu diuq; consilia capiunt, quibus prædicationem Euangelij de medio tollant, & miseram Ecclesiam opprimant. Sic posuit eo vti Stephanus aduersus consilium Pontificum, Act. 6. & 7. Et Petrus cum ab Herode captiuus tenebatur, Act. 12.

Postremo licet eo vti in priuatis quibusq; tentationibus, de cura Dei erga se in aduersis. Cum enim aduersa apparent nobis grauiora, quàm vt ferre queamus, sollicitatur animus, vt existimet Deum negligere preces nostras, & non curare afflictionem nostram, nosq; omni humano auxilio destitutos, etiam
à Deo

à Deo ipso desertos esse. Hic ergo opportunum est,
hunc Psalmum in manus sumere, & ex eo
imbecillitati fidei, atq; agritus
dini animi succurs
rere.





Breuis & perspicua
explicatio Psalmorum
Dauidis.

A V T O R E

Ioanne Brentio.

DECAS SECVNDA.



TVBINGÆ,
Apud viduam Vlrici Morhardi.
Anno 1567.

PSALMI SECVNDÆ
Decadis.

11. *In DOMINO confido, quomodo dicitis, &c.*
12. *Saluum me fac DOMINE.*
13. *Vsq; quò DOMINE.*
14. *Dixit insipiens in corde suo.*
15. *DOMINE quis habitabit in tabernaculo tuo.*
16. *Conserua me DOMINE.*
17. *Exaudi DOMINE iustitiam meam.*
18. *Diligam te DOMINE fortitudo mea.*
19. *Cæli enarrant gloriam Dei.*
20. *Exaudiat te DOMINVS in die tribulationis.*

Psalmus II.

In DOMINO confido, quomodo dicitis, &c.

*In Alpersbach, die 27. Iunij, Anno 1557.
explicatus.*



Hic Psalmus non est precatio, sed confessio fidei, aduersus calumniatores. Cum Dauid in exilium nunc quidem à Saule, nunc autem à filio suo Absolone pelleretur, incurrit, vt fieri solet, in varia hominum iudicia. Alij enim iudicabant eum seditiosum, & virum sanguinum, ideoq; diuinitus ac iuste affligi. Alij sentiebant eum innocentem quidem esse, sed non posse è tot aduersariorum calumnijs eluctari, iuxta vulgatum dictum: Aduersus sycophantæ morsum nullum est remedium. Sunt quidem sua remedia aduersus omnia penè corporalium vulnerum genera inuenta: aduersus autem ictum calumniatoris, nullum videtur remedium. Qui ergo ita affecti sunt, vt existiment fieri non posse, quin opprimatur is, qui multorum, ac præcipuè potentum & sapientum calumnijs percellitur, reprehenduntur hoc Psalmo, & erudiuntur, quòd etsi nulla patet via liberationis à calumnijs sycophantarum apud homines, multa tamen & magna ac certa sit laus apud DOMINVM Deum nostrum. Vbi enim desinit auxilium humanum, ibi incipit

pit diuinum. Itaq; sententia Psalmi, vt paraphrasi explicetur, hæc est. In tantis calumnijs, quibus me hostes mei premunt, colloco omnem fiduciam meam in solo DOMINO Deo nostro: nec sinam me vnquam ab hac statione depelli. Et si enim impij mei aduersarij excogitant, & aduersus me varias calumnias, vt clam, tanquam sagittis, me ex insidijs traiciant & confodiant, ac firmissima quæq; mea præsidia, ita subuertere videntur, vt nusquam mihi euadendi via pateat, tamen DOMINVS, qui & in templo Hierosolymitano colitur, & in cælo habitat, omnia intuetur, ac rectè iudicat inter pios & impios. Fauet enim pio, etiamsi affligatur: odio autem habet impium, etiamsi prosperum habeat rerum suarum successum. Et perdet tandem impium horribili genere supplicij: pium autem conseruabit perpetuo. Quare pius optimè speret, & certò confidat, quòd etiamsi calumniæ sycophantarum ad tempus obtineant, tamen DOMINVS tuebitur eum mirando modo.

1. *In DOMINO confido, quomodo dicitis animæ meæ, fuge montem vestrum velociter.*

Vbi vetus tralatio habet: Sicut passer, ibi Hebræus habet צִפּוֹר Zipor, quod est generale nomen auium, ac significat etiam, manè surgere. Nos igitur interpretati sumus pro velociter seu citò. Solenne enim est Hebræis, vt non tantum nominibus adiectiuis, verum etiam substantiuis pro Aduerbijs vtantur. Sic Psalmo 2. Pereatis de via, vbi pro (via) Hebræus habet דֶּרֶךְ Derech, quod significat quidem viam, sed sumitur

mitur hoc loco aduerbialiter, pro subito, quod Germanicè dicitur, *stracks Wegs*.

Hic ergo versiculus est propositio Psalmi, & continet tam confessionem fidei, quam reiectionem, ac reprehensionem eorum, qui ad dubitationem aut incredulitatem, propter grauitatem & magnitudinem calumniarum sollicitant. Et hæc est sententia. Vos quidem siue amici, siue inimici mei, dicitis animæ meæ, vt fugiat montem vestrum velociter, hoc est, vt abijciat omnem suam fiduciam, quam habet in verum Deum, qui in monte Zion colitur. Vos existimatis me è tot ac tantorum hominum calumnijs non posse eluctari, ac me frustra sperare cœlestem opem. Ego verò haudquaquam committam, vt abijciam fiduciam meam in DOMINVM. Ego, etiamsi fractus illaberetur orbis, in DOMINO tamen confido. Cæterum quòd in hoc versiculo, per montem intelligatur DOMINVS Deus noster, vsitatum est in Scriptura, partim, quòd qui in monte Zion colebatur, verus erat Deus: partim quòd Christus filius Dei, verus & æternus Deus, reuelandus erat prædicatione, miraculis, & missione Spiritus sancti, in monte Zion, & in vrbe Hierusalem. Psal. 120. Leuaui oculos meos in montes, vnde veniet mihi auxilium, hoc est, ad Deum, qui in mōtanis Zion colebatur. Esa. 2. In nouissimis diebus erit preparatus mons, domus DOMINI in vertice montium, & eleuabitur super colles. Et fluent ad eum omnes gentes. Et cap. 31. Dixit DOMINVS, cuius ignis est in Zion, & caminus eius in Hierusalem.

2. *Quoniam ecce impij intendunt arcum, parant sagittas suas*
a 3 *super*

- super neruum, vt sagittent in obscuro rectos corde.*
3. *Quæ firma (videbantur) subuertunt. Iustus quid faceret.*
 4. *DOMINVS in templo sancto suo, DOMINVS cuius sedes est in cælo, oculi eius aspiciunt, palpebra eius explorant filios hominum.*
 5. *DOMINVS explorat iustum & impium. Sed anima eius odit illum, qui diligit iniquitatem.*
 6. *Pluet super impios fauillas ignis & sulphur, ac Spiritus procellarum, pars calicis eorum.*
 7. *Quoniam iustus DOMINVS, diligit iustitias, & vultus eius aspiciunt rectum.*

Hi sex versiculi sunt ratio propositionis, cuius sententiam paraphrasi percurramus. Confido, inquit, in DOMINO, nec sequar consilium eorum, qui me ad abiiciendam fiduciam, propter magnitudinem calumniarum cohortantur. Quid ita? Quia etsi impij calumniatores in hoc solum studium incumbunt, vt venenata sua lingua, quæ est velut arcus & sagitta, me & alios pios, clam in extremum interitum conijciant, ac omnia, quæ nobis tutissima & firmissima præsidia videntur, suis calumnijs ita inuertant, vt nullum nobis effugium pateat, & pal'am glorientur, iustos imbecilliores esse, quàm vt possint resistere, aut euadere. Hæc (inquam) etsi ita se habent, tamen Deus, qui in templo sancto suo, Hierosolymis colitur, & in cælo habitat, hoc est, non commentitius Deus, quales Ethnici Deos colunt, sed verus & æternus Deus, non deserit pios, nec approbat causam impiorum sycophantarum: sed facit quod est æqui iudicis, non accipit cuiusquam personam, audit sicut magnum, ita & paruum, cognos-

scit

Deut. 1.

scit causam, tam piorum quam impiorum: ac hos quidem odio habet ex animo, & detestatur eos. Nec committet, ut impietatem suam diu impune ferant, sed sicut quondam pluit ignem & sulphur, super Zodomam & Gomorrhā, ita afficiet etiam impios calumniatores horribili supplicio. Quod enim accidit Zodomitis, hoc idem merentur sycophantæ: & quam supplicij partem, quem poenæ calicem effudit DOMINVS super Gomorrhitas, eundem effundet etiam super calumniatores. Hæc est (inquit) pars calicis eorū, hoc est meritum supplicium, quod ipsis propter impietatem debetur: Sicut & alias calix more Hebræo pro sua cuiq; assignata portione, siue felicitatis, siue infelicitatis, accipitur. Psal. 16. DOMINVS pars hæreditatis meæ, & calicis mei. Hier. 49. Ecce quibus non erat iudicium, ut biberent calicem, bibentes bibent, &c. Matth. 20. Potestis ne calicem bibere, quem ego bibam, hoc est, suscipere in vos ærumnas & afflictiones, quæ mihi accident? Sicut autem DOMINVS abominatur impios sycophantas, & perdet eos horribiliter, ita amat ex animo pios, iustos & rectos corde, & complectitur eos tanta cura, ut ad interitum eorum haudquaquam conniveat. Quare cum nos, in quos multæ & magnæ calumniæ, tanquam iacula & sagittæ conijciuntur, habeamus iustam causam, non est nobis de cœlesti ope dubitandum, sed optimè de diuina clementia confidendum, quod etsi nos quoq; sumus coram Deo peccatores, tamen Deus tanta est bonitate, ut remittat nobis credentibus in Christum peccata, & conseruet nos in omnibus aduersis, impoenitentes autem sycophantas perdat.

Ex

Ex his initiò obseruandum est, in quod genus peccatorum referendi sint sycophantæ & calumniatores. Dicit enim Psalmus: Intendunt arcum, parant sagittas, vt clam interimant rectos corde, Hoc autem est Sicariorum & homicidarum. Calumniatores igitur non pertinent in catalogum leuium, sed grauissimorum scelerum, & reputantur in iudicio Dei pro homicidis. Psal. 57. Filij hominum, dentes eorum arma & sagittæ, & lingua eorum gladius acutus. Prouer. 25. Iaculum & gladius, & sagitta acuta, homo qui loquitur contra proximum suum falsum testimonium. Vnde & Deut. 19. redditur falso testi & calumniatori, sicut cogitauit fratri suo facere: Non misereberis (inquit) eius, sed animam pro anima, oculum pro oculo, dentem pro dente, manum pro manu, pedem pro pede exiges. Memorabile est, quod Thearidas quidam Dux Lacædemonius de calumnia dixit. Cum enim gladium cote acueret, rogatus à quodam, num esset satis acutus, respondit: Acutior calumnia. Significans, calumniam esse rem nocentissimam.

Deinde obseruanda est grauitas huius peccati, ex grauitate supplicij. Sicut enim quondam Zodomitæ perierunt igni & sulphure, ita Psalmus dicit, calumniatores simili supplicio dignos esse. Pluet (inquiens) super eos carbones ignis, & sulphur, &c. Hæc eò commemorantur, vt cognita magnitudine & grauitate huius peccati, à mutuis calumnijs abstineamus.

Postremo, hi versiculi commendant Deum, à iustitia, æquitate & rectitudine iudicij sui, vt pii, qui ab impijs affliguntur, in aduersis benè confidant, nec sinant se à fiducia abduci. Et si enim in præsentia non videtur

detur nisi interitus, & pii sua quoque peccata habent, tamen Deus condonat ipsis peccata propter Christum, in quem credunt, & patefacit vel tandem sententiam iudicii sui aduersus impios, ut pii mirando modo seruentur. Vnde veteres dixerunt: Deum habere lances pedes, quod lentè ad vindictam procedere videatur. Sed quò tardius, eò grauius de sceleratis supplicium sumit.

VSVS HVIVS PSALMI.

Hic Psalmus est *Ἰδαντὸς*. Docet igitur veram rationem, qua calumniā effugere, & superare queamus. Alij aliud aduersus calumniam remedium quærunt. Hic execratur, & diris deuouet calumniatores, ac vicissim excogitat calumnias, sed hoc modo augetur malum, non tollitur: ille nimis acurata & loquaci vtitur excusatione: sed quia veritatis simplex est oratio, in suspicionem tantò maiorem incurris, quantò magis anxiosa & morosa est excusatio. Appelles pictor vltus est calumniam publica pictura. Sed non est melior ratio vltionis, quàm quæ nobis in hoc Psalmo demonstratur: videlicet, ut quò grauior est calumnia, eò maiorem fiduciam concipiamus, & speremus, quòd DOMINVS nos, sicut in media morte, ita & in medijs calumnijs sit seruaturus, & innocentiam nostram tandem patefacturus. Postquàm enim Christus filius Dei sustinuit varia genera calumniæ, ita eam sanctificauit, ut necesse habeat piijs credentibus in Christum esse adiumento ad gloriam nominis eorum: tantum abest, ut sit ipsis perpetuò ignominiosa & perniciofa.

Psalmus 12.

Saluum me fac DOMINE, &c.

*Apud Diuum Georgium in Sylua Marciana, quam
nunc vocant Hareyniam, die 29. Iunij,
Anno 1557. explicatus.*



2. Cor. 1.

Ultæ sunt causæ, cur Deus con-
niueat, vt pñ in hoc seculo afflis-
gantur. Inter eas autem causas,
non est postrema, quod obijciat
pios varijs ærumnis: vt postquã
fuerint diuina clementia & mi-
rando modo conseruati ac libe-
rati, prædicent gloriam nominis
Dei, commendent gratuitam misericordiam eius, &
excitent alios afflictos, ad fiduciam & inuocationem
Dei. Deus pater misericordiarum (inquit Paulus) cõs-
solans nos in omni afflictione nostra, in hoc, vt possis
mus consolari eos, qui sunt in quauis afflictione, per
consolationem, qua nos ipsos consolatur Deus. Cum
igitur Deus complecteretur Dauidem ingenti fauore
& gratia, permisit, vt varijs calamitatibus exercere-
tur: non eo consilio, vt opprimeretur & periret, sed
vt mirabiliter conseruatus, alios exemplo suo ad spem
& animi fortitudinem cohortaretur. Inter eas autem
calamitates, quæ acciderunt Dauidi, non solum nume-
randa est persecutio manifestorum hostium, verum
etiam

etiam pericula inter adulatōres, fictos amicos, falsos fratres, Thraſones, & Pyrgopolinices, qui solent opem suam magnificis & prolixis verbis polliceri: sed tantum abest, vt in periculis aliquid opis misero conferant, vt potius eum calumnijs, proditionibus, & alijs malis artibus opprimere studeant. Quare David instituit in hoc Psalmo querelam, quod multi quidem videantur, si promissa eorum respicias, beneuoli, amici & fautores: sed si opera eorum consideraueris, omnia plena sunt mendacijs, simulatione, hypocrissi, & perfidia. Non solum autem conqueritur in hoc Psalmo de paucitate verorum amicorum, & piorum hominum, verum etiam addit consolationem, vt qui in periculis deseruntur ab amicis, sciant se diuinitus adiuuari, & tam inter manifestos inimicos, quam inter hypocritas & falsos amicos conseruari.

1. *Salua DOMINE, quoniam rarus est beneficus, & pauci sunt synceri inter filios hominum.*
2. *Vana loquuntur, cum proximo quisq; suo, labijs blandis, alio atq; alio corde loquuntur.*

In his primis duobus versiculis continetur querela de paucitate eorum, qui sunt verè candidi, integri, & synceri amici. Nam quod initio dicit: Salua DOMINE, non est propriè precatio, sed potius admiratio, pro quo Latine dici solet: Bone Deus. Vel: O factum male, Et Germanicè: *Hilff Gott/wol seind so wenig frommer Leut/vnd rechtgeschaffene Freünd auff Erdenreich.* Rem mirandam & miserandam, quod tam pauci sint veri & integri amici, plenus autem sit

orbis terrarum eorum hominum, qui verbis quidem amicitiam præ se ferunt, sed in corde gestant inimicitiam: qui altera manu panem ostentant, altera lapidē ferunt: qui blanda loquuntur, sed hostilia meditantur: qui quæ dicunt, non simplici, sed duplici, hoc est, vano, vario, & inconstanti corde dicunt. Prouer. 20. Multi homines misericordes, seu benefici vocantur: virum autem fidelem quis inueniet? Queruntur etiam Ethniconum literæ de perfidia amicorum.

Ouidius. Turpe quidem dictu, sed si modo vera fatemur:
Vulgus amicitias vtilitate probat.

Et iterum.

En ego non paucis quondam munitus amicis,
Dum flauit velis aura secunda meis.
Vt vera nimbofo tumuerunt æquora vento,
In medijs, lacera naue, relinquo aquis.

Ac rursus.

Tuta frequensq; via est, per amici fallere nomen:
Tuta frequensq; licet sit via, crimen habet,

Et Germanicus Rhyemus.

Freündt in der not/
Sehn fünff vnd zweinzig auff ein Rot/
Solo aber ein harter Grande sein/
So gehn jr fünffzig auff ein Quintlein.

Hæc autem eò recitantur, vt agnito hominum ingenio, vtamur quidem amicorum opera, dum & quas tenus licet: non collocemus autem fiduciam nostram

in

In vlllo homine , quantumuis amico : sed tantum in
DOMINO Deo nostro.

3. Succidat DOMINVS, omnia labia blandiloqua, linguam loquentem magnifica.
4. (Eorum) qui dicunt, quod verbis loquimur, confirmabimus rebus. Sermo noster in manu nostra est, quis est qui possit promissa nostra impedire?

Postquam Dauid commemorauit in primis versibus paucitatem integrorum amicorum, & perfidiam hominū, excitatur indignitate rei, & inflammatur aduersus hypocriticos amicos, tanto spiritu, vt inuehatur in ipsos grauissima imprecatione : Vtinam, inquit, DOMINVS excindat omnium eorum labia, & linguas, qui in promittenda sua ope proijciunt ampullas & sesquipedalia verba, ac sanctissimè recipiunt, se promissa sua certissimè seruatueros : quippe quòd tanta sint, & potentia, & autoritate, vt quod volunt, facere possint, & quod verbis pollicentur, factis præstare queant. Neminem enim tam potentem esse, qui dominationem in ipsos habeat, & voluntatem ipsorum impedire possit. Et tamen cum res auxilium eorum serio postulauerit, non solum non præstant quod promiserunt, verumetiam maiora dant damna, quam hostes ipsi. Quid ergo? Licet ne pio homini, perfidis amicis imprecari, vt linguæ eorum excendantur? An non benè precandum est, etiam inimicis? De hac re sæpè in exponendis Psalmis admonemur. Alia enim est imprecatio spiritus, alia carnis. Ac imprecatio quidem carnis execranda est, & Deo abominanda, quales

ferè sunt vulgares hominum imprecationes. Imprecatio autem è Spiritu sancto excitata, qualis est hoc loco Davidis, non est nisi annuntiatio, & explicatio seueritatis diuini iudicij erga impios: quæ adnuntiatio, cum in ijs, qui ad hoc munus à Spiritu sancto vocantur, sit officium, non est peccatum aduersus Deum, sed obsequium erga Deum. Cauendum autem est summo studio, ne nos ipsos decipiamus, & ne quod carnis est, spiritui imputemus.

5. *Propter desolationem pauperum, & propter gemitum inopum, nunc exurgam dicit DOMINVS, collocabo eos in salute, consolatio erit eis.*
6. *Eloquia DOMINI, eloquia pura (sicut) argentum, examinatum in vasculo testaceo, purgatum sepius.*

Quid ergo fiet homini pio, sic tam turpiter ab amicis in medio inimicorum deserto? Nunquid quemadmodum deseritur ab hominibus, ita deseretur etiam à DOMINO Deo nostro? Nihil certè minus, sed quò magis destituitur humana ope, eò propinquius est ei cœleste ac diuinum auxiliū. Nunc (dicit DOMINVS) exurgam. Antè quidem videbar dormire, cum adhuc aliquid humanæ spei adesset. Nunc autem, postquam pauperes, inopes & afflicti mei, ita sunt ab hominibus deserti, vastati & oppressi, vt nihil aliud præter gemitum eis sit relictum, expergiscar, & seruabo eos mirando modo, conferam in eos certissimam salutem, vt multò maiorem cōsolationem accipiant, quàm antea tristitiam habuerunt: & non tam falsi sint eloquio & promissione vanorum amicorum, quàm iuuabuntur

buntur & seruabuntur meo eloquio, & certitudine
meæ promissionis. Longè enim alia est ratio eloquiorum
ac promissionum Dei quàm hominum, etiam am
icissimorum. Horum enim eloquia seu promissa so
lent esse vana, incerta, instabilia, & mendacia, nec cons
tant in aduersis, & qui ihs confidit, pude fiat necesse est.
Eloquia autem seu promissa Dei, sunt verissima &
certissima: atq; adeò sunt velut purum & probum
argentum, quod cum sæpè ac multum in igne, in vasis
testaceis examinatum sit, semper tamen syncerum &
probum inuentum est. Cum igitur ego DOMINVS
Deus vester, promittam vobis meam opem, & dicam,
me iam nunc exurgere, ad conferendam in vos mis
eros & afflictos, ac ab omnibus alijs desertos homines,
coelestem opem & salutem, optimè confidite, non fals
let vos mea promissio, sicut humana fallere solet, sed
constabit, sicut probum argentum in igne constat, &
conseruabit vos in omnibus periculis.

Hæc est memorabilis antithesis, diuinarum & hu
manarum promissionum. Hæ enim fallunt, illæ au
tem fallere non possunt. Humanæ promissiones non
constant in igne probationis, Diuinæ autem ita cons
tant, vt etiam si videantur aduersis excuti & absumi,
tamen quemadmodum purum aurum seu probum ar
gentum, quantò sæpius igni examinatur, tantò pro
batiùs redditur, ita diuinæ promissiones, quantò ma
gis aduersis percelluntur, tantò firmiores & certiores
probantur: vt quisquis ihs confidit, pude fieri non pos
sit. Exempla sunt in promptu iam inde ab initio orbis
terræ. Deus promisit Abraham multiplicationem pos
teritatis suæ, possessionem terræ Canaan, & benedic
tionem

tionem in semine eius, quod est Christus. Etsi autem multa videbantur cum hac promissione pugnare, tamen veritas eius, rebus ipsis probata est, sicut puritas argenti in igne constat. Deus promisit Dauidi stabilitatem regni Christi filij eius: Suscitabo, inquit, sementuum post te, Stabiliam thronum regni eius vsq; in sempiternum. Quanquam autem Babylonij deuastauerunt vrbem Hierusalem, & Antiochus oppressit familiam Dauidis, ac Pontifices & Pharisei tradiderunt Christum filium Dauidis in mortem, tamen sicut probum argentum constat in igne, ita & promissio illa firmissima mansit, quia Christus excitatus à mortuis, perpetuò regnat in cœlo & in terra. Sic & de alijs promissionibus Dei sentiendum est. Nam illas exempli tantum gratia commemorauimus.

7. *Tu, DOMINE, serues eos, & custodias nos, à generatione ista in aeternum.*
8. *Impij vndiq; obambulant, cùm exaltantur vani homines inter filios hominum.*

Concludit Psalmum precatione, qua petit, vt quod Deus miseris & afflictis promisit, hoc etiam, sicut pij fore non dubitant, reipsa impleat. Generationem autem vocat cœtum vanorum amicorum, qui opem suam prolixè pollicentur, sed fallunt. Quæso igitur te D O M I N E, vt conserues & custodias nos perpetuò, ne vanis amicorum promissis seducamur. Nam cùm vani illi homines consequuntur potestatem & dominationem in humano genere, omnia fiunt plena impiorum adulatorum, hypocritarum, parasitorum,
& fals

& falforum amicorum: Princeps, (inquit Salomon) qui libenter audit verba mendacia, omnes ministros habet impios. Et vulgatus est versiculus:

Regis ad exemplum totus componitur orbis.

Vbi autem est multitudo impiorum & vanorum hominum, ibi necesse habent pii multa incommoda ferre, ac etiam opprimi. Psal. 10. Cum exaltatur impius, persecutionem patitur pauper. Quare diligenter orandum est, vt Deus pios in multitudine impiorum, & in medio prauæ nationis tueatur.

VSVS HVIVS PSALMI.

Sicut David suos habuit fictos amicos, qui erant lingua strenua, opera autem ignava, ita non solum publice vniuersa Ecclesia, verumetiam priuatim pius quisquis suos habet falsos fratres, qui studium suum prolixè quidem pollicentur, sed non satisfaciunt expectationi amicorum: Cauete, inquit Christus, à Pseudoprophetis, qui veniunt ad vos in vestimentis ouium. Hi sunt, qui simulant se esse amicos Ecclesiæ, & pollicentur hominibus, pro meritis suorum operum, non tantum mundanam, verumetiam cœlestem felicitatem. Sed intus sunt lupi rapaces, quia quærunt aut gloriam nominis sui, aut opes, aut voluptatem: & interea coniiciunt vanis suis promissis, miseros homines in æternum exitium. In tali periculo properandum est ad hunc Psalmum, vt ex eo consolationem petas, & discas, te inter falsos fratres & Pseudoprophetas Deo curæ esse, & conseruari.

Deinde memorabile extat encomium promissio-
c num

num Dei, in hoc Psalmo: Eloquia DOMINI, eloquia pura, seu proba, sicut argentum igni examinatum. Et hoc encomio excitandi sumus in omnibus aduersis, ad firmam & stabilem fiduciam, vt cogitemus, certiores esse veritatem diuinarum promissionum, quam comminationes omnium, quamuis grauissimarum afflictionum: Maior est, inquit Ioannes, qui in nobis est, videlicet, filius Dei, per fidem, quæ adhibetur promissioni, seu Euangelio eius, quam qui in mundo, hoc est, Satan, qui est Princeps huius mundi, & minatur nobis per afflictiones extremum interitum.

Psalmus 13.

Vsq; quò DOMINE, &c.

*Murrharti, die 25. Ianuarij, Anno 1558.
explicatus.*



Ecce dixerunt veteres, nullum Dei cultum difficiliorem esse, quam orare Deum. Etsi enim facile est verba orationis recitare, tamen illud demum difficillimum est, Deum ex fide orare, seu inuocare, & in oratione non defatigari. Nunc enim nostra indignitas, nunc summa Dei Maiestas, deterrent nos ab iuuocatione, nunc afflictionum magnitudo, nunc earum diuturnitas

turnitas sollicitant nos ad deserendum nostrum officium, & ad abiiciendam omnem spem cœlestis auxilij & salutis. Quare facile quidem incipies verba inuocationis recitare: sed vt in inuocatione perseueres, & in grauib; ac diuturnis aduersis opem Dei æquo animo expectes, ac officium non deseras, non tam singularis est industriæ, quàm præcipuæ pietatis. Hinc sunt illæ frequentes cohortationes de expectanda cœlesti ope.

Psal. 26. Expecta DOMINUM, viriliter age, & confortetur cor tuum, & sustine DOMINUM.

Et Psal. 36. Expecta DOMINUM, & custodi viam eius, & exaltabit te, vt hæreditate capias terrā. Quod igitur accidere solet sanctis ferè omnibus, vt propter graues & diuturnas ærumnas defatigentur in precatione, hoc idem accidit Dauidi. Cum enim eiectus esset à Saule in exilium, & magna ferret incommoda aliquot annis in exilio, sæpè respexit in cœlum, sæpè conquestus est DOMINO Deo ærumnas suas, sæpè implorauit auxilium eius & liberationem. Sed tantum absuit vt liberaretur, vt grauioribus subinde viarum suarum periculis obijceretur. Quare defatigatus ferè orando & expectando, erumpit tandem in precationem huius decimitertij Psalmi, ac petit, vt Deus non diutius differat auxilium suum, cum calamitas videatur ad summum peruenisse.

Quamquam autem brevis est Psalmus, cōtinet enim quinque tantum versiculos, tamen constat tribus partibus, quot ferè partibus constare etiam solent Politicæ supplicationes. In his enim primo loco exponuntur vel ærumnæ & miseriæ, vel iniuriæ ab alijs illatæ.

Secundo loco additur petitio auxiliij. Postremo recipit supplex, se beneficium gratitudine pro virili compensaturum. Iisdem partibus constat & huius Psalmi supplicatio. Prima habet querelam de diuturnitate exilij, & grauitate afflictionum. Secunda petit opem celestem & liberationem. Postrema continet gratiarum actionem.

1. *Vsq̃ quò D O M I N E obliuisceris mei perpetuò? vsq̃ quò abscondis faciem tuam à me?*
2. *Vsq̃ quò affligar cogitationibus in anima mea, dolore in corde meo indies? vsq̃ quò exaltabitur inimicus meus super me?*

Hi duo versiculi, sunt expositio diuturnitatis, & grauitatis afflictionum & periculorum, quæ necesse habuit Dauid in exilio adire. Ego versor nunc aliquot annis in exilio, & obijcior varijs ac magnis periculis, vt aliquoties spem vitæ abijciam. Quare sæpè ac multum petiui hactenus precibus meis, vt tu D O M I N E Deus meus, memineris mearum ærumnarum, & respicias me benignè ac liberaliter, ne hostes mei ita me superent, vt etiam me trucident. Sed quò diutius nomen tuum inuocaui, eò grauioribus periculis obiectus sum, vt videar tam mei oblitus, quàm preces meas auersari. Itaq̃ fit, vt animo meo grauisimè affligar, &

1. Sam. 27. metuum de die in diem, ne vel tandem incidam in manum hostis mei, & occidar.

Obseruandum autem est, quòd cùm Dauid conuerteretur Deum obliuisci ipsius, & abscondere faciem suam, non sit veritas Spiritus sancti, sed imbecillitas humanæ

humanæ carnis. Cum enim afflictio est grauis, & diuturna, videtur carni, quòd Deus non curet nostra, nec respiciat misérias nostras, & quòd auersetur omnes preces nostras. Et hæc quidem est sententia humanæ imbecillitatis. Sed res ipsa longè aliter se habet. Quò enim grauior & diuturnior est afflictio piorum, eò propinquior est **DOMINVS** Deus noster, vt seruet ac liberet.

Psal. 33. Iuxta est **DOMINVS** ijs, qui tribulato sunt corde, & humiles spiritu saluabit.

Psal. 50. Sacrificium Deo Spiritus contritulus, cor contritum & humiliatum Deus non despiciet.

Esa. 57. In sancto habitans, & cum contrito & humili spiritu, vt viuificet spiritum humilium, & viuificet cor contritorum.

Et si autem hæc imbecillitas, qua existimamus, Deum nostri in nostris æumnis obliuisci, & preces nostras auersari, non est in hominibus absq; peccato, tamen Christus filius Dei suscepit eam in se absque peccato, & clamauit in cruce: Deus meus, Deus meus, vt quid me dereliquisti? Longè discedis à salute mea, & à verbis rugitus mei. Deus meus, clamo per fidem, *Psal. 21.* & non respondes, ac ne nocte quidem fileo. Quare Deus imbecillitatem nostram boni consulit propter Christum: & tantum abest, vt pios propter tales querelas abiiciat, vt potius ad ferendam opem, primo quoq; tempore excitetur.

3. *Respice, & audi me DOMINE Deus meus. Illumina oculos meos, ne obdormiam in morte.*

4. *Ne dicat inimicus meus, prauaui aduersus eum, ne tribu-*

latores mei exultent, si oppressus fuerò.

Secunda pars Psalmi, quæ continet precationem. Precatur enim, ut cum hæc Deus videatur auersisse ab ipso vultum, & auersatum esse preces eius, nunc tandem respiciat clementer, & exaudiat: Illumina, inquit, oculos meos, ne obdormiam in morte. Tanta enim pericula mihi creantur, ut quouis momento mors sit expectanda. Peto igitur, ut cum mihi toties ingrediendum sit in pericula mortis, illustres oculos meos, ut tenebras mortis illæsus euadere queam. Certè horribiles sunt tenebræ mortis, nec quisquam eas illæsus euadet, nisi sit Lynceis oculis. Quomodo igitur tales oculos consequemur? Hi enim corporei oculi in his tenebris nihil nos iuuabunt. Spirituales autem oculos per peccatum ita amisimus, ut ne quidem per tenebras paupertatis aut morborum euadere possimus: tantum abest, ut per teterrimam caliginem mortis euadamus. Quò igitur nos vertemus? Sequamur exemplum Psalmi. Suspiciamus in cælum, & dicamus: Illumina oculos meos, ne obdormiam, ne peream morte. Sed quomodo Deus illustrat oculos nostros? Proponit nobis Christum filium suum, ut hunc fide nostra intueamur. Quod cum factum fuerit, oculi nostri illustrantur, ut iam nulla mortis caligo ita impedire possit, ut non in veram & æternam vitam ingrediamur. Ego sum, inquit, resurrectio & vita: Qui credit in me, etiamsi mortuus fuerit, viuet. Et omnis qui viuit, & credit in me, non morietur in æternum.

Ioan. 11.

Addit autem precator causam, qua sperat, se petitionem

tionem impetraturum : Ne dicat , iniquiens , inimicus ,
 praualui aduersus eum. (hoc est) Ego hacienus præ
 dicaui clementiam Dei , & veritatem promissionum
 eius. Professus sum, Deum promississe mihi opem suam
 in omnibus ærumnis, contra omnes aduersarios meos.
 Dixi palam : Deum tam seruantem esse suarum pro
 missionum, vt malit naturam rerum inuertere, quàm
 promissiones suas irritas & mendaces reddere. Si ers
 go tu DOMINE Deus meus, defereres me nunc, & obs
 ijceres me hostibus dilaniandum, multò magis periculis
 taretur gloria nominis tui, quàm salus mea. Impij enim
 hostes dicerent , Deum esse imbecilliozem , quàm vt
 possit sperantes in ipsum iuuare : & promissiones Dei
 esse vaniores, quàm vt ijs credentes seruentur. Quan
 ta hæc esset contumelia nominis tui ? Quare peto, vt si
 non meæ salutis, saltem gloriæ tuipius nominis ratio
 nem habeas , & me inter tot pericula , inter tot hostes
 tuearis. Hæc est efficacissima ratio impetrandæ coram
 Deo petitionis. Vtitur ea & Moses , Num. 14. Cum
 enim Deus de Israëlitis diceret : Feriam eos pestilens
 tia, atq; consumam , respondet Moses , vt audiant, in
 quiens, Ægyptij, & dicant : Non poterat introducere
 populum in terram pro qua iurauerat, &c.

Et Exo. 32. Ne quæso dicant Ægyptij, callide edux
 it eos, vt interficeret in montibus, &c.

Et Psal. 113. Non nobis DOMINE, non nobis, sed
 nomini tuo da gloriam, propter misericordiam tuam,
 & veritatem tuam, ne quando dicant Gentes : Vbi est
 Deus eorum, &c.

5. *EGO autem in beneficentia tua spero, exultabit cor meum
 in salutaris*

in salutaris tuo, cantabo DOMINO, quòd beneficijs me afficiat.

Postrema pars Psalmi continet promissionem gratitudinis, pro liberatione, & reliquis beneficijs. Petij, vt ad illustrandam gloriam nominis tui conserues me inter hostes meos, & tuearis me, ne hostes sint propter victoriam suam in nomen tuum contumeliosi. Spero igitur te adfuturum mihi clementer, & benigne, & exhilaraturum cor meum tua salute. Ego vicissim recipio me prædicatione, Psalmis & carminibus nomen DOMINI, misericordiam, clementiam, & veritatem DOMINI, pro virili illustraturum, propterea quòd maiora in me beneficia conferat, quàm quæ rependere queam.

Solenne autem est, quòd pñj pro beneficijs in se collatis, recipiant se gratitudinem suam erga Deum declaraturos Psalmis seu carminibus: Laudabo, inquit Psal. 68. nomen Dei cum cantico, & magnificabo eum laude, & placebit Deo super vitulum nouellum, producentem cornua & vngulas. Sed de hoc genere gratitudinis dictum est aliàs copiosè.

VSVS HVIVS PSALMI.

Hoc Psalmo vt illecebit in diuturno morbo, in dura & perpetua paupertate, in longo exilio. Apud Ioannem cap. 5. tenetur quispiam morbo triginta & octo annos. Apud Lucam cap. 13. mulier habet spiritum infirmitatis, annis decem & octo. Et cap. 16. Lazarus affligitur, tam morbis, quàm mendicitate, vsq; ad extremum

mum vitæ lîræ. Nec dubium est, quin hi in aduersis
 suis habuerint tales cogitationes, quales hîc in primis
 versiculis describuntur. Petendâ igitur est in graui-
 bus & diuturnis afflictionibus, consolatio, tam ex hoc
 Psalmo, quàm ex alijs locis Scripturæ, & promissio-
 nibus Dei, videlicet, quòd etsi Deus videtur nostri
 oblitus, nec curare nostra, tamen non cadit capillus de
 capite, sine voluntate cœlestis patris: & non stertit,
 nec dormitat, qui custodit Israël. Et apud Esaïam:
 Nunquid mulier potest obliuisci infantem suum, vt
 non misereatur filio vteri sui? Etsi illa oblita fuerit,
 ego tamen non obliuiscar tui. Quòd autem auxilium
 in longinquum tempus differatur, non sit irato, sed
 propitio Deo: nec sit nostro detrimento, sed maxi-
 mo nostro commodo. Diligentibus enim Deum, vt
 Paulus ait, omnia adiumento sunt in bonum. Et res-
 censentur aliàs causæ, cur Deus soleat populum
 suum grauibz & diuturnis malis afflige-
 re: quæ si considerentur, afferunt
 ægro animo magnam
 consolatio-
 nem.

d

Psalmus

Psalmus 14.

Dixit insipiens in corde suo, &c.

*In Alba Dominorum, die 11. Martij, Anno
1558. Explicatus.*



Hic Psalmus insignis est, non solum repetitione, quod postea Psalmo 53. paucis modo verbis mutatis, iterum recenseatur, verum etiam allegatione Apostoli Pauli, quod cum Paulus ad Rom. cap. 3. susceperet docendum, omnes homines, tam Iudæos quam Græcos, peccato obnoxios esse, utatur huius Psalmi testimonio.

Continet autem duas partes. Prior inuoluit omnes homines peccato, & ostendit magnitudinem corruptionis humanæ naturæ. Posterior ponit discrimen inter pios & impios: ut sciamus, qui in tanta humani generis corruptione pereant, & qui seruentur. Et si enim in Adamo omnes moriuntur, & vniuersum genus hominum vna quædam est peccati massa, tamen qui credunt in Christum, accipiunt remissionem peccatorum, & seruantur.

1. *Dicit insipiens in corde suo: Non est Deus, corrupti sunt, & abominabiles facti sunt in studijs suis, non est qui faciat bonum.*

2. *DOMI-*

2. *DOMINVS de celo prospicit super filios hominum, & videat, num sit intelligens, aut requirens Deum.*
3. *Omnes declinauerunt, simul feridi facti sunt, non est qui faciat bonum, ne vnus quidem.*

Per vnus delictum, inquit Paulus, propagatum est malum in omnes homines, ad condemnationem. Describit ergo Psalmus his tribus versiculis, quod sit malum illud, quod propagatum est in omnes homines. Ac initio cum ait: Dicit insipiens, nomine insipientis, non vnus tantum homo, nec vnum tantum hominum genus, sed vniuersum humanum genus comprehenditur: Omnes enim homines natura sua sunt insipientes. Ac siquidem de rebus mundanis sermo est, inuenias homines natura ad rerum huius seculi administrationem, sic satis sapientes & industrios, vnde & Christus dicit: Filij huius seculi, prudentiores sunt filiis lucis, in sua natione. Nam quemadmodum nocturne acutè quidem in tenebris cernunt, interdiu autem & in luce cæcutiunt, ita & homines in mundanis, seu artibus, seu negotijs, multum vident & prospiciunt: in rebus autem cælestibus, in cognoscenda voluntate Dei, in consequenda vera iustitia & beatitudine, extrema laborant cæcitate: cuius cæcitatis causa est peccatum, ab Adamo in posteritatem eius propagatum. Et quia hoc peccatum introijt, sicut Paulus loquitur, in mundum, hoc est, in omnes homines, idcirco nomine insipientis, hoc loco intelligendi sunt omnes homines, sicut natura sua corrupta nascuntur.

Gen. 8. Sensus & cogitatio humani cordis, malum sunt ab adolescentia sua.

Pfal. 116. Ego dixi in excessu meo, omnis homo mendax.

Et Psal. 143. Non iustificatur in conspectu tuo omnis vivens.

Sed quid pluribus opus? Psalmus ipse in his versibus interpretatur nomen insipientis, quod non sit intelligendum, de vno tantum homine, aut vno hominum genere, sed de vniuersis hominibus: Omnes, inquit, declinauerunt: simul foetidi facti sunt, non est qui faciat bonum, ne vnus quidem. Deinde videndum est, quod sit insipientis, hoc est, vniuersi humani generis peccatum: Insipiens (inquit) dicit in corde suo: Nō est Deus. Sed quis (inquiens) tanta est insipientia & impietate, qui sentiat, nullum esse Deum? Non nego, quin inter Ethnicos fuerint, quorum alij dubitauerunt, num sit Deus, vt Protagoras: alij publicè profiteri non sunt veriti, nullum esse Deum, vt Diagoras, Melius, & Theodorus Cyrenaicus: vniuersum autem humanum genus accusare huius impietatis, durissimum videtur, praesertim cum homo natura sua habeat *περόληψιν*, hoc est, anticipationem quandā Dei, & Paulus dicat: Deum patefecisse gentibus, quod de Deo cognosci queat. Quid igitur sibi vult generalis illa omnium hominum acculatio? Non certè mentitur Psalmus, sed quod dicit, oraculum est Spiritus sancti. Et si enim non facile in populo Dei inuenias, qui palam ore suo profiteantur, nullum esse Deum, tamen nihil certius est, quàm quod omnes homines natura sua dicant, in corde suo, & sentiant in recessu animi sui, non esse Deum. Ac verè quidem Paulus affirmat: Inuisibilia Dei cognosci ex visibilibus, & informationem quandam

dam Dei animo hominis diuinitus impressam esse. Hoc autem intelligendum est, nec de perfecta Dei notitia, nec de homine affectibus perturbato, sed de ea notitia, quam habet homo extra tentationes positus. Postquam enim peccatum, in quo homo conceptus est & natus, incipit pro ingenio suo, conuiiente Deo, & inflammante satana, grassari, teneri non potest animus hominis, quin virus suum euomat, & dicat, nullum esse Deum. Sed quæ sit *ἐσθής*, quæ potentia, & qui sint fructus peccati, quod vocant originale, Psalmus describere exponit. Homo enim nascitur ex carne, & caret natura Spiritu sancto. Vbi autem abest Spiritus sanctus, ibi dominatur in homine spiritus satanæ, qui teneri non potest, quin inspiret mancipio suo peccatum. Hoc igitur peccatum, initio excitat hominem ad dubitationem de Deo: & si grauiore inciderint tentationes atque afflictiones, excitat eum ad negationem, ut sentiat, sicut Paulus dicit, non esse Deum. Deinde corrumpit omnes humanas vires, ac præsertim mentem, seu intellectum, & voluntatem: ut nec mens recte intelligat diuina ac cœlestia, nec voluntas legem Dei sequatur, hoc est, quod Psalmus dicit, corrupti sunt. Præterea, etsi post peccatum relictus est in homine aliquis sensus honesti, ut possit externam pietatis speciem præstare, tamen peccatum etiam hunc honesti sensum ita corrumpit, ut quicquid boni facere videtur, non habeat ullam boni rationem coram Deo, sed iudicetur peccatum. Omne enim quod non est ex *fi* *Rom. 14.* de, peccatum est. Et: Omnis caro fœnum, & omnis *Esa. 40.* gloria eius, quasi flos agri, &c.

Hic dices mihi: Ecquæ est illa temeritas, omnes

d 3 homines

homines indiscriminatim peccato ita inuoluere, vt nullus eorum verè pius & honestus dicatur: Aristides Atheniensis tanta fuisse iustitia legitur, vt etiam Iusti *Plutar. in* cognomen publicè reportauerit. Cimon, & ipse Athe-
vita Ci- niensis, tanta fuit pietate in ciues, ac præsertim paupe-
monis. res, vt amotis vndiq; agrorum suorum septis, permiserit egenis ciuibus & peregrinis, poma & fruges impune sumere: & parauerit singulis diebus ingens conuiuium, ad quod pauperes liberè conuenirent. & eo fruerentur. Sed fortassis non est mirum, quòd Gentium honestas non habeat coram Deo rationem boni, cum non habeant veram Dei cognitionem. Quid autem dicemus de populo ipso Dei? An ne quidem inter hos inuenitur, qui non sit insipiens, & non sit corruptus, nec studia eius sint Deo abominabilia? Et quis inter hos est, qui non de Deo etiam gloriatur, tantum abest, vt dicant non esse Deum? De hac re secundus & tertius versiculus respondent. Multi quidem sunt, qui videntur coram hominibus, p̃j & honesti: sed in hoc Psalmo describitur, quale sit humanum genus coram Deo: **DOMINVS** (inquit) de cælo prospicit super filios hominum. Si qui homines aspiciunt alios in hac terra, nonnullos inueniunt honestos & inculpato: si autem **DOMINVS** Deus noster prospexerit super homines de cælo, vt videat, cuius & mens sit sana, & voluntas perfectè bona, ibi tum inuenit omnes homines ita corruptos & deprauatos, vt ne vnus quidem sit, qui verè benefaciat: **OMNES**, inquit, declinauerunt, simul foetent coram Deo propter peccatum. Et ne quis existimet Synecdochen esse, qua aliquoties pars tantum nomine totius comprehenditur,

tur, additur aperta Synecdoches reiectio: Ne vnus quidem, inquiriens. Deinde loquitur Psalmus in his versiculis, de omnibus hominibus, non quales reputantur coram Deo nonnulli, per fidem renati, propter Christum, sed quales sint omnes homines origine, & natura sua post peccatum, quales etiam in carne sua maneant vsq; ad mortem. Et si enim peccatum non imputatur omnibus hominibus coram Deo, ijs nimirum, qui renascuntur in Christo per fidem, tamen caro eorum semper manet impia, donec in hac vita superstes fuerit: Affectus, inquit, carnis inimicitia est aduersus Deum, nam legi Dei non subditur, siquidem non potest quidem. Ac rursus: Scio, quod non habitat in me, hoc est, in carne mea, bonum. Et iterum: Caro concupiscit aduersus Spiritum, Spiritus autem aduersus carnem. Quare cum aliud sit diuinum, aliud sit humanum iudicium, & natura carnis per peccatum corruptæ, compescatur quidem in pijs, per Spiritum sanctum, non autem eradicetur prorsus in hac vita, reliquum est, quod omnes homines, si carnem eorum respicias, sint coram Deo insipientes & peccatores. Cæterum, in vulgata æditione sequuntur tres versiculi, qui nec in Hebræo, nec in ea, quæ extat Græca translatione habentur.

Sepulchrum patens est guttur eorum, linguis suis dolose agebant, venenum aspidum sub labijs eorum.

Quorum os maledictione & amaritudine plenum est, veloces pedes eorum ad effundendum sanguinem.

Contritio & infelicitas in vijs eorum, & viam pacis non cognouerunt, non est timor Dei ante oculos.

Sunt

Sunt autem hi tres versiculi in hunc Psalmum ex Paulo transpositi. Paulus enim cum ad Rom. cap. 3. probaret, omnes homines tam Gentes, quam Iudæos esse peccatores, usus est testimonijs, non tantum huius Psalmi, verum etiam aliorum locorum Scripturæ. Quare quod dicit: Non est iustus quisquam, non est intelligens, non est requirens Deum, omnes declinaverunt, simul inutiles facti sunt, non est qui faciat bonum, ne vnus quidem, sumptum est ex hoc & 53. Psalmo. Deinde quod addit: Sepulchrū patens est guttur eorum, linguis suis dolose agebant, sumptum est ex Psalmo 5. Illud autem: Venenum aspidum sub labijs eorum, sumptum est ex Psalmo 139. Cuius initium est: Eripe me DOMINE, ab homine malo. Et illud: Quorum os maledictione & amaritudine plenum est, sumptum est ex Psalmo 9. vel iuxta Hebræos, decimo. Et illud: Veloces pedes eorum, ad effundendum sanguinem. Contritio, & infelicitas in vijs eorum, viam pacis non cognouerunt, sumptum est ex Esa. cap. 59. Postremo illud: Non est timor Dei ante oculos eorum, sumptum est ex Psalmo 35. Cuius initium est: Dixit iniustus, &c. Cum ergo Paulus collegerit testimonium suum ex varijs locis Scripturæ, visum est Latinis integrum Pauli textum, in hunc 14. Psalmum transferre, vt quæ in eo de peccato totius humani generis dicuntur, hac additione magis perspicue explicarentur. Sicut enim homines sunt natura impio corde, ita reliqua omnia in homine sunt impia. Impuris omnia sunt impura. Guttur eorum est sepulchrum patens, hoc est, sordidum & foetidum. Ex abundantia cordis, os loquitur, si cor est impium, quid est gutture pietatis

ratis egredi posset: Si cor est mendax, quid non dolus aut fraudis lingua concinnaret: Si cor est virulentum, fieri non potest, quin & labia proferant sermonem venenatum, & os plenum sit amarulentia & execratione. Si cor est crudele, ne pedes quidem teneri possunt, ut non properent ad effundendum innoxium sanguinem. Ac breuiter, vbi cor est impium, & dicit, non esse Deum, ibi nulla est tranquillitas, nullus timor Dei, sed omnia hominis vasta sunt & perturbata.

4. *Nonne manifestè cognosci potest, (quòd) omnes scelerati deuorant populum meum, perinde ac si panem deuorarent, DOMINVM non inuocant.*
5. *Illic trepidant tremore: sed DOMINVS est in generatione iusti.*
6. *Consilium egeni pudefacitis, sed DOMINVS est spes eius.*
7. *Quis dabit ex Zion salutem Israeli? cum conuerterit DOMINVS captiuitatem populi sui, exultabit Iacob, letabitur Israel.*

Hæc est altera pars huius Psalmi, in qua recitatur discrimen inter impios & pios: & significatur, quòd ex Zion patefiet Euangelion DOMINI nostri Iesu Christi, quo adnunciatur liberatio ex peccato, & æterna salus propter Christum. Postquàm enim in priori parte Psalmi, omnes homines accusantur impietatis, ac dicitur, ne vnum quidem esse, qui verè beneficiat coram Deo, dubitabit quispiam, num in tanta hominum corruptione, sit etiam aliqua in terris ecclesia, quæ sit Deo grata, & quæ veram ac æternam salutem

e consequas

consequatur? Respōdet igitur Psalmus, his postremis versiculis, & per antithesin docet, quòd etsi omnes homines sunt natura impij, & peccato corrupti, tamen alij assequuntur remissionem peccati, & fiunt populus seu ecclesia Dei: alij manent & moriuntur in peccato, & pereunt. Et in illorum quidem generatione, hoc est, coetu aut congregatione, aut vitæ duratione, est DOMINVS, illos tuetur & conseruat DOMINVS ab initio vitæ, vsq; ad mortem, vt per mortem ingrediantur in æternam ac beatam vitam. Illorum sola spes est DOMINVS Deus ipse: hi autem, qui manent in peccato, deuorant populum meum, velut escam, persequuntur ecclesiam meam omni genere crudelitatis, sicut lupi oues. Habent quidem frequenter nomen Dei in ore, sed Deum non inuocant. Verba inuocationis recitare sciunt, sed non inuocant Deum ex fide: quippe quòd in latebris cordis sui, sentiant non esse Deum. Trepidant tremore, (& additur in Psal. 53. quod hoc loco omittitur) vbi non esset trepidandum, hoc est, non timent, non colunt Deum iuxta verbum suum, sed tantum iuxta humanas traditiones. Cum non lauant manus, priusquam cibum capiant, magno corripuntur tremore, ne diuinitus affligantur. Cum autem dicunt in corde suo, non esse Deum, cum æstuant in animo, cupiditate vindictæ, non metuumt sibi vel à peccato, vel à supplicio peccati. Ad esum carnis in feria sexta, ita trepidant, perinde ac si terra dehisceret: ad virulentam autem inuidiam, & ad odium parricidiale, quo inflammati sunt, ne manum quidem verterent. Ac breuiter, tanto odio erga miserum & afflictum populum Dei flagrant, vt omnia eorum consilia,

filia, omnes conatus, omnia studia confundenda, pudes facienda, & impedienda suscipiant. Habes discrimen hominum, quod etsi omnes homines sunt natura sua vna peccati massa, tamen alij renascuntur per Euangelion in Christo, qui retinet quidem naturam carnis, donec in hac vita superstites fuerint, non autem obediunt cupiditati carnis, sed affectui spiritus: & habent remissionem peccati, propter Christum, per fidem. Alij autem non renascuntur, sed manent in peccato suo, & obsequuntur affectui eius: quare manet etiam super eos ira Dei, & intereunt perpetuo.

Postremo concluditur Psalmus optione. Nam cum Deus habeat in humano genere, quamuis per peccatum corruptissimo, suam ecclesiam, quae renascitur per fidem in Christum, per quem promissa est salus, ab initio conditi orbis, optat Psalmus, ut hic Christus breui adueniat, & veram ac æternam salutem afferat. Quis dabit, inquit, ex Zion, &c. Hæc particula: Quis dabit, optantis est, pro qua nos dicere solemus: Utinam. Hæc est igitur sententia. Postquam Adam peccasset, & traxisset secum vniuersum genus humanum in ruinam, promisit Deus, se missurum Messiam, seu Christum filium suum: & subinde repetijt hanc promissionem, donec etiam Spiritu sancto suo patefecerit, quod Christus concionaturus sit Euangelion suum in Zion, & ex eo loco diulgaturus illud in vniuersum orbem, ut omnis, qui crediderit, saluus fiat. Nam de Zione, inquit Psalmus 132. Elegit DOMINVS Zion, elegit eam in habitationem sibi. Et Psal. 2. Ego constitui regem meum super Zion, montem sanctum meum. Utinam igitur Christus breui veniat, & concionetur

cionetur Euangelion suum in Zion, vt humanum genus liberetur è captiuitate sua, & consequatur veram salutem. Captiuitas enim humani generis est, quòd propter peccatum ab Adamo propagatum, sit mancipium Satanæ, & obnoxium morti ac inferno. Hæc est horribilis captiuitas. Promissus autem est Christus, qui sit peccatum expiaturus, & captiuos mortis ac inferni liberos redditurus. Nihil ergo magis in vobis habendum est, quàm vt adueniat Christus, & absoluat, quod in ipso promissum est. Quo beneficio nihil potest ecclesiæ Dei, nec latius, nec iucundius accidere.

VSVS HVIVS PSALMI.

Necessaria est nobis doctrina, de vera poenitentia. Sunt autem duæ partes poenitentia. Altera, agnitio peccati. Altera, agnitio Christi, qui est expiator peccati. Hic verò Psalmus recitat has partes poenitentia. Initio concludit vniuersum humanum genus sub peccatum. Deinde ostendit Messiam seu Christum ex Zione, vt in ipsum credamus, & propter ipsum consequamur remissionem peccati. Quare hic Psalmus frequenter recitandus est, vt excitemur ad poenitentiam, hoc est, ad veram peccati nostri agnitionem, & ad fidem in Christum, in quo solo constat salus, & liberatio ecclesiæ Dei, &c.

Psalmus.

Psalmus 15.

DOMINE quis habitabit in tabernaculo tuo.

*In Monasterio Hirsaugia, die 16. Iunij, Anno
1558. explicatus.*

Salmus decimusquintus: DOMI-
NE quis habitabit in tabernaculo
tuo, &c. etsi habet speciem pres-
cationis, tamen propriè est do-
ctrina de discrimine veræ & falsæ
ecclesiæ. Sunt enim hypocris-
tæ, qui cum sacrificant, ieiunant,
longas preces recitant, & alia o-

pera, externa sua specie, honesta & pia faciunt, existi-
mant, se propter suam ipsorum iustitiam, esse vera
membra ecclesiæ, & tamen, quia non habent veram fi-
dem in Deum, nec veram charitatem erga proximum,
alieni sunt ab ecclesia Dei. Alij fatentur quidẽ Deum
verbis, & gloriantur de Deo, atq; iactant fidem suam
in Deum: negant autem Deum factis, & non agunt
veram pœnitentiam, sed pergunt sceleratam vitam
ducere. Etsi autem hi putant se præcipuos esse in eccle-
sia Dei, tamen Deus non agnoscit eos. Quare David
confert in carmen descriptionem veræ ecclesiæ, & res-
citat fructus, quos proferunt hi, qui sunt vera ecclesiæ
membra.

1. DOMINE, quis habitat in tabernaculo tuo, quis com-
moratur in monte sancto tuo?

Habitaculum Dei, & mons sanctus Dei, est ecclesia seu cœtus piorum. Sumuntur autem hæ appellationes à templo Hierosolymitano, quod ædificatum erat in monte Zion, in quo Deus dicebatur habitare, propterea, quod in eo loco verbum DOMINI adnuntiabatur, & legitima sacra peragebantur, atq; ecclesia seu cœtus populi Dei conveniebat. Cum igitur multi essent, qui iactabant, se esse cœtum illum, quem Deus respiceret, & pro vera ecclesia agnosceret, non tamen placebant Deo, propter impietatem, & impœnitentiam ipsorum, suscipit Psalmus explicandum, qui sint veri fructus Ecclesiastici cœtus. Hic autem primus versiculus, interrogatione formatus, est propositio Psalmi, & respicit tacitam antithesin, vt sit sententia. Homines affirmant habitare in tabernaculo Dei, & commorari in monte sancto eius, hoc est, esse vera & viua membra ecclesiæ, eos, qui multa faciunt sacrificia, & sunt in precibus suis *βαρλόγοι*: etiamsi interea nec verè credunt Euangelio Dei, nec vera charitate complectuntur proximum. Alij sentiunt, ad ecclesiam pertinere illos, qui, etsi varijs sceleribus sunt sorditati, tamen multa & præclara de Deo iactitant. Et qui sic de ecclesia sentiunt, videntur esse viri prudentes, docti, & sancti, ac tanta auctoritate præditi, vt animos imbecillum in sententiam suam pertrahant, ac magno sint offendiculo. Quare cum id nō sit verisimile, quod hi homines sentiunt aut docent, conuerto me ad te, DOMINE Deus meus, vt tu me doceas, quis habitet in tuo tabernaculo, & commoretur in monte sancto tuo, hoc est, quis sit verum & viuum membrum tuæ ecclesiæ:

2. *Qui ambulat immaculatus, & facit iustitiam, & loquitur
veritatem in corde suo.*

Respondet Spiritus sanctus interrogationi, & exponit, quis verè sit membrum ecclesiæ. Ac iterum respicit in antithesin. Is nondum est verè membrum ecclesiæ, qui multa offert sacrificia, & honestè de Deo loquitur: sed qui est immaculatus, hoc est, qui non est vlla peccati labe sordidatus. At enim, quis est, qui nullum habeat peccatum? Quis potest dicere, mundum est cor meum? Si dixerimus, inquit Ioannes, quòd peccatum non habeamus, ipsi nos seducimus, & veritas in nobis non est. Respondet igitur Psalmus ipse, & explicat, quis sit immaculatus. Sequitur enim in hoc versiculo: Qui facit iustitiam, & loquitur veritatem in corde suo. Et si hoc hemistichium, intelligi potest generaliter de obedientia totius legis, quæ exigit omnem iustitiam, ac præsertim veram & synceram Dei dilectionem ex toto corde, tamen quia non iustificatur vlla caro ex operibus legis, & lex est pædagogus ad Christum, idcirco exponenda erit hæc particula de Christo, & fide in Christum. Is enim verè coram Deo immaculatus, & nulla peccati labe sordidatus habetur, qui facit iustitiam, & loquitur veritatem in corde suo, hoc est, qui agnoscit Christum, & verè in ipsum corde suo credit: Corde enim, vt Paulus ait, creditur ad iustitiam. Nam, cum Christus factus sit nobis à Deo *IUSTITIA*, & nobis vnà cum omnibus beneficijs eius à Deo donatus, perspicuum est, quòd qui credit in Christum, & possidet Christum per fidem, habeat Deum propitium, qui non imputet, sed condona-

net ei peccatum, atq; adoptet ipsum in filium suum, ut fruatur omnibus beneficijs Christi, & cum Paulo dicere possit: Vivo, non iam ego, vivit autem in me Christus: ut quam iustitiam Christus habet, ea mihi quoq; coram tribunali Dei, propter Christum imputetur.

3. *Qui non diffamat lingua sua, qui non malefacit proximo, nec convitijs proscindit propinquum suum.*
4. *Qui abominatur hominem malignum, & magnificat eos, qui timent DOMINUM. Et qui iurat proximo, & non decipit (eum.)*

Fidem cordis sequuntur fructus eius, qui & professunt se, tanquam ramis, in omnibus membris piorum. Corde enim per fidem in Christum iustificato, & purificato, primum purificatur, & emendatur lingua seu sermo, ut & Deus nulla hypocrisi, sed veritate inuocetur, & homo proximus, nullo sermonis dolo, nulla linguae impostura decipiatur aut diffametur. Accedit & illud, quod cuius cor est fide purificatum, huius lingua à Spiritu sancto ita gubernari solet, ut nullo contumelioso verbo proximum offendat, aut convitijs eum proscindat. Non solum enim, homicida est, qui alterum gladio temere occidit, verum etiā, qui calumnijs, mendacijs, convitijs, & contumeliosis dictis eum affligit, ac virulento sermone in ipsum grassatur. Deinde renatus in Christo, & purificatus corde per fidem, illud etiam officium præstat Deo, ut amplectatur magno animi candore pios quosq;, & timentes Dei, atq; amicitia & contubernio eorum delectetur, abomines-

tur

tur autem & detestetur omnes impios & malignos, ac fugiat, quoquo modo fieri potest, omnia impiorum contubernia, ne & ipse malorum societate corrumpatur. Hoc enim illud est, quod vetus tralatio habet: Ad nihilum deductus est in conspectu eius malignus, (hoc est) nihil reputatur coram pio malignus, & fugit pius societatem eius. Nihil enim periculosius est, præsertim adolescenti, quàm si se cum prauorum consortio coniungat. Vetus dictum est: Si iuxta claudum habitaueris, fies & ipse claudus.

Est & alius veræ fidei, & charitatis in proximum fructus, videlicet, vt proximum non decipias falso iuramento, hoc est, vt quæ vel pactis vel iuramentis promissisti, constanter serues. Qui enim fallit proximo fidem, non in vnum tantum hominem peccat, sed etiam in vniuersam humanam societatem, cuius vinculum est mutua fides, ac pactorum constantia. Nec homines tantum lædit perfidia, sed etiam Deum ipsum, cuius nomen vano iuramento, & fallacibus promissis contaminatur.

5. *Qui pecuniam suam non dat ad vsuram, & munus aduersus innocentem non accipit. Qui facit hæc, non mouebitur in æternum.*

Aliud officium pijs hominis, qui sit verè membrum ecclesiæ: Negotiari cum proximo candidè, & iuuare eum pecunia, absq; vsura. Scriptura sapè ac multum detestatur vsuram. Sed & Ethnici Scriptores affirmant, eam esse contra naturam. Non enim, sicut vnum granum in agro gignit nunc trigecuplum, nunc sexa-

f

gecuplum,

gecuplum, nunc centuplum fructum, ita numus gignit numum. Sed quemadmodum definire, quæ herba sit salutaris ad depellendam febrem, non est propriè eorum, qui docent Euangelion Christi, sed Medicorum: ita definire, quæ in politicis contractibus sit vsura illegitima, non est propriè Theologorum, sed Magistratus, & Iurisconsultorum, vt sentiamus, eas esse vsuras illegitimas & prohibitas, quæ pugnant cum publicis, & recta ratione constitutis legibus. Quos enim contractus hæc leges probant, ijs pius bona conscientia vtî potest, propterea quòd publicæ leges, iuxta rectam rationem constitutæ, sint ordinationes Dei: & Magistratus minister Dei est, bono in bonum.

Exigitur à pio & illud officium, ne accipiat munera aduersus innocentes: Maledictus (inquit Moses Deut. 27.) qui accipit munera, vt effundat sanguinem innocentem. Hoc non pertinet tantum publicè ad iudices, ne vel prece, vel precio, vel fauore, vel odio, vel alio prauo carnis affectu iniquè iudicent, & innocentes opprimant, verum etiam priuatim, ad quosuis homines, ne quis acceptis muneribus, alios vel calumnijs, aut mendacijs in pericula vitæ, famæ & fortunæ conijciat, vel veneno aut gladio e medio tollat. Quæ continentur in his præceptis: Non occidas. Et: Non dicas falsum testimonium aduersus proximum tuum.

Possent quidem & aliæ species officiorum, quæ à pijs exiguntur, commemorari, ac totus Decalogus explicari, sed hæc in præsentia sufficiunt. Additur ergo conclusio: Qui facit hæc, non mouebitur in æternum. Qui hæc & ijs similia officia præstiterit, is habitat verè in tabernaculo.

in tabernaculo DOMINI, & commoratur in monte sancto Dei, estq; verum & viuum membrum ecclesie, ac in iudicio coram tribunali Dei ita constat, vt in æternum non pereat. Non est autem intelligendum, quod constemus in iudicio Dei propter opera seu merita horum officiorum, quæ sunt commemorata. Etsi enim renati sumus in Christo, & donati Spiritu sancto, tamen manent in nobis reliquiæ carnis, præ quibus opera nostra sunt per se imperfecta & sordida, ideoq; non habent vllam meriti rationem: nec possumus ijs coram Deo confidere, sed constamus tantum propter Christum, per fidem, ex qua pius suum officium facit. Omnis enim, qui credit in Christum, quod habeat propter ipsum peccatorum remissionem, & adoptetur in ius filiorum Dei, non perit, sed habet æternam vitam.

VSVS HVIVS PSALMI.

De vsu huius Psalmi iam dictum est, videlicet, quod proponitur nobis in ipso discrimen veræ & falsæ ecclesie, & admonemur recitatione eius, ne nobis blandiamur operibus externarum ceremoniarum, sed studeamus veris fructibus fidei. Iuxta illud: Misericordiam volo, & non sacrificium. Et:

Scientiam Dei plus quam
holocaustum.

Psalmus 16.

Conserua me DOMINE, &c.

*Mulbrunnæ, die 7. Augusti, Anno 1558.**Explicatus.*

Ic Psalmus singulari studio notandus est. Primum enim vaticinatur, & describit mortem ac resurrectionem Christi, quæ sunt summa veræ ac perpetuæ salutis nostræ capita. Deinde ex hoc Psalmo texuit Petrus primam suam concionem, quam, accepto iam in die Pentecostes Spiritu sancto, Hierosolymis, astantibus vndecim collegis suis, & audiente maxima hominum multitudine, habuit, Acto. 2. Probat & Paulus testimonio huius Psalmi, resurrectionem Christi à mortuis, Act. 13. Postremo, hic Psalmus non simpliciter narrat mortem & resurrectionem Christi, sed concludit eam in precationem, vt verisimile sit, quod Christus hunc Psalmum in monte Oliueti orauerit, & Angelus DOMINI ex eo Christum, in maxima & admirabili illa lucta, qua sanguinem sudauit, confirmauerit. Et si enim Christus est æternus & omnipotens filius Dei, ac perfudit hominem in vnitatem personæ assumptum, omni sua Maiestate, nec eger iuxta Maiestatem suam, vel humana, vel angelica consolatione:

tionem: tamen quia in diebus corporalis vitæ suæ, ac præsertim tempore suæ passionis, exinanivit se, & assumpsit formam serui, idcirco usus est & precibus, & consolationibus, quibus humana imbecillitas in afflictionibus, & horroribus mortis sustentari solet. Quare, cum hic Psalmus non solum contineat vaticinium de morte & resurrectione Christi, verumetiam attulerit Christo in grauissimis suis aduersis singulare solatium, debet nobis & notissimus & commendatissimus esse.

1. *Conserua me Deus, quoniam spero in te.*
2. *Dico DOMINO, tu es Dominus meus. Obedientia mea non indiges.*
3. *Sed sancti (indigent,) qui in terra sunt, & Magnifici, ad quos tota voluntate propendo.*

Non sentiamus hanc precationem filio Dei in ore natam, sed è toto pectore, & ex ipsis misericordiæ visceribus profectam esse. Intueamur filium Dei, iacentem in terra, prostratum ante conspectum Dei patris sui, & sustinentem peccata totius humani generis, ac sentientem grauitatē iræ Dei aduersus peccata, ideoque perculsum doloribus mortis ac inferni. Sicut enim peccatum, non est res iocularis in conspectu Dei, sed pugnat ex diametro cum Deo, qui est æterna iustitia, ita ira Dei aduersus peccata, non est ludicra, sed maxime omnium seria: quippe quòd Deus essentia sua, non sit nisi ipsa, aduersus peccatum, ira. Postquam autem filius Dei suscepit peccatum coram Deo patre suo expiandum, suscepit etiam iram Dei perferendam,

cuius tanta est grauitas, vt eam haudquaquam potuisset perferre, nisi præter illud, quod est homo, verus etiam Deus esset. Quare cum iam in faciem prostratus, haberet in conspectu suo iram Dei, & concuteretur tota mente terroribus mortis ac inferni, attollit oculos suos ad Deum patrem, & exclamat: **CONSERUA ME**, inquit. Quid ergo, quaeso te, pateris? quæ pericula sustines, quod tam misere petas conseruationem? Quid, rogas, patiar? quid sustineam? laceo hîc, in conspectu quidem hominum adhuc viuus, sed horrores mortis & inferni ita me obruerunt, vt non aliter affectus sim, quàm si mihi perpetuò esset pereundum. Obsecro igitur te, vt in tantis periculis & terroribus, saluum me & incolumem conserues.

Recenset autem duas causas, propter quas petit conseruari. Vna est, quia spero, inquit, in te, & dico: Tu es Deus meus, (hoc est) te solum agnosco **DOMINUM** Deum meum. In te solo omnem fiduciam, & spem meam colloco. Sapè autem in sacris literis repetitur sententia ac promissio illa, quod qui sperant in **DOMINO**, non pudeant, sed exaudiantur & seruentur. Psal. 16. Mirifica misericordias tuas, qui saluos facis sperantes in te. Psal. 24. Non erubescam, quia speraui in te. Psal. 30. In te **DOMINE** speraui, non confundar in æternum. Psal. 83. Beatus homo, qui sperat in te. Psal. 90. Quoniam in me sperauit, liberabo eum. 2. Sam. 22. Scutum est omnium sperantium in se.

Altera causa est. Obedientia mea (inquit) non indiges, sed sancti indigent. Vbi nos transtulimus: Obedientia mea non indiges, &c. ibi Hebraeus legit: Bonitas mea non super te, sed super sanctos, &c. Nomine autem

autem bonitatis, intelligit filius Dei obedientiam suam, quam præstitit Deo patri usque ad mortem crucis, quæ obedientia est maxima bonitas. Sententia igitur hæc est: Ego obedio tibi Deo patri meo, usque ad mortem, & sustinero grauissimos cruciatus mortis ac inferni, non quod tu exigas hanc obedientiam à me ex ira aduersus me, aut propter meum aliquod in te peccatum, sed propter peccatum sanctorum, qui sunt in terra Israël, & Magnificorum, quos ego multum amo. Pro magnificis, Hebræus habet אדיר Adire, significat autem Adar, excellere, eminere. Vnde Adirim excellentes, præcipui, nobiles, quos & Germani solent vocare, **den Adel**. Iustum autem est, ut qui non suo merito aut peccato affligitur, conseruetur ac liberetur. Cum igitur ego sustineam non meum, sed alienum peccatum, quod ego ex summa animi beneuolentia erga sanctos expiandum suscepi, quæso te, **DOMINE** Deus meus, conserua me, ne in hac extrema mea afflictione peream. Habes hæc initio testimoniū innocentie filij Dei, quod pater imposuerit ei crucem & mortem, non propter aliquod ipsius peccatum: Peccatum enim, inquit Esaias, non fecit, nec est inuentus dolus in ore eius. Deinde recensetur utilitas crucis & mortis Christi, videlicet, quod Christus suscepit passionem suam propter electam suam ecclesiam, quam vocat sanctos & Magnificos, seu nobiles, non quod prius, qui sunt ecclesia Dei, videantur coram mundo sancti, & magnifici, aut præclari, & nobiles, in oculis enim huius mundi sunt abiectissimi, obscurissimi, & contemptissimi: sed quod tales, hoc est, sancti & nobiles, præclari ac insignes habeantur in conspectu Dei, non quidem

quidem propter ipsorum merita, sed ex gratuita Dei beneuolentia, qua eos ex vniuerso humani generis corpore ad accipiendam cœlestem hæreditatem selegit. Vnde & ecclesia, Exod. 4. vocatur filius Dei primogenitus. Et Deut. 7. Te (inquit) elegit DOMINVS Deus tuus, vt sis ei populus peculiaris de cunctis populis, qui sunt super terram. Hæc recitantur, vt confirmemus fidem nostram in aduersis. Etsi enim sordemus coram hoc mundo, tamen Deus tanti nos fecit, vt propter nos miserit filium suum, & reputet nos coram se sanctos, & insignes nobiles ac Heroas, propter Christum filium suum, in quem credimus, & cuius membra sumus per fidem.

Postremo additur causa, qua filius Dei excitatus est, ad suscipiendam expiationem alieni peccati. Ad quos (inquit) tota voluntate propendeo. Non suscepi peccatum expiandum, propter aliquod meritum ecclesiæ, sed ex gratuita mea beneuolentia. 1. Ioannis 4. In hoc est charitas, non quod nos dilexerimus Deum, sed quod ipse prior dilexit nos, &c. Et Rom. 5. Christus, cum adhuc infirmi essemus, pro ratione temporis, pro impijs mortuus est.

4. *Multiplicant idola sua, postea properant (ad ea colenda & exornanda.) Non libabo libamina eorum de sanguinibus, & non meminero nominum eorum labijs meis.*

Vbi nos transtulimus: Non libabo libamina eorū, ibi vetus interpres habet: Non congregabo conuenticula eorum. Nam pro eo, quod est in Hebræo נַסִּיחַ Afich, & venit à verbo נָסַח Nasach, quod significat libare

libare seu fundere, legit interpret ~~non~~ Asaph, quod significat congregare. Vaticinatur autem hic versiculus de abiectiōe Iudæorum propter Idolomaniam. Cum enim in præcedenti versiculo dixisset filius Dei, se obedire Deo patri suo, & suscipere crucem ac mortem propter sanctos & magnificos in terra Israël, quæret quispiam: Quid igitur fiet de reliqua Israëlitarum multitudine, quæ videbatur innumerabilis? Respondet filius Dei. Maxima pars Israëlitarum sunt Idolatræ, multiplicant idola sua, & adorant ea summo studio. Et si enim Israëlita, ijs temporibus, quibus filius Dei vitam in terris egit, non coluerunt externa idola, tamen quia non solum caruerunt vera cognitione Messia, verumetiam persecuti sunt Euangelion eius maximo odio, tot idola adorauerunt, quot bona opera fecerunt, & quot sacra Dei instituerunt, ut eorum meritis expiarent coram Deo peccata sua, & consequerentur æternam vitam. Testatur etiam historia Euangelij, quod Iudæi fuerint studiosissimi excogitandorum sacrorum, & humanarum traditionum, ad quas observandas, ex imo pectore anhelantes properabant. Vide Matth. 15. & 23. Et Mar. 7. Postquam igitur Iudæi excogitant, abiecto Christo & Euangelio eius, multa nova sacra, ad quæ seruanda summo studio properant, ut meritis eorum consequantur cœlestia beneficia, ideoque pro idolis habenda sunt, quod omnem fiduciam salutis suæ, in ijs collocent: Non libabo (inquit) libamina eorum in sanguinibus, non sunt mihi grata cruenta eorum sacrificia, non sunt mihi accepti cultus eorum, nec recordabor nominis eorum, non confitebor eos coram patre meo, non patrocinarbor eis

coram Deo, sed abrogabo omnem politiam eorum, tam mundanam, quam Ecclesiasticam, & abijciam eos in extremas tenebras. Hæc est execratio & exhæredatio Iudæorum, in omnibus cœlestibus beneficijs. De qua abiectione multa tam in Prophetis, quam Apostolicis scriptis. Ponitur autem nobis Gentibus ob oculos, ut discamus timorem Dei, & exhibeamus nos gratos erga Deum, ne & nos abijciamur. Nam si Deus (inquit Paulus) naturalibus ramis non pepercit, vide ne qua fiat, ut nec tibi parcat.

Rom. 11.

5. *DOMINVS pars hereditatis meæ, & calicis mei, tu sustinens sortem meam.*
6. *Funiculi ceciderunt mihi in iucundis (locis) adeoque hereditas decora mihi (contigit.)*

Si Iudæi abijcientur, ne sint participes beneficiorum Messias, quam ergo habebit Messias ecclesiam? Respondent hi duo versiculi. Etiam si Iudæi exhæredabuntur, ne sint amplius populus Dei, tamen DOMINVS ipse (inquit Messias) est mea hereditas, & meus calix, hoc est, portio quæ mihi debetur. Nomine enim calicis, apud Hebræos, non tantum intelligitur exterius poculum, verum etiam demensum, quod in rebus diuidendis cuique obuenit. Psalmo 116. Calicem salutaris, hoc est, portionem salutis, quæ mihi offertur, accipiam. Et Hier. 49. Ecce quibus non erat iudicium ut biberent calicem, bibentes bibent, hoc est, hi de quibus non erat decretum, ut aliqua supplicij parte afficerentur, supplicium subibunt. Et Matth. 20. Calicem meum

meum bibetis, hoc est, affligemini pro vestra portione aduersis, quemadmodum ego affligar. Sumpta autem est metaphora à conuiujs, in quibus suum cuique demensum potus in calicibus distribuitur. Dicit ergo filius Dei. Quamuis Iudæi efficiantur ex hereditate cœlestium bonorum, non tamen carebo omni hereditate. DOMINVS enim ipse Deus pater meus, mea est portio, mea hereditas. Quid autem mihi dærit, si DOMINVM possideam? An non satis diues & locus ples ero, si Dominus sese mihi totum tradiderit ac donauerit? Hic enim sortem meam ita tenebit, & dispensabit, vt obueniat mihi in hereditatem pulcherrima iucundissima portio terræ. Per funiculos enim hoc loco intelligendæ sunt perticæ mensoriæ, quibus termini agrorum definiri solent. Ios. 17. Ceciderunt fusticuli Manassæ decem. Psal. 105. Tibi dabo terram Canaan funiculum (hoc est, mensuram, partem seu portionem) hereditatis vestræ. Esaia 54. Dilata locum tentorii tui, & pelles tabernaculorum tuorum extendere ne parcas, longos fac funiculos (hoc est) perticas mensorias, &c.

Vaticinatur autem de vocatione Gentium, ex quibus filius Dei colligit Ecclesiam suam ministerio Apostolorum, in vniuersa terra. Vocatur verò ecclesia Gentium iucunda, & pulchra hereditas, non tam propter multitudinem ex omnibus terris collectam, quæ aspectu iucundior est paucitate, quàm propter claritum dinem Euangelij, qua Gentes ita sunt illustratæ, vt Paulus vocet eos, qui inter Gentes agnoscunt Euangelion Christi, luminaria mundi, Philip. 2.

EXPLICATIO

50

7. Laudo DOMINUM, qui consulit mihi, adeoq̃ nec
etiam ex diuitiis me renes mei.
8. Pono DOMINUM coram me semper, quia est ad dex-
teram meam, ne commouear.
9. Ideo atatur cor meum, & exultat gloria mea, adeoq̃ caro
mea requiescet in spe.
10. Quia non deferet animam meam in inferno, nec permittet,
vt sanctus tuus videat corruptionem.
11. Ostendes mihi semitam vitæ, faciem tuam, (quæ est) sacu-
ritas lætitiæ, iucunditates in dextera tua semper.

Gratiarum actio, cum enumeratione beneficiorum, quæ expectat à DOMINO. Laudo (inquit) DOMINUM, propterea quòd effundat in me omnia beneficia genera. Primum enim, consulit mihi, & ducit me spiritu suo, non interdiu tantum, verum etiam noctu, in omnibus tam actionibus, quàm passionibus meis, ne renes, seu cogitationes meæ seducant me, sed recta in omnibus vijs eius incedam. Deinde, quia pos-
no eum mihi semper ob oculos, proximus mihi est, & apprehendit dexteram meam, vt me conseruet, ne peream. Præterea, efficit vt caro mea requiescat in spe, hoc est, vt non peream in morte, sed habeam spem resurrectionis. Quare maxima animi lætitiæ perfundor, & celebros tantum beneficium gloria mea, hoc est, tam cantico linguæ, quàm Psalterio. Non cesso sermone meo magnitudinem huius beneficii in totum orbem diuulgare. Adhæc: Non deserit animam seu vitam meam in inferno, seu perditione, nec permittit, vt corpus meum Deo dicatum putrescat in sepulchro. Postremo ostendit mihi semitam vitæ, hoc est, excitat me
tertia

tertia die à morte. Ostendit enim mihi faciem suam,
& collocat me ad dexteram suam, vt habeam cœleste
gaudium & perpetuam vitam ac felicitatem.

VSVS HVIVS PSALMI.

Ex hoc Psalmo primum petenda sunt testimonia
mortis Christi, sepultura eius, descensus eius ad inferos,
resurrectionis eius à morte, & sessionis eius ad
dextram Dei patris eius, vt habes Acto. 2. & 13. Deins
de confirmanda est fides nostra in Iesum Christum,
quod cum ea, quæ hic Psalmus vaticinatur de Messia
per Dauidem, impleta sunt in Iesu filio Mariæ, post
mille, plus minus annos quàm à Dauide recitata fue-
rant, perspicue intelligamus, hunc Iesum esse verum
illum Messiam seu Christum, quem Prophetæ ventu-
rum adnunciauerunt. Postremò recitandus est hic
Psalmus, in summis afflictionibus nostris, & in dolori-
bus mortis ac inferni. Non enim est dubiũ, quin Chris-
tus ipse accepit ex hoc Psalmo consolationem per
Angelum, in monte Oliueti, cum sanguinem sudaret,
& in cruce, cum Latroni Paradisum promitteret. Nos
autem sumus membra Christi per fidem. Et Paulus
ait: Si compatimur, etiam conregnabimus. Quare *Rom. 8.*
cum affligimur terroribus mortis ac perpetuæ damna-
tionis, petamus ex hoc Psalmo consolationem, vt
quemadmodum Christus eluctatus est ex morte
& inferno, ita nos per Christum & in
Christo vincamus omnia
aduersa.

Psalmus 17.

Exaudi DOMINE iustitiam, &c.

*Alpersbachij, die 22. Maij, Anno**1559. explicatus.*

Idetur quidem hic Psalmus, à Da-
uide, suo tantum & ecclesiæ nos-
træ recitatus: sed quia precator
commemorat in eo, se sua ipsius
iustitia coram tribunali Dei cons-
tare, & legem Dei perfecte im-
plere, quod nulli quamvis sancto
homini competit, ideo precat-
io est solius filij Dei DOMINI nostri Iesu Christi. Est
enim nomen iusti competit etiam Sanctis, tamen hi
non sunt iusti sua ipsorum, sed tantum aliena iustitia,
quæ est per fidem, propter Christum. Quare sentias-
mus hunc Psalmum esse precatorem, qua Christus in
suis afflictionibus, ac præsertim in monte Oliueti, cum
sudaret guttas sanguineas, usus est.

Implorat autem opem Dei, quatuor præcipuè ar-
gumentis.

Vnum est, quod ipse sit innocens & iustus.

Alterum, quod Deus soleat exaudire sperantes &
inuocantes ipsum.

Tertium, quod hostes sint sæuissimi & crudelissi-
mi.

Quartum,

Quartum, quòd Deus habeat manum & gladium, hoc est, sit omnipotens, & possit oppressum & sæuitia hostium suorum liberare.

1. *Audi DOMINE iustitiam, attende ad clamorem meum, ausculta precationi meæ, quæ procedit ex eo ore, in quo nunquam inuentus est dolus.*
2. *A conspectu tuo iudicium meum prodeat, oculi tui videant, quæ recta sunt.*

Hi duo versiculi sunt propositio precationis. Christus enim, cùm videret se à Iuda proditum, à reliquis discipulis suis desertum iri, & à pontificibus, ac tam Iudæorum, quàm Ethnicorum cohorte iam capiendum, ac immanissimè tractandum, cùm tamen nullum vnusquam peccatum fecisset, nec inuentus esset dolus in ore suo, procidit in faciem suam coram Deo patre, & orauit: Pater mi, inquit, si fieri potest, transeat à me calix iste. Non est autem sentiendum, quòd Christus hæc tantum Euangelistarum verba in precatione sua dixerit: sed quòd Euangelistæ scripserint precationis Christi epitomen, quæ precatio antea in Psalmis copiose recitata erat. Testatur enim Lucas, Christum correptum angore, prolixius orasse. Inuocat igitur Christus filius Dei patrem, vt in tanto discrimine, quod imminet, exaudiat iustas suas preces, respiciat iustam suam causam, reuocet in animum, quòd nullum vnquam peccatum fecerit, nec inuentus sit dolus in ore suo, iudicet seueriter aduersus hostes suos & expendat, quæ iusta sint & recta, ne tam misere ipsi in sua innocentia sit pereundum.

3. *Probas*

3. *Probas cor meum, vificas noctu, examinas me, non tamen inuenis (iniquitatem:) Cogito, non tamen prauaricatur os meum.*
4. *In operibus quidem hominum (inuenis iniquitatem,) per legem tuam, ego autem seruaui semitas legis.*

Descriptio innocentiae Christi, qua Christus perfectissimè, & absq; vllò vitio, diuinæ legi satisfecit. Primum enim Deus coniecit Christum filium suum in varias & horribiles afflictiones, quæ nomine nostris significantur: & conuiuit, vt non solum esuriret, sitiret & algeret, verumetiam vt caperetur, alapis cederetur, flagellaretur, & tandem probrosissimæ mortis crucis obijceretur. Idq; permisit illo consilio, vt probaret obedientiam eius, & exploraret latebras animi eius: ac quemadmodum faber argentarius examinat aurum igne, num sit probum, aut purum, ita Deus examinauit filium suum igni magnarum & multarum afflictionum, vt palàm fieret, num perfectum obsequium præstaret. Sed nullam prorsus inuenit in ipso iniquitatem, nullamq; animi in aduersis suis amarulentiam. Etsi enim visus fuit cogitatione sua mortem, quæ diuina voluntate subeunda erat, vsq; adeò abhorrere, vt & sanguineas guttas sudaret, & mortem deprecaretur: Si possibile est, inquit, transeat à me calix iste: tamen ea cogitatione in tantum non peccauit, vt ne verbo quidem voluntati Dei restiterit, sed continuo addiderit: Non quod ego volo, sed quod tu vis. Hoc enim illud est, quod in tertio versiculo dicitur: Cogito, hoc est, trepido quidem ad cogitationem mortis, sed non prauaricatur os meum, hoc est, tantum abest,

ut pugnem cum voluntate Dei, & sim ei inobediens, ut ne verbo quidem me ei opponam. Deinde Christus non solum factus est Deo patri suo obediens, in malis perferendis, verum etiam in bonis faciendis. Dilexit enim Deum patrem, ex toto corde, & proximum sicut seipsum. Nullum officium iustitiæ, nec coram Deo, nec coram hominibus intermisit, sed vniuersam legem Dei perfectissime impleuit. Neque enim de Christo iudicandum est, sicut de alijs hominibus. Manifestum quidem est, si carnem & sanguinem eius, iuxta corporalem substantiam, & humanas imbecillitates respexeris, quod factus sit nobis similis, & tentatus per omnia, sicut nos: sed in hoc est discrimen, quod ipse tentatus sit absque peccato, & nulla vnquam inuenta sit in eo iniquitas. Ego, inquit, seruaui semitas legis. In hominibus autem, & in operibus eorum, si ad legem Dei exigantur, omnia iniquitate plena sunt. Sicut & alias dicitur: Non intres in iudicium cum seruo tuo, quia non iustificatur in conspectu tuo omnis viuens. Et: Si iniquitates obseruaueris Domine, Domine quis sustinebit? Solus igitur Christus filius Dei, verè iustus est, & perfectus legis impletor. Omnes autem homines sunt peccatores, & diuinæ legis præuicator res. Iustificantur autem, hoc est, consequuntur peccatorum remissionem, propter solum Christum, per fidem. Caterum, ubi vulgata tralatio legit: Ut non loquatur os meum opera hominum, propter verba labiorum tuorum, ego custodiui vias duras, ibi nos, pro illis verbis (propter verba labiorum tuorum) reposuimus: Per legem tuam. Verba enim labiorum Dei, hoc loco sunt lex seu Decalogus Dei, quem Deus ipse

h se in

se in monte Sinai promulgauit. Pro his autem verbis (vias duras) reposuimus, & semitas legis: pro vocabulo enim (Duras) apud Hebræos est, פָּרִיז Pariz, quod significat grassatorem, aut latronem. Quo nomine significatur lex Dei, quod lex, vt Paulus ait, operetur iram & occidat. Verisimile enim est, quod Paulus ex hoc huius Psalmi versiculo, & ex Psal. 142. collegerit suum illud dictum, quod est ad Rom. 3. & Galat. 3. Ex operibus legis non iustificabitur omnis caro, coram illo: per legem enim cognitio peccati. Et alias: Peccatum non cognoui, nisi per legem. Et iterum: Lex occidit. Omnia enim hominū opera, cum ad legem Dei exiguntur, inueniuntur corrupta, sordidata & iniqua, ideoq; homines per legem, tanquam per grassatorem, & latronem, occiduntur, & rei æternæ damnationis iudicantur. Solus autem Christus legem Dei perfecte impleuit, vt ea nullam in ipsum accusationem habeat, ideoq; non possit in eum grassari, & condemnare.

5. *Confirma gressus meos in semitis tuis, ne nutent vestigia mea.*
6. *Ego inuoco te, quia exaudis me Deus, inclina aurem tuam ad me, exaudi sermonem meum.*
7. *Ostende mihi mirifice beneficia tua, saluator sperantium, ab insurgentibus (aduersus me) dextera tua.*
8. *Custodi me, sicut pupillam oculi, sub vmbra alarum tuarum absconde me.*
9. *A facie impiorum, qui deuastant me, ab inimicis meis, qui toro animi affectu circumuallant me.*

Conclusio cœptæ precationis, in qua conclusione,
precatio

precatio non solum repetitur, verumetiam commutationibus variatur, & argumentis fidem precatoris confirmantibus amplificatur. Audi, inquit, iustas meas preces, iudica, quæ recta sunt, & libera me. Tu enim ipse scis, me esse innocentissimum, quippe qui me tanquam aurum in igne probaueris, nec ullam in me iniquitatem inueneris. Quare peto supplex, ut aut me hac cruce liberes, aut confirmes me robore animi, quò cōstanter in vocatione tua ambulem, & aduersa quæque fortiter perferam. Hoc enim est, quod dicit: Confirma gressus meos in semitis seu vijs & mandatis tuis, ne nutent vestigia mea.

Sed ut fides inuocantis confirmetur, adduntur nonnulla dicta, ex quibus animus ad bonam spem excitatur.

Primum: Inuoco te, quia exaudis me. Promisit enim Deus, se exaudire inuocantes ipsum in veritate: Inuoca me (inquit) in die tribulationis, eruam te, & honorificabis me. Cum igitur non ignorem, te esse veracem, & seruantem promissi, excitor ad inuocationem nominis tui: nec dubito, quin sis me exauditurus.

Deinde dicit: Saluator sperantium. Hoc est obseruabile epitheton Dei, quòd Deus multis miraculis, & magnis stratagematis reportauit. Nec quicquam certius est, quam quòd Deus seruet sperantes in ipsum. Quare, cum hoc epitheton in precatione recensetur, solet fidem precatoris mirifice excitare, & inflammare.

Præterea petit, ut liberetur ab insurgentibus in ipsum, seu ab hostibus suis, idque per dexteram Dei. Mens

tione autem dexteræ Dei admonetur de omnipotentia eius. Itaque iterum confirmatur fides precatoris, quod Deus non tantum habeat cor & voluntatem iuuandi, id quod ex promissionibus & exemplis nostrum est, sed etiam habeat manum dexteram, (hoc est) omnipotentiam, qua possit inuocantes ipsum iuare & seruare.

Ad hæc cum dicit: Custodi me, sicut pupillam oculi, &c. iterum confirmat fidem suam, mentione eius exempli, quo Israëlitarum in summis periculis seruati sunt diuinitus. Nam Deut. 32. ita dicitur: DOMINVS custodiuit populum suum, quasi pupillam oculi sui, sicut aquila prouocans ad volandum pullos suos, & super eos volitans expandit alas suas, &c. Liberauit enim DOMINVS Israëlitas ex Ægypto, & summis periculis, & custodiuit eos, vt pupillam oculi sui, & sicut aquila pullos suos: non vt hoc exemplo beneficia sua absolveret, sed potius testificaretur, se omnes eos qui in periculis suis inuocant ipsum ex fide, seruaturum & liberaturum. Quid autem sit DOMINVM ex fide inuocare, & quomodo Deus seruare ac liberare soleat, alias explicatum est.

Postremo, confirmat & illud fidem in inuocatione, quod commemoret aduersarios suos esse homines impios, & toto pectore in ipsum grassantes. Manifestum enim est, quod Deus odio habeat impios & virulentos. Quare dubium non est, quin exaudiat oppressum & innocentem, ac liberet eum de manibus impiorum.

10. *Adipem suum concludunt, ore suo loquuntur superbe.*

11. *Linera*

11. *Itinera nostra nunc obsident, oculos suos intendunt, ut deiciant (me) in terram.*
12. *Similitudo eius, sicut Leonis, qui inhiat prædæ, & sicut catulus Leonis, qui insidiatur in latebris.*

In versiculis septimo, octauo & nono, fecit Christus in hac sua precatione simplicem mentionem suorum hostium, persecutorum, & impiorum. Nunc autem in his tribus versiculis explicat & amplificat crudelitatem & immanitatem eorum: Concludunt, inquit, adipem suum. Nomine adipis significantur opes, facultates, & præstantissima hominum possessio. Queritur ergo Christus, quod habeat aduersarios haudquāquam abiectos, imbelles, & inter se dissidentes, sed omnibus suis viribus coniunctos, qui ad opprimendum ipsum iungant socias manus, & conferant omnes Gut vnd Blüt
zusammen setzen. suas opes & facultates, & quicquid habeant excellentissimarum rerum, adeoque sanguinem & vitam. Præterea crudelitatem instituti sui augent verbis arrogantis-
simis & atrocissimis. Spirant ingentes minas. Omnes gressus, omnia itinera non tam mea, quā meorum discipulorum obseruant, & in hoc solum proposito intenti sunt, ut me deiciant in terram & opprimant. Quid plura? Non aliter erga me affecti sunt, quā Leo esuriens, quærens prædā, quā deuoret, & catulus Leonis, qui fame excitatus ad rapinā ex latebris suis properat.

Cum hoc conuenit, quod Christus in Psal. 22. dicit: Circumdederunt me vituli multi, tauri pingues obsederunt me. Aperuerunt super me os suum, sicut Leo rapiens & rugiens. Recitantur & ista in precatione, ut

confirmetur fides precantis: quò immanior enim est crudelitas impiorum aduersus pios, eò propior est liberatio. Sicut habet vulgatum dictum: Cum duplici cantur lateres, tunc venit Moïses, hoc est, cum summa est afflictio, in propinquo est salus.

13. Surge DOMINE, anteuerte eum, deijce eum, salua gladio tuo animam meam ab impio.
14. A viris, manu tua DOMINE, à viris (inquam) seculi huius, quorum portio est in hac vita, & quorum ventrem imples de penu tuo, implentur & filij eorum, & relinquunt diuitias suas nepotibus suis.
15. Ego autem in iustitia, videbo faciem tuam, satiabor, cum surrexero, specie tua.

Reuertitur filius Dei ad precationem, ac iterum ex-
pergefagit fidem suam mentione manus & gladij, hoc
est, omnipotentiae Dei. Habes, DOMINE, manum, ha-
bes gladium, tua est omnis potestas in coelo & in terra.
Quaeso igitur te, vt hac tua manu & gladio, anteuertas
hostes & aduersarios meos, Pontifices ac Pharisaeos,
irrita facias consilia eorum, ne in me perdendo voti
fui compotes fiant. Deinde, facit antithesin inter se &
Pharisaeos, adeoque omnes suos, hostes: Salua (inquit)
me à viris huius seculi, qui omnem spem suae salutis
collocant in rebus mundanis. Hoc igitur decimoquar-
to versiculo describitur ingenium impiorum, qui op-
pugnant filium Dei, & Euangelion eius. Hi enim, etsi
iactant aliquoties desiderium coelestis regni, ac bono-
rum eius, tamen ardent sola rerum terrenarum cupi-
ditate, ac putant, se tum verè felices, cum prospero
rerum

rerum successu in hoc seculo fruuntur. Ac serè fieri solet, vt impij, non quidem sua industria, sed diuino beneficio, inuitante ipsos ad poenitentiam, maximam huius seculi felicitatem consequantur. Nec ipsi tantum multis opibus abundant, & magna dignitate sunt illustres, verumetiam propagant suam felicitatem ad posteros, ad liberos & nepotes. Sicut Psal. 72. dicit. Non est respectus mortis eorum, & firmamentum in plaga eorum. In labore hominum non sunt, &c. Et Psalm. 143. Quorum filij sicut nouellæ plantationes in iuuentute sua. Filiae eorum compositæ, &c. Et Hierc. 12. Quare via impiorum prosperatur, bene est omnibus, qui præuaricantur, &c. Quid plura? Etsi lex minatur omnibus impijs extremas maledictiones, tamen manifestum est, & res ipsa testificatur, quod priusquam iudicium Dei patefactum fuerit, impij fruuntur in hoc seculo omni genere benedictionis & felicitatis. Habes vnâ partem anthiteses, de impijs, qui non spirant nisi terrenum regnum. Sequitur altera pars de filio Dei: Ego autem (inquit) videbo faciem tuam, in iustitia, satiabor, cum surrexero, specie tua. Hoc prorsus illud est, quod Christus alias dicit: Regnum meum non est de hoc mundo, Impij Pontifices & hostes mei, non quærunt nisi mundana. Et quanquam etiam ipsi Messiam expectant, & de eo gloriantur, tamen non quærunt in eo vera & cœlestia bona, remissionem videlicet peccatorum, iustitiam, gaudium & pacem in Spiritu sancto, sed tantum quærunt mundana: Det vitam, *Det vitam, det* (inquiunt) det opes, reliqua mihi ipse parabo. Meum *opes, animam* autem regnum (inquit Christus) non constat terrenis *mihi æquum* bonis; nec hoc ago, vt fiam externus Monarcha huius *ipse parabo,* seculi,

seculi, sed ut sim iustus, & obsequar voluntati patris, qua mihi non tantum humanæ imbecillitates, verum etiam crux & mors ferenda sunt. Quid igitur? Perendum ne mihi erit? Nihil certe minus. Non continget mihi terrena bona: cōtingent autem mihi cōlestia. Non peribo in morte, sed resurgam à mortuis. Et postquam surrexero, intuebor faciem Dei & satiabor specie eius. Hæc est descriptio summæ felicitatis, Vivere enim faciem Dei, & satiari conspectu eius, est frui omnibus cōlestibus ac diuinis bonis. Habes antithesin impiorum, & Christi filij Dei. Illorum enim cupiditas est regnum mundanum, huius autem regnum non est mundanum, sed cōleste.

VSVS. HUIVS PSALMI.

Hic Psalmus est vaticinium mortis & resurrectionis Christi. Et quanquam precatio huius Psalmi soli Christo competit, propterea quod solus ipse diuinæ legi satisfecit, & perfectam iustitiam præstitit: tamen quia habet eam cum omnibus pijs, credentibus in ipsum, communem, idcirco excitemur ex hac precatione ad fiduciam inuocationis Dei in omnibus aduersis: & certo speremus, quod quemadmodum Deus pater conseruauit filium suum in omnibus afflictionibus, ac in morte ipsa, & collocauit eum in summa maiestate, ita & nos sit conseruaturus propter Christum, ut vnâ cum Christo intueamur faciem Dei, & satiemur cōlestibus ac æternis bonis. Sicut Paulus ait, 1. Cor. 13. Cernimus nunc per speculum in ænigmate, tunc autem facie ad faciem. Nunc cognosco ex parte, tunc autem

autem cognoscam, quemadmodum & cognitus sum.
 Eccl. Cor. 15. Cum subiecta fuerint illi omnia, tunc &
 ipse filius subijcietur ei, qui illi subiecit omnia, vt DE-
 VS sit OMNIA in OMNIBVS. Et Ioan. 3. Scimus,
 quoniam si aparuerit, similes ei erimus, quoniam vis
 debimus eum, sicuti est.

Psalmus 18.

Diligam te DOMINE fortitudo mea, &c.

*In Præpositura Denckendorffij,
 explicatus.*



Ic Psalmus vulgò de Dauide ex-
 poni solet. Inscriptio enim, quæ e
 priori libro Samuelis cap. 22. vnà
 cum Psalmo in hunc Psalmorum
 librum trāslata est, sic habet: Lo-
 cutus est Dauid DOMINO verba
 carminis huius, in die, qua libes-
 rauit eum DOMINVS de manu
 omnium inimicorum suorum, & de manu Saul. Non
 est igitur mirum, quòd interpretes exposuerint hunc
 Psalmum, iuxta ρ̃ ḡn̄δ̄p̄, de Dauide, non autem de
 Christo DOMINO nostro, nisi allegoricè, & vt ipsi
 loquuntur, spiritualiter. Sed si intueamur eum pressis-
 us, & considerauerimus eum, iuxta Apostolicam interi-
 pretationem, ρ̃ ḡn̄δ̄p̄ seu litera eius, non nisi in Christum

DOMINVM nostrum competit. Etsi enim dubium non est, quin David multa & magna aduersa sit passus, è quibus **DOMINVS** ipsum elementissimè liberauerit, nec est negandum, quin David iuxta inscriptionem, quam commemorauimus, acceperit occasionem, ex ijs miraculis, quibus omnia sua pericula euasit, & excitatus sit à Spiritu sancto, vt hunc Psalmum recitaret: tamen ^ꝛ ^ꝑ ^ꝑ ^ꝑ seu litera Psalmi non respicit, nisi in **DOMINVM** nostrum Iesum Christum. Ac tunc deum ad Dauidem, & omnes alios pios in Christo renatos, accommodari suo modo potest, cum fundamentum de Christo positum fuerit. In hoc enim Psalmo dicitur: Retribuit mihi **DOMINVS** secundum iustitiam meam, & secundum puritatem manuum mearum reddidit mihi. Quia custodiui vias **DOMINI**, nec impiè gessi à Deo meo, &c. Hæc & his similia quæ sequuntur, non possunt propriè in Dauidem, qui aliàs dicit: Non intres in iudicium cum seruo tuo, sed in solum Christum **DOMINVM** nostrum referri. Etsi enim David habuit magnam iustitiam, collatis suis controuersijs cum hostibus suis, tamen collatus cum lege Dei, fuit & ipse peccator. Deinde & illud: Constitues me in caput gentium. Populus, quem ego cognoui, seruiuit mihi, conuenit propriè, non Dauidi, sed Christo, qui solus est caput, & vt Esaias ait, Lux & salus Gentium, & ad quæ agnoscendum vocatæ sunt, reiectis Iudæis, Gentes. Postremo, Paulus scribens ad Romanos, cap. 15. recitat ex hoc Psalmo testimonium de uocatione Gentium ad agnitionem Christi: Gentes, inquit, pro misericordia, glorificent Deum, sicut scriptum est: Propter hoc confitebor tibi in gentibus, &

 nomini

nomini tuo Psalmum dicam. Hæc non sunt propriè Davidis, sed Christi verba, quæ & testificantur vniuersum Psalmum, recitatore quidem Dauide, dictatore autem Spiritu Dei, de Christo esse intelligendum. Quare, cum Paulus exponit eum de Christo, non est alia, ne Angeli quidem interpretatio, agnoscenda.

Continet autem hic Psalmus quinquaginta versiculos. Et est vaticinium de passione, doloribus mortis & inferni, quos pertulit Christus, nostro nomine. Item de resurrectione, qua liberatus est ex omnibus suis aduersis, & de exaltatione eius in summam maiestatem, vt in nomine eius omne genu se flectat. Collatum est autem hoc vaticinium à Spiritu sancto in hunc Psalmum, & hanc tam precationis, quam gratiarum actionis formulam, vt mors & resurrectio Christi non solum sacrificijs adumbrarentur, verum etiam publicis & vulgaribus carminibus celebrarentur, & p̃j ad manum, in omnibus actionibus & passionibus, diu, noctuq; haberent, quo fidem suam confirmarent, & in Christo salutem consequerentur.

1. *Diligam te DOMINE, fortitudo mea.*
2. *DOMINE, petra mea & arx mea, & liberator meus, Deus meus, rupes mea, in qua spero, scutum meum, & cornu salutis mea, & exaltatio mea.*

Exordium Psalmi, in quo Christus ad captandam Dei patris sui beneuolentiam, & ad testificandam certissimam ac firmissimam promptitudinem eius in liberandis afflictis, commemorat dulcissima Dei patris sui epitheta. **DILIGAM TE.** Non est hoc loco vo-
i 2
cabulum

cabulum actionem, sed affectum significans. Interiectionem vocant, preeandi, seu blandiendi, Latine, *Amabo te*, Germanice, *Ach lieber*.

Fortitudo mea. In aduersis enim, in morte, in horribus inferni, & in ira Dei, nihil est, quod afflictum fortius & validius conseruet, quam Deus ipse. Merito igitur reportat epitheton fortitudinis.

Petra mea. Vbi enim firmitus & stabilius consistet afflictus, quam in DOMINO Deo suo? Iuste igitur tribuitur ei cognomen petrae.

Arx mea, seu turris meus. Sic & Psal. 31. Fortitudo mea, & refugium, seu turris mea es tu. In afflictionibus enim non est asylum, ad quod tutius confugas, quam ad DOMINUM Deum nostrum.

Liberator meus. Multi sunt liberatores & seruatores in aduersis: sed mundani, in rebus mundanis, & corporales, in rebus corporalibus: & humani, in rebus humanis: & externi, in rebus externis: & temporales, in rebus temporalibus. Solus autem DOMINUS Deus noster, verus est, & coelestis ac perpetuus liberator, qui etiam non semel & iterum, sed in sempiternum seruat sperantes in ipsum.

Deus meus. Non est hoc loco vocabulum nomen les hora, sed *El*, quod proprie significat fortem, Heroem, admiratione dignum. Tribuitur ergo DOMINO Deo nostro epitheton Herois, quod etsi omnia gubernat, nec cadit capillus absque voluntate eius de capite nostro, tamen peculiariter seruat inuocantes ipsum, heroice, & mirabiliter: cum iam pro mundi huius ratione omnia videantur conclamata & perdita. Vnde
&

& Esa. cap. 9. Christus ipse vocatur El, gibbor, hoc est, Heros, fortis.

Rupes mea. Aliud vocabulum a priori, quod petram transtulimus. Significat autem rupes hoc loco, saxum vndiq; ita circumdatum & munitum, vt expugnari aut viribus humanis deijci non queat. Vnde & qui ad eam confugiunt, & sperant ibi tutelam, spe sua non frustrantur. Talis rupes est D O M I N U S Deus noster, in quem tutissimè sperare poteris, propterea quod quisquis sperauerit in ipsum, non pudeat.

Scutum meum. Qui enim hoc scuto, & hoc clypeo, qui est Dominus Deus, munitur, tutus est ab omnibus saculis aduersarij.

Cornu salutis meæ. Cornu, more Hebræo, significat vel regnum, quod Reges balsamo è cornu sumpto, vngebantur: vel vires & potentiam, quod animalia cornupeta grassentur cornibus suis, tanquam armis. Vocat igitur Christus Deum, cornu salutis suæ, hoc est, regnum, seu potentiam suam salutarem, quod conseruauerit ipsum regie, heroicè, seu potenter in omnibus aduersis, & contulerit in ipsum omnem salutem.

Exaltatio mea. Deus enim non simpliciter seruauit Christum filium suum in aduersis, ne periret, sed etiam exaltauit eum in summam sublimitatem, & dedit ei nomen super omne nomen. Rectè igitur tribuit ei Christus titulum exaltationis.

Hæc sunt epitheta, quæ Deus non solum reportauit ex miranda illa filij sui liberatione, qua conseruauit eum in morte, in horroribus inferni, & in extrema ira Dei, propter peccata humani generis, quæ Chris-

stus expianda suscepit, & extulit eum in summam maiestatem, verumetiam conseruabit, & efferet in æternam felicitatem omnes, qui verè credunt in Christum. Sed de hac re postea.

3. *Laudans, inuocabo DOMINUM, & ab inimicis meis seruator.*

Post exordium, in quo Christus commemoratione epithetorum Dei, non solum captauit benevolentiam apud Deum patrem, verumetiam excitauit spiritum suum ad precationem, & confirmauit certitudinem fiducia suæ. Sequitur propositio precationis. Etsi enim filius Dei, cum initio assumeret filium hominis ex Maria virgine, in vnitatem personæ, ornauit eum omni sua maiestate, quam habuit ab æterno, à Deo patre suo, vt potuisset ab omni assaultu mortis & dolorum inferni, liberrimus esse, & coram toto mundo gloriam suam ostentare, tamen in diebus carnis suæ exinanituit se, & assumpta abiectionis serui forma, factus est obediens patri usque ad mortem crucis, vt peccata humani generis expiaret, & nos cum Deo patre reconciliaret. In hac igitur serui forma, cum iam mortis vicinus esset, prosternit se coram Deo patre suo in monte Oliueti, in horto Gethsemane, & ait: Ah DOMINE, petra mea, arx mea, cornu salutis meæ, in tantis meis angustiis & ærumnis, ad quem confugiam, nisi ad te Deum patrem, seruatorem & exaltatorem meum? TE igitur solum inuocabo, idque non simpliciter, sed cum summa nominis tui laude, vt qui ingenuè, & ex animo profitear, te tanta esse in promissis tuis

veritate

veritate & constantia (qua laude, quid potest excellentius dici?) ut quotquot te inuocauerint, ab inimicis suis liberentur & seruentur. Non enim sentiamus Christum, cum in horto Gethsemane oraret, pauca illa tantum verba, quæ Euangelistæ recitant, dixisse: Pater si possibile est, transeat à me calix iste, &c. Hæc quidem verba, epitome sunt, & summa precatationis Christi: sed si rem probe expendere, non est dubium, quin cum Euangelistæ testentur, Christum ^{extremis} adeoque tantisper orasse, dum & Apostoli obdormiscent, & ipse sanguinem sudaret, usus sit istis precationis formulis, quas Spiritus sanctus iam ante mille plus minus annis, per Dauidem atauum eius præscripserat, in quarum catalogo etiam hic Psalmus continetur. Reponamus igitur hunc Psalmum inter eas precationes & supplicationes, quas Christus in diebus carnis suæ, cum valido clamore & lachrymis, (quemadmodum epistola ad Hebræos loquitur) apud Deum patrem, qui poterat ipsum à morte seruare obtulit, & pro reuerentia exauditus est. Heb. 5.

Cæterum, quod facit in hac precatationis propositione, mentionem suorum inimicorum: Seruabor (inquit) ab inimicis meis, non est propriè intelligendum de externis & carnalibus inimicis, quales fuerunt Scribæ & Pharisei. Etsi enim hi, & alij impij excitati fuerunt à Satana, ut persequerentur Christum virum lentissimè & crudelissimè, tamen quia nec regnum Christi est de hoc mundo, nec Christus venit in hunc mundum, ut externus bellator: inimici eius propriè intelligendi sunt, Satan, Mors, & Infernus, contra quos ita belligeratus est, ut victoriam longè omnium clarissis

clarissimam, & nobis exoptatissimam reportauerit. Sed de hac re postea.

4. *Circumdant me dolores mortis, & torrentes perditionis con-*
turbant me.
5. *Dolores inferni circumdant me, occupant me laquei mor-*
tis.
6. *In tribulatione mea inuoco DOMINUM, & ad Deum*
meum clamo. Exaudit è templo suo vocem meam, &
clamor meus coram ipso, peruenit ad aures eius.

Hæc est narratio, in qua cōmemorantur inimici, è quorum faucibus petit se eripi & seruari. Et quid multis opus? Hoc ipsum est, quod Euangelistæ scribunt:

Matth. 26. Coepit Iesus expauescere & angi, ac dixit: Tristis est anima mea, vsq; ad mortem. Postquam enim Christus suscepit peccata nostra expianda, & ea non possunt, nisi morte & inferno, seu extremo supplicio, & perditione (stipendium enim peccati mors est) expiari, reliquum erat, vt & mortem ac dolores inferni suscipere. Obijcitur ergo tentationibus, horroribus, ac doloribus mortis, non in infimo, non in mediocri, sed in supremo gradu. Multi fuerunt non inter homines tantum pios, verumetiam inter Ethnicos & impios, qui susceperunt mortem perferendam, aut tranquillo, aut etiam alacri animo. Christus autem filius Dei, ad conspectum mortis, ita expauescit & terretur, vt non solum toto corpore contremiscat, verumetiam sanguinem sudet: Dolores, inquit, mortis & inferni, seu extremæ perditionis, ita me inuadunt, ac occupant, vt sentiam me non aliter periturum, quam si quis subito & impro-

& improuiso aquarum torrente præter omnem expectationem obruatur & submergatur, nec aliter afficiar, quàm si captius tenear laqueo, quo confestim suffocer. Obsecro igitur te, quid est, quòd Christus, qui est & filius Dei, & in forma Dei, longè imbecillior ad conspectum mortis apparet, quàm multi homines, qui visi sunt mortem fortiori animo pertulisse? Vna causa est, quòd debuit per omnia, iuxta epistolam ad Hebræos, fratribus similis fieri, & per omnia tentari, iuxta similitudinem, (sed absq; peccato) vt misericors esset, & fidelis Pontifex, in his, quæ apud Deum forent agenda. Magna autem hominum quamuis piorum pars, tanta est imbecillitate, vt non aliter mortem horreant, quàm extremum interitum. Debuit igitur Christus hac in parte similis ipsis fieri, & mortem horrere, vt sic tentatis succurrere posset. Altera causa est, quòd cum peccatum, quò est grauius & horribilius, eo grauioribus mortis & inferni terroribus, tanquam supplicijs, dignum sit: Christus autem suscepit peccatum, non vnius tantum hominis, sed etiam totius humani generis expiandum, congruentissimum fuit, vt susciperet etiam supplicium peccati, hoc est, horrores mortis & inferni, in summo gradu. Huc accedit & illud, quòd Christus aggrediendo mortem non aspexit mortem, militum aut prædonum more, quibus cum homines minantur exitium, propter scelera, soleant temerè respondere: Quid? Capitiū carne plenum, hæc omnia expiabit: qua voce significant, si bi non admodum magnæ esse curæ, etiam si capiantur, & dent pœnas morte, sed aspexit mortem, qualis est formata ex peccato. Peccatum autem pingit mortem,

k

non

Es ist umb ein
Bappen vol
Fleisch zurhūn.

non vt rem leuem & euanidam , sed quæ non solum aufert homini omnia vitæ huius commoda , verum etiam obijcit eum æternæ iræ Dei, & tradit ipsum perpetuis cruciatibus. Quare sicut non est mirum, quòd Christus in hoc Psalmo conqueratur de torrentibus & laqueis mortis, ita mirum non est, quòd ad conspectum mortis in monte Oliueti ita cohorrerit, vt & exclamauerit: Tristis est anima mea vsq; ad mortem, & paulo post sanguinem sudauerit. Quid igitur Christus in tantis terroribus faceret? Quid aliud, nisi quod Euangelistæ dicunt, progressus à discipulis pusillum, procideret in faciem suam, & oraret. Et quod hoc loco Psalmus recitat: In tribulatione mea inuoco Dominum, & clamo ad Deum meum, certissima fiducia & spe concepta, quòd vox clamoris mei ad eum perueniat, & exaudiat ipsam è templo suo, vel cœlo, quod est Thronus eius, vel tabernaculo, in quo se oraculis suis præsentem testificatus est.

7. *Commouetur, & contremiscit terra, & fundamenta montium conturbantur & concutiuntur, quoniam irascitur ei.*
8. *Ascendit fumus in ira eius, ignis ex ore eius absumens, carbones succenduntur ab ipso.*
9. *Inclinat cœlos & descendit, & caligo sub pedibus eius.*
10. *Et rebitur super Cherub, ac volas, adeoq; volat super alas venti.*
11. *Ponit tenebras latibulum suum, circum circa tabernaculum suum tenebræ aquarum, caliginos nubium.*
12. *Præ fulgore coram eo, caligines eius prætereunt, grando & carbones ignis.*

13. *Et*

13. *Et tonat in caelo DOMINVS, & altissimus dat vocem suam grandinem, & carbones ignis.*
14. *Mittit sagittas suas, & confringit ipsos, fulgura multa, & perdit ipsos.*
15. *Apparent profunditates aquarum, & reuelantur fundamenta orbis, ab increpatione tua DOMINE, à flatu spiritus iræ tuæ.*

Filius Dei Christus Dominus noster expiaturus peccatum humani generis, non solum obiectus est horroribus mortis, iuxta illud, quod dixit: Tristis est anima mea usque ad mortem, verumetiam obiectus est grauitati iræ diuinæ. Etsi enim peccatum non fecit, nec est inuentus dolus in ore eius, tamen suscepit in se expiandum peccatum totius humani generis, & voluit esse victima, non solum pro nostris, vt Ioannes inquit, verumetiam pro totius mundi peccatis. Quam igitur iram Dei singuli homines, pro suo peccato meriti sunt, hæc vniuersa deriuatur & coniicitur in filium Dei. Ac sensum quidem huius grauissimæ iræ, Christus in cruce laceratus, & clauis perfossus pendens, breuissimis exprimit, cum exclamat: Deus meus, Deus meus, vt quid me dereliquisti? in versiculis autem huius Psalmi, quos iam recitauimus, exponit eum enumeratione omnium penè signorum & argumentorum, quibus Deus inenarrabilem iræ suæ grauitatem, aduersus peccata hominum, in scriptis Prophetis testificatus est.

In Genesi cap. 6. & 7. peccant homines in toto orbe terrarum, tyrannide & libidine. Irascitur igitur Deus tanta vehementia, vt statuerit vniuersum humanum

genus delere. Hanc autem iram patefacit aquarum inundatione: Rupti sunt, inquit Scriptura, omnes fontes abyssi magnæ, & cataractæ cœli apertæ sunt, & facta est pluuiæ super vniuersam terram quadraginta diebus, & quadraginta noctibus.

In Genesi cap. 19. peccant Zodomitæ & Gomorrhitæ horrendis sceleribus. Declaratur ergo ira Dei, cum DOMINVS pluit super Zodomam & Gomorrhatham sulphur & ignem à Domino de cœlo.

In Exodo cap. 19. Dominus promulgaturus Decalogum, non simpliciter reuelat se de cœlo, & concionatur in monte Sinai. Sed quia Decalogus dandus erat in hunc vsum, vt ostenderet peccatum, & operaretur iram, idcirco Dominus concionaturus descendit de cœlo tam stupendo spectaculo, vt cœperint audiri tonitrua, & micare fulgura: nubes item densissima operiebat montem, clangorq; buccinæ vehementius perstrepebat. Breuiter, totus mons Sinai fumabat, & ascendeat fumus ex eo, quasi de fornace, vt vndiq; esset terror, & plurima mortis imago. Hæc erant manifesta testimonia iræ Dei aduersus peccata, quæ Decalogo ostenduntur. Et qualis fuit externus tumultus in promulgatione Decalogi, talis solet etiam excitari in conscientia, cum peccatum & ira Dei reuelantur.

In Numeris cap. 16. peccant Core, Dathan & Abiron seditione aduersus Moysen & Aheronem, imò potius blasphemia aduersus legitimam ordinationem Dei, testificatur igitur DOMINVS iram suam, dirup-tione terræ sub pedibus eorum, vt terra aperuerit os suum, & deuorauerit illos cum tabernaculis suis, ac
vniuersa

vniversa substantia eorum, ipsi autem descenderint vivi in infernum.

In Iosua cap. 10. irascitur Deus regibus Amorrhæorum, quod essent hostes electi populi sui. Quare, vt clararet iram suam, mittit lapides magnos super ipsos de cœlo, & mortui sunt multo plures lapidibus grandinis, quàm quos filij Israël gladio percusserant.

In libro Iudicum cap. 4. Irascitur Deus Sisaræ, duci exercitus Regis Canaan, quod extrema crudelitate opprimeret Israëlitas, qui erant ecclesia Dei. Testificatur igitur iram suam, aduersus Sisaram, primum quidem immisso terrore in exercitum eius, deinde infixio clauo in cerebrum Sisaræ, per mulierem, vt Psalmus Deborah dicat: De cœlo pugnaverunt stellæ, de gratiis Iudi. 5. dibus suis pugnaverunt cum Sisara.

1. Samuel. 7. Philistini, perpetui Israëlitarum hostes, belligerantur aduersus ecclesiam Dei. Dominus autem crudelitatem eorum exosus, iram suam ita patefacit, vt tonet super Philistinos magno fragore, quo metu ita exterrentur, vt ab Israëlitis fusi fugatique occumbant.

1. Samuel. 12. Irascitur Deus Israëlitis, quod ex impietate Regem petiissent. Ostendit ergo iram suam repentino & improuiso tonitru & tempestate: Nunc state, inquit Samuel, & videte rem istam grandem, quam facturus est Dominus in conspectu vestro. Numquid non messis tritici est hodie? Inuocabo Dominum, & dabit voces & pluuias: & scietis & videbitis, quia grande malum feceritis vobis in conspectu Domini, petentes super vos Regem.

Apud Prophetam Ioelcm cap. 3. DOMINVS rugit

k 3 de

de Zion, & dat vocem suam de Hierusalem. Hæc est denunciatio iræ Dei. Quid ergo sit : Mouentur cœli & terra.

Extant & alia in Prophetiis scriptis exempla, quibus Deus seueritatem iræ suæ aduersus peccata, testificatus est.

Cum igitur filius Dei suscepit peccata vniuersi humani generis expianda, debuit etiam sensum seuerissimæ iræ Dei suscipere. Hic autem sensus, sicut est viribus humanæ carnis in hac vita intolerabilis, ita etiam humanis verbis inexplicabilis est. Sed vt aliquo saltem modo explicaretur, visum est filio Dei, DOMINO nostro Iesu Christo, in his versiculis commemorare illa argumenta & signa, quibus Deus solet iram suam aduersus peccata patefacere & testificari.

Commouetur, inquit, & contremiscit terra, & fundamenta montium conturbantur & concutiuntur. Solet Deus ostendere & declarare iram suam terræ motibus, montium concussionibus, & id genus alijs argumentis, sicut quondam in promulgatione Decalogi factum esse apparet. Ego igitur cum nunc hæc pen-deam, horribiliter dilaceratus & confixus, non aliter afficior, quàm si terra tremere, & mihi dehiscere, ac omnia montium fundamenta quassarentur. Quid itaq; Quoniam Deus (inquit) irascitur El, vel humano generi, vel Christo filio suo, vt sit repentina mutatio personæ primæ in tertiam, quæ mutatio frequens est apud Hebræos, quemadmodum est & illud, Psal. 3. DOMINI est salus, & super populum tuum, benedictio tua. Sententia igitur est: In his grauissimis meis calamitatibus, perinde afficior, ac si cœlum terræ misceretur.

Sentio

Sentio enim intra me tantam diuinæ iræ seueritatem, vt existimem me planè à Deo esse desertum. Non ignoro quidem Deum patrem de me è cœlo clamasse: Hic est filius meus dilectus, in quo mihi complacitum est, sicut & mox, versu 19. dicitur. Sed quia stas tui expiare peccata humani generis, video & sentio in me etiam seuerissimam iram, qua Deus in peccata excandescit, & qua maior ne cogitari quidem potest, deriuatam esse.

Ascendit fumus in ira eius, inclinât cœlos, vehitur super Cherub: ponit tenebras latibulū suum: præ fulgore coram eo, nubes eius transeunt. Quondam enim, cum Dominus ad promulgandum Decalogum, præsentiam maiestatis suæ patefaceret, (Hoc enim significat Dominum inclinare cœlos, & è cœlo descendere) omnia videbantur plena caligine, fumo, igni, tonitruis, & fulgetris, tanquam accensis vndiq; carbonibus ignitis. Et quia terribiles & tenebricosæ ac densissimæ nubes impetuosis ventis hinc inde in cœlo seu aëre agitatæ discurrebant, & minitabantur hominibus in terra horribilia mala, idcirco dicitur Deus iratus vehi & volare super Cherubim, seu ventos, seu Angelos. (Cherub enim volucris dicitur, quo nomine significatur, partim ventus, quòd quasi volucris alis suis per aërem velocissimè penetret, partim angelus, quòd forma eius alata, tanquam volucris, constituitur, Exod. 25. & Ezech. 10.) Dicitur etiam in tenebris latere, & habere tabernaculum caligine seu nubilus vndiq; circum circa obtectum, ac fulgore suo, seu fulgetris caliginosas nubes discutere, & quasi cœlum aperire. Hisce enim tam miraculis, quàm terroribus

bus testificatus est Deus quondam in Decalogi promulgatione, non solum presentiam suæ maiestatis, verumetiam seueritatem iræ suæ. Sicut ergo, cum talia quondam agerentur, Israëlita tanto terrore & pavore concutiebantur, vt existimarent ceruicibus suis gladium iam imminere, & se ab irato Deo abiectos ac desertos, vnde & exclamant ad Moysen: Loquere tu nobis, & audiemus. Non loquatur nobis DOMINVS, ne fortè moriamur. Ita & ego, (inquit filius Dei) pensans iam in cruce miserrimus & nouissimus virorum, non aliter afficior, quàm si iratus Deus me à facie sua ita proiecisset, vt necesse habeam perpetuò interire, & omni felicitate priuari. Præterea quemadmodum Deus iratus, quondam Philistinis, exterruit eos horrendis tonitruis & fulgetris de cælo, ita ira DEI multò magis in me grassatur, quàm si omnia tonitrua & fulgetra in me sæuire viderentur. Adhæc, sicut quondam DEVS regibus Amorrhæorum iratus, misit in ipsos grandines & lapides, vt internitione perirent, ita Deus nunc grauitate iræ suæ multò sæuerius in me animaduertit, quàm si omnia grandinum & fulminum (quæ sunt lapides & sagittæ Dei) genera in me conijcerentur. Postremò, quemadmodum vehemensissimi venti, (qui sunt increpatio Dei, & flatus iræ eius) solent profunda, voragines & abyssus aquarum, (hæc enim dicuntur fundamenta orbis) ita discooperire & denudare, vt qui in aquis nauigant, videantur sibi in medio inferno nauigare, & iam internitioni proximi esse. Adeoq; illud omnino fieri solet, quod Psal. 107. commemorat: Qui descendunt, inquit, in mare nauibus, facientes negotiationes in aquis multis,

tis, ipsi vident opera DOMINI, & mirabilia eius in profundo. Dicit, & stare facit ventum procellosum, & exaltantur fluctus eius. Ascendunt vsq; ad cœlum, descendunt vsq; ad abyssos, anima eorum in malis tabescit. Turbantur & mutant sicut ebrius, & omnis sapientia eorum absorbetur. Ita & ego videor mihi nunc in profundo maris versari, & omnibus marinis fluctibus obrui, vt præ terroribus contabescam, & arbitrer nullam mihi vspiciam viam euadendi patere. Habes descriptionem seueritatis iræ Dei, cuius sensum Christus filius Dei, non coactus, sed sua sponte in se suscepit: nō vt sua aliqua, quorum nulla habuit, sed nostra peccata expiaret. Cogitemus igitur, quanta sit magnitudo peccati nostri, vt ad expiandum illud, filius ipse DEI obiecerit sese iræ, poenæ, & supplicio longè omnium grauissimo. Cogitemus etiam, quanta sit seueritas diuinæ iræ, aduersus peccata, ut DEVS ne filio quidem suo, qui peccata expianda suscepit, percerit, sed maluerit eum sensu seuerissimæ suæ iræ percelli, quàm peccata impunita remittere. Quare abhorreamus à designandis peccatis, non aliter, quàm à faucibus ipsis inferni, & agamus Deo patri gratias, quòd non sit dedignatus, vnigenitum filium suum in mortem & inferni dolores, propter nostram salutem, conijcere. Quid igitur dicemus? An non filius Dei assumpsit semen Abraham, seu filium hominis in eandem personam, & ornauit eum, iam inde ab initio conceptionis, omni forma & maiestate Dei? Quomodo ergo fieri potuit, vt sensu tantorum dolorum & calamitatum afficeretur? Certè diuinitas natura sua nihil patitur. Humanitas autem, etsi natura sua obnoxia est passioni,

Philip. 2.

passioni, tamen à filio DEI in eandem personam assumpta, facta est & ipsa particeps diuinæ maiestatis. Quomodo igitur tantis doloribus quassari potuit, vt nō fictitia, sed verissima voce exclamaret: Deus meus, Deus meus, quare me deseruisti? Hic audiendus est nobis Paulus, qui ad Philippenses scribens: Iesus Christus, inquit, cum esset in forma DEI, non rapinam arbitratu est, vt esset æqualis Deo, sed semetipsum inaniuit, forma serui sumpta, in similitudine hominum constitutus, & figura repertus vt homo, humilem præbuit semetipsum, factus obediens vsq; ad mortē, mortem autem crucis. Potuisset enim Christus ab initio conceptionis suæ ostentare formam, seu maiestatem Dei, in qua iam ex assumptione, & vnione cum filio Dei collocatus erat. Sed quia visum est Deo patri, vt in diebus carnis suæ, ad expianda peccata humani generis, dissimularer, seu vt Paulus loquitur, exinaniret formam & maiestatem Dei, acsumeret formam & abiectionem serui, idcirco obsecutus est voluntati patris, & factus est obediens, suscipiendo non solum varias corporis imbecillitates & calamitates, verum etiam dolores mortis & horrores inferni, adeoq; sensum extremæ iræ Dei. Quare, quod passus est Christus, non est passus necessitate, sicut nos alij homines patimur, sed spontanea voluntate: vt & Deo patri officium obedientiæ suæ probaret, & nostra peccata expiaret. Quid ergo? Num Deus filium suum in tantis doloribus & afflictionibus deseruit? Nihil minus, sed potius extulit eum in summam sublimitatem, ac donauit illi nomen, quod est super omne nomen, vt in nomine Iesu omne genu se flectat, coelestium, terrestrium

ac infernorum. Quod autem Paulus suis verbis exponit audiamus nunc Psalmum nostrum, suis etiam verbis explicantem.

16. *Mittit de summo, apprehendit me, extrahit me de aquis mulis.*
17. *Eripit me ab inimico meo forti, & ab ijs, qui me odio habent, quoniam robustiores me erant.*
18. *Præuertunt me, tempore calamitatis meæ, DOMINVS autem est sustentaculum meum.*
19. *Et educit me in latitudinem, eripit me, quoniam complacitum est ei in me.*

Etsi Deus pater obijcit Christum filium suū omnis generis calamitatibus, adeoq; morti ipsi crucis, & extremis horroribus inferni, tamen non abijcit, non deserit eum: sed quò grauiores sunt ærumnæ eius, eò propius est auxilium Dei. Mittit enim (inquit) de summo, mittit de cœlo, mittit cœleste auxilium, & me iam penè submersum, & suffocatum apprehendit, quasi crinibus, vt extrahat me incolumem e profundis aquis, aut extremis ærumnis: aquæ enim ærumnas & afflictiones significat. Et quanquam hostes mei, & qui me odio prosequuntur, videantur me robustiores, ac præualere mihi, meq; incautum, & nihil tale cogitantem præuerti, ac opprimere, tamen Dominus sustentaculum meum est, ac seruat ac liberat me, & educit me in latitudinem, hoc est, educit me ex omnibus angustijs animi, & perfundit me omni latitia & gaudio, quo animus quasi dilatatur, & in locum spaciosum deducitur. Non enim is sum homo, de quo Deus dixit:

pœnitet me fecisse hominem, sed ille homo sum, de quo pater è cœlo testificatus est: Hic est, inquit, filius meus dilectus, in quo mihi bene est complacitum.

Quæ cum ita se habeant, videamus, qui sint hostes & inimici, de quorum crudelitate conqueritur Christus, & quomodo sit ab ijs liberatus. Et si enim Scribæ & Pharisei fuerunt coniurati hostes Christi, & graßati sunt, post Pentecosten, in discipulos Christi tam Iudæi quàm Gentes, omni genere crudelitatis, tamen hoc loco non loquitur Christus propriè de his hostibus & inimicis, sed quemadmodum Paulus ait: Non est nobis lucta aduersus carnem & sanguinem, sed aduersus principatus, aduersus potestates, mundi dominos, rectores tenebrarum seculi huius, aduersus spirituales astutias in cœlestibus. Ita Christus non suscepit externum bellum, aduersus externos hostes, mundano modo, sed belligeratus est cum spiritualibus hostibus, spirituali modo. Qualis enim est rex, talis etiam est bellator. Non est rex mundanus: Regnum meum, inquit, non est de hoc mundo, non igitur belligeratur mundano modo. Ecce enim hostis Christi est Satan, de quo ab initio dictum est: Tu insidiaberis calcaneo eius. Et de quo Christus ipse dicit: Venit princeps mundi huius, & in me non habet quicquam. Hostis etiam Christi est peccatum. Cum enim Christus sit iustitia, cum qua ex diametro pugnat peccatum, perspicuum est, peccatum inter hostes Christi collocandum esse. Est & hostis Christi mors ipsa: Nouissimus (inquit Paulus) hostis aboletur mors. Habes præcipuos hostes & inimicos Christi, de quibus est & in alio Psalmo: Dixit DOMINVS Domino meo, sede à dextris meis,

meis, donec ponam inimicos tuos scabellum pedum tuorum. Et mox: Dominare in medio inimicorum tuorum. Et si enim etiam homines impij sunt inimici Christi, tamen non sunt inimici, nisi propter Satanam & peccatum. Contra hos igitur principatus, rectores tenebrarum, & spirituales astutias in cœlestibus bellis geratus est Christus: idq; non externa arma inferens, sed multa mala patiendo.

Hactenus de hostibus & bello Christi. Videamus etiam modum liberationis, quo in bello est à Deo pater servatus & liberatus. Cum enim in cruce penderet, virorū novissimus, & videretur tam à Deo, quàm ab hominibus desertus, ac maledictus, (maledictus enim à Deo omnis, qui pendet in ligno) Satan irridet eum virulentissime, & per organa sua exclamat: Si filius Dei es, descende de cruce: alios servavit, seipsum non potest servare: si rex Israël est, descendat nunc de cruce, & credimus ei. Quid ergo factum est? Num descendit de cruce, iuxta externam maiestatem, & grassatus est in hostes ferreis armis? Potuisset quidem tam satanā, quàm omnes impios homines vno verbo, imò vno nutu perdere, & maiestatem suam coram mundo ostentare: sed quam obedientiam præstitit patri suo ab initio conceptionis suæ, eam retinuit vsq; ad mortem crucis. Servatus igitur est à Deo patre suo, mirando modo, non ut non moreretur, sed ut moriendo non periret, ac morte ipsa sua mortem vinceret, & tertia die à morte resurgeret, accepta à DEO tanta maiestate, ut in nomine eius omne genus fleat cœlestium, terrestrium, & inferorum. Quid igitur est, quòd Deus pater filium suum mirando modo in morte servaverit,

uauerit, & in summam sublimitatem extulerit? Sequitur: Quoniam (inquit) complacitum est ei in me. Hæc est vox illa, quam postea Propheta Esaias, cap. 42. aut potius Deus pater cœlestis, per Esaiam, de Christo filio suo usurpat, & interpretatur: Ecce seruus meus, (inquiens) suscipiam eum, electus meus, Complacuit sibi in illo anima mea. Est & illa vox, quam idem Deus pater è cœlo, de filio suo coram Apostolis testificatus est: (quemadmodum paulo antè dicebas

Matt. 13. 17. mus,) Hic est (inquiens) filius meus dilectus, in quo
2. Pet. 1. mihi complacitum est. Ipsum audite.

20. *Re tribuit mihi Dominus secundum iustitiam meam, secundum puritatem manuum mearum reddit mihi.*
21. *Quia custodio vias DOMINI, & non impiè ago à Deo meo.*
22. *Quoniam omnia iudicia eius coram me, & statuta eius non repello à me.*
23. *Et sum perfectus cum eo, & seruo me ab iniquitate mea.*
24. *Et reddit DOMINVS mihi secundum iustitiam meam, secundum puritatem manuum mearum coram oculis eius.*

In proximis versiculis professus est Christus filius Dei, se ab inimicis suis mirando modo liberatum, & in summam maiestatem exaltatum, propterea quod Deus pater ipso delectetur, & summo ipsum fauore prosequatur. In his autem, quos nunc enumerauimus, versiculis, commemorat causam, cur Deus ipso delectetur, & benefaciat ipsi. Quia custodio, inquit, vias
 DOMINI,

DOMINI, nec vlla vnquam impietate deficio à Deo meo. Omnia enim iudicia, omnia statuta, hoc est, vniuersam legem Dei perfectè impleo. Et vt postea Esaïas de me concionatur, peccatum non facio, nec est dolus in ore meo. Ac tanta sum perfectione, & ab omni iniquitate tam alienus, vt possim in seuerissimo Dei iudicio constare. Itaq; qua Deus est æquitate, confert sua in me beneficia, iuxta meam iustitiam & innocentiam, in omnibus manuum mearum operibus.

Hæc gloriatio de perfecta innocentia & iustitia, coram Deo, non potest conuenire Dauidi. Etsi enim Dauid habuit iustissimam causam contra Saulem, nec affecit Saulem vlla iniuria, potuit etiam de iustitia, quam habuit in promisso Messia per fidem, gloriari, tamen habuit peccatum in carne, etiam in causa iustissima, & quam iustitiam habuit per fidem, non habuit in operibus suis, sed in Christo. Quare verè & pie alias exclamat: Non intres in iudicium cum seruo tuo, quia non iustificabitur in conspectu tuo omnis viuens. Et: Si iniquitates obseruaueris DOMINE, Domine quis sustinebit? Solus vnigenitus filius Dei DOMINVS noster Iesus Christus, ea est innocentia, puritate, perfectione & sanctitate, vt verè & alacriter coram Deo profiteri audeat, retribuere ipsi DOMINVM secundum iustitiam suam, & reddere ipsi secundum puritatem manuum suarum, quia omnia iudicia & statuta eius, vniuersam videlicet legem eius, seruet ac perfectè impleat.

25. *Cum sancto, sanctus es, cum viro perfecto, perfectus es.*

26. *Cum*

26. *Cum mundo, mundus es, & cum aduerso, aduersus es.*

Hi duo versiculi vulgò vsurpari solent, de hominum inter se contubernio, vt qui consociauerit se cum hominibus honestis & probis, fiat & ipse honestus ac probus: qui autem contubernium egerit cum improbis & sceleratis, fiat & ipse improbus ac sceleratus. Bona quidem & pia per se sententia. Verissimum enim est, quod de improborum societate Paulus dicit: Corruptunt bonos mores colloquia praua. Et, quod prouerbio dici solet: Si iuxta claudum habitaueris, fies & ipse claudus. Sed quid hæc sententia ad hos versiculos? aut quæ eius conuenientia cum præcedentibus & sequentibus? Psalmus igitur non loquitur hoc loco de hominum inter se, sed de Dei patris cum Christo filio suo, societate. Exponit enim rationem, cur Deus pater rependat Christo filio suo iustitiam, & puritatem manuum eius. Deus enim idcirco seruat filium suum in omnibus aduersis, & in morte ipsa, ac extollit eum in summam maiestatem, propterea quòd Deus talem se gerat erga hominem, qualem eum inuenit. Si homo est iustus, sanctus, innocens, purus, immaculatus & perfectus, talem etiam præstat se ei Deus, & exhibet se ipsi iustum, sanctum, innocentem & perfectum, ac benefacit benefacienti, reddit iusta iusto, & seruat perfecte perfectum. Cum igitur talem inuenerit vnigenitum filium suum, videlicet, perfecte iustum, purum & immaculatum, meritò etiam exhibuit se ipsi perfecte iustum & immaculatum. Econtra autem, Deus etiam est peruersus, peruersus. Hæc verba duriora quidem videntur, quàm par est, vera autem sententia

sentio eius nihil habet incommodi. Significat enim, quod quemadmodum Deus est bonus & clemens remunerator bonorum, ita etiam est seuerus punitor malorum. Qui enim peruersè agit contra Deum, huic etiam fit Deus peruersus, hoc est, dicitur aduersus & contrarius. Iuxta illud Leuit. 26. Quod si nec sic vos lueritis recipere disciplinam, sed ambulaueritis ex **ADVERSO** mihi: ego quoque cōtra vos **ADVERSVS** incedam. Deus quidem sua ipsius natura, non est nisi bonitas & salus: sed sicut sol, cum natura non sit, nisi lux & splendor, obscura illustrans, solet tamen imbecilles oculos nimio suo splendore cæcare, non quidem suo, sed imbecillium oculorum vitio: ita Deus sua propria natura, non est, nisi viuificator, benefactor, & saluator: Viuo ego, inquit, non volo mortem peccatoris. Et Paulus: Deus (inquit) vult omnes homines saluos fieri: & tamen mortificat, punit, & damnat impios, non quidem sua natura, sed vitio impiorum, qui præ impietate sua non possunt immensum splendorem diuinæ salutis ferre. Ad eundem modum etiam Christus filius Dei de se dicit: In iudicium ego in hunc mundum veni: vt qui non vident, videant, & qui vident, cæci fiant. Et tamen natura sua vera est lux, quæ illuminat omnem hominem venientem in hunc mundum. Quid igitur dicemus? si Deus est tantum bonus & clemens bonis, peruersis autem peruersus, quis poterit coram eo constare? Omnes enim homines natura sua sunt peruersi. Omnes declinauerunt, & facti sunt inutiles. Quis ergo bonitate & clementia Dei fruetur? Nullus certe hominum, siquidem naturam eorum peruersam respexeris; sed benedictus Deus in

m secula.

secula, qui dedit nobis filium suum DOMINVM nostrum Iesum Christum, vt omnis, qui credit in eum, non pereat, sed habeat aeternam vitam.

27. *Quoniam tu populum afflictum seruas, & oculos superbiorum humilias.*

Alia ratio, cur Deus pater seruauerit Christum, & oppresserit hostes eius. Deus enim respicit afflictos & miseros homines: Cor contritum, inquit alias, & humiliatum, Deus non despicias. Et iterum: luxta est DOMINVS ijs, qui tribulato sunt corde, & humiles spiritu saluabit. E contra superbis, elatis, arrogantibus resistit, & deijcit eos. Christus autem inter miseros & afflictos fuit miserrimus & afflictissimus, quemadmodum supra commemoratum est. Satan autem, & quos ipse aduersus Christum excitauit, Iudaei, Scribae, Pharisei & Gentiles, sunt superbissimi & arrogantissimi. Cum Christus penderet in cruce miserrime, manus & pedes perfossus, securissime & superbissime insultarunt ipsi tanquam iam victores. Sed quid factum est? Deus deijcit oculos superbiorum, & pudefacit eos, Christum autem afflictum extollit in summam sublimitatem, & dat ei nomen super omne nomen. In afflictione igitur bene speremus etiam nos: & inuocemus nomen DOMINI, vt & in Christo & propter Christum seruemur.

28. *Quoniam tu illustras lucernam meam, DOMINVS Deus meus illuminas tenebras meas.*

29. *Quoniam per te contero copias militares, & per Deum meum transilio murum.*

30. Dei

30. Dei perfecta est via, eloquium DOMINI purgatum,
clypeus est omnibus sperantibus in ipsum.
31. Quoniam quis Deus præter DOMINUM, & quæ pe-
ra præter Deum nostrum.
32. Deus accingit me fortitudine, & facit perfectam viam meam.
33. Ponit pedes meos, sicut ceruorum, & super excelsa mea con-
stituit me.
34. Docet manus meas præliari, & conterere arcum æreum
brachijs meis.
35. Das mihi scutum salutis tuæ, & dextera tua fulcit me, &
cum humilias me, magnificas me.
36. Dilatas gressus meos subtus me, ut non vacillent tali mei.

Generalem sententiam (quæ est : DOMINVS
seruat afflictum) accommodat nunc filius Dei ad suam
personam. Ac primum : Tu, inquit, DOMINE
Deus meus, illustras meam lucernam. Et quid hoc sit,
mox explicat mutata secunda persona in tertiam, pro
more Hebræo : Deus, inquit, illuminat tenebras
meas. Tenebræ, si metaphoricæ accipias, significant
afflictiones & tribulationes. Deus ergo dicitur il-
luminare tenebras, cum seruat afflictum in afflictio-
nibus, & liberat eum ex tribulationibus. Itaque Deus
tunc illustravit lucernam Christi, & illuminavit tes-
nebras eius, cum seruauit eum in morte, & eduxit eum
ex sepulchro & inferno, ut resurgeret, & sederet ad dex-
teram Dei patris sui. Qua luce, qua gloria, quid pos-
test esse illustrius : Deinde : Per te, inquit, contero co-
pias militares, & per Deum meum transilio murum,
seu expugno ciuitates, & arces muris munitas. Hic
iterum consideremus, tales esse copias militares, pui-

gnantes cum Christo, & muros hostium eius, qualis est rex, videlicet, non mundanus, sed spiritualis, non terrenus, sed cœlestis. Exercitus igitur, & copiarum militares, quæ Christo resistunt, ac muri hostium eius, sunt
Ephes. 6. rectores tenebrarum huius seculi, & spirituales astutiae in cœlestibus, adeoque principatus & potestates
Ephes. 4. illæ, de quibus Psalmus & David loquuntur: Captiuam duxit captiuitatem. Et Paulus iterum: Expoliatus principatus ac potestates ostentauit palam triumphans de illis per semetipsum, satan enim tam potens est princeps in hoc seculo, vt etiam Deus huius seculi à Paulo dicatur. Peccatum tam late dominatur, vt vniversum humanum genus opprimat. Mors & infernus tantæ sunt virtutis, vt ne Monarchæ quidem huius terræ possint tyrannidem eorum euadere. Sed Christus filius Dei has omnes copias militares fudit & fugauit, & hos omnes muros, quamuis altissimos transiliuit & superauit. Per quem autem, & cuius virtute superauit Christus has copias & muros? PER TE, inquit, PER DEVM MEVM. Satan enim victus est, peccatum expiatum est, & mors ac infernus expugnata sunt à Christo, non terrena, sed cœlesti, non humana, sed diuina virtute. Quomodo? Num sicut Petrus, Paulus, & reliqui p̃j, qui & ipsi vicerunt mortem, & euaserunt tenebras inferni? Nihil minus. Hi enim reportarunt victoriam non sua propria, sed aliena virtute, Christus autem reportauit eam sua propria virtute, hoc est, ea diuina maiestate, qua fuit iam inde ab initio conceptionis suæ ornatus. Non enim homo tantum est, sicut Petrus & Paulus, sed est Deus & homo, (hoc est) homo à filio Dei ita assumptus, vt acceperit
ab

ab ipso omnem deitatis plenitudinem corporaliter. Quare, quod vicerit satanam & mortem, diuinitatis quidem opus est, sed eius, quæ est filio hominis, initio conceptionis suæ ab æterno filio Dei communicata. Postquam enim Adam peccauit, & traxit secum in ruinam vniuersum humanum genus, Deus pater miseratus hominum calamitates, in hunc mundum statuit & promissit, se missurum filium suum vnigenitum, qui in plenitudine temporis assumeret semen Abras hæ, seu filium hominis ex virgine, & ornaret eum omni plenitudine suæ diuinæ maiestatis. Hæc promissio, non est vanum hominis figmentum, sed vox Dei certissima & firmissima. Vnde sequitur versiculus huius Psalmi tricesimus: Dei via est perfecta, eloquium Domini igne examinatum, clypeus est omnibus sperantibus in ipsum. Via Dei, est propositum & institutum Dei. Et eloquium eius est promissio eius. Hoc igitur institutum Dei de filio suo, non est mutationi obnoxium, non est vlllo vitio corruptum, sed perfectum, inuiolatum, fixum & stabile. Hæc promissio Dei de missione filij sui, non est sicut lignum aut stipula, quæ ab igni arrepta, confestim absumuntur, sed est velut purum aurum, quod in ignem coniectum, tantum abest, vt absumatur, vt potius purgatius reddatur. Itaque reliquum est, vt quotquot hac promissione excitati, concipiant certam spem de clementia DOMINI, propter filium suum, ijs DOMINVS verè sit clypeus, scutum, protectio & propugnaculum in omnibus periculis. Hæc est illa spes, de qua Paulus ait: Spes non pudefacit: adeoque quod hæc dicit, illud prorsus est, quod Christus in Ioanne ait: Sic Deus dilexit mundum, vt

vnigenitum suum filium daret, vt omnis, qui credit in eum, non pereat, sed habeat æternam vitam. Nec mirum, quòd DOMINVS Deus sit clypeus omnibus sperantibus in ipsum, propter filium suum. Non enim est alius Deus præter hunc DOMINVM, nec est alia pes-
 1. Cor. 8. tra, alia certitudo, alia firmitas, & stabilitas, præter hunc Deum. Multi quidem sunt inter Ethnicos, qui vocantur dñj, sed sunt vanissimi. Ac multa sunt sacra & nomina, propter quæ homines salutem sperant: sed aut sunt per se, aut fiunt propter vanam hominum fiduciam, mendacissima. Vnus autem solus est verus Deus ille, videlicet qui promissit se filium suum missurum in hanc terram, e virgine, semine Abrahamæ, & posteritate Dauidis. Et vnum est solum nomen, ac vnum tantum sacrum, in quo nobis salus contingit, videlicet Iesus Christus filius Dei, & fides, quæ est in ipsum. Sed pergit Christus commemorare, quæ diuinitus in bello suo aduersus hostes suos peragat: Deus, inquit, accendit me velut baltheo fortitudine, vt via mea sit perfecta, vt institutum meum contra hostes meos, satanam, mortem & infernum, feliciter promoueat, & prosperum ac perfectum habeat successum. Si properandum est ad excelsa seu arces, & munitiones meas, in quibus tuto consistam, facit pedes meos velociores ceruis, & addit pedibus meis alas. Si præliandum est aduersus hostes, dirigit ipse manus meas, vt dextera rimè pugnem, & brachijs meis arcus hostium, quamuis æreos, quamuis ahæneos, conteram. Si opus est mihi scuto, quo aduersarij ictus repellam, tribuit ipse mihi salutare suum scutum, & dextera sua ita me fulcit, vt eo ipso, quo me humiliat, quo conuiuet, vt cruci affigat.

figar, & moriar, magnificet, & exaltet, ac iter meum
 tam latum & planum reddat, vt non nutent, tanquam
 in lubrica via, vertebrae meae, sed inoffenso pede libe-
 re & expedite victoriam consequar. Non est autem
 intelligendum de mundano bello, praelio, aut victoria,
 quemadmodum antea admonebamus, sed de eo, quod
 regno Christi spirituali & coelesti conueniat. Ac plane
 illud est, quod Paulus ait: Factus est obediens vsq; ad
 mortem, mortem autem crucis. Quapropter extulit
 illum Deus in summam sublimitatem, & donauit illi
 nomen super omne nomen, &c.

37. *Persequor inimicos meos, & apprehendo eos, nec reuertor,
 donec absumam ipsos.*
38. *Transfigo eos, nec possunt surgere, cadunt subius pedes
 meos.*
39. *Accingis me fortitudine ad bellum, incuruas insurgentes
 in me subius me.*
40. *Et das mihi ceruicem inimicorum meorum, vt perdam
 odio habentes me.*
41. *Clamant, & non est, qui seruat, ad DOMINVM, &
 non exaudit eos.*
42. *Comminuo eos, vt veniens puluerem, & sicut lutum platea-
 rum contero eos.*

Filius Dei adhuc perseuerat in commemoratione
 victoriae, quam expiato humani generis peccato, a
 satana, morte & inferno, diuina potentia reportauit.
 Et quemadmodum ante descripsit praelium, sumpta
 metaphora a mundanis bellis, ita in eadem metapho-
 ra pergit describere victoriam suam: Persequor, in-
 quies,

quiens, inimicos meos. Deus tantum roboris, tantum
 felicitatis mihi concessit, vt hostes mei vertantur in
 fugam. Persequar igitur eos, tantisper, dum apprae-
 hendero & cepero eos: nec prius desistam, quàm prorsus
 absumpsero & perdidero ipsos. Sic enim transis-
 go, sic conficio eos, vt non queant amplius sese erigere,
 & pristinas vires recuperare. Nam, cum tuipse,
 DOMINE Deus meus, accingas me bellica fortitudi-
 ne, fieri non potest, quin hostes & osores mei ita mihi
 subiiciantur, vt cervicem eorum conteram & dispers-
 dam. Vociferantur quidem ad DOMINVM, sed non
 est, qui ipsos exaudiat & seruet. Quid igitur dicemus?
 Ostendit & antea, quod hostes Christi sint satan,
 mors, & infernus: & quod metaphora mundani præ-
 lij & victoriæ, describatur hoc loco prælium, quod
 Christus cum his suis hostibus iniit, ac victoriâ res-
 portauit. Quomodo autem competit in hos hostes,
 quod hîc dicitur: Clamant, sed non est, qui seruet eos.
 Ad DOMINVM, & non exaudit eos. Num & satan,
 & mors, & infernus inuocant Deum, in suis aduersis?
 Num implorant opem Dei in suis ærumnis? Nihil
 hîc geritur mundano & humano more, sed omnia fi-
 unt metaphoricôs. Nam quemadmodum homines ab
 hostibus suis superati, & crudeliter tractati, quamuis
 alioqui impij, solent tamen caput & oculos ad cœlum
 attollere, & salutem à Deo petere ac expectare, imò
 & bestię ipsæ magnis periculis obiectæ, videntur
 vociferationibus suis significare, se in extremis cala-
 mitaribus versari, nec se seruari posse, nisi ope de cœlo
 missa. Ita cum satanæ, morti & inferno tribuitur in-
 uocatio Dei metaphoricôs, non significatur in ipsis
 aliquid

aliquid esse pietatis erga Deum, sed significatur eos victoria Christi in tantam perditionem redactos, vt etiam si aliquem humanum sensum haberent, & Deum invocarent, non tamen possent ex interitu suo emergere, & vires suas recipere, Germanicè dicitur: *Der Feind ist also geschlagen / daß im nach Gott weh sein möcht*, (hoc est) hostis ita oppressus est, vt nulla sit ei spes salutis, nisi mirabiliter contingat, relicta. Dicit ergo Christus: Hostes meos, satanam, mortem & infernum ita deijcio & contundo, vt extrema intentione laborent, & de salute ipsorum prorsus sit conclamatum. Disijcio enim eos, sicut ventus solet quicquid quiliās & puluerem terræ disijcere: & conculco eos, sicut lutum in plateis conculcari solet. Hæc omnia recitantur tam diligenter & copiosè, nostri causa, vt cognoscamus, quanta beneficia victoria Christi nobis impetrauerit. Quam enim victoriam Christus à satana, morte & inferno reportauit, ea non solus ipse fruitur, verumetiam fruendam proponit omnibus ijs, qui in ipsum credunt. Quare si agnoueris Christum, & credideris in ipsum, quem satanam metues, ad quam mortem cohorrescas, ad quos inferni horrores expauesces? Habes enim hoc loco, illos Christi hostes, ita deuictos & superatos, vt etsi adhuc exitium minantur, tamen non possint amplius caput erigere.

43. *Eripis me à contentioso populo, cōstituis me in caput Gentium: populus, quem non agnoscebam, obedit mihi.*
 44. *Audiu auris obtemperat mihi, filij extranei negant me.*
 45. *Filij extranei contabescunt, & fremunt è vinculis suis.*

n Inter

Inter beneficia, quæ filius Dei ex victoria sua consecutus est; illud inter præcipua non est postremum, quod Deus eripuerit ipsum à populo contentioso, & à filiis extraneis, ac fecerit ipsum caput & principem earum gentium, quas antea non agnouerat. Sciamus igitur, qui sit populus ille contentiosus, & filij extranei, à quibus filius Dei se liberatū esse gloriatur. Non est autem, ut ad hos inuestigandos diu oculos circumferamus. Ecce enim tibi, Moses, qui fuit dux Israëlitarum ex Ægypto, aperte profitetur, suum ipsius populum, esse contentiosum illum populum, & alienos seu spurios, ac illegitimos filios, de quibus hîc sit sermo. In Deuteronomio enim cap. 31. dicit: Ego scio contentiosam tuam, & ceruicem tuam durissimam. Adhuc uiuente me, & ingrediente uobiscum, semper contentiosè egistis contra DOMINUM: quanto magis, cum mortuus fuero? Idem postea testificatur Stephanus in concione sua, quam habuit in Synodo Pontificum, Act. 7. Duri, inquit, ceruice, & incircumcisi corde, & auribus: vos semper Spiritui sancto resistitis, ut patres vestri, & vos. Quem Prophetarum non sunt persecuti patres vestri? Et occiderunt eos, qui prænuntiauerunt de aduentu iusti illius, cuius vos nunc proditores & occisores fuistis. Qui accepistis legem per dispositiones angelorum, nec seruastis. Huc etiam pertinet parabola, quam filius Dei, factus iam in plenitudine temporis homo, apud Matth. cap. 21. de agricolis, quibus locata erat vinea Domini, recitat. Significat enim haud obscure, Israëlitas fuisse populum illum contentiosum, qui ab initio semper restiterit, & pergnauerit cum Spiritu sancto. Sunt & iidem filij alieni

& extranei. In exitu enim ex Ægypto dictum est de
 Israël: Filius meus primogenitus Israël. Mox autē de-
 clararunt se non esse veros, sed adulterinos, non legiti-
 mos, sed spurios, non domesticos, sed alienos & extra-
 neos filios, quippe quod DOMINVS expectauerit ab
 ipsis officia, quæ liberi debeant parentibus. Sed mens-
 titi sunt, & fefellerunt hanc expectationem: Dereli-
 quit (inquit Moses in carmine suo) Deum factorem *Deut. 23.*
 suum, & recessit à Deo salutari suo. Et mox: Deum,
 qui te genuit, dereliquisti, & oblitus es DOMINI crea- *Esa. 1. 5.*
 toris tui. Et apud Esaïam: Filios enutriui & exaltaui,
 ipsi autem sperauerunt me. Ac iterum: Plantauit vi-
 neam electam. Expectauit, vt faceret vuas, & fecit las-
 bruseas. Quid igitur fiet? aut quod supplicium inferes-
 tur eis? Contabescunt, inquit, & fremunt è vinculis
 suis. Auferetur enim ab ipsis hæreditas cœlestium bo-
 norum, & dabitur genti hætenus à Deo aliene. Quod
 cum viderint, contabescunt, & fremunt è captiuitate
 & infelicitate ipsorum. Hoc prorsus illud est, quod
 Moses in carmine suo dicit: Ipsi me prouocauerunt, in
 eo, qui non erat Deus, & irritauerunt in vanitatibus
 suis: & ego prouocabo eos, in eo, qui non est populus,
 & in gente stulta irritabo eos. Et apud Esaïam cap. 8.
 Transibit per eam, & corruet: & esuriet, & cum esu-
 rierit, irascetur, & maledicet regi suo, & Deo suo, & sus-
 piciet sursum. Et ad terram intuebitur, & ecce tribus
 latro, & tenebræ, & dissolutio, & angustia, & caligo
 persequens, & non poterit auolare de angustia sua.
 Et Christus apud Matthæum cap. 25. Inutilem seruum
 effecite in tenebras exteriores: illic erit fletus, & stris-
 dor dentium. Dices: Si ad istum modum habet causa

Israëlitarum cum Christo, quis ergo deinceps erit populus eius? Si Iudæi sunt excæcati & abiecti, ne sint amplius populus & ecclesia Dei, ubi ergo erit ecclesia? Respondet Christus ipse: Constituis, inquit, me in caput Gentium. Populus, quem hætenus nō agnoscebam pro populo seu ecclesia, me complectitur, & meo Euangelio obsequitur. Hætenus coluerunt me Iudæi sacrificijs Leuiticis, interim autem nec vera fide me agnoscebant, nec verbo meo obedienter obtemperabant. Nunc autem voco Gentes incircumcisas ad participationem cœlestium bonorum. Hæ colunt me auditu auris, hoc est, audiunt Euangelion meum magno desiderio: & quia fides ex auditu est, auditus autem per verbum Dei, idcirco Gentes amplexantur me vera fide, & proferunt ex ea fide, non Leuitica sacra, quæ tantum fuerunt futurorum vmbra, sed proferunt veros fidei fructus, spem videlicet, charitatem, & omnia genera virtutum: de qua Paulus ex Propheticijs vaticinijs copiose, in epistola ad Rom. cap. 11. & 15. & Ephes. 2. similiter Acto. 13. dixerunt Paulus & Barnabas ad Iudæos: Vobis oportebat primum loqui sermonem Dei: sed quia repellitis illum, & indignos vos iudicatis æterna vita, ecce conuertimur ad Gentes, sic enim præcepit nobis **DOMINVS**: Posuite in lucem Gentium, vt sis salus mea vsq; ad extremum terræ. Et Acto. 28. Benè Spiritus sanctus locutus est, per patres nostros dicens: Vade ad populum istum, & dic: Auribus audietis, & non intelligetis. Ac mox: Notum ergo sit vobis, quòd Gentibus missum est hoc salutare Dei, Et **IPSI AUDIENT**. Cum igitur filius Dei reuocat in mentem, Iudæos, gentem quondam in
 populum

Esa. 49.

populum & ecclesiam Dei electam, iam inde ab initio fuisse incurruiceruicos, impios, rebelles, morosos, & sibi idolomania, & inobedientia molestos, ac videt in ijs emendandis, & ad meliorem frugem reducendis operam & oleum perdita esse, congratulatur sibi, & maximi beneficii loco deputat, quod sit onere huius populi ita liberatus, ut interim sit positus & electus in principem omnium Gentium, in toto orbe terrarum: & sicut antea collegit ecclesiam suam ex Iudæis, ita deinceps colligat eam ex omnibus nationibus, quæ sunt sub cælo.

46. *Vivite DOMINVS, & benedictus sit, qui est petra mea, & exaltetur Deus salutis mea.*
47. *Deus dat vlciones mihi, & ducit populos sub me.*
48. *Qui eripis me ab inimicis meis, & exaleas me ab ijs, qui in me insurgunt, ac liberas me à viro iniquo.*
49. *Quapropter laudo te DOMINE inter Gentes, & nomen tuum celebro.*
50. *Qui magnam salutem exhibet Regi suo, & facit misericordiam Messia suo Dauidi, & semini eius perpetuò.*

Hactenus commemoravit filius Dei pugnam suam, cum hostibus, & victoriam, quam ex hostibus reportavit, ac alia Dei beneficia, inter quæ præcipuum est, quod Deus liberauerit ipsum ab impio & rebelli populo Iudaico, & posuerit ipsum in caput & principem Gentium. Nunc igitur agit DOMINO Deo suo pro tantis beneficijs, gratias, & recipit se, ad testificandam animi sui gratitudinem, diuulgaturum Euangelion suum inter omnes Gentes in toto orbe terrarum,

vt colligat ex his ecclesiam, quæ nomen **DOMINI** peroptet celebrare. Videntur autem hi versiculi mutuati, partim ex fine carminis Mosaiici, Deut. 32. partim ex fine carminis Hannæ matris Samuelis, 1. Samuel. 2. & accommodati in hoc Psalmo ad Christum filium Dei. In carmine enim Mosi dicit **DOMINVS** de Iudæorum abiectione: Mea est ultio, & ego retribuam eis in tempore. Et mox: Leuabo ad cælum manum meam, & dicam: Vivo ego in æternum, si acuerò vt fulgur gladium meum, & arripuerit iudicium manus mea, reddam ultionem hostibus meis, & his, qui oderunt me, retribuam, &c. Quod igitur Christus in hoc Psalmo dicit, hanc habet sententiam. In carmine Mosi professus est quondam **DOMINVS**, se ulturum seuerissime impietatem, & rebellionem populi Israëlitiici, quod non solum semper restiterint Spiritui sancto, verum etiam occiderint tandem me, vnigenitum filium suum, cum in terras ad expianda peccata humani generis missus essem, & iurat: Vivo ego, inquit, reddam ultionem hostibus meis rebellibus, Israëlitis, & rependam ipsis omnia malefacta, quæ tam in Prophetas meos, quam in filium meum designarunt. Vixit igitur nunc **DOMINVS**, hoc est, qui quondam iurauit, vivo ego dicens, se pœnas ab impijs & sceleratis Iudæis sumpturum, is nunc implet iuramentum suum, & ostendit mihi manifestè ultionem & vindictam suam, in Iudæos, quia excæcat eos, & reijcit, ne sint amplius populus & ecclesia Dei. Eligat autem Gentes incircumcisas, & subdit eas sub me, ac adducit ad me, vt me agnoscant, & Euangelio meo subijciantur. Benedico igitur, & laudo Deum, qui est petra & fiducia mea,

quod

quòd eripiat me ab impijs Iudæis , capitalibus meis hostibus , & extollat me , vt euadam manus omnium iniquorum Iudæorum , qui aduersus me insurgunt. Ego vicissim ad declarandam gratitudinem meam, mitto Apostolos meos in totum orbem terræ , inter omnes Gentes , vt laudent nomen tuum, & celebrent gloriam tuam in omnem aternitatem. Hic est versiculus ille, quem Paulus (quemadmodum ab initio ad monebamus) ad Romanos scribens, de Christo, & vocatione Gentium interpretatur, & manifestè testificatur, Christum filium Dei non hunc tantum versiculum, verumetiam vniuersum Psalmum, suo ipsius, non Davidis nomine recitare, non quòd inscriptio, quæ facit mentionem Davidis & liberationis eius de manu omnium inimicorum eius, mentiatur : sed quòd David, occasione à sua liberatione accepta, hunc Psalmum de Christo & triumpho eius recitauerit. Firmissima enim fide tenendum est , quòd fundamenta articulorum religionis nostræ , inter quos articulos, etiam ille , qui est de abiectione Iudæorum , & vocatione Gentium, continetur, non tradantur à Prophetica Scriptura allegorijs , sed maximè omnium proprijs & certissimis dictis, quæ iuxta *ῥὴν δὲ*, seu litteram, sunt intelligenda. Cum igitur Paulus hunc Psalmum, fundamenti loco, de Christo & vocatione Gentium commemoret , non sentiamus eum allegoria ludere, sed proprijsimè interpretari. Et si enim suus est allegorijs locus , postquam fundamenta firmiter facta fuerint , cuius rei exemplum habes in epistola ad Galatas cap. 4. tamen in ponendis fundamentis vtendum est proprijs testimonijs.

Quemad-

Quemadmodum autem hic 49. versiculus de Christo, ac proinde totus Psalmus de ipso intelligendus est, ita & ultimus versiculus iuxta literam, non ad Dauidem, sed ad Christum DOMINVM nostrum referri debet. Negari quidem non potest, quin Deus magna & multa beneficia contulerit in Dauidem, & in semen seu posteritatem eius: sed hic versiculus propriè in Christum verum Regem & verum Dauidem, ac ecclesiam Christi respicit: Confiteor (inquit) DOMINVM, & laudo eum, quod exhibuerit maximam salutem, & inenarrabilia beneficia Regi suo, qui est Messias seu Christus, David, & semini eius, quod est Ecclesia per Christum ex fide renata: sicut & Hanna mater Samuelis suum carmen concludit: DOMINVS, inquit, iudicabit fines terræ, & dabit imperium regi suo, & sublimabit cornu seu potentiam Christi sui. Extollet enim eum in summam sublimitatem, & dabit ei nomen super omne nomen, ut in nomine eius omne genu se flectat, coelestium, terrestrium & inferorum. Nec est inusitatum, quod verus Messias, qui est DOMINVS noster, vocetur nomine Davidis, è cuius posteritate natus est. In Osea cap. 3. dicitur: Post hæc reuertentur filij Israël, & quærent DOMINVM Deum suum, & David Regem suum. Hic non est David ille filius Isai, qui cum hæc ab Osea dicebantur, iamdudum mortem obierat: sed verus David, DOMINVS noster Iesus Christus. Et in Ezechiele cap. 34. Suscitabo super eas pastorem vnum, qui pascat eas, seruum meum David. Ne hic quidem est David filius Isai, sed David Christus filius Dei, factus è posteritate Davidis, homo. Non est igitur hic Psalmus, iuxta literam, de alio, quàm de

DOMINO

DOMINO nostro Iesu Christo intelligendus.

VSVS HVIVS PSALMI.

Postquam fundamentum veræ sententiæ eius positum est, non tantum licuit Dauidi, verumetiam licebit omnibus pijs eo vti. Ac planè is est vsus eius, qui est & articulorum illorum fidei nostræ de Christo: Passus sub Pontio Pilato, crucifixus, mortuus & sepultus, descendit ad inferna, tertiâ die resurrexit à mortuis, ascendit ad cœlos, sedet ad dextram Dei patris, &c. Admonemur igitur ex hoc Psalmo, de magnitudine & gravitate nostrorum peccatorum, & de seueritate diuinæ iræ in peccata. Nisi enim magna essent, non opus fuisset, vt ad expianda ea filius Dei grauissimos mortis & inferni dolores subiisset: & nisi ira Dei in peccata seuerissîma esset, certè pepercisset filio suo, qui ea expianda suscepit. Admoneamur etiam de summa Dei erga humanum genus clementia & charitate, quod maluerit filium suum in extremis mortis ac inferni horroribus videre, quàm ad interitum humani generis conuincere. Ponamus quoq; nobis ob oculos victoriam, quam Christus ex hostibus suis, satana, morte & inferno reportauit, & sciamus eam nostram quoq; fieri per fidem in Christum. Postremò discamus etiam ex abiectione Iudæorum (de qua hic Psalmus concionatur) timorem Dei, ne fidamus carnalibus prærogatiuis, quas habuerunt Iudæi, & tamen abiecti sunt à Deo. Discamus & ex vocatione Gentium, fiduciam de clementia Dei, quòd Gentes etiam si videbantur prorsus à Deo alienæ, tamen Deus res

o cepit

cepit eas in populum suum, cum ipsæ reciperent & agnoscerent Euangelion Christi filij sui, quemadmodum Paulus in epistola ad Romanos cap. 9. 10. & 11. docet.

Psalmus 19.

Cœli enarrant gloriam Dei, &c.

*In Monasterio Regij fontis, ad fontes fluminis
Brentij explicatus.*



Rom. 10.

Non est dubium, quin hic Psalmus sit expositio, qua commemoratur diuulgatio Euangelij, per Apostolos, in vniuersum orbem terrarum, & inter omnes hominum nationes & linguas, quæ sunt sub cœlo. Paulus enim, cum ad Romanos de vocatione Gentium scriberet, & doceret, nullum in terris hominem habere suæ incredulitatis & impietatis excusationem, citat in testimonium, quartum ex hoc Psalmo versiculum, & ait: Sed dico, an non audierunt? Atqui in omnem terram exiuit sonus eorum, & in fines orbis terrarum verba illorum: significans videlicet, Apostolos circumtulisse prædicatione sua Euangelion, in omnibus Gentium regionibus, vsq; ad terminos terræ: vt nullus possit suæ impietati prætexe,

re,

re, vocem Euangelij de Christo ad se non peruenisse. Manifestum igitur est hoc Pauli testimonio, quod hic Psalmus sit vel vaticinium vel historica narratio, de diuulgando Euangelio Christi inter omnes gentes in toto orbe terrarum. Continet autem quatuordecim versiculos, in quorum primis quatuor recensetur diuulgatio Euangelij in omnes linguas & terras. In alijs, qui sequuntur, commendatur Euangelion, à summa, quam affert, vtilitate. In postremis additur precatio.

1. *Cæli enarrant gloriam Dei, & firmamentum adnuntiat opus manuum eius.*
2. *Singulis diebus adnuntiat verbum, & singulis noctibus explicatur scientia.*
3. *Non est loquela, non sunt sermones, ubi non audiat vox eorum.*
4. *In omnem terram exit sonus eorum, & in fines orbis terra verba ipsorum. Soli posuit tabernaculum in ipsis.*

Videntur quidem hæc dici de ea enarratione & adnuntiatione, qua gloria & maiestas Dei patefit, & illustratur ex creaturis huius mundi, è cælo, firmamento, sole, solis cursu, & alijs rebus à Deo conditis. Ac profecto res ipsa testificatur, quod cælum & terra, & omnia, quæ in ipsis sunt, vociferentur, & esse Deum, & esse ipsum omnipotentem rerum gubernatorem: Interroga, inquit, Iob, iumenta, & docebunt *Iob. 18.* te: volatilia cæli, & indicabunt tibi. Loquere terræ, & respondebit tibi, & narrabunt pisces maris. Quis ignorat, quod omnia hæc manus DOMINI fecerit: Et

- Rom. 1.* Paulus: Quæ sunt, inquit, visibilia Dei, ex creatione mundi, per opera intelliguntur & peridentur, ipsa videlicet æterna eius potentia ac diuinitas. Ac rursus:
- Acto. 14.* Deus non sinebat seipsum expertem testimoniij, dum beneficia conferret, è cœlo nobis dans pluuias, ac tempora fructifera, implens cibo & lætitia corda nostra. Vnde & nonnulli vocarunt cœlum & terram, librum naturæ, ex quo notitiam Dei discamus. Sed alio nos vocat autoritas Apostoli Pauli, qui cum disertè testificetur hunc Psalmum vaticinari & loqui de diuulgatione Euangelij Christi in orbem terrarum, quemadmodum suprâ ostendimus, perspicuè significat, quod in his versiculis non fiat sermo de Phylica enarratione gloriæ & maiestatis Dei, quæ fit per cœlum, firmamentum, solem, & alias res à Deo conditas: sed de hyperphylica & theologica enarratione, quæ fit per Apostolos inter omnes Gentes, quæ sunt sub cœlo, & firmamento, & quas hic sol singulis diebus perlustrare solet. Quæ enarratio est diuulgatio Euangelij de Christo in vniuersum orbem terræ. In Euangelio enim de Christo, gloria & maiestas DOMINI Dei nostri ita illustratur, vt agnoscamus eum non solum extulisse Christum filium suum in summam sublimitatem, & dedisse ei nomen super omne nomen, vt in nomine eius omne genu se flectat, verum etiam eum esse Deum veracem, omnipotentem, clementem, paterno erga homines animo ita affectum, vt quotquot credunt in Christum, recipiat in suam gratiam, condonet ipsis omnia peccata propter Christum, imputet ipsis iustitiam Christi, & adoptet ipsos in suos filios, ac hæredes æternæ suæ salutis. Hæc ex maxima omnium Dei
- patris

patris gloria, de qua & Christus ipse in precatone sua loquitur: Ego te, inquiens, glorificaui super terram. Quod ergo dicit, illud est: Cœli, hoc est, Apostoli, cœlesti vocatione excitati, cœlesti spiritu donati, enarrant gloriam Dei, Euangelion videlicet de Christo, qua enarratione & prædicatione gloria ac maiestas Dei ita illustratur, vt nihil obscuritatis reliquum fiat. Et firmamentum, (pro quo Hebræus legit Expansionem seu Extensionem,) qui sunt iidem illi Apostoli, quorum doctrina fundata & firmata est ecclesia, & extensa seu diuulgata in vniuersum orbem: Superstructi, (inquit Paulus) super fundamentum Apostolorum & Prophetarum, summo angulari lapide ipso Iesu Christo. Hoc (inquam) firmamentum, hi Apostoli adnuntiant opera manuum Dei, quia per Apostolicum Euangelium adnuntiatur redemptio humani generis à peccato, morte & inferno, per Christum filium Dei. Quod opus non minus miraculū est, quàm creatio cœli & terræ. Adnuntiatur autem hoc redemptionis opus per Euangelion, non interdum tantum, sed diu noctuq. Semel enim in die Pentecostes patet factum & diuulgatum, nunquam amplius silentio obruetur, sed prædicatur de die in diem, de nocte in noctem, vt nullum sit tempus vsq. ad extremum huius seculi diem, quo ex prædicatione Euangelij non colligatur ecclesia Christi, & non erudiatur scientia seu cognitione earum rerum, quæ ad consequendam æternam salutem cognitu necessaria sunt. Huc alludit etiam Esaias, cum de ecclesia Christi concionatur: *Apo. Ephes. 2.* *Esa. 60.* **APERIENTUR**, inquiens, portæ tuæ iugiter, **DIE AC NOCTE** non claudentur, vt afferatur ad te fortitudo, (seu

ingens multitudo) gentium, & reges earum adducantur.

Sed ubi nam gentium fit hæc adnuntiatio & explicatio? Num in vna tantum Iudæa? in vna tantum vrbe Hierusalem? in vna tantum lingua Hebræa? Nihil minus, inquit, Nulla erit lingua, nullus sermo, in quo non sonat vox Apostolorum & Euangelij, quod ipsi adnuntiant. In die Pentecostes, Apostoli repleti sunt omnes Spiritu sancto, & coeperunt loqui alijs linguis.

Acto. 2. Et confusa est multitudo, quod audiret vnusquisq; sua lingua illos loquentes, Et postea egressi, circumtulerunt vocem Euangelij in vniuerso orbe, inter omnes Gentes, & in omnibus Gentium linguis. Vnde & additur, in omnem terram exit sonus, seu, vt Hebraeus legit, amussis & regula eorum, Apostoli enim sono Euangelij sui aedificauerunt & extruxerunt, tanquam amussi & perpendiculo, ecclesiam in omnibus finibus terræ. Et quod hic Psalmus futurum vaticinatur, aut potius, vt rem seu gestam, seu quæ iam geritur, narrat, hoc Christus ipse hunc mundum, iuxta externam conuersationem, deserturus: Vos, inquit, eritis testes mihi, non solum Hierosolymis, verumetiam in vniuersa Iudæa, Samariaq; deniq; vsq; ad extrema terræ. Et Paulus ad Colos. cap. 1. Per sermonem Euangelij, quod peruenit ad vos, quemadmodum & in T O T O M V N D O fructificat. Et mox: Siquidem permanetis, inquit, in fide fundati ac stabiles, nec dimouemini a spe Euangelij, quod prædicatum est apud vniuersam creaturam, quæ sub cælo est. Vides igitur hunc Psalmum verius historiam, de rebus iam gestis, texere, quam vaticinium de rebus adhuc gerendis commemorare,

morare, quòd diuulgationem Euangelij in totum orbem, mille ante annis ira recitet, perinde ac si eam coram fieri, suis oculis vidisset.

Cæterum, quod in quarto versiculo sequitur: Soli posuit tabernaculum in ipsis, quia sententia eius coheret cum illis duobus versiculis, qui mox sequuntur, idcirco recitabimus eos, priusquam appendicem illam explicemus.

5. *Et ipse tanquam sponsus procedens de thalamo suo, exultat sicut gigas ad currendam viam.*
6. *Ab extremo cælorum egressus eius, & ambitus eius vsq; ad extremum eorum, & non est, qui se abscondat à calore eius.*

Videntur & hæc de sole illo externo, & cursu eius in cælo dici. Sed quemadmodum Psalmus ab initio intelligit nomine cælorum Apostolos, & nomine enarrationis seu vocis, diuulgationem Euangelij, ita & hoc loco nomine Solis intelligit Christum, qui Euangelio Apostolico adnuntiatur: Soli, inquit, posuit tabernaculū in ipsis, videlicet Apostolis. Apostoli enim in hunc vsum diuinitus ordinati sunt, vt sint tabernaculum seu tentorium Solis, hoc est, in quorum Euangelio verus sol, qui est Christus (qui & alias se ipse lucem mundi vocat) commoretur, & per vniuersum orbem circumferatur. Quare sicut externus sol hæret in cælo, tanquam in suo tabernaculo, & manè oriens procedit ex inferiori hemisphærio, super terram, magno & illustri ornatu, aurora quasi aurea, tanquam sponsus de thalamo suo, & incedit ac progreditur ad
peris

perficiendum cursum suum, ab extremo cœlorum vsq;
 ad extremum, hoc est, ab oriente vsq; in occidentem:
 nec est vllus locus in terra, ad quem Sol non projiciat
 radios, aut ad minus calorem seu virtutem suam. Inces-
 dit autem non vulgari & humili modo, non pro more
 hominum captiuorum, sed magna, vt ita dicam, ala-
 critate & maiestate, tanquam gigas, aut heros quis-
 spiam, cui nihil potest obsistere, quod ipsum à cursu
 suo impedire, & remorari queat. Quis enim rex, quis
 Monarcha tantarum est viriū, qui posset solem à cursu
 suo auertere? Steterunt quidem sol & luna ad manda-
 tum Iosue, nec sunt aliquandiu progressi, donec Iosua
 sumeret vltionem de hostibus suis. Hoc autem factum
 est, non vulgari, sed mirando modo, non humana, sed
 diuina potentia. Si verò solennem rerum naturam
 consideraueris, nullus hominum, quamuis potentissi-
 morum, est, qui queat cursum solis sua virtute cohibe-
 re, ita etiam de Christo, vero sole, sentiendum est. Cir-
 cumfertur enim prædicatione Apostolorum, per om-
 nem orbem. Nec venit sordido & lacerato vestitu, sed
 incedit sicut sponsus, multis donis ornatus, quæ in
 ecclesiam suam liberaliter confert: nec commoratur
 in vno tantum loco, sed discurrit per omnem terram,
 ab oriente in occidentem: nec est vlla gens, vlla natio,
 in qua Christus non sit prædicatus. Et quanquam tam
 Iudæi, quàm Ethnici contulerunt quicquid habues-
 runt viriū, ad extirpandum nomen Christi, & op-
 primendum Euangelion eius, tamen ipse semper, in-
 uitis etiam inferorum portis, pergit summa alacritate
 & potentia, tanquam heros omnibus formidatus &
 inuictus, Euangelion suum propagare & tueri. Cum
 igitur

igitur manifestè videamus, re ipsa impletum esse, & adhuc impleri, quod hic Psalmus de diuulgatione Euangelij in omnem terram concionatur, agamus Deo gratias, agnoscamus Christum & Euangelion eius, vt etiam beneficijs eorum fruamur.

7. *Lex DOMINI perfecta, recreans animas, testimonium DOMINI fidele, sapientiam præstans paruulo.*
8. *Præcepta DOMINI recta, latificantia cor, mandata DOMINI purum, illuminans oculos.*
9. *Timor DOMINI mundus, permanens in æternum, iudicia DOMINI veritas, iussa sunt simul.*
10. *Desiderabilia magis quàm aurum, & quàm obrizum multum, ac dulciora melle & succu fauorum.*
11. *Etiā seruus tuus illustratur per ea in custodiendis illis, retributio multa.*

In superioribus versiculis descripta est diuulgatio Euangelij in vniuersum orbem. In his autem versiculis describitur, qualis sit doctrina illa Euangelij, quod est ab Apostolis diuulgatum, & quid efficiat. Nomine enim legis, nō est hoc loco intelligendus Decalogus, qui habet longè alios effectus, quàm hīc enumerantur: sed est intelligendum Euangelion de Christo. Sicut & Esa. 2. De Zion exhibit lex, & verbū DOMINI de Hierusalem. Intelligitur & hīc in Esaia, nomine legis, Euangelion Christi. Lex enī, cum pro doctrina sumitur, habet duas partes, videlicet Decalogum, & Euangelion Christi. Et hæ quidem partes sunt inter se diuersissimæ: vtraq; autem nomine generis, hoc est, Legis appellatur. Nec id solum, verum etiam quibus

Rom. 1.

vocabulis lex seu decalogus, enunciatur, eadem etiam Evangelio tribuuntur. Itaque per omnia illa nomina, quæ in his versiculis recensentur, videlicet, Lex, testimonium, præceptum, mandatum, timor & iudicium, intelligenda est doctrina Evangelij de DOMINO nostro Iesu Christo. Audiamus igitur, qualis sit illa doctrina, & quæ sit virtus ac potentia eius. Ac profectò, quod Paulus ad Romanos scribens, paucissimis verbis dicit: Evangelion est potentia Dei ad salutem omni credenti, hoc Psalmus pluribus exponit. Principio igitur, Lex DOMINI est perfecta seu integra. Doctrina enim Evangelij de Christo, sicut est ab Apostolis diuulgata, & Apostolicis literis mandata, nihil habet vitij, nihil imperfectionis. Non opus habet perfici, & integra reddi humanis traditionibus, sed est perfecte ab Apostolis exposita, & quemadmodum Spiritus sanctus duxit Apostolos in omnem veritatem, ac docuit eos omnia, quæcunque Christus dixit eis, ita Apostoli diuulgarunt omnem hanc veritatem in toto orbe terrarum fidelissimè & perfectissimè: nec est alia doctrina quærenda, qua ad veram & æternam salutem perducamur, præterquam Apostolicum Evangelion.

Acto. 20. de Domino nostro Iesu Christo: Non subterfugi, inquit Paulus, quo minus adnunciarem vobis OMNE consilium Dei. Quare impie errant, qui sentiunt Evangelion Apostolicum humanis constitutionibus supplendum & perficiendum esse.

Deinde Lex DOMINI, inquit, conuertit seu recreat animas, quia per Evangelion regeneramur ad capiendam cœlestem hæreditatem, & renouamur, ut Spiritu sancto excitati, in nouitate vitæ ambulemus, & in omnibus

omnibus aduersis refocilemur : Renati, inquit *Pe. 1. Per. 1.*
 trus, non ex semine mortali, sed immortalis, per ver-
 bum viuētis Dei, & manentis in æternum. Et mox:
 Hoc autem est verbum, quod per Euangelion ad vos
 delatum est. Ad hæc, testimonium D O M I N I fidele, seu
 firmum & stabile. Quod enim Euangelion de Christo
 nobis promittit, haudquaquam nos fallit. Humana
 quidem promissa sæpenumerò fallunt. Euangelion
 autem de Christo, quod est cœleste & diuinum oracu-
 lum, tantum abest, vt agnoscentem, & confidentem
 eo fallat, vt citius rerum natura inuerteretur : Exici-
 catur fœnum, inquit *Esa. 40.*, & decidit flos, Verbum
 autem D O M I N I, hoc est, promissio Euangelij, manet
 in æternum.

Præterea, Testimonium D O M I N I seu Euanges-
 lion de Christo, præstat sapientiam paruulo. Paruulus
 est, quisquis natura est rerum imperitus, nec intel-
 ligit, qua via sit ad veram salutem incedendum. Tales
 paruuli erant Apostoli, de quibus Christus dicit : Gra-
 tias ago tibi pater, Domine cœli & terræ, quod abs-
 conderis hæc à sapientibus, & reuelaris ea paruulis.
 Doctrina igitur Euangelij erudit paruulos, hoc est, res-
 rum imperitos, & qui coram mundo habentur stulti,
 vt fiant sapientes & intelligentes, quæ sit compen-
 diaria via ad veram & æternam felicitatem. Hanc
 viam omnes huius seculi sapientes, quos vocarunt
 Philosophos, summo semper studio inquisierunt, sed
 nunquam humana sua ratione inuenire potuerunt.
 Soli autem paruuli eam inueniunt, quia hi agnoscunt
 Euangelion de Christo, & credunt non esse aliud nos-
 men hominibus sub cœlo datum, in quo oporteat ipsos

saluos fieri, præterquam DOMINVM nostrum Iesum Christum, qui est propitiatio pro peccatis nostris. Hæc est summa sapientia, qua effugiamus non solum afflictiones huius seculi, sed etiam mortem & infernum.

Deinde, præcepta DOMINI sunt recta, & lætificant cor, quia non est alia doctrina, quæ recta nos ducit ad veram lætitiã, ad pacem & tranquillitatem conscientie, præter doctrinam Euangelij. Humanæ traditiones non sunt rectæ, non dirigunt animos nostros ad tranquillitatem, sed magis perturbant eos. Euangelium autem conscientiam ita tranquillam reddit, vt ne ad mortis quidem minas contremiscat: quia ostendit nobis Christum victorem mortis, vt credamus in eum, & in ipso etiam mortem vincamus.

Accedit & illud, quod mandatum DOMINI sit purum, illustrans oculos. Est & hoc per antithesin ad humanas traditiones dictum. Hæ enim tanta sunt immunditie & impuritate, vt non solum ipsæ in se sint sordidæ, verum etiam oculis sectatorum suorum tenebras offundant, & excæcent eos. Vnde & Christus ipse, Phariseos, qui traditionibus maiorum suorum fascinati erant, vocat cæcos: Omittite, inquit, illos, duces sunt cæci cæcorum.

Doctrina autem Euangelij de Christo, & expiatio ne peccatorum per Christum facta, tanta est munditie & puritate, vt etiam cæcos oculos illustret, & ad ambulandum in vera æternæ salutis via perducatur.

Adhæc: Timor DOMINI mundus est, permanens in æternum. Timor DOMINI hoc loco est Euangelion de Christo, quod credentes regenerentur per doctrinam

Strinam Euangelij, & adoptentur in filios Dei, vt Deus non serui, sed filiali affectu timeant, colant & uenerentur. Et est iterum antithesis ad doctrinas hominum. Hæ enim, vt non possunt conseruare suos sectatores in aduersis, & coram tribunali Dei, ita nec perpetuò constant: Omnis plantatio, inquit Christus, *Matth. 13.* quam non plantauit pater meus cœlestis, eradicabitur. Doctrina autem Euangelij per Apostolos in totum orbem vulgati, constat perpetuò, & conseruat, non in morte tantum, verum etiam coram tribunali Dei, quotquot eam fide excipiunt: Si quis, inquit Christus, *Ioan. 14.* diligit me, sermonem meum (hic est sermo Euangelij) seruabit, & pater meus diligit eum, & ad eum uenies mus, ac mansionem apud eum faciemus. Vbi autem Deus pater & filius habent mansionem & hospitium, quid ibi felicitatis deesse posset?

Præterea: Iudicia DOMINI sunt veritas, adeoq; in vniuersum iusta. Est & hæc per iudicia DOMINI intelligenda prædicatio Euangelij, traditionibus hominum opposita. Iudicium enim DOMINI est, quod summam in illo Christi dicto continetur: Prædicare Euangelion omni creaturæ. Qui crediderit (Euangelio,) & baptisatus fuerit, saluus erit: qui uerò non crediderit, condemnabitur. Hoc iudicium, hæc sententia, est veritas ipsa, & tam perfecte & absolute iusta, vt etiam credentem iustificet, hoc est, afferat ei remissionem omnis ipsius iniustitiæ, & donet eum iustitia Christi. Longè alia est ratio humanarum traditionum. Hæ enim vt sunt mendacium, ab hominibus confictæ, ita tantum abest, vt sectatores suos reddant iustos, vt potius iniustitiam ipsorum augeant,

Additur & illud in descriptione & encomio Euangelij: Desiderabilia magis quam aurum & obrizum multum, ac dulciora melle, & succu fauorum. Filij huius seculi amant argentum, aurum, idq; obrizum, defecatissimum, videlicet, & purgatissimum. Amant gemmas, vinum, mulieres, & quicquid est bonorum huius mundi. Et apparent quidem in his nonnulla desiderabilia, propter quæ homines in ea affectant, & summo studio consecretantur. Arbitrantur enim se ex horum possessione in his terris esse felices, sed fallunt longissimè. Quæ enim sunt huius seculi bona, non sunt verè bona, nec beant possessorem, imò conijciunt maximam hominum partem in perpetuum exitium. Quomodo igitur possent esse verè desiderabilia? Euangelion autem de Christo, verè illud desiderabile & delectabile bonum est, quod excellit omnes huius mundi thesauros, de quo & Christus apud Matthæum concionatur: Simile est, inquit, regnum cœlorum thesauro abscondito in agro, quem repertum homo abscondit, & præ gaudio, quod habet super eo, abit, & omnia quæcunq; habet, vendit, ac mercatur agrum illum. Euangelion enim affert nobis remissionem peccatorum propter Christum. Vbi autem est remissio peccatorum, ibi est Deus propitijs, adoptio in familiam Dei, & hæreditatem cœlestem, ibi est & iustitia, & victoria mortis, ac sempiterna felicitas. Quæ cum nobis per Euangelion Christi afferuntur, quid thesauro Euangelij preciosius? quid eo magis desiderabile & delectabile? Careamus licet opibus, & reliquis thesauris huius seculi, quid deerit nobis, si habuerimus ex Euangelio remissionem peccatorum, propter Christum?

stum? Possideamus licet omnem huius mundi potentiam, affluentiam, dignitatem & maiestatem, quid proderit, si Euangelion ignorauerimus, & remissionem peccatorum propter Christum caruerimus? Postremo, Psalter suo ipsius exemplo probat Euangelij seu promissionis de Christo doctrinam, asserere talem fructum seu effectum, qualem hactenus commemorauit. Dixi, Euangelion de Christo asserere sapientiam paruulis, & illustrare oculos cæcorum. Hoc in me ipse expertus sum. Nam & ego per Euangelion ita illustratus sum, ut perspicue cognoscam, quæ sit ad veram & æternam felicitatem ambulandum. Ac breuiter, si quis custodierit Euangelion fide, multo maiorem retributionem, multo plura beneficia, non quidem suo ipsius merito, sed merito tantum Christi per Euangelion patefacti, consequetur, quam vel ego hactenus commemorauerim, vel humana lingua recitari queat. Proponit autem Dauid suum ipsius exemplum, ut cum sit Rex Israël, & in suis periculis non aliam consolationem & liberationem senserit, nisi ex promissione Messiae, seu ex Euangelio Christi, non dedignemur ipsum imitari, ac in omnibus nostris casibus ad Euangelion Christi per fidem properare. Sic enim fiet, ut reipsa nos quoque retributionem, seu beneficia eius experiamur.

12. *Delicta quis intelligit? ab oculis munda me.*
13. *Etiā ab impudentijs custodi seruum tuum, ne dominentur mei. Tunc immaculatus & innocens ero à transgressionem multa.*
14. *Placeant verba oris mei, & meditatio cordis mei coram*

in DOMINE, petra mea, & redemptor meus.

In fine Psalmi addit precationem, ut quem Euangelij fructum coepit in ipso Deus proferre, eum augere & perficere pergat. Euangelion enim de Christo, conscriptionatur maxime omnium de expiatione & remissione peccatorum, propter Christum. Hæc enim est summa Euangelij. Hoc etiam est summum beneficium, quod homini in hac vita contingere potest. Hoc beneficio consecuto, reliqua omnia adhiñcentur. Precatur igitur, ut Deus condonet ipsi peccata tam occulta, quam manifesta. Sunt enim duo peccatorum genera. Alterum est occultum, quot latet in nostra carne, & quod ne ab optimis quidem & pijsimis satis intelligi potest. Humana enim natura ita est per peccatū corrupta & cæcata, ut non queat impietatem in recessu & latebris cordium latentem, sufficienter agnoscere & deprehendere. Nostri vocant peccatum Originale. Gen. 6. Cuncta cogitatio cordis, mala est omni tempore. Et in Psalmo: Ecce in iniquitatibus conceptus sum, & in peccatis concepit me mater mea. Et Hiere. 17. Præuū est cor hominis, & imperscrutabile. Quis cognoscet illud? Et Matth. 15. Ex corde exeunt cogitationes malæ, cædes, adulteria, stupra, furta, &c. Cum Dauid occupatus esset cogitationibus de excitando templo, in quo arca testamenti reponeretur, num ex istimis ipsum tum uidisse in corde suo adulterium & homicidium, quæ postea designauit? Nihil certè minus, & tamen latebant in eo, & Deus videbat. Cum Petrus audiret à Christo: Omnes vos hac nocte offendiculum in me patiemini, num arbitraris ipsum uidisse aut

se aut sensisse in corde suo tam horribilem abnegationem, qualis paulo post secuta est? Imò, cum de ea admoneretur, toto pectore restitit. Et tamen in pectore hærebat, & Christus videbat. Precatur ergo David, ut Deus non imputet sibi hæc occulta peccata, sed condonet: Delicta, inquires, quis intelligit? hoc est, ea peccata, quæ inhaerent carni natura, & quæ in recessu cordis ita latent, ut ne quidem à spiritualibus simis omnino depræhendi queant. Quæso igitur te D O M I N E Deus noster, ut non imputes mihi hæc occulta peccata, quorum cor plenum est, etiamsi ego in præsentia nec sentiam, nec intelligam: sed clementer mihi propter Christum Euangelio adnuntiatur, remittas.

Alterum genus peccatorum est manifestum & conspicuum: & est fructus peccati originalis, quale est homicidium, adulterium, & vniuersa illa malorum lerna, quam Christus affirmat ex corde exire. Hæc peccata David vocat hoc loco, זדים Zedim, hoc est, temeritates, petulantias, impudentias, insolentias, quod ea designare, non sit nisi temeritas, petulantia & impudentia. Homo enim, etsi è Spiritu sancto non renatus, tantarum tamen est natura sua virium, ut queat se ab his abstinere. Negare quidem non potest, quin homo aliquoties à satana ita occupetur, ut ex improviso, & contra quàm cogitarat, in externa illa, & horrenda scelera ruat: generaliter autem homo ita conditus est, ut etiam post lapsum relictum ei sit tantillum virium, ut possit, iuxta externam speciem, honestam vitam ducere. Exempla passim, tam in Gentium historis, quàm in Iudæorum, Phariseis & hypocritis extant,

qui, quamuis non renati, cauerunt sibi à vitæ turpitudine. Quare externa scelera haud iniuria dicuntur petulantiae & impudentiae. Sed quia caro valde est imbecillis, idcirco Dauid recte & necessario precatur, vt in his cauendis, adiuuetur à spiritu: Custodi, inquit, seruum tuum, non tantum vt occulta peccata condones, verum etiam vt Spiritu sancto tuo gubernes me, ne externa & manifesta scelera dominantur mihi, & ne in corpore meo ita regnent, vt ea petulanter & impudenter designem. Hoc enim, si impetrauero, ero coram te perfecte mundus & innocens, non quidem mea ipsius mundicie & innocentia, sed condonatione meae iustitiae, & imputatione iustitiae Christi. Nec dubito, quin, si ope Spiritus sancti externa scelera non regnent in corpore meo, facile cauere queam, ne in multa, varia, & horrenda flagitia ruam. Obsecro igitur te DOMINE, qui es petra mea, qua confido, & redemptor meus, vt hæc precatio mea, quam non ore tantum, sed ex fideli corde recito, placeat tibi, & sit tibi grata & accepta, quo beneficijs tuis, quæ Euangelio Christi, in totum orbem diuulgato, adnunciantur, perpetuo fruar.

VSUS HUIUS PSALMI.

In tanta diuersissimarum religionum varietate, & in tanta verè piorum paucitate, multi dubitare solent, num adhuc reliquus sit in his terris populus, qui doctrinam initio nascentis ecclesiae, per Apostolos vulgatam, amplectatur & sectetur. Etsi enim sunt, qui de professione huius doctrinae gloriantur, tamen etiam

hi, si alijs conferantur, paucissimi numerantur, & ipsi inter se ita dissident, vt alij haud immerito offendi videantur. His cogitationibus & offendiculis obuiam eundum est hoc Psalmo, in quo Spiritus sanctus testificatur Euangelion de Christo, sparsum esse in orbem terrarum, non temere, nec humano, sed coelesti & diuino consilio, non vt ad tempus tantum ostendatur, & subito euanescat, sed vt colligat suam filio Dei ecclesiam ex omni natione, quæ sub cœlo est, vsq; ad extremum huius seculi diem: Non vos me, inquit Christus ad Apostolos, elegistis, sed **E GO** vos elegi, & constitui vos, vt eatis, & fructum afferatis, & fructus vester maneat. **FRUCTVS**, inquit, vester **MANEAT**. Non videtur quidem reliquus esse vllus Apostolicarum concionum fructus, in ijs nationibus, in quibus publicè obtinet Mahumetismus & Papismus. Quod autem ad Eliam dictum est: Reliqui mihi septem millia virorum, qui non curauerunt genua sua ante Baal, hoc meminerimus etiam ad nos dici, vt etiam si inter tot Gentes non prædicatur Christus publicè, tamen quia sonus Apostolorum peruenit ad maiores earum gentium, & fructus illorum non perit, dubitandum non est, quin doctrina Apostolica propagata sit ad posteritatem, & conseruetur adhuc hodieq; vel in priuatis multorum familijs. Quare hic Psalmus sæpè recitandus est, vt nos aduersus offendiculum, quod ex paucitate ecclesiæ Christi oriri solet, muniamus.

Deinde alij offenduntur humilitate, & contemptu prædicationis Euangelij. Sicut & Paulus scribit: Nos, *1. Cor. 1.* inquit, prædicamus Christum crucifixum, Iudæis offendiculum, Græcis stultitiam. In hoc autem Psalmo

commemoratur insigne encomium Euangelij Christi. Ponamus igitur nobis hoc Euangelij encomium ob oculos, vt excitemur ad amplectendam doctrinam eius, & fructum eius capiamus. Docemur in hoc Psalmo etiam illud, quod etsi audimus in Euangelio afferri nobis omnium peccatorum tam occultorum, quam externorum seu manifestorum, condonationem, gratis, propter Christum, per fidem, tamen addenda semper est pia & ardens precatio, seu inuocatio nominis Dei, vt fides, quæ remissionem peccatorum accipit, inuocatione crescat, inflammetur, & confirmetur.

Psalmus 20.

Exaudiat te DOMINVS in die tribulationis, &c.

*Anbusij ad flumen Brentium,
explicatus.*



Vllum hominum genus videtur aliena ope minus indigere, quàm Reges & Principes huius terræ. Et tamen non est, qui magis necesse habeat, cum alijs rebus, tum maximè piorum precibus coram Deo iuari. In administranda enim Republica, siue domi, siue militiae, sua sunt pericula, quæ nisi Reges & Principes

pes coelesti ope muniti fuerint, euadere, & conseruari non possunt. Proponit igitur Spiritus sanctus hunc vicesimum Psalmum, vt ecclesia populi Dei habeat formulam precandi, qua Regum, Principum & Magistratum suorum salutem DOMINO Deo nostro commendet. Habet autem hic Psalmus nouem versiculos, in quibus videntur sex aut septem petitiones contineri, sed quæ idem penè significant, ac eodem respiciunt.

1. *Exaudiat te DOMINVS in die tribulationis, exaltet te nomen Dei Iacob.*
2. *Mittat auxilium tuum de sanctuario, & de Zion roboret te.*

Ponamus regem nostrum, exempli gratia, Davidem, suscipere protectionem aduersus Ammonitas, aut alios hostes. Cum igitur nec obscura, nec parua sint pericula belli, & salus Regis ac Principum nostrorum, qui arma ad defendendam patriam sumunt, debeat nobis curæ esse, quippe quod ex ipsorum incolumitate, etiam nostra, in hoc hominum contubernio, pendeat, obsecro te, præscribe nobis precandi formulam, qua institutum eorum Deo ita commendemus, vt omnia belli pericula, aut alias afflictiones euadant, & victoriam ab hostibus reportent.

Non est autem dubium, quin pñ Reges & Principes adituri pericula, inuocent etiam ipsi nomen DOMINI, & petant auxilium non ab armis aut equis suis, sed è cœlo. Quare, si susceperimus eos, vt debemus, precibus nostris coram Deo iuuandos, procumbamus in

genus, & dicamus : Exaudiat te DOMINVS in die tribulationis. Videmus te, regem & principem nostrum, adire magna & grauia pericula. Videmus te obijci multis aduersis, ac sollicitè petere cœlestem opem. Obsecramus igitur, & obtestamur DOMINVM Deum nostrum, vt te exaudiat, te tueatur, te exaltet, & omnino faciat te voti tui compotem. Non aut̃ inuocamus fictitium quendam Deum, quales multos somniant Ethnici, sed inuocamus nomen Dei Iacob, illum videlicet verum Deum, qui non solum promisit Patri archæ Iacob, se ex posteritate eius missurum semen seu filium, in quo omnes Gentium familię benedictionem consequentur, verumetiam qui Patriarcham ipsum Iacob, in multis & magnis periculis mirando modo conseruauit, ac cum in monamachia sua, quam cum ipso filius Dei inierat, ita tutatus est, & extulit, vt reportauerit nomen Israël, quod significat, si rectè interpreteris, Victorem Dei. Speramus igitur hunc verum Deum non minus in præsentia, ope sua affuturum, quàm quondam Patriarchæ Iacob affuit.

Gen. 32.

Quid autem illud est, quod addunt : Mittat tibi auxilium de sanctuario, hoc est, de sancto loco, in quo erat arca propitiatorij, & roboret te de Zion, in quo monte edificabatur templum? Cur nō potius dicunt: Mittat tibi auxilium de cœlo, sicut Salomon postea dicit : Tu exaudies in cœlo, in firmamento Solij tuic? Num Deus magis commoratur in monte Zion, quàm in cœlo? Num mittit auxilium suum potius ex arca propitiatorij, quàm è throno suo cœlesti? Hic iterum obseruamus, quod precatorez idcirco sic loquantur, vt significant, se inuocare, nō Moabiticum quendam,

1. Reg. 8.

aut

aut Ammoniticum, aut Delphicum Deum, qui oracula è tripode dare solet : sed verum Deum Patriarcharum, qui vera & cœlestia oracula dedit è propitiatorio, & qui sacris diuinitus institutis in sanctuario, & in Zione colitur. Sic Esa. 31. dicitur : Dixit DOMINVS, cuius ignis est in Zione, & caminus eius in Hierusalem. Hæc est descriptio veri Dei, qua seiungitur ab omnibus alijs dijs fictitijs. Verus enim Deus est, non quem Ethnici somniarunt, absq; verbo Dei : sed qui patefecit se verbo suo Patriarchis, & promisit, se è posteritate ipsorum missurum filium suum, redemptorem husmani generis, ac interea adumbravit eum, donec veniret, sacrificijs, quæ in Zione, seu in templo suo, ad arcam propitiatorii, peragenda instituerat.

3. *Memor sit omnium oblationum tuarum, & Holocaustum tuum pingue fiat.*

Quod dicit : Pingue fiat, significat se precari, vt holocaustum Regis sit Deo gratum & acceptum. Conqueritur enim Deus apud Malachiam, quod populus Israël non offerat sacrificia nisi cæca, clauda, languida & macilenta, quæ abominetur : sed requirat integra, sana & pingua. Cum igitur precatore orant hoc loco, vt holocaustum Regis fiat pingue, orant, vt Deo placeat. Sed quid ? Num precantur, vt Deus respiciat merita oblationum & holocaustorum Regis, ac tueatur eum propter illa, cœlesti sua ope ? An non apud Esaiam dicitur : Holocausta arietum, & adipe pinguium, & sanguinem vitulorum & agnorum, & hircorum nolui. Cum veniretis ante conspectum meum,

meum, quis quæsiuit hæc de manibus vestris? Certè sacrificia & holocausta Israëlitarum male in multis Prophetarum locis audiunt, non quòd non fuerint diuinitus instituta, sed quòd Hypocritæ ijs ad impietatem & idolomaniam sint abusi. Blandiebantur enim sibi his sacris, & pollicebantur sibi meritis eorum omnem cœlestem benedictionem. Sed hæc est impietas. Non enim erant in hunc usum instituta, vt expiarent suo opere peccata coram Deo, & mererentur æternam felicitatem: sed tantum vt verum peccatorum expiatorem, qui est Christus Dominus noster, adumbrarent, & fidem in ipsum confirmarent. Quare, quod in hoc versiculo dicunt: Memor sit oblationum tuarum, &c. non precantur, vt Deus respiciat in rege, merita holocaustorum eius, sed potius vt respiciat merita DOMINI nostri Iesu Christi. Est enim phrasis Leuitica, qua id suo tempore intelligitur, quod postea apud Ioannem Christus clavis & apertis verbis dicit: *Ioan. 16.* Quæcunq; petieritis patrem in NOMINE MEO, dabit vobis. Oblationes enim & holocausta Leuitica, non expiant peccata, sed concionantur tantum de vero peccatorum expiatore, Iesu Christo: & significant, Deum merita tantum Christi filij sui, non merita illorum Leuiticorum holocaustorum respicere. Quare quod precatore in hoc versiculo dicunt, habet hanc sententiam.

Rex noster ingressurus in bellum, multa obtulit sacrificia & holocausta, non vt meritis eorum fauorem Dei mereatur, sed vt admoneat se fide in Messiam, propter quem solum Deus fauet nobis, & conseruat tam regem & principes, quàm nos in ipsum credere.

tes in omnibus aduersis. Petimus igitur DOMINE Deus noster, vt memor sis horum sacrificiorum, hoc est, vt confirmes fidem Regis, & des ei felicem euentum belli, propter Messiam tuum, cuius ecclesiam Rex suscepit contra hostes nostros tuendam.

4. *Des tibi secundum cor tuum, & omne consilium tuum fortinet.*
5. *(Vt) exultemus in salute tua, & in nomine Dei nostri vexilla erigamus. Impleat DOMINVS omnes petitiones tuas.*

Pergunt orare: Tu rex noster, cogitas nos ab hostibus defendere, constituis nos in tuto collocare, ne ab hostibus ex improviso opprimamur. Oramus igitur Deum, vt his tuis cogitationibus satisficiat, & consilijs tuis prosperum det euentum. Quo fine, & in quem usum? Num, vt ex ultione hostium nostrorum carnalem capiamus voluptatem? Nihil minus. Orandum enim est, etiam pro persecutoribus nostris, tantum abest, vt de aduersis eorum nobis applaudamus. Sed vt exultemus, inquit, in tua salute, & statuamus trophæa in nomine Dei nostri, hoc est, vt cum tu reportaueris salutem & victoriam, nos beneficio per te parato fruamur, & gloriam nominis Dei, propter victoriam diuinitus concessam, celebremus. Hoc prorsus illud est, quod Paulus ad Timotheum scribens: Ad ^{1.} *Timo. 2.* hortor vos, inquit, vt antè omnia fiant deprecationes, obsecrationes, interpellationes, gratiarum actiones, pro omnibus hominibus, PRO REGIBVS, & omnibus in eminentia constitutis, vt placidam ac quietam

Rom. 13.

ram vitam degamus, cum OMNI PIETATE & honestate. Et Hiere. cap. 29. Quærite pacem ciuitatis, ad quam trāsmigrare vos feci, & ORATE pro ea ad DOMINVM, quia IN PACE illius, erit PAX VOBIS. Reges enim & Magistratus constituti sunt diuinitus, vt publicam tueantur pacem & tranquillitatem, non propter seipfos, sed propter populum suum, ac maxis me omnium propter ecclesiam Dei: Dei (inquit Paulus de magistratu) minister est, TIBI in bonum. Tanto igitur diligentius & ardentius orandum est, pro salute Regum & Magistratus, ac merito precandum, quod hîc addunt: Impleat DOMINVS omnes petitiones tuas, (dum videlicet Reges & Principes, suæ vocationi seruierint) quanto plura & maiora beneficia Dei, ministerio eorum in nos redundant.

6. *Nunc cognosco, quod DOMINVS seruaturus sit Messiam suum, exaudiat eum de cælo sancto suo, ac dextera eius saluet eum potentissimè.*
7. *(Quia) hi in curru & in equis (fiduciam suam collocant,) nos autem nominis DOMINI Dei nostri recordamur.*
8. *Ipsi incuruabuntur, & cadent, nos autem exurgemus, & erecti stabimus.*

Et si ecclesia Dei, quæ in superioribus versiculis orauit, non est sine fide precata, tamen quia fides orantis solet precibus inflammari, idcirco iam accensa exclamat: Nunc cognosco, nunc scio, nunc certa sum, nec amplius quicquam in me dubitationis relictum est, quin Deus sit seruaturus nostrum, imò suum ipsius Regem,

Regem, quem videlicet ipse instituit, & in regem vngi voluit, (vnde & Reges, Messia, hoc est, vincti dicuntur) & sit exauditorum eum de cœlo sancto suo, (quod idcirco vocat sanctum, propterea quod sit in thronum Dei, qui tamen cœlum & terram implet, sanctificatum seu deputatum) ac ex omnibus aduersis maxima dextræ suæ potentia liberaturus. Vnde ergo, quæso te, hoc nosti? vnde hanc certitudinem concepisti? Non certè concepisti eam ex meo ipsius somnio, aut ex carnis meæ coniecturis, sed ex oraculo cœlesti, & ex verbo diuino. Video enim hostes nostros inflatos esse sua ipsorum potentia, & gloriari de suis viribus, ac fiduciam suam, non nisi in curribus bellicis, & in magno equitatu collocare, Non iactant, non crepant, nisi arma, gladios, hastas, arcus, currus & equites, ex quibus pollicentur sibi certissimam victoriam. Nos verò nihil habemus, quod iactemus, & de quo gloriemur, nisi quod reuocemus in memoriam summam Dei clementiam, quam nobis promissione sua aduersus hostes nostros manifestè testificatus est.

Extat enim cœleste oraculum, quo Deus recepit se vanam hostium fiduciam, quam collocant in suis curribus & equitatibus, pudefacturum: Deut. 20. Si exieris, inquit, ad bellum contra hostes tuos, & videris equitatus & currus, & maiore, quam tu habeas, aduersarii exercitus multitudinem, non TIMEBIS EOS, quia DOMINVS Deus tuus TECVM EST, qui eduxit te de terra Ægypti. Hæc est illa promissio, quæ excitat fidem nostram, vt non amplius de victoria regis nostri dubitemus.

Extat etiam in priori libro Samuelis cap. 2. illud dis-

ctum. Arcus fortium superatur, & infirmi accinguntur robore.

1. *Samu.* 17. Meminimus etiam illius sermonis, quem Dauid ad Goliathem dixit: Tu venis ad me cum gladio, hasta & clypeo, ego autem venio ad te in nomine DOMINI exercituum, Dei agminum Israël, quibus exprobraſti hodie.

His & id genus alijs cœlestium oraculorum dictis, ac piorum exemplis ita confirmamur, vt certò futurum cognoscamus, nec dubitemus, quin hostes nostri deſciantur & opprimantur. Exercitus autem regis nostri superior euadat, & victoriam reportet. Quod cum ita se habeat, oramus magna fide & certissima fiducia, quod in poſtremo verſiculo ſequitur.

9. *DOMINE ſerua Regem. Exaudiat nos (DOMINVS) in die, qua inuocamus.*

Nota diſtinctionis (quã Membrum vocant) apud Hebræos in ſemicirculo videlicet in modum iridis. Alij hunc verſiculum, propter notam membri, ſub verbo *SERVA*, (quam notam Hebræi vocant *Athnatha*,) ſic legunt: *DOMINE ſerua*, Rex (videlicet Chriſtus) exaudiat nos, &c. Optima ſententia, qua ſignificatur Deum patrem inuocandum eſſe propter nomen Chriſti, qui eſt verus rex noſter. Sed quia notæ diſtinctionum apud Hebræos facile à ſcribis tranſpoſui poſſunt, idcirco ſequimur in præſentia vulgatam


translationem. *DOMINE ſaluū fac Regem.* Et (mutata ſecunda perſona in tertiam, quæ ſubita mutatio apud Hebræos uſitata eſt,) exaudiat nos, (videlicet *DOMINVS*) in die, qua inuocauerimus eum. Eſt autem cōcluſio totius precationis, qua ſignificant, ſe tam firma


firma fiducia pro salute regis orare, vt sperent se non tantum in hac precatione, verum etiam quocumq; tempore Deum inuocauerint, ab eo exaudiendos. Ecce quomodo igitur hoc impetrari potest: facillima est responsio: **TIME DOMINVM**, & inuoca eum **IN VERITATE**. Inuocabis autem eum in veritate, si inuocaueris eum verè, in nomine **DOMINI** nostri Iesu Christi. Voluntatem, inquit aliàs, **TIMENTIVM** se faciet, & deprecationem eorum exaudiet. Ac iterum: Propè est **DOMINVS** omnibus inuocantibus eum, inuocantibus eum in veritate. Et aliàs: Quæcumq; petieritis patrem in **NOMINE MEO**, dabit vobis.

VSVS HVIVS PSALMI.

Ostendimus hunc Psalmum esse à Spiritu sancto dictatum & propositum, vt Ecclesia populi Dei haberet certam formulam, qua salutem Regum & magistratuum suorum Deo commendaret. Testatur igitur hoc ipso Spiritus sanctus, quòd Reges & magistratus sint sibi curæ, & velit ipsos haberi sacrosanctos & inuiolatos. Quo monemur, ne simus aduersus eos seditioni, sed legitimis ipsorum ordinationibus obediamus. Et quia nostra tranquillitas pendet diuina ordinatione ex ipsorum studio & cura, non cessemus ministerium eorum tam precibus, quàm alijs officijs iuuare. Deinde, docet nos Spiritus sanctus, quòd nulla inuocatio sit Deo grata, nisi quæ fit propter Christum Dominum nostrum. Quod enim dicitur: Memor sit omnium sacrificiorum eius, idem planè est, ac si diceretur, Memor sit passionis & mortis **DOMINI** nostri

Iesu Christi. Hæc enim sola est sacrificium & holocaustum illud, quod per Levitica sacra est adumbratum, & quod peccata nostra in conspectu Dei expiavit. Discamus & illud, quod sicut administratio Reipublicæ non constet humana sapientia, ita nec victoria in bello constet humanis viribus, sed diuina tantum clementia, & gratuita Dei bonitate. Quare militia tam togata, quàm armata suscipienda est, sola diuinæ vocationis, clementiæ & bonitatis fiducia.





Breuis & perspicua explicatio Psalmorum Dauidis.

AVTORE

Ioanne Brentio.

DECAS TERTIA.



TVBINGÆ,
Apud viduam Vlrici Morhardi.
Anno 1568.

PSALMI TERTIÆ

DECADIS.

21. *DOMINE in virtute tua latabitur rex, &c.*
22. *Deus meus, ut quid me dereliquisti?*
23. *DOMINVS regit me: & nihil mihi deerit.*
24. *DOMINI est terra, & plenitudo eius.*
25. *Ad te DOMINE leuavi animam meam.*
26. *Iudica me DOMINE, quoniam ego in innocentia mea ingressus sum.*
27. *DOMINVS illuminatio mea, quem timebo?*
28. *Ad te DOMINE clamabo, Deus meus.*
29. *Afferte DOMINO filij Dei: afferte DOMINO filios arietum.*
30. *Exaltabo te DOMINE, quoniam suscepisti me.*

Psalmus 21.

DOMINE in virtute tua letabitur rex.

I Acilis est coniectura, cur interpretes hunc Psalmum de Davide exposuerint. Cum enim is, qui proximè præcedit, (Exaudiat te DOMINVS in die tribulationis), ad Dauidem cōmodè referatur, arbitrati sunt, etiam hunc Psalmum rectè & apte ad Dauidem accommodari. Sed vera Psalmi sententia magis ex Psalmo ipso, quàm ex ordine eius petenda est. In quarto enim versiculo dicitur: Vitam petijt à te, dedisti ei longitudinem dierum in seculum & seculum. Hoc propriè in Christū, & non in Dauidem competit. Et in versiculo sexto: Constituis eum, vt sit benedictio perpetua, pertinet & hoc propriè ad personam Christi. Quare hic Psalmus iuxta τὸ ἑκτόν de Christo & regno seu maiestate eius, non de Davide, intelligendus est.

Continet aut̃ duas partes. Prior est expositio gloriæ & maiestatis Christi: posterior est expositio oppressionis & abiectiois Iudæorum: quibus etsi Christus erat promissus, tamen nō fuerunt virulentiores Christi hostes & persecutores: quippe quòd ad illum tantum exitum properarūt, vt maiestatem Christi ad inferos vsq; deprimerent & conculcarent.

1. *DOMINE, in tua fortitudine letatur Rex, & in tua salute exultat vehementer.*

A 2 Propos

Propositio Psalmi, cuius sententia illustrior fit, si per antithesin ad Iudæos explicetur. Iudæi cogitarunt regem seu Christum, vna cum suo regno opprimere, ac prorsus e terra viuentium eradicare. Sed Christus lætatur in fortitudine Dei, & exultat vehementer in salute eius. Tantum enim abest, vt potuerint ipsum opprimere, vt potius exaltatus sit in summā sublimitatem, & collocatus ad dexteram Dei, super omnem principatum, & super omne nomen, tam in hoc, quàm in futuro seculo. Cum igitur seruatus sit fortitudine Dei, & reportauerit insignem victoriam ab omnibus hostibus suis, non habet causam, cur doleat, & tristitia afficiatur, sed potius lætetur, & præ gaudio gestiat. Ac idem planè in hoc versiculo paucis dicitur, quod Psal. 118. copiosius exponit: Impulsus sum, inquit Christus, vt caderem: & DOMINVS suscepit me. Fortitudo mea, & laus mea DOMINVS: & factus est mihi in salutem. Ac mox: Lapis, quem reprobauerunt ædificantes, factus est in caput anguli.

20. *Desiderium cordis eius tribuis ei, & voluntatem labiorum eius non negas.*

Propositionem sequitur enumeratio beneficiorum, quæ Deus confert in Christum, & propter quæ Christus lætatur, & triumphum agit. Primum enim Deus gratificatur Christo filio suo in omnibus votis suis. Quicquid Christus vel corde desiderat, vel ore rogat, sequi velle significat, tantum abest, vt Deus recuset aut neget, vt cumulatè impleat, ac satisfaciat. Vnde & apud Ioannem ait: Ego sciebam, quod semper me aus

Ioan. 11.

me audis. Vociferabantur quidem Iudæi, cum penderet in cruce, iuxta carnis aspectum, miserrimus: Confidit in Deo, liberet eum nunc, si vult eum: arbitrabantur enim eum à Deo prorsus desertum. Sed Spiritus sanctus in hoc versiculo affirmat, ipsum Deo ita acceptum, ut impleat omnes petitiones cordis eius. Et alias testatur Deus pater: Hic est, inquit, filius meus dilectus, quo vnice delector.

3. *Obruis eum benedictionibus bonitatis, ponis super caput eius coronam auream.*

Aliud beneficium, quod Deus pater confert in Christum filium suum: Obruis, inquit, eum benedictionibus bonitatis: afficis eum optimis quibusque beneficiis: ornas eum omni genere bonorum, adeoque imponis capiti eius coronam architectatam non de simplici, sed de optimo, & purissimo auro. Hoc planè illud est, quod apud Ioannem dicitur: Pater diligit filium, & dedit ei omnia in manus. Et iterum apud Matthæum: Data est mihi omnis potestas in cœlo & in terra. Ac rursus in Psalmo: Omnia subiecisti sub pedibus eius. Ut interim non addam, quæ Paulus ad Ephes. cap. 1. & 4. & ad Phil. cap. 2. de maiestate Christi disertè scribit, quæ si huc contuleris, manifestè videbis, Christo impositam esse coronam, non regiam huius seculi, non angelicam, nec archangelicam, sed diuinam: ut in nomine eius omne genu cœlestium, terrestrium & infernorum sese flectat.

4. *Vitam petijt à te: dedisti ei longitudinem (videlicet) dierum perpetuò & in æternum.*

A 3. Aliud.

Aliud beneficium. Cum Christus perturbaretur aspectu mortis, in monte oliueti, & prosterneret se coram Deo patre, deprecatus est mortem, & petijt vitam: Pater mi, inquit, si possibile est, transeat à me calix iste. Quid ergo factum est? Etsi Christus non retinuit hanc corporalem & mundanam vitam, debuit enim mortem ad expianda nostra peccata suscipere, Deus tamen pater dedit ei pro hac corporali vita, longitudinem dierum, in omnem æternitatem, & collocavit eum in throno diuinæ suæ maiestatis, vt omnia coràm gubernaret: idq; non quinquaginta aut centum, aut etiã mille annis, sed perpetuò & in sempiternum. Multiplicabitur, inquit Esaias, eius imperium, & pacis non erit finis. Super solium Dauid, & super regnum eius sedebit, vt confirmet illud & corroboret in iudicio & iustitia, à modo & vsq; in sempiternum.

Esa. 9.

5. *Magna est gloria eius per salutem tuam, laude & decore exornas eum.*

Exclamatio, & admiratio. Cum tu, ô cœlestis pater, facias Christum filium tuum compotem omnis voluntatis eius, ac afficias eum omni genere bonorum, & extollas eum in perpetuum regnum, quanta, obsecro, & quàm magna est maiestas eius, quam consecutus est ex eo, quod tu seruas & extollis eum: quanta est laus, quantum decus eius, quo tu ipsum, præ omnibus hominibus & angelis exornas? Hic versiculus cõuenit cum eo, qui est in Psalmo octauo: Visus quidem fuit aliquantisper deseri à Deo: sed gloria & honore coronasti eum, & constituisti eum super opera manuum tuarum.

6. Quo-

6. *Quoniam constituit eum, ut sit benedictio in perpetuum, lætificas eum gaudio vultus tui.*

Pergit commemorare beneficia, quæ collata sunt in Christum à Deo patre suo. Non est mirum, quod magna sit maiestas Christi, & insignis sit laus eius. Constituit enim ipsum, ut sit benedictio in omnem æternitatem, & respicis eum vultu tuo tanta clementia, ut effundas in ipsum omnem tuam felicitatem, quo gaudio & lætitia, quid potest maius & excellentius dici? Hic versiculus sumptus est ex illa promissione, quæ dicta est de Christo ad Abrahamum, & extat in Gen. cap. 22. In semine tuo (qui est Christus) benedicentur omnes gentes terræ. Non autem fit hic sermo de benedictione corporali & terrena, sed de spirituali & cœlesti, quæ est remissio peccatorum, adoptio in hæreditatem cœlestem, conseruatio in morte, & æterna felicitas. Hæ sunt benedictiones, hæc sunt beneficia, quæ credentibus contingunt propter Christum. Manifestum quidem est, quod homines carnales non quærant, nisi benedictiones carnales, quæ sunt sanitas corporis, diuitiæ, longitudo vitæ corporalis, gloria mundana, & regnum terrenum. Sed quid hæc aliud sunt, quàm somnium vmbra, aut si quid est hoc vanius? Illæ autem spirituales benedictiones, ut solæ sunt verè salutares, ita sunt perpetuæ. Quare omni studio elaborandum est, ut eas in Christo consequamur.

7. *Quoniam rex sperat in DOMINO, & per beneficentiam altissimi non concutietur.*

Vocifer

Vociferabantur quidem Iudæi de Christo : Confidit in Deo , & liberet eum nunc , si placet ei. Sed etsi Christus visus fuit aliquandiu à Deo desertus, tamen nunquam decidit de spe sua : Tu es, inquit, qui extra xisti me de vëtre. Spes mea ab vberibus matris meæ. In te proiectus sum ex vtero, de ventre matris meæ, Deus meus es tu, &c. Quid ergo hac spe est assecutus? Beneficio, inquit, altissimi non concutietur. Gloriantur quidem Iudæi, se adegisse ipsum in crucem & mortem, ac arbitrati sunt gloriam eius prorsus esse conculcatam. Sed ecce tibi, tantum abest, vt fuerit è statu gloriæ suæ dimotus, excussus, & protritrus, vt beneficio Dei patris sui collocatus sit in summa & perpetuò stabili maiestate. Habes priorem huius Psalmi partem, quæ est expositio gloriæ Christi, & beneficiorum, quæ Deus in ipsum contulit. Accedamus nunc ad posteriorem eius partem.

8. *Inuenit manus tua omnes inimicos tuos, dextera tua inuenit eos, qui te oderunt.*

Ab hoc versiculo incipit posterior pars huius Psalmi de abiectiōe & oppressiōe Iudæorum. Nam Iudæi cogitauerunt Christum opprimere, & radicitus euellere. Sed ipsi, saluo Christo, vicissim ita sunt oppressi, & abiecti, vt non sint amplius populus seu Ecclesia Dei, & necesse habeant perpetuò interire. Dicit ergo : Manus tua inuenit inimicos tuos, qui sunt Iudæi, & dextera seu potentia tua, (quæ per dexterā significatur) inuenit ocores tuos, qui & ipsi sunt Iudæi. Etsi enim persequendo Christum, & Apostolos eius, arbitrantur se præstare cultū Deo, & habent aliquan-

diu

diu felicem crudelitatis suæ progressum, tamen vel
tādem inuenit aut apprehendit eos manus, seu potens
tia Dei, vt dent pœnas impietatis suæ. Detestatur
quidem Deus omnem crudelitatem, & impietatem:
non solet autem eam statim ^{in æternū} punire, sed lenis
to gradu procedit, & tarditatem grauitate cōpensat.

9. *Ponis eos, vt clibanum ignis, tempore vultus tui, DOMI-
NVS in ira sua deuorat eos, & absumit eos ignis.*

Pollicentur quidē sibi in hoc & futuro seculo, sum-
mam felicitatem, propterea quòd sint semen Abrah-
hæ, & videantur legem Dei, ac gloriam nominis eius
magno zelo tueri. sed quia sunt iniuri, contumeliosi,
& virulenti in Christum filium Dei, idcirco, quo tem-
pore aspexeris eos iracundo tuo vultu, & expedieris
iram tuam, ita æstuabunt, perinde ac si coniecti essent
in ardentem fornacem, & absumerentur ab igni. Nam
quemadmodū Zodomitæ & Gomorrhitæ perierunt
quondam pluuia sulphuris & ignis è cœlo demissa, vt
non aliter absumerentur, quàm si in ijs locis succens-
sus esset clibanus, ita & Iudæi horribiliter, irato DO-
MINO, interibunt. Significat autem Spiritus sanctus
hoc versiculo abiectionem quidem Iudaicæ gentis, ne
sint amplius ecclesia Dei: inprimis verò, etiam tem-
pli Hierosolymitani conflagrationem, quod etsi Im- *Vide Iosephum,*
perator Titus in expugnatione vrbs Hierusalem, in- *de bello Iudaico.*
columine conseruare voluit, tamen tanta erat ira Dei
in Iudaicum populum, & in omnia sacra eius effusa, vt
templum, ne quidem Monarchæ autoritate, potuerit
ab igni illæsum manere: quo casu concidit etiam om-
nis Iudaici populi incolumitas.

10. *Fructum eorum de terra perdes, & semen eorum de filiis hominum.*

Fructus & semen Iudæorum sunt posterii eorum. Canit igitur Psalmus, quòd DOMINVS tanta ira sit aduersus Iudæos inflammatus, vt nō solum illos ipsos, qui vociferati sunt, crucifige, crucifige, verumetiam posteritatem eorū sit oppressurus. sic enim voluerunt ipsi, cum clamarent: Sanguis, (hoc est) ultio sanguinis eius veniat super nos, & super filios nostros. Hanc pœnam adhuc hodieq; dant Iudæi. Etsi enim non videntur omnes ex his terris sublatis, tamen qui adhuc sunt superstites, vagantur incertis sedibus, & non solum eiectioni sunt ex auitis suis possessionibus in his terris, verumetiam exclusi sunt e cœlesti hereditate. Hoc verè est e contubernio filiorum hominum eijs.

11. *Quoniam intenderunt in te malum, & cogitauerunt consilium, quod perficere non potuerunt.*

Quid ergo est, quòd Deus tanta ira inflammatus est in Iudæos? Quia intenderunt, inquit, in Christum filium Dei, iniquitatem & malitiam: cogitauerunt eū e medio tollere, & omnem gloriam nominis eius cōculcare, & tamen consilium eorum nō successit, quippe quòd ipsi potius omni malorum genere sunt obruti, quàm quòd Christum lædere potuerint. Huc pertinet parabola de patrefamiliās, qui plantauit vineam, apud Matthæum cap. 21, & apud Luc. cap. 20. Ibi enim coloni, cum ante seruos patrisfamiliās, exigentes redditum vineę, dimississent, additis etiam plagis, inanes, & vidissent filium ad se accedere, cogitant intra se, dicentes:

eentes : Hic est heres : venite occidamus illum, vt nostra fiat hæreditas, &c. Sed etſi conſilium eorum hætenus promouet, vt occidant eum, tamen & ipſe euadit mortē illuſtriſſima reſurrectione, & exaltatione ad dexteram Dei : illi autem horribiliter perierunt.

12. *Quoniam facis eos humerum, & neruis tuis tendis (ſagittas) aduerſus faciem ipſorum.*

Quod in Pſalmo ſeptimo de impio ſcribitur, hoc etiam in Iudæis impletur : Lacum, inquit Pſalmus, aperuit : & effodit eum, & incidit in foueā, quam fecit. Conuertetur dolor in caput eius, & in verticem ipſius iniquitas eius descendet. Idem planè Iudæis accidit. Inſidiati ſunt Chriſto, cogitauerunt eum opprimere, effoderunt cisternam, vt caderet in eam, & ſuffocaretur. Sed ecce, inciderunt ipſi in ea mala, quæ machis nati ſunt in Chriſtum. Conſtituit enim eos humerum, effecit vt fierent humerus. Humerus aptus eſt ad geſtanda onera, & ad ſuſtinendas plagas, vnde & apud Eſaiam cap. 9. dicitur : Virgam humeri eius ſuperasti, hoc eſt, abſtulisti ab humero populi virgā ſeu plagas. Sic & hoc loco, cum dicitur, quod Iudæi facti ſint humerus, ſignificatur, eos traditos plagis, & opprimi grauiſſimis oneribus, quibus nunquam liberabuntur. Nec id ſolum, verum etiam DOMINVS impoſuit neruis arcus ſui ſagittas, quas aduerſus faciem eorū eiæ *Vide Eusebium* culetur : alia enim ſagitta aliam trudit : vt etiamſi vis *in Eccle. hiſt.* deatur ipſis aliquoties proſper rerum ſucceſſus affulſ *lib. 4. cap. 6.* gere, ſicut ſpem ſalutis, duce Barcochaba, & Impes *Et Sozomenum* ratore Iuliano, conceperant, tamen tanta fuit vis diſ *lib. 5. cap. 22.* vinæ ultionis, vt poſt excæcationem & abiectionem
B 2 ipſorum,

ipforum, quæ facta est ab ascensu Christi in cœlum, nunquam potuerint amplius emergere, & è malis suis eluctari, sed missa est in ipsos altera cœlestis vindictæ sagitta post alteram, donec redacti sunt in extremam, ac nunquam finiendam calamitatem. Quæres igitur, si tanta est diuinæ iræ semel inflammatae seueritas, quis eam effugiet? Nemo certè effugiet, nisi si quis conuersus fuerit ad Christum. Hic enim vt est placator diuinæ iræ, ita conseruabit omnes eos illæsos, qui vera fide ipsum amplectuntur: Cum exarserit, inquit secundus Psalmus, in breui ira eius, beati omnes qui confidunt in eo. Et Ioannes: Qui credit, inquit, filio, habet vitam æternam. Qui verò non credit filio, non videbit vitam, sed ira Dei manet super eum.

13. *Exaltare D O M I N E fortitudine tua, & cantabimus,
ac psallemus potentiam tuam.*

Conclusio precationis. Cum tu D O M I N E Deus noster tanta sis fortitudine & potentia, vt non solum colloques Christum filium tuum ad dexteram tuam, & ornes eum omni maiestate tua, verumetiam deñcias inimicos & aduersarios eius, ac ponas eos scabellum pedum ipsius, petimus obedienter, vt hanc tuam fortitudinem patefacias, & missò filio tuo, in toto orbe diutulges, quò potentia & maiestas nominis tui, tam seramonibus, quam Psalmis & carminibus celebretur.

V S V S H V I V S P S A L M I.

Ioan. 17.

Hæc est, inquit Christus, vita æterna, vt cognoscāt te solum Deum verum, & quem misisti Iesum Christum.

stum. Cum igitur cognitio Christi necessaria sit ad cōsequendam æternam salutem, nec aliud nomen, præter Christum, datum sit inter homines sub cœlo, in quo oporteat nos saluos fieri, visum est Spiritui sancto, promissiones de Christo, & explicationes eius, non tantum sacrificijs adumbrare, & sermonibus vulgare, verumetiam in vulgares & publicos Psalmos conferre, vt liceret ecclesiæ se de Christo, & beneficijs eius, tam in tabernaculo & templo publice, quàm in domibus, in agris, in omnibus deniq; locis, priuatim, commonefacere, ac fidem suam excitare & confirmare. Nam, quæ beneficia Christus à Deo patre suo accepit, ea non sibi tantum, sed etiam nobis accepit, vt ijs vnà cum ipso fruamur. Desiderium cordis eius, inquit Psalmus, tribuis ei, & voluntatem labiorum eius non negas. Desiderauit autem Christus, & voluit, vt non tantum Apostoli, verumetiam omnes per Apostolicam prædicationem credentes in Christum, seruarentur æterna salute: Non pro eis tantum rogo, inquit, Ioan. 17. sed & pro ijs, qui credituri sunt per sermonem eorum in me. Rursus dicit Psalmus: Constituis eum, vt sit benedictio in æternum. Christus autem non est in se tantum benedictus, verumetiam effundit benedictionem suam, in omnia membra sua, qui sunt credentes in ipsum: iuxta illud: De plenitudine eius accepimus omnes. Quare, cum hunc Psalmum recitamus, anmoneamur de beneficijs, quæ possidemus in Christo per fidem: vt quicquid aduersi, siue paupertas, siue fames, siue morbus, siue mors acciderit, in Christo acquiescamus. Deinde, hic Psalmus concionatur in posteriori parte de abiectioe Iudæorum ex ecclesia

Rom. 11.

Dei, & excecatione eorum propter incredulitatem. Meminerimus ergo nos, qui sumus ex Gentibus, illud Pauli ad Rom. Ne efferaris animo, sed timeas. Nam si Deus naturalibus ramis non pepercit, vide, ne quā fiat, vt nec tibi parcat.

Psalms 22.

Deus meus, Deus meus, vt quid me deseruisti?

*Matth. 27.*

Nihil est manifestius, nihil certius, quā quod hic Psalmus concionetur de passione, morte, resurrectione & regno Christi, nec sit de alio quā de Christo ipso intelligendus. Extant enim de hac eius sententia, perspicua in Apostolicis scriptis testimonia. Christus ipse clamat in cruce ad Deum patrem suum, verbis primi in hoc Psalmo versiculi: Deus meus, Deus meus, quare me deseruisti? Et Matthæus: Postquā crucifixerunt eum, inquit, diuiserunt vestimenta eius, sortem mittentes: vt impleretur, quod dictum est per Prophetam: Diuiserunt sibi vestimenta mea, & super vestem meam miserunt sortem, hic est decimus octauus huius Psalmi versiculus. Ac iterum: Principes, inquit, sacerdotum, illudentes cum scribis & senioribus, dicebant: Alios seruauit, seipsum seruare non potest: Si rex Israel est, descendat nunc de cruce, & credimus ei: Confidit in Deo, liberet eum nunc, si vult eū. Hæc sunt verba illa, quæ

quæ in octauo huius Psalmi versiculo recitantur. Et Epistola ad Heb. cap. 2. de Christo scribens: Non erubescit, inquit, fratres illos vocare, dicens: Annuntias bonomen tuum fratribus meis: in medio Ecclesię laudabo te. Hic est vicesimus secundus in hoc Psalmo versiculus. Quare, etsi Rabini Iudæorum & asseclæ eorum fingunt aliam interpretationem, tamen Apostolica testimonia debent nobis esse certiora & firmitiora, quàm si angelus de cœlo, nedum vanus quispiam Rabinus, & excæcatus Iudæus nobis aliud somniaret.

Continet autem hic Psalmus quatuor præcipuè partes: Vna est querela, cum commemoratione grauissimarum afflictionum, quæ Christo in passione sua contigerunt. Altera est precatio pro liberatione ex ista passione. Tertia est gratiarum actio. Quarta est vaticinium de amplitudine regni Christi, & de vocatione Gentium ad Ecclesiam populi Dei.

1. *Deus meus, Deus meus, quare deseris me? vociferor quidem, sed longè abest à me salus.*
2. *Deus meus, inuoco interdum, ac ne noctu quidem sileo.*
3. *Cum tamen tu sis sanctus, habitans inter laudes Israelis.*

Inter omnia miracula & oracula, quæ diuinitus ædita sunt, non est fere insignius, quàm vaticiniũ David de passione & resurrectione Christi in hoc Psalmo. Dauid enim non solum prædicit in genere, Christum suo tẽpore passurũ, et grauissimas afflictiones subiturũ, verum etiam addit certas circumstantias, recitat verba ipsa Christi, Deũ patrem in extremis suis periculis inuocantis: commemorat expressè amarulentæ conuicia, quibus inimici insultaturi erant ærumnis Christi.

Christi: Sperauit in Domino, eripiat eum, saluū faciat eum, si vult eum. Recenset lusum & sortem militū de vestimentis eius, adeoq; genus ipsum mortis aperte designat: Foderunt, inquit, manus meas, & pedes meos, idq; prædicit, ante mille, plus minus annos, quam Christus nasceretur. Hoc certè nō est hominis, quamuis prudentis, nec dæmonis, quamuis astuti: sed sancti Spiritus, hæc oracula ex ipsissimo Deitatis sinu depromentis. Quare magnificiamus hunc Psalmum, & reponamus eum inter ea *reuerentia*, quæ habemus non è terra, ex qua effodiuntur opes, malorum irritamenta, sed è cœlo, ex quo sunt æternorum bonorum thesauri.

Ac initio, Christus captus, ad mortem à Concilio damnatus, illusus, consputus, percussus, flagellis dilaceratus, spinis coronatus, crucifixus, manus & pedes confusus, virulentissimis conuicijs ab omni hominū genere, adeoq; à latronibus quoq; proscissus, attollit caput ad Deum patrem suum, exclamat & conqueritur: Deus, inquit, meus, Deus meus, quid est, quod me in tantis, & tam horrendis afflictionibus deseris? Vbi est paternus tuus erga me affectus? vbi sunt antiquæ tuæ, & omnibus seculis decantatæ misericordiæ? Ego quidem vociferor ad te toto corde, sed quò magis vociferor, eò longius videtur à me recedere salus. Ego hætenus te diu noctuq; inuocaui, & adhuc quo possum animi ardore inuoco: sed manifestam patior repulsam: cum tamen tu sis sanctus, & habites seu commoreris inter laudes Israelis.

Hic obserua primum, quod vbi nos transtulimus: Vociferor quidem, sed longè abest à me salus, ibi verus interpres habet: longè à salute mea, verba delictorum

florum meorum. Hic sermo non competit in Christus: nulla enim habet Christus delicta, peccatum non fecit, nec est inuentus dolus in ore eius. Et si autem descendere posset, è Psal. 69. DOMINE, tu scis insipientiam meam, & delicta mea non sunt à te abscondita, vides licet, quod Christus non habuerit delicta, quæ ipse fecit, sed habuerit aliena, quæ expianda suscepit: tamen nihil opus est hac excusatione, quia error veteris interpretis manifestus est. Cum enim pro (delictorum meorum, quibus verbis interpret vsitur) apud Hebræos habeatur, שַׁאגַּתִּי Schaagathi, quod significat rugitum, seu vociferationem meam, interpret legit, שַׁגַּתִּי Schagathai, quod significat delicta mea. Sequamur igitur, non quod interpret somniauit, sed quod Hebræa veritas habet.

Deinde quæritur, quid sit, quod dicit: Tu es sanctus, habitans inter laudes Israël. Ac alij quidem aliter interpretantur. Vera autem sententia eius petenda est ex ijs locis scripturæ, in quibus Deus dicitur sanctus Israël, qui ex omnibus gentibus elegerit Israël, in suam Ecclesiam: & commendetur summis laudibus, quod omnes preces Israël exaudiat. Apud Esaiam cap. 43. Ego DOMINVS, (inquit) Deus tuus sanctus Israël saluator tuus. Ex quo facile intelligitur, Deum idcirco dici sanctum Israël, quod postea habitis reliquis Gentibus adiunxerit & addiderit se se populo Israelitico: & quemadmodum Deus sanctificauit, & consecrauit se huic populo, vt sit Deus saluator ipsorum, & velit omnes preces eorum exaudire, ita vicissim exigit, vt hic populus sanctificet se ipsi vera præceptorum eius obedientia. Non est alia

C (inquit

(inquit Moses, Deut. 4.) natio tam grandis, quæ habeat Deos appropinquantes sibi, sicut Deus noster adest cunctis deprecationibus nostris. Et cap. 7. Populus sanctus es DOMINO Deo tuo. Te elegit DOMINVS Deus tuus, vt sis ei populus peculiaris, de cunctis populis, qui sunt super terram. Ac rursus cap. 10. En DOMINI Dei tui cælum est, & cælum cœli, terra & omnia quæ in ea sunt. Et tamen patribus tuis CONGLUTINATVS est (hoc est esse sanctum Israël) DOMINVS: & amauit eos, elegitq; semen eorum post eos, (hoc est) vos, de cunctis gentibus. Ac iterum cap. 14. Populus sanctus es DOMINO Deo tuo, vt sis ei in populum peculiarem, de cunctis gentibus, quæ sunt super terram. Huius igitur dicti: Tu autem sanctus, habitans inter laudes Israël, sententia hæc est: Tu quidem DOMINE Deus meus, sanctificasti & addixisti te in Deum saluatorem Israëlitico populo: ac celebraris continenter in hoc populo summis laudibus, quod elegeris ipsos in tuam veram Ecclesiam, & promiseris te omnes preces ipsorum exauditurum: Inuoca me, inquit alias, in die tribulationis, exaudiam te, & honorificabis me. ego autem nihil prorsus talium rerum in me experior: clamo ad te, sed non audis: inuoco te, diu nec tuq; sed inuocationem meam surda aure transis, vbi ergo manet laus tuæ sanctitatis? vbi fama promissionum tuarum veritatis? vbi gloria tuæ clementiæ, quæ de te in vniuersa ecclesia vbiuis prædicatur? Accedit illud grauamen, quod patiar repulsam, non simpliciter, sed sine villo maiorum nostrorum exemplo. Sic enim sequitur.

4. *Inte sperauerunt patres nostri : sperauerunt , & liberaſti
eos.*
5. *Ad te clamauerunt , & ſeruati ſunt , inte ſperauerunt ,
& non ſunt pudefacti.*
6. *Ego autem ſum vermis & non homo , opprobrium homi-
num, & deſpectio plebis.*

Si haberem exemplum alicuius Patriarchæ, qui inuocasset Deum, & nō fuiſſet exauditus, multo æquior animo ferrem, quod nec ego exaudirer: non nihil enim ſolatiū eſt miſeris, habere miſeriæ ſuæ ſocios. Nūc autem, δ extremam calamitatem, quocunq; circumſero oculos inter Patriarchas, non inuenio vllum, qui ſic ſpe ſua ſit fruſtratus, & in precibus ſuis pudefactus, vt ego. Concluſerat quondam Deus omnem matris *Gen.20.* domus Abimelech, Regis Geraræ, propterea quod rapuerat Patriarchæ Abrahamæ Saram vxorem: ſed orante Patriarcha, Deus ſanauit omnes mulieres regis, vt parerent.

Laban ſocer Patriarchæ Iacobi perſequitur *Gen.31.* rum, infeſto animo. Eſau frater Iacobi procedit fra- *Gen.32.* tri obulam, cum quadringentis viris: quo metu Iacob ita contremiſcit, vt arbitretur ſe & familiam ab irato fratre oppreſſum iri. Inuocauit igitur in aduerſis ſuis DOMINVM: ac in tantum non eſt pudefactus, vt tam ſoceri quàm fratris infeſti animi, in ſummam, diuino beneficio, beneuolentiam mutarentur.

Ioseph conijcitur ex falſa adulteræ accuſatione in *Gen.37.* carceres: in quibus, cum inuocaret DOMINVM, ita ſeruatus eſt, vt ex ipsis, maximo nominis ſui honore, ad principatum Ægypti educeretur.

*Exod. 7. & reli-
quis capitibus.*

Exo. 14.

Quoties, obsecro, Moses intercessit apud DOMINUM pro Pharaone, quamuis impio, ad tollendas plagas, Aegyptijs diuinitus immissas, & factus est voti sui compos? An non, cum clamaret ad DOMINUM, in extremis illis periculis, quibus vnà cum populo suo, inter Aegyptios & mare rubrum comprehendebatur, affecutus est tam mirandam liberationem, vt potius rerum natura necesse habuerit inuerti, quàm vt vanæ essent preces eius?

Ios. 10.

Quid dicam de Iosua? Hic clamauit ad DOMINUM, in praelio aduersus Amorrhæos: & DOMINVS tanta promptitudine affuit clamori eius, vt solem & lunam tantisper à cursu suo cohiberet, dum hostes populi Dei vincerentur.

1. Reg. 7.

In priori libro Samuelis, non cessat Samuel clamare ad DOMINUM pro Israëlitis, vt liberet ipsos de manu Philisthinorum. Ecce igitur tibi stupenda: Samuel clamat ad cælum, & DOMINVS confestim tonat de cœlo, ac hostes ita exerret, vt etsi conijciunt se in pedes, tamen non euadant.

Psal. 33.

Quid Dauid? Toties ad inuocationem nominis Dei seruatus est in extremis periculis, vt se etiam in exemplum proponat: Exquisiui, inquit, DOMINUM, & exaudiuit me: & ex omnibus tribulationibus meis eripuit me. Accedite ad eum, & illuminas mini: & facies vestrae non confundentur. Iste pauper clamauit, & DOMINVS exaudiuit eum, & de omnibus tribulationibus eius saluauit eum.

Longum esset, omnia Patriarcharum exempla commemorare, quibus probatur, quòd cum sperassent & clamassent ad Deum in aduersis, mirando modo sint liberati.

liberati. Quid autem de me sit, inquit Christus: Tantū abest, ut clamor meus exaudiatur, & spe mea fruatur, ut Deus videatur minorē mei rationem habere, quā abiectionis vermiculorum. Non reputor homo, sed vermis: non computor in aliquo hominum numero, sed sum reliquorum hominum opprobrium, perisphema, catharma, despectio & excrementum. Ex hoc versiculo concionatur etiam Esaias de Christo: Non est ei, inquit, species, neque decor: vidimus eum, & non erat eo aspectus, ut desideraremus eum, sed erat despectus, virorum novissimus, adeoque vir dolorum, omni infelicitatis genere obrutus.

Sciamus igitur, quid Christo acciderit, quod in suis adversis tam miserabilem querelam instituat, ut etiam videatur cum Deo patre suo impatientissime expostulare. An non est longē alia conditio Christi, quā aliorum hominum? Christus enim non est filius tantum hominis, sed etiam filius Dei. Ac si quis dem consideraeris Christum filium Dei, iuxta æternam suam diuinitatem, qua vna est essentia cum Deo patre & Spiritu sancto, quomodo convenit ei hic clamor: Deus meus, Deus meus, quare me deseris? cum iuxta hanc diuinitatem, omnia tam in cælo, quā in terra impleat: nec ullam creaturam, nedum Christum, deserat, quippe quod quæ Deus sua essentia deserit, mox in nihilum redeant. Si autem consideraeris Christum, iuxta eam diuinitatem, quæ statim in assumptione & conceptione humanitati eius ab æterno filio Dei communicata est, ne sic quidem dici potest, quod Deus eum deseruerit. Etsi enim maiestas huius diuinitatis non fuit coram hominibus, ab initio conceptionis

A^{tho.} 2.

ceptionis eius manifesta , tamen nunquam ei defuit. nec tum primum factus est DOMINVS & Christus, sicut Petrus loquitur, cum ascendit visibili spectaculo in cœlum , & dicitur ad dextram Dei consedisse: sed iam inde ab initio conceptionis , quo assumptus est à filio Dei in eandem personam , semper habuit maiestatem dominationis in cœlo & in terra : semperq; fuit verus Christus: nec vnquam desijt esse DOMINVS & Christus. Quomodo igitur nunc vociferatur, se à Deo desertum? Explicatio huius rei petenda est ex Paulo , qui ad Ephes. cap. 4. scribens : Illud, inquit, ascendit, quid est, nisi quod etiam descenderit prius in inferiores partes terræ? Et ad Philipenses cap. 2. Christus Iesus, quum esset in forma Dei, non rapinam arbitratus est, vt esset æqualis Deo: sed semetipsum inaniuit, forma serui sumpta, in similitudine hominum constitutus, & figura repertus, vt homo, humilem præbuit semetipsum, factus obediens vsque ad mortem, mortem autem crucis: Et ad Hebræ. cap. 2. Debuit per omnia fratribus similis reddi, vt misericors esset, & fidelis pontifex, in his, quæ apud Deum forent agenda, ad expiandum peccata populi. Nam ex hoc, quod ipsi contigit tentatum esse, potest & ihs, qui tentantur, succurrere. Ac mox cap. 4. Non habemus Pontificem, qui non possit affici sensu infirmitatum nostrarum, sed tentatum per omnia, iuxta similitudinem, absque peccato. Hæc Apostolica testimonia proponunt nobis Christum, duplici ratione intuendum. Altera, quod sit in forma Dei, hoc est, quod ab initio conceptionis suæ in virgine Maria assumptus sit, sicut Athanasius loquitur, in Deum,

Deum, & ornatus sit omni diuina maiestate : vt esset omnipotens, & omnium rerum tam in cœlo quàm in terra gubernator, quod est sedere ad dextram Dei patris sui. Hac maiestate Christus in humanitate sua nunquam caruit: sed semper eam retinuit, ac retinebit eam perpetuò. Altera, quòd inaniuerit sese, quòd sumptuerit formam serui, quòd descenderit in inferiores partes terræ, quòd per omnia factus sit (absque tamen peccato) fratribus similis: & suscepit in se omnes humanas imbecillitates, ac dolores: denique mortem ipsam, eamq; non simplicem, sed longè omnium probrosissimam. Quare cum vociferatur in cruce, se à Deo desertum, non loquitur iuxta formam Dei, & maiestatem diuinam, qua iam inde à conceptione in utero virginis ornatus fuit, ac nunquam ab ea desertus: sed iuxta formam serui, quam in diebus carnis suæ, dissimulata maiestate, assumpsit: iuxta quam serui formam, verè dicitur à Deo desertus, propterea quòd Deus non fuerit visus ipsum externo, & mirando modo in aduersis suis iuuare, sicut quondam iuuerat Patriarchas, videlicet, Mosen, Aheronem, Iosuam, & Chaleb, quos iam ab Israëlitis lapidandos protexit DOMINVS gloriosa & admirabili apparitione sua super tectum tabernaculi. Similiter Prophetam, quem rex Hieroboam iubebat, extensa manu, apprehendi: sed manus regis, diuina vltione, continuo exaruit. Et Eliam, quem cum quinquagenarij, iuxta mandatum regis Achazizæ, capiendum susciperent, descendit ignis de cœlo, & deuorauit eos. Adhæc, Elizeum, quem Deus, ira defendit, vt exercitus Syrorum, qui ad capiendum

Num. 14.

3. Reg. 13.

4. Reg. 1.

4. Reg. 6.

dum Prophetam missus erat, percuteretur cæcitate, nec agnoscerent Prophetam coram astantem, donec in Samariam, hoc est, in manus suorum hostium, adducti essent. Dies me deficeret, si vel paucis enumerare vellem omnia exempla Patriarcharum, quos **D O M I N U S** mirando modo, in summis suis periculis, seruauit. Non seruauit autem vlllo tali miraculo Christum filium suum: conuiuit enim vt caperetur, vt flagellaretur, vt crucifigeretur, vt extremis conuicijs proscinderetur, vt morte quoq; ipsa afficeretur, quare verè dicitur, iuxta hanc serui formam, à Deo desertus. Assumpsit autem hanc formam, non sua aliqua necessitate, sed spontanea voluntate: non simulate, sed verè, nō frigide, sed summo, & humilitatis & doloris, gradu, vt ex vna quidem parte peccata nostra hoc dolore & supplicio coram Deo expiaret, & reconciliaret nos cum ipso: ex altera autem parte, vt ex hoc, quod ipsi contigit tentatum esse, possit & ijs, qui similiter tentantur, succurrere. Quare cum in summis doloribus & afflictionibus clamamus ad Deum, & non vides mus nos, exemplo Patriarcharum, mirandis modis liberari, sed potius morte ipsa obrui, non despondeamus animum, sed benè, etiam in morte confidamus, quòd Christus filius Dei in eodem luto, vt prouerbio dicitur, hæserit, & nobis in ipsum credentibus veram salutem impetrauerit.

7. *Omnes, qui me vident, derident me, deducunt labium, & mouent caput.*
8. *Deferat ad D O M I N U M, seruet eum, liberet eum, si placet ipsi.*

Aliud

Aliud genus ærumnæ, alia forma serui. Christus enim, non solum non exauditur in precibus suis, sicut Patriarchæ exauditi sunt & liberati, verum etiam tractatur ab omnibus spectatoribus contumeliosissime, & habetur summo ludibrio: Omnes, inquit, qui me vident, derident me: ac diductione labiorum & motu capitis, palam testificantur, se extremo contemptu me fastidire & abominari. Ac ne quidem se à blasphemis verbis abstinere. Exprobrant enim mihi, non scelera aut flagitia, quorum ne vnum quidem in me inueniunt: sed pietatem & benefacta. Dixi in concionibus meis, quod pater diligit filium, & omnia demonstret *Ioan. 5.* ei: dixi, quod descenderim de cœlo, ut faciam, non *Ioan. 6.* quod ego volo, sed quod vult is, qui misit me: dixi, *Ioan. 8.* quod ex me ipso faciam nihil, sed ita, ut docuit me pater meus, hæc loquor. Ac iterum: Est pater meus, qui glorificat me, quem vos dicitis Deum vestrum esse. Hæc certe summa est pietas, omnia sua Deo patri accepta ferre, & ei soli confidere, ac solius nominis eius gloriam illustrare. Sed tanta est Pontificum & Phariseorum impietas atque crudelitas, ut etiam hanc pietatem mihi summi probri loco obijciant. dicunt enim: Gloriatuſ hactenus est, se habere Deum propitium, Deum esse suum patrem, Deum a parte sua stare & defendere ipsum. Age igitur, si res ita se habet, quid est, quod Deus non eripiat ipsum, quod ipsum in tantis malis deferat, quod non efficiat, ut descendat de cruce, & euadat e nostris manibus? Hæc inſitio obſeruemus, re ipsa comprobari, quod Paulus in Antiochia Pisidiæ Act. 13. concionatur: Qui habitabant, inquit, Hierosolymis, & principes eorū, quum ignorarent illum,

D

& voces

Matth. 27.

& voces Prophetarum, quæ per omne sabbathum les-
guntur, condemnato eo impleuerunt, nullaq; causa
mortis inuenta, petierunt à Pilato, vt interficerent il-
lum. Rem miram, Pontifices & Pharisei videbāt no-
ctu diuq; prophetica scripta de Christo, ac imprimis
hunc Psalmum, in quo hæc verba extabant: Sperauit
in DOMINO, seu detulit ad DOMINVM, (sua om-
nia) eripiat eum, saluum faciat eum, si vult ipsum: &
tamen tanto fuerunt stupore, vt ignorantes hoc vatis-
cinium impleuerint, ac iisdem penè verbis, quæ hîc
recitantur, contumeliosi fuerint in Christum: cum in-
terim existimauerint se Deum religiosissimè colere.
Timeamus igitur DOMINVM, ne in tantam conijcia-
mur cæcitatem, & mentis furorē, vt arbitremur sum-
mum esse Dei cultū, quod Spiritus sanctus in scriptu-
ra manifestè pronuntiat summam esse in Deum con-
tumeliam & impietatem. Deinde cōsideremus, quòd
hæc conuitia non sonuerint tantum in auribus Chris-
sti, verumetiam penetrauerint ossa & medullas eius,
nec aliter, imò longè vehementius fuerit affectus, (sed
absq; peccato) quàm David, cum audiret à Simei, Vir
sanguinum, & vir Belial. Debuît enim, quemadmo-
dum paulò antè dicebamus, fratribus per omnia simi-
lis reddi, vt & peccata populi expiaret, & similiter
tentatis succurrere posset.

9. Quoniam tu es, qui me extraxisti de ventre, fiducia mea.
ab vberibus matris meæ.
10. In te proiectus sum, ab utero, à ventre matris meæ, tu es
Deus meus.
11. Ne longè recedas à me, quoniam tribulatio proxima est:
nec est alius quispiam adiutor.

Querelæ

Querelæ & commemorationi duarum afflictio-
 num addit precationem. Quid enim? Primum Deus
 non exaudit inuocationem Christi: ac ne talem quis-
 dem fauoris significationem ostendit, qualem Patriar-
 chis exhibuit. Deinde conuiuet ad virulentissima
 probra, & ludibria, quibus Pontifices & Pharisei in
 Christum grassantur. Quid igitur faciat Christus?
 num despondeat animum de clementia DOMINI?
 num abijciat omnem spem salutis suæ? Nihil minus:
 Tu es (inquit) qui extraxisti me de ventre, ab eo tem-
 pore, quo in vtero matris de Spiritu sancto homo cōs-
 ceptus, & ab æterno filio Dei in eandem personam as-
 sumptus sum: etsi tum confestim ornatus fui forma
 Dei, & collocatus in omni diuina maiestate, vt potus-
 issem eam publicè coram vniuerso mundo ostentare,
 & e ventre matris mirando modo, ac gigantea statura
 exilire, dominationemq; cœli & terræ ineffabili vir-
 tute inuadere, tamen sumpsi mea sponte formam ser-
 uī, in qua tu DOMINE Deus meus, me summa semper
 clemētia defendisti & seruaisti. Tantæ enim curæ tibi
 fui, vt me in ventre matris illæsum conseruaueris: in
 natiuitate sine vlllo vel matris vel meo incommodo in
 hanc lucem eduxeris: angelos, qui meam natiuitatem
 pastoribus adnuntiarent, miseris: parentes vt me fu-
 rori Herodis fuga subtraherent, per angelum admo-
 nueris: Magos ex oriente, vt me thesauris suis, ad sus-
 ferendum exilium donarent, excitaueris: & ex Ægy-
 pto, hortatu angeli, incolumem reduxeris: adeoque
 me semper singulari studio in infantia, pueritia, &
 adolescentia protexeris, & ex omnibus periculis li-
 beraueris. Quibus argumentis palam testificatus es,

quod sis verè Deus meus, summo me fauore complexus. Quomodo igitur nunc, postquam ætate processisti, & factus sum vir, non in te sperarem, non omnem meam fiduciam in te collocarem? præsertim cum hoc tempore proxima mihi sit summa afflictio, & obruar extremis periculis: nec sit alius quispiam vel in cœlo vel in terra, qui me possit iuuare, præter te DOMINUM Deum meum. Quare oro & obtestor, ne opem tuam longius à me subtrahas, sed eam mihi præsentissimam exhibeas. Tria hîc argumenta nobis subministrantur, quibus spes in aduersis est alenda, conseruanda & confirmanda atq; augenda. Vnum est, præteritorum beneficiorum recordatio. Nam, si Deo fuimus curæ, cū adhuc essemus in vtero matris, & ferremur, quò libet, rerum omniū ignari, in infantia & pueritia, quomodo abiiecisset curam nostri, in adolescentia, in virili ætate, & senectute? Fateor, fuimus sæpè ingrati in Deum benefactorem, & reiecimus clementiā eius, peccatis nostris: sed ipse propter nostram ingratitudinem, non reiecit perpetuam suam naturam & ingenium, quo non est nisi bonitas, philanthropia, & misericordia, quam præstabit omnibus ijs, qui agnoscunt Christum filium suum, & reuertuntur ad ipsum. Quare non est dubium, quin priora Dei beneficia confirmant spem nostram de futuris beneficijs, si in Christo constiterimus, aut ad ipsum reuersi fuerimus.

Huc facit, quod penè iisdem verbis in Psalmo 71. dicitur: Deus meus eripe me de manu impij, de manu iniqui & tyranni. Quia tu es fiducia mea DOMINE, DOMINE spes mea à iuuentute mea. In te confisus sum, ab vtero matris meæ: tu. extraxisti me de ventre matris

matris mee: te prædico semper. Ac statim additur: Ne abiicias ergo me in tempore senectutis, cū defecerint vires meæ, ne derelinquas me. Et Psalm. 139. Confitebor, seu gratias ago tibi, quod mirabiliter formatus sum: mirabilia sunt opera tua, id quod anima mea bene nouit. Non erant tibi occulta ossa mea, quando in abscondito formabar, quando fingebar infra in terra. Adhuc cum essem informis massa, videbant me oculi tui: & omnes dies mei, quorum nullus adhuc aderat, scripti erant in libro tuo, &c. Nec est Dauidi inusitatum, spem de futuris Dei beneficijs, ex præteritis cōfirmare. Cum aggressurus esset Goliathem: Leonem, ^{1. Reg. 17.} inquit, & Vrsū ego interfeci seruus tuus: erit igitur & Philistheus hic incircuncisus, sicut vnus ex eis. Ac mox: DOMINVS, qui eripuit me de manu Leonis & de manu Vrsi, ipse me liberabit de manu Philisthæi huius. Dauidis exemplū sequitur etiam Paul. 2. Cor. 1. Sententiā mortis, inquit, acceperamus ipsi, in nobis ipsis, ne cōsideremus in nobis ipsis: sed in Deo, qui ad vitā suscitāt mortuos, qui ex tanta morte eripuit nos, & eripit: in quo spē fixam habemus, quod etiam post hac erepturus sit, &c. Hinc est & illud ad Rom. ca. 15. Quæcūq; præscripta sunt, in nostram doctrinā præscripta sunt, vt per patientiam & consolationem scripturarum, spem habeamus. Alterum argumentū est, quod dicit: Tribulatio proxima est. Confirmat & hæc particula spem nostram in aduersis. Extant enim promissiones Dei, & exempla, quibus Deus testificatus est, se ope sua eō propiorem esse & promptiorem, quod grauior & acerbior est afflictio. Vetus dictum est: Tunc venit Moyses, cum duplicantur lateres, hoc est,

liberatio in propinquo est, cum aduersa in summum peruenerunt. Et Psal. 34. Iuxta est DOMINVS ijs, qui tribulato sunt corde: & humiles spiritu saluabit. Et apud Esa. cap. 66. Ad quem, inquit DOMINVS, respiciam, nisi ad pauperculum, & contritum spiritu, & tremementem sermones meos: Tantum igitur absit, ut magnitudo afflictionum reddat spem nostram imbecilem, ut potius eam confirmare debeat: quod, quod maior est afflictio, eo propior sit salus DOMINI. Tertium est, quod addit: Non est alius quispiam adiutor. Tunc enim excitatur Deus ad ferendam opem, cum soli ipsi tribuitur gloria liberationis & redēptionis. Etenim tantisper solet Deus manum retrahere, dum aliunde nobis adhuc spes liberationis affulget. Postquam autem omne terrenum auxilium cessauerit, tum praesto adest coeleste: & si desierit humanum, incipit diuinum. *1. Reg. 23.* Dauid queritur à Saule ad mortem, & cingitur ab exercitu eius in modum coronae, ut desperaret, se posse euadere: sed ecce, diuinum auxilium, ubi non apparebat amplius humanum. Auocatur enim Saul à persecutione Dauidis repentino nuntio, quo retrahitur ad persequendos Philisthaeos. Maria virgo versabatur in summo infamiae periculo, cum à sponso suo insimularetur adulterij: nec videbatur vlla humana defensio. ecce igitur tibi praesto adest angelus ex coelo, qui Iosepho rei gestae veritatem exponat, & innocentem virginem suspitione stupri liberet. Sciamus igitur, coeleste auxilium tum in propinquo esse, cum periculum eo peruenerit, ut verè & seriò agnoscamus & exclamemus: Non est alius adiutor, nisi tu DOMINE Deus noster.

12. *Circundant me tauri multi, prauallidi (boues) ex Basan circumuallant me.*
13. *Aperiunt super me os suum, (sicut) Leo rapiens et rugiens.*
14. *Sicut aqua effundor, dissoluuntur omnia ossa mea, cor meum liquefit, instar cere, in medio ventris mei.*
15. *Arescit, tanquam testa, fortitudo mea, & lingua mea adhaeret faucibus meis, ac in puluerem mortis reponis me.*
16. *Quoniam circundant me canes: congregatio prauorum obfidet me: confodiunt manus meas & pedes meos.*
17. *Numerare (possem) omnia ossa mea, & ipsi aspiciunt, ac inuentur me.*
18. *Diuidunt vestimenta mea inter se, & de tunica mea for-
tiuntur.*

Redit à precatione ad cōmemorationē afflictionū suarum. Nec opus est sollicita horum versiculorū interpretatione: quippe quòd historia passionis Christi, vt est ab Euangelistis descripta, sit perspicuus eorum cōmentarius. Et quod Euāgelistæ simpliciter sine vlla sermonis amplitudine de Pontificum & reliquorū Iudæorum furore ac sæuitia narrarunt, hoc isti versiculi grandius exponunt: Qui me persequuntur, & ad opprimendū me circundant, habent quidem speciem hominum, sed ferocia, furore, immanitate sunt tauri, nōq; non vulgares, sed quales pascuntur in regione Basan, qui vt sunt alijs, propter pingua pascua, saginas tiores, ita sunt etiam ferociore. Sunt & crudelitate Leones: nam quemadmodum Leo, cum prædam cepit, solet horribiliter rugire, ita persecutores mei, os suū nō aliter aduersus me aperiunt, quàm si vno impetu me essent deuoraturi. Sunt etiā tam impudentia,
quàm

quàm rabie canes; quòd sicut canes, nulla sunt verecundia, & circumdantes feram, grassantur in eà crudelissimè, ita persecutores mei illud vnũ agunt, vt me extremis conuicijs proscindāt, & dentibus suis dilaniēt.

Nec sunt pauci, & homines idiotæ, abiecti, ac imbelles: sed sunt multi, magni, potentes, ac etiam specie sanctitatis & autoritatis venerabiles. sunt Pontifices, sunt Synedrion, hoc est, cœtus ille, qui sunt successores illorum septuaginta seniorum, quibus Deus *Num. 11.* partitus est de spiritu Moysi: sunt cōcilium illud, quod repræsentat catholicam ecclesiam: vt quod ab his decretum fuerit, ex ore ipso Dei egressum videatur, nec alio habeatur loco, quàm Spiritus ipsius sancti oraculum. Ac sæuiunt, & grassantur in me, non simplici genere persecutionis, non verborum tantum anathematæ, sed adigunt me ad crucem, genus supplicij vt probrosissimum, ita etiam immanissimum. Fodiunt & affigunt cruci acutissimis clauis manus meas, & pedes meos. Ac breuiter, membra mea in cruce ita extendunt & distrahunt, vt liceret cuipiam omnia mea ossa dinumerare. Ipsi autem interea summa cum voluptate me intuentur, & doloribus meis delectantur. Et ne quid ærumnarum mihi desit, etiam vestimenta mea inter se partiuntur, & de tunica mea sortiuntur: vt mater & cognati mei ne vestibus quidẽ meis frui, & eas loco hæreditatis capere queant. Hinc fit, vt omnibus meis viribus destituatur. Et quemadmodum, si quis euertat vas plenum, effundit omnem aquam, quæ in eo continebatur: ita etiam horribilibus afflictionibus omnis virtus, omnis fortitudo mea exhauritur. Ac sicut cera à calore solis aut ignis liquefit, & dif-

fluit,

fluit, vt tandem euanescat: ita & cor meum intra me
 colliquefcit, & omnem vim suam amittit. Accedit &
 illud, quòd sicut testa ad colorē solis exposita, tota ex
 arefcere solet: ita his tantis & tam grauibus aduersis
 omnis vitæ meæ succus absorbetur: vt & lingua mea
 palato adhareat, & sermo deficiat. Quid multis opus?
 Ita sum affectus & afflictus, vt mihi non aliud expe
 ctandum sit, quàm vt in puluerem mortis, hoc est, in
 sepulchrum condar. Habes hypotyposin, qua passio
 Christi ita describitur, vt non narrari, sed geri videas
 tur. & tamen nulla sunt humana verba, nullæ simili
 tudines aut cōparationes, quibus magnitudo eius sa
 tis explicari possit. Lēctione aut horum versiculorum
 admoneamur primum de authore Psalmi. Cum enim
 clare & perspicue describat, mille plus minus annis,
 eas de Christo passiones, antequam gestæ fuerint, ma
 nifestum est, hanc descriptionem non esse humanum
 figmentū, sed e Spiritu sancto profecta sit, necesse esse.
 Prophete, inquit Petrus, vaticinati sunt de ventura in *1. Pet. 1.*
 nos gratia: scrutantes, ad quem aut cuiusmodi tempo
 ris articulū significaret, qui in illis erat spiritus Chris
 ti, qui, priusquam acciderent, testabatur venturas in
 Christum afflictiones, & quæ essent secuturæ, glori
 as. Admoneamur etiam de causa passionis Christi,
 videlicet, quòd Christus susceperit tam horribiles af
 flictiones, non sua aliqua necessitate, sed spontanea
 voluntate: vt nostra peccata coram Deo expiaret, &
 nos in gratiam Dei patris, e qua propter peccatū ex
 cideramus, reuocaret. Consideremus & illud, quòd
 voluerit tantam passionis grauitatem in seipso verè
 experiri, vt possit & nobis sic tentatis & afflictis suc
 E currere,

currere. Postremo excitemur meditatione magnitudinis afflictionum Christi, vt cohorrescamus ad omne genus peccati, & caueamus. Si enim tanta est peccati grauitas in conspectu Dei, vt nō potuerit expiari, nisi tam diro filij Dei supplicio, quis est ille furor, in peccatū tanta facilitate, impudētia, & procacitate ruere?

19. *Tu ergo D O M I N E, ne longè recedas, fortitudo mea, ad ferendam mihi opem, festina.*
 20. *Erue à gladio animam meam, de manu canis, vnicam meā.*
 21. *Salua me ex ore Leonis, & à cornibus Vnicornium libera me.*

Ab enumeratione afflictionum, iterum reuertitur ad precationem. Afflictorum enim asylum est precatio. Nec est opportunius tempus vel inuocandi Dei, vel impetrandi beneficia eius, quā tempus afflictionis. Deus enim affirmat se eis propinquum esse, qui tribulato sunt corde. Et Psal. 51. ait: Spiritum contritum esse sacrificium Deo, ac Deum non despiciere cor contritum & humiliatum. Dicit ergo Christus: Cum afflictiones meæ grauiores sint, quā vt humanis viribus ferri queant, quæso te, D O M I N E Deus pater, ne me tua gratia deferas, ac recedas: sed cum agnoscam te solum meā fortitudinem, meam potentiam, & salutem, ad opem mihi ferendam properes. Vides animam meam periclitari inter gladios, inter persecutiones hostium meorū. Vides vnicam meam, (hoc est) vitam meam, omnium aliorum auxilio destitutam, & è tua solius ope pendentem, rabiei Canum, ferociæ Leonum, & crudelitati Vnicornium expositam.

tam esse. Peto igitur DOMINE Deus noster, vt me si-
 ne diuturna mora his tantis malis clementer liberes,
 & cōserues. Dubitant autem nonnulli, quomodo hæc
 precatio conueniat Christo, qui cum aliis omnibus
 afflictis suam offerat opem: Venite, inquit, ad me
 omnes, qui laboratis & onerati estis, & ego refocilla-
 bo vos, hoc loco alienam ipse opem imploret? Sed
 quemadmodum in principio huius Psalmi cōquestus
 est, se a Deo desertū, ex forma serui, & inanitione: ita
 & nunc ex eadē forma, petit se a Deo iuuari. Et si enim
 fuit ab initio conceptionis suæ in forma Dei, sicut su-
 præ expositū est, nec indiguit alieno extra se auxilio,
 tamen, cum sumpsit formam serui, factus est nobis si-
 milis, vt & inuocauerit nomen DOMINI, & expecta-
 uerit opē eius. Deinde dubitant, quomodo sit a Deo
 exauditus, cū hostes eius videantur reportasse victori-
 am, & occiderint ipsum in cruce? Sed meminerimus,
 quod Epistola ad Heb. scribit: Cū Christus in diebus *Heb. 5.*
 carnis suæ (inquit) preces & supplicationes
 apud illū, qui poterat ipsum a morte seruare, cum cla-
 more valido obtulisset, exauditus est, pro reuerentia.
 Et si enim non est exauditus iuxta sensum carnis, quo
 Pontifices & Pharisei postulabant, vt descenderet de
 cruce, & receperant se tum in ipsum credituros: ta-
 men exauditus est iuxta sensum Spiritus sancti: vt
 moriendo mortem vinceret, & euaderet. Noluit de
 cruce descendere, sed voluit, quod & gloriosius & il-
 lustrius est, de sepulchro resurgere, & in summam
 sublimitatem extolli. Hæc est verè cœlestis victoria,
 quam hac precatione impetrauit: & qua non solum
 ipse fruitur, sed etiam nobis fruendam proposuit.

22. Narrabo nomen tuum fratribus meis, in medio ecclesie laudabo te.
23. Qui timent DOMINUM, laudate eum, omne semen Iacob glorificate eum: reuerentiamini ipsum omne semen Israel.
24. Quoniam non spreuit, nec despexit afflictionem pauperis, & non abscondit faciem suam ab ipso: & dum clamaret ad eum, exaudivit.
25. Te laudabo in ecclesia magna, vota mea reddam coram ijs, qui timent te.

Gratiam actus

A precatōne, quam non dubitat exauditam esse, transit ad gratiarum actionem. Precatus sum, vt DOMINVS eruat me ab ore leonis, a crudelitate hostium meorum. Et si autem morior in cruce, cōdor in sepulchrum, & descendo ad infernum: tamen DOMINVS non deserit animam meam (sicut habet Psal. 16.) in inferno: nec sinit, vt sanctus eius videat corruptionem: sed ostendit mihi viā vitæ, quia excitat me tertia die, & collocat me ad dexteram suam, vt habeam omnem potestatem in cœlo & in terra. Quid ergo gratitudinis retribuam DOMINO, pro omnibus ijs beneficijs? Narrabo, inquit, nomen tuum fratribus meis, & prædicabo te in vniuersa Ecclesia. Memorabile dictum: Primum enim Epistola ad Hebr. cap. 2. diligenter insuetur nomē FRATRVM, cum Christus dicit, se narraturum nomen Dei FRATRIBVS suis: Non erubescit, inquiens, vocare illos fratres. Et repetit idem nomen, cum apud Ioannem ad Mariam diceret: Noli me tangere, nondum enim ascendi ad patrem meum: sed vade ad fratres meos. Hoc est epitheton dulcissimū, quod.

36.2

Ioh. 20.

*Epistola beati Pauli
ad Rom. 8. & Titum 1.*

in medio Eccl.

*Qui sunt omnes
Iudei etc.*

quod non tantum Apostolis, sed etiam omnibus, qui per Apostolicum sermonem in Christum credunt, competit. Si enim efficimur per fidem fratres Christi, quid reliquum est, nisi ut eiusdem cum ipso hereditatis in coelo participes fiamus? Quod si filij, (inquit Paulus) *Rom. 8.* & haeredes: haeredes quidem Dei, cohaeredes autem Christi. Deinde, quod dicit, se nomen Dei narraturum fratribus, & DOMINUM in medio Ecclesiae, hoc est, in uniuersa ecclesia laudaturum, significat se Euangelium suum diuulgaturum per Apostolos in uniuersum orbem terrarum, & inter omnes gentes. Et quod hic futurum dicit, hoc etiam re ipsa praestitit, cum apud Matthaeum dicit: Data est mihi omnis potestas in coelis *Matth. 28.* & in terra, Euntes ergo, docete omnes gentes, &c. Et apud Marcum: Ite in uniuersum mundum, & praedicare Euangelium omni creaturae, &c. *Mar. 16.* Ac rursus apud Lucam: Eritis mihi testes, non solum Hierosolymis, verum etiam in uniuersa Iudaea, Samariaque, donec usque ad extrema terrae. Hortor igitur vos omnes, qui timetis DOMINUM, ac imprimis vos posteros Patriarchae Iacob, qui dictus est Israel, ut laudetis, glorificetis, & reueramini DOMINUM, hoc est, ut agnoscatis Euangelium Christi, & excipiat is ipsum fide: qua laude, qua gloria, qua reuerentia non potest DOMINO Deo nostro quicquam gratius, aut acceptius a nobis praestari. Hoc plane illud est, quod Petrus in Actis Apostolicis concionatur Israelitis: Vobis, inquit, facta est repromissio, & filiis vestris, & omnibus qui longe sunt, quoscunque aduocauerit DOMINUS Deus noster. Et iterum: Vos estis filij Prophetarum, ac testamenti, quod testatus est Deus ad patres

nostros, dicens ad Abraam: In semine tuo benedictionem consequentur omnes familiae terrae. Vobis primum Deus, cum suscitasset filium suum Iesum, misit eum benedicientem vobis, ita ut unusquisque vestrum conuerteret se ab iniquitatibus suis. Sed quid est, quod laudandus & glorificandus sit Deus ab omni semine Iacob, ab omni posteritate Patriarcharum? sequitur: Quia non spreuit, nec despexit afflictionem pauperis, & non auertit faciem suam ab ipso: sed exaudiuit clamorem & precationem eius. Hic afflictus & pauper est Christus DOMINVS noster: qui, sumpta serui forma, factus est obediens patri usque ad mortem crucis. Cum igitur in hac seruili forma, & in tanta afflictione inuocaret DOMINVM Deum nostrum, tantum abest, ut Deus ipsum repulerit, ut potius extulerit eum in summam sublimitatem, & dederit ei nomen super omne nomen, ut in nomine eius omne genuflectatur, quemadmodum mox sequitur. Contulit autem Deus tantam maiestatem in Christum, non ut solus ipse ea fruatur, sed ut eius etiam participes fiant omnes gentes, siue Iudaei, siue Ethnici, quotquot in ipsum credunt. Christus enim non terminauit sacrificium laudis, & vota sua (quae sunt praedicatio Euangelij) in vna tantum Israelitarum ecclesia: sed vulgavit ea in magna ecclesia tam Iudaeorum, quam Gentium: ut in omni gente, qui timet DOMINVM, & agnoscit Euangelium Christi, accipere possit illi.

Vritur autem nominibus Leuiticorum sacrorum, quibus tamen intelligit sacra seu cultus noui Testamenti, inter quos praecipuus est diuulgatio Euangelij
in to

*Christus non spreuit
afflictionem pauperis
& dedit ei*

*Christus non spreuit
afflictionem pauperis
& dedit ei*

In totum orbem terræ. In Leuitico enim cap. 7. des-
 cribuntur ritus hostiæ pacificorum, aut potius san-
 ctificatorum. Horum alia offeruntur pro gratiarum
 actione, alia voto aut sponte: carnes autem eorum nec
 totæ igni absumebantur, sicut in holocaustis, nec so-
 lis sacrificulis cedebant, sed suæ erant partes offerens-
 tium, ex quibus publica instituebantur conuiuia. In
 summis festis, aut regijs sacrificijs accedebant buccinæ,
 tympana, cantica, psalteria, & id genus alia music-
 ca, quemadmodum describitur 2. Regum 6. & 1. Para-
 lippo. 13. Fit & horum mentio in Psalm. 116. Tibi sa-
 crificabo hostiam laudis: & nomen D O M I N I prædi-
 cabo. Vota mea D O M I N O reddam coram omni po-
 pulo eius, &c. Hic autem Leuiticus cultus perageba-
 tur tantum in tabernaculo, seu templo, in quo collo-
 cata fuerat arca testamenti. Cum igitur Christus hoc
 loco dicat, se in gratiarum actionem, laudaturum D O-
 M I N V M, in ecclesia magna, & redditurum vota sua
 coram ijs, qui timent D O M I N V M, non sentit, se pro-
 more Leuitico oblaturum hostias pacificas, quemad-
 modum David & alij Reges, qui in angusto taberna-
 culo aut templo sua sacrificia obtulerunt, & Deum
 laudarunt: Sed laudabo, inquit, te in ecclesia magna,
 hoc est, inter omnes gentes, in toto orbe terrarum:
 & reddam vota seu sacrificia mea ex voto, non tan-
 tum coram vno populo Israel, sed coram omnibus,
 qui timent Deum, sine vlllo personarum respectu, si-
 ue sint circuncisi, siue incircuncisi. Hæc autem omnia
 describunt diuulgationem Euangelij in vniuersum
 mundum: vt quotquot siue ex Iudæis, siue Gentibus
 Euangelio credunt, salui fiant: quotquot autem
 non.

non credunt,condemnentur. De quo sacrificij genes
re concionatur DOMINVS etiam apud Malachiam
cap.1. Ab ortu,inquiens,solis vsque ad occasum,ma
gnum est nomen meum in Gentibus:& in omni loco
sacrificatur , & offertur nomini meo oblatio munda:
quia magnum est nomen meum in Gentibus , dicit
DOMINVS exercituum.

26. *Edent afflicti , & saturabuntur , laudabunt D O M I -
N V M , qui requirunt ipsum , viuet cor vestrum in
perpetuum.*
27. *Memores erunt , & conuertentur ad DOMINVM
omnes fines terræ , adorabunt coram te , omnes familie
gentium.*
28. *Quoniam DOMINI est regnum , & dominatur inter
gentes.*
29. *Edent , & adorabunt omnes pingues terræ , incuruabunt
genua ante ipsum omnes descendentes in puluerem , &
qui animam suam non viuificat.*
30. *Semen seruiet ei , prædicabit de DOMINO apud poste
ros.*
31. *Venient & adnuntiabunt iusticiam eius populo , qui re
nascitur , quoniam ipse fecit.*

Hactenus perstrinximus tres partes huius Psalmi:
quarum vna fuit querela Christi cum recitatione in
gentium calamitatum, quas Christus ad expianda pec
cata nostra perpeffus est. Altera est precatio Christi
ad DOMINVM , vt è tantis calamitatibus clementer
liberetur. Tertia est gratiarum actio, qua Christus res
cipit se ad testificandam animi sui gratitudinem, obla
turum

turum DOMINO hostiam laudis, & redditurum sacrificia ex voto suscepta, (hoc est) diuulgaturum Euangelion suum in vniuersum mundum: vt nomen DOMINI celebretur inter omnes gentes.

Nunc sequitur quarta pars, in qua regnum & maiestas Christi describitur. Consideremus igitur, quòd quæ hæcenus in hoc Psalmo recitauimus, verba sunt Christi, in forma, quam sua sponte sumpsit, serui, & in qua passionem suam ipse exposuit, & sustinuit. Postquam autem peruenit ad resurrectionem & reuelationem exaltationis suæ in summam maiestatem, ad dextram Dei patris sui omnipotentis, nō iam amplius loquitur in forma serui: sed Spiritus sanctus excipit verba eius: & pergit commemorare diuinam gloriam & maiestatem eius, ad quam è forma serui, etiam in hoc seculo, suo quodam modo, est euectus. Quare, quicquid in his sex versiculis, quos iam recensuimus, de DOMINO Deo nostro dicitur, intelligendum est de DOMINO nostro Iesu Christo, qui est verus Deus, nō lehoua, benedictus in secula. Repetit aut ex priorum metaphora sacrificij laudis, seu ex voto suscepti verbum Edendi. Solent enim in tali sacrificio, publica, & gaudij plena conuiuia celebrare, in quibus suæ sacrificij partes conuiuiis in cibum exhibebantur. Dicit ergo Spiritus sanctus: Ex hoc laudis & voti sacrificio, quod Christus DOMINVS pro gratiarum actione celebrabit: & quod est diuulgatio Euangelij in vniuersum mundum, edent: seu participes eius fient afflictī, ac saturabuntur: et quotquot requirunt DOMINVM, (hoc est) quotquot credunt in Christum, qui verus est DOMINVS Deus noster, summa laude celebrabunt

F eum,

eum, & corda ipsorum viuent, seu perpetuum gaudent,
ac felicitatem (hoc enim est vere saturari & viuere)
consequentur. Quotquot enim sunt afflicti vel agni-
tione peccatorum, vel magnitudine ærumnarum, vel
horrore mortis & inferni, & esuriunt ac sitiunt iusti-
tiam & liberationem, hi ex Euangelio Christi, si cre-
diderint, ita satiantur, vt reportent sempiternam vi-
tam ac salutem. Hoc planè illud est, quod alias Chris-
tus ait: Venite ad me omnes, qui laboratis & onera-
ti estis, & ego refocillabo vos. Et iterum: Patres ves-
stri comederunt manna in deserto, & mortui sunt. Hic
est panis ille, de cœlo descendens, vt ex ipso edat ali-
quis & non moriatur. Et mox: Si quis ederit ex hoc
pane, viuet in æternum.

Sed quid? num soli afflicti in Israël fient horum cœ-
lestium ac æternorum bonorū in Christo participes,
& exatiabuntur? Nihil minus, sed omnes fines terræ;
(sicut sequitur) & omnes familiæ Gentium, hoc est, ex
vniuersis gētibus, quæ sunt vsq; ad fines terræ, erunt;
qui prædicationem Euangelij alta mente reponēt, &
cōuertentur ad DOMINVM Iesum Christum: coram
quo procumbent, ac vt verum DOMINVM Deum &
seruatorem suum agnoscent & adorabunt. Ecclesia es-
nim Christi non est in vnum ludææ angulū conclusa:
sed colligitur voce Euangelij, ex omni natione, quæ
sub cœlo est. Nec mirum, quia DOMINI est regnum,
& ipse dominatur inter gentes, (hoc est) Iesus Chris-
tus verus est DOMINVS Deus noster, cui ad dextrā
Dei patris collocato data est omnis potestas in cœlo
& in terra: ideoq; data est etiam ei dominatio inter
omnes gentes: vt ex ijs ecclesiam suā colligat, & ætera
na fas

Math. 11.
Ioan. 6

Math. 28.

na salute seruet. Quare edent, seu participes fient beneficiorū Euangelij, et adorabūt Christū DOMINUM Deum, nō vnus tantum populus Israēliticus, sed primum, omnes pingues terræ, qui sunt Reges & Principes, ex his enim omnibus multi agnoscent Christū, & adorabūt eum, de quibus Psal. 72. ait: Reges Tharsis, & insulæ munera afferent, reges Arabum & Saba dona adducent: & adorabunt eum omnes reges terre, omnes gentes seruient ei. Et Esa. 49. dicitur: Erunt reges nutritij tui, & reginæ nutrices tuę. Et ca. 60. Ambulabunt gentes in lumine tuo, & reges in splendore ortus tui. Ac mox: Edificabunt filij peregrinorū muros tuos, & REGES eorum ministrabunt tibi, &c. Deinde non tantum adorabunt & incuruabunt ei genua pingues seu reges terræ, verum etiam omnes descendentes in puluerem, & qui anima sua nō viuunt, (hoc est) vel qui mortui in puluere, aut sepulchro iacent, et non viuunt amplius vita animali: vel qui oppressi iacent in ærumnis. et ducunt miseram vitam, vt Christo subiiciantur tam reges & principes, in hoc seculo sublimes, quàm homines priuati, idiote, abiecti et miseri: & tam viuentes in hac terra, quàm mortui in sepulchris. Omnino n. ex hoc loco Paulus sumpsisse videtur, quod ad Phi. cap. 2. de Christo scribit, datū esse ipsi nomen super omne nomen, vt in nomine Iesu omne genu se flectat, coelestium, terrestrium, & inferorum. Et ad Roman. cap. 14. In hoc (inquit) Christus mortuus est & resurrexit, & reuixit, vt mortuis ac viuens tibus dominetur. Et apud Ioan. cap. 5. Veniet hora, in qua omnes, qui in monumentis sunt, audient vocem eius, & prodibunt, &c. Cæterum, cum dicitur,

omnes reges & gentes adoraturos Christum, & ipsum dominaturum tam viventibus quàm mortuis, non significatur, omnes reges & gentes credituros in Christum, & omnes viuos ac mortuos consecuturos æternam salutem propter Christum: sed quòd inter reges & gentes, alij quidem amplectentur Christum fide, & consequentur in Christo veram felicitatem: alij aut, etiamsi videantur Christo resistere, tamen necesse habeant Christo subijci, & velint nolint permittere, vt Christus Ecclesiam suam ex ipsorum terris colligat, adeoque eo ipso, quo resistunt, regno Christi seruiant. Sanguis enim Christianorum, semen est Ecclesiæ, & Ecclesia, cum premitur, exurgit. Sic et de mortuis sentiendum, quòd Christus dominetur quidem omnibus mortuis, & mortui omnes sint virtute Christi a mortuis resurrecturi: nò autem omnes seruabuntur æterna salute: sed qui bona, inquit Christus ipse, fecerunt, prodibunt in resurrectionem vitæ: qui verò mala egerunt, in resurrectionem condemnationis.

Porro, suprà dixit Christus, se narraturum nomen DOMINI fratribus suis, & vota sua redditurum in Ecclesia magna, (hoc est) Euangelion suum diulgaturum in toto orbe terrarum, inter omnes gentes: vt gentes edant, saturentur, & adorent DOMINVM Christum. Qui ergo sunt illi, per quos Christus sparget Euangelion suum in vniuerso mundo? De his concionatur Spiritus sanctus in duobus vltimis huius Psalmi versiculis: Semen, inquit, seruiet ei, & prædicabit de Christo DOMINO omni posteritati. Semè autem illud est, de quo Esaïas cap. i. scribit: Nisi DOMINVS (inquit) exercituum reliquisset nobis semen,

men, quasi Zodoma fuisset, & quasi Gomorrha similis essemus. De quo etiam semine dicit Psalm. 45. Pro Patribus nati sunt tibi filij, constitues eos principes super omnem terram. Et Esaias iterum cap. 52. Quam pulchri super montes pedes adnuntiantis, & prædicantis pacem, adnuntiantis bonum, prædicantis salutem, dicentis Zioni: Regnat Deus tuus. Cum enim Christus DOMINVS diuulgaturus esset Euangelion suum in orbe terrarum, visum est ei ad hanc functionem emittere Apostolos, non ex Ethnicis electos, sed ex eo semine, ex quo ipse natus erat, & semine videlicet Abrahamæ, de quibus aliàs dicit: Non vos me *Ioan. 15.* elegistis, sed ego elegi vos: & constitui vos, ut eatis & fructum afferatis, & fructus vester maneat. Hi sunt Apostoli, de quibus Spiritus sanctus in his ultimis Psalmi versiculis concionatur, & qui seruiunt Christo in diuulgando Euangelio, & prædicant de Christo ad omnem generationem & posteritatem. Et si enim non semper manserunt superstites in hac mortali vita: tamen doctrina eorum collata est in scripta Apostolica: & sonat semper usque ad nouissimum huius seculi diem: Constitui, inquit, vos, ut eatis & fructum afferatis, & fructus vester maneat. Cum quibus verbis Christi conuenit prorsus sententia nouissimi versiculi: Venient, videlicet, Apostoli, & adnuntiabunt iustitiam eius: nimirum illam iustitiam, de qua Paulus Romanis scribens: Iustitia, inquit, Dei patet per Euangelion ex fide in fidem. Et iterum: Iustitia Dei per filium *Rom. 1.* dei Iesu Christi, in omnes & super omnes, qui credunt. *Cap. 3.* E quibus Pauli verbis habes etiam, qui sit populus ille, ad quem veniunt Apostoli, & adnuntiant ei iustitiam

Dei. Non enim est populus qui circumciditur externa circumcissione : sed qui renascitur, siue sit circumcissus, siue incircuncissus, non enim est distinctio, quippe quod omnes peccauerūt, ac destituuntur gloria Dei. iustificantur autem gratis per illius gratiam, per redemptionem, quæ est in Christo Iesu.

Quod autem in fine additur : **QVIA FECIT**, hanc habet sententiam. Quæcunq; Apostoli in orbe terrarum per prædicationem Euangelij perfecerunt, non sunt facta humanis viribus, sed diuina virtute **DOMINVS** ipse Iesus Christus hæc omnia **FACIT**. Etsi enim vsus est ministerio Apostolorū, tamen non deservit Ecclesiam, sed potius, quia assumptus est in Deum, & exaltatus ad dexterā Dei, Ecclesiam suam ipse coram, per Euangelion suum, colligit, gubernat, conservat, & auget: vt vnā cum ipso æterna beatitudine fruatur.

VSVS HVIVS PSALMI.

Cum hic Psalmus concionetur de passione, morte, resurrectione ac regno Christi, manifestum est, quod eadem sit vtilitas eius, quam afferunt nobis narrationes Euangelistarum de Christo. Et ostendimus etiam sparsim vsum eius, cum versiculos eius explicatione perstringeremus. Sed illud habet eximium & insigne, quod personam Christi disertissime describat, tam humilitate, quam maiestate sua. Nec dubito, quin Paulus hūc Psalmum ob oculos habuerit, & in epitomen contulerit, cum ad Philipenses cap. 2. scriberet: Is affectus sit in vobis, qui fuit & in Christo Iesu: qui quum esset in forma Dei, non rapinam arbitratus est,

ut sit æqualis Deo: sed semetipsum inaniuit forma serui sumpta. Et mox: Deus extulit illum in summā sublimitatem: ac donauit illi nomen, quod est supra omne nomen, &c. Quod enim Paulus paucis verbis de Christo commemorat, hoc Psalmus copiosè exponit. Tribuit autem vterq; vni Christo DOMINO nostro duas formas. Alteram, formam Dei, ad quam, etsi in incarnatione, cum ab æterno filio Dei assumeretur in vnā personam, euectus est: tamen non voluit eam, contra vocationem Dei patris, tempore carnis suæ ostentare, donec ministerium, ad quod peragendum, in hanc terram missus erat, absolueret. Alteram, formam serui, quam, tecta Dei forma, sua sponte sumpsit. Hanc serui formam describit Psalmus, cum recitat Christum clamasse: Deus meus, Deus meus, quare me deseris? Quid est, quòd preces meas nō exaudias, sicut preces Patriarcharum exaudisti? Vides me truculentis tauris, ferocissimis Leonibus, rabidissimis canibus circumdatum, qui in præsens meum exitum inhiant. Vides me virulentissimis conuicijs proscissum, vestibis meis spoliatum, manus & pedes ita perfossum, & distentum, ut etiam ossa mea numerari possent. Vides me ita viribus exhaustum, ut non aliud mihi reliquum videatur, præter mortem & sepulchrum. Et tamen tu taces, & ad hæc omnia conniues? Quò igitur me vertam? quid sperem? Habes formam serui, similitudinem, & schema hominis, quæ in hoc Psalmo ferè clariùs expressa sunt, quàm in scriptis ipsius Euangelistarum.

Formam autem Dei in Christo describit, cum vocat eum DOMINUM seu mōlehōa, & affirmat, ipse
 sius

sius esse regnum, & ipsum dominari inter gentes, ac omnes fines terrarum: & omnes familias gentium genua coram ipso flectere, & adorare. Nam hoc nomen *mn̄* Iehoua, nomen est super omne nomen. Dicitur verò Christus homo *mn̄* Iehoua, *DOMINVS* Deus, non quòd Deus impleat ipsum duntaxat, præsentia sua, & essentia, ac potētia, (sic enim implet omnes homines, imò omnes creaturas: & tamen nulla earum vocatur Deus,) sed quòd assumat ipsum in vnā personam: & collocet eum ad dextram suam super omnem principatum, & omne nomen in hoc & futuro seculo: ac transfundat in ipsum omnem diuinitatis suæ plenitudinem corporaliter, sicut Paulus loquitur. Hoc autem non est sic intelligendum, quòd tum primum acceperit hanc diuinā maiestatem, cum à mortuis resurrexit, & ascēdit externo spectaculo in cœlum, quem admodum antea admonebamus, & alijs copiosè exposuimus: quo enim tempore assumptus est in utero materno, à filio Dei in vnā personam, euectus est super omnes creaturas, & collocatus in æquali maiestate cum Deo. sed idcirco dicitur à resurrectione & ascensu ipsius in cœlum, intrasse in regnum suum, & consedisse ad dextram Dei patris sui, quòd tunc forma Dei, qua initio conceptionis suæ ornatus fuit, patefacta sit suo modo, & in toto orbe terrarum per Euangelion diuulgata: vt sciamus non esse alium verum Deum, nec in cœlo, nec in terra quærendum, præter Iesum Christum, natum ex Maria virgine, passum sub Pontio Pilato, crucifixum, mortuum, ac tertia die iterum à mortuis excitatum. In ipsa quidem diuinitate, sunt præter filium Dei aliæ duæ personæ,

sonæ, Pater videlicet, & Spiritus sanctus, in diuinitas
tis autem essentia, & maiestate, non est alius Deus, nisi
DOMINVS noster Iesus Christus.

Hæc cognitio de humilitate & maiestate Christi,
quæ in hoc Psalmo explicatur, necessaria nobis est ad
veram & æternam salutem. Postquam enim peccatum
intrauit in mundum per vnum hominem, ea est homi-
nis conditio, vt siue consideraueris ipsum secundum
generalem creationem, siue secundum peculiarem res-
generationem, obnoxius sit omnibus generibus males-
dictionis, tam corporalis, quàm spiritualis, tam munda-
næ, quàm æternæ. Si intuearis hominem, iuxta ve-
terem & generalem conditionem, sententia lata est:
Terra proferet tibi spinas & tribulos: puluis es, & in
puluerem reuertêris, & Omnes sumus natura filij ire.
Si autem intuearis eum iuxta nouam & specialem res-
generationem, tunc præter communes humani gene-
ris afflictiones, satan etiam peculiare excogitat ad-
uersus electos Dei. Stat enim sententia: Ecce mitto
vos sicut oves in medio luporum: Propter te morti
tradimur tota die: In mundo afflictionem habebitis.
& Per multas tribulationes oportet nos ingredi in
regnum Dei. In his verò tantis maledictionibus, mi-
serijs & ærumnis, non habemus alium adiutorem &
liberatorem, nisi DOMINVM nostrum Iesum Chris-
tum. Qui cum humiliauerit te obedientia sua vsq; ad
mortem, et tradiderit manus & pedes suos perfodiendos,
vt peccata nostra expiaret, palam testatum fecit,
se velle nos iuuare & seruare. Factus enim est fra-
tribus, in perferendis calamitatibus, similis, vt miser-
ticors esset, & afficeretur sensu nostrarum infirmita-
tum.

tum. Cum autem elatus & euectus sit super omnem principatum, super omne nomen, siue in hoc, siue in altero seculo, testatum fecit, se non tantum velle, sed etiam posse nos in omnibus aduersis, in morte denique ipsa, & inferni horroribus seruare. Hæc quia hic Psalmus de Christo perspicue concionatur, versemus eum diurna nocturnaque manu, & ediscamus eum ad verbum: vt quoties tentamur de salutis desperatione propter magnitudinem & grauitatem criminum, et propter horrores mortis ac inferni, habeamus promptuarium, è quo veram, præsentem & stabilem consolationem petamus.

Psalmus 23.

DOMINVS regit me, & nihil mihi deerit, &c.



Væcunque fuerit occasio huius Psalmi componendi, certè apparet, Dauidem insignem aliquam reuelationem à Spiritu sancto, de regno & maiestate promissi Christi accepisse: ex qua re, fide sua de cura Christi filij sui erga se ita confirmatus fuerit, vt non dubitauerit, etiam mortis ipsi medium (quod aiunt) digitum ostendere. Dicit enim in quarto versiculo: Etiam si ambulauero in valle umbræ mortis, non timebo malum: quoniam tu mecum es. Excipiamus igitur hunc Psalmum tanquam breue

breue compendium, quo recitantur maxima & summa beneficia, quę contingunt credenti, ex cognitione regni & maiestatis DOMINI nostri Iesu Christi.

1. *DOMINVS, pastor meus, nihil mihi deerit.*

In secundo libro Regū cap. 7. & in priori libro Paralip. cap. 17. promittitur Christus Davidi, quod sit ē posteritate sua venturus: Ego tuli te, inquit DOMINVS, filius Dei, (hic enim, quamuis nondum incarnatus, cum Patriarchis collocutus est,) cum in pascuis sequeris gregē, vt esses dux populi mei Israel. Et mox: Cum impleueris dies tuos, vt vadas ad patres tuos, suscitabo semen tuum post te, quod erit de filijs tuis, & stabiliam regnum eius: ipse ædificabit mihi domū: & firmabo solium eius vsq; in æternum, &c. Illud vult filius Dei dicere: Tu fuisti hactenus in adolescētia tua pastor ouium: ego autem feci ex te pastorem populi mei: sed nondum, nec tu nec populus ex isto pastoritio munere veram felicitatem assecuti estis. Quare promitto, me ex posteritate tua alium pastorem missurum, qui te ita gubernet, vt nihil tibi vnquam ad veram felicitatem sit defuturum. Ego enim ipse assumam semē tuum in vnā personam, & dabo ei omnem potestatem in cœlo & in terra: vt defendat & te, & vniuersam Ecclesiam populi mei in omnibus aduersis, in morte deniq; ipsa ad perpetuam beatitudinem. Hanc promissionem, vel initio dictam, vel postea renouatam & explicatam, David audiens, & quantum beneficiorum pręgnans sit, intelligens, tanto spiritus gaudio, tanta mentis lætitia gessit, vt

teneri nō potuerit, quin maxima animi fiducia & celestitudine in hunc Psalmum eruperit, & vel admirandi, vel gratias agendi causa, beneficia Christi commemorauerit: D O M I N V S, inquit, pastor meus: nihil mihi amplius defuturum est. Non est dubium, quin quem hoc loco D O M I N V M pastorem suum vocat, eū intelligat Christum filium Dei, sibi promissum. Nam & Prophetæ & Apostoli interpretantur Christum pastorem, & Christus ipse se pastorem vocat. Esaias cap. 40. Ecce Deus vester, ecce D O M I N V S Deus, (hic est Christus) in fortitudine veniet, & brachium eius dominabitur. Ecce merces eius cum eo, & opus illius coram illo. Sicut pastor gregem suum pascet, in brachio suo cōgregabit agnos, & in sinu suo leuabit, fœtas ipse portabit. Et Ezech. 34. Saluabo gregem meum, & nō erit vltra in rapinam, & iudicabo inter pecus & pecus. Et suscitabo super eas Pastorem vnum, qui pascet eas, seruum meum Dauid, (hic est hoc loco Christus) ipse pascet eas, & ipse erit eis in pastorem. Apud Ioannem cap. 10. Christus ait: Ego sum pastor bonus. Bonus pastor ponit animam suam pro ouibus suis. Et

1. Pet. 5. Petrus: Pascite, inquit, qui in vobis est, gregem Dei, vt cum apparuerit ille pastorum princeps, reportetis immarcescibilem gloriæ coronam. Habes, quis sit verus pastor, de quo Dauid in hoc Psalmo loquitur, videlicet D O M I N V S noster Iesus Christus. Videamus nunc, quæ beneficia hic pastor gregi suo afferat. Ac profecto Dauid vno verbo summatim exponit: Nihil mihi, inquit, deerit. Quantum, obsecro, hoc est copiæ cornu? quantus bonorum thesaurus? D O M I N V S pastor meus. Nihil ergo mihi amplius deest. Quis est pastor:

pastor ille? & quid est: Nihil deest: Pastor ille, quem
 admodum paulo antè dicebamus, est Christus. Quid
 autè est Christus? Audi Prophetam: Vocatur (inquit) *Esa. 9.*
 nomen eius admirabilis, consiliarius, Deus, fortis, pa-
 ter futuri seculi, princeps pacis. Audi etiam Aposto-
 lū: Vos, inquit, estis in Christo Iesu, qui factus est nos *1. Cor. 1.*
 bis sapiētia à Deo, iustitiarū & sanctificatio & redem-
 ptio. Ac iterum: In illo complacitum est patri, vni *Colos. 1.*
 uersam plenitudinem inhabitare. Et rursus: In illo in *Colos. 2.*
 habitat omnis plenitudo Deitatis corporaliter. Vi-
 des, quantus thesaurus sit pastor ille Christus. Quid
 autem & illud: Nihil deest: Quid? nisi quod idem A-
 postolus ait: Si Deus pro nobis, quis contra nos? qui *Rom. 8.*
 proprio filio non pepercit, sed pro nobis omnibus tra-
 didit illum: quā fieri potest, vt non & cum eodem nos
 bis omnia donauerit? Ei igitur, cuius pastor est Chris-
 tus, nihil deesse, significat, omnia ipsi abundare, tam
 in hoc, quàm in futuro seculo, tam corporalia, quàm
 cœlestia & æterna bona. De corporalibus dicit Pau-
 lus: Quasi pauperes, multos tamen ditantes: vt nihil *2. Cor. 6.*
 habentes, & tamen omnia possidentes. Et Christus
 ipse: Quando misi vos, inquit, sine sacculo & pera & *Luc. 22.*
 calceamentis, nunquid defuit vobis? At illi dixerunt:
 Nihil. Et iterum: Primum quærite regnum Dei, & *Matth. 6.*
 iusticiam eius: & hæc omnia adjicientur vobis. De
 cœlestibus autem & æternis ait Apostolus: Quis in-
 tentabit crimina aduersus electos Dei? Deus est, qui *Rom. 8.*
 iustificat. Quis ille, qui condemnet? Christus est, qui
 mortuus est, imò qui & suscitatus est, qui est etiam ad
 dexterā Dei, qui & intercedit pro nobis, &c. Et quod
 paulo antè recitauimus, Christus factus est nobis sas-

pientia, iustitia, sanctificatio & redemptio. Quare, si quis insipientior est, quàm vt inueniat viam ad regnum cœleste, habet pastorem Christum, qui est sapientia ipsa, et via quoq; ad cœlum. Si quis iniustior est & prophanior, quàm vt coram Deo apparere, & felicitatem sperare audeat, habet pastorem Christum, qui est iustitia, & condonat iniustitiam, adeoq; imputat ei suam ipsius iustitiam. Si quis metu mortis & inferni ita tenetur, vt videatur de vita & beatitudine desperare, habet pastorem Christum, qui est redemptio, & conseruat in morte ac horroribus inferni in omnē & felicem æternitatem. Quid hoc pastore præstantius? quid eo excellentius? Sed quod David summus tim, & paucis dicit: Nihil mihi deerit, hoc in reliquis versiculis, qui sequuntur, diducit copiosius in suas species, & explicat.

2. *In amœnis pratis facit me accubare : ad aquas recreantes deducit me.*

Pergit in metaphora pastoris. Et quia boni pastoris est, oues ad amœna & viridia pascua minare, & ad salubres aquas deducere; idem etiã facit summus ille pastor, Dominus noster Iesus Christus. Pascua enim, quibus cibât oues suas, & aque, quibus potat eas, sunt Euangelion suum, quod & Dauidi adnuntiavit, & postquam homo natus esset, diuulgauit per Apostolos suos, in vniuersum mundum. Qualia autem sint hæc pascua, quales aquæ, quid efficiant, Paulus brevibus exponit: Euangelion, inquit, est potentia Dei ad salutem omni credenti. Et supra, Psalm. 19.

Lex

Lex (hoc est, doctrina Euangelij) syncera, recreans animas, testimonium DOMINI verax, sapientiam præstans paruulis, &c. In prædicatione enim Euangelij de Christo inuenit famelicus cibum: siticulosus potum: iniustus iustitiam: afflictus lætitiā: tristis gaudium: moribundus vitam. quid plura: infelix veram & æternam felicitatem.

3. *Animam meam reficit, deducit me in semitis iustitiæ propter nomen suum.*

Quod Christus ipse, postquam iam hominē assumpsisset, dixit: Oves meæ vocem meam audiunt, & ego cognosco eas, & sequuntur me, E T E G O V I T A M A E T E R N A M D O E I S, nec peribunt in æternum, neque rapiet quisquam eas è manu mea, hoc David suo exemplo testificatur, & in hoc versiculo in se expertum, priusquam Christus in hunc mundum venisset, profitetur: Animam meam, inquit, reficit, recreat, refocillat, exhillarat, & vt alij interpretantur, conuertit, videlicet, à tristitia in gaudium, ab iniustitia ad iustitiam, à morte ad vitam. quia per Euangelion suum offert mihi æternam vitam, & deducit me recta, vel, vt Psalmus sua phrasi loquitur, in semitis iustitiæ, (hoc est) in semitis iustis, planis, & rectis ad veram beatitudinem. Sicut aliàs petit: Ostende, inquit, mihi, D O M I N E, viam tuam, & dirige me in semita recta, propter inimicos meos. Ac iterum: Gressus meos dirige secundum eloquium tuum, & non dominetur mei omnis iniustitia. Additur autem hoc loco: Propter nomen suum. Quod enim beneficium.

Ioan. 10.

Psalm. 27.

Psalm. 119.

beneficium filius Dei, verus pastor confert in Dauidem, aut alios homines, non confert in ipsos propter ipsorum nomen, aut meritum & iustitiam: sed tantum propter suum ipsius nomen, propter seipsum, gratuita sua clementia & misericordia, vt solius Dei nomen seu gloria laudetur & celebretur: Non nobis DOMINE, inquit aliàs, non nobis, sed nomini tuo da gloriam.

4. *Etiam si ambulauero in valle vmbrae mortis, non timebo malum: quia tu mecum es. Virga tua, & pedum tuum, ipsa me consolantur.*

Aliud beneficium, quod confertur Dauidi & omnibus pñs, à pastore suo Domino nostro Iesu Christo. Etiam si (inquit) ambulauero in valle vmbrae mortis, in media ipsa morte, etiam si faucibus lupi cōprehensus, & iam dilaniandus ac deuorandus tenear, tamen non metuam interitum. Quid igitur est quod malum non metuas? Num tu fortiori & celliori animo es, quàm filius ipse Dei, qui ad conspectum mortis ita expauescit, vt etiam sanguinem sudet, & exclamet: Deus meus, Deus meus, quare me deseruisti: Nō certe sum celliori animo, quippe qui ex me sim puluis et vmbra, & si iniquitates obseruaueris DOMINE, DOMINE quis sustinebit? sed quam habeo animi fortitudinem in conspectu mortis, ipsius est beneficium, non meum meritum, non mea iustitia. Ipse enim idcirco suscepit in se metum & horrorem mortis, idq; in summo gradu, vt me & omnes in ipsum credentes, in tali metu iuuaret, conseruaret, & ad æternam vitam liberaret.

Quare

Quare etiam si iam in faucibus ipsis mortis hærerem, tamen non metuo exitium. Quid ita? Quia TV, TV, inquam, mecum es. Quis est ergo ille TV? Quod est nomen eius? Nomen eius est filius Dei, Iesus Christus, victor mortis, expugnator inferni, autor vitæ, & largitor cœlestis ac æternæ beatitudinis. Quod si quis amplius requisierit, primum est omnipotens rerum omnium creator, & gubernator: deinde est vigilantissimus & clementissimus omnium ouium suarum, nimirum omnium credentium in ipsum, pastor & seruator. Quid metuam ne assaultum mortis, & minaces inferni fauces, præsentem ac me tuentem tanto mortis victorem, tanto vitæ authorem, & longe omnium potentissimum & clementissimum seruatorem? Huc pertinet etiã vox Pauli: Quis separabit nos à dilectione Dei, *Rom. 8.* (qua videlicet Deus nos complectitur propter Iesum Christum Dominum nostrum) num afflictio? num angustia? num persecutio? num nuditas? num periculum? num gladius? Et Psal. 3. DOMINVS sustentat me, non timebo centum millia populi, qui in circuitu locauerunt se contra me. Ac Psal. 27. Etiam si consistant aduersum me castra, non timebit cor meum: & si exurgat aduersum me bellum, ipse erit fiducia mea. Hæc non sunt eò intelligenda, quod qui tenentur metu mortis, non sint Christi. Et si enim fides in Christum nititur victoria Christi, tamen quoad sumus in carne, habet & caro suam infirmitatem: sed, quod qui agnoscunt pastorem Christum, etiam si metu mortis carne sua contremiscant, tamen per fidem tanta animi celsitudine conseruantur, vt omnia mortis pericula salui & incolumes euadant.

H Quid

Quid aut illud est, quo filius Dei verus pastor sustentat Dauidē, & reliquos pios in valle vmbre mortis? Dicit enim Dauid, se idcirco non timere mortem, quia TV MECUM ES. An non ille TV implet coelum & terram? An non est præsens cum omnibus hominibus? In ipso, inquit, sumus, viuimus, & mouemur. Recte. Hic pastor noster, filius Dei, implet quidem omnia, sua essentia & præsentia, non autem habet, vel (vt rectius dicam,) non profert vbiq; virgam, & baculum suum. Notum est, quod pastores soleant baculo quisq; suo pastoralis, quem pedum vocant, incedere, quo & ipsi innituntur, & oues, tanquam scepro, dirigunt, & gubernant, quo etiā, cum opus fuerit, lupos ab ouili arcent. Quæramus igitur, quæ sit virga, quis baculus, quod pedum, imò quod sceptrum pastorale, quo pastor noster Dauidem in ipsa etiam mortis valle dirigit, & consolatur. Dicit enim: Virga tua, & baculus tuus ipsa me consolantur. Ecce autem tibi, hæc est illa virga, hic ille baculus & sceptrum, de quo Psalmus 110, canit: Virgam, inquit, virtutis, seu regni tui emittet DOMINVS ex Zion, dominare in medio inimicorum eius. Postquam enim Christus filius Dei euectus est ad dextram Dei patris sui, misit ex Zion, seu Hierusalem, Apostolos suos in vniuersum mundum, vt predicarent Euangelion suum apud omnem creaturam, vt qui Euangelio crederent, eternam salutem cōsequerentur. Euangelion igitur Christi est virga pastoralis, & baculus seu pedum, quo filius Dei oues suas ita ducit, regit, tuetur, consolatur & conseruat, vt in media morte consistent. Vnde & Dauid, cum audiret illud Euangelion de Christo, quod & su-

præ commemorauimus : Suscitabo semen tuum post te, quod erit de filijs tuis, & stabiliam regnum eius, ac cepit, tanquam porrectum à pastore baculum: & tanta consolatione perfusus est, vt non solum summo animi gaudio diceret: Quid ultra addere potest David, *1. Paral. 17.* cum ita glorificaueris seruum tuum, & cognoueris eum? verum etiam exclamaret, quod est in hoc Psalmo: Etiam si ambulauero in valle umbræ mortis, non timebo malum, quia tu mecum es. Arripiamus & nos hoc pedum, quod pastor noster his temporibus clementer & luculenter nobis porrigit: vt eo innixi, capiamus consolationem in omnibus aduersis.

5. *Præparas coram me mensam aduersus hostes meos: unguis oleo caput meum: & reple calicem meum.*

Quod pastoris beneficiū exposuit antea metaphora pascuorū, & baculi pastoralis, hoc idem exponit nunc alia metaphora, opipari videlicet conuiuij: Præparas inquit, mēsam corā me, aduersus hostes meos. Multos habeo hostes, multos aduersarios, tam corporales, quàm spirituales: multa sunt & magna aduersa, quæ minantur mihi famem, nunc corporalē, nunc spiritualem, & cuspunt me perditum tam corpore, quàm animo. Sed tu DOMINE fili Dei, paras mihi aduersus hæc omnia mēsam lautissimam, & omni genere ferculorum instructissimam. Ungis præterea me balsamo. Hoc enim solemne fuit in publicis conuiuijs apud Israëlitas, vt cōsuetudine balsamo aspergerentur, & flagranti odore eius recrearentur, quemadmodū Christus ipse apud Lucā ad Phariseum dicit: Intraui in domum tuam, oleo *Luc. 7.*

Ioan. 12. caput meum non unxisti. Et apud Ioannem: Maria accepit in conuiuio libram vnguenti nardi pisticæ præciosæ, & unxit pedes Iesu, ut & domus ex odore eius vnguenti sit impleta. Ad hæc, non solum recreas me cibo & flagranti odore, verumetiam potas me pleno semper calice: ut nihil mihi, quod vel ad necessitatem, vel ad voluptatem pertinet, in hoc conuiuio desit. Quæ est ergo illa mensa, quod illud conuiuium? In Psal. 69. de Iudæis excæcatis dicitur: Fiat mensa eorum coram ipsis in laqueum, in retributionem, & in scandalum. Hæc, mensa sumitur pro sacra scriptura, & doctrina, quæ in ea continetur. Impij enim Iudæi ita sunt excæcati, ut sacra scriptura, e qua pollicentur sibi salutem, fiat ipsis in internitionem: propterea quod Christum, qui est totius scripturæ scopus, reiecerint, & condemnauerint. In Exodo cap. 25. fit mensa in exstructione tabernaculi, super qua ponuntur duodecim panes, quos propositionis vocant. Adumbrat & hæc mensa scripturam Prophetica & Apostolicam: ac doctrinam, quæ in ea traditur, & quæ à duodecim Apostolis vulgata est in orbem terrarum. Quam igitur mensam, quod conuiuium, quos calices, & quæ vnguenta David sibi à pastore, filio Dei, parata esse affirmat, scriptura est Prophetica, & doctrina Euangelij, quæ in ipsa continetur: in qua proponitur nobis conuiuium illud, quod Esaias cap. 25. describit: Faciet, inquit, DOMINVS exercituum omnibus populis, in monte hoc, conuiuium pinguium, conuiuium vindexiæ, conuiuium pinguium medullatorum, vindexiæ defecata. Hæc est prædicatio Euangelij de Christo, quod Apostoli adnuntiauerunt in vniuerso mundo,

do, & ex quo peti possunt remedia aduersus omnem famem & sitim tam corporalem, quam spiritualem. Si in agnitione peccati esuris iustitiam, Euangelion medetur huic fami, & ostendit tibi Christum, per cuius fidem iustificamur. Si in morbis vel corporis vel animi, si in metu mortis & inferni sitieris liberationē & salutem, parata est tibi mensa, seu prædicatio Eus angelij de Christo, ex qua licet sitim sedare: quia proponit Christum fide agnoscendum, quo nobis certa contingit salus & liberatio. Non enim est aliud nomen, præter Christi nomen, sub cælo nobis datum, in quo nos saluos fieri oporteat. Summa igitur cura studendum est, vt ad hanc mensam, & conuiuium accedamus, quò & ferculis in eo propositis fruamur.

6. *Certè bonitas & misericordia subsequuntur me, omnibus diebus vitæ meæ, & commorabor in domo DOMINI perperuò.*

Conclusio Psalmi. Certè; (inquit) vt breuiter & summatim dicam, sub hoc pastore, nihil vnquam mali mihi accidet: sed omnia bonitatis genera, omnia diuinæ clementiæ seu misericordiæ beneficia me omnibus diebus vitæ meæ comitabūtur: & perperuò commorabor in domo DOMINI, in vera Dei Ecclesia, & in cœlesti regno. Hoc illud est, quod Christus apud Ioannem dicit: Nemo potest oues meas rapere de manu mea, & patris mei. Et Paulus: Persuasum, inquit, habeo, quod neq; mors, neq; vita, neque angeli, neq; principatus, neq; potestates, neq; insitiātia, neq; futura, neq; altitudo, neq; profunditas, neq; vlla creatura alia

H. 3. poterit

Rom. 11.
2. Tim. 2.

Rom. 3.

poterit nos separare à dilectione, quam Deus erga nos habet, in Christo Iesu Domino nostro. Vnde autem, inquires, Dauid & Paulus certi fuerunt, se nunquam à DOMINO abiiciēdos, sed perpetuò fore Deo dilectos, & in domo Dei, seu in cœlesti regno cōmoraturos? Non profectò certificati sunt de hoc ex humana ratione, quæ citius nos ad dubitationem, quàm ad certitudinem, seu πληροφορίαν sollicitat: non ex meritis nostræ iustitiæ, quia nostra iustitia plurimum habet in se imperfectionis & vitij: sed ex veritate Evangelij Christi, & certitudine clementiæ, quam Deus constantissimè seruat erga omnes eos, qui Christum agnoscunt, & fide sua eum amplectuntur. Dona Dei, inquit Paulus, & vocatio eius eiusmodi sunt, vt eorum illum pœnitere non possit. Et iterum: Si comortui sumus, & conuiuemus: si sustinemus, & conregnabimus: si negamus, (& in negatione perseuerauerimus,) & ille negabit: si increduli sumus, (& conuertimur ad fidem) ille fidelis manet, negare seipsum non potest. Et sicut aliàs dicit: Incredulitas nostra non facit fidem (seu veritatem) Dei irritam. Quare dū credimus et speramus, (id quod à nobis seuerissimè, & in omni nostra seu actione seu passione exigitur,) sumus etiam certi, nos esse in gratia Dei, & perpetuò in regno cœlesti commoratuos.

VSVS HVIVS PSALMI.

Recitauit hoc Psalmo Dauid, quid utilitatis cepit è pastore, filio Dei. Hortatur ergo nos omnes, vt suo exemplo hunc pastorem agnoscamus & oues eius
fiamus.

fiamus. Sic enim fiet, vt nihil nobis vnquā sit defuturum : & vt mortem quoq; ipsam vincamus. Quo beneficio, quid potest nobis excellentius & magis salutare contingere? cōsideremus igitur, qua ratione fiat, vt oues Christi veri pastoris efficiamur, & beneficijs eius fruamur. Ecce autē tibi, docet Christus ipse, quid sit faciendum, vt simus oues eius. Oves meæ, inquit, *Ioan. 10.* vocem meam audiunt, & sequuntur : alienum verò non sequuntur, sed fugiunt ab eo. Quare si quis voluerit vera ouis Christi haberi & esse, vocem Christi audiat, & sequatur, necesse est. Vox autem Christi est: Sic Deus dilexit mundum, vt filium suum vnigenitum daret, vt omnis qui credit in eum, non pereat, sed habeat æternam vitam. *Ioan. 3.* Vox Christi est: Ego sum resurrectio & vita: qui credit in me, etiam si mortuus fuerit, viuet. Et: Omnis qui viuit, & credit in me, non morietur in æternum. Vox Christi est: Pœnitentiam *Ioan. 12.* agite, & credite Euangelio. Audiamus igitur hanc vocem, agamus pœnitentiam, fugiamus peccata, credamus Euangelio, quòd peccata sint nobis propter Christum remissa: sectemur vocationem Christi, in omni genere virtutum: & si quid aduersi inciderit, cogitemus seruum non esse maiorem Domino suo, (quæ & ipsa est vox Christi,) & feramus obedienter ac patienter. Hæc si præstiterimus, licebit vnā cum Dauid de tollere caput in cœlum, & ex animo dicere: DOMINVS pastor meus, NIHIL mihi deerit.

Psalmus 24.

DOMINI est terra & plenitudo eius.

Vlgò dici solet: Quot capita, tot sensus. Quod dictum non est e vano hominis somnio ortum: sed ipsa rerum experiētia ita cognitum & confirmatum est, vt nihil manifestius sit, quàm quòd homines, tam in rebus mūdānis, quàm in rebus spiritualibus & coelestibus variè afficiantur. Ac res quidem mundanas suis locis relinquemus. In pręsentia autem dicemus quędam de rebus spiritualibus. Inter homines enim tanta est varietas sententiarum de Deo, vt alij quidem dicant in corde suo, (sicut Psalmus loquitur) Non est Deus. Alij autem, etsi sentiunt esse Deum, tamen arbitrantur, res humanas non esse ei curę, nechabeat in terris peculiarem populũ, quem singulari fauore complectatur: sed sinat res pro suo cuiusque arbitrio temerè ferri, ipse autem interea suo tantum gaudio & felicitate fruatur. Alij, etiamsi sentiunt, Deum habere in his terris, inter homines, selectam Ecclesiam, cui ita faueat, vt conseruet eam in omnibus aduersis, & donet eam tandem æterna salute: tamen solent clementiam Dei & Ecclesiam eius in tantas angustias concludere, vt existiment, quòd pręter externũ illum coetum, qui habet titulum Ecclesię Dei, nō sit alius populus, quem Deus pro sua Ecclesia agnoscat. Sic Iudęi arbitrantur, Deum non agnoscere
alium

aliū populū, præterquam gentem Israeliticā, seu externā posteritatem Abrahæ, ac illos, qui se cum hac per circūcisionem coniungunt. Sic Pontificij putant, quod Deus non agnoscat ullam aliam Ecclesiā, præter eum cœtum, qui Romanum Pōtificem, v. sum- mum Ecclesiæ caput, in his terris adorant, & omnem salutis rationem e scrinio pectoris eius perunt.

Hæc autem sententiarum de Deo & Ecclesia eius varietas, hinc ad eō originem habet, quod humanum genus sit originali peccato corruptum. Etsi enim naturali hominum rationi diuinitus insculptū est, quod sit Deus, quemadmodum Paulus Rom. i. docet: tamen ea cognitio tam imbecillis facta est per peccatum originale, vt grauitate afflictionum, & magnitudine tentationum facillimè excutiat: ac tantum impiæ cogitationes reliquæ maneant.

Deus igitur misertus humanæ cæcitatē & interitus, patefecit cœlestem doctrinam verbi sui, ex qua verè ac certò cognoscere queamus, quid de ipso & Ecclesia eius sit sentiendum. Hæc autem doctrina mandata est scriptis Prophetis & Apostolicis, & confirmata tanta cœlestium ac diuinorum miraculorum auctoritate, vt nihil certius sit, quàm hanc doctrinam esse verè cœlestem, ac salutarem, contra quā ne ullius quidem angeli, nedum hominis concio sit audienda, id quod aliàs copiosius expositum est. Cum autem summa Dei clementia erga humanum genus, ac imprimis erga Ecclesiā, quam sibi Deus pater ex toto humani generis corpore, per DOMINVM nostrū Iesum Christum, Prophetica & Apostolica voce colligit, in multis scripturæ locis perspicuè traditur: tum præcipuè,

I breuiter

breuiter quidem, sed clarè admodum & iucundè, in hoc vicesimo quarto Psalmo describitur.

Initio enim commemorat hic Psalmus, ex quo populo filius Dei Ecclesiam suam in his terris cōgreget. Deinde, quis sit verè populus & Ecclesia Dei, & quæ beneficia à Deo accipiat. Postremò, admonentur omnes huius seculi reges, principes, & patres familiās, vt portas & fores regnorum, regionum, & domorum suarum filio Dei DOMINO nostro Iesu Christo patētissimè aperiant, & dent ei locum, quo ex ipsis Ecclesiam suam vocare & seligere queat.

1. *DOMINI est terra, & plenitudo eius, orbis terrarum, & quaecumq; in eo commorantur.*
2. *Quia ipse ad maria fundauit eum, & ad flumina firmauit ipsum.*

Hi duo versiculi sunt prima pars huius Psalmi, quibus explicatur, è quibus terræ regionibus filius Dei Domini nostri Iesu Christi Ecclesiam suam colligat. In hoc enim Psalmo nomine DOMINI, intelligendus est Dominus Christus, vnigenitus filius Dei, verus Deus & verus homo. Nam in fine huius Psalmi mandatur, vt portæ, hoc est, regna & principatus huius seculi patenter aperiantur, quo rex gloriæ ingrediatur. Et additur, quod rex ille gloriæ sit DOMINVS Zebaoth, fortis & potens. Nullus autem in vniuersa terra talis vnquam rex in regnum ingressus est, qui simul fuerit Deus & homo, præter DOMINVM nostrum Iesum Christum. Quare hic Psalmus de solo Christo & regno eius, quod est Ecclesia, intelligendus est. Nec est dubitan-

dam,

dum, quia Paulus hoc Psalmo admonitus, vocet Christum, DOMINUM gloriæ: Si cognouissent, inquit, haudquaquã DOMINUM gloriæ crucifixissent. Agredum igitur, audiamus, quam regionem in his terris Christus occupet, ex qua Ecclesiam suam congreget: DOMINI, inquit Psalmus, est terra, & plenitudo eius, orbis terrarum, & quæcunq; in eo habitant. Iudæus arbitratur, quod Messias, quem ipse somniat, circumlaturus quidem sit arma sua, per vniuersum orbem, & debellaturus omnes gentes: sed illos tantum pro vero suo populo agniturus, & seruaturus, qui sint Iudæi circumcisi, & qui ex reliquis gentibus circumcisionem & legem Moysi accipiant. Et quod in Zacharia DOMINVS *Zacha* Zebaoth de Ecclesia Christi dicit: Ecce ego saluabo populum meum de terra orientis, & de terra occasus solis: & adducam eos, & habitabunt in medio Hierusalem, &c. hoc Iudæus intelligit de externa congregatione & habitatione in vrbe Hierusalem, itaq; alligat regnũ & populum Messie sui ad certam & mundanam sedem. Pontificius alligat regnum Christi & Ecclesiam eius ad Romam, & putat, nullum posse verum esse membrum Christi, nisi agnoscat Romanũ Pontificem, (quemadmodũ paulo antè dicebamus) summũ in terris Ecclesiæ caput, & habeat mandata ac traditiones eius pro oraculis Spiritus sancti. Sed hic Psalmus longè aliter docet. Et si enim Deus elegit sibi Iudæos, seu posteritatem Abraham in peculiarem populum, vt prædicatio promissionis de Christo in ea, vsq; ad aduentum eius in carnem, conseruaretur, & Christus ex ea secundum carnem nasceretur: ac fortassis Petrus Apostolus non Hierosolymis tantum & Antiochiæ, verum etiam Romę concionatus est Euangelion Christi:

tamen DOMINVS noster Iesus Christus nō sinit se al-
ligari ad Hierusalē, & in Iudaismum: nec ad Romam,
& in regnum Pontificium: sed peragrat vniuersum or-
bem terrarum: & accipit in hæreditatem, (vt alius
Psal. 3. Psalmus dicit) gentes, & in possessionem omnes ter-
minos terræ. Congregat enim Ecclesiam suam non ex
vna tantum natione aut gente, sed ex omnibus natio-
nibus & gentibus in toto orbe terrarum. Num Iudæo-
Rom. 1. rum Deus tantum? (inquit Paulus) An non & Gens
tium? Certè & Gentium. Quandoquidem vnus Deus,
qui iustificat circumcisionem ex fide, & præputium per
Rom. 10. fidem. Ac iterum: Non est distinctio vel Iudæi vel
Græci. Nam idem DOMINVS omnium, diues in om-
nes inuocantes se. Quisquis enim inuocauerit nomen
DOMINI, saluus erit. Quid pluribus opus? Christus
ipse testificatur perspicuis verbis, se non permissurum,
vt in solam Iudæam concludatur, dicit enim ad Apo-
Act. 1. stolos: Eritis mihi testes, non solum Hierosolymis,
verum etiam in vniuersa Iudæa, Samariâq; deniq; vsq;
ad extrema terræ. Et alius Psalmus de regno Christi
differens: Dominabitur (inquit) à mari vsq; ad mare,
Psal. 72. & à flumine (Euphrate) vsq; ad terminos orbis terra-
rum. Nec est mirum, quòd DOMINVS suscipiat domi-
nationem in toto orbe terrarū, & inter omnes gentes,
quia ipse fundauit, inquit Psal. orbem terrarū ad ma-
re, & ad flumina firmavit eum, (hoc est) DOMINVS
Christus creauit orbem terræ. Et quanquam initio
conditionis, terra aquis ita operta fuerit, vt nec homi-
nes, nec iumenta potuerint in ea habitare, DOMINVS
tamen eam ex aquis potenti sua manu ita eleuauit &
stabiliuit, vt non solum super aquis firma consistat,
verum

verum etiam hominibus commodam & utilem habitationem præbeat: Omnia, inquit Ioannes, per ipsum *Ioan. 1.* facta sunt: & sine ipso factum est nihil, quod factum est. Et in Iob dicit DOMINVS: Vbi eras, quando posui *Iob 38.* nebam fundamenta terræ? Ac mox: Quis conclusit ostijs mare, quando erumpebat, quasi de vulua procedens? Cum ponerem nubem vestimentum eius, & caligine illud, quasi pannis infantiae obuoluerem? Circumdedit illud terminis meis, & posui vectem & ostia, & dixi: Vsq; huc venies, & non procedes amplius, & hic confringes tumentes fluctus tuos. Hactenus Iob. Ac profectio, inter maxima & præcipua miracula, illud non est postremum, quod terra, cum natura sua locum in ipso maris medio habere, & vndiq; aquis immersa & contacta esse deberet, potenti tamen manu Dei ex aquis ita sit eleuata & conseruetur, vt homines in ea commorari, ambulare, magnificentissima edificia excitare, adeoq; necessaria quæque negotia conficere queant. Hic re ipsa comperimus, quod manu Dei semper contineamur, & beneficio eius fruamur. Nam, si DOMINVS Deus noster abstraheret à terra, vel minimum suum, vt ita dicam, digitulum, fieri non posset, quin subito aquis ita immergeretur, vt omnes homines suffocarentur, & omnia in terris perirent. Sed terra, quantacumq; sit grauitate, tamen necesse habet, ex aquis eleuata perdurare: & quantumcumq; impetuosi sint fluctus maris, tamen non possunt longius progredi, quàm termini eius positi sint: ne terræ quicquam incommodi afferant.

Hoc miraculum alta mente reponendū est, vt semper clementiam Dei agnoscamus, gratias ei agamus, et

gratitudinē obsequio nostro testificemur. Deus enim non est ea illiberalitate, ut nobis vnum hoc & solum & nudum miraculum intuendum proponat: sed potius testari vult, quod quemadmodum posuit mari terminos, ultra quos excurrere non possit, ita etiam posuerit terminos, omnibus afflictionibus, imò etiam morti & satanæ ipsi, ne possint in Ecclesiam Christi, & vera membra eius amplius grassari, quàm Christus permiserit, & p̃ijs in Christum credentibus vtile fuerit. Cum igitur Christus condiderit orbem terrarum, & seruet eum potenti manu sua, adeoq̃ sit omnipotens Dominus, & gubernator omnium eorum, quæ in eo sunt, nullus est vel in cœlo Archangelus, vel in his terris Monarcha, vel in inferno Beelzebub, qui aut vi, aut iure impedire possit, quò minus ipse è toto terrarum orbe, & ex omnibus nationibus colligat populum, qui hæreditatem æternæ iustitiæ ac felicitatis possideat.

Sed hic versiculus: **DOMINI** est terra, & plenitudo eius, &c. fecundior est, quàm quem oscitanter præterire debeamus. Et si enim Psalmus ille eo vtitur, ut doceat, quòd Christus colligat Ecclesiam suam, ex omnibus gentibus, & nationibus: tamen vsus eius latius patet. Paulus intuetur eum magno spiritus acumine. Docet enim ex ipso, quòd homo pius possit omni genere ciborum, bona conscientia, cum gratiarum actione, coram Deo uti: Omne, inquit, quod in macello venditur, edite: nihil interrogantes, propter conscientiam. **DOMINI** siquidem est terra, & plenitudo eius, (hoc est) Sicut Christus liberrimus **DOMINVS** est omnium rerum in his terris, ita fecit etiam credentes in

in ipsum liberos dominos, vt possint quouis genere ciborum, quos Deus in vsum hominum creauit, bona conscientia vti.

Pius quispiam spoliatur omnibus suis facultatibus, & eijcitur e patria sua in exilium. Hic potest ex isto versiculo consolationem petere. Postquam enim Christus est Dominus orbis terrarum, & omnium, quæ in eo sunt, cur exul sollicitus esset de terrenis suis facultatibus & patria? An non habet à parte sua diuitem Dominum Christum, quem, quocunque peruenierit, domi inuenit? qui etiam tanta est beneuolentia, vt non deserat ipsum in vllis quantumuis magnis periculis: & tanta est liberalitate, vt pro vno ablato numo & patria, centum numos & patrias certè restituat.

Minatur magistratus quispiam, Euangelij persecutor, homini pio probrosam mortem, & ignominiosam sepulturam, videlicet ad patibulum in caluaria. Sed hic versiculus consolatur pium. Cum enim orbis terrarum, & omnia quæ in eo sunt, subiecta sint potestati & gubernationi DOMINI nostri Iesu Christi, homo pius nullam habet causam, cur animum despondeat: propterea quod, certò inueniat Christum Dominum & seruatorem suum in omnibus locis, atque adeo in morte ipsa, etiamsi trucidetur, & in caluariam amproijciatur. Nullus nostrum, inquit Paulus, sibiipsi *Rom. 14.* si viuít, & nullus sibiipsi moritur. Nam, siue viuimus, Domino viuimus: siue morimur, Domino morimur: siue igitur viuamus, siue moriamur, Domini sumus. In hoc enim Christus, & mortuus est, & resurrexit, ac reuixit, vt mortuis ac viuentibus domine-

tur.

tur. Quare cum hi duo primi huius Psalmi versiculi tam late pateant, non committamus, ut ipsos oscitanter intueamur, sed ut veram eorum sententiam diligenter cognoscamus, & in suum usum transferamus.

3. *Quis ascendet in montem DOMINI? & quis stabit in loco sancto eius?*
4. *Innocens manibus, & mundo corde: qui non assumit vanam animam suam, & non iurat dolo.*
5. *Hic accipiet benedictionem à DOMINO, & iustitiam à Deo seruatore suo.*
6. *Hæc est generatio quærentium eum, inquirentium faciem suam Iacob.*

Altera hæc est pars huius Psalmi, in qua Spiritus sanctus docet, quis verè sit populus Dei, & quæ sit vera Christi Ecclesia in terris. Postquàm enim paulò antè dictum est, quòd filius Dei sit Dominus orbis terræ, & colligat Ecclesiã suam, ex omni natione, posset quispiã arbitrari, quòd omnes gentes indiscriminatim, in vniuersa terra, cuiuscunq; fuerint religionis, aut conuersationis vitæ, sint Ecclesia Christi, & assequantur æternam salutem. Sed res longè aliter se habet. Sicut enim plurimum errat, qui sentit, beneficia filij Dei tam angusta esse, ut non nisi in vnum populi genus conferantur: ita non minus errat, qui existimat omnes gentes frui sine vllò discrimine, beneficijs eius. Tametsi enim verissimum est, quòd Deus velit omnes homines saluos fieri, & beneficia Christi diuulgentur & offerantur prædicatione Euangelij, omnibus hominibus, non ta-

men

men omnes homines voluntati Dei morem gerūt: nec oblata beneficia propter incredulitatē ipsorum agnoscent, aut recipiunt. Quare, non omnes in hīs terris homines sunt verē populus Dei, & vera Ecclesia Christi.

Age igitur, dicito, quæso, mihi, quis est, qui ascendit in montē DOMINI, & qui stat in loco sancto eius? (hoc est) quis sit verus populus Dei, & ubi inuenitur vera Ecclesia Christi? Hīc vulgus in contraria scinditur. Iudæus affirmat, illum esse verum populum Dei, qui est circumcissus carne, qui multa adducit ad templū Dei sacrificia, qui non vescitur carne suilla aut sanguine, & si quod id genus aliud est sacrorum Iudaicorum. Pontificius dicit, illam esse veram Ecclesiam Christi, quæ agnoscit Romanum Pontificem summum in his terris Ecclesiæ caput: quæ confitetur singulis annis peccata sua proprio sacerdoti: quæ sumit sacramentum altaris (vt ipsi loquuntur) iuxta ritum à Pontifice ordinatum: quæ diligenter visitat & audit Missas, & redimit sibi Pontificias indulgentias, vt effugiat ignem purgatorium. Monachus affirmat illam esse veram Christi Ecclesiam, quæ ducit vitam cœlibem, gestat cucullam, recitat multas preculas, continuat multorum dierum ieiunia, & sectatur χαλδονίαν καὶ ἰερουσαλήμ.

Spiritus sanctus autem describit in hoc Psalmo populum Dei & Ecclesiam Christi longè aliter: Ille, inquit, ascendit in montem DOMINI, & stat in loco sancto eius, (hoc est) verum est & germanum membrum Ecclesiæ Christi, qui sit innocens manibus, mundus corde, & non assumat animam seu nomen Dei in vanum, aut falsò in nomine Dei iuret. Hīc tria exiguntur, quæ præstanda sunt, vt sis verum Ecclesiæ mem-

K

brum,

brum. Vnum est de corde, vt sit purum & mundum. Alterum de ore, seu lingua, vt anima Dei, (sic enim solet Deus per animam suā iurare, Hie. 5. & Amos 6.) seu nomine eius non abutaris vanè, nec iures per animam seu nomen Dei falso aut dolosè. Tertium est de manibus, vt sint innocētes, videlicet, ne quicquam mali opere designes, sed bona quauis opera facias. Deus enim per se nō requirit, num quis sit carne circuncisus. Instituit quidem externam circuncisionem, vt esset legitimum ad suum vsq; tempus, sacramentum: ipsa aut per se non reddit hominem mundum, sed Deus exigit, vt cor circuncidatur, & sit purum ac mundum. Nec requirit, num multas preces ore cōmemores, sed exigit, vt nomen eius verè confitearis, rectè de nomine eius concioneris, & caueas, ne quicquam impietatis doceatur. Præterea non respicit manus, num sint aqua lotæ, an illotæ, sed ne quid scelerum opere cōmittatur. Tales homines, quocunq; loco, siue inter Iudæos, siue inter Gentes, siue inter Tartaros, siue inter Turcas inueniat, hos agnoscit pro populo & vera Ecclesia sua.

Sed quis est ille, qui audeat gloriari se habere cor mundum? se ore aut lingua sua nunquam esse præuaricatum, & nullum vnquam scelus opere suo designasse? Hoc nunc opus, hic labor est, vt cognoscamus, quomodo cor mundum consequamur: nec falso per animam seu nomen Dei iuremus: & quomodo innocentes manus faciamus aut conseruemus. Etsi enim in quarto huius Psalmi versiculo, in quo tres illæ conditiones veræ Ecclesiæ Christi recitantur, nihil disertè de Christo & de Euangelio eius, aut de fide in Christum, per Euangelion eius, dicitur: tamen quia Psalmus

mus

mus vrget & exigit mundum cor, sanctam linguam, & iusta opera, idcirco non est dubium, quin pro vera legis ratione & fine vrgeat & respiciat, in Iesum Christum, & Euangelion eius, iuxta illud Pauli dictum: Lex Pædagogus noster fuit ad Christum, vt ex fide iustificaremur. Et iterum: Finis legis, Christus, ad iustificationem omni credenti. Quisquis enim tenetur desiderio habendi mundi cordis, necesse habet Euangelion de Christo audire, & per illud, in Iesum Christum, autore Spiritu sancto, credere, quod Christus reconciliauerit ipsum cum Deo patre, & impetrauerit ipsi condonationem omnium peccatorum suorum, ac donet ipsi omnem suam probitatem & iustitiam, quam seuerio iudicio Dei, coram tribunali eius opponat, & qua confidat, ac per quam æternam beatitudinem consequatur. Vbi igitur Christus tali fide seu fiducia accipitur, ibi est cor mundum, nō quod re ipsa sentias in corde perfectam mundiciem, quia immundities peccati originalis hæret in corde hominis, vsque ad mortem: sed quod Christus, qui habet omnem mundiciem, imò ipsa est mundities, habitet in corde per fidem, & cor reputetur coram Deo mundum & purum, propter Christum, quemadmodum Petrus (Act. 15.) dicit: Purificauit corda eorum fide.

Deinde, quisquis noluerit nomine DOMINI abuti, & falsò per Deum iurare, necesse habet & ipse Euangelion de Christo audire, & DOMINVM Christum, vnigenitum filium Dei, ac vnicum nostrum seruatorem fide sua agnoscere. Vbi enim vera est agnitio Christi in corde, ibi sequitur etiam vera confessio oris, & verè glorificatur nomen Dei. Accedit &

Psal. 116.

illud, quòd rectè docetur de Deo, nec falsò iuratur per nomē Dei. Credo, inquit alius Psalmus, propter quod & loquor. Omnes alijs Doctores, qui non habent veram Christi cognitionem, falsò prædicant de Deo, & vanè ac dolose iurant per animam seu nomen Dei. Illi autem soli rectè prædicant de Deo, qui DOMINUM nostrum Iesum Christum, per Euangelion suum rectè cognoscunt: Nemo, inquit Christus ipse, venit ad patrem, nisi per me.

Præterea, qui cupit manus habere innocentes, & bona opera, quæ Deo placent, facere, necesse habet & ipse Euangelion Christi agnoscere, & credere in Christum, videlicet, quòd sit Deo acceptus propter Christum, ac donetur Spiritu sancto, quo cupiditates carnis compescantur, & honesta vita bonis operibus instituitur. Etsi enim bona nostra opera, suos semper habent defectus & vitia: tamen, quia homo est acceptus Deo per fidem propter Iesum Christum, idcirco accepta est etiam Deo obedientia hominis, (quamvis imperfecta) propter Christum.

Ex his facile nunc intelligi potest, quis verè sit populus Dei, & quæ sit vera Dei Ecclesia. Cum enim proprium sit Ecclesiæ Christi, quòd sit mundo corde, quæ mundities est ex vera fide in Dominum nostrum Iesum Christum, certè sine vlla controuersia sequitur, quòd qui non verè credunt in Christum, seu non collocant veram fiduciam in solo Christo, non sint verè populus Dei, nec vera Christi Ecclesia, etiamsi nomen Ecclesiæ gestent.

Adhæc, cum proprium sit Ecclesiæ Christi, quòd debeat DOMINUM suum Christum confiteri, rectè de ipso

ipso docere, & Euangelion eius synceriter adnuntiare, ut nomen DOMINI glorificetur, & celebretur, manifestè sequitur, quod qui doctrinam Christi fastidiunt, aut Euangelion eius corrumpunt, aut persequuntur, non sint vera Christi Ecclesia: etiamsi, multitudine reliquos superent, & summam dignitatem in Ecclesia in his terris obtineant.

Postremo, cum Ecclesia Christi debeat habere innocentes manus, perspicuum est, quod qui iniquitatem sectantur, et sceleratam vitam ducunt, non sint vera Christi Ecclesia: etiamsi nomine Christianorum vocentur, aut supremum locum in Ecclesia occupent. Quare nemo sibi ipsi externa specie aut nomine Ecclesie Christi blandiatur: sed in hoc studium incumbat, ut habeat cor mundum, nomen DOMINI vera doctrina & confessione glorificet, & habeat innocentes manus, quæ è sola fide in DOMINUM nostrum Iesum Christum, sicut paulò antè dicebamus, peti possunt. Quisquis enim hoc assequitur, is est verum Ecclesie Christi membrum, siue in Persico, siue in Romano imperio commoretur: siue sit potentia huius seculi ornatus: siue homo coram mundo abiectus: siue dives siue pauper: siue sit clarus siue obscurus: breuiter, siue viuat siue moriatur.

Cæterum, cum nobis nunc sit manifestum, quæ sit vera Ecclesia Christi, agendum, sciamus etiam, quæ beneficia à Deo accipiat, & quibus donis quoduis verum veræ Ecclesie membrum ornetur. Dicit ergo Psalmus in quinto versiculo: Hic accipiet benedictionem à DOMINO, & iustitiam à Deo saluatore suo. In hoc versiculo promittitur Ecclesie benedictio Dei. Sunt autem (præter benedictiones, aut potius incantationes

Magicas, de quibus hîc non fit sermo, & quæ omnino sunt detestandæ, varia genera benedictionum. Vnum enim genus est corporalis benedictionis, qua benedicitur corpus corporalibus bonis: quod genus est, sanitas corporis, diuitiæ, potestas, obediens liberi, incrementa frumentorum, copia rerum, pax mundana, victoria super hostes, prosper successus in omnibus negotiationibus corporalibus. Etsi autem talis benedictio, donum Dei est, & confertur etiam à Deo in Ecclesiam Christi, & in membra eius suo modo, & suo tempore; tamen ea non est illa cœlestis & æterna benedictio, quæ vel sit in hac terra stabilis, vel queat Ecclesiam in suis periculis iuuare.

Est igitur aliud genus benedictionis spirituale, & cœleste, quod & solum Ecclesiæ Christi proprium est. Quæ autem sit illa benedictio, Psalmus ipse clare exponit: Accipiet, inquit, à Deo seruatore suo **IUSTITIAM**. Hîc habes nominatim veram illam, spirituale & cœlestem benedictionem, videlicet, **IUSTITIAM**. Omnes aliæ benedictiones, aut sunt perniciosæ, vt benedictiones Magicæ: aut sunt caduæ, vt sunt corporales. Sola autem hæc benedictio, quæ vocatur iustitia à Deo salutis nostræ, est vera & cœlestis benedictio, quæ in tantum nec perdit, nec perit, vt etiam secum cœlum, & perpetuam vitam ac felicitatem afferat. Tamen si enim benedictus fueris corporali sanitate, aut mundanis diuitiis, carueris autem benedictione iustitiæ, tamen necesse habes vel tandem morte perire, & vna cum satana, gehennæ mancipari. Si autem habueris benedictionem iustitiæ, etsi cares sanitate corporali & diuitiis mundanis, tamen consequeris vel
tandem

tādem perpetuum gaudium, & cœleste regnum, quod omnes regias & Cæsareas maiestates & regna superat, imò ne quidem cum his conferri debeat. Vbi enim est iustitia, ibi est & remissio iniustitiæ, & liberatio ab accusatione mortis ac satanæ, & victoria super mortem: ibi denique est hæreditas omnium cœlestium, diuinorum, & æternorum bonorum. Hæc & his similia omnia vno iustitiæ nomine comprehenduntur.

Sed hoc opus, hic labor est, quomodo hanc benedictionem iustitiæ consequamur, & conseruemus. Quid autem pluribus opus? quandoquidem Psalmus paulò antè dixit: Qui est innocens manibus, nec abutitur nomine Dei vanè, & est mūdo corde, hic ascendit in montem DOMINI, & stat in loco sancto eius, (hoc est) verum est Ecclesiæ membrum. Quod cum supra interpretaremur, ostendimus, quòd hæc, sola fide in DOMINUM nostrum Iesum Christum, ex auditu Euangelij eius, consequamur. Quare etiam fieri nō potest, vt benedictionem iustitiæ aliter consequamur, quàm fide in Christū. Quisquis enim Iesum Christum DOMINUM nostrum gratia Spiritus sancti, per Euangelio verè agnoscit, & omnē suā fiduciam, in ipso, vt solo & vnico suo seruatore, collocat, ei Christus vnà cū omnib. suis bonis donatur. Itaq; adoptatur propter Christū, à Deo patre in filiū, in heredem, adeoq; in cohæredē Christi. Christus autem est hæres iustitiæ, vitæ, & omnis eternæ ac cœlestis dominationis, maiestatis & felicitatis. Quare, quisquis DOMINUM Christū vera fide possidet, habet iam corā Deo benedictionem iustitiæ, propterea quòd imputetur ipsi iustitia Christi, ac liberetur propter hanc benedictionē ab omni maledictione, & affec

& assequatur in Christo, et vnà cum Christo omne bonum: vt non amplius dubium sit, quin qui hoc modo Dominum Christum, per fidem quærunt ac possident, verè sint populus Dei, & vera Christi Ecclesia, quem admodum Psalmus in sexto versiculo exponit: Hæc (inquiens) est generatio quærentiũ eum, quærentium faciem tuam, Iacob, (hoc est) faciem D O M I N I Dei, qui apparuit Patriarchæ Iacob, & de quo Iacob dixit: Vi di D O M I N V M facie ad faciem. Homines excogitant varias pro suo arbitrio rationes, quibus quærunt D O M I N V M Deum, ad videndam faciem eius. Alij accipiunt bouem aut vitulum, & offerunt in templum: sperantes se hac ratione Deum inuenturos, & faciem eius contemplaturos, qui mos fuit Iudæorum. Alij recipiunt se in eremum, & vescuntur tantum herbarum radicibus: quo merito pollicentur sibi gratiam Dei. Alij induunt cucullam, aut ieiunant pane & aqua, aut faciunt seu audiunt multas Missas, aut recitant Rosaria, quæ ita vocant: & arbitrantur se his sacris peruenire ad intuendam faciem Dei. Sed vna tantum est vera via & ratio, qua possumus ad conspectum Dei, & ad videndam faciem eius peruenire, videlicet, agnitio filij Dei D O M I N I nostri Iesu Christi: & fides, quæ est in ipsum, ex Euangelio eius. Vbi enim Christus agnoscitur, & per fidem accipitur, ibi oblationes bouum & vitulorum in lege Mosi suum habuerunt vsum, videlicet, vt adumbrarent sacrificium Christi: ibi suam quodque vtilitatem habent ieiunia, preces, vsus sacramenti cœnæ dominicæ, & alia sacra, seu bona opera, pro sua quodque ratione: videlicet, vt ieiunio conseruetur sobria & honesta vita: precibus & vsu cœnæ dominicæ

minicæ confirmetur fides, adeoque omnibus alijs bonis operibus, à Deo præceptis, debitam nostram obedientiam, & gratitudinem erga Deum testificemur. Vbi autem Christus non agnoscitur, nec recipitur per fidem, ibi nec sacrificia bouum, nec esus radicum, nec ieiunia, nec alia id genus opera possunt nos iuuare, vt faciem Dei contemplemur. Quare in id studium maxime omnium incumbamus, vt discamus Euangelion Christi, & cognoscamus ex eo fide nostra, per gratiam Spiritus sancti, DOMINVM nostrum Iesum Christum, ac præstemus vocationi eius, in tota vita nostra, obedientiam.

7. Dilatate portas, & altas facite ianuas in mundo, vt ingreditur rex gloria.
8. Quis est iste rex gloria? DOMINVS fortis & potens, DOMINVS potens in prælio.
9. Dilatate portas, & altas facite ianuas in mundo, vt ingreditur rex gloria.
10. Quis est iste rex gloria? DOMINVS Zebaoth, ipse est rex gloria.

Hæc est tertia & postrema pars huius Psalmi, in qua Spiritus sanctus cohortatur omnes reges, principes, patres & matres familiars, vt dent locum DOMINO Christo & Euangelio eius, in regnis & familijs suis. Postquam enim in prima huius Psalmi parte demonstratur, quod Christus congregaturus sit per prædicationem Euangelij, Ecclesiam suam, non ex vna tantum natione, sed ex toto orbe terrarum: & in ses-

L

cunda

cunda parte docetur, quæ sit vera Ecclesia Christi, & quæ beneficia à Deo accipiat, res ipsa exigat ut adhi-
ciatur cohortatio ad omnes huius seculi principes, quæ
admonentur, ut non impediant cursum Euangelij Chris-
ti, sed ut omnem suam operam eò conferant, quo Ec-
clesia Christi è regnis suis, per ministerium Euangelij
colligatur: Dilatate, inquit, portas, & altas facite ianu-
as huius seculi, ut ingrediatur rex gloriæ. Cæterum,
rex ille gloriæ seu gloriosus, de quo hîc Psalmus lo-
quitur, est DOMINVS noster Iesus Christus, de quo
etiam in principio Psalmi dictum est, quod DOMINI
sit terra, & plenitudo eius, de quo & mox dicitur,
quod sit DOMINVS Zebaoth, videlicet, verus & æ-
ternus Deus, fortis & potens. Portæ autem & ianuæ
mundi, sunt regna & principatus in hoc seculo, qui
muniti sunt portis, muris, vallibus, legibus præterea, &
ciuilibus ordinationibus. Admonet igitur Psalmus
politicum Magistratum, ut non claudant portas & ia-
nuas suas: sed late eas glorioso regi, qui est Chris-
tus, aperiant, & superliminaria portarum satis al-
ta faciant, quò Christus vnà cum Euangelio suo in-
gredi, & ex regionibus eorum Ecclesiam suam collig-
ere queat.

Omnino autem necesse habent reges, principes, &
patresfamilias huic admonitioni parare. Hic enim rex
gloriosus, DOMINVS noster Iesus Christus, condidit
non terram tantum, sed etiam cælum, & omnia, quæ
in ipso continentur. Est præterea orbis terrarum pro-
pria possessio eius, quemadmodum in primo & secun-
do versiculo huius Psalmi dictum est. In secundo quo-
que

que Psalmo dicit Deus pater ad filium suum, DOMINUM nostrum Iesum Christum: Postula à me, & dabo tibi gentes hæreditatem tuam, & possessionem tuam terminos terræ. Et in Psalmo 72. Dominabitur à mari usque ad mare, & à flumine usque ad terminos orbis terrarum. Cum igitur orbis terrarum, & omnes gentes in eo traditæ sunt DOMINO Christo in propriam hæreditatem & possessionem, æquum est & iustum, vt Magistratus terræ non claudant portas & ianuas regnorum suorum coram ipso, sed potius excipiant eum omni genere officiorum reuerenter & obedienter: vt subditi, & familiæ ipsorum beneficijs eius fruantur.

Deinde Deus instituit & ordinauit in his terris, omnia regna, principatus, politicas & œconomias, propter hanc maximè omnium causam, vt præbeant Domino Christo & Euangelio eius locum ac hospitium, quo Ecclesia colligatur. Non apparet quidem externa specie, quòd regna, politica, & œconomia ordinata sint diuinitus, propter Ecclesiam: sed quia Deus seueriter punit regna & principatus, qui Ecclesiam malis afficiunt, & Esaïas ait: Gens & regnum, quod non ser- *Esa. 60.* uierit tibi, peribit, & gentes (quæ non præstiterint tibi sua officia) solitudine vastabuntur, idcirco facile intelligi potest, quòd Deus regna, politicas & œconomias, propter Ecclesiam instituerit.

Officium igitur & vocatio omnium Regum & Principum, imò cuiusuis Magistratus, siue politici, siue œconomici exigit, vt portas & fores suorum regnorum, & principatuum latissimè aperiant, quòd gloriosus, fortis, potens, & inuictus Rex Christus ingredias-

tur. Vnde & secundus Psalmus dicit: Nunc reges intelligite, erudimini, qui iudicatis terram. Seruite DOMINO in timore & tremore. Osculamini filium, ne forte irascatur, & pereatis subito. Politicus quidem magistratus occupatus est instituendis politicis legibus & ordinationibus, ad tuendam externam tranquillitatem & honestatem. Occupantur etiam patres familiars varijs negotijs, alius agricultura, alius opificio, alius mercatura. Hæc autem omnia in illum scopum dirigenda sunt, vt DOMINO Christo portæ & fores aperiantur, & Euangelion Christi suum hospitium habeat.

Sed, cum Christus pulsatur vnà cum Euangelio suo portas regum, principum, ac patrum familiars, vt inueniat hospitium, quid fit? Negari non potest, quin alii quot reges, principes & patres familiars excipiant gloriosum regem Christum, omni officiorum genere, & dent ei satis spaciosum locum: magna autem pars eorum dicunt, quod est in hoc Psalmo scriptum: Quis est iste rex gloriæ, hoc est, quid ad nos Christus? quid ad nos Euangelion eius? nos sumus nostrarum regionum *αὐτοκράτορες* & principes: nec videtur nobis vtile, vt peregrinum principem ac dominum intromittamus, ne forte nobis inuehat secum vnà cum Euangelio suo, omne genus calamitatis: ac fieri posset, vt nobis eiectionis, possessionem nostrarum regionum ipse capiat. Adeo necesse habet Christus vnà cum Euangelio suo malè audire perpetuò, quod regnis & familijs hominum non nisi præsens exitium afferat. Cuius rei manifestum exemplum est Herodes, qui cum audivisset Christum natum, tanto metu amittendi regni sui

sui contremuit, vt non solum infantes Bethlehemiticos, verumetiam suos ipsius filios immaniter occideret. Sed Ecclesia recte ex Sedulio de Herode canit: Herodes hostis impie, quid times? Non arripit mortalia, qui regna dat cœlestia.

Docet & hic Psalmus, qualis Dominus & rex sit Christus, qui fores mundanorum regnorum pulsat, & hospitium petit: DOMINVS, inquit, potens in prælio, Et mox: DOMINVS Zebaoth, ipse est rex gloriæ. Illud vult dicere: Audite vos reges, principes, & domini huius seculi: Stat quispiam pro foribus vestris, & petit intromitti, vos autem recusatis. Dico ergo vobis, reputate diligenter cum animis vestris, quem contemnatis & excludatis. Arbitramini fortassis ipsum esse hominem vilem, abiectum, & inglorium, qui nec Deo, nec hominibus sit frugi: existimatis etiam Euangelion eius esse vanum somnium, imò non fuisse in his terris vnquam doctrinam perniciosiorem, sed expendite, quæso, hanc rem accuratius. Verus quidem homo est, & apparet tempore carnis suæ vilis & abiectus, non est autem nudus homo, quales sunt alij homines, siue illi prophani, siue sancti: sed est homo assumptus à filio Dei, in eandem personam, quippe quòd in quem filius Dei effudit omnem Deitatis suæ plenitudinem corporaliter: vt recte dicatur DOMINVS gloriæ, & DOMINVS Zebaoth, fortis & potens, (hoc est) Deus omnipotens. Suscepit enim prælium cum morte, inferno & satana: ac superauit eos tam potenter, & gloriose, vt non sibi tantum, verumetiam omnibus subditis suis, qui sunt credentes in ipsum, & col-

locantes in eo, vt vnico ipsorum seruatore, omnem fiducia, insignem, & omnibus seculis decantandam victoriam reportauerit. Etsi enim satan, mors & horrores inferni adhuc hodieq; inuadere solent homines, & minantur eis præsentem, adeoq; æternam interitionem: tamen Christus sic ademit eis suas vires, vt ijs, qui Christo confidunt, nullum prorsus salutis damnum inferre queant, quemadmodum apud Esaïam cap. 25. dicitur: Præcipitabit, seu absorbebit mortem in sempiternum. Et in Osea cap. 13. De manu mortis liberabo eos, de morte redimam eos. Ero mors tua o mors, & pestis tua, inferne.

Quid igitur dicemus? Manifestum est, quòd DOMINVS noster Christus, rex gloriæ, emittat legationem suam, quod est Euangelion suum, in orbem terrarum, & pulsat ostia mundanorum regnorum, vt intro mittatur. Quare si reges, principes & patres familias non solum aperuerint ei suas fores, & intromiserint ad suos subditos, & familiam, verumetiam excipiunt ipsi eum obuia fide, in tantum non est metuendum, ne aliquid incommodi afferat, vt potius omnia tam corporalium, quàm spiritualium, tam terrenorum, quàm coelestium commodorum genera secum adducat. Christus enim non venit in hanc terram hoc consilio, vt principibus suos principatus, & alijs hominibus suas facultates adimat: quippe quòd dicat ipse ad discipulos, cupientes Samaritas, qui negabant ipsi hospitium, igni de coelo perdere; Filius hominis, (inquens) non venit ad perdendas animas hominum, sed ad seruandas. Ad eundem modum dicere licet: Filius hominis non venit, vt auferat principibus sua regna, & reliquis

Luc. 9.

quis hominibus suas facultates, sed vult potius ea tueri. Dixit quidem ad adolescentem diuitem: Si vis perfectus esse, vade, & vende omnia, quæ habes, & da pauperibus. Hæc autem personalis huius adolescentis vocatio, non est generalis omnium Christianorum, ac membrorum Christi, sine vlllo discrimine. Generalem enim vocationem Christianorum describit Paulus ad Thessalonicenses: In hoc, inquit, incumbatis, vt qui^{1. Thes. 5.} eti sitis, & agatis res proprias: & operemini proprijs manibus vestrīs, sicut nos præcepimus: vt vos geratis honestè erga extraneos, & nulla re vobis sit opus. Et ad Timotheum: His qui diuites sunt, in præsentī secu^{1. Tim. 6.} lo, præcipe, ne elato sint animo, neque spem ponant in diuitijs incertis, sed in Deo viuente, &c. Quod autem Christus dederit adolescenti, de quo antè dictum est, peculiare mandatum, de deferendis suis facultatibus, suas habet causas, quas hoc loco commemorare superuacaneum est, & recēsentur alijs copiosè. Sed & Christus Apostolos auocauit à suis mūdānis opificijs, ac negotiationibus. Non fecit autem hoc illo consilio, vt exhibeat vniuersæ Ecclesiæ exemplum, quod p̃j omnes necesse habeant tali modo imitari, & sua opificia deferere, ac se in Eremum, aut in monasterium conferre.

Et quamuis alijs dicat: Si quis ad me venerit, et non^{Luc. 14.} odio habeat patrem suum, matrem suam, uxorem, liberos, fratres & sorores, ac suam ipsius animam, nō potest esse meus discipulus: hoc tamen dicto non abrogat debitam obedientiam liberorum erga parentes, & fœdera connubiorum, ac fraternam inter se charitatem:
sed

sed potius hoc ipso rectam & piam obedientiam, ac veram fraternam charitatem docet & instituit: videlicet, quod obedientia quidem & charitas sanctissimè sint seruanda, non autem præferenda obedientiæ, & charitati, quæ debentur DOMINO nostro Iesu Christo & Euangelio eius. Nam, si quis non fuerit obediens Christo, & odio habuerit Euangelion eius, etiamsi obedierit parentibus, & dilexerit proximos, in conspectu tamen Dei hæc obedientia & dilectio pro inobedientia & odio habebitur.

Ad eundem modum dicendum erit de regnis, principatibus, & facultatibus huius seculi. Christus enim non venit in hunc mundum, ut reddat omnes credentes in ipsum mendicos, & faciat ex Ecclesia sua, ordinem Monachorum mendicantium: sed potius exigit, ut suam quisque vocationem, in qua diuinitus est collocatus, sectetur. Si quis vocatus est ad regni aut principatus gubernationem, probet in ea suam, quam Deo debet, fidem ac obedientiam. Si quis vocatus est ad administrationem œconomix, & mundanarum facultatum, satisfaciat suo officio in timore DOMINI. Si quis vocatus est ad paupertatem, (omnino enim tam diuitiæ, quam egestas sunt à Deo,) obsequatur voluntati Dei, & ferat crucem suam obedienter. Etsi enim multi pii spoliati sunt, propter confessionem Euangelij, non solum mundanis suis principatibus & facultatibus, verum etiam hac sua corporali vita, quæ exempla ne his quidem temporibus desunt: hæc tamen sunt personalia exempla, & peculiare casus, quæ non idcirco proponuntur Ecclesie, ut doceant, illum non esse vere Christianum, qui non à tyrannis & persecutoribus Euangelij,

Euangelij, terrenis suis facultatibus, & corporali vita exuatur. Quemadmodum enim mundanus principatus, non est præcipue in hunc usum institutus, vt continenter bellū geratur, & necesse habeat subditus quisque in bello, vbi de vita periclitetur, versari, sed institutus est, vt subditi ab incurſu prædonum & latronum defendantur: ac vt tranquillam & quietam vitam, sicut Paulus ait, cum omni pietate & honestate degant. Et *1. Tim. 3.* tamen, si acciderit, vt princeps iusserit subditos arma ad defendendam patriam, contra hostes capere, necesse habet quivis subditus iussioni parere: ac non solum facultates suas, verumetiam vitam suam ad tuendam publicam tranquillitatem, periculo exponere. Ad eundem modum habet sese, in hac quidem parte, & in his terris, regnum Christi, & Ecclesiæ eius. Non enim in hoc est præcipue institutum, vt quivis Christianus fiat mendicus, & trucidetur: sed vt in suo quisque siue regio, siue œconomico & priuato vitæ genere, siue in diuitijs, siue in paupertate honestam & piam vitam ducat. Et tamē, si res ita ceciderit, vt oriatur publica persecutio aduersus piam doctrinam, ac Rex noster DOMINVS Iesus Christus iubeat nomen suum, & veritatem Euangelij intrepide & constanter confiteri, (hoc enim est spiritualia aduersus impios Euangelij hostes, arma capere) ibi tū necesse est, vt pius quisque vocacioni eius morem gerat: & siue regnum, siue principatū, siue facultates, siue etiam vitam suam extremis periculis obijciat. Multi fuerunt Ethnici, qui ad tuendam patriam suam, maluerunt de vita periclitari, quàm patriæ suæ deesse. Ac hisce quoque temporibus reperias tam fideles seruos, qui non detrectant pro dominis suis ius

*Matth. 19.**Mar. 10.**Luc. 18.*

xta carnem, omnia sua præsensibus periculis exponere. Quomodo igitur Christiani ea essent ignavia, eaturpitudine, vt ingenua confessione Euangelij, & alijs debitis officijs, non subirent propter Christum & Ecclesiam eius, aut facultatum, aut vitæ pericula? præsertim cum Christus disertè promittat: Nemo est, inquit, qui reliquit domum, aut parentes, aut fratres, aut vxorem, aut liberos, propter regnum Dei, qui non recepturus sit multò plura, imò centupla, in hoc tempore, & in seculo venturo vitam æternam. Iouinianus & Valentinianus eijciebantur ex aula Cæsaris Iuliani, & exuebantur dignitate militari, propter confessionem Christi. Sed Deus compensauit eis hanc iacturam tam munificè, vt paulò post ornauerit eos, loco persecutoris ipsorum, Cæsarea maiestate, hoc est, suprema in his terris dignitate. Tanta enim liberalitate est Christus, vt pro officio, quod ipsi obedienter præstiteris, decem aut centum vicissim reponat. Quare, si Christus pulsauerit vnà cum Euangelio suo portas, nō est excludendus: sed quia adducit secum omnem salutem, reuerenter est excipiendus.

Si autem principes vel contemptu vel metu calamitatis, Christum non solum non obedienter intromittunt, verum etiam Euangelion eius persequuntur, & professores eius in exilium extrudunt, aut interficiunt: aut etiam si intromittant, contumelia tamen & fame ita afficiunt, vt non possit in eo loco diu commorari, fieri quidem solet, vt persecutione sua pios ad tempus perturbent: sed quicquid id est mali, redundabit tandem in ipsorum potius caput, quàm vt fraudi sit Ecclesiæ Christi.

Postquam

Postquam enim hæreditas gentium promissa est Christo Domino nostro à Deo patre suo, quemadmodum in secundo Psalmo scriptum est, & Domini Christi est terra, ac plenitudo eius, teneri non potest, quin hæreditatem suam & possessionem, inuitis etiam tyrannis, accipiat. Et est quoque tanta industria, qua viam & rationem excogitet, vt etiam si principes huius terræ obstant, tamen ingrediatur vnà cum Euangelio, in suam propriam possessionem. Et quia persecutores aut contemptores reiiciunt, aut fastidiunt oblatam salutem, non solum non fient eius participes, verumetiam necesse habebunt perire ipsi, & Christo & Euangelio eius locum dare.

In die Pentecostes, & paulò post pulsauit Euangelion Christi ad portas Iudæorum, sed cum collatis omnibus viribus suis repugnarent, ne intromitteretur, inuenit Christus congruentissimam viam, qua Euangelion suum promoueret, & Ecclesia cresceret, Iudæi autem vnà cum potentia sua conciderent.

Pulsauit etiam Euangelion Christi ad portas Romani imperij, & quæsiuit ibi hospitium, sed etiam si Nero, Dioclitianus, & alij Cæsares ac Reges summa, qua potuerunt, crudelitate obstiterunt, & publicam piorum lanienam exercerent, inuenit tamen Christus rationem, qua in Romanum regnum ingressus est, et collegit ex eo suam Ecclesiam: cum interim persecutores, vnà cum suis Idolis & Idolomania perpetuò interrerint. Omnino enim firmum & fixum est, quod Christus apud Lucam cap. 20. recitat: Quid est, inquit, quod scriptum est: Lapidem, quem reprobauerunt ædificantes, is factus est caput anguli? Omnis, qui ceciderit super illum lapidem, conquassabitur: super quem

autem ceciderit, comminuet illum. Ac nihil certius est, quàm quòd Deus potentissimas Monarchias subuerterit, cum ad illum finem properassent, vt Ecclesiam Dei opprimerent. In Esa. cap. 43. dicit DOMINVS ad Ecclesiam suam: Ego DOMINVS Deus tuus, sanctus Israel, saluator tuus: dedi propitiationem tuam Ægyptum, & Æthiopiam, & Saba pro te, (hoc est) afflixisti propter te Ægyptũ, & alia regna, vt te seruarem.

Esa. 45. Adhæc, promittit Deus Cyro regi Persarum, se à Babylonijs, qui iam toti eò propendebant, vt Ecclesiam opprimerent, Monarchiam suam ablaturum, & ipsi traditurum, propter seruum meum, inquit, Iacob & propter Israel electum meum. Ac iterum cap. 68. Gens & regnum, quod non seruerit tibi, peribit, & gentes

Dan. 2. solitudine vastabuntur. Quid multis opus? In Daniele abscinditur lapis de monte, siue manibus: & percutitur statuam in pedibus eius, vt concidat: lapis autem fit mons magnus, vt impleat totam terram. Hic lapis est: Christus vnà cum Euangelio suo, Statua verò adumbrat regna huius seculi. Cum igitur aduenerit Christus vnà cum Euangelio suo, necesse habent ei omnia regna & principatus huius terræ locum dare. Si fecerint hoc obedienter & reuerentur, fruuntur beneficijs eius tam mūdānis quàm cœlestibus, tam caducis, quàm eternis. Si autē resisterint, necesse tamen habent vel iniuncti cedere, & insuper æternam cōdemnationē reportare. Quare principes & patresfamilias huius terræ non possunt meliorem operam nauare, quàm vt portas regnorum & domorum suarum Christo & Euangelio suo patentissimè aperiant: & quo possunt studio procurent, vt doctrina verè pia in Ecclesia obtineat, et

propagetur.

propagetur, quo id maximo ipforum commodo fiat: quod alioqui tamen, si obstiterint, maximo ipforum incommodo fiat, necesse est.

Nam, vt sciamus, DOMINVS nostrum Iesum Christum serio exigere apertionem portarum in regnis huius seculi, & omnino velle vna cum Euāgelio suo progredi, etiamsi vniuersus mundus repugnet, non semel tantum versiculum illum: Dilatate portas, &c. recitat, sed etiam secundo, iisdem penè verbis, repetit: Dilatate, inquit, portas, & altas facite ianuas in mundo, vt ingrediatur rex gloriæ: Quis est iste rex gloriæ? DOMINVS Zebaoth, ipse est rex gloriæ. Cuius versiculi hæc est sententia. Omnino consulendum est vobis huius seculi principibus, vt Christum, & Euangelion eius in vestra regna ac principatus intromittatis. quia etiamsi diu restiteritis, nihilominus tamen perget ingredi, idq; extrema vestra internitione. Christus enim est DOMINVS Zebaoth, & rex gloriæ, (hoc est) verus est Deus, fortis ac omnipotens, quicquid facere decreuerit, magna gloria & potentia exequitur, etiamsi videatur initio imbecillis, & abiectus. Alij reges inchoant instituta sua magna maiestate, & tamen vel tandem pudefiant, necesse est. Hic autem Christus eius modi rex est, quod quæcunque instituerit, maxima gloria perficit, etiamsi videatur initium habere pudendum. Suscepit vincendam mortem, & apparuit tam infirmus, vt occideretur & moreretur ipse, in magna illa, quam ita vocant, sexta feria. Ecce autem tibi, in die Paschæ victoriam ex morte tanta maiestate reportat, vt non solum ipse mortem euadat, verum etiam morti eripiat omnes illos, qui fiduciam salutis sue in ipso col-

locant. Suscepit Euangelion suum diuulgandum inter omnes gentes, & ex his Ecclesiam suam colligendam. Et si autem tam Iudei quàm Gentes cunctis viribus suis restiterunt, & multas hominum myriadas trucidarunt: tamen institutum suum ita perfecit, vt etiam potentissimi reges facti sint, sicut Esaias ait, nutritores Ecclesiæ, & reginæ nutrices eius.

Esa. 49.

VSVS HVIVS PSALMI.

Hic Psalmus initio definit Ecclesiæ Christi, non vnam tantum regionem, sed vniuersum orbem: vt sciamus Ecclesiam non in Aphrica tantum, nec in Asia tantum, nec in Europa tantum, nec in conuenticulis hæreticorum, nec in lustris Monachorum, sed in toto mundo, vbicunque Christus prædicatus fuerit, quærendam esse.

Deinde discernit veram Ecclesiam à falsa, quòd falsa gestet quidem aliquoties epitheton & nomē Ecclesiæ, non habeat autem veras Ecclesiæ notas. Vera autem etsi aliquando nihil minus videatur, quàm vt sit vera Ecclesia, tamen quia sectatur fide sua doctrinam verè piam, habet cor mundum, (fide enim purificatur cor) & dat operam, vt sit innocens manibus, & fugiat omnem vanitatem: idcirco sola pro vera Ecclesia habenda est. Postremò cohortatur omnes principes & patres familiars, vt nullum prius opus faciendum suscipiant, quàm vt Christo & Euangelio eius portas suas aperiant, & quoquo officio possunt, adiuuent. Sunt quidem multa alia politica & œconomica opera, quæ pro sua quisque vocatione, in hac corporali vita præstanda

standa sunt diligenter : nullum autem est magis necessarium, nec vtilius, quàm vt Euangelio Christi locus detur, quò rex glorię, qui est Christus, gubernationem regni sui ita instituat, vt simus a satana & morte tuti, & consequamur hæreditatem æternæ iustitiæ, omniũq; cœlestium bonorum.

Psalmus 25.

Ad te DOMINE leuavi animam meam, &c.



In hoc Psalmo componendo David singulari vsus est arte, quòd versiculos eius ita disposuerit, vt singuli à singulis iuxta ordinem Hebraici Alphabeti literis (excepta litera ∇ Kaph, pro qua littera ∇ Res, bis repetitur) inciperent. Qua indultria compositi sunt etiam nonnulli alij Psalmi, videlicet, 34. 111. 112. & 119. Hoc exemplum secutus est Hieremias in suis Threnis, & apud Latinos Sedulius, in carmine illo Ecclesiastico.

- A A solis ortus cardine, &c.
- B Beatus autor seculi, &c.
- C Clausa parentis viscera, &c.
- D Domus pudici pectoris, &c.
- E Enixa est puerpera, &c.
- F Fœno iacere pertulit, &c.
- G Gaudet chorus cœlestium, &c.

Sive autem Spiritus sanctus isto ceu ludo, sed eruditio.

ps. hic cor. formula
precis in Ecclia
et privatim.

adito, & iucundo, peculiari consilio sit delectatus, siue
memoriæ iuuandæ gratia factum sit, certè hic Psalmus
videtur esse formula precationis, quæ à Spiritu sancto
fit præscripta: vt non solum publicè in Ecclesia reci-
taretur, verumetiam priuatim in suis quisque aduersis
ea vteretur, qualis apud nos est oratio Dominica. Cō-
tinet enim non vnum tantum, sed varia genera afflic-
tionum, à quibus precator se liberari cupit. Nunc es-
nim orat, vt Deus doceat ipsum ambulare in via veri-
tatis: nunc petit, ne **DOMINVS** meminerit peccato-
rum adolescentiæ suæ, sed clementer ea, adeoq; omnia
alia, quæ ingenuè confitetur multa & magna esse, con-
donet ac remittat: nunc rogat, vt in multitudine inimi-
corum, & iniquo eorum odio saluus conseruetur: ac
breuiter petit, se & vniuersum Israelem, seu Ecclesiam
Dei ex omnibus angustijs redimi ac liberari. Interea
interferit quasdam conciunculas de clementia, boni-
tate & misericordia Dei, vt fidem precatoris confir-
met, & eum ad preces inflammet. Quare sentiamus,
hunc Psalmum esse generalem precandi formulam,
qua afflictus quisq; quocunq; afflictionis genere tenes-
atur, vti possit.

1. *Ad te DOMINE animam meam attollo Deus meus.*
 2. *In te confido, non pudeſciam, ne latentur inimici mei aduer-
sum me.*
 3. *Etenim, omnes qui te expectant, non pudeſcent: pudeſcent
autem vani contemptores.*

Hi tres versiculi sunt propositio, qua significatur,
hunc Psalmum esse precatoriū, & docetur, quod Deus
non

non sit oscitanter & somnolentè, sed maxima fiducia,
 & certissima spe inuocandus. Quid ergo sibi velit, ex
 antithesi patefiet: D O M I N E, inquit, Deus meus, attol-
 lo animam meam A D T E. Gentes attollunt in inuoca-
 tione sua animas suas, ad Idola, ad simulacra, quæ ha-
 bent os, & non loquuntur, habent oculos, & non vi-
 dent, habent aures, & non audiunt, &c. Papistæ attol-
 lunt in sua inuocatione animas suas ad homines sanctos
 in Christo quiescentes, & ad stutuas eorum. Hypocri-
 tæ attollunt animas suas, ad opera manuum suarum.
 cum enim inuocent nomen Dei, fiducia suæ ipsorum
 iustitiæ, quam faciunt, verè dicuntur opera manuum
 suarum inuocare. Ego autem ad te solum D O M I N V M
 Deum meum attollo animam meam: ego te solum pre-
 cibus meis inuoco. Alij in inuocatione sua confidunt
 sua sapientia, alijsua fortitudine, alijsua iustitia: ego
 aut in te solo, D O M I N E Deus meus, & in sola tua cles-
 mentia ac misericordia confido. Alij siue Ethnici, siue
 Hypocrite inuocant Deum, cum dubitatione, sine vlla
 fidei & spei certitudine: ego aut inuoco te, certissima
 spe concepta, quod non pudefacias me, quod non fasti-
 dias preces meas, ne inimici non tam mei, quam tui,
 voluptatem ex mea repulsa capiant. Obseruemus igitur
 hanc propositionem docere nos, quod vt solū D O-
 M I N V M Deum nostrum, in precibus nostris inuoca-
 re debeamus, ita Deus nō cum dubitatione, sed firma
fide, & certa exauditionis spe sit inuocandus. Vnde
 autem concepit precator tantam fidei & spei certitu-
 dinem, vt verè & constanter affirmare queat, se in
 precibus suis pudore non afficiendum, sed certissimè
 exauditum iri? De hac re admonet nos tertius versis

N

culus:

*Non os oscitante sed
 firma fiducia inuocante*

Psalm. 117.

*Vnde certissime fidei et spei
 de precis exauditione*

culus: Omnes, inquit, qui te expectant, non confundentur, non pudebunt, non patientur in inuocatione sua repulsam, ego autem te expecto. non potest ergo fieri, ut pudeam, & patiar in inuocatione mea repulsam. Hic sciamus primum omnium, quod hæc propositio vniuersalis: Omnes, qui expectant DOMINUM, non pudebunt, sit maxima (ut Dialectici loquuntur) theologica, & ut alias sæpe in sacris literis repetitur, ita est certissimæ veritatis.

*Maxima theologia
quia*

Psal. 37. Expecta DOMINUM, & custodi vias eius, & exaltabit te, ut hæreditate capias terram.

Psal. 40. Expectans expectaui DOMINUM, & intendit mihi. Et iterum: Beatus vir, cuius est nomen DOMINI, spes eius, &c.

Esa. 30. Deus iudicij DOMINVS, beati omnes, qui expectant eum.

Deinde, cum nihil certius sit, quàm quod Deus exaudiat, & seruet expectantes ipsum, videndum est, quid propriè sit expectare DOMINUM: ne vanitate humanarum cogitationum nos ipsos decipiamus. Expectare igitur DOMINUM, initio est, credere in Christum, quod habeamus propter ipsum condonationem peccatorum, & simus cum Deo patre ita reconciliati, ut agnoscat nos propter Christum, filios & hæredes cœlestium bonorum. Hæc est prima & præcipua pars veræ expectationis.

*Expectare Dominum
quid?*

Deinde expectare DOMINUM, est credere, seu confidere, quod afflictiones, qualescunque sint, siue corporales, siue spirituales, siue nobis coram mundo meritis, siue immeritis contingunt, immittantur nobis, Deo non ignorante, sed optimè sciente, ac administrante:

&

& non ab irato, aut à nobis alienato, & extremo nos odio prosequente, sed benigno, clementi & propitio, ne dicamus, quod est apud Hieremiam: Quis est ille, *In Threnis* qui dicit, vt fieret DOMINO non iubente: Ex ore *cap. 3.* altissimi non egredientur, nec mala, nec bona.

Postremò expectare DOMINUM, est in afflictione non se conuertere ad execrationes, ad virulentiam, ad incantationes, aut ad alia impietatum & scelerum genera, nec illud Ethnicì dicere: Flectere si nequeo superos, acheronta mouebo: sed est in vocatione Dei, & in vera inuocatione nominis eius obedienter & constanter perseverare. Qui ergo ad hunc modum expectant opem DOMINI, non pudebunt. Demonstrabimus id vno & altero exemplo. Ioseph filius Patriarchæ Iacob accusatur adulterij, & coniicitur, vt adulter in carceres. hæc est maxima afflictio. Sed Ioseph expectat Dominum. Primum enim credit se habere peccatorum suorum remissionem per semen auo suo Abrahamæ promissum, & Deum sibi propter hoc semen, (qui est Christus) propitium. Deinde credit, hanc afflictionem sibi contingere, non inscio, sed conscio Deo, non irato, sed propitio. Postremò, non projicit virulenta conuitia in adulteram, non execratur cælum & terram, non quærit opem vel apud Idola Aegyptiaca, vel apud Dæmonia, & incantatores: sed perdurat in vocatione Dei obedienter, & perstat in vera nominis Dei inuocatione. In hac igitur expectatione tantum abest, vt pudeat, vt etsi necesse habet plusquam duobus annis squalores carceris perferre, tamen quò diutius expectat, eò gloriosius liberatur, ac è car-

*David.*1. Reg. 24. &
26.

cere ad principatum Ægypti euehitur. David eiicitur, vt seditiosus, à rege Saule in exilium, & necesse habet diu, incertis sedibus, & magno, imò præsentis vitæ suæ periculo vagari. Sed expectat DOMINUM. Credit enim se Deo acceptum propter Christum promissum, & hanc exiliij crucem sibi impositam, non humanitus, sed diuinitus, idq; Deo propitius, nec execratur aduersarium, Saulem, nec quarit opem impiæ, nec appetit vindictam illegitimè, sed etiamsi Saulem in potestate sua haberet, & occidere, ac regnum eius inuadere posset, tamen ait: Propitius sit mihi DOMINVS, ne faciam hanc rem Domino meo Christo, vt mittam manum meam in eum, quia Christus DOMINVS est. Viuit DOMINVS, quia, nisi DOMINVS percussisset eum, aut dies eius venerit, vt moriatur: aut descendens in prælium perierit, propitius mihi sit DOMINVS, vt non mitram manum meam in Christum DOMINI. Quid ergo fit? David non ipse quarit vltionem, sed perseverat in vocatione, & inuocatione Dei. Quare, etsi aliquandiu pudefit, & audit apud impios, aut rerum ignaros, seditiosus, tamen quia expectat DOMINUM, non solum liberatur ab exilio, verum etiam collocatur in regia maiestate. Hi, inquit, fuerunt coram mundo homines innocentes: potuerunt igitur DOMINUM patienter in aduersis expectare. Quid autem de nocentibus, qui aduersa suis sceleribus sunt meriti? Num & his licet expectare DOMINUM, vt non pudeant? Primum, si merita hominum respexeris, etsi Ioseph & David fuerunt coram mundo innocentes, tamen fuerunt coram Deo peccatores: Si iniquitates, inquit David. ple, observaue. is Domine,

*Ab. Ioseph. Dav. fuerunt
innocentes, qd. de
nocentibus. aut. ut illi
expectato Deum no
pudeant?*

R

Domine, Domine quis sustinebit: Et: Non iustificatur
in conspectu tuo omnis viuens. Deinde, expectatio
DOMINI in aduersis mandata est omnibus, siue inno-
centibus, siue nocentibus. Omnibus enim mandatur,
vt credant in Christum, omnibus mandatur, vt cres-
cant afflictiones non immitti sibi temerè: sed diuinis
tut omnibus mandatur, vt Deo ultionem relinquant,
& inuocent solius Dei opem. Quare, si quis sceleribus
suis meritis est supplicia, debet et ipse expectare DO-
MINVM, & non pudefiet. Quomodo? si meritis est
supplicia etiam coram mundo, agat veram pœniten-
tiam, & in ea pœnitentia expectet DOMINVM, sicut
iam exposuimus. Sic enim fiet, vt etiam si pudefiat cor-
am hominibus, & ad tempus, tamen expectatione sua
non pudefiet coram Deo, nec pudefiet perpetuò. Ma-
nasses, rex Iudæ, meritis est sua impietate & crudeli-
tate carceres: sed quia egit veram in carceribus pœ-
nitentiam, & expectauit DOMINVM, restitutus est in
regnum suum. Latro in cruce meritis est latrocinij-
suis, supplicium crucis: sed egit pœnitentiam, & ex-
pectauit Dominum. Quare, etsi non euasit in his ter-
ris externam latrocinij infamiam, & mortem crucis,
tamen euasit infamiam coram Deo, & assecutus est
pro temporaria vita eternam. Expectemus igitur Do-
minum in omnibus afflictionibus: & viriliter agamus,
vt confirmato corde veram à Domino salutem acci-
piamus: Omnes enim, inquit Psalmus, qui expectant
Dominum, non pudefient. Qui autem sunt illi, qui
pudefient? Addit: Pudefient (inquiens) vani cons-
temptores. Impij enim homines, & impœnitentes, si
quando affliguntur, non expectant Dominum, sed nisi

*Impij et iniqui non
pudefient.*

continuo, ut vnum & alterum verbum precationis dixerint, sentiant præsentem opem, contemnunt Deum vnà cum promissionibus suis: & properant ad Idola, ad execrationes, ad incantationes, ad scelera, alijs quoties etiam ad laqueos. Hi, & alij id genus vani & scelerati homines, quia non expectant Dominum fide & spe, idcirco nihil aliud reliquum est, quàm ut pudeant, etiam si ore suo appropinquent Deo, & ad ipsum verbis suis plurimum vociferentur. Hactenus propositio Psalmi: Nunc sequuntur petitiones.

- 7 4. *Vias tuas DOMINE demonstra mihi, semitas tuas doce me.*
 n 5. *Dirige me veritate tua.*
 n *Et doce me, quia tu es Deus saluator meus, te expecto omnibus diebus.*

Prima petitio: DOMINE (inquit) demonstra mihi tuas vias, doce me tuas semitas, dirige & erudi me tua veritate, te enim solum agnosco Deum seruatores meum: te solum expecto, in te solo spero, ex te solo pendeo, non vna tantum hora, non vna tantum die aut anno, sed omnibus diebus vitæ meæ. Sed quæ aut quas tuis obsecro est hæc precatio? An non nouerat Decalogum, in monte Sinai promulgatum? At in hoc Decalogo continentur viæ Domini. In hoc demonstrantur semitæ Dei, in quibus, ut ambulemus, Deus exigit. Nec potest nobis vel planior via, vel rectior semita ostendi, quàm ut diligamus Dominum Deum nostrum, ex toto corde, ex tota anima, & ex omni fortitudine, ac proximum, sicut nos ipsos. Hæc certè precatior, ex Deuteronomio

Dent. 6.

*non obliuiscimini
 vias Dei et seruitus
 in lege et in testimonio*

nomio nouerat. An non sciebat etiā quid Abrahæ & semini eius promissum erat? An ignorabat dictū esse ad Abrahamū: In semine tuo (qui est Christus) benedicentur omnes gentes? Num oblitus erat, quid Moses *Deut. 18.* de Propheta post se venturo prædicauerat? Et quid? num Dauidi, qui hunc Psalmum primus recitauit, exciderat, quod ipsi de Christo è familia sua venturo, & regnum suum stabilituro, recens promissum erat? Hec enim est veritas illa Dei, qua nihil est certius, nihil firmitus, nihil stabilius. Cum igitur hæc omnia probè fuerint Dauidi, & alijs pijs precatoribus nota, quid est, quòd hoc loco precatur? Primum si considerauerimus *23.* antithesin verbi Dei ad humanas traditiones, & exempla aliarum gentium, manifestum erit, cur precator tam anxie, tam sollicitè petat, vt Deus demonstret ipsi vias & semitas suas. Facillimus enim est lapsus à verbo Dei ad humanas traditiones, & ad aliorum exempla, vt non frustra tam seueriter in lege mandatum sit: Quod præcipio tibi, hoc tantum facito D O M I N O: *Deut. 12.* nec addas quicquam nec minuas. Et: Non declines, nec ad dextram nec ad sinistram. Quare, cum Psalmus hoc loco precatur, vt Deus demonstret ipsi vias, & dirigat ipsum in sua veritate, opponit vias & veritatem D O M I N I, vijs, ac promissionibus humanis. Et est sententia: Multæ sunt viæ hominum, multæ semitæ Gentium, multæ promissiones aliorum populorū, quibus pollicentur sibi tam mundanam, quam coelestē salutem. Ego verò, obsecro te D O M I N E Deus meus, quem solum meum seruatorem agnosco, vt me in agnitione verbi T V I, viæ T V AE, semitæ T V AE, & veriatis T V AE, conserues. Huc pertinet totus Psalmus.

mus centesimus decimus nonus: Beati immaculati in via, qui ambulant in lege DOMINI. Nō qui ambulant in lege hypocritarum, aut aliarum gentium. Vtinam dirigantur viæ meæ ad custodiendas iustificationes T V A S, non hypocritarum, tunc non confundar, cum respexero ad omnia mandata T V A, nō hominum, &c. Deinde, non sufficit, vt verbum DOMINI seu vias, semitas, & veritatem eius scias & intelligas, sed etiam exigitur, vt veritati seu promissioni eius fidem adhibeas, & in semitis mandatorum eius ambules. Petit igitur precator his versiculis, vt Deus largiatur ipsi, per Spiritum sanctum suum, veram fidem, qua & promissionem verbi Dei amplectatur, & ad obedientiam mandatorum eius excitetur & inflammetur. Cum hac prece conuenit etiam, quod est in Psal. 5. DOMINE deduc me in iustitia T V A, propter inimicos meos, dirige in conspectu tuo viam meam. Et Psal. 27. Ostende mihi DOMINE viam tuam, & deduc me in semita recta, propter inimicos meos, Et Psal. 119. Gressus meos dirige secundum eloquium tuum, & non domine-
tur mei omnis iniustitia. Huc conuenit etiam dictum Augustini, breue quidem, sed memorabile: DOMINE, da, quod iubes: & iube, quod vis.

6. *Reminiscere miserationum tuarum DOMINE, & misericordiarum tuarum, quæ à seculo sunt.*
7. *Peccatorum adolescentiæ meæ, & scelerum meorum ne meminervis: sed secundum misericordiam tuam memineris mei tu, propter bonitatem tuam DOMINE.*

Alia petitio, qua Psalmus orat pro condonatione peccatorum

peccatorum, non solum eorum, quæ iam in virili ætate, quæ vocat scelera seu prævaricationes ex contemptu verbi Dei ortas, verum etiam quæ in adolescentia & iuventute designata sunt. Peccata autem seu delicta adolescentiæ intelligenda sunt, non tantum quæ pueri & adolescentes ex imprudentia, ignorantia & incogitantia perpetrant, sed imprimis illud, de quo in Genesi cap. 8. dicitur: Sensus & cogitatio humani cordis, sunt malum, ab adolescentia sua. Et apud Matthæum cap. 15. Ex corde exeunt cogitationes male, cædes, adulteria, strupra, furta, falsa testimonia, conuitia: hæc impurum reddunt hominem: vocatur autem aliis peccatum originale. Petit igitur condonationem omnis peccati, siue originalis, siue (quod ita vocant) actualis. Nec petit oscitanter, & semel tantum, sed repetit magno ardore iterum atque iterum, mox enim addit: Propter nomen tuum, DOMINE, propitius esto peccato meo, MYLTVM est enim. Ac iterum: Respice afflictionem meam & laborem meum, & remitte omnia peccata mea. Non certè toties idem repeteret, idq; in eodem Psalmo, nisi affectus esset ardentissimus. Nec est mirum, quod condonatio peccati tam instanti petitione vrgeatur, hoc enim beneficio nihil potest homini contingere, nec magis necessarium, nec magis salutare. Vbi enim est peccati condonatio, ibi reliqua omnia sunt salua: nec mors, nec satan, quicquam amplius iuris habent. Et Deus non solum est propitius, sed etiam pater liberalissimus, qui agnoscat eum, cui peccatum est condonatum, filium & hæredem omnium cœlestium bonorum. Quid ergo deerit ei, etiamsi in hoc mundo omni genere calamitatis pres-

Peccata iuuentutis

*repetit peccatum originale
et affectu ardentissimo.*

matur? Vbi autem non est peccati condonatio, quid proderit ei homini, etiamsi omnes huius terræ facultates, & omnia regna huius mundi possederit? Quare, vt ad veram salutem nihil nobis magis necessarium est, quàm condonatio peccati, ita nullum aliud beneficium potest nobis à Deo contingere vtilius, & preciosius.

*hæc fiducia peccatoris non est
potenda? quæ merito
impotenti?*

Sed qua fiducia, qua prærogatiua petendum est hoc beneficium à Deo? & quo merito Deus beneficium condonationis peccati nobis confert? Num fiducia, num merito iustitiæ nostrorum operum? Nihil minus, sed tantum fiducia gratuitæ Dei clementiæ, propter Iesum Christum. Sic enim dicit Psalmus: Reminisce remissionum tuarum DOMINE, &c. (hoc est) in remittendo & condonando mihi peccato, non memineris, non respicias mea merita, quia nulla habeo: non consideres meam iustitiam, quia non tantum pecco meis sceleribus, sed etiam in mea, si vlla est, iustitia: propterea quod quicquid boni fecero, minus facio, quàm debeo. Tibi enim tantum sum peccator, & malefactor coram te, vt iustificeris in sermonibus tuis, & vincas, cum iudicaris. Sed memineris miserationum tuarum, & respicias misericordias tuas, quas à seculo ostendisti: ac iudices de peccato meo, non secundum iram tuam, sed secundum misericordiam tuam: & condones mihi mea scelera, non propter maiorum nostrorum merita, sed propter tuam ipsius bonitatem. Obserua, quaeso, diligenter, quoties appellet gratuitam Dei clementiam, ne quid videatur suis aut suorum meritis tribuere, dicit: Memineris miserationum tuarum. Nec hoc contentus, addit: Misericordias tuas,

tras, easq; non tantum, quas Deus heri & nudiusters
 tius, sed à seculo, hoc est, iam inde à rerum omnium
 conditione, ab initio orbis vsque ad hoc tempus, res
 ipsa patefecisti, & declarasti. Etenim si consideraues
 rimus publica misericordie Dei exempla, primum tes
 tificatus est eam Deus conditione cœli & terræ, ac
 omnium, quæ in eis sunt. Hæc enim creauit Deus,
 non quia debuit, aut necesse habuit, sed quia mis
 sericors est, & voluit condere creaturas, ac impris
 mis angelos & homines, ad participatum suæ bonitas
 tis. Deinde testificatus est eam liberatione Israelita
 rum e tyrannide Ægyptiaca. Quod opus, post condi
 tionem mundi, præcipuum est testimonium diuinæ
 misericordie. Vnde & in præfatione Decalogi in
 culcatur: Ego sum D O M I N U S Deus tuus, qui te edu
 xi de terra Ægypti, de domo seruitutis. Præterea, tes
 tificatus est eā traditione possessionis terræ Canaan,
 & conseruatione in ea, habitabāt enim in ea terra viri
 & bellatores fortissimi. Et tamen Israelitæ hanc terrā,
 deletis illis, beneficio Dei occuparunt. Populi quoque
 finitimi inuaserunt Israelitas, tanquam ad extinguen
 dum commune incendium. Et tamen seruati sunt, non
 ipsorum fortitudine aut iustitia, sed clementia Dei:
 Nō propter iustitias tuas, inquit, & æquitatum cordis *Deut. 9.*
 tui, ingredieris, vt possideas terras eorum: sed quia ille
 egerunt impie, introeunte te, deletæ sunt, & vt cōple
 ret verbum suū D O M I N U S, quod sub iuramento pos
 litus est patribus tuis, &c. Postremo, quod maximum
 omniū est, testificatus est Deus summam suam clemen
 tiam & misericordiam, quod ab initio orbis terre pro
 miserit semē mulieris, & semē Abrahæ ac Dauidis, hoc

publica misericordia
 vel opus

est, filium virginis, & posteritatem Abraham & Davidis, DOMINUM nostrum Iesum Christum, unicum & verum expiatorem peccati nostri, & placatorem diuinæ iræ. Atque hæc quidem de publicis gratuita clementiæ Dei testimonijs. Si autem considerauerimus priuata eius testimonia, plura sunt, quàm quæ enumerari queant. Non enim ignotum est, quantis beneficijs Deus gratuita sua misericordia affecerit Noham, Abrahamum, Lothum, Isaacum, Iacobum, Iosephum, Mosen, & innumeros alios, qui omnes manifestum de immensa Dei clementia testimonium dicunt. De his, ac imprimis de promissione Christi, admonet nunc Psalmus DOMINUM Deum nostrum, imo seipsum ad suam ipsius fidem confirmandam admonet, cum dicit: Reminiscere miserationum tuarum Domine, & misericordiarum tuarum, quæ à seculo sunt. Nec hæc subsistit, sed pergit repetere: Memento mei (inquiens) secundum misericordiam tuam: & ut ardentem animi sui affectum magis declaret, addit: Propter bonitatem tuam, videlicet, quam ab initio orbis, & conditione omnium rerum in eo, testificatus es, quod vnigenitum filium promiseris, (quem & tandem in hanc terram misit) qui peccata nostra expiet, & nos cum Deo patre reconciliet. Hæc est summa bonitas Dei, propter quam petit, ut Deus peccatorum & scelerum suorum non amplius meminerit.

8. Bonus & rectus DOMINUS, propterea docet peccatores viam.
9. Dirigit afflictos recte, & docet afflictos viam suam.

*præter misericordiam
diu. &c.*

10. Omnes semitæ DOMINI, misericordia & veritas, circumspicientibus pactum suum & testimonia sua.

Precationi additur conciuicula, & encomium misericordiæ, qua & ratio redditur, cur liceat DOMINUM pro peccati cōdonatione liberrimè inuocare, & fides in inuocatione confirmatur ac inflāatur, vt non vereatur perfricta (vt ita dicam) fronte, Deum pro peccati remissione appellare. Dixerit enim quispiam: Quid est, quod tam impudenter irrumpis ad thronum Dei, & audes ab ipso remissionem peccati petere? An nescis Deum abominari peccatores, qualem te esse faceris, & preces ipsorum esse maledictas, tantum abest, vt clementer eas exaudiat? Respondet igitur Spiritus sanctus, his tribus versiculis, & commendat bonitatem, ac veritatem Dei. Confitendum enim est, quod nos indigniores simus, quàm vt ad tantam maiestatem accedamus, & propter peccata, quæ designauimus, abiectiores, quàm vt nos nostrorum meritorum fiducia ad tribunal Dei sistamus, sed benè habet: Bonus, (inquit Spiritus sanctus) & rectus est Dominus. Et si tu malus es, tamen Dominus est bonus: et si tu obliqua & praua via ambulasti, tamen Dominus est rectus. Nec frustra tribuuntur ei hæc epitheta. Non enim sibi tantum est bonus & rectus, sed etiam hominibus peccatoribus, quorū gratia hæc sibi sumit epitheta. Nam si naturam eius consideraueris, non est nisi bonitas & rectitudo ipsa. Si voluntatem eius consideraueris, patet ipse eam, cum doceat eam viam, qua peccatores incedere debeant, vt consequantur peccati remissionem: Docet, inquit, peccatores in via, videlicet, vt

O 3 recte

Encomium Dei misericordie

*Bonus et Rectus
et Aug.*

recte in via ambulent : & dirigat afflictos in iudicio, hoc est , manu ducit ipse miseros , humiliatos & abiectos , vt rectè , iuxta sententiam Dei , ambulent in ea via , quam ipse , ad euadendas afflictiones , proposuit.

Quæramus igitur , vbi & quid doceat , & quò dirigat
DOMINVS miseros peccatores , vt seruentur . Ecce
autem tibi doctrinam DOMINI , quæ scripta est in
Genesi . cap . 3 . Postquam enim homo peccauit , & obnoxius factus est omnibus miserijs tam corporalibus , quàm spiritualibus , DOMINVS statim declarat se , quod est & audit , bonum & rectum , ac docet & dirigit miserum hominem in eam viam , qua & peccati remissionem consequatur , & miseriam effugiat . Ac primum ostendit ei peccatum : Quis , inquit , indicauit tibi , quòd nudus esses , nisi quòd ex ligno , de quo præceperam tibi , ne comederes , comedisti ? Ostendit autem ei peccatū , non hoc consilio , vt in peccato periret , sed vt cognosceret , ac detestaretur , adeoque excitaretur , vt quæreret remedium aduersus peccatum & misérias , in quas sese ipse , instinctu diaboli , coniecerat . Deinde ostendit & promittit ei semen mulieris , hoc est , filiū virginis , (sicut Esaias interpretatus est) Christum Dominum nostrum , qui peccatum sit expiaturus , & ab omnibus miserijs liberaturus . Qua promissione exigit , vt miser peccator agnoscat eum fide , & per eam beneficijs eius fruatur . Postremò imponit ei crucem : Maledicta , inquit , terra in opere tuo . Et : In sudore vultus tui vesceris pane tuo . Hæc crux , non idcirco imponitur misero peccatori , vt aut hac afflictione expiet ipse suum peccatum coram Deo , aut prorsus opprimatur : sed vt in agnitione peccati sui destineatur ,

*Quid docet et quò dirigat
 Dom. peccatores ut seruentur*

Exem. Gen. 3.

Esa. 7.

tineatur, & ad fidem in semen mulieris, & ad inuoca-
 tionem DOMINI excitetur. Hęc est via illa, quam bo-
 nus & rectus DOMINVS miseris peccatores docet, &
 in qua dirigit, vt salutem consequantur. Videamus &
 aliud eiusdem doctrine testimonium. DOMINVS edu-
 cturus Israelitas Ecclesiam suam ex Ægypto, ac libera-
 turus eos non solum ex maledictionibus Ægyptiacis
 & corporalibus, verum etiam e peccato, & maledictio-
 nibus spiritualibus ac æternis, quid fecit? quid docet
 eos? in qua via dirigit eos, vt seruentur? Primum, doc-
 et & concionatur ipse de mōte Sinai Decalogum, ma-
 gna & horribili maiestate, qua ducit auditores, (hoc
 est) peccatores in agnitionem peccati, non vt de salute
 desperarent, sed vt ad quærendam veram salutem ex-
 citarētur. Deinde, cum iam officium Decalogi vim su-
 am in ipsis exerceret, & dicerent ad Moysen: Vltra non
 audiam vocem DOMINI Dei mei, & ignem hunc maxi-
 mum amplius non videbo, ne moriar, confestim ad-
 dit DOMINVS concionem de Christo, peccati expia-
 tore: Bene, inquit, omnia locuti sunt, Prophetā sus-
 citabo eis, de medio fratrum suorum, similem tui, et po-
 nam verba mea in ore eius, &c. Hęc est cōcio de Chri-
 sto, quem Dominus missurus erat ad expianda pecca-
 ta humani generis, vt quotquot in ipsum crederēt, ha-
 berent æternam felicitatem. Postremo circumduxit
 eos quadraginta annis in deserto, & afflixit ipsos va-
 rijs ærumnis: non vt in hac cruce interirent, sed vt in
 agnitione peccati detinerentur, & ad inuocationem
 nominis Dei excitarentur. Hęc est via illa, quam doc-
 et DOMINVS peccatores, & semita, in qua DOMI-
 NVS peccatores ita dirigit, vt si fuerint dociles, &
 sequaces,

Amid.

Exod. 20.

Deut. 19.

sequaces, reportent æternam salutem. Hanc viam pos-
 stea omnes Prophetæ & Apostoli doctrina sua pec-
 catoribus ostenderunt & vserunt, adeoque Christus
 ipse; Pœnitentiam, inquit, agite, & credite Euanges-
 lio. Quid multis opus? Non hæc tantum via, seu semita,
 sed omnes, OMNES (inquam) semitæ Dei sunt mis-
 sericordia & veritas, nimirum ihs, qui custodiunt pa-
 trum eius, & testimonia eius. Etsi enim Deus aliquo-
 ties irasci videtur, & affligit, ac promissiones suas ita
 differt, vt videatur earum oblitus, tamen quicquid es-
 gerit, beneficium est, quicquid dixerit, veritas. Cum
 enim natura sua non sit nisi salus, bonitas, clementia,
 benignitas, veritas, probitas, constantia, & quicquid
 est harum virtutum, fieri non potest, quin siue affligit,
 sit beneuolentia, & clementia: siue promissionem dis-
 fert, sit veritas, & probitas. Afflixit Iosephum in Ægy-
 pto, & conuiuit, vt conijceretur, tanquam adulter, in
 carcerem, cum tamen diuino oraculo significatum ei
 fuerat, quod futurus esset fratrum suorum dominus.
 Quid ergo? Num, quod accidit Iosepho à fratribus, &
 in seruitute atque captiuitate Ægyptiaca, fuit ira Dei,
 & mendacium promissionis eius? Nihil minus, sed erat
 beneuolentia Dei & veritas eius, his enim, quasi gra-
 dibus euehebatur Ioseph ad principatum Ægypti, &
 implebatur, quod diuinitus ipsi promissum fuit. Sed in-
 nocens, inquiet quispiam, erat Ioseph, quid autem de
 nocentibus? Nunquid & his omnes semitæ DOMINI
 sunt beneuolentia & veritas? Omnino, siue enim
 DOMINVS affligat innocentem, iuxta hoc seculum,
 siue nocentem, non meditatur æterna sua natura &
 ingenio, nisi salutem, beneficium, vitam & veritatem.

Viuo

*an fuisse Del misericor-
 dia et veritas ipsa
 expeditur quæstio*

*An et nocentibus an Del
 fuisse beneuolentia
 et veritas?*

Viuo ego, dicit DOMINVS apud Ezechielem, nolo mortem peccatoris, sed magis vt cōuertatur & viuat. Et Paulus: An diuitias, inquit bonitatis Dei, ac tolerantiae, lenitatisq; contemnis, ignorans, quòd bonitas Dei, ad poenitentiam te inuitat? Nam quòd multi in aduersis, & afflictionibus suis non fruuntur bonitate & veritate Dei, non est vitium Dei, qui semper manet bonitas & veritas ipsa: sed est vitium hominum, in afflictione impoentium, & incredulorum. Vnde & additur hoc loco, quibus semitæ Dei sint beneuolentia & veritas, (hoc est) qui beneuolentia & veritate Dei fruuntur, nimirum illi, qui custodiunt pactum, & testimonium Dei. Dices ergo: Nulli igitur hominum sunt, quibus semitæ DOMINI sint beneficium, & veritas. Quis enim est, qui pactum Dei, quod est Lex Dei, & testimonia eius, quæ sunt præcepta eius, custodierit, seruauerit, & impleuerit? An non omnes homines peccato ita corrupti sunt, vt legi Dei non subdantur, ac ne subdi quidem possint? Sciamus igitur, quid proprie sit custodire pactum & testimonia, (hoc est) legem & præcepta Dei. Lex enim Dei continet (quod quidem ad hunc locum attinet) duas partes, alteram, Decalogum, & quæ Decalogo comprehenduntur: alteram, promissionem de semine Abrahe, de Christo Domino nostro. Ac Decalogus quidem exigit opera perfectè bona, quæ nullum habeant vitium. Cum autem nullus hominum possit ea, propter carnem, præstare, finis Decalogi proprie est, peccatum ostendere, vt agnoscatur, & ad Christum remittere, vt in ipso conequamur peccati remissionem & iustitiam per fidem, id quod alijs copiose explicari solet. Custodire igitur

Rom. 8.

Custodire pactum & testimonia Dei

legem Dei & testimonia eius, (hoc est) implere legem, hoc loco, est agnoscere peccatum, & credere in Christum, ad quem lex remittit, vt peccatū propter ipsum non imputetur. Itaque qui sic custodiunt pactum Dei, (hoc est) qui pœnitentiam agunt, quæ constat agnitione peccati, & fide in Christum, ipsi omnes semitæ Dei sunt misericordia, & veritas. Sicut enim lex est pædagogus ad Christum, ita Christus non venit vocare iustos, (tales enim in humano genere non inuenit,) sed peccatores ad pœnitentiam. Siue ergo nocens, siue coram mundo innocens affligeris, age pœnitentiā, agnosce peccatū, agnosce & Christum peccati expiatorem, & donabit te Spiritu sancto suo, vt non solum ducas honestam vitam, verū etiam vincas omnia aduersa, adeoq; mortem ipsam in Christo Domino nostro.

- 3 II. *Propter nomen tuum DOMINE, propitius esto peccato meo, quia multum est.*

Redit à conciuicula ad precationem. Et est hic versiculus conclusio seu illatio præcedentis conciuicule, vt sit sententiā: Cum tu DOMINE sis bonus, rectus, clemens, docens peccatores, vt agnito peccato, credat peccati remissionem propter semen Abraham, & diris gens miseros peccatores, ad nominis tui inuocationē, breuiter, cum omnes tuæ semitæ sint misericordia & veritas ipsi, qui credunt, venio iterum ad te, fiducia tue bonitatis, misericordiæ & veritatis: & oro ac obtestor te, nō propter meum nomen aut meritum, sed propter tuum nomen, quod est misericordia, clementia, bonitas, & veritas, vt sis mihi misero & afflicto peccatori propitius,

propitius, ac condones mihi peccatum, quia est multum
 ac magnum. Dices: Quid hoc causę est, quod petiturus
 condonationem peccati, alleget peccati multitudinem
 & magnitudinem? Alij homines solent multitudine
 & magnitudine suorum peccatorum à fide & inuoca-
 tione deterreri: hic potius multitudine peccatorum ad
 inuocationem excitatur, & magnitudine eorum ad
 preces inflammatur? Quomodo igitur intelligendum,
 quod dicit: Propitius esto peccato meo, quia multum
 est? Sciamus ergo, quod duo sint in peccato. Alterum
 est iniustitia, iniquitas, seu impietas ipsa. Huic nun-
 quam conuenit cum Deo, nec fieri potest, vt Deus in-
 iustitię & impietati ipsi ita faueat, vt cum ipsa cons-
 cilietur. Quod enim consortium iustitię, (Deus aus-
 tem est iustitia ipsa) cum iniustitia? quę communio
 luci, (Deus autem est lux ipsa) cum tenebris? Alterum
 est, miseria, calamitas, ærumnæ, afflictiones, & suppli-
 cia, quę sunt stipendia peccati, & quibus peccatores
 propter peccatum obnoxij sunt. Quod autem plura, &
 maiora sunt peccata, eò pluribus & grauioribus sup-
 plicijs & ærumnis peccator est obnoxius. Cum ergo
 dicit: Esto propitius peccato meo, quia multum est, nō
 petit, vt Deus faueat iniquitati aut impietati ipsi pec-
 cati, sed vt respiciat multitudinem & magnitudinem
 miserię, qua propter peccatum affligitur. Qua enim
 sententia ægrotus corpore appellat medicum, & ro-
 gat eum, cura, inquit, obsecro, meum morbum, quia
 immaniter me cruciat, eadem dicit Psalmus: Quæso te
 DOMINE, condones mihi meum peccatum, quia mul-
 tum est, hoc est, multa mihi mala, magna mihi supplicia
 infert, quę, nisi condonaueris peccatum, depriment

*Cum alleget pēti multi-
 tudinem?*

*Quo fit ut pēti
 iniquitas et impietas*

me vsque in æternum barathrum. Quare cum petimus, vt Deus sit propitius peccato nostro, non hoc agimus, vt Deus faueat peccato, sed vt faueat nobis propter peccatum afflictis, quibus ipse suum fauorem & liberationem clementer promissit: Ego, inquit, cum ipso sum in tribulatione: eripiam eum, & glorificabo eum. Et luxa est D O M I N V S ijs, qui tribulato sunt corde, & humiles spiritu saluabit. Deinde, hoc dicto: Propitius esto peccato meo, quia multum est, respicit etiam ad sententiam illius dicti, quod extat apud Paulum Rom. 5. Vbi exuberat peccatum, ibi magis exuberat gratia. Vbi igitur peccatum est multum, ibi speranda est etiam gratia multa: quod quid sit, in Epistola ad Romanos explicatum est.

12. *Quis est iste, qui timet D O M I N V M? docebit eum
viam, quam eligat.*
13. *Anima eius in bonis commorabitur, & semen eius hereditabit terram.*
14. *Mysterium D O M I N I est apud timentes ipsum, & patefaciet eis pactum suum.*
15. *Oculi mei semper ad D O M I N V M, quia ipse educet de laqueo pedes meos.*

Alia conciuncula, qua precator recitando promissiones Dei, excitat & confirmat fidem suam, ad aliam precationem. Hæc primum obserua phrasim scripturæ, qua timentes Dei accipiuntur pro cultoribus Dei, vt Esa. cap. 29. Timent me mandato hominum, hoc est, colunt me sacris ab hominibus institutis. Et apud Salomonem: Initium sapientiæ, timor Domini, hoc est, summa

summa seu caput sapientiæ est colere Deum. Veri autem cultores Dei sunt, qui audiunt verbum Dei, & ex eo agnoscunt peccata sua, quæ detestantur, & credunt in Christum, peccatorum expiatorem: ex qua fide inuocant nomen DOMINI, & sequuntur vocationem eius. Deinde, ubi nos trāstulimus mysterium, ibi Græcus interpretans trāstulit κρυπτόμα (hoc est) firmamētum. Deduxit autem à verbo יסד Isad, quod significat fundare, seu firmare: cum Hebræus habeat יסוד Sod, quod significat mysterium, sacramentum, seu arcanum. Sententiā igitur istorum versiculorum hæc est. In Deuter. cap. 30, dicit Moses: Testes inuoco hodie cælum & terram, quod proposuerim vobis vitam & mortem, benedictionem & maledictionem. ELIGE ergo vitam, vt & tu viuas, & semen tuum. Ex hoc loco textit precator hanc suam conciunculam, & affirmat eum felicem, qui sit verus cultor Dei, qui videlicet agnito peccato ex lege, agnoscit Christum ex Euāgelio. Quis est iste, inquit, qui timet DOMINUM? Quam felix, quam beatus, quam benedictus est verus Dei cultor. Quid ita? quia primum DOMINVS docet eum viam, quam eligat. Etsi enim Moses hortatur auditores suos, vt ipsi eligant viam vitæ: tamen humana natura peccato ita corrupta est, vt sua sapientiā nec cognoscat, nec eligat vitam, sed necesse est, vt Deus ipse Spiritu sancto suo excitet hominem, & doceat eum viam eligendam. Pater enim vester cœlestis, inquit Christus, *Luc. 11.* dabit Spiritum sanctum poscentibus se. Docet autem Spiritus sanctus, quemadmodum suprā ostensum est, peccatum agnoscere, quod fit per legem, & credere in Christum; Hunc (inquit) audite, quod fit per Euā-

gelion. Ex quibus sequitur inuocatio nominis Dei per Christum, & obedientia. Deinde, anima timentis seu colentis Deum commoratur in bonis, & semen eius, seu posterius eius accipiunt hereditate terram. Sunt & hæc verba ex lege mutuata, in qua tam Patriarchis, quam posteris eorum, qui audiunt verbum Dei, & custodiunt mandata eius, promittitur benedictio omnium rerum, & possessio terræ Canaan, Leuit. 26. & Deut. 6. & 28. Sed Spiritus sanctus respicit maxime omnium his verbis in benedictionem illam spirituales Iem & cœlestem, de qua dictum est ad Abrahamum: In semine tuo (qui est Christus) benedicentur omnes gentes terræ. Qui enim credit in hoc semen, huius anima commoratur in bonis. Quia cum habeat propter Christum condonationem peccati, & iustitiam coram Deo, etiamsi affligitur morbis, paupertate, & alijs ærumnis, ac obijcitur quoque morti, & horribus inferni, tamen non despondet animum, sed est læta & alacri conscientia, quod sciat se habere Deum propitium propter Christum, qui tueatur & conseruet ipsum in omnibus aduersis. Similiter semen seu posteritas eius hæreditabit terram: quia cum propaget & transmittat doctrinam Euangelij de Christo ad familiam & liberos ac nepotes suos, vt & hi cognoscant Christum & credant in ipsum, transmittit etiam ad ipsos cœlestem hæreditatem. Eadem sententia Angelus in Actis Apostolicis dixit ad Cornelium: Accerse Simonem cognomento Petrum, qui tibi ea dicturus est, per quæ SERUERIS, & TV, & VNIVERSA DOMVS tua. Et Paulus ad custodem carceris: Crede, inquit, in DOMINVM Iesum Christum, & saluus

*An colentis Deum
commoratur in bonis*

*Simul, inquit, huius
salus tua.*

Act. 11.

Act. 16.

saluus eris TV, & DOMVS TVA. Postremò timens Deum, seu verus Dei cultor, accipit illud quoque beneficium, quòd Deus aperiat ipsi suum mysterium, & patefaciat ei suum pactum. Mysterium, quòd Latinis est arcanum, & pactum, de quo hìc fit sermo, est promissio Dei de Christo Domino nostro, & de Euangelio eius diuulgando in vniuersum mundum, non tantum inter Iudæos, sed etiam inter Gentes. De hoc mysterio & pacto loquitur Dauid aliàs in Psalmo 51. Peccatum meum, inquit, cognosco. Et mox: Ecce (cognosco etiam) veritatem, quæ tibi placet, sapientiam in intimis & abscondito (latentem,) patefacis mihi, hoc est, reuelas mihi Euangelion tuum de Christo promisso, quæ est summa sapientia, alijs ignota & abscondita. Et Christus, cum apud Matthæum cap. 11. ait: Gratias ago tibi pater DOMINE cœli & terræ, quòd cum hæc absconderis à sapientibus & prudentibus, reuelaris ea paruulis. Ac Paulus Romano. 16. Ei sit gloria, qui potens est vos confirmare secundum Euangelion meum, & præconium Iesu Christi, iuxta reuelationem mysterij, temporibus æternis taciti, manifestati verò nunc, & per scripturas Propheticas, iuxta delegationem æterni Dei, in obedientiam fidei, in omnes gentes patefacti. Et iterum ad Corinthios: Loquimur sapientiam Dei in mysterio. 1. Cor. 2. quæ est recondita, quam præfinierat Deus ante secula, in gloriam nostram, quam nemo principum seculi huius cognouit, &c. Sic etiam ad Ephesios cap. 1. & ad Colossenses cap. 1. Euangelion de Christo vocatur mysterion, reconditum quidem à seculis & à generationibus, nunc autem patefactum. Euangelion igitur de Christo

*Deus agis ipsi sunt
mysterium et pactum*

Mysterium.

*Mysterium à seculis
absconditum.*

Christo Domino nostro est sapientia illa, qua aperte cognoscimus, Deum esse nobis placatum propter Christum, & adoptare nos in filios ac hæredes cœlestium bonorum, ideoque emittere spiritum in corda nostra, ut clamemus, Abba pater. Dicitur autem hæc sapientia, *mysterium, seu arcanum, à seculis absconditum*, non quod fuerit Patriarchis & pijs, ante aduentum Christi in carnem, quantum quidem ad salutem necessarium erat, ignotum, habebant enim promissionem de semine mulieris & Abraham: sed quod illis temporibus, typis adhuc & umbris legis tegeretur, & nondum inter gentes diuulgatum esset. Quæ cum ita se habent, videamus nunc, quo euentu precator hanc concionem iam recitauerit. Dixit, quod DOMINVS doceat mentem seu cultorem Dei, viam rectam: & benedicat eum benedictionibus illis, quæ promissæ sunt Abraham, in semine suo, (quod est Christus,) ac patefaciat ei *mysterium & pactum*, quod est Evangelion de Christo, ex quo datur Spiritus sanctus, excitans corda nostra, ut clament ad Deum, Abba pater. Hac igitur concione recitata, precator *fide ita confirmatur*, & ad precandum *inflammatur*, ut *mox exclamet*: Oculi mei semper ad Dominum, quia ipse euellet de laqueo pedes meos. Sicut enim vel aues, vel ferae terrestres laqueis ex improviso capi solent, ita ego varijs laqueis implicatus hæreo, ut nesciam, quò me vertam. Captus sum laqueo peccati, quo ita constrictus sum, ut satan rapiat me ad omnia genera afflictionis. Captus sum laqueo mortis, quo sic teneor, ut existimem me non nisi ad infernum trahi. Quid igitur faciam? quò oculos meos dirigam? Certe, non alio, quam ad Dominum

Domini Deum meum, qui cum promiserit mihi benedictionem in semine Abrahamæ, & patefecerit mihi mysterium Euangelij sui, quo pactus est, se inuocantes nomen suum, in aduersis saluos facturum, non dubito, quin pedes meos ex his laqueis explicet, ac me in veram libertatem educat. Nec hinc subsistit precator, sed pergit precando ad finem vsque Psalmi.

16. *Respice in me, & miserere mei, quia vnicus sum, & afflictus.*

Singuli versiculi, qui sequuntur, singulae sunt preces, quæ tamen omnes eandem ferè sententiam habent, & ad eundem finem properant. Respice, inquit, super me. Quid? An non semper sumus in prospectu Dei? Quis enim potest se a facie DOMINI, cælum & terram implentis, abscondere? Psalmus igitur hoc loco non loquitur de respectu Dei, qui est per clemenciam eius: sed de eo respectu, qui est per gratiam & clemenciam eius. Vnde mox sequitur: Et miserere mei. Respice super me, non propter me, aut propter mea merita: sed propter te, propter misericordiam tuam. Quid autem illud est, propter quod speras misericordiam Dei? Non certè aliud est, quàm quòd sum unicus (hoc est) ab omnibus desertus, omnium ope destitutus & afflictus. Deus enim tanta est clementia & philanthropia, ut faueat omnibus humana ope destitutis, & afflictione oppressis: ac promiserit eis, inuocantibus ipsum, liberationem: luxa, inquit, est DOMINVS IHS. *Psalm. 34.* qui tribulato sunt corde, & humiles spiritu saluabit. Et: Sacrificium Deo spiritus contribulatus, cor contritum

*Respice. de respice
& gratiam*

Q

tum

Psal. 51. tam & humiliatum Deus non despicias. Quare, cum & ego sim propter laqueos, quibus captivus teneor, propter miseras & afflictiones, quibus obrutus sum, spiritu contribulato, & corde contrito, nec videam ullum humanum auxilium, non dubito, quin me clementer respicias, & miserearis mei.

2 17. *Afflictiones cordis mei auctae sunt, ex angustiis meis educ me.*

Alia verba, sed eadem precatio. Nam quò auctiores sunt afflictiones, & grauiiores angustiae, eò propius est auxilium Dei, quippe quòd ubi desinit humanum auxilium, ibi incipiat diuinum. Excelsus enim DOMINUS, sed humilia respicit, & alta à longè cognoscit.

Psal. 138. 18. *Respice afflictionem meam, & laborem meum, & remitte omnia peccata mea.*

Repetit iterum precatorem pro peccatorum remissione, in hoc enim vno beneficio, omnia reliqua continentur. Vbi enim est remissio peccatorum, (quem admodum paulo ante admonebamus) ibi Deus est propitius. Hoc autem propitium, quid amplius, aut queres remur, aut quaereremus. Hoc propitium, irascantur sanè afflictiones, ærumnae, satan, mors & infernus, necesse tamen habent salutem nostram magis iuuare, quam impedire. Ad Paulum precantem, ut discederet ab ipso nuncius satanae, dixit DOMINUS: Sufficit tibi gratia mea: Nam virtus mea per infirmitatem perficitur. Hæc vox sonet in omnium afflictorum, & laborantium auribus, ut etiam si aduersa post invocationem

nem

nem nominis Dei, augeri potius, quam decreſcere viſ
deantur, ſciant tamen ſe contentos eſſe debere, quòd
habeant Deum propitium, qui non ſolum dabit in ten-
ſatione euentum, vt poſſint ſufferre, verumetiam eò
glorioſius liberabit, quò diutius auxilium differri vi-
detur. Si enim Deus pro nobis, quis contra noſ?

19. *Reſpice, quàm multi ſunt inimici mei, qui iniquo odio ode-
runt me.*

Non affligunt me generalia tantum humani gene-
ris aduerſa, quibus propter peccatum obnoxij ſumus,
verumetiam peculiariter homines ipſi, quos ad colen-
dam amicitiam Deus condidit, ſunt mei inimici, & hoſ-
tiliter me perſequuntur. Quæſo igitur te DOMINE
Deus noſter, vt in hac inimicorum meorum perſecu-
tione clementer me reſpicias: idq; duplici de cauſa:
quòd & ſint MULTI: & oderunt me INIQUE. Multi-
tudo inimicorum auget terrorem. Iniquitas odij auget
indignitatem. Quò igitur maius eſt & indignius peris-
culum, eò proximior, & promptior DOMINI
opem ſperemus. Sed quid eſt, quod ait: Inimicos odiſſe
ipſum odio iniquo, ſeu immerito? An non vel Ioseph,
vel David, vel Iofaphat, vel Ezechias, vel alius quis
ſpiam precatore, etiamſi coram hominibus fuerit inno-
cens, habet tamen ſua peccata, propter quæ ſit obno-
xius maledictioni illi, quæ extat Deuter. 28. Omni-
tempore calumniam ſuſtineas, & opprimaris violen-
tia, nec habeas qui te liberet? Sciamus igitur, quòd ſi
noſtrum quiſpiam quantumcunq; pius & coram hoc
mundo innocens, non collatus cum alijs hominibus, ſed
cum diuina iuſtitia, ſtatuert ſe ad tribunal Dei, tunc

*Inimici mei
qui iniquo odio
oderunt me.*

necesse habet ingenue fateri, quod est in alio Psalmo: Si iniquitates obseruaueris DOMINE, DOMINE quis sustinebit? Et: Non intres in iudicium cum seruo tuo, quia non iustificatur in conspectu tuo omnis uiuens. Si autem conferamur in causa per se iusta & pia, cum iniustis, & impijs persecutoribus, ac virulentis verbi Dei, & nostris hostibus, ibi tum recte de inimicis nostris, etiam coram Deo dicimus: Odio iniquo oderunt me. Itaq; licuit hoc modo, Iosepho aduersus fratres suos, Israelitis aduersus Aegyptios, Dauidi aduersus Saullem, Apostolis aduersus persecutores Iudaeos & Gentes, breuiter, omnibus pijs aduersus hostes suos vere orare, & dicere: Respice, quam multi sunt inimici mei, qui oderunt me INIQUO odio.

20. *Custodi animam meam, & erue me: non pudeam, quia spero in te.*

Satis fuisset dicere: Respice, quam multi sunt inimici mei. Spiritus enim sanctus, qui intercedit pro pijs gemitibus inenarrabilibus, recte, & sine vlla obscuritate intelligit, quid sibi precator hoc verbo (respice), velit: nec indiget vlla interpretatione, sed quemadmodum Deus solet nobiscum, vt cum pueris loqui, ita & precator loquitur cum Deo, quasi cum imperito, & eo, qui expositione verborum indigeat, vt & alias, quasi cum dormiente & obliuioso: Exurge DOMINE, exurge, quare obdormis, & quare obliuisceris me perpetuo. Sic & hoc loco: Custodi, inquit, animam seu vitam meam, & erue me. Dixi autem: Respice, quam multi sint inimici mei: sed vt recte me intelligas, illud peto.

peto, vt defendas vitam meam, & libera me ab immanitate inimicorum meorum, ne opprimar ab ipsis, & pudeam: non quòd multum referat, me probro affici, sed quod probrum meum redundet in tui nominis ignominiam: propterea quod impij dicturi sint, te non potuisse seruare sperantem in te, & vanas esse tuas promissiones, quibus recepisti, te afflictis, et sperantibus in nomen tuum opem laturum. Exponere autem Deo, & admonere eum, quòd, si inuocatus non succurrat nobis in nostris aduersis, non periclitetur tantum nomen nostrum, id quod non multum referret, sed quod maxime omnium periclitetur gloria nominis Dei, & fama tam misericordiae, quam veritatis eius, compensataria est ratio & via, qua ad exaudiendum preces, & ad succurrendum in aduersis excitetur. Non potest enim ferre, vt gloriam veritatis & clementiae amittat. Hac ratione expugnauit Moses animum Dei, cum institueret Israelitas delere pestilentia. In Numeris enim cap. 14. dicit DOMINVS: Feriam eos pestilentia, & consumam: te autem faciam principem super gentem magnam. Sed Moses intercedit: Vt audiant, inquit, Aegyptij, de quorum medio eduxisti hunc populum, & habitatores terrae huius, ac dicant: Non poterat introducere populum in terram, pro qua iurauerat: idcirco occidit eum in solitudine. Magnificetur ergo fortitudo Domini, &c. Huc respicit etiam Psalmus, cum hoc loco dicit: Non pudeam, quia spero in te. Dominus enim promisit suam opem omnibus sperantibus in ipsum.

Arripimus precem.

Psalm. 30. In te Domine speraui, non confundar in aeternum.

Q. 3. Psalm.

Psalm. 31. Multa flagella peccatoris, sperantem autem in DOMINUM, misericordia circumdabit.

Psalm. 90. Quoniam sperauit in me, liberabo eum, protegam eum, quoniam cognouit nomen meum.

Cum igitur ego sperem in DOMINUM, non dubito, quin me sit seruaturus ne pudeam: vt non periclitetur veritas promissionum eius, quibus recepit se sperantes in ipsum liberaturum.

21. *Integritas & rectitudo muniant me, quia te expecto.*

Hunc versiculū alij aliter interpretantur: Faciamus igitur periculum, num & nos aliquid afferamus, quod ad rem faciat. Ac initio, nō est verisimile, quod precator iactet suam ipsius integritatem & rectitudinem coram Deo, præsertim, cum seu petat se his muniri, seu assermet, se his munitum esse. Etsi enim habere iustam causam aduersus inimicos, ingens est consolatio conscientiae, tamen non est coram Deo iustitia causae, sed tantum gratuita Dei clementia confidendum. Deinde, Psalmus decimus nonus describens auctoritatem & virtutem Euangelij de Christo, tribuit ei, præter alia, etiam duo illa, quæ hîc commemorantur, integritatis, & rectitudinis epitheta: Lex DOMINI, (inquiens) hoc est, doctrina Euangelij, est sincera seu integra, seu immaculata: & mandata DOMINI, (quæ & ipsa sunt cōcilio Euangelij) sunt recta. Quod enim in Euangelio Christi promittitur, hoc integrum est, rectum est, verum, certum, stabile, firmum, planum, nullo prorsus vitio, nulla macula, vt quicumq; crediderit, certissimam salutem consequatur. Sententia igitur huius versiculi hæc est: Quæso te DOMINE, vt siue aduersus hostes meos,

meos, siue aduersus alias afflictiones, muniant & circumuallent me, tanquã castra, integritas & rectitudo, non quidem mea, si enim iniquitates obseruaueris Domine, Domine quis sustinebit: sed Euangelij, seu promissionis tue, qua & ex semine meo pollicitus es Christum, (siquidem intelligamus Dauidem hunc Psalmũ de sua persona recitare,) & regnum Israelis, qua etiam pollicitus es te mihi in omnibus aduersis propitium propter semen Abraham (qui est Christus.) Hanc promissionem scio esse synceram, probatam, verissimam, certissimam, rectissimam, quæ uidelicet recta ad cœlestem salutem ducat. Hac promissione munitus sum contra omnes tam homines, quàm afflictiones aduersarias. Nec dubito, quin eam sis constanter seruaturus, non iuuando tantum alios, verum etiam meipsum. Quid ita? Quia te expecto. In præsentia quidem nihil minus videtur, quàm vt promissio tua in me impleatur: sed de felici euentu nihil dubito, quia te expecto, ex te solo pendeo, in tuas tantum manus respicio. Quare etiam si hostes sunt multi, afflictiones sunt graues, tamen liberatione & salute nihil est certius. Beati enim omnes, qui expectant eum, iuxta illud, quod supra dixit: Omnes qui te expectant, non pudefiunt. Esa. 30.

22. *Redime Deus Israel ex omnibus afflictionibus eius.*

Finitis versiculis, qui à singulis Alphabeti Hebraici literis ex ordine incipiunt, addit adhuc vnum versiculum, quo admoneat precatorem, vt in precibus suis, non tantum pro se & sua priuatim salute, verum etiam pro salute vniuersæ Ecclesiæ sit sollicitus: Redime (inquiens) Deus, non me tantum, verum etiam Israel.

lem, hoc est, cunctam Dei Ecclesiam, (quæ Israelis nomine significatur) ex omnibus suis tam corporalibus quam spiritualibus angustijs. Piæ enim charitatis est, non quæ sua tantum sunt, sed etiam quæ aliorum, quæ rere. Et est Sanctorum communio, ut quemadmodum in homine physico, singula membra fruuntur corporis sanitate, ita in Ecclesia, quæ est corpus spirituale, singuli pñ fruuntur beneficijs, quæ in vniuersam Ecclesiam à Deo conferuntur. Vnde & Christus ipse, doctus Apostolos precationem, qua Ecclesia vteretur, præscripsit eis precandi formam vniuersalem: Pater, inquit, **NOSTER**, non meus priuatim tantum. Patrem **NOSTRUM**, non meum tantum. Da **NOBIS**, non mihi tantum, &c.

VSVS HVIVS PSALMI.

Ostendimus suprà, quòd hic Psalmus sit generalis precandi forma, & vsui in quibuslibet aduersis. Quare si quis vel agnitione peccatorum, vel magnitudine periculorum, vel grauitate paupertatis, aut ægritudinis, vel multitudine inimicorum, vel horrore mortis ita territus & expauesfactus fuerit, ut nesciat, quò se vertat, properet ad hunc Psalmum, & procumbat ante **DOMINUM**. Ad te **DOMINE**, inquit, leuo animam meam, quia ad quem alium leuem eam, nō habeo, &c. Obseruandum est etiam in hoc Psalmo, quibus rationibus, non dico, persuadendi Dei, nulla enim humana ratio, aut eloquentia potest animum Dei permouere, sed confirmandæ fidei suæ vtatur. Precor **DOMINE**, ut remittas mihi mea peccata, & libera me ex afflictionibus

tionibus meis. Quam ob causam? Quia:

1. In te confido.
2. Tu es Deus salutis meæ.
3. Te expecto.
4. Propter misericordiam tuam, quæ à seculo est
perpetua.
5. Propter veritatem tuam.
6. Propter nomen tuum.
7. Vnicus sum, & afflictus.
8. Peccatum multum est.
9. Inimici multi sunt.
10. Oderunt me odio iniquo.
11. Afflictiones auctæ sunt.
12. Spero in te.

His & id genus alijs rationibus muniti accedamus cum fiducia ad thronum gratiæ, vt consequamur misericordiam, & inueniamus gratiam ad opportunum auxilium.

Psalmus 26.

*Iudica me DOMINE, quoniam ego in innocentia
mea ingressus sum, &c.*



In statum rerum Ecclesiasticarum in regno Israëlitico, sub rege Saule, & instaurationem piæ doctrinæ ac sacrorum eius, quam Dauid, extincto Saule, instituit, diligenter considerauerimus, haud difficile erit, occasio-

R nem

- nem huius Psalmi, & veram eius sententiam agnoscere. Rex enim Saul, etsi videbatur religiosus, & sacrificiorum præ alijs studiosus; tamen non erat, nihil irulentus hypocrita, & veræ religionis contemptor.
1. Reg. 15. Sacrificat quidem, parta victoria, super Amalec, sed nulla fide, & contra, quàm verbo DOMINI mandatū fuerat. Aufert de terra Magos, & Hariolos, & interficit *εγγασπισμίδους*, sed nulla vera pietate, nam & ipse periculis obiectus, consulit Pythonissam, Instituit delere Gibeonitas, zelo quidem Dei, (quod Gibeonitæ fuerint reliquæ Amorrhæorum, quos DOMINVS delere præceperat,) sed non secundum scientiam, & contra quàm Israelitæ eius iurauerant. Vinctus erat in regem à Samuele, & acceperat per eum regiam maiestatem: sed Samuel illam pro tanto beneficio reportat gratiam, vix ut à tyrannide eius tutus fuerit. Interficet etiam immaniter, nulla prorsus iusta causa, octoginta quinque sacerdotes innocentes: & urbem eorum ita deuastat, ut omnes in ea viros, mulieres, paruulos, lactantes, boues, asinos, & oues, crudeliter occidat. Quo genere immanitatis, quid potest atrocius excogitari? Ac breuiter: David ipse rerum postea Israeliticarum potitus, fatetur paucis quidem verbis, sed luculenter, summum veræ pietatis contemptum, regnante Saule in Israel. Reducamus, inquit, arcam Dei nostris ad nos, NON enim requisuimus eam in diebus Saul. Hinc iam facile æstimari potest, quis fuerit illis temporibus status religionis in Israel. Legitima sacrificia alligata erant verbo Dei ad arcam testamenti. Cum autem ea sit neglecta, sacerdotes interfecti, Samuel contemptus, & quasi fugatus, quid sani putas in religione
1. Paralip. 13.

ligione reliquum fuisse? David igitur suscipiens gubernaculum regni Israelitici, in hoc præcipue studium pro pii principis officio incubuit, ut piam doctrinam & legitima sacra in Ecclesia instauraret: ac primum omnium curauit, ut arca testamenti certum haberet locum, in quo sacra iuxta legem peragerentur. Deinde *1. Paralip. 16.* reformauit & reliqua, iuxta omnia, quæ scripta sunt in lege DOMINI, quam præcepit Israeli. Non est autem dubiū, quin in hac instauratione comitata sit Dauidem ea gratia, quam satan pijs gubernatoribus reddere solet, & quæ etiam in hoc Psalmo haud obscure significatur. Magna enim pars Principum, Sacerdotum, & hypocritarum in vulgo, assueti vilitatæ idolomanie, & illegitimis sacris, ac excitati à satana, sparserunt publice & priuatim, Dauidem esse hæreticum, diuini cultus abrogatorem, veteris & auitæ religionis destructorem, adeoque tam in Deum, quàm in Ecclesiam Dei blasphemum, qui hanc religionis mutationem magis odio Dei, quàm affectu veræ pietatis instituerit: ac præterea esse eum hac impietate authorem omnis calamitatis, quæ Israelitis, à Philistinis & alijs hostibus accidat. Verisimile autem est, hanc de Dauide famam, etiam apud finitimos populos diuulgatam esse.

Hoc enim animaduerti potest ex eo, quod postea Ezechiae accidit. Cum enim & ipse abrogaret impia sacra in Ecclesia Israelitica, & instauraret verè pia, iuxta Legem Dei, audit à Babylonio Rabface, dicens *4. Reg. 18.* te: Quod si dixeritis mihi, in DOMINO Deo nostro habemus fiduciam, nonne iste est, cuius abstulit Ezechias excelsa & altaria? quasi dicat: Rex vester Ezechias defecit à Deo vestro, quomodo igitur pote-

ritis eo confidere? Vides impios mutationem impiorum sacrorum in cultum vere pium, interpretar pro impietate, & abnegatione veri Dei. Idē accidit etiam hoc tempore pñs principibus, qui eruditi Euangelio DOMINI nostri Iesu Christi, abrogant in Ecclesijs suis impia sacra, & restituunt pia. pro hoc enim beneficio reportant illam gratiam, quod audiant defectores ab Ecclesia Christi, condemnatores autē religionis, ac schismatici & hæretici. Cum igitur David in simili causa, similem quoq; haberet inter suos fortunam, nec videret inter homines iudicem, appellat contra sycophantas, calumniatores, & hypocritas suos, ad iudicem DOMINVM Deum nostrum, & expectat ab ipso huius causæ dijudicationem.

1. *Iudica me DOMINE, quia ego in integritate mea ambulabo, & in DOMINO spero, non cadam.*

Hic Psalmus referendus est in longè aliū ordinem, quam Psalmi precatorii. Hi enim constant in genere deliberativo: & implorāt misericordiam atq; clementiam Dei. Ille autem constat in genere iudiciali, & in statu, ut Rhetores loquuntur, Cōiecturali: ac implorat seuerum iudicium Dei. Sciamus igitur, quod David in hoc Psalmolistat se ad tribunal Dei: non autem ut de sua ipsius iustitia & integritate, à Deo per se iudicetur, dicit enim aliās: Non intres in iudicium cum seruo tuo, quia non iustificatur in conspectu tuo omnis vivens: sed ut seueriter iudicetur de iustitia causæ, quam habet aduersus impios sycophantas & hypocritas. Ostendimus enim antea, quod cum David susciperet

sciperet Ecclesiam iuxta verbum Dei reformandam, & aboleret impia sacra, audierit ab hypocritis, & vilitatē idolomanīæ assuetis, hæreticus, veræ religionis osor, impius Dei contemptor, & omnis calamitatis in Israel autor: nec extiterit inter Israelitas Consistoriū, aut Synedrion tam syncerum, cui tutò potuisset tantam religionis causam dijudicandam credere. Maxima enim pars tam Principum, quàm Pontificum & Sacerdotum, (qui enim inter hos verè pii fuerunt, omnes ferè interfecti erant à Saule) corrupti & fascinati fuerunt praua doctrina idolomanīæ & humanarum traditionum. Habebat quidem nonnullos à sua parte, qui de religione rectè sentirent, & institutum suum, quos quo officio potuerunt, aduarent, sed erant ex altera quoq; parte multi, qui & eruditi, & sapientes, & sancti videbantur. Quos ergo constitueret in iudices? Num hypocritas, & piæ doctrinæ aduersarios? sed hic furor esset, non mentis sanitas. Num suos, quos habebat à sua parte stantes? sed altera pars non agnouisset eos iudices. Num constitueret ex vtraq; parte æquali numero, qui de hac causa cognoscerent? sed hoc esset boue simul & asino arare, & occasionem maioris dissidij, dum suas quisque partes tueretur, dare. Num grassaretur in alteram partem gladio? sed recēs erat regnum, erant etiam gladij in altera parte, & incerta est belli, præsertim ciuilis, alea: vt interim non dicam, veram religionis doctrinam, non gladio carnis, sed gladio spiritus, quod est verbum Dei, rectè propagari posse. Quò igitur se verteret? Non habet Synedrion in his terris, cui hoc iudicium deferat, desert iudicio cœlesti: **IUDICA**, inquit, **ME DOMINE**. In qua causa? In

causa religionis, contra hypocritas, Principes & Pontifices. Instauraui in regno Israelitico, abolitis impijs sacris, verum cultum Dei: & instauraui, non iuxta meum arbitrium, non iuxta humanam rationem, sed iuxta integritatem diuinæ legis, cuius administratio mihi credita est. Non iacto meam ipsius integritatem, & iustitiam, agnosco enim me coram Deo miserum peccatorem: sed iacto integritatem, & perfectionem legis Dei, quæ rectè, integrè, & perfectè præscribit, quid in Deo verè colendo sit faciendum, & cuius tam confessio, quam administratio à me diuina vocatione exigitur. In hac integritate profiteor me ambulare: idq; non affectu carnis, sed ex fide, non fiducia humanæ potentiae, sed fiducia DOMINI. In Deo spero, non in armis. Quare non dubito, quin Deus in hoc meo instituto me ita sit adiuturus, vt firmus consistam, & quod proposui, absoluiam. Quid autem gratiæ ex hoc meo officio reporto? quid? nisi odium, inuidiam, accusationem hæreseos, virulenta conuitia, & diras execrationes. Quæso igitur te DOMINE Deus noster, suscipe tu iudicium huius controuersiae, inter me & meos accusatores, & peto, vt non oscitanter, sed seueriter iudices. Sic enim sequitur:

2. *Proba me DOMINE, & tenta me, explora igne renes meos, & cor meum.*

Non prouoco ad iudicium misericordiae, clementiae, gratiæ, & fauoris, sed ad iudicium seueritatis, & exactissimæ iustitiæ. Proba me, inquit, & tenta, quibus modis libet, & non inuenies me aliquid impietatis,
(sicut

(sicut hypocritæ me accusant) designasse. Et quemadmodum aurifabri explorant aurum & argentum igni, num sit probum & syncerum, ita peto, ut meos renes, & meum cor, (hoc est) omnia mea interiora, examines, & quasi excoquas, num deprehendas, me prauo affectu, sicut hypocritæ, & humanarum traditionum sectatores me calumniantur, vocationem à te mihi mandatam, sectatum esse.

Hic iterum obseruemus, Dauidem loqui non de vniuersa sua vita coram Deo per se, sic enim non posset tam seuerum examen, quale hic petit ferre: sed loquitur de officio vocationis suæ, in abolenda idolomania, & restituendo vero cultu Dei. Quod enim ad hoc attingit, tam diligenter omnia iuxta legem Domini administrauit, reformauit, & peregit, ut prorsus nullius sibi, vel impietatis, vel cessationis fuerit conscius. Ne quis autem arbitretur, hanc gloriationem in homine sancto insolentiorē & arrogantiorē esse, quàm quæ probari debeat, extant in scriptura non dissimilia sanctorum exempla, quæ tantum abest, ut Spiritus sanctus improbet, ut potius ea commendet. Ezechias rex Iudæ ægrotat morbo lætali. Et audit ab Esaia: Dispone domui tuæ, morieris enim tu, & non viues: Quod cum audiuiisset, conuertit faciem suam ad parietem, & orat flens: Obsecro, inquires, DOMINE, memento, quæso, quomodo ambulauerim coram te in veritate, & corde perfecto, & quod placitum est coram te fecerim. Obserua, quid dicat: Ambulaui coram te in veritate, & corde perfecto. Quis, reputans corruptionem hominis coram Deo, hæc patienter audiret? Sed hæc precatio in tantum non displicuit Deo, ut non solum abstulerit.

4. Reg. 20.

abstulerit ab ipso morbum, ~~verum~~ etiam quindecim annos ad vitam adijceret.

4. Reg. 23.

De rege Iosia scriptum est. Similis illi non fuit ante eum rex, qui reuerteretur ad Deū in OMNI CORDE, & in TOTA anima sua, & in VNIVERSA virtute sua, iuxta OMNEM legem Moſi: neq; poſt eum surrexit ſimilis illi. Quantum eſt hoc encomium: Putas ne vllum vnquam fuiſſe in terris hominem, (præter Chriſtum Dominum noſtrum,) qui hanc legem: Diligas DOMINUM Deum ex toto corde, ex tota anima, et ex omni virtute ſua, perfectè, ſine vllō vitio impleuerit, quemadmodum hîc de Iosia commemoratur: Et tamen Spiritus ipſe ſanctus tribuit ei hanc laudem. Paulus

Acto. 20.

Apoſtolus, valedicens Ephēſijs Preſbyteris: Confeſſor, inquit, vos hodierno die, quòd mundus ego ſum à ſanguine omnium. Non enim ſubterfugi, quò minus adnuntiarim OMNE conſilium Dei vobis. Et ad Ti-

2. Tim. 4.

motheum: Certamen bonum certavi, curſum conſummaui, fidem ſeruauī. Quod ſuper eſt: Repoſita eſt mihi iuſtitiae corona, quam reddet mihi DOMINVS in illo die, qui eſt iuſtus iudex. Quid ſibi vult hæc ſanctorum hominum iactantia? Num impleuerunt legem Dei tam perfectè, vt potuerint bona conſcientia coram tribunali Dei gloriari, ſe propter merita ſuorū operum iuſtificatos? Nihil minus. Nam Paulus ipſe interpretatur: Nullius, inquiens, mihi conſcius ſum: ſed IN HOC non ſum iuſtificatus. Hoc dictum non ad ſolum Paulum, ſed etiam ad Dauidem, ad Ezechiam, ad Iosiam, & ad omnes Sanctos, qui ſuæ vocationi ſummo ſtudio ſeruierunt, referendum eſt. Dicamus autem in præſentia de Dauide, qui ſe in hoc Pſalmo

ad

ad tribunal Dei sistit, & proficitur se ita ambulasse in integritate diuinæ legis & suæ vocationis, vt audeat etiam ad seuerum Dei iudicium prouocare. Quid? Num sentit se hac sua integritate coram Deo iustificatum? Nihil minus, sed quia accusabatur impietatis & defectionis à lege Dei, sentit se nullius sibi impietatis, in reformanda Ecclesia, & in instaurandis veris cultibus Dei iuxta legem, consciū esse, qua in re possit diuini iudicii seueritatem ferre. Et tamen, quod Paulus dixit, hoc idem dicendum erat Dauidi, Ezechia, & Iosue: Nullius mihi conscius sum, ambulaui coram Deo corde perfecto, reuersus sum ad Deum omni corde, & tota anima, in abolendis videlicet impijs sacris, & in instauranda vera pietate: sed in hac re non sum coram Deo ita iustificatus, vt propter meam iustitiam & merita consequerem remissionem peccatorum, & hæreditatem cœlestis regni. Hæc enim consequimur tantum per fidem, propter semen Abraham & Davidis, qui est Christus Dominus noster. Quæ cum ita sunt animaduersa, licebit nunc reliqua, quæ in hoc Psalmo sequuntur, inoffenso pede percurrere.

Stat enim Dauid ad tribunal Dei, contra hypocristas & sycophantas, qui propter Ecclesiæ reformationem accusauerant ipsum impietatis: & commemorat quæ verè pietatis officia fecerit, & præstiterit: illud videlicet significans, se luculenta iniuria, etiam Deo ipso iudice, ab impijs hypocritis affici.

3. *Quoniam misericordia tua coram oculis meis, & ambulo in veritate tua.*

Primum *argumentum* seu argumentum Davidis, quòd non sit impius aut blasphemus in Deum: Quia, inquit, misericordiam tuam pono mihi ob oculos, & vitam duco iuxta veritatem, seu verbum tuum. In Exodo capite 20. cum Decalogum promulgaret Dominus: Ego sum, inquit, Dominus Deus tuus, faciens misericordiam in millia, his, qui diligunt me, & custodiunt praecepta mea. Hanc misericordiam, hanc misericordiae Dei promissionem, & hanc verbi Dei veritatem, affirmat David, se sibi ob oculos semper posuisse, & omne studium suum in ea collocasse, ut tam in reformanda Ecclesia, quàm in alijs rebus custodiret, pro sua virili, praecepta Dei: & impia quidem sacra aboleret, pia autem, iuxta Mandata Dei, restitueret. Quis igitur posset ipsum impietatis & defectionis à Deo vere accusare? Habes vnum argumentum, quo David depellit à se crimē hereseos aut impietatis. Quo etiam significat, se non dubitare, quin Deus iuxta promissionis suae veritatem, benefactorus sit familiae ipsius, in mille generationes: tantum abest, ut in reformanda Ecclesia aliquid impietatis aduersus Deum, aut verbum eius designauerit. Habent igitur Reges & Principes hoc loco, quo admoneantur, ut si cogitauerint sibi demereri Deum, & familiam suam conseruare, dominationemq; suam ad posteros propagare, diligant Deum, & custodiant praecepta eius: testentur videlicet, dilectionem Dei, & obedientiam erga Deum, instauratione pie doctrinae in Ecclesijs suis, iuxta praecepta Dei, & conferant, quae possunt, officia, ad illustrandam gloriam nominis Dei. Hæc enim est compendiaría via, qua regna & illustres familiae Regum ac Principum conseruantur.

seruantur. Iuxta illud: Quicumque honorificauerit me, 1. Reg. 2.
glorificabo eum: qui autem contemnunt me, erunt
ignobiles. Sed de hac re suprà in Psalmo 24.

4. *Non commoror cum viris vanis, & non coniungo me cum
hypocritis.*
5. *Odi Ecclesiam malorum, & cum impijs non commoror.*

Aliud argumentum, quo testificatur, se non esse im-
pium, nec abrogasse vsitata hactenus sacra, ex impie-
tate. Non commoror, non habeo familiaritatem vllam,
cum ijs hominibus, qui sectantur vana & impia sacra,
nec vllum mihi est consortium cum hypocritis, qui
extrinsecus speciem habent pietatis, sed in abscondis
to cordis dicunt, non est Deus. Ac tantum abest, vt
delecter impiorum hominum societate, vt potius om-
nem Ecclesiam, omnem cœtum, omne synedrion eo-
rum summo odio prosequar. Necesse quidem habui in
exilio, in quod à Saule eiectus fui, aliquoties cum ijs
versari, qui adorabant alienos Deos: hoc autem illud
est, quod summum mihi dolorem in exilio afferebat, &
de quo antea grauter conquestus sum: Maledicti sunt, 1. Reg. 26.
inquiens, qui eiecerunt me hodie, vt non habitem in
hæreditate Domini, dicentes: Vade, serui dñs alienis,
(hoc est) qui cogunt me habitare inter eas gentes, quæ
alienos Deos adorant. Et tamen, ne sic quidem defeci
à Domino Deo nostro: sed etiam si versabar inter ex-
teras gentes, nunquam tamen probaui sacra earum,
sed potius odi omnem earum religionem: nec vnquam
me cum Ecclesia iniquorum ac impiorum hominum
coniunxi.

coniunxi. Plurimum autem refert, quibus cum contubernium agas: Corruptunt bones mores, colloquia & consortia mala: Si iuxta claudū, inquit, habitaueris, fies & ipse claudus. Cum igitur nemo possit verè affirmare, me societatem inīisse cum hominibus impijs, vanis, hypocritis, & sceleratis, nec me vnquam coniunxisse cum impietate idolomanitarum, qua fronte audent me sycophantæ isti impietatis traducere? Mōnent autem hi duo versiculi nos, vt fugiamus impiorum, & sceleratorum hominum contubernia. Et si enim illud non queras, nec agas, vt prauis aliorum moribus corruptaris, tamen & de cuiusque moribus iudicatur ex contubernio eius. Et quemadmodum, qui in sole ambulat, contrahit nigrorem, etiam si non ob hanc causam ingressus sit solem: ita qui cum sceleratis & impijs habitauerit, fieri vix potest, quin etiam præter animi sententiam non nihil vitij contrahat. Quare consortia malorum diligenter sunt cauenda.

6. *Lauo in innocentia manus meas, & adhaereo altari tuo DOMINE.*
7. *Vbi auditur vox laudis, & commemorantur omnia mirabilia tua.*
8. *DOMINE diligo habitaculum domus tuae, & locum habitationis gloriae tuae.*

Aliud signum, quo depellit à se crimen impietatis. Sicut sacerdotes Leuitici non solent sacra facere, illotis manibus: ita nec ego suscipio sacra instauranda impuro corde, sed ex fide, quæ purificat cor, & reddit hominē coram Deo innocētem. Nec instituo aut sector aliena

aliena sacra, sed adhæreo DOMINE altari T V O, hoc est, illa sacra obseruo, quæ tu verbo tuo mandasti: illa sacra instituo, quæ altari tuo, iuxta præcepta tua, conueniunt, quibus videlicet prædicatur vox laudis seu gratiarum actionis, & illustrantur mirabilia tua.

Hæ sunt conciones Decalogi, quo explicatur lex, ad peccati agnitionem, & Euangelij de Messia: quo docetur fides, ad consequendam in Messia remissionem peccati. Huc pertinent sacrificia, quibus sacrificium Messiae adumbratur; huc pertinet explicatio Propheticae scripturae, qua mirabilia Dei opera, ad testificandam potentiam Dei, & seueritatem eius erga impios & impoenitentes, ac misericordiam & clementiam eius erga pios, recensentur. In tali coetu, in tali Ecclesia commorari, quid est iucundius? quid magis salutare? Diligo igitur, DOMINE, habitaculum domus tuae, & gloriosum locum tabernaculi tui. Non diligo excelsa, non diligo lucos, in quibus hypocritæ solent sacrificare, non diligo querceta, in quibus impij sua sacra peragunt: sed diligo DOMINE illum locum, & illud tabernaculum, vbi est arca testamenti tui, & in quo legitima sacra, iuxta verbum tuum peragenda sunt. Sed quia tabernaculum, arca & sacrificia, in Christum Dominum nostrum respiciunt, idcirco, cum Dauid affirmat se hæc diligere, non obscure significat, se in solum Christum respicere, in solum Christum credere, è solo Christo pendere, & ex ipso solo omnem suam salutem petere. Quomodo igitur impietatis crimini obnoxius esset?

Discamus hoc loco, quod sit verum altare & verum habitaculum, ac vera sedes & tabernaculum Dei, vi-

delicet, vbi auditur vox laudis, & annuntiantur miracula Dei, (hoc est) vbi celebratur nomen Dei, voce Euangelij Domini nostri Iesu Christi, vt qui audierint, credant, & qui credunt, agnoscant admirandam Dei clementiam, qua nobis peccata nostra propter Christum condonat, & facit nos hæredes cœlestis regni. Sciamus igitur tunc nos verè in domo Dei versari, cum audimus Euangelion Christi, & credimus nos propter Christum in filios Dei adoptatos, quo excitemur, vt & vitam filijs Dei dignam ducamus.

9. *Ne congreges cum peccatoribus animam meam, & cum viris sanguinarijs vitam meam.*
10. *Qui scelestè agunt, & qui libenter munera accipiunt.*
11. *Ego autem in integritate mea ambulo: redime me & miserebere mei.*
12. *Pes meus constat in rectitudine. In Ecclesijs benedicam DOMINVM.*

Postquam Dauid commemorauit *iniqua* & argumenta, quibus testificatus est se iniustissimè traduci & accusari impietatis, vertit se nunc ad iudicem, & implorat opem eius: ac petit, vt cum suam causam aduersus impios hypocritas & sycophantas probauerit, seruet ipsum, ne vnà cum sceleratis illis hominibus pereat: Ne congreges, inquiens, animam meam cum peccatoribus. Non dubito, quin hypocritæ illi impij certissimè sint perituri: sunt enim homines impoenitentes, virulenti, sanguinarij, scelerati, ac munerum acceptores, (hoc est) peruerterentes iudicia. (Dicitur enim Exo. 23. Non accipies munera, quæ etiam excæcant

cant prudentes, & subuertunt verba iustorum. Rectè igitur per munerum acceptores intelliguntur homines cæcati, & subuertentes seu calumniantes aliorum iuste facta & dicta.) Quare fieri non potest, quin æterno exitio intereant. Ego aut in integritate mea ambulo, & pes meus firmus stat in rectitudine, hoc est, ego res formauì pro mea vocatione Ecclesiam, iuxta perfectā & integram tuam legem: nec declinaui pedibus meis vel ad dextram vel ad sinistram, sed secutus sum rectā verbum tuum. Peto igitur, vt non congreges, non coniungas me cum peccatoribus, non sinas me vnā cum sceleratis hypocritis perire, sed vt redimas me, & miseraris mei. Quid autem hoc? Antè appellauit ad seuerum tribunal Dei, nunc reuertitur ad implorandam misericordiam eius: Sed hoc illud est, quod suprà ex Paulo commemorauimus: Nullius mihi conscius sum, non autem sum in hoc iustificatus. Non subterfugi, quin omnia in instauratione Ecclesię iuxta verbum DOMINI reformauerim: nec dubito, quin sceleratī hypocritæ faciant mihi, in accusatione impietatis, luculentam iniuriam. Iustitia autem meorum operum non est tanti momenti, vt propter ea merear condonationem peccati & æternam vitam: hæc enim donantur nobis, gratuita Dei clemētia, tantum propter Christum, per fidem. Quare, sicut in causa illa, quam habeo aduersus impios hypocritas, non detrecto iudicium tuum, quamuis seuerum: ita quod ad beneficiū remissionis peccatorum, & æternæ liberationis attinet, non nisi gratuitam tuam misericordiam imploro, vt me clementer serues ac tuearis. Pro quo beneficio, etsi non habeo, quod pro dignitate rependam, tamen benedicam

dicam, & laudabo te in Ecclesijs. In hoc studiū incumbam, vt componam Psalmos, qui contineant commendationem glorię nominis tui, & recitentur cū publicē, tū priuatim in Ecclesijs: ac dabo summam operā, vt prædicatio verbi tui transmittatur & propagetur ad posteros, quo homines discant timorem Dei, fidem in Deum, inuocationem solius nominis Dei per Christum, patientiam in omnibus aduersis, & veram obedientiam. hi enim sunt veri cultus Dei, ad quos peragendos prædicatione verbi Dei, & recitatione Psalmorum vocamur. Prodest autem sæpè ac multum meminisse de interitu hypocritarum, & eorum, qui falsam doctrinam sequuntur & tuentur: vt admonitu eius excitemur ad cognoscendam veram pietatis doctrinā, & ad cauendum à falsa. Magna hominum pars iuxta ponunt, siue hanc, siue illam doctrinam in religione sectentur, tantummodo honestam, iuxta externam speciem, vitam ducas. Sed Spiritus sanctus testificatur, quod nisi falsam doctrinam detesteris, & fugias, interitione, vnà cum doctoribus & sectatoribus eius, pereas, necesse sit: Cauete, inquit, à pseudoprophetis, & à fermento Phariseorum, quod est hypocrisis. Et iterum; Si cæcus cæcum ducit, ambo in foueam cadunt.

VSVS HUIVS PSALMI.

Multus est huius Psalmi vsus, præsertim in persecutionibus, quæ vel generaliter propter professionem piæ doctrinæ oriuntur; vel specialiter alicui propter quandam virtutis speciem iniuste accidunt. Et quamquam videtur tantum esse querela Davidis coram Deo,

Deo, cōtra hypocritas, & impios sycophantas, tamen, quia dictatus est à Spiritu sancto, & continet precationem, qua petit precator, ne coniungatur cum sanguinarijs, & sceleratis illis hominibus, significans videlicet, eos horribiliter interituros, idcirco sentiamus eam esse cœlestem sententiam, quæ aduersus impios in diuina iudicio lata est, & cuius admonitu confirmemus fidem nostram in omni genere persecutionis. Itaq; hoc Psalmo vti potuit Propheta Elias, cum fugeret Isabelz *3. Reg. 19.* lam reginam, & lateret præ metu in spelunca, ac vix *3. Reg. 21.* deretur omni auxilio destitutus. Potuit eo vti Naboth Isreelita, cum accusaretur blasphemix in Deum & in *Hier. 38.* regem, propter vineam. Similiter Hieremias cōiectus in lacum, in quo non erat nisi lutum, & Daniel in lacum Leonum. Item Athanasius, cum propter piam doctrinam, quam contra Arrianos profitebatur, fugeretur ex Ægypto vsq; in Treuerim Germaniæ. Quid multa? si addideris huic Psalmo dictum illud Christi apud Matthæum cap. 5. Beati estis, cum maledixerint vobis homines, & persecuti vos fuerint, ac dixerint omne malum aduersus vos, mentientes propter me.

Gaudete & exultate, quoniam merces vestra copiosa est in cœlis, habebis in persecutionibus, non solum precationem, verum etiam cœleste oraculum, quo fidem de certissima salute confirmes.

T Psalmus

Psalmus 27.

DOMINVS illuminatio mea & salus, &c.



Olenne fuit, ijs diebus, quibus hystoria passionis Domini nostri Iesu Christi in Ecclesia publice explicabatur, duodecimum huius Psalmi versiculū: Quoniam insurrexerunt in me testes iniqui, &c. de falsis testimonijs, quæ coram concilio Pontificum, & Pilato, cōtra Christum dicta sunt, recitare. Quod haud obscurum est indicium, veterem Ecclesiam hunc Psalmum, iuxta *τὸ φησιν*, de Christo intellexisse. Hæc sententia pia quidem est, quod & Christus multis calumnijs ac mendacijs sit ob-
 rutus: & nemo rectius dicere potuerit, quàm quod est in principio huius Psalmi: DOMINVS illuminatio mea, & salus mea, quem timebo? Sed, quia non habemus, quod ego sciam, Apostolicum testimonium, quo hic Psalmus Christo, iuxta literam, accommodatur, sentiamus literam eius in Dauidem ita respicere, vt tamen ad Christum, & Ecclesiam eius suo modo referatur. Excitatus autem est Dauid ad hanc precationem diuturno suo exilio, in quod eiectus erat à rege Saule, & in quo plurimas & grauissimas ærumnas vidit. Neceffe habuit carere patria, & inter impios, qui seruiebant alienis dijs, versari: de qua re conqueritur ipse coram Saule: Si incitant te (inquiens) aduersum me filij hominum, maledicti sunt in conspectu Domini, qui eiecerunt me hodie, vt non habitem in hæreditate

*Uetus hunc psalmum
iuxta phosin de
Christo interpretatur.*

*Oratio psalmi
Davidis Regis*

Sam 27

tate

tate DOMINI, dicentes: Vade, serui dñs alienis. Præterea sycophantæ accusauerunt eum affectati regni, & sparserunt de ipso virulentissimas criminationes. Ad hæc, non habuit vllum in tantis afflictionibus adiutorem. Erant quidem nonnulli amici, erant & parentes: sed tantum aberat, vt hi aliquid opis afferre potuerint, vt potius necesse habuerint etiam ipsi exulare: & dolorem eius auxerint, quemadmodum scriptum est 1. Reg. 22. Cum igitur tantis malis premeretur, nec videret vllum humanum auxilium, vertit se ad implorandum auxilium diuinum. Ac initio quidem exuscitat & confirmat fiduciam animi sui commemoratione diuinæ bonitatis & clementiæ. Deinde exponit, vnde tantam fiduciam hauriat: Postremò precatur conseruationem inter tot pericula & aduersa: & hortatur etiam reliquos ad fiduciam & fortitudinem animi.

1. *DOMINVS lux mea & salus mea, quem metuerem?
DOMINVS fortitudo vitæ meæ, quem formidare?*
2. *Cum inuadunt me maligni, vt deuorent carnem meam, aduersarij mei & hostes mei, hallucinantur & cadunt.*
3. *Etiam si consistant aduersum me castra, non timebit cor meum:
& si consurgat aduersus me prælium, ipse est fiducia mea.*

Si Deus, inquit Paulus, pro nobis, quis contra nos? Sic & Dauid: Multa quidem & grauia incumbunt in me mala, expellor in exilium, versor in medio impiorum, audio seditiosus & homicida, periclitor quouis momento de vita, & quod ad alias maximas ærumas accedit, etiam amici & parentes mei periclitantur propter me, de omnibus suis fortunis. Hæ sunt crassiss

simæ & palpabiles tenebræ afflictionū: nomine enim tenebrarum apud Hebræos significantur afflictiones: & nomine lucis prosper rerum successus. Quid ergo facerem? Num metuerem, ne in his tantis ærumnarum tenebris peream? Nihil minus, quia DOMINVS est lux mea. Num desponderem animum de salute? Ne id quidem: quia, etiamsi non video in his terris vllam salutem, tamē DOMINVS est salus mea. Num timerem mihi ab interitu vitæ meæ? Absit, Dominus enim est fortitudo & conseruatio meæ vitæ. Quid amplius? Multi quidem sunt homines maligni, qui vnum illud agunt, vt carnem meam deuorent. Multi sunt sycophantæ & calumniatores, qui toties in me dentes suos exerunt, & infigunt, quoties me falso calumniantur, & mendaciter traducunt, (hoc enim est humanam carnem deuorare, Iob. 31.) Multi sunt aperti mei hostes & aduersarij. Quid igitur? Num desperarem, & fierem ^{in periculum}? Nullo modo. Dominus enim ita me tuetur, vt non dubitem, quin omnes illi, vel clancularij, vel aperti hostes mei, necesse habeant, vel tandem halucinari, impingere, & cadere. Rex Saul, & omnes amici eius sæpè figunt aduersus me castra, & cupiunt mecum inire prælium, vt me opprimant: sæpè me ita circumdant, vt iuxta humanam rationem, me posse euadere, ne quidem somniandum sit. Quid ergo? Num metu ita cohorrescerem, vt omnem fiduciā abijciam? Sæpenumero quidem contingit, vt nulla mihi humana fiducia relinquatur: sed optimè habet, Dominus enim mea fiducia, Dominus mea spes est. Si autē Dominus est lux, salus, fortitudo vitæ meæ, fiducia & spes mea, quid est, quod trepidarem? quod expauescerem?

Audio,

*tenebræ afflictiones
lux prospera fort.*

*Carnis humanam
deuorare*

Audio, inquires, fortia verba, sed non video semper facta verbis respondere. Si enim David tanta est animi fortitudine, quid est, quò demittit se sporta per fenestram? quid est, quò coniecit se in pedes, & fugit? quid est, quod coram rege Achis fingit se stultum & insanum? quomodo hæc cum tam heroicis verbis conueniunt? Hic intuendum nobis est in exemplum Christi, qui, etsi ad conspectum mortis ita cohorrui, ut etiam sanguinem sudaret, tamen nullus hominum, præter ipsum, verius potuit dicere: Dominus lux mea, & salus mea, quem timebo? Assumpsit enim in se nostras infirmitates, & cohorrui mortem carne: qui tamen spiritu ita animatus fuit, ut nec contra vocationem Dei fugeret, cum patéret ei fugiendi spatium: nec respercuteret percussores, cum summam haberet potestatem: nec virulentissimis sarcasmis prouocatus de cruce descenderet, cum hoc citius dicto valuisset. Sic & David, etsi in deserto Maon, ab exercitu Saulis ita cinctus erat, ut desperaret, se, quemadmodum scriptus *1. Reg. 23.* ra loquitur, posse euadere: tamen potuit alacri animo dicere: Dominus lux mea & salus mea, quem timebo? alterum videlicet, carne, alterum spiritu: illo tantum discrimine, quò Christus metuit mortem absque villo peccato, David autem metuit eam cum peccato, ut verè potuerit cum Paulo dicere: Non quod volo, hoc facio: sed quod odi, hoc ago. Si verò, quod non volo, hoc *Rom. 7.* facio, consentio legi Dei, quò sit bona. Nunc autem non iam perpetro illud, sed inhabitans in me peccatum. Noui enim, quò non habiter in me, hoc est, in carne mea bonum. Itaque homines verè pii, cohorrerescunt quidem ad cōspectum ærumnarum & mortis, sed in-

Si David tanta est animi fortitudo, quò demittit se sporta per fenestram? quò coniecit se in pedes, & fugit?

*si charis sunt quoniam et
inopiant carnis, spm
a foris sunt.*

becillitate carnis, & dubitatione de veritate promissionis diuine: quam tamen dubitationem odio habent, & libenter eam, si possent, excuterent: spiritu autem sunt heroes, & in tantum non trepidant, ut malint extremam mortem perferre, quam diuinæ vocationi repugnare. Dices iterum: Non dubito quidem, quod animus afflicti fiat fortis, alacer, constans, & in aduersis perdurans, si DOMINVS fuerit lux, salus, & fortitudo vitæ suæ. Sed quid faciam, quid agendum suscipiam, ut talis mihi sit DOMINVS? Scio, quod quem DOMINVS fauore suo complectitur, & felicitate ac salute sua illuminat, non timeat nec castra, nec prælium, nec mortem. Sed quò me vertam, ut fauorem & lucem salutis eius consequar? Hæc nunc accedendum est ad alteram partem huius Psalmi.

4. *Vnum petij à DOMINO, hoc requiram, videlicet, ut habitem in domo DOMINI omnibus diebus vitæ meæ, ut videam amœnum cultum Dei, & visitem templum eius.*
5. *Quoniam abscondit me in tabernaculo, tempore afflictionis, occultat me in abscondito templi sui, & super petram exaltat me.*
6. *Et nunc exaltat caput meum, super inimicos meos, qui circumdant me, ideo sacrificabo in tabernaculo eius sacrificia laudis, cantabo, & laudem dicam DOMINO.*

Hæc est altera pars huius Psalmi, in qua docet, quo modo alacrem illam & heroicam fiduciam in omnibus aduersis assequamur. In præsentia autem non quaeritur, à quo hæc virtus nobis detur: non enim dubium est,

*Vnde istam heroicam
fiduciam frequamus*

est, quin veniat à Deo, & sit gratuitum Dei donum: sed quæritur, quo modo, seu quo organo nobis detur, vt ad hoc in manus suscipiendū excitemur. Priusquam igitur audiamus sententiam Dauidis, recitabimus responsū Mosi: Mandatum hoc, inquit Moses, quod ego præcipio tibi hodie, non supra te est, neq; proculsitum: sed iuxta est sermo valde in ore tuo, & in corde tuo, vt facias illum. Et Paulus: Eides, inquit, ex audis *Deut. 30.* tu est, auditus autem per verbum Dei. Docent autem tam Moses quàm Paulus, quod ad concipiendam fidē & fortitudinem eius, necessarium sit, vt audiamus verbum Dei, quod non est in cœlo absconditum, aut trans mare in ignotis Insulis occultatum, sed nobis palam Prophetica & Apostolica prædicatione patefactum. Hoc enim est organon, quo Spiritus sanctus est efficax, vt verè agnoscamus Dominum esse nostram lucē, salutem, & defensionem. Quare nihil nobis prius, nihil posterius sit, quàm vt simus assidui verbi Dei auditores, tractatores, & meditatores. Hoc illud est, quò in his tribus versiculis, quos modò cōmemorauimus, respicit: Etiam si consistant, inquit, aduersum me castra, non timebit cor meum. Quomodo igitur tantum fiducia, tantum roboris in corde tuo concepisti? Respondet: Vnum illud semper petij à Domino, vnum illud semper studui, & studebo, vt inhabitem in domo Domini toto vitæ meæ tempore: & vt sim spectator iucundissimi cultus diuini, qui in tēplo seu sanctuario eius, cœlesti ordinatione peragi solet. Nec mihi potest quicquā in hac vita iucundius, & amœnius contingere, quàm vt hæc sacra, quoties licet, visitem, & coram inspiciam. Ac multa quidē aduersa contingūt mihi in meo exilio.

Sed

Sed illud longè omnium molestissimum est, quod aduersarij dicant ad me: Vade, serui alienis dijs, (hoc est) quod necesse habeam inter idolomanitas versari, & nō liceat mihi, vnā cum Ecclesia DOMINI, pia eius sacra celebrare. Quid ergo dicemus? Num Dauid idcirco his sacris interesse cupit, quod arbitretur, se celebratione eorum placare iram Dei, & mereri peccatorum suorum remissionem? Nihil minus, dicit enim aliās: Sacrificium & oblationem noluisti, aures autem perfecisti mihi, Holocaustum, & pro peccato non postulasti. Et postea dicit Esaías: Quo mihi multitudinem victimarum vestrarum, dicit Dominus: plenus sum: Holocausta arietum, & adipem pinguium, & sanguinem vitulorum & agnorum & hircorum nolui. Dauid igitur non ardet desiderio videndorum holocaustorum per se, in tabernaculo Dei, neq; enim tam amœna, tam iucunda est per se laniena pecudum, vt multum voluptatis afferat spectatori: sed longè aliud est, quod Dauid in templo Dei, & in his sacris quærit. In tabernaculo enim Dei, seu templo adnuntiatur verbum Dei & explicantur Propheticae promissiones de Messia, & adumbratur sacrificium Messiae holocaustis, & alijs oblationibus. Vbi autem hæc peraguntur, ibi fides per Spiritum sanctum concipitur, & alitur, vt non solum in aduersis fortiter constes, verum etiam æternam vitam, ac felicitatem certò speres & consequaris. Petit igitur Dauid hos cultus frequenter videre, & sacris eorum interesse: vt cū credit Dominum Deum esse suam lucem, & salutem, fide sua ita cōfirmetur ac stabiliatur, vt non metuat sibi, etiamsi consistent aduersus ipsum castra, & exurgat contra ipsum prælium, Habes con-

cionem

*Cur Dauid gratias
sacris intersit*

Psalm. 40.

Esa. 1.

cionem verbi Dei, & adumbrationem seu explicatio-
nem promissionum de Messia, esse organon Spiritus
sancti, quo in omnibus aduersis confirmamur. Vnde
& sequitur: Quoniam abscondit me in tabernaculo,
in die afflictionis, (hoc est) si habitauero in tabernacu-
lo Dei, & audiero verbum eius, præsertim illud, quod
est de promissione benedictionis in semine Abraham,
siue illud voce recitetur, siue holocaustis adumbretur;
& credidero in corde meo, certè, quicquid ærumna-
rum, & aduersitatum imminet, Deus ita me conser-
uat & tuetur, vt quasi me sub vmbra alarum suarum
abscondat, donec me illæso pertranseant. Sicut enim
homines in grauissimis tempestatibus solent cōfugere
ad tuta loca, & se subducere ac abscondere sub tecta
domorum, donec præterierint: ita cum oriuntur in me
tempestates affectuum, vel doloris, vel metus, non ha-
beo aliud asylum, quo me occultem, donec abscedant,
quàm tabernaculum Domini, seu verbum & Euanges-
lion Dei, quod in tabernaculo & verbis adnuntiatur,
& sacramentis quasi palpandum proponitur. Nec so-
lum conseruat & tuetur me, vt has tempestates illæsus
euadam, verumetiam exaltat me super petram, efficit,
vt & firmus consistam, & attollam caput meum super
omnes hostes meos, ac reportem insignem victoriam,
etiamsi me vndiq; circumdederint, & in medio ipsos-
rum, tanquam confestim opprimendum, concluderint:
Huius rei multa exempla de Davide extant, ac imprimis
illud, quod scriptū est. 1. Reg. 23. Ibat Saul, (inquit
scriptura) & viri eius ad latus montis ex parte vna,
Dauid autem & viri eius erant in latere montis ex
parte altera. Porro Dauid desperabat se posse euadere

Tabernaculum Dei

a facie Saul. Itaq; Saul & viri eius, in modum coronæ
 cingebant Dauidem & viros eius, vt caperent eos: &
 tamen Dauid euasit. Quod de euasione è manu ex-
 terni hostis factum est, idem etiam contingit pijs com-
 morantibus in tabernaculo D O M I N I, hoc est, credens-
 tibus verbo Dei de euasione è manu spiritualium ho-
 stium, qui sunt satan, mors, & infernus. Qui enim cre-
 dit Euangelio Dei, quis aduersus ipsum crimina intē-
 tabit? Deus est, qui iustificat: quis ille qui condemnet?
 Christus est, qui mortuus est, imò qui & suscitatus est,
 qui etiam est ad dexteram Dei, qui & intercedit pro
 nobis. Vides, quanta beneficia consequatur is, qui
 commoratur in tabernaculo Dei, & videt sacra eius,
 hoc est, audit verbum eius, & adhibet ei veram fidem.
 Quam ergo repones pro tantis beneficijs gratiam?
 quod genus gratitudinis ostendes? Sacrificabo, in-
 quit, in tabernaculo eius sacrificia iubilationis, seu
 laudis, cantabo, & laudem dicam D O M I N O. In Leui-
 tico cap. 7. describitur hostia gratiarum actionis, quā
 hoc loco vocat sacrificium iubilationis seu clangoris.
 Hæc hostia offerebatur in Mosaïca politia, acceptis
 beneficijs, ad testificandam animi gratitudinem. Dicit
 ergo Dauid, se, postquam acceperit à Deo maxima
 beneficia, oblaturum hostiam iubilationis. Et quid sibi
 velit, mox exponit: Cantabo, inquit, & Psalmum dic-
 cam D O M I N O. Alij alijs rebus suscipiunt gratitudi-
 nem animi sui erga Deum declarandam: ego autem
 componam Psalmum quendam, quo nomen Domini,
 seu immensa eius clementia celebretur, & ad posteros
 propagetur. Nam hoc imprimis Deo placere, testatur
 in alio Psalmo: Salus tua, inquires, suscepit me. Lau-
 dabo

Ro. 8.

e. una p. his beneficijs
no tabernacu

sacrificia iubilationis

Lev. 7.
Sacrificia

Psal. 69.

dabo nomen Dei cum cantico, & magnificabo eum laude. Et placebit Deo super vitulum nouellum, cornua producentem & vngulas. Quid autem sit, quod hoc genus gratitudinis Deo mirifice placeat, copiose alias expositum est, & superuacaneum hinc repetere.

7. *Audi DOMINE vocem meam, cum clamo: miserere mei, & exaudi me.*
8. *Recordor in corde meo, te dixisse: Quarite faciem meam, faciem igitur tuam queram DOMINE.*
9. *Ne abscondas faciem tuam à me, ne abijcias in ira seruum tuum. Tu enim es auxiliū meum: ne derelinquas me, nec deseras me, Deus salutis meæ.*
10. *Quoniam pater meus & mater mea deseruerunt me, & DOMINVS colligit me.*

Postrema pars Psalmi cōstat precatione. Postquam enim afflictus confirmatur fide, & alit eā auditu verbi Dei, quemadmodum paulò antè dictum est, excitatur ad inuocationē nominis Dei, & accedit alacri animo ad thronū clementiæ Dei, vt exponat ipsi suas ærumnas, ac petat conseruationem & liberationem: Dominus, inquiens, est lux & salus mea. Quam fiduciam de Domino tradunt mihi, quasi in manum, imò in cor meum, promissiones Propheticae de benedictione seminis Abrahamæ, seu de Messia, qui tot sacris in tabernaculo adumbratur. Quid ergo aliud reliquū est, quàm vt attollā oculos meos ad te, Domine Deus noster, & nomen tuum in aduersis meis confidenter inuocem? Itaque clamo ad te, audi, quæso, vocē meam, nec audi tantum, sed etiam misertus mei, exaudi me. Tu enim sapē ac multum dictis tuis, quorū nunc mihi in mentē venit,

Dicitur +

1. Reg. 12

cohortaris nos, vt quæramus faciem tuā, vt in aduersis nomen tuum inuocemus, & à te solo auxilium expectemus. In Deuter. cap. 4. dicitur: Cum quæsieris Dominum Deum tuum, inuenies eum. Et Samuel ad populum, 1. Reg. 12. ait: Nolite recedere à tergo Domini, sed seruite Domino in omni corde vestro, et non derelinquet Dominus populum suum propter nomen magnum suum. Hæc & alia id genus dicta reuoco in mentem meam. Quare non recedam à tergo Domini, sed quæram faciem eius solius: quam, vt inueniam, quælo te, ne abscondas eam à me, nec me seruum tuū iratus abijcias, aut deseras. Te enim solum agnosco auxilium & salutem meam: nec habeo alium, ad quem confugiam. Est mihi pater, est mater, sunt & amici, sed hi tantum abest, vt me in his meis aduersis iuuare queant, vt potius ipsi aliena ope indigeant.

Sunt.
1. Reg. 22.

Notum enim est, quod inter alios exules, etiam parentes Davidis confugerint ad ipsum, & opem eius implorauerint. Vnde & commendat eos regi Moab: Maneat, oro, (inquiens) pater meus, & mater mea vobiscum, donec sciam, quid faciat mihi Deus. Quare David omni humano auxilio destitutus, è solius Dei fauore pendet: Dominus (inquiens) colligit me: parentes non iuuant me: amici non iuuant me. Etsi enim non deest ipsis iuuandi me voluntas, tamen deest facultas. Dominus autem suscipit me, Dominus defendit me, Dominus complectitur me, vt inter tot pericula tutus consistam.

compendiaria ratio
quæ Deus ad opandū
homo potest optine.

Habes hîc compendiariam & optimam rationē, qua Deus ad exauditionem precum excitatur, videlicet, vt agnoscamus nō alium, præter solum Dominum Deum adiutorem

adiutorem & seruatores nostrum. Hoc enim sibi vult primum præceptum Decalogi: Non habeas alienos Deos coram me, (hoc est) non agnoscas alios seruatores, & liberatores. Quare, si Deus viderit te huic primo ac præcipuo mandato obsequium præstare, & à sola ipsius ope pendere, teneri non potest, quin re ipsa testificetur, soli sibi epitheton & honorem seruatoris vere competere. Rex Iosaphat, prosternit se coram Deo in repentina hostium incursione, & ait: Cum ignoremus, quid agere debeamus, hoc solum residui habemus, vt oculos nostros dirigamus ad te. Ecce igitur tibi, cum Rex solum Deum liberatorem agnoscit, confestim reportat ab hostibus admirandam victoriam. 2. Paralip. 20.

11. *Doce me DOMINE viam tuam, & deduc me in semita recta propter inimicos meos.*
12. *Ne tradas me libidini inimicorum meorum, quoniam insurgunt aduersum me testes mendaces, & spirantes iniuriam.*
13. *Nisi credidissem, me visurum beneficium DOMINI in terra viventium, (defecissem.)*

Alia precatio, imò eadem cum priori, verbis tantum mutatis. Primum enim inimici mei intenti sunt in omnem occasionem, vt mihi noceant, & me opprimant. Ostende igitur mihi Domine Deus, quem solum habeo tutorem & seruatores, viam tuam, & deduc me in recta semita, qua euadam, & inter tot inimicorum insidias conseruer. Deinde inimici mei non simpliciter tenentur desiderio me opprimendi, verum etiam produciunt aduersus me testes quidem, sed mendaces.

& virulentos calumniatores, qui non spirant, nisi in impudentiam & iniuriam, vt videatur, se optimo iure me opprimere. Ac breuiter, tanta rabie in me grassantur, quoquo modo possunt, vt nisi munitus fuisset fiducia diuinæ misericordiæ, qua credo, me consecuturum beneficentia Dei inter homines in hoc seculo, iamdudum perisset. Deus enim promisit mihi, vngente Samuele, regnum Israelis, & quæ beneficia ad rectam & felicem regni gubernationem necessaria sunt. Inimici autem mei tanto furore in me grassantur, vt nisi firmus in verbo seu promissione Dei constarem, non solum non consequeretur regnum promissum, verumetiam ne quidem vitam inter homines in hoc seculo retinerem. Quæso igitur te, Domine Deus noster, non tradas me voluntati inimicorum meorum, vt pro sua libidine in me sæuiant, & opprimant. Hi versiculi docent, quanta sit efficacia fidei, quæ adhibetur verbo diuinæ promissionis: Nisi credidisset, (inquit) iamdudum perisset. Dauid enim habuit multos & magnos aduersarios, passus est multa & magna aduersa, sæuiuerunt in ipsum multi & magni sycophantæ, & sparserunt de ipso grauissima crimina ac mendacia, nec potuisset, vel humanis consilijs, vel mundanis armis constare: & tamen constitit. Quo modo? **FIDE.** Fides igitur est, qua conseruamur inter medios hostes, & euadimus omnia pericula, vt Epistola ad Hebræos rectè commendat fidem esse hypostasim earum rerum, quæ sperantur, & elenchum eorum, quæ non videntur.

Hebræ. 11.

14. *Expecta DOMINVM, confortare, & roboretur cor
eum, & expecta DOMINVM.*

Memos

Memorabilis appendix, qua cohortatur David suo ipsius exemplo, vniuersam Ecclesiam, vt in aduersis animus quisque suum fide in promissionem Dei confirmet, & in ea fide expectet patienter opem DOMINI. Illud enim vult David dicere: Si quisquam alius, ego certe hactenus tantis afflictionibus obiectus sum, vt de fama & vita non solum periclitarer, sed etiam animum penè desponderem, & tamen mirando modo seruatus sum: credidi enim verbo diuinæ promissionis, & expectaui opem coelestem. Rex Saul, capitalis meus hostis, in manus meas aliquoties ita peruenit, vt potuisssem eum tuto interficere: ad quod etiam facinus amici me cohortabantur, ac sentiebant hanc interficiendi hostis occasionem mihi diuinitus oblatam. Sed repuli eos, & malui expectare opem Domini, quàm manum eius præuenire, & meipsum vindicare. Dixi, propiti-
us sit mihi Dominus, ne faciam hanc rem Domino meo Christo Domini, vt mittam manum meam in eum. Cū igitur confirmassem cor meum fide in promissionem, qua Deus receperat se collocaturum me in regno Israelis, & expectassem legitimum tempus eius, (hoc enim est expectare Dominum) non solum liberatus sum ab insidijs Saulis, verumetiam in regia eius maiestate collocatus. Hoc autem non tantum propter me factum est, sed maxime omnium propter vniuersam Ecclesiam Dei, vt quisquis grauibus aduersis affligitur, concipiat ex Euangelio Dei fidem, confirmet cor suum fide, & non properet sese suis priuatis & illegitimis, iniquis, aut impijs consilijs liberare: sed expectet Dominum, constet in vocatione Domini, & confirmet cor suū spe. Sic. n. tantum abest, vt expectatione sua per-
deat,

1. Reg. 24.

defiat, vt cum arbitratur omnia esse conclamata, coeleste auxilium derepente & mirando modo adsit. Respondebis autem: Constanter & ipse expectarem Dominum, si ea essem sanctitate, qua fuit & Dauid. At enim hæc non est Spiritus sancti, sed prophane carnis obiectio. Quod enim Dauid sanctus fuit, non ex operibus, sed ex fide fuit. An non & ipse dicit: Si iniquitates obseruaueris Domine, Domine quis sustinebit? Et: Non intres in iudicium cum seruo tuo, quia non iustificatur in conspectu tuo omnis viuens. Agnosce igitur & tu peccata tua, crede in Christum, & expecta Dominum: tunc agnoscet Deus etiam te sanctum, & seruabit te in omnibus aduersis.

VSVS HVIVS PSALMI.

Præcipuum eius vsum vltimus hic versiculus exponit: Expecta Dominum, confortare, & roboretur cor tuum, & expecta Dominum. Proponit enim Dauid suum exemplum, quemadmodum paulo ante exposuimus, & hortatur, vt in afflictionibus de promissa Dei clementia non dubitemus, sed confidenter in uocatione Dei pergamus. Certo enim futurum est, vt etiam si fractus illabatur orbis, non tamen spe nostra pudeamus. Recitemus igitur hunc Psalmum, in gratiis nostris ærumnis, vt confirmata fide, speremus post tenebras lucem, & post tempestates serenitatem.

Psalmus

Psalmus 28.

*Ad te DOMINE clamabo, Deus meus,
ne fileas à me.*



Interpretum alijs alias commemorant occasiones, propter quas David hunc Psalmum conscripserit, & Ecclesiæ vtendum tradiderit. Manifestum enim est, quòd varijs casibus, nunc calumnijs, nunc exilio, nunc infamia, nunc periculis inter amicos, nunc periculis inter inimicos iactatus sit. Manifestum & illud est, quòd non semper vsus sit aduersa fortuna, sed habuerit aliquoties prosperum rerum sitarum successum: vt nunquam non habuerit occasi-
nem vel inuocandi Dominum, & opem eius petendi, vel gratias ei pro beneficijs agendi. Composuit igitur hunc Psalmum tanquam generalem formulā, qua partim muniret se precibus aduersus futuras aduersitates, partim gratum se propter accepta beneficia testificaretur. Itaq; constat hic Psalmus duabus partibus: altera precatione, altera gratiarum actione.

1. *Ad te DOMINE clamo, petra mea, ne fileas erga me, ne si tacueris, similis fiam illis, qui descendunt in foveam.*
2. *Audi vocem precationis meæ, cum clamauero ad te, cum exultero manus meas ad aditum sanctuarij tui.*

Tria sunt, quæ Psalmus in hac priori sua parte precatur. Primum est, vt Dominus non taceat, non obmut-
X rescat,

tescat, sed respondeat, exaudiat, & faciat ipsum voti sui cōpotem, quocunq; tempore clamauerit, ac manus suas versus adytum sanctuarij sustulerit, (hoc est) Dominū Deum inuocauerit. Solebant enim Israëlītæ tam præsentes, quàm absentes, manus suas in precatione, ad arcam fœderis seu propitiatori, quæ in adyto, seu secretiori, & sacratiori parte tabernaculi Dei, posita erat, sustollere, propterea, quòd arca habebat promissionem præsentiæ Dei, & exauditionis eius, quemadmodum Exo. 25. & 3. Reg. 8. scriptum est. Vocat autē Dominum Deum, petram suam, quòd in inuocatione sua non nitatur, vel sua, vel alia quadam humana iustitia, sed sola solius Domini Dei clemētia & bonitate. Vnde & ingenuè fatetur, de sua salute, nisi Dominus ipsum adiuuerit, prorsus actum esse. Nam hoc illud est, quod addit: Ne si tacueris, siam similis ijs qui descendunt in foueam. Tacere enim ad inuocationem, est auersari preces, & tacendo exauditionem negare: descendere autem in foueam, est descendere in sepulcrū, seu mori, & perire. Quare etiamsi in præsentiā, nulla calamitas Dauidem aut alium quendam pium opprimeret, tamē quia omnes, qui agnoscunt Christum, & volunt piè viuere, obnoxij sunt varijs erumnis, & necesse habent incursionem satanæ & membrorū eius, quouis momento expectare, idcirco prudenter faciunt, quòd antequam pericula veniunt, muniant se precibus, & petant, vt quotiescunq; inuocauerint Deum, cōfestim ipsos exaudiat, & clementer respondeat: quippe quod sciant, non præsentes tantū, verūmetiam futuras ærumnāstātā esse gravitate, vt nisi Dominus Deus mox opem ferat, moriendum sibi sit, & pereundum. Sed
quid?

quid? an non impudentiæ potius est, quàm recte fidei, postulare à Deo, vt quoties inuocamus ipsum, statim exiliat de throno suæ maiestatis, & ad nos iuuandos accurrat? Et, an non homines ea sunt petulantia, vt magna ex parte petant magis sibi detrimentosa, quàm salutaria? Num & in his petitionibus exaudiat eos Dominus? Sciamus igitur primum, quod hîc fiat sermo *Rom. 14.* mo, non de impiorum, quorum oratio tantum abest vt sit salutaris, vt etiam, quia est sine fide, peccatum fiat: sed de piorum precatione, qui etiamsi aliquoties non nouerunt, quid sint oraturi, vt oportet, tamen spiritus *Rom. 8.* intercedit pro ipsis, gemitibus inenarrabilibus. Deinde sciamus, quod Deus ipse recepit se suis promissionibus omnes populi seu Ecclesiæ suæ precationes exauditurum. In Exodo capite sexto: Assumam (inquit Dominus ad Ecclesiam suam) vos mihi in populum, & ERO VESTER DEVS. Hoc quid aliud est, quàm si dixisset, exaudiam vos in omnibus precibus vestris, & liberabo vos ex omnibus vestris periculis? In Leuitico cap. 26. Ambulabo inter vos, & ero Deus vester, vosq; eritis populus meus. In Deut. cap. 4. Nō est alia natio tam grandis, quæ habeat deos appropinquantes sibi, sicut Deus noster adest cunctis obsecrationibus nostris. Quid plura? Cum aduenisset Christus filius Dei in carne, clare & perspicue dixit: QVICQVID petieritis in nomine meo, hoc faciam, vt glorificetur pater per filium. Inuocare autem Deum iuxta voluntatem, & iuxta promissionem, imò iuxta mandatum eius, in omnibus aduersis, non est impudentia, sed obedientia, non est temeritas, sed necessitas: quippe quod non sit alius, qui nos in extres

mis periculis iuuare & liberare queat, præter Domini Deum nostrum. Quare, quod Psalmus hoc loco precatur, vt Deus exaudiat ipsum, quoties extendat manus suas, & inuocet eum, non ex carne, sed ex spiritu fidei, profectum sentiamus.

3. *Ne trahas me vnà cum impijs & cum operantibus iniquitatem, qui loquuntur amicè cum proximis suis, & malum (cogitant) in cordibus suis.*

Secunda petitio, qua precatur, ne vnà cum impijs & sceleratis hypocritis in exitium conijciatur. Video hunc mundum plenum esse hominibus impijs, ac pessimis quibusq; exemplis. Alij enim homines sunt passim scelerati, alij sunt hypocritæ, tam in politia, quam in Ecclesia. In politia quidem nulla penè est fides in contractibus, nulla constantia in pactis & conuentis. Colloquuntur quidem homines inter se amicè, & promittunt multa, sed corde aut inuident, aut imposturas meditantur, & violant, data quacuncq; occasione, fidẽ. Deprehensi autem in perfidia, eludunt, rident: Tempori, inquiunt, seruiendum esse: & pacta esse inuenta, non perdendæ, sed seruandæ rei gratia. In Ecclesia inuenias maximam partem hypocritarum, qui veniunt in vestimentis ouium, & pollicentur quidem omnem coelestem benedictionem, si doctrinam ipsorum fueris sectatus, intus aut sunt lupi rapaces. Non enim quærunt, quæ sunt Dei, & veræ salutis, sed quæ sunt sua, & æternæ damnationis. Quid pluribus opus? Vniuersus mundus plenus est hypocritarum tam politico- rum, quam Ecclesiasticorum. Et horum exitio nihil est certius. Precatur ergo vel Dauid, vel alius quispiam
pius,

pius, vt Dominus conseruet ipsum, ne vnà cum sceles
 ratis hominibus, qui sunt hypocritę, in exitum trahas
 tur & conijciatur. Ante diluuium erant hypocritę,
 quia etsi homines edebant, bibebant, & contrahebant
 matrimonia, (hoc est) ducebāt in se vitam amicissis
 mam, non tamen erat nisi mera hypocrisis. Loqueban
 tur pacem cum proximis: sed in corde cogitabant mas
 lum. Ante conflagrationem Zodomiticam ciues ad
 ministrabant rempub. suam summo inter se consensu:
 sed non erat nisi hypocrisis, quia nec erat vlla vera co
 ram Deo pietas, nec syncerus amor erga proximum.
 In aula regis Saulis, e qua Dauid in exilium eiectus
 erat, magna erat aulicorum concordia, & amicissima
 familiaritas: sed omnia erant plena hypocrisi: loques
 bantur cum proximis pacifica, in cordibus autem ge
 stabant hostiles affectus. Quid ergo factum est? Quo
 tempore minime expectabatur, venit diluuium in or
 bem, incendium in Zodomam, & interitus Saulis, &
 exercitus eius: ac sustulit hypōcritas e medio horribi
 liter, pios autem seruauit mirabiliter: Nouit enim Do^s 2. Pet. 2.
 minus, inquit Petrus, pios e tentatione eripere, iniu
 stos verò in diem iudicij puniendos seruare. Non igit
 tur abijciamus studium verę pietatis, inter hypocris
 tas, & pessima huius mundi exempla, sed inuocemus
 Dominum, & pergamus vocationem eius sectari, cers
 ta fiducia concepta, quòd etiamsi reliqui omnes pere
 ant, tamen Dominus non trahat nec conijciat nos vnà
 cum impijs & hypocritis in exitium.

4. *Da eis secundum opus ipsorum, & secundum mala studia
 eorum. Da eis secundum opus manuum suarum, redde eis,
 vt merentur.*

7. *Quoniam non aduertunt animū ad opera DOMINI, & ad opus manuum eius. Destruet eos, & non edificabis ipsos.*

Tertia petitio, qua orat, vt Dominus reddat impijs hypocritis, quod impietate sua merentur, & puniat ipsos, pro merito impiorum suorum studiorum. Hoc aut nihil aliud est, quā precari, vt impij in æternum pereant: nam hoc est ipsorum meritum. Ceterum in recitandis Psalmis sepe ac multū occurrunt imprecationes, quibus impij & scelerati homines deuouentur. Non est autem sentiendum, quod tales imprecationes, (sicut iam aliquoties admonuimus) sint carnales maledictiones, qualibus homines priuato suo affectu, in proximos inuehi & grassari solent: sed sint cœlestia iudicia, ac diuina oracula, quibus Spiritus sanctus publicè in Ecclesia promulgat sententiā Dei, aduersus impios latam. Promulgatur autem hæc sententia publicis Psalmis, partim, vt impij seueritate huius sententiæ ad timorem Domini excitentur, & resipiscant: partim, vt impij in officio contineantur, ne & ipsi ad impietatem desinant: partim, vt afflicti ab impijs consolationem capiant, quod cognoscant impiorum vel securitatem, vel crudelitatem non diu duraturam, quippe quod Deus teneri non possit, quin cū sententia iudicii sui sit patefacta, & vniuersa Ecclesia petat executionem eius, properet ad supplicium impijs inferendum, & ad pios liberandos. Sed quid faciunt impij, aut quod est opus & studium ipsorū, propter quod diuina sententia condemnantur? Additur: Quoniā, inquit, nō intelligunt, non obseruant, non intendunt, non aduertunt animum ad opera manū Dei, & ad consilia eius. Sciamus igitur, quæ sunt opera manuum Dei, & quæ consilia

consilia eius. Quod quidem ad presens negotium attinet, opus manuū Dei est, quod impij, qui blandis verbis alios seducunt, & loquuntur ore amica, in corde autē gestant inimica & hostilia, sibiipsis parent exitiū, & suo se gladio (quod dici solet) iugulent. In Psal. 7. dicitur de impio: Lacum aperit, & effodit eum, & incidit in foueam, quam fecit. Conuertitur dolor eius (quē alteri inferre studet) in caput ipsius, & in verticem ipsius iniquitas eius descendit. Pereunt igitur impij, quia pergunt pios opprimere, & non cogitant hoc iudiciū, & hoc opus Domini, quod insidiando & opprimendo pios, seipsos opprimant, & in æternum exitiū conijciant. Vnde & in Zacharia dicitur: Qui tangit vos, tangit pupillam oculi sui. Deinde opus manuum Domini est, quod beneficiat impijs, in hoc seculo, non hoc cōsilio, vt felicitate sua abutantur ad oppressionem piorū, sed vt beneficijs Dei inuitati, resipiscant, & veram ipsi quoq; pietatem sectentur. An ignoras, inquit Paulus, *Rom. 2.* quod bonitas Dei ad poenitētiā te inuitat? Impij autē abutuntur hac Dei bonitate ad crudelitatem potius erga pios, quā ad capessendam pietatem. Cum igitur non aduertant animum ad hoc opus & consiliū Domini, sed pergūt præfractē in sua impietate, mirū non est quod pereant: mirum autē esset, si ita affecti, seruarentur. Adhuc opus manuum Domini est, quod cum obijcit Ecclesiam suam grauibus aduersis, & affligit pios, non meditetur internitionem ipsorum, sed liberationē & salutem. Dominus (inquit Hanna) mortificat, & *1. Reg. 3.* viuificat, deducit ad inferos & reducit. Dominus pauperē facit & dirat, humiliat & subleuat, (hoc est) cum Dominus mortificat, meditatur vitam, cum deducit ad in-

ad inferos, seu videtur omnino perdere, cogitat redire in cœlum: cum immittit paupertatem, vult dare diuitias: cum deprimit, vult in altum erigere. Impij autem non obseruant, non aduertunt animū ad hoc opus & consilium DOMINI, quia, cum vident Ecclesiam seu pios affligi, arbitrantur eos à Deo odio haberi, & abiectos esse, vt perpetuò intercant. Quare addunt afflictionem afflictis: & cum, iuxta Zachariam, Deus iratus fuerit parum, ipsi adiuuant in malum: & cum, iuxta

Zacha. 1. Esaiam, Dominus iratus est super populum suum, & contaminat hæreditatem suam, ac dat eos in manum impiorum, non ponunt eis misericordias, sed aggrauant, etiam super senes iugum suum valde. Ideoq; merito accidit impijs, quod in eodem Propheta sequitur: Veniet super te malum, & nescies ortum eius, & irruet super te calamitas, quam non poteris expiare. Veniet super te repente miseria, quam ne cogitaueras quidē. Agedum igitur, non inspiciamus opera manuum Dei oscitanter, sed aduertamus animum ad consilia eius. Et siquidem dederit prospera è manibus suis, non abutamus ijs ad impietatem, ad contumeliam proximi, & ad arrogantiam, sed ad pietatem erga Deum, vt bonitate eius excitati, gratias ei, tam verbis, quàm operibus agamus, & ad vtilitatem proximi, vt rebus eius consulamus. Nam hoc consilio largitur nobis Deus prospera. Si autem è manibus suis immiserit aduersa, non murmuremus, sed humiliemur sub potenti manu eius, & inuocemus nomen ipsius, ac sine vlla hæsitacione credamus, ea nobis adiumento esse in bonū. Hoc enim consilio affligit Dominus pios, vt ducat ipsos per afflictiones in verum & cœleste gaudium.

6. *Benedictus DOMINVS, quoniam exaudivit vocem pre-
cationis meæ.*
7. *DOMINVS fortitudo mea, & scutum meum. In ipsum
sperat cor meum, ideoq; adiuvor, & exultat cor meum.
ideoq; laudo eum cantico meo.*
8. *DOMINVS fortitudo eorum, ideoq; est etiam fortis
servator Christi sui.*

Hæc est altera pars huius Psalmi, gratiarum videlicet actio pro exauditione. Et si autem pleriq; precato-
rij Psalmi, quibus addita est gratiarum actio, collati
sunt in literas, non in ipsis afflictionū paroxysmis, sed
post liberationem ex afflictionibus: tamen hic Psal-
mus, quia est generalis precandi formula, qua semper in
rerū etiam tranquillitate utendū est, ut muniamus nos
adversus imminentiā pericula, quemadmodum orati-
one (quam ita vocant) Dominica uti solemus, idcirco
cōmemorat gratiarum actionem, priusquam pericu-
la ipsa & afflictiones acciderunt, ut precator admones-
atur de certitudine liberationis, & doceat, in præsentia
bus periculis, non aliter confidendum, & Deo gratias
agendas esse, quàm si iam omnia adversa evasisset. Ac-
cedit & illud, quod etiam si precator in præsentia non
dum percipit re ipsa liberationem, tamen antè sepe mi-
rando modo servatus est. Ex quo certò colligi potest,
quod Deus servaturus sit etiam ipsum in periculo, seu
iam præsentī seu futuro. Benedictus, inquit, seu laus
dandus, & omni commendatione dignus est Dominus
Deus noster, quod me clemēter in precibus, quas mo-
dò recitavi, exaudiat. Tamen si enim in præsentia non
admodum graviter affligor, sed fruor mediocri rerum

Y felicitate,

felicitate, nec videtur mihi hoc tempore singularis & admiranda liberatio necessaria: tamē quia non est dubium, quin grauissimæ quæq; tentationes & ærumnæ suo subinde tempore soleant recurrere, & nihil certius sit, quàm quòd Deus me in his sit seruaturus, idcirco ago ei perinde gratias, ac si beneficium liberationis iam manu tenerem. Etenim, quæ hæcenus precatus sum, Deus promissionibus suis recepit se præstiturū. Dixit: Inuoca me in die tribulationis, & exaudiam te: *Gene. 18.* affirmauit, se non occisurum vnā cum impio iustum, vt fiat iustus, sicut impius: significauit palam se abominari impios, & perditurū omnes, qui loquuntur mendacium. Quis autē Domino promittenti, affirmanti, & asseueranti, fidem non haberet? quis de certitudine verbi Dei dubitaret? Cum igitur ego nihil aliud precatus sim, quàm quæ Dominus ipse precari iussit, & quorsī exauditionem disertē promisit, teneri nec possum, nec debeo, quin canam, contrā quàm vetus habet prouerbium, encomium ante victoriā, & exclamem: Benedictus & laudāus Dominus, quoniam iam me adhuc precantem, & liberationem nondū sensu ipso externo percipientem exaudivit. Nec mirum, agnosco enim solum Dominum meam fortitudinem, meum robur, in omnibus aduersis, meum scutum contra omnia iacula hostium, siue corporalium, siue spiritualium. nō igitur dubito, quin se talem mihi exhibeat, qualem ego agnosco, & qualis ab omnibus vult haberi. Deinde, spes mea in solo Domino collocatur, & in sola gratuita clementia eius, quam promissionibus testatus est, acquiesco. non est igitur nec mirum, nec nouum, quòd adiuvet me, nec sinat, vt spe mea pudeam. Præterea cor
meum

meum in Domino exultat. Alij exultant in facultatibus huius terræ, alij in maiestate regia, alij in volutatibus corporis, ego autem exulto in solo Domino nostro. Hæc mea est lætitia, hoc meum est gaudium, vt gloria nominis Dei promoueat, ac bonitas, clementia, misericordia, & gratia Dei inter homines illustretur. Quare hanc mihi præcipuam operam sumo, vt nomen Dei Psalmis & carminibus celebrem, quo homines excitati agnoscant Dominum, & inuocent eum in omnibus suis afflictionibus. Postremò laudo Deum & gratias ei ago, quòd non sit mea tantum solius fortitudo & scutum, verum etiam sit fortitudo eorum, hoc est, omnium illorum, qui sunt ex populo suo, & vera membra Ecclesiæ suæ. Dicit enim: Ego assumo vos mihi in populum, & ero vester Deus: & scietis, quòd ego sum Dominus Deus vester, &c. Deum autem esse Deum populi sui, est esse protectorem, seruatorem, fortitudinem, robur, scutum & clypeum eorum. Et quia Deus est fortitudo populi sui, idcirco non est dubium, quin etiam sit mea, Davidis, qui sum Christus, seu vnctus & Rex eorum, fortitudo, vt sit mutus inter regem & populum respectus. Rex enim seu Magistratus constituitur diuinitus, non sua ipsius, sed populi gratia. Et siquidem Deus voluerit populo benefacere, dat eis regem pium, clementem, prudentem, & fortem. Si autem voluerit populum affligere, ac punire, solet eis dare vel impium, vel tyrannum, vel imbellem & effœminatum regem. David ergo cōgruenter commemorat, quòd cum Deus sit fortitudo populi sui, sit etiam sua ipsius fortitudo, quippe qui propter Ecclesiam populi, sit in regem vnctus & constitutus.

Exo. 6.

Hæc admonent reges & principes sui officij, vt meminerint, suam ipſorum ſalutem eſſe ſalute populi, ſuo quodam modo, pendere: & ſiquidem Deus completur ſuo fauore populum, cum regibus etiam & principibus benefacere. Quare in hoc ſtudium maximè omnium incumbant, vt bene ſit populo, hoc eſt, vt gubernent, quo ad eius in hac humani generis corruptio-
ne fieri poteſt, populum, non pro ſuo priuato arbitrio, ſed pro arbitrio verbi Dei, quo populus verum Deum cognoſcat, & veram pietatem ſectetur. Admonent quoq; patresfamilias ſui officij, vt cogitent, ſe propter familiam liberorum diuinitus in parentes inſtitutos, non familiam propter ipſos conditam: & ſci-
ant, ſuam ſalutem, in familiæ ſalute ſuo modo ſitam eſſe. Quare illud præcipue curent, vt familia erudiatur in vero timore DOMINI, & habeat Deum patrem
coeleſtem propitium. Sic enim fiet, vt & patresfamilias beneficio Dei fruantur.

2. *Serua populum tuum, & benedic hereditati tuæ, & paſce eos, & extolle illos in æternum.*

Redit à gratiarum actione ad precationem. Et quia iam dixit Deum ſuam eſſe fortitudinem, quòd ſit populi fortitudo, idcirco precatur vt Deus benefaciat populo ſuo, & effundat benedictionem ſuam in eum cumulatè, quò & ipſe benedictionem conſequatur. Serua, inquit, populum tuum in omnibus periculis, ſiue præſentibus, ſiue futuris, ſic enim & ego ſeruabor. Benedic hereditati tuæ. Populus Iſrael tuus eſt populus, non meus. Tu dixiſti: Filius meus primogenitus Iſrael.

Israel. Et in cantico Mosi : Irruat super eos formido & *Exod. 15.*
 pavor , in magnitudine brachij tui fiant immobiles,
 quasi lapis, donec pertranseat populus T V V S D O M I
 NE, donec pertranseat populus, Q V E M P O S S E D I S
 TI. Hæreditas igitur D O M I N I est populus Israel, seu
 Ecclesia. Precor igitur vt in hanc tuam hæreditatem,
 in hũc tuum populum effundas benedictionem tuam:
 sic enim & mihi continget benedictio. Et pascce eos,
 pascuis videlicet verbi tui: sic enim & ego pascar. Et
 extolle illos in æternum , reddas eos magnos & glo
 riosos, non in hoc tantum seculo , verumetiam in futus
 ro, vt exaltentur in cœlestem hæreditatem, quę est im
 mortalis, incontaminabilis, & immarcessibilis: sic e *1. Pet. 1.*
 nim & ego extollar, vt vnà fruamur perpetua felicitas
 te. Discat autem ex hoc loco Magistratus populum fis
 dei suę commendatum in timore Domini gubernare,
 & cogitet in salute populi suam quoque salutem cons
 tineri: vt ex eo admoneatur, ne priuatis suis cupiditas
 tibus indulgeat, sed publicę populi sui vtilitati seruis
 at. Verè quidem scriptura aliàs dicit: Salus populi,
 princeps sapiens. Sed sapientia datur Principi à Deo,
 non propter principis ipsius merita, sed propter popu
 lum. Nam si Deus regnare facit (iuxta Iobem,) homi *Iob 34.*
 nem hypocritam, propter peccata populi, & dat (iux *Esa. 3.*
 ta Esaiam) pueros & effœminatos, ad puniendam po
 puli impietatem, facile intelligi potest, quòd Deus det
 etiam propter populi pietatem principes pios & salus
 tares. Cum igitur salus principum pendeat suo quos
 dam modo è populi sui salute , sciant principes, se tum
 sibi ipsis recte benefacere , cum pro officio suo saluti
 populi sui consulant.

VSUS HVIVS PSALMI.

Hoc Psalmo vtendum est, in rebus tam prosperis, quàm aduersis. In prosperis quidem, vt animum aduersus euenturas afflictiones muniamus: in aduersis autem, vt fidem confirmemus, & discamus Deo in præsentibus periculis non aliter gratias agere, quàm si iam liberationem assecuti essemus. Nihil enim certius est, quàm quòd Deus pias preces ex fide profectas exaudiat. Quare, etiamsi opem Domini, & liberationem ex aduersis nondum sensu ipso percipimus, tamen agenda sunt Deo gratiæ, & cum Iobe, omnibus facultatibus & liberis spoliato, dicendum est: Dominus dedit, Dominus abstulit, sit nomen Domini benedictum: propterea quòd quæ fide, & expectatione beneficiorum, quæ diuinitus promissa sunt, è manu Domini sperantur, certiora sunt, quàm quæ in præsentia cernuntur.

Psalmus

Psalmus 29.

Afferte DOMINO filij Dei, &c.

VI in expositione huius Psalmi re-
 tinent *non sunt*, et per tonitrua, fulgu-
 ra, & confectionem cedrorum in-
 telligunt, non metaphorica, sed me-
 teorologica, & physica, quæ Do-
 mino Deo nostro creante, dispens-
 tante & gubernante in magnis tem-
 pestatibus fieri solent, non omnino vana somnia sequun-
 tur. Nec illud à vero abhorret, quod arbitrentur hunc
 Psalmum Ecclesiæ propositum, tanquam generalem
 recitandi formulam, qua in horribilibus tempestatibus,
 tonitruis, fulgetris & ventis vteretur, & qua homines,
 maximè aut omnium, reges, principes, & qui magna
 in hoc seculo potentia sunt ornati, admonerentur, ut
 non confidant, nec abutantur sua potentia & maiestas-
 te, sed potius e cœlestibus tonitruis & fulgetris agnos-
 cant potentiam & maiestatem Dei, quam timeant &
 adorent. Ex creatione enim mundi, ut Paulus ait, & ex *Rom. 1.*
 visibilibus eius operibus intelliguntur inuisibilia Dei,
 æterna videlicet potentia & diuinitas eius.

Sed aliò nos vocant Psalmus 96. Cantate Domino
 canticum nouum, cantate Domino omnis terra. Et Psal.
 97. Dominus regnavit, exultet terra, &c. Et 98. Canta-
 te Domino, &c. Qui, sicut aliquot versiculis huius Psal-
 mi, quem in præsentia interpretandum suscepimus,
 disertè vtuntur, tanquam ex ipso mutuò acceptis, ita
 haud obscure apparet, quod quasi paraphrasi quadam
 ipsa

ipsum interpretentur. Constat autem, quòd illi Psalmi vaticinentur, & canant diuulgationem regni & Euangelij Domini nostri Iesu Christi in vniuersum orbem terræ, & inter omnes gentes: Adnuntiate, inquit aliter, inter gentes gloriam eius, in omnibus populis mirabilia eius. Et mox: Dicite in gentibus, quia Dominus regnat. Quare sentiamus, etiam hunc Psalmum, quem præ manibus habemus, de regno Christi, & diuulgatione Euangelij, quo Christus in toto terrarum orbe regnat, intelligendum esse.

Fortassis initio
pro filijs אלים
Elim, scriptum
est: filij ארם A.
dam.

1. *Afferte DOMINO, filij Heroum, afferte (inquam) DOMINO gloriam & potentiam.*
2. *Afferte DOMINO gloriam nominis eius, adorato DOMINVM in ornatu sancto.*

Eosdem penè versiculos habes Psal. 96. Afferte Domino patriæ gentium, afferte Domino gloriam & honorem, afferte Domino gloriam nomini eius, &c. Hi ergo duo primi versiculi sunt propositio exhortationis. Suscepit enim Psalmus cohortandos filios heroum, hoc est, omnes principes & potentes huius seculi, adeoque omnes incolas terræ, vt ex voce & diuulgatione Euangelij in vniuerso mundo, & inter omnes gentes, agnoscant gloriam, potentiam, & maiestatem Domini nostri Iesu Christi, & celebrēt nomē eius, adeoque adorent eum, vt verum Deum & seruatorem nostrum, in ornatu sancto, (hoc est) in vera fide, qua sola, sicut cor purificatur, ita etiam ornatur. Afferte, inquit, Domino. Cui Domino? Christo vero filio Dei, Deoque ipsi, qui assumpsit quidem, suo tempore, hominem ex Maria virgine, humanis imbecillitatibus obnoxium, sed

sed exaltauit & collocauit eum ad dextram Dei patris sui, vt regnet vnà cum ipso, in cœlo & in terra. Quid autem afferant Christo? Afferte, inquam, non boues, non oues, non capras, qualia quondam in Mosaica politis afferebantur ad templum Hierosolymitanum: sed afferte gloriam, & potentiam, afferte laudem nominis eius dignam. Nolite vobis quicquam vel glorię, vel potentię & maiestatis tribuere, sed tribuite omnem gloriam & maiestatem Domino nostro Iesu Christo: & adorete eum obedienti fide. Datum est enim ei *Philip. 2.* nomen super omne nomen, vt in nomine eius omne *Acto. 4.* genu se flectat, cœlestium, terrestrium & infernorum. Nec est aliud nomen sub cœlo datum inter homines, in quo oporteat nos saluos fieri.

3. *Vox DOMINI in aquis, Deus glorię tonat, DOMINVS in aquis multis.*
 4. *Vox DOMINI in potentia, vox DOMINI in maiestate.*

Propositionem sequitur ratio, cur soli Domino nostro Iesu Christo omnis gloria sit adscribenda, & tribuenda. Vox enim eius tonat in aquis multis, & sonat potenter ac magnifice. Hęc vox est prædicatio & diuulgatio Euangelij in vniuerso mundo. Sicut enim tonitrua fiunt diuinitus in aquis, adeoque in aquis multis, (hoc est) in nubibus aquosis, seu multa aqua plenis, & excitant homines ad considerationem potentię & maiestatis Dei: ita Christus misit, per Apostolos, Euangelion suum in vniuersum mundū, magna potentia & maiestate, per quod, tanquam per tonitruum, excitantur gentes in toto orbe, vt agnoscant summam maiestatem.

iestatem Christi, & consequantur per fidem æternam salutem. Et si enim vox Euangelij videtur esse vox potius hominis, quàm Dei: tamen res ipsa testificatur, quòd sit tonitru cœleste, ad cuius fragorem, sicut impij horribiliter exterrantur, ita pijs attollunt capita sua, & redemptorem suum obujs, quod aiunt, vlnis excipiunt. Vnde & Christus ipse, cum emitteret Iacobum & Ioannem ad prædicandum Euangelion suum, imposuit eis nomina Boanerges, quod est, filij tonitru: quippe quòd Euangelion, ad quod adnuntiandum ablegarētur, nō sit vox hominis, sed tonitruum cœleste, cuius sonitu omnes populi excitentur ad agnoscendā maiestatem Christi. Et Paulus ad Romanos scribens: Euangelion, inquit, **POTENTIA** Dei est, ad salutem omni credenti. Ac iterum: Cum acciperetis à nobis sermonem, quo Deum disceratis, accepistis nō sermonem hominum, sed sicut erat verè, sermonem Dei, qui & agit in vobis credentibus. Cum igitur Euangelion Christi sit vox illa, quæ breuissimo tempore vulgata: & sparsa est, apud omnem creaturam, (vt Paulus ait) quæ sub cœlo est, & collegerit Ecclesiam ex omnibus gentibus, idq; non quidem terrena & humana, sed cœlesti & diuina potentia ac maiestate, meritò adscribenda est Christo ipsi omnis gloria, & huic soli omnis cultus adorationis exhibendus. Cæterum, quòd Paulus ad Corinthios scribens, vocet Christum Dominū gloriæ, cum inquit: Si cognouissent, haudquaquam Dominum gloriæ crucifixissent, non obscure apparet, hoc epitheton Christi, è tertio huius Psalmi versiculo sumptum esse: vt manifestum sit, Christum esse Dominum & Deum illum, cui Psalmus iubet omnem gloriam & maiestatem afferendam seu tribuendam esse.

5. *Vox DOMINI confringit cedros, confringit DOMINVS cedros Libani.*

6. *Et exilire facit eas, vt vitulum: Libanon & Sirion, vt pullum vnicornium.*

Quod Paulus ad Corinth. scribens: Arma militiæ 2. Cor. 10. nostrę (inquit) non sunt carnalia, sed potentia Deo, ad demolitionem munitionum, quibus armis consilia demolimur, & omnem celsitudinem, quę extollitur aduersus cognitionem Dei, & captiuam ducimus omnē cogitationem ad obediendū Christo, &c. hoc Psalmus his duobus versiculis, metaphora cedrorum et montiū, Libani ac Sirion explicat. Vox enim Domini, quem admodum antea indicauimus, est Euangelion Christi. Nomine autem cedrorum, earumq; quę sunt in Libano, monte in sacris literis valde celebri, excelsissimę, intelligitur more sacre scripturę, omnis huius mundi potentia, sapientia, iustitia, sublimitas & celsitudo. Vnde apud Ezech. cap. 31. Regnum Assyriorum dicitur, quasi cedrus in Libano, pulcrum ramis, & frondibus nemorosum, excelsumq; altitudine, & cuius cacumen eleuatum est inter condensas frondes. Et Psal. 37. Vidi impium superexaltatum & eleuatum, sicut cedros Libani. Quod de cedris Libani dicitur, idem intelligendum est de arboribus in monte Sirion, (cuius fit mentio in Deute. cap. 3. & vocatur alijs nominibus, Hermon, & Sanir,) vt metaphora huius montis seu arborum eius significetur, quicquid est in hoc seculo excelsum & sublime. Psalmus igitur in celebranda & illustranda potentia ac maiestate vocis Domini, quę est Euangelion Christi, dicit, hoc Euangelion, cū diuulgatur in mundo, cōfringere cedros, easq; cedros Libani,

quæ celsitudine reliquis præstant, & arbores montis Sirion, vt, quemadmodum vitulus solet aduersus stitulum calcitrare, & pullos vnicornium exilire, ita & rami illarum arborum, voce DOMINI confracti, & dissipati, hinc inde exilient & saltitent. Quo significatur, quòd Euangelion Christi demoliat omnem potentiam, sapientiam, & iustitiam huius mundi, & suscipiat eam in obedientiam Christi, captiuam ducens.

Psal. 2. & 99. Hinc fit, vt contrà fremant gentes, sicut alij Psalmi canunt, & populi irascantur ac meditentur inania, astant reges terræ, & principes conueniant in vnum, aduersus DOMINUM, & aduersus Christum eius. Hoc enim est more vituli & pulli vnicornium saltitare & calcitrare. Christus enim, qui per Euangelion suum in vniuerso mundo regnat, est lapis ille, apud Danielem cap. 2. qui de monte sine manibus abscissus, percutit statuam, & conterit pedes eius, vt cõcidat, quemadmodum suprà Psalm. 24. dictum est. Dicitur autem Christus voce Euangelij sui confringere cedros, hoc est, demoliri regna, & potentiam huius mundi, reijcere sapientiam, & damnare iustitiam huius seculi, non quòd mundano modo regna destruat, (regnum enim eius non est de hoc mundo, & tamen nisi ipse regna huius mundi gubernaret, non consisterent,) nec quòd reddat homines in rebus huius seculi stultos & insipientes, (humana enim ratio seu sapientia, donum est Dei, & in suo gradu necessaria,) nec quòd velit, vt homines in hoc seculo ducant inhonestam & sceleratam vitam, (Deus enim, non est Deus volens iniquitatem:) sed quòd exigat, vt aut omnis humana potètia, sapientia, & iustitia cedat, in rebus cœlestibus, & ad veram

ac

ac eternam salutem nostram pertinentibus, soli potentia, sapientia & iustitia Christi, quæ per Euangelion eius patefacta est, & subiiciatur ei: aut si restiterit, aboleatur vel tandem, ac suo tempore prorsus è medio tollatur, & pereat. Sicut enim Esaïas dicit: Gens & res *Esa. 60.* ignum, quod non seruiert tibi, (Ecclesiæ Christi,) peribit, & gentes, (quæ te oppugnant,) solitudine vastabuntur: ita & de sapientia & iustitia hominum dicendum est, quod nisi tradant se captiuas Christo, & seruiant ei, abolebuntur & peribunt. Tradamus igitur omnia nostra in obsequium Christi, vt consequemur.

7. *Vox DOMINI efficit flammam ignis.*

Euangelion Christi, quod est vox DOMINI, non solum tonat, quemadmodum versu tertio dictum est, verumetiam efficit flammam ignis, (hoc est) fulgurat, fulminat, & inflammat, quæcunque arripuerit. Primum enim, sicut fulgur exit ab oriente, & apparet vsque in occidentem, ita flamma Euangelij dispersa est à Hierosolymis, vsque ad extrema terræ. Deinde corda credentium ita accedit & inflammat, vt malint crudelem mortem perferre, quàm nomen Christi abnegare. Huius rei specimen exhibitum est in die Pentecostes, quo Spiritus sanctus, missis igneis linguis, Apostolos ita inflammavit, vt non solum varijs linguis loquerentur, verumetiam exponerent vitam suam ad propagandam gloriam nominis Christi, extremis periculis. Postremo, fulmen Euangelij non solum prostermit hostes, & persecutores eius, verumetiam nisi resipiscant, absumit eos perpetuo interitu. Saulem (qui & Paulus) proficiscentem ad Damascum, vt opprimeret pios, circum- *Act. 9.*

fulgurauit subito lux è cœlo, & prostrauit eum in terram: sed quia continuo subiecit se voci Domini, idcirco, etsi conciderat, tamen reuocatus est clementia Domini ab interitu, & factus est insignis Apostolus. De his autem qui pergunt increduli esse, & Ecclesiam persequi, dicit Paulus: Iustum est apud Deum reddere ijs, qui affligunt vos, afflictionem: & vobis, qui affligimini, relaxationem nobiscum, cum reuelabitur Dominus Iesus de cœlo, cum angelis potentia suæ, cum INCENDIO FLAMMAE, &c.

8. *Vox DOMINI commouet desertum, commouet DOMINVS desertum Cades.*

Nomine & metaphora deserti, adeoque deserti Cades, (quod est horribile & vastissimū, & in quo Israëlitæ post egressum ex Ægypto multis annis errarunt, quemadmodum Num. 13. & 20. & Deut. 1. scriptum est) intelliguntur regiones Gentium, in quibus omnia erant propter idolomaniam inculta, horrenda, sterilia, & à cultu veri Dei alienissima. Vox autem Domini, sicut supra dictum est, significat vocem Euangelij de Christo, diuulgatam ministerio Apostolorum, in omnibus Gentibus. Hæc igitur vox tantæ est energiae, tantæ efficaciae, vt commouerit vastissima quæq; deserta, & fecerit ex ipsis agros cultissimos: hoc est, excitauerit immanes & impias Gentes, vt agnoscerent Christum, & quæ antea erant steriles, fierent amœnissimi horti Ecclesiae, ac proferrent vberimos fructus ad implendum cœleste horreum. Eadem deserti metaphora describit Esaias vocationē Gentium: Letabitur, inquit, deserta & inuia, & exultabit solitudo, & florebit, quasi liliū

Esa. 35.

lilium germinans germinabit, & exultabit letabunda,
 & laudans: Gloria Libani data est ei, &c. Et iterum: *Esa. 41.*
 Leuabunt (vocem) desertum & ciuitates eius, villæ in *Esa. 43.*
 quibus habitat Cedar, &c. Ac rursus: Glorificabit me
 bestia agri, dracones & struthiones, quia dedi in deserts
 to aquas, flumina in inuio, vt darem potũ populo meo,
 electo meo. Et iterum: Deserta tua, & solitudines tue, *Esa. 49.*
 & terra ruinæ tuæ nunc angusta erunt præ habitato-
 ribus, & longe fugabuntur, qui absorbebant te. Nam
 hæc de vocatione Gentium intelligēda esse, interpre-
 tatur Esaias ipse: Hæc dicit (inquiens) Dominus De-
 us: Ecce leuabo ad Gentes manum meam, & ad popu-
 los exaltabo vexillum meum, & afferent filios tuos in
 vlnis, & filias tuas super humeros protabunt, &c.

9. *Vox DOMINI commouet ceruas, & denudat sylvas,
 ideoq; in templo eius quilibet dicat (ipsi) gloriam.*

Apud Iobem cap. 39. de ceruis dicitur: Nunquid par-
 turientes ceruas obseruasti? dinumerasti menses con-
 ceptus earum, & nosti tempus partus earum. Huius die-
 cti autoritate intelligimus ceruas temporibus partus
 sui recipere se in loca ab hominum contubernio remo-
 tissima, nec posse obseruari, vel numerum mensium à
 conceptu earũ, vel certitudinem temporis partus ipsa-
 rum. Et tamen, qui animalium naturas describunt, as- *Arist. lib. 6. de*
 firmant ceruas metu beluarum iuxta vias parere, & *natura anima-*
 octonis mensibus vterum ferre. Arbitramur igitur *lium.*
 ceruas parturientes, natura quidem sua, recipere se in *Plinius.*
 tranquillitate in remotissima sylvarũ loca, vt vel à reli-
 quarum ferarum, vel etiam ab hominũ incurſu sint tu-
 tæ: in tempestatibus autem, ac tonitruis & fulguribus
 excitari,

excitari, vt conferant se, contra ingenium suum, ad semitas humanis vestigijs tritas, & ibi pariant. Significatur aut hac metaphora, quod vox Domini, quę est vox Euangelij de Christo, excitet gentes: vt etsi natura sua abhorrent ab omni humanitatis & pietatis cultu, & in vasta barbarie, quasi in abditissimo deserto delitescent, tamen commotę & inflammataę voce Euangelij conferant sese ad mansuetum genus vitę, & ad amplectendam veram pietatem. Idem etiam sentiendum est de sylvarum denudatione: Vox Domini, inquit, denudat syluas, videlicet inuias, & reddit eas peruias. Quia postquam Euangelion Christi diuulgatum est inter Gentes, inuię prius syluę factę sunt peruię, & loca arida facta sunt humida, iuxta illud Esaia, cuius antea mentionem fecimus: Ponam in deserto viam, & in inuio flumina. Ac mox: Dedi in deserto aquas, flumina in inuio, vt darem potum populo meo. Ac iterum: Ponam omnes montes meos in viam, & semitę meę exaltabuntur. Hęc omnia respiciunt in vocationem gentium per Euangelion Christi: quod antę quidem Iudęi & Gentes fuerint religione sua inter se disiunctissimi, ac nulla potuerit via inter ipsos conueniri. Postquam autem Gentibus reuelatum est Euangelion Christi, densissimę syluę, quę Iudęos a Gentibus separauerant, ita denudatę, & patefactę sunt, vt factus sit alteris ad alteros facillimus transitus, vnde & Esaias: In die illa, inquit, erit via de Aegypto in Assyrios, & intrabit Assyrius Aegyptum, & Aegyptius in Assyrios, & seruient Aegyptij Assur. Quid aut hoc sibi velit, Paulus ad Ephesios interpretatur: Nunc, inquit, per Christum Iesum, vos qui quondam eratis longinquul,

qui, propinqui facti estis per sanguinem Christi. Ipse enim est pax nostra, qui fecit ex vtrisque vnum, & interstitium maceriarum diruit, &c.

Porro, in fine huius noni versiculi additur cohortatio ad gratiarum actionem. Cum enim Deus patefecerit gentibus in toto orbe terrarum Evangelion filii sui, quod est potentia Dei ad salutem omni credenti, Iudeo primum, simul & Græco, reliquum est, ut quilibet siue *Rom. 1.* Iudæus, siue Ethnicus testificetur, pro hoc summo beneficio, suam erga Dominum Deum gratitudinem, & deferat ei laudem gloriæ in templo suo, (quod est Ecclesia Christi,) idque non verbis tantum, verum etiam quouis pio officio. Exigit autem Deus à nobis pro gratitudine, laudem, & gloriam nominis sui: non quod vel indigeat, vel delectetur humana commendatione: sed partim, ut hac gratitudine inuitemus eum, ad præstanda plura & maiora beneficia, vetus enim dictum est: Gratiarum actio est ad plus dandum inuitatio: partim, ut laude nominis Dei alij homines excitentur ad fidem, & obedientiam fidei. Illud enim agit, ut illustrata nominis sui gloria, homines ad agnitionem veritatis veniant, & veram salutem consequantur.

10. *DOMINVS ad diluuium sedit, & sedebit DOMINVS rex in æternum.*
11. *DOMINVS fortitudinem populo suo dabit. DOMINVS benedicet populum suum pace.*

Potuisset hic Psalmus cohortatione, quæ continetur in fine noni versiculi, concludi: sed visum est addere hos duos versiculos, ut sciamus, quanta cura, quanto studio

dio Dominus conseruet & tueatur Ecclesiam, quę voce Euangelij ex vniuerso orbe colligitur, & quibus beneficij eam afficiat. Dominus (inquiens) sedet ad diluuium, & sedebit Dominus rex in æternum, (hoc est) sicut Dominus gubernauit quondam diluuium, temporibus Nohæ, vt etsi impij perierunt, tamen pius Noha, vnā cum familia sua in arca incolumis & saluus conseruaretur: ac præterea etiam arcum poneret in nubibus, quo testificaretur, se deinceps aquis terram non vastaturum: ita etiam sedebit, gubernabit & tuebitur Dominus Ecclesiam suam perpetuò in diluuiio baptismi, quem baptismū, Apostolica prædicatione, in toto orbe instituit: Baptisate, inquiens, omnes gentes, in nomine patris, & filij, & Spiritus sancti: vt etiam si magna pars impiorum in hoc diluuiio submergantur, & suffocentur, tamen Ecclesia, quæ agnoscit vocem Domini, per Apostolos diuulgatam, salua enatet, & tanquam in arca, omnia pericula euadat. Ex hoc versiculo cōcionatus est Esaïas cap. 54. Sicut, inquiens, in diebus Nohæ istud mihi est, cui iuravi, ne inducerem aquas vltra supra terram: sic iuravi, vt non irascar tibi, & nō increpem te. Montes enim commouebuntur, & colles contremiscent: misericordia autem mea non recedet à te: & fœdus pacis meę non mouebitur, dicit miserator tuus Dominus. Et Petrus, 1. Pet. 3. Mortificatus quidem (inquiens) carne, viuificatus autē Spiritu, in quo etiam abierat: & spiritibus, qui erant in carcere, prædicauerat, inobedientibus quondam, cum semel expectrabatur lenitas Dei, in diebus Nohæ, cum apparabatur arca, in qua paucę, (hoc est) octo animæ seruatię fuerunt per aquam. Cuius figuræ nunc respondens

Baptismus,

Baptismus, nos quoque saluos reddit, quo non carnis sordes abijciuntur, sed quo fit ut conscientia bene respondet apud Deum, per resurrectionem Iesu Christi, qui est in dextera Dei, (quod Psalmus dicit: Sedebit Dominus rex in æternum) profectus in cœlū, subiectus sibi angelis & potestatibus ac virtutibus. Sedet autem Dominus Christus ad dextram Dei patris sui, nec ociosus, nec ignauus, sed dat populo suo, ut hic Psalmus ait, fortitudinem, & benedicit eum pace, (hoc est) ornat Ecclesiam suam magna animi constantia in omnibus aduersis, & effundit in eam omne genus beneficiorum, ut fruatur æterna pace ac salute. Hoc alius Psalmus sic effert: Ascendisti in altum, cepisti captiuos *Psal. 68.* tatem, accepisti dona in hominibus. Paulus autem in *Ad Ephes.* interpretatur: Qui descendit, (inquiens) idem ille est, *cap. 4.* qui etiam ascendit supra omnes cœlos, ut impleret omnia. Et idem dedit alios quidem Apostolos, alios vero Prophetas, alios autem Euangelistas, alios autem pastores & doctores ad instaurationem sanctorum, &c. Cum enim Christus in reditu suo ad Deum patrem diceret: Ecce ego vobiscum sum, omnibus diebus, usque ad consummationem seculi, manifestè significat, se Ecclesiam suam in tantum non deserere, etiamsi non adsit visibili specie, ut non solum conseruet eam potenti manu, verumetiam ornet eam omni genere donorum, adeoque æterna salute & felicitate.

VSVS HVIVS PSALMI.

Continet hic Psalmus encomium Euangelij de Christo Domino nostro. Et quod hic copiose explicatur.

Aa 2 hoc

hoc Paulus in pauca confert: Euangelion, inquit, est potentia Dei ad salutē omni credenti. Vtatur igitur hoc Psalmo, primum quidem in publicis persecutionibus, quas hostes veræ pietatis aduersus prædicationem Euangelij mouere solent, vt fidem nostram confirmemus, & forti animo insultum hostiū perferamus. Et si enim minæ & crudelitas eorum videntur carni esse extrema internecio, tamen non sunt nisi fulgura, vt proverbium habet, ex pelui. Solum autem Euangelion Christi, verum est tonitru, & fulmen: ac ea est potentia & maiestate, vt sicut deiicit & demolitur omnem potestatem extollentem sese aduersus Christum, ita conseruat omnes fide sua ipsum complectentes, ad æternam salutem. Quare non cohorrescamus ad minas hostium, sed consistamus firmi, in Euangelij professione. Deinde vtatur eo in priuatis tentationibus: vt si quando corripimur metu afflictionis, mortis & inferni, propter peccata nostra, sumamus in manus hunc Psalmum, & recitemus eum, vt admoneamur de potentia Euangelij, & benè confidamus, quod etiam si peccata nostra minantur nobis interitum, tamen quia habemus & agnoscimus fide Euangelion Christi, de remissione peccatorum propter Christum, certò sciamus, hoc Euangelion esse tonitruum, fulgur & fulmen contra omnes spirituales potestates in cœlestibus, & conseruet nos in omnibus aduersis.

Psalmus 30.

Exaltabo te DOMINE, quoniam suscepisti me.



Titulus huius Psalmi apud Hebræos est Psalmus, qui cantatus est in dedicatione domus David. Arbitrantur autē aliquot interpretes, quod dedicatio eius domus, quam David, capta vrbe Hierusalem, ædificauit, & cuius fit mentio in posteriori libro Samuelis cap. 5. (solenne 2. Reg. 5.)

enim fuit domos recens ædificatas peculiari ritu dedicare, quemadmodum significatur Deut. 20.) dedit Davidi occasionem, vt hunc Psalmum componeret, & Ecclesie in ea dedicatione publicè cantandum proponeret. Quod ergo ad titulum attinet, etsi sunt, qui existimant, titulos Psalmorum esse clauēs (vt ipsi loquuntur,) ad ipsorum intelligentiam, tamen non videntur à Davide, aut alijs Psalmorum autoribus initio adiecti, sed lōge post, ab alijs scriptoribus, qui Psalmos in vnum volumen contulerunt, & pro suo arbitratu, vel ad peculiaria argumēta, vel ad diuersa Musica instrumenta accommodarunt, appositi esse. Itaque clauis intelligentiæ huius Psalmi videtur magis & rectius in versiculis ipsis Psalmi, quàm in titulo querenda. Hos, si expendamus, non erit obscurum, quod David aut laborauerit periculoso quodam ac lætali, vt videbatur, morbo, aut concussus fuerit graui aliqua tentatione de morte & inferno. Ex quibus fluctibus, postea

A. a. 3. quam

quàm diuina clementia, saluus eluctatus esset, & enas-
tasset, instituit hoc Psalmo gratiarũ actionem : & hor-
tatur Ecclesiam suo exemplo, primum quidem, ne cõ-
sidant præsentis rerum felicitate, sed cogitent, nihil hu-
manarum rerum in hoc seculo firmum & stabile esse,
ac solere subito casu, quæ valuerunt, ruere. Deinde, vt
pro acceptis beneficijs, Deo diligenter agant gratias,
quo deinceps, si prosper rerum successus fuerit muta-
tus, audeant nomen & opem Dei iterum confidenter
& alacriter inuocare, ac liberationem & salutem cer-
tò sperare.

1. *Exalto te DOMINE, quoniam erexisti me, & non
exhilarasti inimicos meos super me.*
2. *DOMINE Deus meus clamaui ad te, & sanasti me.*
3. *DOMINE eduxisti ex inferno animam meam, viuifi-
casti me, ne vnà cum alijs descenderem in lacum.*

Cum hic Psalmus institutus sit ad gratiarum actio-
nem, consideremus initio, quod sit beneficium illud,
propter quod celebrat nomẽ Domini, & agit gratias:
Erexisti, inquit, me. Ego ita deiectus eram, vel in pe-
riculosissimum morbum, vel in aliam quandam gra-
uissimam afflictionem, vt nulla humana coniectura
potuerim de liberatione benè sperare. Tu autem Do-
mine Deus meus, cum opem tuam implorarem, tanta
me clementia complexus es, vt apprehensa quasi ma-
nu me iterũ erexeris, & eleuaueris. Inimici mei, quos
habeo multos & magnos, arbitrabantur mihi certissi-
mum imminere exitium, vt haberent, quo non tam in-
sinu gauderent, quàm palam arũis meis insultarent.
Tu autem Deus meus, expectationẽ eorũ ita fefellisti,

vt quantam antea exhilarationē animi sui ex meo casu
sperauerunt, tanta nunc ægritudine, propter meam sa-
lutem, laborent. Ego morbo tam animi, quam corpo-
ris, ita afflictabar, vt de spe meæ incolumitatis concla-
matum esset, nec aliud mihi reliquum, præter mortem,
sepulcrum, & extremum interitum, videretur. Tu au-
tem, cum te Dominum Deum meum, vt patrem, inuo-
care, tanta beneuolentia me respexisti, vt me è lacu,
hoc est, è faucibus mortis & inferni, eripueris, & me
pristinæ sanitati restitueris. Quid igitur pro tantis be-
neficijs referam? Quid vicissim tibi rependam? si des-
lectareris holocaustis, adeoq; hecatombis, nullis certè
sumptibus parcerem. Sed quia nihil possum tibi red-
dere, quod non sit antea tuum, faciam, quod vnū mihi
reliquum est, prædico tuam clementiam, cōmendo tu-
am misericordiam, laudo tuam bonitatem. Tu me ex-
altasti: vicissim & ego te exalto, quoquo modo pos-
sum. Tu me erexisti: vicissim & ego nomen tuum eri-
go, & qua possum laude, extollo. In his tribus versicu-
lis, obserua primum, quæ sit fors piorum in hoc seculo.
Etsi enim habent cōdonationem peccatorum, propter
Christum, & recepti sunt in gratiam Dei, tamen neces-
se habent adhuc tantas in hoc mundo ærumnas ferre,
vt videantur aliquoties extremæ internitioni proxis-
mi esse. Quo autem consilio Deus hoc permittat, aut
etiam subornet ipse, alijs suo loco explicari solet. Non
miremur ergo, si grauib; periculis obijciamur, mire-
mur potius, si cui piorum prosper semper rerum suc-
cessus contigerit, propterea quod sententia lata sit, vt
p̃p̃ per multas tribulationes ingrediantur in regnum
cœlorum, & in his terris affligantur, vt conformes red-
dantur.

dantur Christo filio Dei. Deinde, inter afflictiones nō postremum locum obtinet lætitia inimicorum, in nostris aduersis: Non exhilarasti, inquit, inimicos meos super me, videlicet significans, quod afflictiones nostræ tantò grauiore siant, quantò maiorem voluptatē ex ijs inimici nostri capiāt. Vnde, cum Philisthīm es portarent victoriam ab Israelitis, & interfecissent heros Israelitarum, exclamat Dauid: Nolite adnuntiare in Gath, neq; adnuntietis in compitis Ascalōnis, ne fortè lætentur filix Philisthīm, ne exultent filix (hoc est, regiones, seu ciuitates, quæ non sunt metropolis tanæ, quas nos vocare solemus filialia) incircuncisorum. Illud vult sibi querela Dauid, quod lætitia, & insultatio hostium reddit nobis nostras afflictiones molestiores, & grauiore. De qua re idcirco admonemur, vt gaudentibus de nostra infelicitate hostibus, non inuehamur in ipsos virulenter: sed benè confidamus, quod quò maior est lætitia hostium, tantò propinquior sit nostra liberatio, & ipsorum interitus.

Adhæc, obserua hîc efficaciam piarum precum: Domine Deus meus, inquit, clamaui ad te, & sanasti me, eduxisti ex inferno seu inferni doloribus animam meam, &c. Hoc illud est, quod apud Ioannem cap. 14. dicitur: Quicquid petieritis in nomine meo, hoc faciam, vt glorificetur pater per filium. Postremò, diligenter considera, quo præcipuè officio testificemur coram Deo gratitudinem nostram, pro acceptis beneficijs: Exalto, inquit, te, seu celebroy, ac magnifico nomen tuum. Deus enim non delectatur aut multitudine sacrificiorum, aut longitudine ieiuniorum, aut duritia chameuniarum, sed delectatur laude & celebratione

tione nominis sui, quæ non verbis tantum, verum etiam bonis exemplis constat. Nec delectatur hac laude, pro more hominum ambitiosorum, sed ut propagetur commendatio clementiæ & misericordiæ eius, ac homines excitentur ad inuocationem in aduersis, & bene confidant.

4. *Psallite DOMINO sancti eius, & prædicate sacrosanctam memoriam eius.*

Postquam tribus prioribus versiculis egit gratias Domino, pro acceptis beneficijs, priuato suo nomine, cohortatur nunc vniuersam Ecclesiam, ut & ipsa suo exemplo agat Domino gratias: Psallite, inquit, Domino omnes sancti eius. Sancti Dei hoc loco dicuntur, misericordiam à Deo consecuti, & multis gratuitis beneficijs affecti. Nam, quæ beneficia Deus confert in sanctam suam Ecclesiam, numerari non possunt. Cum Israëlitarum electi essent in populum Dei, non solum liberauit eos Dominus à tyrannide Ægyptiaca, verum etiam conseruauit ipsos magnis miraculis in deserto. Deinde dedit eis terram Canaan, & instituit in ea leges Ecclesiasticas, politicas, & œconomicas, ac defendit eos in omnibus hostium incursionibus. Quod autem est maximum omnium beneficium, promulgauit eis Decalogum stupendis miraculis, & restaurauit in Ecclesia ipsorum, promissionem de filio virginis, de semine Abraham, (hoc est) de Christo Domino nostro, ut quod peccatum, & quam maledictionem, per Decalogum agnoscerent, condonationem eius, & benedictionem per fidem propter Christum consequerentur. Postquam autem Christus aduenit, diuulgauit Euangelion

gelion suum, tam inter Israëlitas, quam inter reliquas gentes: ut quotquot in Christum crederent, fierent omnium coelestium bonorum hæredes: quibus enim

Rom. 8. Deus pater donat filium suum Christum, ijs donat etiã vnã cum ipso omnia genera coelestis hæreditatis. Propter tanta beneficia, psallite, inquit, Domino, celebrate nomen eius publicis tam cantionibus, quam concionibus: prædicate Euangelion eius, in vniuerso orbe, facite mentionem, adnuntiate sacrosancã commemorationem nominis eius, in sua quisq; familia, in suo quisq; regno, deniq; in toto mundo. Hic enim est cultus Deo gratus, hoc est officium Deo acceptum, & quod Deus pro gratiarum actione agnoscat. Vnde aliàs dicit: Laudabo nomen Dei cum cantico, & magnificabo eum laude. Et placebit Deo super vitulum nouellum producentem cornua & ungulas. Sed quæ Dei beneficia, propter quæ agendæ sunt Deo gratiæ, & laudandum nomen eius, hæcenus recensuimus, generalia sunt. Perstringemus igitur peculiare, quod in Psalmo sequitur.

Psal. 69.

5. *Quoniam momentum in ira eius, vita in beneplacito eius.
Vespero pernoctat fletus, & mane (redit) lætitia.*

Vbi nos transtulimus: Momentum in ira eius, ibi Græcus interpres legit, ὀργῆς αὐτοῦ τὸ θυμὸν αὐτοῦ. Et Latinus: Ira in indignatione eius. Nam pro eo, quod est apud Hebræos רָגַח Regah, & significat momentum, Græcus similitudine literarũ deceptus, legit רָגַשׁ Regasch, quod significat tumultum, seu fremitum. Transtulit igitur sententiam sententiæ Psalmi prorsus contrariam. Psalmus enim non agit Deo gratias, quod in indignatione

dignatione eius sit ira, seu furor, & quòd indignatio eius sit grauis & diuturna: sed potius quòd in indignatione eius sit clementia, seu beneuolentia, & quòd indignatio eius sit momentanea. Quare hoc illud est peculiare beneficiū, propter quod Psalmus excitat vniuersam Ecclesiam, vt laudet nomen Domini, & gratis a se iagat: videlicet, quòd etiamsi Deus aliquoties irascatur, & affligat, tamen ea afflictio non sit perpetua, nec diuturna, sed tēporaria & quodammodo momentanea: ac si multum, vesp̄i tantum duret fletus per noctem, manē autē reuertatur lætitia. Cum enim Deus affligit, vel Ecclesiam ipsam, vel priuatū aliquod membrum eius, non affligit ex animo hostili, non ex odio, non ex impotenti iracundia, sed ex amore, ex beneuolentia, eoq; consilio, vt per afflictionem maiora beneficia cōferat. Vnde & addit: Vita in beneplacito eius, (hoc est) non placet Deo afflictio per se, sed placet ei liberatio: non placet ei mors per se, sed placet ei vita, vt per mortem operetur vitam: Viuo ego, inquit, nolo mortem peccatoris, sed magis vt conuertatur & viuat. Hæc sententia sæpē repetita est in scriptis tam Prophetiis, quàm Apostolicis.

Iob 10. Vitam & misericordiam tribuisti mihi, & visitatio tua custodiuit spiritum meum. Licet hæc cæles in corde tuo, tamen scio, quòd hoc sit tecum.

Psal. 126. Qui seminant in lachrymis, in exultatione metent. Euntes ibant & flebant, portantes semina sua, venientes autem venient cum exultatione, portantes manipulos suos.

Esa. 54. Ad punctum in modico dereliqui te, & in miserationibus magnis cōgregabo te. In momento in

dignationis abscondi faciem meam parumper à te. (quod Esaia dictum planè conuenit cum versiculo huius Psalmi, vt Esaia ex ipso sumplisse videatur,) Et in misericordia sempiterna misertus sum tui, dixit redemptor tuus Dominus.

In Threnis Hieremiæ cap. 3. Non repellet in sempiternum Dominus. Quia si abiicit, miserebitur etiam secundum multitudinem misericordiarum suarum. Non enim humiliauit ex corde suo, & abiicit filios hominum, &c.

Rom. 8. Scimus, quòd his qui diligunt Deum, omnia adiumento sunt in bonum, &c.

2. Corinth. 4. Momentanea leuitas afflictionis nostræ, mirè supra modum æternum pondus gloriæ parit nobis, &c.

Heb. 12. Omnis castigatio in præsens quidem, non videtur esse gaudij, sed molestiæ: at postea fructum tranquillum iustitiæ reddit ijs, qui per illam fuerint exercitati.

Ac breuiter. Cum Spiritus sanctus iubet nos in aduersis expectare Dominum, & sperare, (id quod passim in scriptura occurrit) eo ipso promittit nobis, quòd afflictionem secutura sit vt certissima, ita & ciuissima liberatio, (si modò tempus non iuxta carnem, sed iuxta spiritum, numerauerimus,) & quòd tanto maior & iucundior contingat salus, quanto grauior, & tristior fuerit afflictio.

Quæramus autem propter quod meritum Ecclesia tantum beneficium à Domino cōsequatur, vt afflictio pariat tranquillitatem, & fletus sit meditatio gaudij, adeoq; mors, vitæ? Certè non est meritum humanum,

nec

nec sapientia humana, sed est meritum Domini nostri Iesu Christi, qui cum peccatum nostrum, sua afflictione, cruce & morte expiauerit, & hæc omnia resurrectione vicerit, effecit, vt Deus agnoscat nos, credentes in Christum, filios suos, & seruet nos in omnibus aduersis, in morte deniq; ipsa ad æternam vitam & felicitatem, iuxta Propheticum illud dictum, Osee cap. 6. Venite & reuertamur ad Dominum, quia ipse discerpfit, & sanabit nos, ipse percussit, & curabit nos. Viuificabit nos post duos dies. In die tertia suscitabit nos, & viuemus in conspectu eius.

6. Dicebam & ego, cum omnia mihi prosperè succederent, non cadam in æternum.
7. DOMINE in beneplacito tuo munuisti montem meum fortitudine, (sed statim,) cum absconderes faciem tuam, conturbabar.
8. Alce DOMINE clamabam, & Domino meo supplicabam.
9. Quæ (dicebam) veritas in sanguine meo, vbi mortuus fuero? Num laudabit te puluis? & adnuntiabit veritatem tuam?
10. Audi DOMINE, & miserere mei, DOMINE sis adiutor meus.

Expofuit antea in tribus primis versiculis, beneficium, propter quod gratias agat Domino, & laudet nomen eius. Deinde cohortatus est Ecclesiam, vt & ipsa psallat Deo, & cõmendet gloriam nominis eius. Propterea quòd Dominus, etsi aliquoties affligit, ac etiam mortem infert, tamen meditetur gaudium & vi-

tam. Nunc autem dehortatur suo ipsius exemplo, à securitate, in rebus prosperis, & docet, quàm necessariū sit, vt, cum nobis omnia ex animi nostri sententia successerint, timeamus Dominum, & gratias ei agamus, ne quod beneficium, & quam rerum prosperitatem gratuita Dei clemētia adepti sumus, ingratitude, & carnali securitate amittamus. Dicebam, inquiens, & ego, cum omnia mihi feliciter succederent, non nutabo, non cadam in æternum. Illud vult dicere: O amici, timete Dominum, quotquot prosperam in hoc seculo vitam agitis, nolite securi esse, & gratiarum actionis coram Deo obliuisci: vel meo exemplo discatis in rerum felicitate timorem Domini, & gratiarum actionem. Nam & ego, cum vel deuicissem Goliathem, & in aula regis Saulis præcipuum locum inter proceres & heroes aulicos obtinerem, vel cum gener regis fierē, vel cum extincto Saule regnum Israel susceperem, & in eo confirmarer, vel cum oppressissem Syros, & eò
 2. Reg. 10. adegissem, vt pacem peterent, arbitrabar, nullam amplius reliquam mihi fore aduersam in hoc seculo fortunam: sed me præsentī tranquillitate perpetuò fruturum. Dicebam intra me: Nunc res meæ in tuto collocatæ sunt: nunc fieri non potest, vt deinceps è felici rerum mearum statu deſceiar, & cadam. Ac videbar mihi quoq; religiosulus: non enim tribuebam mihi, aut meo, vel merito, vel sapientiæ, hoc beneficium: sed tantum clementiæ Domini Dei nostri. Dicebam, edoctus ex lege, Deut. 7. & 9. O Domine, non ego propter iustitias meas & æquitatem cordis mei, sed tu ipse Domine, stabilisti & munisti fortitudine montem meum, hoc est, vel statum rerum mearum, in summa dignitate

dignitate & autoritate, vel regnum meū in Israel, idq̃
 pro tuo beneplacito, pro tua gratuita beneuolentia, &
 clementia erga me, non pro mea vel iustitia, vel sapi-
 entia, vel fortitudine. Cæterum, vbi nos transtulimus
 montem meum, ibi Græcus & Latinus transtulerunt
 decorem meum, iterum similitudine literarum dece-
 pti. Pro eo enim, quod est apud Hebræos הררי Hareri,
 & significat, montem meum: legerunt הדרי Haderi,
 quod significat, decorem meum. Nomine autem mons
 tis, intelligitur, pro Hebræo more, alijs vel Deus ipse
 aut templum Dei, in monte Zion ædificatum, vt in
 Psalmo vndecimo: vel, regnum, regia potentia, aut
 alioqui insignis & sublimis in hoc seculo status vitæ.
 Significat igitur Dauid, se in rerum suarum prosperis
 tate munitionem, & firmitudinem regni, aut dignitas
 ac maiestatis suæ, non suis virtutibus, sed beneuo-
 lentia Dei acceptam tulisse. Et tamen ne sic quidem
 felicitas rerum eius in hoc seculo stabilis fuit. Simul
 enim ac Deus absconderet, inquit, faciem suam, & au-
 uerteret manum suam, non solum immutata est felicita-
 tas mea, verumetiam ego ex improviso casu mirifice
 perturbabar. Nec aliud mihi relinquebatur, quàm vt,
 quemadmodum in superioribus, ita & in præsentibus
 aduersis, clamarem ad te Domine, & te Dominum me-
 um obsecrarem, quò mihi in tam repentina mutatione
 opem ferres. Hoc enim vetus est afflictorum asyllum,
 & persegium, vt properent, non ad idola, non ad mas-
 giam, sed ad Dominum Deum nostrum, qui solus, vt
 potest, ita etiam vult cor contritum & spiritum con-
 tribulatum iuuare. Precaturus igitur Dominum, præ-
 ter alia, dicebam: Quæ est vtilitas in sanguine meo,
 (hoc

(hoc est) in effundendo sanguine meo, aut in amittenda vita mea? (iuxta illud: Sanguis eius super nos, & super filios nostros, hoc est, effusio sanguinis & mors eius.) Aut quæ utilitas, si moriar, & in sepulcrum condar? Statueram magnificentissimum templum nominis tuo excitare, vera sacra, iuxta legem, instaurare, & verbum tuum ad posteros propagare. Sed num in pulverem redactus, possum tantas res, in gloriam nominis tui conficere, gratias tibi pro beneficijs agere, & veritatem promissionum tuarum meis ipsius exemplis commendare, & testificari? Quare obsecro te Domine Deus noster, ut preces meas iterum exaudias, & miserearis mei, ac mihi in tantis meis angustijs, quibus præter omnem expectationem obrutus sum, clementer succurras. Ex his initio considerandum est, quod tanta sit corruptio humani generis, ut in prospero rerum successu, non solum impij, verum etiam sancti, securi fieri soleant: ac tantum non, quod est apud Esaiam, dicere: Percussimus foedus cum morte, & cum inferno fecimus pactum. Flagellum inundans, cum transierit, non veniet super nos. Sed quid? an dubitandum est, de gratia & clementia Dei erga nos? An non vera fide dicendum est, quod est in alio Psalmo: Si consistent aduersum me castra, non timebit cor meum. Si exurgat aduersus me prælium, in hoc ego sperabo? An in certissimis & verissimis Dei promissionibus, non est securè acquiescendum, & confidendum? Omnino certè in his acquiescendum est: non autem carnali, sed spirituali securitate. Et quæ est carnalis, quæ spiritualis securitas? Carnalis securitas est, cum prætexitur quidam promissio Dei, & fiducia in eam, sed sine timore Dei,

Esa. 28.

Psal. 27.

Dei, & vera pœnitentia. Quales illi securi erant, apud
 Esaïam, quorū paulo antè mentionem fecimus, & qui *Esa. 28.*
 dixerunt: Percussimus fœdus cum morte. Et illi, qui
 apud Hieremiam dicunt: Templum Domini, templū *Hier. 7.*
 Domini, templum Domini. Extabant enim promissio-
 nes, tam de populo Israël, quàm de templo, quibus De-
 us receperat se perpetuum fore gentis & templi custos
 dem. In alio Psalmo dicitur: Elegit Dominus Zion, *Psalm. 132.*
 elegit eam in habitationem sibi. Hæc requies mea in
 seculum seculi, hîc habitabo, quoniam elegi eam. Et
 postquam Salomon dedicasset templum, apparuit ei
 Dominus: Sanctificauit (inquiens) domum hanc, quam *3. Reg. 9.*
 ædificasti, vt ponerem nomen meum ibi in sempiternu-
 num: & erunt oculi mei, & cor meum ibi cunctis dies
 bus. Has promissiones agnoscebant quidem Iudæi, &
 factabant eas: securissime sperantes, se hoc templo tutos
 ab omnibus hostibus fore: sed sine vlla vera pœnitentia.
 Pergebant enim magna impudentia, in suis
 sceleribus: & admoniti à Prophetis, tantum abfuit, vt
 resipiscerent, vt etiam Prophetas immaniter trucidas-
 rent. Hæc erat carnalis securitas & confidentia: quas
 re etiam miserrimè pudefiebant. Spiritualis autem se-
 curitas est certa & indubitata fiducia in promissionē
 Dei rectè intellectam, coniuncta cum vera pœnitentia.
 Talis securitas fuit Davidis, cum ait: Et si ambula: *Psalm. 13.*
 uero in medio vmbra mortis, non timebo mala, quoniam
 tu mecum es. Et Pauli, cum ait: Mihi persuasum *Rom. 8.*
 habeo, quod neq; vita, neq; angeli, neq; principatus,
 neq; potestates, neq; instantia, neq; futura, neq; altitudo,
 neq; profunditas, neq; vlla creatura alia poterit
 nos separare à dilectione, qua Deus nos in Christo les-

su Domino nostro complectitur.

Deinde discamus exemplo Dauidis, vt, cum in rerum felicitate carnalis securitas in nobis exoritur, reprehendamus nos ipsos, & properemus ad preces, inuocantes Dominum, ne deserat nos, sed clementer conseruet, si quando prospera fortuna mutetur in aduersam. In die enim bonorum, vt Syracides ait, ne sis immemor malorum: & in die malorum, ne sis immemor bonorum.

Eccle. 11.

Sed quid illud est, quod ait: Quæ utilitas in effusione sanguinis seu vitæ meæ: aut quis vsus mortis meæ? Nunquid laudabit te puluis? Quid? Num vnà cum corpore, etiam moritur anima? Num homines mortui, ac præsertim, qui in Christo mortui sunt, vsq; adeo nihil sunt, vt interea temporis, dum aduenerit mortuorum resurrectio, toti consilescant, nec Dominum Deum suum, vnà cum cœlestibus spiritibus laudent?

Psal. 115.

Tale quid extat etiam in alio Psalmo: Non mortui laudabunt te Domine, neq; omnes qui descendunt in infernum: sed nos, qui viuimus, benedicimus Domino, ex hoc nunc & vsq; in seculum. Et in Ecclesiasta Sa-

Eccle. 9.

lomonis: Mortui nihil nouerunt amplius. Et mox: Quodcunq; facere potest manus tua, instanter operare: quia nec opus, nec ratio, nec sapientia, nec scientia erunt apud inferos, quò tu properas. Hæc & alia id genus non docent animam hominis post hanc vitam nihil esse, aut non suo modo Deum laudare. Ne metuas

Matt. 10.

tis vobis (inquit Christus) ab ijs, qui occidunt corpus,

Luc. 20.

animam aut non possunt occidere. Et iterum: Deus non est Deus mortuorum sed viuorum. Omnes enim viuunt illi. Commendat etiam Christus Spiritum suum

in

in manum patris. Et Stephanus iam moriturus: Domine Iesu, inquit, suscipe spiritum meum. Ac Paulus: Cupio, inquit, dissolui, & esse cum Christo. Hæc & his similia testificantur, animam hominū post hanc vitam, non esse vsq; ad resurrectionem, nihil, sed coram Deo viuere, & in manu Dei contineri ac conseruari. Quod et si præcipuè intelligendum est, de animabus piorum hominum, tamen sentiendum est, quòd etiam animæ impiorū contineantur & conseruentur in manu Dei, vsq; ad generalem resurrectionem: illæ quidem piorum in expectatione perpetuæ felicitatis, hæ autē impiorum, in expectatione cruciatus nunquam finiendi. Quod ergo Psalmi dicunt: Mortuos non laudare Deum, & Salomon: Apud mortuos non esse nec rationem, nec sapientiam, nec scientiam, intelligendum est, quòd mortui non amplius agant inter homines humanam vitam, nec habeant vllum exercitium humanarū actionum, nec concionentur inter homines de verbo Dei, nec psallant in Ecclesia sicut viuentes solent: sed desierint ab omnibus illis humanæ huius vitæ operibus: interea autem viuant Deo: & cum sint extra omnem locum & tempus, habeant eas actiones, quæ humanæ rationi sunt incognitæ, & imperuestigabiles. Vnde, quod Ezechias, cum Propheta denuntiaret ipsi mortem, dicit: Obsecro, Domine, memento, quomodo ambulauerim coram te in veritate, & in corde perfecto, (hoc est) quomodo gloriam nominis tui, & instaurationem veræ religionis toto animi studio promouerim, & quod institui, nondum absoluerim. Idem etiam sentit in hoc Psalmo David: Quæ est (inquiens) utilitas mortis meæ? Et nunquid puluis laudabit te?

(hoc est) Non recuso quidem ad tuam vocationem & voluntatem mori, sed vides Domine, quod opus ad instaurandam veram religionis doctrinam, hactenus in regno Saulis pene collapsam, susceperim. Quæ igitur erit huius instituti utilitas, si ego in medio cursu eius, morte abripiar? Nunquid in puluerem redactus, potero parare, quæ ad illustrandam gloriam nominis tui necessaria videntur? In eandem sententiam dicit

Phil. 1.

Paulus: Cupio dissolui, & esse cum Christo, multo longèq; melius: cæterum, manere in carne, magis necessarium, propter vos.

Quæ cum ita se habeant, videndum nunc est, quid David his precibus à Deo impetrauerit. Dicit ergo:

10. *Conuertisti plandum meum in gaudium, resolvisi saccum meum, & cinxisti me letitia.*

11. *Ut canet tibi gloria, & non sileat, DOMINE Deus meus in æternum laudabo te.*

Saccus seu cilicium, symbolum est luctus. Vnde in

Joël. 1.

Ioële dicitur: Plange, quasi virgo, accincta sacco, super virum pubertatis suæ. Et in Iona: Rex Ninive audiens venturam urbis calamitatem, surrexit de solio suo, & abiicit vestimentum suum à se, & indutus est

Iona 3.

sacco, & sedit in cinere. Et apud Matth. Si in Tyro &

Matt. 11.

Sidone factæ essent virtutes, quæ in te factæ sunt, olim in cilicio & cinere, pœnitentiam egissent. Gloria autem, de qua vndecimus versiculus loquitur, est vel lingua, vel musicum instrumentum, quo gloria nominis Dei carminibus commendatur & illustratur. Dicit ergo: Et si in mea securitate obruebar inopinata afflic-

ctio:

etione: tamen ea es clementia & bonitate, Domine Deus meus, vt postquam conuerti me ad inuocationem nominis tui, conuertisti etiam tu planctum, & dolorem meum in chorum, in tripudium seu gaudium, & concidisti, seu, vt Hebræus habet, aperuisti, aut resoluisti saccum meum, quo indutus lugebam, ac cinxisti me lætitia. Sed quo consilio resoluit saccum meum? Num vt iterum securam agerem vitam, & officium desererem? Nihil minus: sed vt gloriam nominis tui, lingua & Psalterio meo celebrarem, ac maiestatem tuam, quocunque possem officio, illustrarem. Quare dabo summam operam, vt ad agendas tibi pro tantis beneficijs gratias, nomen tuum perpetua laude prosequar. Aguntur autem Deo gratiæ, non verbis tantum, & carminibus, sed etiam bonis totius vitæ exemplis: Luceat, inquit, lux vestra coram hominibus, vt videat *Matth. 5.* ant vestra bona opera, glorificentq; patrem vestrum, qui est in cœlis. Sic igitur cantemus Domino, vt interim cum lingua & voce conueniat cor, & omnes vitæ nostræ actiones.


VSVS HVIVS PSALMI.

Varia est fortuna hominum in hoc seculo. Aut enim prospera, aut aduersa accidunt. Qualiacunque igitur euenerint, hic Psalmus vsui erit. Si enim felix est rerum successus, sumendus est hic Psalmus in manum: vt excitemur ad gratitudinē: & admoneamur, ne abutamur præsentī felicitate, ad carnalem vitæ securitatem: sed ambulemus in timore Domini, & in officio contineamur. Si autem aduersis opprimimur, consolamur

tur nos hic Psalmus, & confirmat fidem, ac spem nostrā, qui sunt cultus Deo acceptissimi: vt non despondeamus animum, nec aliena, & cum Deo pugnantia remedia quæramus, sed expectemus opem Domini obedienter & patienter. Memorabile enim est, & non est vox carnis, sed spiritus: non est terrena, sed cœlestis: non est vox hominis, sed Dei, quod in quinto versiculo dicitur: Momentum est in ira eius, vita autem in beneplacito eius. Vesperī perdurat fletus, mane autem redit letitia. Hac voce confirmati non declinamus in aduersis, nec ad dextram, nec ad sinistram, sed rectā in officio pergamus: certa spe concepta, quod etsi Dominus adhuc procul abesse videtur, tamen ap-

Abac. 2.

parebit in finem, (vt verbis Prophetæ Abacū
vitar) & non mentietur: Si moram fe-
cerit, expecta illum: quia ve-
niens veniet, & non
sardabit.



BREVIS ET PER=

SPICUA EXPLICATIO

Psalmorum Davidis.

AVTORE

Iohanne Brentio.

DECAS QVARTA.



TVBINGÆ,

Apud Viduam Vlrici Morhardi.

Anno 1569.

PSALMI QVAR.
TAE DECADIS.

31. *In te DOMINE speravi, non confundar in aeternum etc.*
32. *Beati, quorum remissa sunt iniquitates.*
33. *Exultate iusti in DOMINO.*
34. *Benedicam DOMINVM in omni tempore.*
35. *Iudica DOMINE nocentes me.*
36. *Dixit iniustus vt delinquat in semetipso.*
37. *Noli amulari in malignantibus.*
38. *DOMINE ne in furore tuo arguas me.*
39. *Dixi: Custodiam vias meas.*
40. *Expectans expectavi DOMINVM.*

PSALMVS XXXI.

*In te DOMINE speravi, non confundar in
eternum, &c.*



Agna Psalmorum commendatio
est, quod Paulus ad Ephesios scri-
bens: Impleamini (inquit) spiritu, *Ephē. 4.*
loquentes vobismetipsis, per Psal-
mos & hymnos, & cantiones spiri-
teales (in quarum catalogo, princi-
pem locum obtinent Psalmi Da-

uidici.) significans videlicet, has cantiones in illum
vsum nobis traditas, & diuinitus commendatas esse, vt
sint cœlestia organa, instrumenta, seu, vt ita dicam, va-
sa, quibus Spiritus sanctus in nos effundatur. Non arbi-
tretur autem quispiam, Spiritum sanctum cœlo ita con-
tineri, vt in nos terræ incolæ, non nisi vasculis effusus,
illabatur. Hæ sunt crassissimæ humanorum phantasma-
tum cogitationes. Nam si loquendum est de natura, seu
(quam ita vocant) essentia Spiritus sancti, verus est ab-
æterno Deus, & omnia tam cœlum, quàm terrā implet:
Quò ibo, inquit, à spiritu tuo, & quò à facie tua fugi-
am? Si ascendero in cœlum, tu illic es: si descendero
ad infernum, ades. In præsentia autem sermo nobis est,
non de essentia, sed de donis Spiritus sancti, quibus
impleto esse oportet omnes illos, qui è grauibz ten-
tationibus eluctantur, & ad veram salutem euadunt. Si
enim quispiam iudicio peccatorum ita perturbatur, vt
arbitretur de sua salute acn̄ esse, necessaria est ei fides,

qua agnoscat peccata sibi propter Christum condonata. Hæc fides non nascitur in carne humana: sed est donum Spiritus sancti. Si quem aduersa vel grauius, vel diuturnius, quàm vt perferre posse videatur, affligerint, necessaria est ei spes, expectatio, patientia, & animi fortitudo, qua in tolerandis aduersis constet. Hæc spes, & animi fortitudo, sunt donum Spiritus sancti. Si quis post multa beneficia diuinitus accepta, lapsus fuerit in graui peccata, & metuit, vt amplius pateat ipsi receptus ad clementiam Dei, huic necessaria est pœnitentia, & conuersio ad fidem, ac precationem: quæ conuersio est donum Spiritus sancti: Si sathan sollicitat hominem, vt vel proximum odio prosequatur, vel imposturas exerceat, vel scortetur, vel helluetur, vel aliud genus sceleris aduersus mandata Dei designet, necessarius est timor Dei, qui ipsum in officio obedientiæ contineat: Hic Dei timor est donum Spiritus sancti. Quid multis opus? Non est vllus hominum, qui possit veram & coelestem salutem consequi, nisi impleatur Spiritu sancto, (hoc est) donis Spiritus sancti. Affirmat autem Paulus, quòd hæc dona effundantur in nos Psalms & hymnis spiritualibus, non quidem, cum non intellecti demurmurantur, aut Stentorea voce decantantur: Si enim tuba, inquit Paulus, incertam vocem dederit, quis apparabitur ad bellum? sed cum rectè & piè percepti, attento animo considerantur. Quare, cum Spiritus sanctus vtatur Psalms, pro organo aut vasculo, quo dona sua in homines effundat, non est dubium, quin Psalms sint pharmacopœlion, ex quo remedium aduersus omne genus morborum animi ad recuperandam coelestem sanitatē petere licet.

Archi-

1. Cor. 14.

Architectatationem autem illius Psalmi, quem explicare instituimus, solent interpretes in id præcipuè tempus referre, quo Dauid necesse habuit fugere proditores Ceilanos, quos tamen paulò antè extremo vitæ suæ periculo, ab hostibus Philistinis liberauerat, & maximo ipsos beneficio affecerat, quemadmodum scriptum est in priori libro Samuelis cap. 23. Nec dubium est, quin Dauid non apud Ceilanos tantum, verum etiam alias sæpè ac multum eam periculorum molem, quæ in hoc Psalmo commemoratur, sustinuerit. Sed quia Christus filius Dei tradidit in cruce Deo patri suo Spiritum, & clausit corporalem suam vitam versiculo huius Psalmi, & Petrus ait: Spiritum Christi testatum esse in Prophetis venturas in ipsum afflictiones, sentiamus hunc Psalmum esse imprimis precationem Domini nostri Iesu Christi, deinde etiam vniuersæ ecclesiæ, ac singulorum membrorum eius. Nam quæ ærumna in hoc Psalmo recitantur, ea maximè omnium Christo filio Dei (qui, sicut fuit primitiæ eorum, qui dormierant, ut resurgeret, ita primas tenet partes, inter omnes sanctos, qui vnquam ab initio orbis terræ afflicti sunt, & adhuc affligentur) acciderunt. Et quia seruus non est maior Domino suo, idcirco solent etiam ijs, qui Christum fide amplectuntur, accidere. Tametsi enim nonnulla in hoc Psalmo recitantur, quæ non videntur in Christum filium Dei competere, quale est illud: Infirmata est propter iniquitatem meam virtus mea. Et illud: Ego dixi in anxietate mea, projectus sum à facie oculorum tuorum: tamen hæc, si rectè expendas, non minus suo modo in Christum, Ecclesiæ suæ caput, quàm in membra eius conueniunt, quemadmodum postea, Deo volente, ostendemus.

Cor. 15.

Et quia tam Christus, quàm magnus auus eius Dauid seruati sunt precatione huius Psalmi in maximis ac periculosis omnium aduersis, ideo non est obscurum, quòd hic Psalmus, etiamsi videtur tantum esse petitio salutis, tamen sit etiam vera & certa salutis promissio. Quare excipiamus eum, non solum vt formulam precandi, qua in summis tentationibus vtamur, sed etiam vt cœlestem promissionem, qua extreme afflicti confidamus.

1. *In te DOMINE spero, non pudeſcam in æternum, in iuſtitia tua libera me.*
2. *Inclina ad me aurem tuam, propere vt eruas me: ſis mihi petra fortis, & arx munita, vt ſerues me.*
3. *Quoniam rupes mea, & arx mea tu es, & propter nomen tuum ducas me, & regas me.*

Ioan. 9.

Oſtendimus hunc Psalmum eſſe precationem Chriſti. Non eſt autem ignotum, quantæ arumna obruerint Chriſtum in hac vita, ac præſertim ijs temporibus, quibus acceſſit ad abſoluendum ſacrificium ſuum pro ſalute humani generis, in vrbē Hieruſalem. Primum enim proſcribatur à iudæis: Iam conſpirauerant, (inquit Ioannes) Iudæi, vt ſi quis conſiteretur eum eſſe Chriſtum, è Synagoga eiſceretur: Et iterum: Dederant Pontifices & Phariſæi præceptum, vt ſi quis cognouiſſet, vbi eſſet, indicaret, vt comprehenderent eum. Nemo autem aſſideretur Pontifices Iudaicos & Phariſæos ea fuiſſe tum infamia, qua nunc ſunt apud nos: ſed habitos eſſe ſacroſanctos & inuiolatos, & quicquid decreuiſſent, habuiſſe ſpeciem oraculorum ſpiritus ſancti: quare decreta eorum non iudicabantur, tanquam fulgur

fulgor expulsi, sed tanquam tonitrua cœlestia. Deinde
 cōsilia Pontificum & Phariseorum aduersus Christū
 feliciter promouere videbantur, Christus enim, iuxta
 has deliberationes capiebatur, ad mortem condemna-
 batur, cruci affigebatur, donec tandem animā in cruce
 efflaret. In tantis igitur aduersis, in tantis ærumnis, in
 tam horrendis corporis & animi doloribus, non vertit
 se ad homines diris execrationibus, qui mos est carnis:
 sed vertit se ad Deum patrem suum pia precatione, vt
 cœlesti ope seruetur. In te, inquit, Domine, spero,
 non pudeſiam in æternū. Initio, obseruanda est affectus
 vehementia, qua significatur magnitudo afflictionis.
 Non enim simpliciter dicit: Peto, vt non pudeſiam, sed
 addit: Libera me. Et mox: Inclina ad me aurem tuam.
 Ac iterum: Propera vt eruas me. Et ne sic quidem exi-
 stimat se voluntatem suam satis exposuisse, sed pergit:
 Sis mihi, inquit, petra fortis, & arx munita, vt serues
 me. Deniq; idem alijs quidem verbis, sed eadem senten-
 tia repetit: Ducas, inquit, me, & gubernes, propter no-
 men tuum. Hæc frequens eiusdem propositionis & sen-
 tentiæ iteratio haud obscure significat, precatorem, vt
 summum periculū adire, ita extremo consequendæ di-
 uinæ opis desiderio teneri. Vt non pudeſiam, (inquit)
 vt non cōfundar in æternum, te etiam atq; etiam rogo.
 In præſentia quidem pudeſio coram hominibus, quia
 capior, & mei Discipuli à me deficiunt, aliquot etiam
 turpiter me abnegāt, traducor per ora hominum, nunc
 ad hunc, nunc ad illum magistratū: condemnor ad mor-
 tē, & affigor cruci. Quid est confusio, quid est contume-
 lia, quid est calamitas, si hoc non est? Cum igitur, Domi-
 ne Deus meus, omnino tibi viſum est, me confundere

& pudefacere coram hominibus, & ad tempus, quæſo te, vt clementer me conſerues, ne etiam coram te, & perpetuo confundar. Feram confuſionem terrenam & temporariam obedienter, ſeras tu ſaltem, obſecro, opem, ne ſpiritualiter, & in æternum confundar.

Sed quibus argumentis, quibus rationibus precator excitat & confirmat fidem ſuam, vt & precationem coram Deo ſuſcipiat, & certam ſibi exauditionem polliceatur? Aliæ quidem rationes commemorantur in illis verſiculis, qui ſequuntur, in hiſ autem tribus primis recensentur tres. Harum prima eſt: In te Domine ſpero. Non dubito de exauditione, non metuo mihi ab æterna pudefactione, etiamſi in præſentia videar coram hominibus pudeſieri. Quam ob cauſam? Quia, Domine, in te ſpero. Non ſpero in vanos deos Gentium, non in idolomaniam populorum, non in excogitata ſacra Iudæorum, ſed in te ſolum verum Deum patrem meum. Qui autem in inuocatione ſua, in ſolum verum Dominum Deum noſtrum ſperat, fieri non poteſt, vt pudeſiat, etiamſi omnia cum promiſſa ſalute pugnare videantur. Eriſi verò recensuimus aliàs illa ſcripturæ oracula, quibus manifeſtè promittitur certa ſalus ſperantibus in Deum, tamen, quia ea ſemper nobis ob oculos poſita eſſe debent, nō pigebit nos illa copioſius referre,

Pſal. 16. Mirifica miſericordiaſtuas, qui ſaluos facis ſperantes in te.

Pſal. 17. Proteſtor eſt omnium ſperantium in ſe.

Pſal. 31. Multa flagella peccatoris, ſperantem autem in Domino miſericordia circumdabit.

Pſal. 39. Beatus vir, cuius eſt nomen Domini, ſpes eius, & non reſpicit in vanitates & infanias falſas.

Pſal:

Psal. 90. Quoniam in me sperauit, liberabo eum, protegam eum, quoniam cognouit nomen meum.

Psal. 146. Beneplacitum est Domino super timentes eum, & in eis, qui sperant super misericordia eius.

Prouerb. 29. Qui timet hominem, cito corruet. Qui sperat in Domino, subleuabitur.

Esa. 30. Beati omnes, qui expectant eum.

Esa. 40. Qui sperant in Domino, mutabunt fortitudinem, assument pennas sicut aquilæ: current, & non laborabunt: ambulabunt, & non deficient.

Hiere. Thren. 3. Bonus est Dominus sperantibus in eum, animæ quærenti illum.

Nahum 1. Bonus Dominus, & confortans, in die tribulationis, & sciens sperantes in se.

Quid pluribus opus? Sacra scriptura, hoc est, cœlestis doctrina plena est horum dictorum, quibus liberatio ex omnibus periculis, & vera ac æterna salus, confidentibus, & spem suam in Domino Deo nostro collocantibus promittitur. Quare, cum prelator affirmet, se in Dominum sperare, eo ipso significat, se in sua inuocatione non pudefactum iri.

Secunda ratio. Libera me in tua (inquit) iustitia, seu propter tuam iustitiam. Tanta est tua, Domine Deus meus, iustitia, vt cum eam mihi ob oculos posuero, haud quaquam dubitem, quin me sis liberaturus, & seruaturus, ne pudefiam perpetuò. Porro vocabulum iustitiæ rectè intelligendum est. Et si enim Deus natura sua simplicissimus est, tamē facimus, docendi gratiā, iustitiam eius duplicem. Vna est iustitia veritatis, quam iustitiam aliàs probitatem vocare solemus, qua Deus verè & constanter seruat, quod promisit. Vulgò

B definiunt

definiunt iustitiam esse, quæ unicuique tribuit, quod suum est. Non autem tribuitur tantum unicuique, quod suum est, cum impijs & sceleratis redditur supplicium, quod iuxta legem Domini meriti sunt: verum etiam cum credentibus, & bene sperantibus redditur, quod ipsis promissum est. Aequum enim est, & iustum, ut serues, quod promiseris. Tametsi enim is, cui promissum est beneficium gratuitum, indignus fortasse videbitur, qui accipiat: tamen qui promisit, dignus est, qui etiam immeritis seruet promissum, ne vanus & mendax habeatur. Quod si Christus loquitur hic de hac veritatis Dei iustitia, non solum dignus est Deus, qui promissa beneficia reddat, verum etiam Christus filius Dei dignus est, propter suam obedientiam, quam præstuit usque ad mortem crucis, quæ ea accipiat. Quare cum dicit: Libera me propter tuam iustitiam, sententia est: Tu Domine Deus cælestis pater, testificatus es de me à cælo: Hic (inquiens) est filius meus dilectus, in quo ego delector: quæ voce promissisti mihi palam omnia ea beneficia, quæ patres filiis suis præstare possunt, & pro paterno affectu volunt. Cum igitur non dubitem, te ea esse iustitia, probitate, veritate, & constantia, ut serues, quod promissisti, non dubito etiam, quin me sis & gravissimis illis ærumnis, quibus obrutus sum, immensa tua clementia & potentia crepturus. Soles eripere ex angustiis suis sperantes in te, quamvis indignos, & longè aliud meritos: quanto magis eripies sperantem in te, dignum, & optimè de nomine tuo meritum? Habes iustitiam Dei veritatis. Alia est iustitia severitatis, quæ frequentius dici solet iudicium, quam iustitia. Hæc est iustitia illa, quæ Deus severissi-

mè impletionem legis suæ exigit, & si quis non imple-
 uerit eam, pronunciar ipsum æterna morte dignum.
 De qua iustitia Daniel loquitur, cùm ait: *Vigilauit Dani. 9.*
 Dominus super malitiã, & adduxit eam super nos.
 Iustus Dominus Deus noster in omnibus operibus
 suis quæ fecit. Side hac iustitia sermo fuerit, nullus
 hominum potest de ea gloriari, quòd ipsi satis fecerit:
 nec petere liberationẽ periculis suis, propter ipsam:
 Non enim iustificatur in conspectu tuo omnis viuens.
 Solus autem Iesus Christus satisfecit ei perfectissi-
 mẽ, & impleuit omnem Dei patris sui voluntatem.
 Soli igitur Christo licuit propter hanc iustitiam pe-
 tere ex ærumnis suis liberationem. Sic enim promi-
 sit Deus, & ait: *Præstans beneficia in millia his, qui Exod. 20.*
 diligunt me, & custodiunt præcepta mea. Tertia
 ratio: Exaudi me, deduc & dirige me, propter no-
 men tuum. Quod ergo est nomen illud Dei, propter
 quod Christus petit exaudiri, liberari, & deduci? Ec-
 ce igitur tibi, Deus ipse commemorat nomen suum
 Mosi, quemadmodum scriptum est Numeri 14. &
 Psal. 103. Notas fecit vias suas Mosi, filijs Israel volun-
 tates suas, Miserator & misericors Dominus, longani-
 mis & multum misericors. Et mox: Secundum al-
 titudinem cœli à terra, corroborat misericordiam
 suam super timentes se. Et Psal. 145. Miserator & mi-
 sericors Dominus, patiens & multum misericors. Ac
 iterum: Fidelis Dominus in omnibus verbis suis, &
 sanctus in omnibus operibus suis. Alleuat Dominus
 omnes, qui corruunt, & erigit omnes elisos. Et Psal.
 146. Custodit veritatem in seculũ, facit iudicium iniu-
 riam patientibus, &c. Habes aceruum epithetorum ac

nominum Dei. Vocatur enim Deus misericors, vocatur verax, vocatur fidelis in omnibus promissis suis, vocatur auxiliator in necessitatibus, & multa id genus alia. Sed quid opus est, ut ad inquirenda epitheta & nomina Dei, diu circumspiciamus, cum ea nobis hic Psalmus, quem nunc interpretamur, ob oculis disertè ponat. Vocat enim Deum petram, rupem, & arcem munitā, quippe quod sit certissima salus omnium eorum, qui promissione, & clementia eius confidunt. Quare, cum Christus precatur Deum patrem, ut liberet ac seruet ipsum, propter nomen suum, illud precatur, ut meminerit epithetorum suorum, quibus in vniuersa Sacra Scriptura celebratur, quod sit in promissis suis verax, quod sit misericors, quod sit auxiliator in necessitatibus: ne si deserat nunc ipsum in suis ærumnis, pro nomine veracis, reportet nomē mendacis, pro nomine misericordis, reportet nomen crudelis, pro nomine adiutoris, reportet nomen desertoris. Hæc certè est compendiaria via, qua precator expugnat animum Dei, ut preces eius promptè exaudiat, videlicet, si Deum admonueris, constanti fide veritatis promissionum suarum, & gloriæ nominis eius. Non potest enim ferre, ut habeatur mendax, crudelis, desertor, & verè ipsum timentium ac supplicum contemptor: ac mauult immeritos & indignos exaudire & seruare, quàm bonam nominis sui famam amittere. Quare, si calamitatibus ita obrutus fueris, ut nulla tibi euadendi via patere videatur, attolle oculos in cælum ad Deum patrem, propter Iesum Christum filium eius, & admone eum suorum epithetorum: certa fiducia concepta, quod, qui voluit se ut patrem inuocari teneri,

teneri non queat, quin inuocantem ex fide, paterno affectu complectatur.

Cogitabit autē fortasse quispiā, quomodo hæc præcatio conueniat Christo filio Dei, & Domino nostro? An non est (siquidem diuinitatem eius consideraueris) verus Deus ab æterno, & eiusdem, cum Deo patre suo, essentia, vnde & patri *ὁμοούσιος* vocatur? Si autem respexeris humanitatem eius, an nō ea assumpta est ab initio conceptionis, in Deum, & ornata omni diuina maiestate, vt gubernet æquali potentia, vnā cum Deo, vniuersum orbem? quomodo igitur conuenit ei, vt petat à Deo, nē pudeat, sed exaudiatur & liberetur, idq; citò, ac velociter? Quo significat, se versari in extremis malis, & si nō continuò liberetur, sibi mox pereundum esse. Hæc certè cum maiestate Christi pugnare videntur. Sed de hac re erudit nos Paulus, qui *Philip. 2.* ad Philippeneses scribens: Is affectus, inquit, sit in vobis, qui fuit & in Christo Iesu, qui cum esset in forma Dei, non rapinam arbitratus est, vt esset æqualis Deo, sed semetipsum inaniuit, forma serui sumpta, &c. Et si enim Christus fuit ab initio incarnationis suæ ornatus forma & decore Dei, tamen texit hanc diuinam formam forma serui, & factus est obediens vsq; ad mortem crucis, donec peregit mysterium nostræ redemptionis, & resurrexit à mortuis, ac intrauit in gloriam patris, (hoc est) patefecit publicè, quā formā iam ab initio conceptionis suæ ornatus fuerit, quā etiam in æternum retinebit. Sciamus igitur, quòd quæ Christus, in hoc & alijs suis Psalmis præcatus est, non sit præcatus, iuxta formam Dei, sed iuxta formam serui, quā nobis per omnia similis factus est, absq; tamē peccato,

Heb. 2.

ut misericors esset, (quemadmodum Epistola ad Hebræos dicit) & fidelis Pontifex, in his, quæ apud Deum forent agenda, ad expianda peccata populi. Nam ex hoc, quod contigit ipsi tentatum esse, potest & ijs, qui tentantur, succurrere.

4. *Educ me de laqueo quem absconderunt mihi, quoniam tu es fortitudo mea.*
5. *In manum tuam commendo spiritum meum. Redimis me Domine Deus veritatis.*

Iohan. 11.

Pergit Christus in sua precatone: & cùm antea petierit liberari, duci, & regi diuinitus in suis aduersis, nunc idem quidē petit, sed alijs verbis: Educ, inquit, me de laqueo, quem absconderūt mihi. Quæramus igitur, quis sit laqueus ille aut rete, è quo petit educi, aut liberari: Collegerunt, inquit Iohannes, Pontifices & Pharisei consilium, & dicebant: Quid facimus? quia hic homo multa signa facit: si dimittimus eum sic, omnes credent in eum, & venient Romani, & tollent nostrum locum & gentem. Ac mox: Ab illo die cogitauerūt, ut interficerent eum. Ecce, hic est ille laqueus, hoc est illud rete, quod Pontifices absconderunt Christo, videlicet clandestina illa Pontificum deliberatio, & sententia, qua definierunt, ut Christum occiderent, quoquò modo possent. Dicitur & mors ipsa laqueus seu rete, quo vniuersum humanū genus, propter peccatum captum tenetur, & è quo nullus hominum sua se virtute explicare potest. Vocatur autē rete absconditum, non quòd mors sit incerta, omnibus enim certissime moriendum est, & quod maxime omniū horribile

bile est, in morte pereundum, nisi si quis cœlesti ope
 conferuetur: sed quod incertum sit tempus & momen-
 tum, quo nobis sit moriendum. Petit igitur Christus à
 Deo patre suo, vt ab hoc mortis laqueo, ac reti libera-
 tur. A quo enim alio peterem? Non est medicus, qui
 arte sua me à morte seruare queat: non est princeps,
 non rex, non monarcha, cuius tanta sit potentia, vt me
 faucibus mortis eripiat. Ad te igitur solum, Deus pa-
 ter cœlestis, confugio: quia tu es fortitudo mea. Fa-
 teor, multi sunt reges terræ potentissimi, sed seipfos
 saluos in morte seruare non possunt: quomodo igitur
 seruarent alios? Tu solus es fortitudo mea, quare te
 mortis saluus euadere possum. Sed quid? Cur Christus
 deprecatur mortem, quam sua sponte ab obediendum
 Deo patri adiit, & suscepit? Non deprecatur mortem
 ex incredulitate, & ex inobedientia, sed ex inanitione,
 & obedientia: Tentatus est (inquit epistola ad He-
 bræos) per omnia, iuxta similitudinem, sed absq; pec-
 cato. Vnde apud Ioannem dicit: Pater, seruato me ex
 hac hora: audis inanitionem. Sed propterea veni in
 hanc horam: audis obedientiam. Et iterum: Pater mi,
 si possibile est, transeat à me calix iste: audis inanitionem:
 veruntamen non sicut ego volo, sed sicut tu: au-
 dis obedientiam. Nec ita deprecatur mortem, vt effu-
 giat eam corporali, carnali, & mundano more, nondū
 enim erat captus, & morti adiudicatus, ac patebat ad-
 huc ipsi liber receptus ad loca tuta. Sed illud petit, ne
 in morte corporali pereat: itaq;, quod carne petit, spi-
 ritu interpretatur. Sic enim sequitur: In manu tuā com-
 mēdo spiritū meū. Redimis me Domine Deus verita-
 tis. Hęc est vox illa, qua Christus in emittēdo extremo
 suo

Ioan. 12.

suo spiritu usus est in cruce, & quæ singulari studio
 obseruanda erit. Primum enim significat, quod quæ
 hætenus precatus sit, non hoc consilio dixerit, vt de-
 trecter inobedienter mortem corporalem, quam Deus
 pater imposuerit ferendâ: sed tantum, vt spiritus eius,
 manu Domini Dei patris, ad resurrectionem conser-
 uetur. Tu enim (inquit) redimis me, qui es Deus ve-
 ritatis, (hoc est) Non dubito spiritum meum tuæ ma-
 nu commendare, propterea quod sis Deus verax, ex
 quo certus sum, te conseruare me in morte, & redime-
 re à morte in veram & æternam vitam. In promissione
 enim, quæ dicta est de Christo ad Dauidem, testifica-
 tus est Deus, quod velit Christo esse in patrem, & re-
 gnium eius stabilire in æternū. Quomodo autem mor-
 tuus, in morte manens, regnaret, idq; perpetuo? Cùm
 igitur Deus sit verax, ac promissionum suarum seruan-
 tissimus, & tamen obiecerit Christum filium suum ex-
 tremæ morti, non dubitat, quin interea, dum moriatur
 corpore, conseruetur à Deo spiritus eius, vt tertia die
 à morte ad perpetuum regnum excitetur: ideoq; eo
 ipso, quò comendat spiritum suum Deo patri, redem-
 ptori, & veraci, vaticinatur de sua ad cœleste regnum
 resurrectione. Deinde docet hac voce, quò spiritus
 piorum, credentium in ipsum, à morte perueniant: Pa-
 ter, inquit, in manum tuam comendo spiritum meum.
 Nec dubiū est, quin Deus pater exceperit spiritum filij
 sui promptissimè. Quòcunq; autem peruenit spiritus
 Christi, qui est caput suæ ecclesiæ, eò etiam spiritus
 membrorum eius perueniat, necesse est: Pater, (inquit)
 quos dedisti mihi, volo, vt vbi ego sum, & illi sint me-
 cum. Non est igitur dubium, quin Spiritus piorum sint

PSALMI XXXI.

77

& conseruentur à morte, in manu Dei patris. Vbi autem tutius, vbi viuatius & vigetius commorari possent? Conseruantur etiam impiorum spiritus in manu Dei, sed seueri iudicis, non indulgentis patris. Itaque *Ioan. 5.* cum venerit hora, in qua omnes, qui in monumentis sunt, audient vocem filij Dei, procedent illi quidem in resurrectionem iudicij seu condemnationis, hi autem in resurrectionem vitæ.

6. *Odi eos, qui observant vanitates inanæ: ego verò in Dominum spero.*
7. *Exulto & laetor in misericordia tua, qui respicis afflictionem meam, agnoscis in tribulationibus animam meam.*
8. *Et non concludis me in manum inimici, statuis in latitudine pedes meos.*

Potuisset Christus quinque prioribus versiculis precationem suam absolvere & concludere. Qui enim orat, & impetrat, vt non pudeat in æternum, vt liberetur, & eruatur ex omnibus aduersis, vt Deus sit ipsi petra, rupes, & arx munita, vt ducatur & gubernetur diuinitus, in omnibus vijs suis, vt educatur de laqueo insidiarum, & mortis, vt Deus habeat spiritum ipsius commendatum, & redimat ipsum ex omnibus ærumnis & afflictionibus, quid amplius desiderat? cuius rei amplius egebit? quid ipsi deinceps deerit? Sed quia *Luc. 22.* Lucas scribit, Christum in horto montis Oliueti tanto angore correptum, vt oraret *ἐκ τινος* (hoc est) prolixius & intentius, ac sudaret etiam sanguinem, non est dubiū, quin non tantum recitauerit in cruce hunc versiculum: In manum tuam commendo spiritum meum

C

verum-

verum etiam commemorauerit cum aliis, tum precipue in monte Oliueti, & per noctem, qua traductus est per ora Pontificum, & ad iudicum sublellia, hunc totum Psalmum, & multos alios, qui de ipso conscripti erant. Quare, etsi priores versiculi continent summam omnia Dei beneficia, quæ ad veram hominis salutem necessaria sunt: tamen quia cor afflictum & perturbatum, quale tum erat cor Christi, indiget copiosa cōsolatione, idcirco progreditur Christus in hac precatōne longius: vt quanto ardentius Deum patrem inuocat, & beneficia eius commemorat, tantò certius fide sua confirmetur, & ad benè sperandum inflammetur: Odio (inquit) habeo eos, qui obseruant & sectantur inanes vanitates. Inanes seu mendaces vanitates, de quibus hoc loco fit sermo, significant idola, quæ colunt Gentes: & humanas traditiones, quas obseruant hypocritæ. Apud Hieremiam dicit Dominus:

Hier. 2. Quid inuenerunt patres vestri in me iniquitatis, quia elongauerunt se à me, & ambulauerunt post vanitatem, hoc est, coluerunt idola, & studuerunt humanis traditionibus, seu sacris humana ratione excogitatis

Hier. 8. & institutis? Et iterum: Nunquid Dominus non est in Zion, aut rex eius non est in ea? Quare ergo me ad iracundiam prouocauerunt in sculptilibus suis, & in vanitatibus alienis? Dicit ergo Christus: Tantum abest, vt vel in his extremis meis ærumnis, vel in vniuersa vita mea approbauerim fictitia sacra, & quæ siuerim cultu eorum opem, vt summo odio ea prosequar, & grauissimè semper detestatus sim Scribas & Phariseos, qui ea & instituerunt, & magno studio obseruauerunt. Quæ etiam causa est, cur in tantam odij ipsorum

acer-

acerbitatem incurrerim, vt me è terra viuentium prorsus extinctum & deletum cupiant. Ego enim confido & spero tantum in Dominum Deum meum: hunc solum colo, huic soli seruiò, in huius solius beneficentia acquiesco, exulto & lætor: Quia tu solus respicis (inquit) afflictionem meam, agnoscis angustias animi mei in aduersis. Nec concludis me in manum inimici, non conuiues, vt hostes mei conculcent me vsq; ad extremam internecionem. Conuiues quidem, vt manus & pedes meos clauis cõfodiant, & me cruci affigant: non conuiues autem, vt me in morte detineant, sed statuis pedes meos in latitudine, (hoc est) excitas me iterum è morte, vt resurgam, & accipiam summam maiestatem, ac latissimum imperium, in cælo & in terra, adeoq; omnia subijciantur sub pedes meos. His verbis Christus profitetur, idq; iustissimè, quòd legi Dei perfectè satisfecerit. Prima enim & præcipua lex est: Non habebis Deos alienos coram me. Sed diliges Dominum Deum tuum ex toto corde tuo, ex tota anima tua, & ex tota fortitudine tua. Et Dominum Deum tuum timebis, & illi soli seruiies. Quare, cum Christus legi satisfecerit, & Deus donauerit eum nobis vnà cum omni eius iustitia, dubitandum non est, quin iustitia eius confisi, liberemur ex omnibus afflictionibus. Deinde vaticinatur de sua à morte resurrectione, vt sciamus afflictiones & mortem non esse nostrum interitum, sed si in Christo manserimus, viam esse, qua in veram & æternam tranquillitatem ac felicitatem ingrediamur.

9. *Miserere mei Domine, quoniam affligor, contabescit præiustitia oculus meus, anima mea, & venter meus.*

10. *Consumitur præ afflictione vita mea, & anni mei præ gemitu, collabitur præ iniquitate virtus mea, & ossa mea contabescunt.*

Pergit Christus in precatione, & exponit gravitatem suarum afflictionum, non ut Deum patrem, tanquam ignorantem, doceat: sed ut se ipse in fide confirmet, & consoletur. Quod enim grauior est afflictio, eo propinquius est auxilium Dei: Miserere, inquit, mei Domine. Quâ ob causam? Quia AFFLIGOR. Hæccine causa est, propter quam exhibeam tibi misericordiam, & in aduersis te clementer seruem? Itaprofus, Deus enim recipit se ope sua præsto affuturum ijs, qui multis & magnis aduersis conflictantur: Sacrificium, inquit, Deo spiritus contribulatus, cor contritum & humiliatum Deus non despicias. Et: Iuxta est Dominus ijs, qui tribulato sunt corde, & humiles spiritu saluabit. Et: Cum ipso sum in tribulatione, eripiam eum, & glorificabo eum.

Sed fortassis afflictiones sunt leuiiores & tolerabiliiores, quam ut propter eas Deus sit inuocatione defatigandus. Nihil minus. Afflictiones enim & ærumnæ meæ peruenierunt ad summam necessitatem. Tanta est moestitia mea, tanta agritudo mea, ut præ ea omnia mea tam exteriora, quam interiora contabescant: oculus, forma, aspectus, venter, ossa, anima, vita, deniq; omnis virtus mea deficit, absumitur, collabitur. Et quanquam ætate non ita multum processi, tamen gemitibus & doloribus ita exhaustus sum, ut annis multo grandior, quam sum, videar. Quid multis opus? Tristis est anima usq; ad mortem. Et, quod in
alio

alio Psalmo dicitur: Factum est cor meum, tanquam ceraliquefcens in mediò ventris mei. Aruit tanquam testa virtus mea, & lingua mea adhæfit faucibus meis. Caterùm, vbi vetus tralatio habet: Infirmata est in paupertate virtus mea, ibi nos transtulimus: Collabitur præ iniquitate virtus mea. Videtur autem hoc in Christum minimè competere, quippè qui peccatum non fecerit, nec sit inuentus dolus in ore eius. Et si autem Hebræa dictio חַוִּי חַוִּי Hauoni, significat tam paupertatem, & afflictionē, quàm iniquitatē & peccatum, tamen non est inusitatum in Psalmis Christo tribuere iniquitatem. Psal. 40. Circumdederūt me mala, quorū nō est numerus: cōprehenderunt me iniquitates meæ, vt nō potuerim videre. Et Psal. 41. Sana animā meam, quia peccaui tibi. Tribuitur autem Christo iniquitas, non quòd vllum vnquam peccatum designauerit: sed quòd suscepit in se peccatū humani generis expiandum: ideoq; quam nos fecimus iniquitatem, eam suscepit Christus in se, nō operatione, sed expiatione. Quare in hoc Psalmo verè dicit Christus: Collabitur præ iniquitate virtus mea. Propterea quòd afflictio, quam propter iniquitatē humani generis in se suscepit, tāto pondere ipsum presserit, vt omnes vires tam corporis quàm animi eius exhaustæ fuerint.

11. *Ex omnibus aduersarijs meis (illud reperto,) quòd sim opprobrium vicinis meis valde, & timor notis meis. Qui vident me in platea, fugiunt à me.*
12. *Obliti contrador ex corde, tanquam mortuus, sum sicut vasculum perditum.*
13. *Auiis opprobrium multitudinis circum me congregata,*

conspirat vnanimiter contra me, cogitant mihi adimere vitam meam.

Hæret adhuc Christus in expositione grauitatis & magnitudinis suarum ærumnarum. Ex omnibus, in-
 quiens, aduersarijs meis, sum opprobriũ vicinis meis,
 (hoc est) habeo multos & magnos aduersarios, oppu-
 gnant me Scribæ & Pharisei, Pontifices & Sacerdo-
 tes, ex quibus constat synedrion summorum capitum
 in ecclesia populi Dei, itaq; videtur me oppugnare v-
 niuersa ipsa catholica ecclesia: oppugnant me Sena-
 tus politicus, Pilatus, & Herodes, itaq; videtur me op-
 pugnare, & mihi resistere vniuersum Romanum im-
 perium, hi enim rempub. Israëliticam nomine Ro-
 mani Imperatoris gubernant. Cùm igitur habeam tot,
 tam multos, tam magnos, tam potentes hostes & ad-
 uersarios, omnes hi autores sunt, quòd primùm, vici-
 nis meis valde sim abominabilis: arbitrantur me sibi
 esse summo opprobrio & dedecori: existimant me esse
 labem & maculam politiæ suæ, Deinde, quòd etiam
 sim timor notis meis, & vbiq; viderint me in pla-
 teis, nunc ad synedrion Pontificum, nunc ad Pilatum
 aut Herodem captiuũ & vinctum duci, ita diffugiunt,
 perinde ac si aspectu meo aut contaminarentur, aut in
 præsens exitium conijcerentur. Metuunt enim, si me
 aspectu dignentur, aut familiariter colloquantur, &
 in tantis meis afflictionibus, vel vno verbulo conso-
 lentur, creent sibi certissimum capitis periculum, &
 summum vitæ discrimen. Nomine autem vicinorum
 & notorum Christi, continentur partim illi, quibus
 Christus restitutione sanitatis benefecit: qui etsi acce-
 perunt

perunt beneficia à Christo, tamen præ metu periculorum non sunt ausi ipsum confiteri. Apud Ioannem dicitur de parentibus cæci, quòd præ metu non fuerint confessi Christum. Iam enim conspirauerant Iudæi, vt si quis eum confiteretur esse Christum, è Synagoga eijceretur. Et iterum: Multi ex principibus crediderunt in eum, sed propter Phariseos non confitebantur, ne è Synagoga eijcerentur: dilexerunt enim gloriam hominum magis, quàm gloriam Dei. Partim continetur etiam discipuli, & imprimis Apostoli, qui quàm turpiter deseruerint, & fugerint Christum, cum caperetur, & mox Petrus horribiliter abnegauerit, obscurum non est. Dicit & Lucas, quòd cum Christus crucifigeretur, stabant omnes noti eius, non propè, sed procul, videlicet, ne si propius adstarent, iudicarentur cognati eius, & subirent idem cum ipso periculum.

Ioan. 9.

Ioan. 12.

Luc. 23.

Eccle. 9.

Accedit & illud, quòd tradar obliuioni ex corde, tanquam mortuus, & habear velut vasculum confractum aut contritum. Mortuorum nulla amplius habetur ratio: Mortui (inquit Ecclesiastes) nihil nouerunt amplius, nec est eis merces, quia obliuioni tradita est memoria eorum. Dicit ergo Christus, quòd etsi adhuc vitam agit inter homines: tamen nulla amplius sit autoritate, nullus faciat honestam ipsius mentionem, ac planè videatur velut mortuus, ex omnium hominum corde seu memoria extinctus, ne cuiquam sit curæ. Et quemadmodum nullus est amplius vsus vasculi testacei, quod confractum est & contritum, nec ad quidquam aliud valet, nisi vt testæ eius foras proijciantur, & pedibus conculcentur: ita & ego in tanta sum abominatione, vt non vnus & alter extremæ

atrem fecis homo, sed vniuersa multitudo quę me circumdat, Pontificum, sacerdotū, magistratus, maiores & minores, principes, & vulgus arbitrentur se aspectu meo contaminari, & gestiant, me quā primum ē terra sublatum, Vociferantur enim omnes vnanimi voce: Tolle, tolle, crucifige eum, vt meis ipse auribus nihil aliud audiam, quā opprobria, detestationes & execrationes. Quid hac abiectiōe grauius? quid honesto homini tristius? Commemorat autem eam Christus: primum, quod libera doloris querela, sit nonnulla doloris leuatio. Deinde, vt testificetur fiduciam & spem suam, quod quod grauior est afflictio, eō propior speret liberationē. Postremò, vt significet, quanto dolore & afflictione cōstitit ipsum expiatio peccatorum nostrorum: & commonefaciat nos gratitudinis & obsequij, ne tam temerē, tam impudenter in peccata ruamus, sed præbeamus membra nostra serua iustitię ad sanctificationem.

Rom. 6.

14. *Ego autem in te spero DOMINE, dico, Deus meus es tu.*
15. *In manu tua sint tempora mea, libera me de manu inimicorum meorum, & de persecutoribus meis.*
16. *Illumina faciem tuam super seruum tuum, salua me bonitate tua.*

In tantis meis ærumnis, in tanta abominatione & abiectiōe, quod me vertam? quem implorem? cuius spe me sustentem? Non certē confugiam ad idola, non ad deos, quos ignorauerunt patres nostri, non ad sacra, quę homines pro sua sapientia instituerunt: sed in te solo,

Solo Domine, spem meam colloco, ad te solum confugio, te solum agnosco Deum redemptorem & servatorem meum. Quare, cum sciam omnia, ac imprimis tempora, seu opportunitatem me iuuandi & liberandi, in manu ac potestate tua posita esse, queso te, Domine Deus meus, ut me pro tuo arbitratu, quo tempore, & quo tibi modo visum fuerit, à tyrannide hostium & persecutorum meorum liberes. Nihil tibi præscribo, nullum certum tempus, nullum modum liberationis definio: illud tantum obsecro, ut mihi seruo tuo sis propitius, & digneris me aspectu clementiæ tuæ, ac conserues me pro summa tua bonitate & misericordia. In his versiculis docet iterum Christus suo exemplo, quod in summis nostris afflictionibus non habeamus aliud asylum præter Dominum Deum nostrum, nec aliud nobis sit confugiendum, quam spe & inuocatione nostra ad Deum patrem nostrum. Deinde illud etiam docet, quod non liceat nobis Deo tempus & modum liberationis præscribere, sed sapientiæ Dei relinquere, & contenti esse gratia Dei. Nam quod ad Paulum, ter petentem, ut ab angelo sanata liberetur, dictum est, hoc ad nos omnes, Deum pro liberatione à grauius aduersis inuocantes, pertinet: Sufficit, inquit Dominus, tibi gratia mea. Nam virtus mea per infirmitatem perficitur. 2. Cor. 12.

17. Domine, non pudeſiam, quia te inuoco, pudeſcent impij, & deſcendent taciiti ad infernum.
 18. Obmuteſcent labia mendacia, quæ loquuntur dura aduerſus iuſtum, cum ſuperbia & contemptu.

Precationi ſubiungit *πληροφορίαν* de certitudine ex
 D auditionis,

*Ios. 2.**Acto. 2.**Rom. 10.**Matth. 22.*

auditionis, & antithesin, qua cōfert suā inuocationem cum inuocatione impiorum. Illud enim dicit: Et si maximis calamitatibus obrutus sum, ac videor internitioni proximus, tamen certus sum, & persuasum habeo, me non pudefactum iri, & perituum. Vnde ergo hoc persuasum habes? Quia Domine (inquit) te inuoco. Omnis enim, quicumq; inuocauerit nomen Domini, seruabitur. Cur igitur de mea salute dubitarem? Qui autem sunt illi, qui pudefient? Non ego, inquit, qui inuoco Dominum, sed impij pudefient, qui Dominum non inuocant. Et si enim faciunt in precibus suis longos logos, vt est mos hypocritarum, tamen sunt coram Deo verè muti, & descendunt ad infernum muti. Ac valde quidem vocales sunt, & plurimùm vociferantur, insultando, mentiando & tyrānidem exercendo aduersus iustum & pium. Coram tribunali autem Domini, cū propter impietatem arguuntur, ita obmutescunt, vt ne gry quidem, vel ad vnum verbum respondere queant: ideoq; ligatis manibus & pedibus proijcientur in exteriores tenebras, vbi est fletus & stridor dentium. Dices autem: Agnosco quidem Christum Dominum nostrum, qui verè fuit iustus & pius, Deum rectè inuocasse, & de sua salute certissimum fuisse, quid autem de me & alijs hominibus fiet, de quibus scriptum est: Non iustificatur in conspectu Dei omnis viuens? Quàm miserè metuo, ne & ego in illorum catalogo continear, de quibus in his versiculis dicitur: Pudefient & descendant muti ad infernum, quippe qui mihi conscius sim multorum coram Deo mendaciorum, & grauissimorum criminum. De hac re versiculi, qui sequuntur, respondent.

19. *Quàm multa est bonitas tua, quam reposuisti timentibus te,
& quam praeftas sperantibus in te, coram filiis hominum.*
 20. *Abscondis eos in abscondito apud te, ab elationibus cuiusq;
abscondis eos in tabernaculo, à contentiosis linguis.*

Non solus ego, inquit Christus, non pudefiā, in mea inuocatione, verūmetiam, non pudefient, quotquot timent te Dominum Deum, & sperant in te. Non potest enim humanis verbis enarrari, non solum quā admirandis modis & rationibus Deus liberet timentes ipsum, è suis ærumnis & afflictionibus, verūmetiam, quā multa, quā magna, quā immensa beneficia in ipsos clementissimè & liberalissimè conferat: idq; non tantum in futuro seculo, coram cœlesti cœtu, sed etiam in præsenti seculo, coram filiis hominum. Nam si acciderit eis aliquid aduersi, vel ab elatis, superbis, arrogantibus, contemptoribus, & insultoribus, vel à contentiosis hominibus, & virulentis calumniatoribus, Deus tanta cura eos complectitur, vt etsi non statim beneuolentiam suam, & studium defendendi & liberandi coram hominibus, & humano more patefacit, tamen recipit ipsos abscondito & admirando modo in suam tutelam. Et quemadmodum Deus mirabiliter defendit Moysen, confugientem in tabernaculum fœderis, cum Israëlitaë susciperent eum lapidibus opprimendum, ita nō est dubium, quin tueatur etiam inexpectato modo, omnes timentes ipsum, & sperantes in eum. Memorabiles versiculi, quorum autoritas nobis cōsideranda est. Non enim recitauit eos vanus quispiam homo, ac ne Patriarcha quidem aut Propheta, sed Christus filius Dei, Dominus noster, qui vt

Num. 14.

est ipsa veritas, ita attulit ad nos hanc vocē, è sinu patris sui, ne quid de certitudine veritatis eius dubitemus. Deinde repetijt sententiā eius Propheta Esa. cap. 64. & Paulus 1. Cor. 2. A seculo nō audierunt, neq; auribus perceperunt, Deus, absq; te, quæ præparasti expectantibus seu diligentibus te. Utamur igitur eo, non tantum in cogitationibus de certitudine futurorum & celestium bonorum, verum etiam de modo & ratione liberationis ex ærumnis huius seculi: quod etsi Deus pater constituit tempora, articulos temporum & modum liberationis in sua ipsius potestate, tamen liberatio, ut erit admiranda, ita sit longè omnium certissima.

Sed cum omnis homo sit mendax, & omnes declinauerint, nec sit qui faciat bonum, ne vnus quidem, (vt Psalmus ait) dicito mihi, quæso, qui sint timentes Dei, & diligentes ac expectantes eum: vt sciamus etiam, quibus reposita sint immensa Dei beneficia, & seruentur in omnibus aduersis? Consideremus igitur, quod in his & similibus locis Sacræ scripturæ, timentes Dei, & diligentes eum, non sint, qui diligunt Deum, perfecta dilectione, & colunt eum absoluta & ex omni parte integrā obedientia, tales enim dilectores, & cultores Dei non sunt vlli in his terris homines; Sed qui verbum Dei, quoquo studio possunt, reuerentur, ac ex Decalogo quidem, qui est vna pars verbi Dei, agnoscunt peccata sua, & detestantur ea: ex Euangelio autem, quod est altera verbi Dei pars, agnoscunt Christum, per fidem, & credunt, quod habeant remissionem peccatorum & Deum propitium propter solum Dominum nostrum Iesum Christum, & testificantur hanc fidem, cum confessione nominis Christi co-

ram hominibus, tum spe in aduersis, ac dilectione proximi, ijsq; virtutibus, quas spiritus fidei secum affert. Et si enim nulla virtus perfecta est in homine, dum in hac terra vitam agit: tamen ubi Christus inhabitat per fidem, ibi inhaerent quidem adhuc reliquiae peccati: nihil autem reliquum est condemnationis, ijs, qui non iuxta carnem, sed iuxta spiritum versantur, ut Paulus *Rom. 8.* ait. Quare, qui sic timeant Deum, & sperant in eum, dubitare non debent, quin omnia cooperentur ipsis, teste eodem Paulo, in bonum.

21. *Benedictus Dominus, quia benefacit mihi mirando modo in ciuitate munita.*
 22. *Dicebam enim in trepidatione mea, proiectus sum à conspectu oculorum tuorum: & tamen tu audiebas vocem deprecationum mearum, dum clamarem ad te.*

Concludit Christus filius Dei precationem suam gratiarum actione & cohortatione. Ac de cohortatione quidem mox, nunc de gratiarum actione. Dominus, inquit, contulit hactenus in me plurima & maxima quæq; beneficia, idq; mirando modo, & præter omnium hominum expectationem: nec aliter me defendit & seruauit, quàm si in munitissima quadam & inexpugnabili vrbe aut arce commoratus essem. Nam cum in extrema mea afflictione ita trepidarem, ut arbitrarer me ab oculis, à fauore Dei prorsus abiectum, & exclamarem: Deus meus, Deus meus, quare me deservisti? quare longè à me recedis, ut non serues me, nec audias verba rugitus mei? Talia (inquam) cum vociferarer, non tamen repulit me Dominus, nec auersatus est preces meas: sed quanto magis videbar, pro

humano iudicio perijsse, tantò illustriorem victoriam beneficio Dei tam ab hostibus meis Pontificibus & Phariseis, quàm à morte & inferno reportabam. Reliquum igitur est, vt benedicam Dominũ, & celebrem nomen eius, qua possum laude, ac omne meum studiũ in illo collocem, vt pro tantis beneficijs summas gratias agam & referam. Cæterũ vox illa: Dicebam in trepidatione mea, proiectus sum à facie oculorum tuorum, videtur esse vox desperationis, & nulli hominum minus competere, quàm filio Dei, Domino nostro Iesu Christo. Sed sciamus, quòd in Christo, iuxta Paulũ, alia sit forma Dei, alia forma serui. Iuxta formam Dei, Christus est Deo in maiestate æqualis: iuxta formam autem serui, factus est per omnia (sed absq; peccato) nobis hominibus similis, & obediens Deo, non solum vsq; ad tristitiam, anxietatem & trepidationem animi, verũ etiam vsq; ad mortem crucis. Quare, cùm dicit: Proiectus sum à facie oculorum tuorum. Et: Deus meus, Deus meus, quare me deseruisti, non est vox formæ Dei, sed formæ serui: non est vox maiestatis, sed humiliationis, non est vox plenitudinis Dei, sed exinanitionis, qua in similitudine hominum constitutus, metuit, tristitia affectus est, & trepidauit, imò etiam mortuus est, & descendit ad inferos: vt nos à metu, tristitia, trepidatione, morte & inferno liberaret. Habes gratiarum actionem. Nunc audiamus cohortationem.

Philip. 2.

23. *Diligite Dominum omnes sancti eius, Dominus custodit credentes, reddit autem abundanter agenti superbè.*
24. *Estote animo forti, & roboretur cor vestrum omnium, quĩ expectatis Dominum.*

Hæc est cohortatio filij Dei ad vniuersam suam ecclesiam. Quos enim vocat hic sanctos, intelligit sanctam suam ecclesiam catholicam: quam non idcirco vocat sanctam, quod sit iuxta carnem sancta, & ab omni labe perse pura ac immaculata, dum enim in hac carne viuimus, semper orandum est: Non intres in iudiciū cum seruo tuo, quia non iustificatur in conspectu tuo omnis uiuens: sed dicitur sancta, quod fide sua agnoscat verum sanctum Dominum nostrum Iesum Christum, quo cum omnia nobis sunt donata: & quod cœperit expurgare sancto spiritu reliquias carnis. Hos ergo cohortatur & excitat Christus filius Dei, ut etsi grauissimis afflictionibus obruuntur, & prorsus opprimi videntur, tamen pergant diligere Dominum, hoc est, deferre Domino honorem veritatis, credere promissionibus Domini, omnem spem suam in verbo Domini collocare, ac in inuocatione nominis Domini constantiter pergere, & in expectatione cœlestis auxilij, officium non deserere. Et additur ratio, cur Dominus sic diligendus sit: Quia Dominus (inquit) custodit, tnetur, & seruat credentes: incredulis autem, superbè agentibus, verbum Domini contumaciter reiicientibus, ecclesiam Domini tyrannicè persequentibus, in omni scelerum genere vitam impœnitenter ducentibus, reddit Dominus, suo tempore, mercedem: idque non exiguè, sed abundanter & cumulatè: ut non necesse habeas te ipsum vlisci, & vindictam, pro carnali tuo arbitrato, ab aduersarijs sumere, sed relinquas ultionem Domino, qui retribuet omnibus impijs confertam & copiosam mensuram. Admoneo igitur vos omnes, qui expectatis opem Domini, ut in aduersis sufferendis non defatigemini, sed fortis sitis animo, & robusto corde.

Hoc

Ioan. 16.

Hoc prorsus illud est, quod Christus postea, cum incarnatus esset, dixit. In mundo afflictionem habetis: sed bono animo sitis: Ego vici mundum. In hoc enim Psalmo commemorauit Christus misérias & afflictiones suas, quas ad expianda peccata humani generis suscepit. Commemorauit etiam liberationem & victoriam suam: Benedictus, inquit, Dominus, quia benefacit mihi mirando modo, in munita ciuitate. Hortatur ergo nunc ecclesiam suam, vt in aduersis suis fortem ac robustum animum tam virtute, quàm exemplo ipsius concipiat. Nam cum ipse vicerit crucem & mortem. reliquum est, quòd omnes, quotquot collocauerint suam fiduciam & spem in ipso, non pudeant, sed vincant etiam ipsi, spiritu eius, quo donati sunt, & exemplo eius, omnes ærumnas, hoc est, tam mortem, quàm infernum ipsum,

VSVS HVIVS PSALMI.

Paulus ad Romanos scribens: Quæcunq; (inquit) præscripta sunt, in nostram doctrinam præscripta, vt per patientiam & consolationem scripturarum spem habeamus. Sic & hic Psalmus non solum scriptus, sed etiam dictus & recitatus est à Christo filio Dei, propter nos, vt cum animis nostris diligenter reputemus, primū quidem quanta cruce & morte constiterit Christum filium Dei expiatio peccatorum nostrorum: & expergiscamur ad timorem Dei, atque gratitudinem. Deinde, vt excitemur ad spem liberationis, in omnibus aduersis: quæ sicut Christum nō pudefecit, ita nullum hominem, qui fiduciā suam in Deo patre Domini nostri

nostri Iesu Christi collocat, pudefaciet. Nam, quem-
 admodum passionibus Christi sunt nostræ, ita & nostræ
 passionibus sunt Christi, ut certò sperandum sit, nos non
 minus è nostris passionibus liberandos, propter Chri-
 stum, quàm Christus è suis liberatus est. Dicit autem
 quispiam horrore mortis & inferni concussus: Multa
 quidem & magna salus promittitur confidentibus &
 sperantibus in Domino Deo, per Christum Iesum: ego
 autem re ipsa sentio, me à facie oculorum Domini ita
 proiectum, ut nullam nec fiduciam, nec spem in corde
 meo comperiã. Iubes quidem has virtutes à Deo pre-
 cibus petere, sed preces absq; fide, irritæ sunt & vanæ,
 Fidem autem non possum ex meipso petere, quia do-
 num Dei est, non hominis, donũ spiritus est, non car-
 nis: nec possum à Deo petere, quia cùm caream fide
 naturaliter, quomodo Deus haberet petitionis meæ
 rationem? Et: An non, quod non est ex fide, peccatum
 est? Quomodo autem peccato impetrarem fidem? Ac-
 cedit & illud, quòd miserrimè metuum, ne non sim à
 Deo ad salutem electus, seu prædestinatus: nec possim
 ad Deum conuerti, quòd peccauerim fortassis in spiri-
 tum sanctum, quod genus peccati dicitur irremissibi-
 le. Frustra igitur recitantur mihi multa dicta de spe in
 Dominum, cùm ego nullam in me spem sentiam, aut
 quam sentio, video non esse durabilem, ideoq; nec ve-
 ram: quò ergo me vertam? Hæc sunt ignita iacula sa-
 tanæ, quibus non mirum est, si multi confodiantur, &
 pereant, mirum potius est, si vel vnus aut alter illæsus
 euadat: & tamen ea extinguere, & euadere licet, si
 modò exhibuerimus nos armatura Dei muniendos.
 Rectè enim, & verè dicis, quòd fides & spes non sint

E humanæ

humanæ carnis opera, sed sint dona Dei. Quod autem addis, Deum idcirco nolle tibi hæc dona dare, quod & non sis electus, & peccaueris in Spiritum sanctum, te ipsum seducis & est opinionis mendacium, non veritatis testimonium.

- Dicamus ergo primum de electione. Non est dubium, quin salus nostra constet, non humana voluntate aut industria, sed electione & gratuita clementia Dei.
- Ioan. 1.* Qui non ex sanguinibus, inquit, neq; ex voluntate carnis, neq; ex voluntate viri, sed ex Deo nati sunt. Et:
- 1. Ioan. 4.* In hoc est charitas, non quod nos dilexerimus Deum, sed quod ipse dilexerit nos. Et de Esau ac Iacob dicit
- Rom. 9.* Paulus: Nondum natis pueris, cum neq; boni quippiam fecissent, neq; mali, ut secundum electionem propositum Dei maneret, non ex operibus, sed ex vocante dictum est: Maior seruiet minori. Ac mox Mosi dicit: Miserebor, cuius misereor, commiserabor, quemcumq; commiseror: itaq; non est volentis, neq; currentis (hominis) sed miserationis Dei. Non est autem sentiendum, quod sacra & cœlestis scriptura concionetur hæc de electione, ut homines deterreat à fide & spe salutis suæ, sed potius, ut ipsos ad fidem & spem innitet. Sacra enim scriptura data est nobis, & magnis ac multis miraculis confirmata, in nostram doctrinam, quemadmodum paulò antè ex Paulo dicebamus, ut per patientiam & consolationem scripturarum, spem habeamus. Et iterum
- Rom. 19.* dicit Paulus: Sacrae literæ possunt te eruditum reddere ad salutem, per fidem, quæ est in Christo Iesu: Omnis scriptura diuinitus est inspirata, & utilis ad doctrinam, (videlicet fidei, spei, & charitatis) ad redargutionem (videlicet impiæ doctrinæ,) ad correctionem, (prauitatis

tatis vitæ) ad institutionem, quæ est in iustitia, vt integer sit homo ad omne opus bonū apparatus. Hic est verus & legitimus vsus vniuersæ sacræ scripturæ, adeoq; etiam eius particulæ, quæ de electione concionatur. Quare si quis per doctrinam de electione excitatur magis ad incredulitatem quàm ad fidem, & plus ad abiiciendâ, quàm concipiendam spem salutis, tantū abest, vt veritatem sectetur, sicut sibi ipse fingit, vt potius cœlesti & diuina scriptura manifestè abutatur, & grauissimè, aduersus Deum, scripturæ autorem, peccet.

Reprehenduntur seueriter, qui abutuntur nomine Dei ad maledicta & execrationes, quòd hoc nomen datū nobis sit ad benedictionem & salutem; condemnantur, qui sacra scriptura abutuntur ad veneficia & magiam. Non minus certè reprehendendi & condemnandi sunt hi, qui scriptura abutuntur ad abiiciendam fidem, & suscipiendam desperationem. Atenim, (inquies iterū) etiamsi sciam peccare illos, qui scriptura ad abiiciendâ spem salutis suæ abutūtur, tamen nondum euulsus est mihi scrupulus de mei electione, qui me dies noctesq; stimulat & pungit, nec finit me vllam habere animi tranquillitatem. Cogito enim ac varijs argumentis, ijsq; nō omnino incertis, vt mihi quidem videtur, cognosco, me non esse à Deo ad verâ & æternam salutem electum, quid ergo faciam? Sed si rem probè expendas, quæ modò de vsu scripturæ diximus, magna iam ex parte tibi responsum est. Quæso enim te, quæ sunt illa argumenta, quibus cognoscis te non esse à Deo ad salutem electum? num constant testimonijs scripturæ? Sed exposuimus modò, illum esse verum scripturæ vsum, nō vt infirmet, sed vt confirmet fidem.

Et extant manifesta dicta scripturæ, quibus Spiritus sanctus testificatur, quòd Deus, quantum ad se (ad se, inquam, qui sua natura, non est aliud, quàm salus ipsa) attinet, nò vnum tantum, & alterum hominem, sed omnes homines, ad participatum eternæ salutis elegerit.

Ezech. 18

& 33.

Viuo ego, dicit Dominus in Ezechiele, nolo mortem impij, sed magis, vt conuertatur & viuat. Non simpliciter affirmat, sed etiam iurat, idq; cum non habeat se maiorem, per semetipsum, quòd non delectetur interitu hominum, quamuis impiorum. Delectatur ergo salute eorum. Quod, quid aliud est, quàm eos ad consequendam salutem eligere.

Rom. 11.

Paulus ad Rom. scribens: Conclufit, inquit, Deus omnes sub incredulitatem, vt misereretur omnium.

1. Tim. 2.

Et ad Timotheum: Deus, inquit, vult cunctos homines saluos fieri, & ad agnitionem veritatis venire.

2. Pet. 3.

Et Petrus: Patiens est (inquit) Dominus erga nos, dum non vult vllos perire, sed omnes ad poenitentiam recipere.

1. Ioan. 2.

Sed & Ioannes dicit, Christum esse propitiationem pro peccatis, non pro nostris tantum, sed etiam pro totius mundi.

Elegit ergo Deus, quod in ipso est, totum mundum, hoc est, omnes homines, vt veram & eternam salutem cõsequerentur. Nam, quòd non omnes ad salutem perueniunt, non fit vitio diuinæ electionis, sed vitio humanæ obstinationis, quòd maxima hominum pars oblatam salutem, ad quam & creati & electi sunt, recipere nolint. Hinc est, quod dicitur: Multos vocatos, paucos verò electos. Non enim hic fit sermo, de electione Dei, qui omnes eos, quos vocat, elegit, alioqui
vocatío

vocatio magis esset ridicula, quàm seria: sed sit sermo de electione hominum, quòd, etsi Deus multos eligit & vocat, tamen hi non agnoscunt electionem Dei, nec dant locum vocationi eius. Hoc enim parabola ipsa, in qua hoc dictum recitatur, significat, cùm affirmat inuitatos & vocatos, beneficium regis sua sponte reie- *Matt. 22.* cisse. Et quos parabola dicit inuitatos & vocatos, hos Moses vocat electos: Te, inquit, elegit Dominus Deus tuus, vt sis ei populus peculiaris de cunctis populis, qui sunt super terram.

Nec vniuersos tantùm eligit Deus, verùm etiã singulis, qui Sacramenta eius accipiunt, testificatur palàm, quòd agnoscat ipsos ad veram salutem electos. Quare, si quis è scriptura colligit, se à Deo non esse electũ, suis se ipse somnijs fallit, & mendacia sibi fingit.

Sed hic iterum obstrepis: Scio, inquit, Deum omnibus hominibus offerre salutem, & velle omnes homines saluos fieri, ac etiam ad agendam pœnitentiam, & ad consequendã pœnitentia salutem, eligere, iuxta dicta Sacræ scripturę. Sed Deus videtur aliud reuelata prædicatione verbi sui significare, & aliud in æternæ illius & imperscrutabilis mentis suæ latebris cogitare. Ego enim re ipsa in me comperio, quòd sim induratio & obstinatio, quàm qui possim oblatam salutem fide accipere, & spe conseruare. Si ergo Deus serio me ad salutem eligit & vocat, cur non mutat meam voluntatem, vt quod ab ipso offertur, prompta fide accipiam: cur nõ facit è corde meo lapideo, cor carneum, quod pœnitentiam agat, verbo eius credat, & in præceptis eius obedienter ambulet? Me miserum, quàm metuo, ne quem Deus externa sua voce eligit, interna

mente sua abominetur. Respondeo: Nā tu insignem ex Domino Deo nostro impostorem & veteratorem facis, si arbitraris eum aliud verbis polliceri, aliud corde cēlare: & altera manu panem ostentare, altera lapidem gestare. Absit hoc à Deo, vt hanc rem faciat, & non velit ex animo, vt quem vocat ad pœnitentiam, resipiscat, & salutem consequatur. Non est hoc eius, qui iuramento asseuerat, se nolle mortem impij, sed magis, vt conuertatur & viuat. Nam, quòd omnes quidem eligit & vocat ad salutem, non mutet autem omnibus cor lapideum in carneum, vt agnoscant electionem & accipiant salutem, non ideo accidit, quòd id non velit, cū sit optimus, aut non possit, cū sit maximus: sed quòd id facere non debeat, cū sit gubernator rerum omnium iustissimus & sapientissimus.

Initio humanæ conditionis collocauit hominem in Paradiso, & dedit ei mandatum, ne vesceretur de arbore sapientiæ. Voluit autem seriò & ex animo, vt homo hoc præceptum obseruaret: ac potuisset etiam cauere, ne hoc præceptum violaret: sed id fieri non debuit. Quid ita? Recensent quidem nonnulli aliquot verisimiles rationes: sed quæ non possunt humanæ curiositati, imò ne quidem exactissimo humanæ sapientiæ iudicio satisfacere. Perfecta enim huius rei cognitio reseruata est in futurū seculum, vbi cernemus Deum facie ad faciē, & videbimus eum, sicuti est. Post lapsum autem hominis, vocat Deus peccatores ad pœnitentiam, & vult ex animo, vt pœnitentiam agant. Ac potest etiam omnium animos ad agendam pœnitentiam conuertere: & tamen non conuertit omnes, sed

sed alios quidem conuertit ex gratuita sua clementia: alios autem finit in peccato ipsorum, ex ira sua iustissima. Quid ita? Quia aliud fieri non debet. Cur autem hoc? O profunditatem diuitiarum sapientiae & cognitionis Dei, quàm imperscrutabilia sunt iudicia eius, & imperuestigabiles viæ eius.

Tu ergo, quisquis es, qui affirmas, te idcirco non posse veram penitentiam agere, quòd non sis à Deo electus, facis Deo iniuriam, & dicis mendacium, propterea quòd Deus manifestè ac verè significauerit, se & faueret tibi, & elegisse te ad salutem, non tantùm generalibus dictis, quæ paulo antè commemorata sunt, verùm etiam peculiaribus testimonijs, dum sacramento Baptismi te in ecclesiam suam suscepit, & corporis ac sanguinis filii sui te in Cœna dominica participem fecit. Nec licet tibi, vt deserta hac manifesta & vera voluntate Dei, recipias te in perscrutationem maiestatis Dei, in altero demum seculo reuelandæ, hæc enim in hoc seculo nihil ad te, propterea quòd Deus seuerissimè præceperit, vt illam suam voluntatem, quam tibi in Prophetis & Apostolicis scriptis cognoscendam proposuit, sceteris, & in ea conquiescas. Quod si autem cogitaueris, Deum idcirco te non conuerti ad agendam penitentiam, quia non debeat tibi hoc beneficiũ, verè agnoscis maiestatem Dei, ac rectè confiteris tuam indignitatem, ideoq; de tua salute benè confidendũ est. Morbũ enim suũ, & veram morbi causam intelligere, primus gradus est ad sanitatẽ. Nam, quos Deus in hoc seculo, nunquam ad agendam penitentiam cõuertere cogitat, hi non dant Deo gloriam iustitiæ, sed aut non requirunt Deum,

Deum ; aut accusant Deum iniustitiæ & tyrannidis, quanquam ne sic quidem manus Domini abbreviata est, quin etiam speremus eum ex his, qui sic insaniunt, nonnullos, pro immensa sua bonitate, ad bonam frugem conuertere. Quare cùm tu tribuas Deo laudem iustitiæ, & agnoscas tuam indignitatem, non dubium est, quin Deus, qui linum fumigans non exstinguit, & calamum quassatum non conterit, conseruaturus sit te ad consequendam veram salutem. Reliquum autem est, vt cùm alter alterius onera portare debeamus, iuue mus nos hominem sic tentatum nostris officijs, & confirmemus eum prædicatione Euangelij Christi, & cōmēdemus eum precibus Domino, vt ostēdat in ipso omnem clementiam ad exprimendum exemplar his, qui similes aliquando tētationes sint subituri. Et hætenus quidem de electione.

Dicamus nunc etiam de peccato in Spiritum sanctum. Nam, quòd nonnulli de sua salute dubitent, non ex illo tantum mouentur, sicut suprà dictum est, quòd arbitrentur se non esse à Deo electos, verum etiā quòd cogitent, se fortè alicubi peccasse peccatū in Spiritum sanctum, quod scriptura Sacra vocat peccatum irremissibile. Ac verisimile est, multis occasionem pereundi hinc datam esse, quòd non rectè explicetur, quomodo peccatū in Spiritum sanctū dicatur irremissibile. Cui
Mar. 3. accedit & illud, quod Ioannes vocat peccatum ad mortem, pro quo dicit, non esse orandū, videlicet sentiens esse irremissibile. Quid igitur dicemus ? si vllum est peccatum, quod Deus nec velit, nec possit remittere, conscientia nunquam erit tranquilla, nec poterit vquam certam & firmam fiduciam de peccatorum remissione

missione concipere, propterea quòd semper metuat, ne fortè tale peccatum designauerit, præsertim cùm videat inter scripturæ interpretes nondum constare, quid sit hoc irremissibile peccatum. Sed si rectè, & iuxta fidei analogiam intelligitur, quod in scriptura de hoc irremissibili peccato, & ad mortem, dictum est, nullus scrupulus de salutis nostræ incertitudine residet. Nam, quòd Christus de irremissibili peccato in Spiritum sanctum concionatur, non sentit, quòd hoc peccatum superet ac vincat omnem Dei clementiam, nec possit vllò modo condonari: sed quòd non habeat vllam speciem excusationis, nec coram Deo, nec corā hominibus. Alia enim peccata, inter quæ est etiam peccatum in filium hominis, etsi nullam habet excusationem coram Deo, tamen habent quēdam coram hominibus prætextū. Peccatum autem, quod dicitur in Spiritum sanctum, nullum habet omninò prætexum nec coram Deo, quod Christus dicit in futuro sæculo, nec coram hominibus, quod dicit in hoc sæculo: nihilo minus tamen, si egeris pœnitentiā, condonatur à Deo. Quòd enim vocabulum irremissibile, in hac de peccato in Spiritum sanctum disputatione, magis significet inexcusabile, quàm inexpiabile, aut, vt ita dicam, incondonabile, probat summa totius Euangelij Christi, & vera fidei analogia. Nam Euangelium Christi eò tendit, id agit, ad eum exitum properat, vt doceat, Christum esse expiatorem, non vnius tantum, & alterius peccati, sed omnium simul peccatorum, quamuis grauium & atrocium. Cùm enim duo sint genera peccatorum, alterum Originale, vt vocant, alterū Actuale, & hoc sit illius fructus, necessario sequitur, illud

longè omnium grauissimum esse. Non est autem dubium, quin Christus expiauerit morte sua peccatum Originale: quomodo igitur nō expiasset etiam peccatum Actuale, Originalis illius fructum? Et cū peccatum in Spiritum sanctum sit fructus peccati Originalis, quid reliquum est, nisi vt verè sentiamus, etiam ipsum esse à Christo expiatum? Hic nunc Spiritus sancti ipsius (hoc est) sacræ scripturæ, quæ est Spiritus sancti oraculum, testimonia consideranda sunt, & diligenter obseruanda.

Elia. 40. Completa est militia eius, dimissa est iniquitas illius. Suscepit de manu **D O M I N I** duplicia pro **OMNIBVS** peccatis suis. Hæc est concio de expiatione peccatorum, quæ facta est per Christum. Et cū dicit, homines suscipere duplicia pro omnibus peccatis suis, manifestè significat, non solum omnia peccata esse expiata, verū etiam beneficium Christi duplo maius & amplius esse, quàm sint omnia humani generis peccata: vt sciamus, quòd clementia Dei per Christum filium eius patefacta, superet omnem hominū iniquitatem.

Mich. 7. Deponet iniquitates nostras, & proijciet in profundum maris **OMNIA** peccata nostra. Quid? Excipiemus ne hic peccatum in Spiritum sanctum? At, quod Spiritus ipse sanctus non excipit, dicit enim: **OMNIA**: cur nos nostra temeritate exciperemus? Sed excipit, inquires, alio loco, cū affirmat aliquod esse peccatum irremissibile. Ergo ne dicemus, quòd secum ipse pugnet? Nihil certè minus, sed cū & Prophetica & Apostolica litera constantissimè doceant, mortem Christi esse sufficientissimā pro **OMNIBVS** peccatis

eatis expiationem, necessarium erit, vt irremissibile illud peccatum ita intelligamus, ne ab expiatione Christi excludatur, (hoc est) ne expiatio Christi pro imbecilli & insufficienti habeatur: hoc enim esset mortem Christi summa contumelia afficere.

Roma. 5. Vbi exuberavit peccatum, ibi magis exuberavit gratia. Quòd si esset aliquod peccatum grauius & atrocius, quàm quod à filio Dei expiatum esset, magis exuberaret peccatum quàm gratia.

1. Joannis 1. Sanguis Iesu Christi filij Dei emundat nos ab OMNI peccato.

Et mox: Si confiteamur peccata nostra, fidelis est & iustus, vt remittat nobis peccata nostra, & emundet nos ab OMNI iniquitate.

Quid plura? Vbicunq; Prophetica & Apostolica litera cōcionantur de multitudine misericordiae Dei, & de opulentia ac diuitijs gratiae eius, per filium suum Iesum Christum, ibi manifestè significant, nullū omnino esse genus peccati, quod nō per clementiam Dei in Christo deleri queat. Cū igitur Euangelion Christi adnūciat omnibus hominibus omnium peccatorū remissionem, fieri nō potest, vt ex hoc ordine peccatū in Spiritum sanctum excludatur. Itaq; cū hoc peccatū dicitur irremissibile, & in hoc, & in futuro seculo, nō intelligendū erit, quòd Deus tam durus & immitis sit, vt conuertēti se ad Christum, hoc peccatū non cōdonet, sed quòd qui hoc peccatum designat, non habeat vllā peccati sui causificationē, nec corā hominibus in hoc seculo, nec coram Deo in altero seculo. Vbi enim Christus de hoc peccato apud Euangelistas cōcionatur, ibi Pharisei calumniati fuerāt miraculum, quo daemonia,

tam manifesta & aperta cœlestis ac diuini Spiritus potentia, eiecta erant, vt ei nemo vlla probabili aut verisimili specie contradicere potuerit. Et tamen Pharisei contradicebant, ac satanæ potius, quàm Spiritui sancto adscribebant. Opponit igitur Christus inter se peccatum in filium hominis, & peccatum in Spiritum sanctum: ac illud quidem vocat remissibile, propterea quòd qui non agnoscebant ipsum (qui se filium hominis solet vocare) pro vero Messia seu Christo, videbantur coram hominibus aliquam peccati sui excusationem habere. Filius enim ille hominis, qui est Iesus Christus, etsi multa & debet miracula, tamen Prophetæ etiam & diderunt miracula: & persona ipse sua, humilior atq; abiectior videbatur, quàm qui tam prolixis & magnificis Prophetarum promissionibus de Messia responderet. Hoc autem vocat irremissibile, propterea quòd cùm Pharisei manifestum opus Spiritus sancti tribuerent satanæ, tam euidenter & perspicuè peccabant, vt nullam planè peccati sui vel rationem, vel excusationem afferre potuerint. Quale est, si quis conferret inter se furem pauperem, & opulentum, ac diceret, illum quidem remissibiliter peccasse, quòd furatus sit, vt impleret esurientem animam, sicut Salomon loquitur: hunc autem irremissibiliter peccasse, quòd cùm magnam vim diuitiarum possidet, nullam prorsus habeat furti sui excusationem, nec coram Deo, nec coram hominibus, & tamen nec hoc peccatum tanti est momenti, vt resipiscienti non condonetur propter Christum. Quare, quod in hac disputatione de peccato in Spiritum sanctum, dicitur de peccati irremissibilitate, non est referendum ad mortem Christi, qua omnia peccata

cata sufficienter expiata sunt: sed referendum est ad pec-
 cati ipsius perspicuitatem, qua fit, vt ipsi nulla prorsus
 excusatio relicta sit, quæ vel aliquo modo, si non co-
 ram Deo, at saltem coram hominibus prætexi queat.
 Nam, quod Ioannes recēset aliquod peccatum ad mor-
 tem, pro quo non vult orari, loquitur simpliciter de tali
 peccato, quod etiā vulgò mortale vocatur. Facit enim
 duo peccatorum genera, alterum ad mortem, alterum
 non ad mortem, quod vocant veniale. Ac pro illo qui-
 dem, non vult vt oretur: non quod Deus tam immise-
 ricors sit, vt ipsum non condonet propter Christum, a-
 genti pœnitentiam, sed quod qui eiusmodi peccatum
 designat, & non agit pœnitentiam, non sit recipiendus
 in publicam communionem ecclesiæ. Sicut & Paulus
 dicit: Cum eiusmodi ne cibum quidem capiat. Quod 1. Cor. 1.
 enim apud Ioannem est peccatū ad mortem, hoc apud
 Paulum est scortatio, adulterium, furtum, rapina, ebie-
 tas, simulacrorum cultus, & id genus alia, quæ vocant
 peccata mortalia. Pro his ergo peccatis non est oran-
 dum, primum, quod nō debeamus orare DOMINVM,
 vt condonet & remittat ea illis, qui non agunt pœniten-
 tiā: sed orandū potius est, vt DOMINVS coniiciat eos
 in peccatorum suorū agnitionē, ne in his peccatis ma-
 neant, sed agant pœnitentiam, & meliorem vitam du-
 cant. Deinde, quod qui his peccatis obnoxij sunt, non
 debeant in communionem publicarum precum Eccle-
 siæ admitti, sed excommunicari, vt pudore suffundantur
 & resipiscant. Nam si resipuerint, tantum abest, vt
 non consequantur peccatorum suorum veniam, pro-
 pter Christum, vt Christus maximè omnium in hunc
 mundum venerit, quo peccatores saluos faceret, quem

admodum mōx indicabitur: Aliud autem est peccatū non ad mortem, quod intelligendum est, partim pro peccato Originali, cōdonato quidem in Baptismo propter Christum, manente autem in carne, & inhærente ei vsq; ad mortem. Et si enim hoc peccatum per se est maximè omnium mortiferum, tamen quia credenti in Christum non amplius imputatur, haud incongruēter vocatur post Baptismum, peccatum non ad mortem. Partim etiam intelligendum est pro humanis vitijs, quibus etiam hi, qui alioqui sanctissimam vitam ducunt, obnoxij esse solent, vt sunt, exempli gratia, morosum esse, suspicacem, præcipitis iræ, nimix tenacitatis, indulgentiæ, socordiæ, de quibus vitijs vulgò dici solet: Amici vitia noueris, non oderis. Pro his vult Ioannes, vt ore tur, non quòd sint approbanda, sed quòd etiam si maneant in homine, tamen non est propter ipsa e communiōe Ecclesiæ eiiciendus: sed toleranda sunt, si corrigi non possunt, & orandum est, vt homini non imputentur. Siue igitur peccaueris peccatum in Spiritum sanctum, siue peccatum ad mortem, nullā habes causam, cur spem salutis tuæ abijcias, quòd Christus pertulerit omnia peccata in corpore suo super lignum, vt Petrus loquitur, & expiauerit ea sanguine suo, vt credentibus in ipsum remittantur.

Deinde sacra scriptura non solūm testificatur, quòd omnia peccata sanguine Christi sint expiata, sed etiam quòd Deus omnes pœnitentiam agentes clementer suscipiat, & faciat ipsos expiationis Christi participes. Nam & hoc multi metuūt, ne pateat ipsis, post multa & magna peccata, eaq; sæpius repetita, receptus ad Christum, etiam si pœnitentiam agere instituant.

Audienda

Audienda igitur sunt testimonia Spiritus sancti, ut abijciamus hunc metum, & in agendæ pœnitentiæ instituto confirmemur.

Esa. 55. Derelinquat impius viam suam, & vir iniquus cogitationes suas: & reuertatur ad DOMINVM, & miserebitur eius: & ad Deum nostrum, quoniam mul-
tusest ad ignoscendum.

Hiere. 3. Vulgò dicitur: Si dimiserit vir uxorem suam, & recedens ab eo, duxerit virum alterum, nunquid reuertetur ad eum vltra? nunquid non polluta & contaminata erit mulier illa? Tu autem fornicata es cum amatoribus multis: tamen reuerrere ad me, dicit DOMINVS, & suscipiam te.

Matth. 11. Venite ad me omnes, qui laboratis & onerati estis, & ego refocillabo vos.

Luc. 15. Gaudium erit in cœlo super vno peccatore pœnitentiam agente.

Rom. 2. Bonitas Dei innuitat te ad pœnitentiam. Non inuitaret autem, nisi pœnitentem reciperet.

Rom. 11. Dona & vocatio Dei eiusmodi sunt, ut eorum illum pœnitere non possit. Deus autem offert omnibus donum filij sui, & vocat omnes per Euangelion, ad capiendam cœlestem hæreditatem per fidem in filium suum. Quare, etiamsi quispiam deseruerit Deum, & abiecerit donem & vocationum eius, tamen si reuersus fuerit, & pœnitentiam egerit, non repellitur, propterea quòd non pœniteat Deum donorum & vocationis suæ.

1. Tim. 1. Christus Iesus venit in mundum, ut peccatores saluos faceret, quorum ego primus sum. Verum ideo misericordiam sum adeptus, ut in me primò ostenderet

deret Iesus Christus, omnem clementiam, ad exprimendum exemplar his, qui credituri essent in ipso invitam æternam.

2. Timot. 2. Si negamus (subintelligendum est, & perduramus in negatione) & ille negabit nos. Si increduli sumus (subintelligendum est, & conuersi fuerimus ad fidem) ille fidelis manet, se ipsum negare non potest. Et si enim nos deficimus à Christo abnegatione nostra, tamen si conuersi fuerimus ad eum per fidem, non deficit ipse à veritate Euangelij sui, sed seruat eam firmam omnibus pœnitentiam agentibus.

1. Ioannis 2. Filioli mei, ne peccetis, & si quis peccauerit, aduocatum habemus apud patrem Iesum Christum iustum.

Sed nihil opus est in præsentia multa id genus dicta commemorare, cum manifestum sit, Iesum Christum præcipuè propter hanc causam in hunc mundum venisse, ut vocaret peccatores ad pœnitentiam. Non vocaret autem eos, nisi serio cogitaret eos recipere.

At enim, non dubito, inquires, quin Deus recipiat conuertentes se ad ipsum, & agentes veram pœnitentiam, ego verò obstinatio sum, quàm qui possim me conuerrere ad Deum, & pœnitentiam agere: & peccatum in Spiritum sanctum illius est ingenij, ut qui hoc designauit, ne possit quidem, etiam si velit, ad pœnitentiam redire. Veterem audio cantilenam, & tamen veram confessionem, si quidem sermo fuerit de corrupte humanæ naturæ viribus. Natura enim sumus filij iræ, ideoq; nemo est hominum, qui vel è minimo peccato, nedum è peccato in Spiritum sanctum, possit se sua ipsius virtute ad Deum conuerrere & pœnitentiam agere.

Conuerte

Conuerte me (inquit) & cōuertar, quia tu DOMINVS Deus meus: postquàm enim conuertisti me, egi pœnitentiam, & postquàm ostendisti mihi, percussi femur meum. Si aut sermo est de diuina virtute, an non apud Deum omnia possibilia? an abbreviata est manus DOMINI, vt saluare non possit? an clementia eius imminuta est, vt saluare non velit? & vbi se vinculis ita constrinxit, vt ne possit quidem, etiamsi maximè velit, contra vsitatas suas ordinationes, indebita & extraordinaria gratia seruare? Sapientes huius seculi sentiunt Regem suum politicum non esse suis legibus subditum: & Rex Regum, Dominus dominantium teneretur legibus naturæ, & vsitatz suæ ordinationis? Quare, etiamsi peccatum in Spiritum sanctum non esset remissibile iuxta ordinariam rationem, tamen cùm potentia & clementia Dei nullis terminis sint circumscripta, nūquam abijcienda est spes remissionis: & quod ex te ipso non potes, petendum est à Deo per Iesum Christum, vt Spiritu sancto suo corda nostra ad se ipse conuertat, ac vera in ipsum fiducia inflammet.

Breuitè, quisquis eò stuporis & vesaniæ peruenerit, vt pertinaciter asserat, se credere quidem Deum erga alios misericordem, non autem erga se, propterea quòd vel non sit electus, vel peccauerit in Spiritum sanctum, is, etsi laborat grauissimo & periculosissimo morbo, tamen de salute eius nondum est desperandū. Lex enim in hunc vsum data est, vt ostendat nobis nostram incredulitatem, nō vt pereamus in ea, sed vt hac via ad veram fidem perueniamus. Lex, inquit Paulus, subintravit, vt abundaret delictum. Et: Concluserunt omnes sub incredulitatem, vt omnium misereretur. Rom. 11,

G

Et


Et: Cōclufit ſcriptura omnia ſub peccatum, vt promiſſio ex fide Ieſu Chriſti daretur credentibus. Cū igitur ille, quiſque iſ fuerit, ſentiat iam & agnoſcat ſuam incredulitatem & peccatum, non eſt in eo abiiciendus, ſed docendus, quòd iuxta teſtimonia ſcripturæ, manifeſta ſit ipſi incredulitas, in hunc uſum & finem, nō vt maneat in incredulitate & pereat, ſed vt credat & ſalutē cōſequatur. Ac ſiquidem eſt ſanabilis, Spiritus ſanctus nō erit in ipſo, per verbum Euangelij ocioſus: ſi autem eſt inſanabilis, agnoſcenda eſt ſeueritas Dei erga vaſa iræ eius, & commendanda clementia eius erga vaſa miſericordiæ, ac orandum, vt agnita incredulitate, ad veram fidem excitemur, & in ea confirmemur.

Ad hanc digreſſionem longiorem fortaiſis, quàm huic ſcripti generi cōueniat, occaſionem nobis dedit, quòd tam in hoc, quàm in alijs Pſalmis & dictis ſcripturæ multa & magna credentibus & ſperantibus in DOMINVM promittuntur. Imbecilles autem conſciētiz ſuas habent de fide & ſpe ſua tentationes: ac nunc metuunt, ne vllam habeant veram fidem & ſpem, nunc cogitant, ne in ea fide & ſpe, quam habent, pudeſiant. Arbitrabar igitur non fore ſuperuacaneum, ſi ad cōſolandam conſciētiz imbecillitatem, & ad corroborandam fidem & ſpem, hanc rem paulò copioſius explicarem.

Pſalmus

PSALMVS XXXII.

Beati, quorum remissa sunt iniquitates, &c.



Dductus aliquado Dauid ad tribunal Dei, & accusatus peccatorū suorum, excogitat pro humano more varias causificationes, quibus se coram diuino iudicio tueretur. Nunc enim prætexit vulgarem peccandi consuetudinem, & se alieno magis exemplo irritatum, quàm sua aliqua malitia excitatum peccasse. Quod excusandi genus iam inde ab Adamo carni agnatū est, qui accusatus de peccato, mox reijcit causam in uxorem: Mulier, inquit, quam dedisti mihi sociam, dedit mihi de arbore, & comedi: similiter & mulier reijcit causam in serpentem. Nunc allegat compensationem per sua bona opera: Multa sunt, fateor, peccata mea: multa extant etiam bona mea opera. Designaui semel adulterium, sed idem duxi semper in coelibatu vitam castissimam, & seruauī aliās semper coniugium inuiolatū. Occidendū curaui Vriam, sed liberaui aliās multa tam virorum quàm mulierum & puerorū millia ab hostibus, ne crudeliter interficerentur. An nō meritō tot beneficia, pro paucis aliquot peccatis compensanda essent? si nihil aliud certē innumera sunt sacrificia, quę ad arcā fœderis obtuli, & haud iniuste pro peccatis benè numerabilibus acceptāda videtur. Quale quid & illi

cogitat, qui apud Esaiam dicunt: Quare ieiunauimus, & non aspexisti, humiliauimus animas nostras, & nescisti? Sed talibus seu causificationibus seu prætexitibus se ueritas diuini iudicij in tantum non placatur aut mitigatur, ut potius exasperetur & inflammetur. Cum igitur Dauid nullam videret coram tribunali Dei viam euadendi, vel propter aliena exempla, vel propter suam ipsius iustitiam, excitatus à Spiritu sancto, & admonitus de dicto, quod extat in Genesi cap. 15. Credidit Abraham Deo, & reputatum est illi ad iustitiam, exclamat, & erumpit in memorabilem & omni obseruatione dignissimam illam huius Psalmi vocem.

1. *Beati (inquiēs) quibus remittitur prauaricatio, quibus tegitur peccatum.*
2. *Beatus vir, cui non imputat Dominus iniquitatem, & in cuius Spiritu non est dolus.*

Meliores horum versiculorum interpretem non habemus Paulo Apostolo, qui ad Romanos scribens, cap. 4. Dauid (inquit) explicat beatificationem hominis, cui Deus imputat iustitiam absq; operibus: Beati, quorum remissæ sunt iniquitates, &c. Ex hac igitur interpretatione Pauli sciamus initio, quòd quam Paulus vocat iustificationem, eam Psalmus vocat beatificationem, ut idem sit iustus, qui beatus, & idem beatus, qui iustus: nemo enim consequitur beatitudinem absq; iustitia, iustitia igitur dicenda est nostra beatitudo, ideoq; solus iustus, beatus est. Deinde, cum in Psalmo dicitur, quòd beatus sit, cui remittitur seu condonatur prauaricatio, cui tegitur peccatum, & cui non imputatur iniquitas,

quitas, non intelligendum est, quòd Deus condonet
 prauaricationem, tegat peccatum, & non imputet ini-
 quitatem, propter merita nostrorum operum, aut pro-
 pter virtutem humanæ iustitiæ: nam & Hypocritæ sen-
 tiunt sibi peccata diuinitus remitti, tegi, & non imputa-
 ri, non autem gratis, propter Christum, sed propter suę
 ipsorum iustitiæ, & aliarū virtutum merita. dicunt, si- *In senten. Lom*
 ne suis meritis sperare beatitudinem, nō esse spem, sed *bardi. li. 3. d. 26.*
 præsumptionem: quod quia pugnat cum summo & præ-
 cipuo capite verę Christianæ doctrinæ, abominanda &
 detestanda est Hypocritarum sententia. Sed intelligen-
 dum est, iuxta interpretationem Pauli, qui dicit: Dauid
 explicat beatificationem hominis, cui Deus imputat
 iustitiam, absq; operibus, **ABSQVE** (inquit) **OPE-**
RIBVS, hoc est, absq; vllis operum vel diuinæ legis, vel
 humanæ iustitiæ meritis. De quare, Epistolæ Pauli,
 imprimis ad Romanos & ad Galatas copiose. Postremò,
 etsi in his versiculis non fit expressa mentio Christi,
 propter quem solum remittuntur peccata per fidem, ta-
 men iterum ex ipsa Pauli interpretatione, imò ex vni-
 uersa Christianismi doctrina notum est, quòd nulli ho-
 minum cōdonatur peccatum, aut tegitur iniquitas, ni-
 si credat in Iesum Christum, quòd propter ipsum solū
 condonetur nobis peccatum: Non scriptum est, inquit
 Paulus, propter Abraamum tantū, imputatum fuisse *Rom. 4.*
 illi, sed etiam propter nos, quibus imputabitur, creden-
 tibus in eum, qui excitauit Iesum **DOMINVM** nostrū
 à mortuis, qui traditus fuit propter peccata nostra, &
 excitatus est propter iustificationem nostram. Et Pe- *Acto. 4.*
 trus: Non est aliud nomen sub cœlo datum inter homi-
 nes, in quo oporteat nos saluos fieri. Et iterum: Huic

omnes Prophetæ testimonium ferunt, quòd remissio-
nem peccatorum accepturus sit per nomen eius, quis-
quis crediderit in eum. Quare, cùm dicitur in Psalmo:
Beati, quorum remissæ sunt iniquitates, vel quibus con-
donatur præuaricatio, subintelligendum est, propter
Christum, per fidem, nulla enim condonatio præua-
ricationis, nisi per fidem in Christum. Sic & cùm dicitur:
Quorum tectum est peccatum, subintelligendum
est, per Christum, solus enim Christus est verum oper-
culum, quo peccatum prorsus absconditur, imò tollitur
à conspectu Dei. Similiter & illud, quod sequitur: Bea-
tus vir, cui DOMINVS non imputat peccatum, expo-
nendum est, de non imputatione, propter Christum.
Deus enim tam seuerus est legis suæ exactor, vt omni-
bus ijs, qui legi non perfectè satisfaciunt, imputet pec-
catum, etiamsi ad similitudinem transgressionis Adami
non peccauerint: solis autem illis, qui credunt in Chri-
stum, non imputat peccatum, vnde & additur: In cuius
Spiritu non est dolus, (hoc est) qui non est in corde suo
Epicureus aut Hypocrita, sed qui veram habet fidem in
Christum. In populo enim Dei, varia sunt hominū ge-
nera. Nō iam nobis est sermo, de hominibus manifestè
& impœnitenter sceleratis, quorum in populo Dei nul-
lus est numerus, quippe qui digni sunt, vt legitima ex-
communicatione eijciantur: sed loquimur de ijs, qui
aliud corde tegunt, aliud ore profitentur, quos vocare
solemus homines dolosos, quales partim sunt Epicuræi,
qui etsi voce sua testificantur se credere in Christū, &
fiunt Sacramentorum Christi participes, tamen in late-
bris cordis sui rident Christianismum, & arbitrantur
doctrinam eius de Christo crucifixo, esse summam stul-
ticiam,

titiam. Partim sunt Hypocritæ, qui etiam si sciunt verba Christianismi recitare, & cōdonationem peccati soli Christo sermone suo tribuere, tamen retinent in corde suam interpretationem, videlicet, Deum cōdonare quidem peccatum propter solum Christum, sed ita, si tuis ipsius meritis aut virtutibus fauorem & clementiam Dei redemeris & cōsequaris. Hi omnes, Epicuræi videlicet & Hypocritæ, sunt homines dolosi, qui aliud corde gestant, aliud ore simulant. Beatos igitur pronunciat Psalmus illos, quibus DOMINVS non imputat peccatum. Qui autem sunt illi: Additur: In quorum Spiritu non est dolus, (hoc est) qui nec sunt Epicuræi, irridentes in corde veram doctrinam, nec sunt Hypocritæ, peruertentes falsa sua hypocrisis veram piæ doctrinæ sententiam: sed qui verè & sincerè credunt in Iesum Christum DOMINVM nostrum, quòd Deus cōdonet nobis peccata, & tegat nostras iniquitates, nec imputet nobis nostras præuaricationes, non propter vlla nostra merita, vel præcedentia vel sequentia, non propter vllas nostras virtutes aut dignitates, quas vel ex carne, vel ex Spiritu habemus, sed tantum gratuita sua liberalitate & clementia, propter solum vnigenitū filium suum DOMINVM nostrum Iesum Christum. Quod vt rectius intelligatur, consideremus antithesin. Beati sunt, non qui suscipiunt præuaricationes suas operibus legis & meritis suorum operum coram Deo expiandas, sed qui credunt eas sibi gratuita clementia Dei, propter solam Christi expiationem remitti & condonari. Beati sunt, non qui excusant peccata sua publica & vulgari peccandi consuetudine, non qui regunt ea suis sacrificijs, ieiunijs, chameunijs, agrypnijs,

&

& alijs id genus operibus, sed qui tegunt ea solo Christo DOMINO nostro, per fidem. Beati sunt, non qui optant sibi imputari suam ipsorū iustitiam, sed qui petūt, ut sibi non imputetur sua iniustitia, imputetur autē sibi sola iustitia Christi. Beati sunt, nō qui multa de Christo verbis iactant, interim autem corde suo lōgē sunt à Christo, sed qui vera fide, & sincero corde Christū amplectuntur. Breuiter, Beati sunt, qui nullā aliam in se iustitiam agnoscunt, quā gratuitam remissionē, & cōdonationem suæ iustitiæ, propter solum Iesum Christum. Hic nunc cōiunge mihi locum in Genesi cap. 15. Abraham credidit Deo, & imputatum est ei ad iustitiā: ac illud Prophetæ Abacuc: Iustus ex fide sua uiuit: & hos duos Psalmi huius versiculos: Beati, quorum remissæ sunt iniquitates, &c. similiter Epistolam Pauli ad Romanos, in qua hæc iam commemorata loca explicantur, & habebis summam & caput vniuersæ verè piæ & Christianæ doctrinæ. Sed pergamus.

3. *Quoniam obticescebam, & ossa mea, in asiduo meo rugitu, cōtabescebant.*
4. *Quoniam diu noctuq; grauior reddebatur super me manus tua: conuertebatur succus meus in siccitates æstiuas.*
5. *(Donec) peccatum meum notum facerem tibi, & non abscederem iniquitatem meam, ac dicerem: fateor in genuē aduersus me prauaricationem meam Domino, tunc demum remittebas iniquitatem peccati mei.*

Proposuit antea & commemorauit, illos solos esse iustos & beatos, non qui peccata sua defendunt, aut suscipiunt ea meritis suæ ipsorum iustitiæ coram Deo expianda, sed quibus ea gratis condonantur, & non imputantur.

putantur. Nunc igitur addit huius propositionis rationem, ac recenset veras partes poenitentie, qua sit, ut peccata nobis condonentur & non imputentur. Sunt enim duæ eius partes: una est agnitio peccatorum, altera est agnitio seu fides remissionis peccatorum propter benedictum semen Abraham, qui est Christus DOMINVS noster. Dicit ergo: Quoniam obticeſcebam, seu obmuticebam, (hoc est) Ego vocatus ad tribunal Dei, ut darem rationem vite meæ, & responderem de peccatis meis, et sic conabar initio peccata extenuare, aut meritis bonorum meorum operum tegere, tamē sentiebam re ipsa, conatum meum esse vanissimum. Statim enim, postquam seueras iræ diuinæ aduersus peccata sese mihi aperire cœpit, prorſus obticui & obmutui, nec potui ne ad vnum quidem verbum accusationis respondere. Nec id ſolum, verum etiam tantus horror propter peccata mea me inuasit, ut præ continuo eiulatu & rugitu meo, contabescerent in me ossa mea, ac deficerent omnes vires meæ. Manus enim, seu seueritas iræ Dei aduersus peccata non videbatur vnquam remissura, sed subinde magis ac magis ita ingraueſcebat, ut si quid adhuc vigoris ac viroris in me reliquum eſſet, non aliter exiccaretur, quàm in feruidissima æſtate humor terræ exiccari, & gramina exareſcere ſolent. Cæterum vbi nos iuxta Hebraicam proprietatem tranſtulimus: Conuertebatur succus meus in ſiccitates æſtiuas, ibi vulgata tranſlatio iuxta Græcorum interpretationem habet: Conuerſus ſum in ærumna mea, dum cōfigitur ſpina. Error autem huius tralationis nō eſt obſcurus. Græcus enim interpres, quem Latinus ſecutus eſt, videtur vocabulū לשחדי leſchaddi, quod ſignificat ſuccum ſeu virorē me

H

um,

um, deduxisse à שרר Schadad, qđ significat vastitatem. Et pro חרבוני Harbõe, quod significa: siccitates, legisse חרבוני Harchone, quod significat cõignationes seu tigmatisationes. Nam vocabulũ quod sequitur קאיז Kaiz, significat tam æstatem quàm spinã. Vides igitur, quàm necessarium sit, vt in explicatione scriptorum Prophetorum consulatur Hebræus textus, in qua lingua initio & dicta & conscripta sunt. Sed hoc est Grammaticũ παράγωγον, quo ratio trãslationis redditur. Reuertamur ergo ad nostra: Tanta (inquit) erat grauitas & seueritas diuinæ iræ aduersus peccata, vt cùm ea in me reuelaretur, omnis vigor & viror meus, velut in summo æstu exiccaretur: ac nisi Spiritus sanctus me ad agendam veram pœnitentiam excitasset, prorsus mihi pereundum fuisset. Grauitas enim iræ Dei tantisper in me sæuebat, dum peccatũ meum verè coram Deo agnoscerem, & iniquitatem meam, vel extenuatione vel prættextu meorum sacrificiorum & aliorum bonorum operum, non cælarem, non absconderem: sed ingenuè me ipse accusarem, & prauaricationem meam contra me ipse coram DOMINO confiterer, ac veniam, propter bene dictum semen Abrahæ, peterem. Tunc demum enim remittebas & cõdonabas mihi, DOMINE Deus meus, iniquitatem peccati mei, & conscientia mea reddebatur tranquilla. Antè quidem, cùm adhuc hærerem in quærenda peccati excusatione, & in suscipienda per meam ipsius iustitiam expiatione, nulla erat pax meæ conscientix: postquam autem conuersus, agnoui corã DOMINÒ peccatum, & gratuitam eius remissionem propter Christum, tanta statim affulsit tranquillitas, vt videbar ex inferno in cœlo ipso collocatus. Ex his pri-

mum discenda est magnitudo diuinæ iræ aduersus peccata, etiam in hoc seculo, vt interim nihil dicam de grauitate supplicij, quod propter peccata in altero seculo secuturum est, nisi vera agatur pœnitentia. Nam si ira Dei in hoc seculo, vel aliquo saltem modo, conscientia hominis patefiat, non excitat tantum in corde continuum gemitum, eiulatum & rugitum, verum etiam tabefacit ossa, & exiccat omnes humanas vires: Non est (inquit Psalmus 38.) sanitas in carne mea propter iram tuam, nec est pax ossibus meis propter peccatum meum. Quoniam peccata mea supergressa sunt caput meum, & sicut onus graue grauata sunt super me, &c. Deinde discendum est, quid in tanto pondere diuinæ iræ faciendum sit, vt non tam leue reddatur, quam totum à nobis auferatur. Non enim est alia via, quam quæ nobis in his versiculis præscribitur, videlicet, vt veram pœnitentiam agamus, quæ constat agnitione peccati & Christi, qui solus est peccati expiatio. Nam cum Psalmus affirmat, se non antè potuisse conquiescere & tranquillum esse, quam peccatum confiteretur DOMINO, DOMINO, inquam, haud obscure significat, se confiteri peccatum ex fide remissionis peccati, quæ remissio propter solum benedictum semen Abraham, seu propter Christum contingit. Quare eo ipso, quo agnoscit peccatum coram DOMINO, & profitetur se accipere remissionem peccati, includit & subintelligit, etiam Christum DOMINVM nostrum, propter quem solum graue onus peccati tollitur, & conscientia libera, tranquilla & læta redditur: Iustificati (inquit Paulus) ex fide, pacem habemus erga Deum per DOMINVM nostrum Iesum Christum. Rom. 5.

6. *Propter hoc oret omnis sanctus ad te, tempore euentus, certè cum in un. lauerint aqua multa, ad ipsum non accedent.*

Redit ad propositionem, & infert è peculiari suo exemplo propositionem vniuersalem. Cum enim cōmemorauerit pro ratione vniuersalis suæ propositionis, (quæ est: Beati, quorum remittūtur peccata, &c) priuatū suū exemplum, & affirmauerit se ex agnitione peccati sui affecutū peccati remissionē, dicet fortassis quispiam: Facile quidem crediderim, Deum remittere iniquitatem peccati, tibi, DAVIDI, iuxta cor Dei electo, non habetur autem tanta mei ratio coram Deo, quāta Dauidis, quid igitur exemplo eius ego homo abiectus sperare possem? Huic seu obiectioni seu tentationi obuiam it hic sextus versiculus, & repetit propositionem, alijs quidē verbis, sed eadem sententia. Et quod Paulus *1. Tim. 1.* ad Timotheū scribens: Christus Iesus, (inquit) venit in mundū, vt peccatores saluos faceret, quorū prim⁹ sum ego, Verūm ideo misericordiam sum adeptus, vt in me primò ostenderet Iesus Christus omnem clementiā, ad exprimēdum exemplarijs, qui credituri sunt in ipso, in vitam æternam. Idem etiam sentit & agit Dauid in hoc versiculo: Recitauī quidem meū ipsius exemplū, quod affecutus sum remissionem peccati, non ex vllis meritis meæ iustitiæ, sed tantūm ex gratuita Dei clementia, & ex nō imputatione peccati, hoc autem exemplum nō pertinet ad me tantūm, nec definitur mea solummodo persona, sed est exemplum generale, & pertinet ad oēs sanctos. Hortor igitur omnes sanctos, vt meo exemplo benè cōsidant, & orent ad Deum ac inuocent eum, tempore euentus, (hoc est) quocunq; tempore euenerit necessitas,

cessitas, & contigerint afflictiones, quibus iudiciū peccatorum reuelatur, & manus DOMINI ingrauescit. Sic enim fiet, vt etiam si multæ aquæ, sicut in diluuio, inundent, ac magnæ & variæ tribulationes acciderint, tamē nō possint ipsos perdere & opprimere, sed potius beati erunt, quod habeāt remissionem suæ præuaricationis, & tegatur ipsorū peccata, nec imputentur ipsis iniquitates, ex gratuita Dei clementia & misericordia. Hic consideremus, quid hoc loconomine sancti veniat. Sanctus enim dicitur, quemadmodū in præcedenti Psalmo exposuimus, non qui externa religionis specie illustris est, aut in eremo herbis tantū & radicibus vescitur, quibus moribus Hypocritæ sanctitatem metiūtur, nec qui vniuersam legē Dei perfectē impleuit, talem enim sanctum in toto humano genere (præter Christum filiū Dei) non inuenies. Sed sanctus dicitur, qui fidelis est, & verē credit in Christum filiū Dei, quod propter ipsum solum habeat remissionem peccatorū. Sic enim interpretatur nomē sancti Psalmus proximē præcedens: Diligite, inquit, DOMINVM omnes sancti eius, quia fideles (seu credentes) custodit DOMINVS. Quos antē dixit sanctos, hos mox vocat fideles. Et Paulus: Vos, inquit, qui quondam eratis ab alienati & inimici mente, in operibus malis, nunc tamē reconciliauit in corpore carnis suæ per mortē, vt exhiberet vos sanctos, & irreprehensibiles & inculpato in cōspectu suo, siquidē per māsēritis in fide fundati & stabiles, nec dimoueamini à spe Euangelij, &c. Definiuntur ergo à Paulo sancti, qui cum sint Deo patri recōciliati per mortem Christi, permanēt in fide & spe huius Euangelij, ac ambulant, vt alius inquit, nōn secundum carnem, sed secundum Spiritum.

Colo. 1.

Rom. 8.

*Gen. 44. Ne
videā malum
quod eueniet
patri meo.*

Pſalm. 115.

Pſalm. 119.

Pſal. 91.

Eſa. 57.

Pſal. 59.

tum. De qua re viſum eſt idcirco admonere, ne quis ſan-
ctitatem corā Deo definiat, aut hypocriticis operibus,
aut perfecta legis in hoc ſeculo impletionem, ſed ſola fide
in Chriſtum, qua vt propter Chriſtum non imputatur
peccata, ita etiam donatur Spiritus, non qui prorsus tol-
lat carnem, ſed qui reliquias carnis cōpelcat, & homi-
nem in obſequiū vocationis Dei ſelectat. Deinde quod
Pſalmus dicit, in tempore euentus, ſeu inuentionis, ſi-
gnificat tempus, quo eueniunt aut accidunt nobis aduer-
ſa, & quo inueniunt nos afflictiones ſeu corporales ſeu
ſpirituales. Sicut & aliās dicitur: Pericula inferni inue-
nerunt me. Tribulationem & dolorem inueni. Et ite-
rum: Tribulatio & anguſtia inuenerunt me. Non enim
eſt tempus magis opportunum quærendi & inuenien-
di DOMINVM, quàm tempus afflictionis & ærumna-
rum, propterea quòd DOMINVS ſuis ipſe promiſſis
recepit ſe in aduerſis inuocatū, ope ſua affuturū: Cum
ipſo ſum, inquit, in tribulatione, eripiam eum & gloriſi-
cabo eum. Et apud Eſaiā: Hæc dicit DOMINVS habi-
tans cum contrito & humili Spiritu, vt viuificet Spiritu-
tum humiliū, & viuificet cor contritorum. Quare hic
verſiculus hortatur, vt cum ſemp, tūm maximè omniū
inuocare DOMINVM, & certò ſperare peccatorum re-
miſſionē debeamus, cū res noſtræ ſunt afflictiſſimæ.
Sed nec illud oſcitanter prætereundū eſt, quod dicit:
Cum inundauerint aquæ multæ, ad ipſum nō accedēt.
Alludit enim ad diluuium, in quo pereūte mundo, ſer-
uatus eſt Noha cū familia ſua. Et aliās metaphora aqua-
rum intelliguntur afflictiones: Saluum me fac (inquit)
Deus, quoniam intrauerūt aquæ, (hoc eſt) afflictiones,
uſq; ad animā meam. Docet igitur hic verſiculus, quòd
beati

beatifint, quibus gratis remittuntur peccata, quia etiāsi
 obruantur varijs & multis ærumnis atq; calamitatibus,
 tamen in ijs in tantum nō pereunt, vt etiā in media mor- *Pſalm. 23.*
 te cōſeruentur. Iuxta illud Pſalmi: Etiamſi ambulaue-
 ro in medio vmbræ mortis, non timebo mala, quoniam
 TV mecumes. Et Eſā. Cūm transferis per aquas, tecum *Eſā. 43.*
 ero, & flumina non operient te. Cūm ambulaueris in
 igne, non combureris, & flamma non ardebit in te.

7. *Tu es refugium meum. Custodias (igitur) me ab angustia, & circumdes me canticis liberationis.*
8. *Reddam te prudentem, & docebo te viam in qua ambules, conſulam tibi oculo meo.*

In præcedenti verſiculo hortatus eſt Dauid omnes
 ſanctos, vt orent & inuocent Deū quouis tempore ne-
 ceſſitatis, certa ſpe concepta, quòd euafuri ſint omnes
 aquas afflictionū. Cum igitur etiam ipſe cōtineatur in
 catalogo ſanctorum, (hoc eſt) fidelium ſeu credentiū,
 ſequitur ſuam ipſius cohortationem, & orat. Agnoſco
 (inquiens) te DOMINVM Deum, ſolum meum refugi-
 um, meum aſylum, meum latibulum, meū præſidiū, ad
 quod me in omnibus aduerſis tutò recipiam. Queſo igi-
 tur te, vt etiam me, in acceſſu multarum aquarum, & in
 euentu variarum afflictionū, in omnibus anguſtijs con-
 ſerues & custodias, accircundes me, (hoc eſt) cura tua
 ita me complectaris, vt habeam occaſionem celebrādi
 nomē tuū, *ἐγκωμίοις ἢ πινυκίοις*, canticis & laudib⁹, pro
 pter beneficiū liberationis, ex omnibus afflictionibus
 meis. Oro autem te iuxta promiſſionem tuam, quā ſa-

Wann das
 Waſſer vber
 Korb gehet
 (hoc eſt) wann
 das vnglück
 vber handt
 nimpt.

penumero clementer recepisti, te maximā tuam curā
 in

in metuendo collocaturum. Reddam (inquiens) te prudentem, docebo & dirigam te in toto vitæ tuæ genere: & quemadmodū pia mater non auertit oculos suos ab infante, ne quid mali ei accidat, ita & ego oculos meos, curam & studiū meum in te ponā, vt in omni afflictione conserueris. In his versiculis primū obserua, qua in re gratificandum sit Deo pro acceptis beneficijs: Custodias, inquit, me ab angustia seu afflictione, ne videlicet in afflictione pereā: Et circundes me encomijs liberationis, (hoc est) efficias, vt exciter ad laudandū & celebrandum nomen tuum, propter beneficia tua. Habes ergo, quod ad testificandam animi gratitudinem corā Deo, pro acceptis beneficijs maximē omniū exigatur, vt nomē DOMINI celebretur & glorificetur: Ego sum, inquit, pauper & dolens, salus autem tua Deus suscepit me. Quid igitur pro tāto beneficio repēdes? Laudabo, inquit, nomen Dei cantico, & magnificabo eum laude, & placebit Deo super vitulum nouellum cornua producentem & vngulas. Laudandus est autē Deus, quem admodum aliās copiosius expositū est, non tantū verbis, sed etiam factis, non tantū sermonibus oris, sed etiam exemplis operum, nō tantū Psalmis, sed etiam palmis, vt manum ad omne genus obedientiæ admoveas, ac re ipsa gratitudinem testificeris. Sic luceat, inquit, lux vestra coram hominibus, vt videant vestra bona opera, glorificentq; patrem vestrum, qui est in celis. Deinde, obserua hīc exemplum applicandi sibi priuatim promissionem generalem. Et si enim non est dubiū, quin Deus significauerit Dauidi peculiaribus promissionibus, nunc quidem per Angelum, nunc autem per Samuelem, Nathan & Gad Prophetas, se suscepisse ipsum

Psal. 69.

Matth. 5.

ipsum clementer in suam curam & tutelam, tamen hoc loco videtur Dauid generalem promissionem, quæ dicta est ad Abrahamum & ad posteros eius, qui iam perfectionem ex Aegypto susceperāt, sibi accommodasse.

Abrahamo dicitur: Statuam pactum meum inter te & me, & inter semen tuum post te in generationibus suis fœdere sempiterno, VT SIM DEVS TVVS, & SEMINISTVI post te. Vt sim (inquit) Deus seminis tui.

Hoc quid aliud est, quàm si diceret: Ero protector seminis tui, dabo eis prudentiam, & docebo eos, vt rectè ambulent in sua vocatione, ac suscipiam eos in meam curam & tutelam? Cùm igitur Dauid etiam fuerit semen Abrahæ, nō ineptè accommodat sibi peculiariter, quod erat vniuersæ familiæ promissum generaliter. Similiter de Israëlitis egredientibus ex Aegypto dicitur: DOMINVS

præcedebat eos, ad ostendendam viam, per diem in columna nubis, & per noctem, in columna ignis, vt dux esset itineris vtroq; tempore. Nunquam defuit columna nubis per diem, neq; columna ignis per noctem coram populo.

Hoc exemplo non illud tantum egit DOMINVS, vt hunc populum in deserto ambulante, hoc tempore in præsentia seruet, sed etiam testificatus est, se quem vis in vocatione Dei ambulante & sperante in ipsum, docturum Spiritu sancto suo prudentiam, & directurum in via, vt non offendat ad lapidem pedes suos. Quare Dauid optat sibi in præsentia generalem promissionem, non carnis suæ prudentia, sed Spiritus sancti afflatu, vt suo exemplo doceat, quomodo ex generalibus quisq; promissionibus fidem concipere & confirmare debeat. Vnde & Paulus ad Corinthios scribens: Vos, inquit, templum Dei estis vi-

I uentis.

Gen. 17.

Exod. 13.

2. Cor. 6.

Leuit. 26

uentis, quem admodum dixit Deus: Inhabitabo in illis, & inambulabo, & ero illorum Deus, & ipsi mihi erunt Populus. Quod dictum erat ad Israëlitas, hoc accommodat peculiariter ad suos auditores, ut doceat, quod qui succedunt maioribus in recta & vera fide ac inuocatione, hi succedat etiam ipsis, suo modo in promissionibus, & percipiendis beneficijs Dei.

9. *Nolite fieri sicut equus & caballus, in quo non est intelligentia, qui, si os eius camo & freno capistratur, retrocedit.*
10. *Multi dolores impio accidunt, sperantem autem in Domino misericordia circumdabit.*

Promissioni additur cohortatio ad ferendam crucem, quæ pijs seu beatis, quorum remissa sunt iniquitates, diuinitus imponitur, non ut fugiant à Deo, sed ut ad Deum confugiant, non ut pereant, sed ut aut ad officium reuocentur, aut in officio contineantur & seruentur. Cum Deus imponit vobis crucem, nolite (inquit) fieri sicut equus aut caballus. Vbi enim nos in veteri translatione habemus mulus, ibi Hebræus habet פָּרָה Phered, quod & Germani dicunt, *Pferdt* (hoc est) caballum. Nolite ergo fieri sicut caballus aut equus, qui adhuc est indomitus, & nec freno nec loro assuetus. Hic enim, quod magis conaris os eius freno aut filicella capistrare, eò magis calcitratur & retrocedit, propterea quod non intelligat se frenari, ut ad humanos vsus, ad quos diuinitus est creatus, fiat accommodus, sed arbitretur potius se hoc vinculo periturum. Ita etiam insipientes homines non intelligunt consilium Dei in aduersis. Deus enim imponit hominibus, ac præsertim pijs
& con-

& cōdonatione peccati beatis, crucem, tanquā equo frenum, non vt opprimat ipsos multitudine, & magnitudine afflictionis, sed vt ipsos ad obedientiam assuefaciat, & in seruitute Dei (quæ tamen est vera libertas) contineat. Tametsi enim Deus immittit multos & magnos dolores atq; afflictiones etiam homini impio, & declinanti à recta via, tamen hoc facit non illo cōsilio, vt perdat ipsum, sed vt aut vocet aut reuocet eum ad fidem, spem & obedientiam, ac perpetua salute seruet. Nam quod Psalmus hīc dicit: Multi dolores seu multa flagella peccatores, sperantem autem in DOMINVM, misericordia circumdabit, planè illud ipsum est, quod postea repetit Ezechiel: Viuo ego, dicit DOMINVS, nolo mortem impij, sed magis vt conuertatur & viuat. Et Paulus: Cū iudicamur, à DOMINO corripimur, ne cū hoc mundo condemnemur. Et Epistola ad Hebræos: *Heb. 12.* Quem diligit DOMINVS corripit. Ac mox: Patres carnis nostrę ad paucos dies erudiebant nos pro suo arbitratu. Deus autem ad commodum nostrum, vt impertiat nobis sanctimoniam suam. Omnis enim castigatio in præsens quidem, nō videtur gaudij, sed molestiæ esse, at postea fructum iustitiæ reddit ijs, qui per illam fuerint exercitati. Non deputemus igitur afflictiones in damno, sed in lucro, vt quæ in sanctis (hoc est) in credētibus prægnantes sint vera & æterna felicitate: Momentanea, inquit Paulus, leuitas afflictionis nostræ, mirè supra modum æternum pondus gloriæ parit. *1. Cor. 4.*

11. *Letamini in Domino, & exultate iusti, & gaudete omnes recti corde.*

1. *Tim.* 1.

Concludit Psalmum generali cohortatione, quæ ex-
 ponit fructum eorum, quæ in superioribus versiculis
 commemorata sunt. Iusti enim & recti corde dicuntur,
 qui credunt remissionem iniustitiæ, (quemadmodum
 suprà dictum est) & habet fidem ἀντιόχριου. Quem er-
 go fructum capiunt illi, quorum remissæ sunt iniqui-
 tates, quorū tecta sunt peccata, quibus non imputatur
 prauaricationes, qui agnoscunt & confitentur trans-
 gressiones suas, qui orant ad Deum in diluuiū aquarum
 seu afflictionum multarum, qui cōfugiunt ad Deum in
 tribulatione, qui non fiunt sicut equus & caballus, &
 qui sperant in DOMINO? Lætamini, inquit, in DO-
 MINO, exultate & iubilare, (hoc est) In filiis huius se-
 culi magna quidem oritur lætitia, exultatio & iubilus
 è sanitate corporis, è diuitijs, è voluptatibus corporali-
 bus, è maiestate terrena, & ex alijs huius mundi bonis.
 In illis autem, qui credunt gratuitam remissionem pec-
 catorum propter semen Abraham, qui est Christus, &
 qui in omnibus aduersis inuocant DOMINVM ex fi-
 de, oritur pax conscientiæ coram DOMINO, quæ pax
 superat omnia humana & terrena beneficia. Vos ergo,
 quotquot sic iusti & recti corde estis, lætamini in DO-
 MINO, quia DOMINVS est vobis propitius, & con-
 donat vobis omnia vestra delicta, gratis, propter Chri-
 stum. Exultate in DOMINO, quia DOMINVS seruat
 vos in diluuiū aquarum multarum, vt nulla afflictio,
 quamuis magna, quamuis diuturna vos opprimat. Et
 gaudete ac iubilare in DOMINO, quia DOMINVS
 dat vobis intellectum, facit vos prudentes, & comple-
 titur vos misericordia sua, vt ambuletis rectè in voca-
 tione eius, & conseruemini ad perpetuam gloriam ac
 felicitatem.

felicitatem. Ecce sic benedicitur homo, qui sperat in Domino.

VSUS HVIVS PSALMI.

Vsum eius iam recitauimus. Qui enim in conscientia sua statuitur ad tribunal Dei, & ita suorum peccatorum accusatur, vt arguatur manifestæ impietatis nō solum in malis, sed etiam in bonis suis operibus, nec videat ullam vel excusationem vel defensionem corā Deo, accipiat hunc Psalmum in manus, & recitet eum, vt ex ipso cognoscat, condonationem peccatorū suorum contingere sibi gratis, absq; ullis operum meritis, sed tantum propter Iesum Christū DOMINVM nostrum, si in ipsum crediderit, quemadmodū Paulus in Epistola ad Romanos cap. 4. interpretatur. Deinde si quis comprehenditur in diluuiū aquarum, in maximis afflictionum periculis, in horroribus mortis & inferni, cōferat se ad recitationem huius Psalmi, vt exhibeat Spiritui sancto organon, quo confirmetur fides eius, & stabilia-
tur spes, quod cum habeat gratuitam peccatorū remissionem, & propitiū DOMINVM Deum propter Christum filiū eius, neq; mors, neq; vita, neq; Angeli, neq; principatus, neq; potestates, neq; instātia, neq; futura, neq; altitudo, neq; profunditas, neq; vlla alia creatura poterit Deum auertere, quo minus credentem
& sperantem summo fauore prosequatur, & ex omnibus afflictionibus clementer eripiat.

Rom 8.

PSALMVS XXXIII.

*Exultate iusti in DOMINO, rectos decet
collaudatio, &c.*



N hoc Psalmo præscribitur nobis generalis formula agendi gratias Deo pro admirandis suis beneficijs, quæ iam olim in humanum genus, ac in primis in ecclesiam suam cõtulit, & adhuc singulis temporibus conferre solet. Vnde etiam in fine additur precario, vt quam misericordiam, & quæ beneficia Deus alijs præstat, nobis quoq; clementer exhibeat: Fiat, in quiens, misericordia tua DOMINE super nos, quemadmodum speramus in te.

1. *Exultate (sen laudate) iusti in Domino, rectos decet laudatio.*
2. *Celebrate Dominum Cithara, Psalterio & Decachordo cantate ei.*
3. *Canite ei canticum nouum, benè sonate pulsando cum iubilatione.*

Hi tres primi versiculi sunt propositio Psalmi, quæ Spiritus sanctus hortatur Ecclesiam ad agendas Deo gratias, pro summis illis beneficijs, quæ mox recitabit. Videtur autem vltimus versiculus Psalmi proxime præcedentis (*Latamini in DOMINO, & exultate iusti,*

iusti, & laudate omnes recti corde) assumptus esse pro
propositione huius presentis Psalmi: certè idem utro-
biq; est verbum laudandi, & eadem epitheta iustorum
& rectorum corde. Cæterum, qui dicantur iusti & re-
cti corde, suprà aliquoties dictum est, videlicet, non
qui ex omni parte satisfecerunt legi Dei suis operibus,
sed qui recto & pio corde credunt in Christum verè iu-
stum & rectum, quòd propter ipsum reconciliati sint
Deo patri, & habeant gratuitam peccatorum suorum
condonationem. Vos ergo iusti, (inquit) vos credentes
in Christum, vos ecclesia Christi, laudate DOMINVM,
seu exultate in DOMINO, & gratias agite DOMI-
NO, propter ingentia beneficia, quæ vobis exhibet.
Exultant etiam iniusti, non autem in DOMINO, sed
in seipsis, aut in bonis suis terrenis, aut in operum suo-
rum meritis, vos autem iusti exultate in DOMINO,
in gratuita DOMINI clementia & misericordia. Lau-
dant DOMINVM etiam pravi corde, non est autem
speciosa laus in ore impij. Laudate igitur DOMINVM
vos recti corde & pij: celebrate DOMINVM, non
tantum voce, verum Cithara, Psalterio, Decachordo,
(sunt autem Psalteriũ & Decachordum diuersa instru-
menta) ac quibuscunq; potestis instrumētis musicis: ce-
lebrate eum non vulgaribus tantum & veteribus, sed
insignibus, inusitatis, & propter nouitatem cōmenda-
tione dignis carminibus: ac breuiter, quicquid habetis
artificij, quicquid industriz in decātandis carminibus,
aut pulsandis instrumentis musicis, hoc omne cōferte
ad laudandum nomen DOMINI, & ad agendas ei gra-
tias. Hæc non idcirco commemorantur, quòd Deus sua
natura delectetur humanis laudibus aut modulatione
musicorum

EXPLICATIO.

musicorum instrumentorum, quamuis in hominū, auribus suauis & iucunda, sed quod Spiritus sanctus significet, Deum ad gratiarum actionem exigere illa, quorum carmina & instrumenta musica solent esse indicia & argumenta. Nam qui carmina seu ore seu instrumentis decantant, solent animo gestire, corde exultare, & lætitia perfusi esse. Exigit autem Deus vt beneficia eius alacri & hilari, (hoc est) grato corde agnoscamus. Quare gratū est ei, quoquo modo testificemur alacritatem nostram, tantummodò fiat zelo secundum scientiam.

4. *Quoniam verbum Domini est rectum, & omnes promissiones eius sunt vera.*
5. *Diligit iustitiam & iudicium, beneficio Domini plena est terra.*
6. *Verbo Domini celi conditi sunt, Spiritu oris eius omnis exercitus eorum.*
7. *Congregat, sicut acernum, aquas maris, ponit abyssos in absconditis.*
8. *Timeat à Domino omnis terra, paueant ab ipso omnes incolæ orbis.*

Exultate, inquit, in DOMINO, laudate DOMINUM, celebrate Dominū, cantate DOMINO: sed quas ob causas? Audiamus igitur causas. Primū DOMINVS est laudandus, quia verbum eius rectum, & omnia opera eius in fide. Verbum Dei hoc loco est verbum promissionis, & opera eius sunt res ipsæ verbo promissæ. Laudandus igitur est Deus, propterea quod quæ verbo suo promittit, rectè procedant, & felieiter promoueant, quæcunq; etiam opera, quæcunq; res promissione
eius

eius continetur, certissimè fient, & fidelissimè impletur, ac breuiter DOMINVS in promissis suis est veracissimus & constantissimus. Exempla in promptu sunt: Deus promissit Abrahæ propagationem & multitudinem posteritatis suæ, etsi autem corpus Abrahæ erat propter senectam emortuum, & Sara sterilis, tamen impleta est promissio Dei, & posteritas Abrahæ rectissimè processit, vt multiplicaretur sicut arena maris, & stellæ cœli. Promissa fuit à Deo Israëlitis liberatio ex Aegypto, & hæreditas terræ Canaan: hoc opus tam fideliter impletum est, vt ipsa rerum natura necesse habuerit inuerti potius, quàm vt Deus in promissis suis mendax fieret. Dauidi promissum fuit diuinitus regnum Israël, etsi autem eijcitur in exilium, & necesse habet diu multumq; incertis sedibus vagari, tamen quod promissum erat, rectè procedit, & verè impletur, Nec in his tantum promissis, quæ iam commemorauimus, Deus fuit verax & constans, sed quia insignis est epitheto veritatis & constantiæ, quæcunq; promittit, seruat fidelissimè, quamuis longè aliud meritis, tantummodò vt nomen veracis reportet: quare habendus est omni laude & preconio dignus, vt ad fidem excitemur. Deinde DOMINVS non tantum est verax in promissis, verumetiam iustus in factis suis, & in administratione regni sui diligit iustitiam & iudicium. Nam quemadmodum politicus Magistratus Rempub. tum dicitur rectè gubernare, cum est laudi benè agentibus, *Rom. 12.* (hoc enim est facere iustitiam) & est terrori malè agentibus, (hoc enim est facere iudicium) ita & DOMINVS Deus noster facit iustitiam, cum pijs benefacit: & facit iudicium, cum impios punit, ac reddit vnicuiq; secundum

dum opera sua. Quare hoc etiam nomine magna laude celebrandus est.

Præterea, vniuersa terra beneficijs Dei plena est. Circumfer oculos in toto orbe terrarum, & non inuenies, nisi beneficiorum Dei promptuarium. Si de corporalibus bonis dicendum est, an non omnia in his terris hominis gratia condita sunt, & homini seruiunt gramina, flores, arbores, fructus, segetes, iumenta, bestia, & quicquid est rerum terrenarum? Si autem dicendum est de bonis spiritualibus, an non exiuit, ut alius Psalmus ait, sonus Apostolorum in omnem terram, & in fines orbis terrarum verba eorum? Vbi autem est Euangelion Apostolicum, ibi est omne genus coelestium bonorum, propitius Deus, condonatio peccatorum, iustitia, victoria in afflictione & morte, ac æterna vita & felicitas. Quare etiam hac parte habemus, propter quod Deum laudemus, & maxime ei gratias agamus.

Ascendamus nunc à terra in cælum, & inueniemus ibi maximam laudandi DOMINI materiam. Cæli enim constant, non ab æterno, nec à seipsis, sed conditi sunt verbo DOMINI: & omnis exercitus eorum, (qui sunt cateruæ seu cohortes stellarum) creati sunt Spiritu oris eius. Hic est insignis versiculus & memorabilis: non solum enim prædicat potentiam Dei, qua cælum & terra, & omnia in eis condita sunt, verum etiam concionatur apertè de discrimine trium personarum in vna diuinitate. DOMINVS enim Deus noster, Deus vnus est, si essentiam eius consideraueris, si autem proprietates eius per se subsistentes, quas nostri personas vocant, intuearis, alius est pater, alius filius, alius Spiritus sanctus. Cæli (inquit) conditi sunt VERBO DOMINI,
hic

hîc habes duas personas, DOMINVM videlicet, qui est pater, & Verbum eius, quod est filius Dei, & additur: Spiritu oris eius omnis exercitus eorum, hîc habes Spiritum sanctum, vt quemadmodum in creatione rerum pater omnia creauit per filium, in Spiritu sancto, ita & in recreatione seu regeneratione baptisemur in nomine patris & filij & Spiritus sancti. Hanc igitur doctrinam de Deitate, alta mēte reponamus, & fidei cor de retineamus.

Sed nec illud oscitanter prætereundū est, quòd cum tanta sit potentia verbi Dei, vt per ipsum cœli sint conditi, non dubitemus de veritate promissionū, quæ verbo Dei dicuntur. Qui enim tam potēs est, vt solo verbo suo cœlum condiderit, certè erit etiam tam potens, vt quæ verbo suo promisit, re ipsa verè impleat. Laudemus igitur Deum, & celebremus nomen eius, cū propter summam eius potentiam, tū etiam propter certissimam eius veritatem & constantiam.

Postremò sicut antea ascendimus è terra in cœlum, ita iterum descendamus è cœlo in mare, & inspiciamus ibi miranda Dei opera, vt ad celebrandum nomen eius excitemur. Congregat, inquit, sicut aceruum aquas maris, & ponit abyssos in absconditis. Hæc, sicut & ea, quæ de creatione rerum præcesserunt, sumpta sunt è primo capite Geneseos: Congregentur, inquit Deus, aquæ, quæ sub cœlo sunt, in locum vnum, & appareat arida. Abyssos autem vocat profunditatem maris, quòd mare videatur nobis *ἄνευ βύσσους*, (hoc est) sine fundo. Vnde & Deus dicitur has abyssos collocasse in absconditis, seu in thesauris: quòd quemadmodum solemus thesaurum vel pecuniæ vel gemmarum

gemmarū remouere ab oculis hominum, & reponere in abscondita loca, ne furibus pateat, ita Deus abscondat profunditatem aquarum maris, ne humana curiositate inuestigari aut explorari queat. Cōmonefacit autem nos Psalmus hoc loco, nō tantū creationis maris, verū etiam ingentis illius miraculi: quo Deus mare in vnum aceruum ita colligauit, vt et si pro natura conditionis suæ vniuersam terram superare & aquis tegere debet, tamen diuinitus ita coërceatur, vt necesse habeat, se intra definitum suum terminum continere, quò terragerminet herbam virentem, & exhibeat homini commodam habitationem: *Iob. 38.* Quis, inquit, Iob, cōclufit ostijs mare, quando erumpebat, quasi de vulua procedens? Et mox: Circundedi illud terminis meis, & posui vestem & ostium, & dixi: Hucusq; venies, & non procedes amplius, & hīc confringes tumentes fluctus tuos. Visum autem est DOMINO Deo nostro hac admiranda aquarum maris coërcione significare nobis, quòd afflictiones, quæ aquis adumbrantur, et si videntur in nos intumescere, & minari suffocationem, tamen quēadmodum mari suus terminus positus est, ne longius in terram, quàm à Deo concessum est, procurrat, ita & illæ nō queāt in nos vltra septa diuinitus posita transilire. *Cor. 10.* Fide lis enim est Deus, (inquit Paulus) qui non sinet nos tentari supra id quod possumus, sed faciet vnā cum tentatione euentum, quo possimus sufferre.

Quæ cum ita se habeant, addit Psalmus cohortationem cum propositione congruentem: Metuat, inquit, omnis terra à DOMINO: paueant ab ipso omnes incolæ terræ. Audiuius Deum esse veracem, iustum, beneficū, liberalem, misericordem, & potentem re-

rum omnium conditorem ac seruatorem. Agite ergo, colamus eum, quotquot in terra habitamus, & reueramur ipsum, quotquot hunc terrę orbem incolimus, cōplectamur eum fide, sufferamus manum eius ipse, & agētes ei pro summa sua erga nos clementia gratias, seruamus ei pro obedientium filiorum affectu, in vera dilectione, & filiali (vt vocant) timore.

9. *Quoniam ipse dicit, & fit, ipse præcipit & extat.*
10. *Dominus irritum facit consilium gentium, irritas facit cogitationes populorum.*
11. *Consilium Domini in æternum fiat, cogitationes cordis eius in generationem & generationem.*
12. *Beata gens, cuius Dominus Deus eius, populus, quem elegit in suam hereditatem.*

Redit ad enumerationem causerum, propter quas Deus commendatione & laude dignus sit. Deus enim verbo suo, non solum omnia condidit, verum etiam omnia administrat & gubernat. Nam, sicut quondam dixit: Fiat lux, & facta est lux, dixit: Germinet terra herbam virentem, & germinavit: ita etiam postquam omnia verbo condidit, omnia verbo gubernat, vt sine ipsius voluntate, ne capillus quidem è capite decideret: dicit: Stet mare vtrinque, instar muri, & stat: dicit: Sol non moueatur contra Gibeon, & sol non mouetur. Idem Exod. 14.
Ios. 10. sentiendum est fieri in conferendis inter se humanis & diuinis consilijs atque conatibus. Esau dicit de fratre suo Iacob: Venient dies luctus patris mei, & occidam Iacob fratrem meum. Deus autem dicit ad Iacob: Ero custos tuus quocumque perrexeris, & reducam te in terram.

hanc, nec dimittam, nisi compleuero vniuersa quæ dixi. Quod ergo consilium promouit? non certè hominis sed Dei. *Gen. 37.* Fratres Ioseph dixerunt: Venite occidamus eum, & mittamus in cisternam veterem, & dicemus, fera pessima deuorauit eum. Deus autem dixerat ad Iosephum: Sol, luna & stellæ vndecim adorabunt te. Quod ergo consilium processit? non hominum sed *Ex. 1. & 3.* DOMINI Dei nostri. Pharaon dixit ad suos Aegyptios: Venite, sapienter opprimamus Israël. Deus autem dixit: Educam populum meum de terra Aegypti in terram bonam & spaciosam. Quid ergo factum est? Consilium Pharaonis dissipatum est & irritum factum: consilium autem DOMINI stetit: cogitatio Pharaonis euauit, cogitatio autem Dei constitit. *Exo. 13.* Dixit inimicus, persequar & compræhendam, diuidam spolia, DOMINVS autem dixit: Flabit Spiritus meus, & operiet eos mare, &c. Eo enim ingenio est DOMINVS Deus noster, vt ad conseruandam Ecclesiam populi sui, omnia hominum aduersariorum consilia irrita reddat, & omnem humanam prudentiam stultam faciat, ac omnem hostium potentiam deiiciat. Beata igitur gens, cuius DOMINVS est Deus eius, & beatus populus quem DOMINVS, tanquam peculiari quadam hæreditate, ex omnibus terræ nationibus, se legit, & quem vt hæredem bonorum suorum agnoscit. Quid enim huic genti, quid huic Ecclesiæ deerit? Si DOMINVS est Deus eius, certè erit gubernator, tutor, conseruator, protector, & liberator eius. Si Ecclesia est DOMINI hæreditas & hæres, certè erit hæres iustitiæ, vitæ, salutis & beatitudinis æternæ: qua hæreditate, quid potest dici excellentius, aut cogitari præstantius? Quare illud vnum sit præcipuum

præcipuum nostrum studium, ut simus populus Dei, hæreditas Dei, & hæres eius. Hoc autem tum fieri solet, cum agnoscimus Christum filium Dei per fidem, & ac *Rom. 8.* cipimus Spiritum adoptionis, per quem clamamus Abba, pater.

13. *De cælo prospicit Dominus, videt omnes filios Adam.*
14. *De habitaculo sessionis suæ, aspicit super omnes habitatores terræ.*
15. *Format pariter corda eorum, intelligit omnia opera ipsorum.*

Aliud argumentum commendandi & laudandi nominis Dei. Non enim sentiendum est, quod postquam Deus condidit homines, deserat ipsos, & finat eos pro ipsorum arbitratu in his terris temerè ferri, sed prospicit de cælo, curat omnes filios Adam, Et si enim videtur in cælesti suo habitaculo quietus & ociosus agere, tamen diligenter obseruat oēs terræ incolas, format & dirigit, quod vult singulorū hominum corda, & intuetur singula eorum opera, ut nō tantum sit scrutator, verum etiam formator & director renum & cordium.

Cæterum, cum dicitur Deus prospicere de cælo, & de habitaculo sessionis seu de loco quietis suæ, non intelligas Deum cōtineri in hoc externo cælo, tanquam Regem in arce, & sedere in eo tanquam Monarcham in regio throno. Absint à priorū cordibus tam pueriles & carnales de summa maiestate cogitationes. Cæli cœlorum, inquit Salomon, te capere non possunt. Et: Cælum mihi sedes est, ac terra scabellū pedum meorum. Et rursus: Cælum & terram ego impleo. Sed Deus dicitur, pro humana loquendi cōsuetudine, in cælo commorari,

morari, & de cœlo respicere, vt sciamus Deum non esse rem quandam humanam aut terrenam, sed cœlestē, humano captu incomprehensibilem: & vt admoneamur, non esse nobis quærenda terrena, sed cœlestia bona, quæ Paulus ad Colos. cap. 3. scribens, aliqua ex parte commemorat. Deinde Psalmus dicit, Deum respicere singulorum hominum non corpora tantum, sed & corda. Reuerenter igitur colamus maiestatem Dei, nobis tam propinquam & præsentem, ne Deus iniquitate nostra irritatus & offensus, præsentem etiam pœnam infligat.

16. *Rex non consequitur salutem multitudine exercitus, heros non liberatur magnitudine fortitudinis.*
17. *Mendax equus ad saluandum, nec seruat (equitem) magnitudine roboris.*
18. *Ecce oculi Domini super timentes ipsum, & super eos, qui expectant beneficentiam ipsius.*
19. *Vt liberet à morte animam eorum, & sustentet eos in fame.*

Aliud argumentum, quo excitamur ad laudandum nomen DOMINI. Solus enim DOMINVS est seruator eorum, qui colunt ipsum, & obedienter expectant beneficentiam eius. Alij quidem alios quærunť seruatores, quibus confidunt. Impij Reges confidunt multitudine suorum exercituum: impij Principes, seu Heroes, confidunt fortitudine vel sua propria vel suorum militum: alij confidunt robore equitatus sui. Etsi autem hæc sunt dona Dei, in vsum Regum ac Principum diuinitus concessa, tamen ijs non est coram Deo confidendum, nec est ex his salus petenda, equus enim res est fallax, ad seruandum

seruandum equitem, vt & vulgò dicatur: Qui infidet equo, infidet suo hosti. Quis ergo est, qui nos in periculis seruat? Non est alius, nisi solus DOMINVS Deus noster: Oculi, inquit, DOMINI, super timentes ipsum, & super eos, qui expectant beneficia eius. In bello periculum est omnium fortunarum, in fame periculum est vitæ, non igitur confidamus equo, non collocemus fiduciam nostram in frumento, sed timeamus DOMINVM, & colamus eum reuerenter. Sic enim fiet, vt oculi DOMINI nos respiciant, & seruemur in omnibus periculis. *Psal. 3. 147.* Non in fortitudine equi, inquit alius Psalmus, voluntatem habebit, nec in tibijs viri beneplacitum erit ei. Beneplacitum est DOMINO super timentes eum, & in eis, qui sperant super misericordia eius. Et Salomon: Equus paratur ad diem belli, sed DOMINVS salutem tribuit. *Prouer. 21.* Non uult DOMINVS dies immaculatorum, & hæreditas eorū *Psal. 37.* in æternum erit. Non confundentur in tempore malo, & in diebus famis saturabuntur.

20. *Anima nostra expectat Dominum, Adiutor noster & scutum nostrum ipse est.*
21. *In ipso latatur cor nostrum, in nomine sancto eius speramus.*
22. *Sit misericordia tua Domine super nos, quemadmodum speramus in te.*

Hactenus commemorauit Psalmus rationes, quæ nos excitare debent, vt laudemus & celebremus nomen DOMINI, videlicet, quòd Deus sit verax & constans seruator suarum promissionum, quòd diligat iustitiam & iudicium, quòd terra plena sit beneficiorum Dei, quòd

L Deus

Deus condiderit verbo suo cœlum, & omnem ornatū eius, quòd contineat mare intra terminos suos, ne excurrat ad vastandam terram, quòd dissipet consilia gentium, quòd consilium Dei perpetuò constet, quòd respiciat & curet humanum genus, quòd non respiciat, vt adiunet Reges propter equitatum suum, nec Heroes propter fortitudinem suā, sed respiciat timētes ipsum, & seruet eos in omnibus periculis. In quem ergo vsum hæc de Deo sunt cognoscenda & decantanda? Non certe, quòd his laudibus voluntati Dei per se satisfiat, sed vt nos ex his, tanquā cœlesti organo excitemur autore Spiritu sancto ad fidem, ad spem & ad expectationē diuini auxiliij in omnibus aduersis. Additur ergo in fine Psalmi precatio. Et postquā (inquit) anima nostra expectat DOMINVM, (quod officium Psalmus exigit) & agnoscimus ipsum solum esse nostrum adiutorium, & nostrum scutum, ac in solo ipso acquiescimus, omnemq; spem nostram in solo sancto nomine eius collocamus, precamur & obtestamur, vt quemadmodū speramus, ita tu DOMINE Deus noster misericordia & clementia tua nos complectaris, ac fiat nobis sicut credimus & expectamus.

VSVS HVIVS PSALMI.

Hic Psalmus celebrat veritatem, potentiam, clementiam, gubernationem & curam DOMINI Dei nostri, erga humanum genus. Quantò autem hæc virtutes Dei magis illustrantur, tantò plus fides, spes & expectatio, qui sunt cultus Deo longè omnium gratissimi, in nobis confirmantur & muniuntur. Vtendum igitur erit hoc Psalmo,

Psalmus, cum in agnitione multitudinis peccatorum si-
des cōcutitur, & in magnitudine afflictionum spes per-
turbatur, ac in granditate periculorum expectatio diui-
ni auxiliij nutare incipit, vt prædicatione virtutum Dei
expergiscamur, & animum resumamus.

PSALMVS XXXIIII.

*Benedicam DOMINVM in omni tempore,
semper laus eius, &c.*



Ccasionem huius Psalmi exponit in-
scriptio eius, quæ sic habet: Psalmus
Dauidis, cum mutauit vultum suum
coram Abimelech, qui & expulit ip-
sum, vt liberè, quò vellet, abiret. Hi-
storia autem descripta est in priori li-

bro Samue. cap 21. Postquam enim Dauid effugerat ty-
rannidem Saulis, excepit eum aliud periculum in Aula
Abimelech regis Palestinorum. Hic Abimelech voca-
tur in libro Samuelis, Achis. Arbitror autè nomen Abi-
melech, (cuius prima sit mentio in Genesi, cap. 20. 21. &
26.) fuisse generale nomen regum Palæstinorum, què-
admodum reges Aegyptiorum dicti sunt Pharaones, &
Monarchæ Romanorum Cæsares, cum quilibet præter
generale, etiam proprium nomen habuerit, vt sit Abi-
melech Achis, quasi dicas, Pharao Necho, aut Cæsar
Maximilianus. Cum igitur Dauid elapsus esset fuga à
rege suo Saule, peruenit in manus regis Achis, & adit

4. Re. 23.

periculum longè omnium maximum: metuendū enim erat, ne aut statim à Palestinis hostibus crudeliter trucidaretur, aut in perpetuos carceres omni morte tristiores cōijceretur, ac tanquam fugitiuus, regi Sauli in la nienam remitteretur: & tamen Deus dat mirandum euentum, vt tāta pericula saluue euadat. Quare suscipit hunc Psalmum componendum & decantandum, vt testificetur coram Deo gratitudinem animi sui, & cohortetur suo exemplo Ecclesiam ad fidem, spem, & inuocationem nominis Dei, in omnibus periculis. Est autem hic Psalmus obseruabilis, non solum propter argumentum, quòd contineat insignes cōsolationes in aduersis, verum etiam propter artificium dispositionis, quòd singuli eius versiculi incipiant à singulis literis iuxta ordinē Hebraici Alphabeti, sicut pleriq; alij Psalmi, de quibus suprà, ac propter auctoritatem quoque Apostoli Petri, qui aduenis scribens, instituit ex hoc Psalmo cohortationem plenam pietate, de qua resuo loco.

Psalm. 2. 5.

1. Pet. 3.

1. *Benedicam (seu laudabo) Dominum omni tempore, semper laus eius in ore meo.*
2. *Dominum glorificabit anima mea, vt audiant afflicti, & laetentur.*
3. *Magnificate Dominum mecum, & exaltemus nomen eius simul.*

Hi tres versiculi sunt propositio gratiarum actionis, (hoc est) præcipui status totius Psalmi. Quorū versiculorum primus docet, DOMINVM laudandum, DOMINO gratias agendas, non tantum semel & iterum, sed omnibus temporibus, non solum in rebus prosperis, verum-

rumetiam in rebus aduersis. Benedicā inquit, laudabo, seu prædicabo DOMINVM & clementiam eius quouis tempore, Cantabo laudes eius assiduè. Deus enim non solum clementer nobiscum agit, cum cōfert in nos externa beneficia, verumetiam cum nos affligit, quippe quod & afflictionibus suū ponat terminū, ne plus grassari queant, quam ipsis permissum est: & det euentū, vt eas sufferre possimus: & quod grauiores sunt, eò gloriosior sequitur liberatio. Quare, siue prospera siue aduersa acciderint, semper cum Iobe dicendū est: DOMINVS dedit, DOMINVS abstulit, sicut DOMINO placuit, ita factum est, sit nomen DOMINI benedictum. Iob. 1.

Secundus versiculus docet, quo consilio nomen DOMINI sit celebrandum, & laudes eius decantandæ. Anima (inquit) mea glorificat DOMINVM. Quo consilio? quo fine? Non certè quod Deus per se delectetur humanis laudibus, sed vt audiant (inquit) afflictī ac miseri homines, & lætētur. Cum enim prædicatur summa Dei clementia & gratuita eius misericordia erga afflictos, excitantur ad fidem, spem & inuocationem nominis Dei, vt & ipsi misericordiam consequantur, & cœlesti gaudio perfundantur.

Tertius versiculus hortatur vniuersam Ecclesiam ad celebrandum nomen DOMINI. Magnificate, inquit, DOMINVM mecum, & nos omnes simul extollamus nomen eius. Non enim vnus tantum & alter, sed vniuersa simul Ecclesia fruitur beneficijs Dei: & quæ Dei clementia in vnum aliquem confertur, ea ad omnia Ecclesiæ membra pertinet. Aequum igitur est, vt cuncta Ecclesia ad prædicandam laudem DOMINI, vnanimi consensu exurgat.

- 7 4. *Quæsiui Dominum, & exaudiuit me, & ex omnibus terroribus meis eripuit me.*

Propositioni, qua David recipit se laudaturum DOMINVM, addit rationem: Laudabo, inquit, DOMINVM, Quam ob causam? Quia quæsiui (inquit) DOMINVM, inuocaui DOMINVM in extremis meis periculis, & continuo exaudiuit me. Euaferam manus regis Saulis, sed incideram in manus hostis, regis Palæstinorum, cuius fortissimum gigantem Goliathem, paulò antè occideram: ibi videbatur me multò maiora pericula manere, quàm antea sub Saule. Quid igitur factum est? in medijs periculis, cùm iam captus tenerer, inuocaui opẽ DOMINI, & ecce eripuit me ex omnibus meis terroribus mirando modo. Sed quo modo? Etsi David erat inter Palæstinos, propter strategema in Goliathe designatũ, & propter carmẽ publicè decantatum, (perculsit Saul mille, & David decem millia) notissimus, tamen cùm iam captiuus, à seruis regis Achis, teneretur, & simularet delirium seu insaniam, effecit Deus, vt non solùm non agnosceretur à Rege, verùm etiam ita reijceretur, vt pateret ei liberrimus & securissimus abitus. Vides igitur tantam esse DOMINI Dei nostri industriam, vt sciat credentes in ipsum, etiam in medio hostium suorum, leuissima quaq; occasione, ac vel saltem delirij prætextu occulere, ne agnoscantur aut lædantur: nec illud agendũ esse, vt iniquis aut impijs rationibus ad liberationem contendamus, sed tantũ, vt in vocatione Dei ambulemus, & promissa eius clementia confidamus, sic enim reliqua omnia Deo curæ erunt.

5. *Qui aspexerint ad eum, illustrantur. ⁊ Et facies eorum non pa-
desunt.* n

Dices, Facile quidem cōcesserim, te Dauidem, quē Deus singulari fauore complectitur, diuinitus exaudiri, & è periculis eripi: quid autem mihi, & alijs, quorum non tanta habetur coram Deo ratio, fiet? Huic cogitationi occurrit Dauid: Non meas tantum (inquiens) ex audit preces DOMINVS, nec me tantum in periculis seruat, sed quotquot aspexerint ad eum, quotquot sustulerint ad ipsum oculos suos ex fide, hos luce fauoris sui ita illustrat, vt facies ipsorum non pudeant, (hoc est) repulsam nequaquam patiantur. Obseruabilis versiculus, quo docemur, peculiaria diuinæ bonitatis exempla in nostrum vsum, & ad nostri consolationem transferre, quod etiam versiculi mox sequentes, alijs quidem verbis, sed eadem sententia docent.

6. *Iste afflictus clamauit, & Dominus exaudiuit, ac ex omnibus afflictionibus eius eripuit eum.* 7
7. *Castrametatur Angelus Domini circa timentes ipsum, & tuetur eos.* n

Iterum commemorat & repetit Dauid suum ipsius exemplum, non vt gloriatur carnali iactantia de fauore Dei erga se, sed vt suo exemplo alios ad spem & inuocationem nominis Dei in aduersis excitet. Quid, inquit, dubitatis, DOMINVM, in afflictionibus vestris certissima fide & spe inuocare? quid differtis opem eius implorare? Sumite vel saltem à meipso exemplum: Ecce iste miser, afflictus, (demonstrat autem se ipse)

se ipse) abiectus, non solum ab omnibus amicis desertus, verum etiam in medio hostium Palestinorum captiuus inuocauit DOMINVM, & eripuit eum mirando modo, ac præter omnem expectationem, è sua afflictione. Quid igitur vos cessaris? Deus enim seruauit me, non mea tantum causa, sed propter vos omnes, timentes eum, vt exhibeat vobis in me exemplum clementiæ suæ, & testificetur se etiam vos in aduersis, quamuis grauissimis seruaturum. Timentes autem Dei dicuntur, non qui legi Dei perfecte satisfaciunt, & carent omni vitio, tales enim homines in hac rerum natura non sunt: sed qui colunt Deum fide in filium suum DOMINVM nostrum Iesum Christum, & constant spe in aduersis, ac studiū suū eò conferunt, vt opera carnis Spiritu mortificent. Hi etsi retinent adhuc in se multū imbecillitatis, tamē quia peccata non imputantur ipsis propter Christum, & dāt operam, vt sordes carnis magis ac magis expurgent, dicuntur verè timētes Dei & cultores eius. Quare qui sic timent, seu colunt DOMINVM, nullam habent prorsus causam, cur in aduersis suis nomen DOMINI inuocare cessent, aut de cœlesti ope dubitent. Si multitudo peccatorum remoratur, cōdonata sunt peccata gratis, propter Christum: si magnitudo afflictionum deterret, excitet vicissim magnitudo cœlestis auxiliij, qui enim timet, seu colit DOMINVM fide, non est solus, sicut humanis oculis apparet, sed est cœlestium angelorum cohorte munitus, Castrametatur (inquit) Angelus DOMINI circa eos, qui timēt DOMINVM, & tuetur eos. Hic versiculus de Angelorum excubijs diligēter obseruādus est, vt admoneamur de insigni cura DOMINI Dei pro salute nostra.

nostra. Est autem sumptus ex ea historia, quæ scripta est de Patriarcha Iacob, in Genesi cap. 32. Cum enim Iacob reuerteretur à socero suo cum familia in terrâ Canaan, & obijceretur varijs ac magnis periculis, fuerunt ei obuiam (inquit scriptura) Angeli Dei, quos cum vidisset Iacob, ait: Castra Dei hæc sunt, & appellauit nomen loci illius Mahanaim, (hoc est) castra. De hac historia commune facit nos hic versiculus Dauidis, (Castametatur Angelus DOMINI circa timentes eum,) & docet, pios excubijs Angelorum, tanquam castris ita munitos esse, vt feruentur in omnibus aduersis. Idem docet Psalmus 91. Angelis suis mandauit de te, vt custodiant te in omnibus vijs tuis. In manibus portabunt te, ne fortè offendas ad lapidem pedem tuum. Idem testificatur historia de Propheta Eliza, 4. Reg. 6. Et Christus de pueris dicit: Angeli eorum in cœlis semper vident faciem patris mei, qui est in cœlis. Et Epistola ad Hebræos: Nonne omnes Angeli (inquit) sunt administratores Spiritus, qui in ministerium emittuntur, propter eos qui hæredes erunt salutis? Agnoscamus igitur summam Dei erga nos clementiam & prouidentiam, quòd etsi ipse ex seipso ad cōseruandos nos in omnibus aduersis sufficit, tamē visum sit ei condere & ordinare Angelos suos in excubijs aduersus satanicas incursiones, vt excitaremur primū quidem ad agendas DOMINO Deo pro tantis beneficijs summas, quas possumus, gratias, deinde ad fidem constanter seruandam in maximis quibusq; periculis, quòd certò sciamus nos in ijs cœlestium Angelorum custodia munitos, vt quicquid acciderit, bona Dei voluntate fiat. Postremo, vt præsentia Angelorum, eorumq; optimorum

& castissimorum spirituū admoniti, abſtineamus nos non ſolū ab omnibus ſceleratis & turpibus operibus; verū etiam à cogitationibus eorū, ac in officio, quod Deo debemus, reuerenter ambulemus.

- U 8. *Gustate & videte, quā suavis est Dominus, beatus vir qui sperat in eum.*
 7 9. *Time te Dominum sancti eius, quoniam non est inopia timentibus ipsum.*
 3 10. *Raptores egebunt, & esurient, Qui autem quarunt Dominū, non carebunt vlllo bono.*

Haecenus exposuit propensam voluntatem Dei in exaudiendis precibus piorum, & in liberandis ipsis ex omnibus aduersis. Nunc concludit hanc expositionem cohortatione, ad suscipiendas preces ex fide, vt re ipsa experiamur beneuolentiam Dei. Et est sentētia. Commemorauī haecenus, Deum, nō solum me in inuocatione mea exaudire, & in aduersis tueri, verū etiam omnium eorum precibus fauere & annuere, qui timent & colunt ipsum fide: ac tantum abesse, vt deserat ipsos in periculis, vt potius cingat & muniat eos castris Angelorū suorum. Quāso igitur, vt ipsi vos vestra ipsorū inuocatione periculū de benignitate & clementia DOMINI faciat. Non enim dubito, quin re & experientia ipsa comperiatis bonitatem & φιλαυθροπία DOMINI, ac illum verē beatum & felicem esse, qui sperat in DOMINVM, & inuocat ipsum ex fide. Hortor etiam vos sanctos, seu credentes in DOMINVM, (hī enim soli verē sunt sancti) vt DOMINVM reuerenter colatis, propterea quod cultores eius nullo vnquā bono destituantur. Ac fieri quidem potest, vt grauibz aduersis affligatur, sed

sed ea omnia adiumento sunt ipsis in bonum. Et quam in hoc seculo homines violenti, prædones & raptores, quales sunt inter bestias catuli leonum, videntur diuitijs affluere, & omni bono abundare, tamē nihil est certius, quàm quòd necesse habeant, vel tandem ad inopiam redigi, egere, & famem pati: soli aut̃ quarētes & inuocantes DOMINVM, omni rerum abundantia & felicitate fruuntur. Cæterum, quod dicit: Gustate & videte, quàm suavis sit DOMINVS, et quàm beatus sit vir, qui sperat in ipsum, cōtinet vnà cum cohortatione etiā promissionem in perseverantia inuocationis. Nam, qui sunt increduli, vt in aduersis suis non inuocant Deū, ita etiam si aliorum hortatu ad inuocandū Deum excitantur, tamen, nisi mox re ipsa senserint opem diuinam, statim resiliunt, & quarunt aliena auxilia, quare nunquā gustant, aut re ipsa experiuntur bonitatem & liberalitatem Dei. Qui verò crediderint, & in inuocatione non fuerint defatigati, sed etiā si aduersa fiant subinde grauiora, perseverauerint tamen & perrexerint, nihil certius est, quàm quòd tandem non gustum tantum, verum etiam plenam cœlestis auxilij fruitionem capiant: Adhuc visus procul, inquit Abacuc, & apparebit in finem, & non mentietur. Si moram fecerit, expecta illū, quia veniens veniet, & non tardabit. Hinc est illud toties in Psalmis & Prophetis repetitum: Expecta DOMINVM. Et apud Lucam recitat Christus ipse parabolam huc spectātem, quòd oporteat semper orare, nec defatigari. Qui ergo voluerit gustum diuinæ bonitatis capere, non festinet, pro more incredulorum, sed expectet in patientia & perseverantia opem DOMINI, & re ipsa comperiet, benignitatem DOMINI

*Abac. 2.**Luc. 18.**Esa. 28.*

maiolem esse, quàm vlla humana ratio cogitare aut ybi polliceri potuerit. Deinde, quod dicit, non esse inopiam timentibus Deum, & raptores egere, cultores autem Dei omni bono frui, sæpenumerò in sacris literis repetitur.

1. Samuel. 2. Repleti prius pro panibus se locauerunt, & famelici saturati sunt.

Iob. 6. Ego vidi stultum firma radice, & maledixi pulchritudini eius statim. Longè fient filij eius à salute, & conterentur in porta, & non erit qui erniat. Cuius messem famelicus comedet, & ipsum rapiet armatus, & bibent sitientes diuitias eius.

Psal. 33. Ecce oculi DOMINI super metuentes eum, & super eos qui sperant super misericordia eius, vt eruat à morte animas eorum, & alat eos in fame.

Psal. 37. Nonit DOMINVS dies immaculorum, & hæreditas eorum in æternum erit. Non confundentur in tempore malo, & in diebus famis saturabuntur.

Prouer. 10. Non affliget DOMINVS fame animam iusti, & insidias impiorum subuertet.

Et in cantico Mariæ: Esurientes implet bonis, & diuites dimittit inanes.

Hæ & similes sententiæ admonent nos primùm, vt in vocatione DOMINI diligenter ambulemus, & quæramus ante omnia (vt Christus loquitur) regnum Dei ac iustitiam eius. Deinde, vt in fame cōfidamus, certa spe concepta, quòd qui vestit lilia campi, & pascit volatilia cœli, permittet potius, vt natura rerū inuertatur, quàm vt in promissis suis mendax fiat.

¶ 11. *Venite filij, audite me, timorem Domini docebo vos.*

12. *Quis*

12. *Quis est homo, qui vult feliciter vivere, & dies videre bonos.*
13. *Coerce linguam tuam à maledicentia, & labia tua ne loquantur dolum.*
14. *Declina à malo, & fac bonū, da operam paci & sectare eam.*
15. *Oculi DOMINI super iustos, & aures eius ad clamorem eorum.*
16. *Vultus autem Domini super eos qui faciunt malum, vt aboleat de terra memoriam eorum.*

Hi sunt versiculi illi, quibus etiam Apostolus Petrus in priori sua Epistola cap. 3. vtitur, & cohortationem ad verum cultum Dei instituit. Postquam igitur Psalmus concludit admonitione priorem partem de inuocatione nominis Dei, suscipit nūc aliam admonitionē, de timendo & verè colendo DOMINO Deo nostro: Venite (inquiens) huc, suauissimi mei filij, (hac enim blandiloquentia vtitur Spiritus sanctus suo more, vt excitet auditores ad pietatem) audite ME. Nolite audire Pseudopphetas, & doctores humanarum traditionum: sed audite ME, qui doceo verbum DEI. Quid ergo faciamus, vt peragamus tranquillam & felicem vitam? Etsi enim non ignoramus, terram nobis in hoc seculo proferre spinas & tribulos, ac nos ad miseras esse natos & per multas tribulationes ingrediendum nobis esse in regnum cœleste, scimus firmum & fixum esse, quod filius Dei dicit: In mundo habebitis afflictionem: tamen illud agimus, non vt nullam in hoc mundo crucem gestemus, sed vt tranquilla & alacri cōscientia sub cruce ambulemus, & post hāc vitam, veram salutem & felicitatem consequamur. Quid igitur in hoc nostro

instituto faciendum, & quis timor, quis cultus hac in re DOMINO Deo nostro præstādu est? Respōdet Psalmus. Primum, coërce linguam tuam à maledicentia, & labium tuum à dolo. Lingua, inquit Iacobus, pusillum membrum est, & magna iactat: ecce exiguus ignis, quantam materiam incendit? & lingua ignis est, iniquitatis mundus. ac mox: Ex eodem ore procedit benedictio & maledictio. Lingua igitur cum multipliciter, tum præcipue dupliciter peccari solet. Semel, cum verbū Dei peruertitur, & falsa, impia ac dolosa docentur, hæc est maledicentia aduersus Deum. Et iterū: Cum maledicis & virulentis verbis in proximum inuehimur, aut cum doloso sermone rebus eius insidiamur. Vtrunq; grauissimum scelus est, dignum nō externo tantum, sed etiam æterno supplicio. Quare, qui cupit quietam vitam transigere, caueat tam ab impia doctrina, quam à maledictis, conuicijs, & malo dolo aduersus proximum suum. Hic est timor, hic est cultus Deo gratissimus.

Deinde recedat à malo, & faciat bonum. Hoc dictū complectitur summam veræ pœnitentię. Constat enim vera pœnitentia, in recedendo seu declinando à malo, & faciendo bono. Tunc autē recedimus à malo, cum agnoscimus malū, & abhorremus à malo: & tunc facimus bonum, cum agnoscimus Christum filium Dei, mali expiatorem, & cōpescimus Spiritu sancto reliquias carnis, vt ambulemus in officio ad quod diuinitus vocati sumus. Quare ad consequendam veram vitæ tranquillitatem & felicitatem, recedendum est à malo, & facendum bonum, hoc est, agenda est vera pœnitentia.

Postremo, det operā paci, & sectetur eam. Varia est pacis significatio. Aliās pacis nomine venit omnis celestis

lestis salus, vt cū Christus salutat suos discipulos: Pax vobis, inquit, & Pacem meā do vobis: aliās significat pacem seu tranquillitatem cōscientiæ, aliās concordia cū proximo. Hoc igitur loco exigitur cōcordia mutua inter homines, & præcipitur, vt quantū in nobis est, cū omnibus hōminibus pacem habeamus, & concordiam alamus. Homo enim & creatus, et natus, & formatus, & institutus, & renatus est ad mutuā concordia. Quare, si quis tenetur desiderio consequendę tranquillitatis & felicitatis, pacem & concordiam sectetur necesse est.

Non simpliciter aut hortatur nos Psalmus ad fugiendum malum, & faciendū bonum, ad sectandam pacem, & fugiendā discordiam, sed addit etiam rationem, quæ ad præstada hæc officia excitetur: Quia oculi DOMINI, inquit, super iustos, (qui hunc timorem, & hunc cultū, quem commemorauimus, Deo præstant) & aures eius patent semper precibus ipsorum. Respicit enim eos benigno & clementi vultu, & exaudit preces eorum prompta voluntate: malos aut & inobedientes respicit duro & irato vultu, & illud agit, non tantū vt in hoc seculo affligantur, sed etiam vt nulla honesta eorū mentio in terris reliqua maneat, & ipsi in æternū pereant. Quare, si quem non excitauerit ad pietatem magnitudo salutis, quæ agentibus pœnitentiā promissa est, excitet ipsum grauitas suppliciorū, quæ manent impœnitentes.

17. *Clamant (iusti) & Dominus exaudit, ac liberat eos ex omnibus afflictionibus ipsorum.* 2
18. *Iuxta est Dominus ijs, qui contrito sunt corde, & seruat illos, qui afflicti sunt Spiritu.* 3
19. *Multæ tribulationes iusti, sed ab his omnibus liberat ipsos Dominus.* 4

10. *Custodit omnia ossa eorum, ut ne unum quidem ex his conteratur.*

Quod ante cœpit de beneficijs, quæ Deus conferre solet in homines iustos, hoc nunc vîq; ad finem Psalmi prosequitur & pluribus explicat, ut magnitudine beneficiorum retineat eos in officio, & iniustos ad pœnitentiam excitet. Dixit antea: Oculi DOMINI super iustos, & aures eius ad clamorem eorum. Nunc igitur repetit hanc sententiam, ut hac occasione pergat iustorum felicitatem exponere: Clamant (inquiens) iusti ad Deum; inuocant Deum in aduersis: non autem frustra clamant, sed DOMINVS exaudit eos, & ita exaudit, ut etiam ex omnibus illis afflictionibus, quibus premuntur, & quibus ad preces excitati sunt, liberet. Etsi enim non semper exaudit ipsos iuxta carnalem ipsorum voluntatem, tamen semper exaudit eos iuxta spirituales ipsorum utilitatem. Nam in inuocatione DOMINI, qua petimus liberationem ab externis seu corporalibus afflictionibus, nunquam nobis ex oculis seponendum est dictum Pauli, quod in Epistola ad Romanos cap. 8. extat: Hoc ipsum, quod oraturi simus, ut oportet, non nouimus, verùm Spiritus intercedit pro nobis gemitibus inenarrabilibus. At ille, qui scrutatur corda, nouit quis sit sensus Spiritus, quoniam secundum Deum intercedit pro Sanctis.

Cæterum, quod dixit Psalmus: DOMINVS exaudit iustos, pergit clarius exponere: Iuxta est (inquiens) DOMINVS ijs, qui contrito sunt Spiritu. Iniusti seu increduli homines, arbitrantur Deum eò longius recedere ab ijs, qui propter afflictiones tristi sunt animo & angusto

gusto corde, quò grauiiores sunt afflictiones, & eò minus exaudire preces eorum, quò acerbiora aduersa sustinent, sed longè errant. Nam quò intolerabiliores videtur tribulationes, quas iusti sufferunt, eò propinquior est DOMINVS sua cœlesti ope, & eò liberalius ac gloriosius seruat ipsos. Non enim obscurum est, quòd ea sit rerum huius sæculi conditio, & is ecclesiæ Dei status, quòd iusti necesse habeant multas in hoc mûdo tribulationes ferre, & varijs æumnis exerceri. Sed bene habet, DOMINVS non solum liberat eos ab his omnibus, verum etiam ossa eorum ita custodit, vt ne vnum quidem ex his conteratur. Obseruabiles versiculi, quibus promittitur iustis certissima conseruatio Dei in omnibus aduersis. Iusti autem dicuntur, (quod sæpè admonuimus) non qui legem Dei perfectè implent, vbi enim hos inuenies? sed qui iustificantur ex fide Iesu Christi, & habent remissionem iniustitiæ propter Christum, ac ambulant in vocatione Dei. Hi ergo iusti tantò propinquiorem habent Deum, quantò miseriore tam in suis, quàm in huius mundi oculis videntur, vt & animo & corpore salui conseruentur. Audio quidem (inquiens) proluxas & magnificas promissionis, sed res ipsa aliud videtur testificari. Vide mihi veteris Ecclesiæ martyres, horum alij obiecti sunt bestiis deuorandi, alij igne combusti, alij dissecti, alij aqua submersi, alij gladijs occubuerunt, horum ne ossa ita cōseruata sunt, vt ne vnum quidem ex ipsis fuerit contritum? Sed de his & alijs id genus promissionibus rectè & piè indicandum est. In Exodo cap. 12. dictum est de agno paschali: Os eius non confringetis. Hoc respicit, interprete Euangelista, Christum DOMINVM nostrum, qui

N

etſi

Ioan. 19.

etsi in cruce mortuus est, tamen corpus eius ita illæsum manet, vt ne vnum quidem os eius cōfringatur. Quod autem in externo Christi corpore contigit, hoc etiam suo modo impletur in corpore eius spiritali, quod est Ecclesia. Etsi enim piorum ossa deuorantur à bestiis, absumuntur igni, conteruntur in mille partes, & dissipantur coram oculis huius mundi, tamen conseruantur manibus DOMINI tam illæsa & salua, vt tempore resurrectionis non solum nullum ex ijs sit defuturum, verum etiam corpus gloriosum, ad æternam vitam proditurum, cuius rei figura extat apud Ezech. cap. 37. qua ossa ad ossa, vnumquodq; adiuncturam suam accedunt. Quare, etsi ossa piorum videntur in his terris conteri & dissipari, tamen promissio in hoc Psalmo recitata manet re ipsa in conspectu Dei verissima & certissima, quod Deus ea colligat, & manu sua ad resurrectionem & cœlestem gloriam conseruet.

21. Occidet impium malignitas, & qui odio habent iustum, peribunt.

Aliud beneficium, quo Deus iustum afficit. Non solum enim exaudit preces eius, & cōseruat eum saluum, in omnibus aduersis suis, verum etiam perdit impium persecutorem iusti: Occidet (inquit) impium malignitas ipsa, qua aduersus iustum & pium grassatur. Et osores seu persecutores iusti, rei fiunt omnis sanguinis iusti, qui effusus est super terram à sanguine Abel iusti, vsq; ad sanguinem Zacharie, adeoq; vltimi illius iusti, qui ante nouissimum huius seculi diem iniuste occiditur. Vides. quantam Deus rationem habeat iustorum,

ut non solum ipsos seruet perpetuò, verùm etiam puniat omnes impios & crudeles eorum persecutores propter ipsos, aeterno supplicio. Et, ut hoc magis inculcetur, addit.

22. *Redimit Dominus animam seruorum suorum, & non peribunt, quotquot in ipsum sperant.*

In proximè præcedenti versiculo vicesimo primo, finitè sunt literè Hebraici Alphabeti. Vidisti enim singulos huius Psalmi versiculos à singulis Hebraici Alphabeti literis inchoasse. Sed quia versiculus quintus attributus est duabus literis, *he*, & *vau*, ut reliqui excrescant tantùm in viginti vnũ versiculos, idcirco quòd numerus versiculorum excrescat in equalem numerũ cum literis Hebraici Alphabeti, quarum sunt viginti duæ, additur adhuc vnus versiculus cum litera *pe*, quasi supernumeraria, ut fiant & ipsi viginti duo versiculi. Est autem antithesis ad versiculum proximè præcedentem: Occidet impium sua ipsius impietas, & oïes, seu persecutores iusti, peribunt suo ipsorum delicto seu crudelitate. DOMINVS autem redimit seruos suos, (hoc est) iustos & pios, nec vnquàm permittet, ut qui sperant in ipsum, pereant. Reliquum igitur est, ut, cum Deus maximam omnium seruorũ suorum, seu iustorum & piorum hominum rationem habeat, cunctum nostrum studium ad sectandam veram iustitiam ac pietatem conferamus, & summas DOMINO Deo nostro, pro beneficijs suis, non semel tantùm & iterum, sed toto vitæ nostræ tempore, gratias agamus.

VSUS HVIVS PSALMI.

Magnus est huius Psalmi usus, in primis autem, si quis diuturnis precibus defatigamus, sollicitatur cogitare, nullum esse locum suarum precum coram Deo: habet hic exemplum & promissionem, quibus sollicitudini sue medeatur: Quæsiui (inquit David) DOMINUM, & exaudiuit me, & ex omnibus terroribus meis eripuit me. Qui aspexerint ad eum, illustrantur, & facies eorum non pudefunt. Deinde, si quis maioribus aduersis obruitur, quam ut possit liberationem sperare, proponat sibi oculos, quod hic canitur: Castrametatur Angelus DOMINI circa timentes DOMINUM, & tuetur eos. Et: Iuxta est DOMINUS ijs, qui contrito sunt corde, & seruat illos, qui afflicti sunt animo. Si quis denique offenditur sua infelicitate, & impiorum felicitate, habet in hoc Psalmo, quo istius offendiculo obuiam eat: Raptores, inquit, seu violenti egebunt & esurient, qui autem querunt DOMINUM, non carebunt vilo bono. Et: Occidet impius sua ipsius malignitas, & qui odio habent iustum, peribunt, etiam si diu videantur in hoc seculo felices.

Psalmus

PSALMVS XXXV.

Judica Domine nocentes me, &c.

Pud Evangelistam Ioannem ca. 15.
 Christus commemorans Aposto-
 lis suis venturas perlecutiones, &
 consolans eos suo ipsius exemplo:
 Hoc, inquit, accidit, vt compleatur
 sermo, qui in lege eorum scriptus
 est: Odio habuerunt me gratis. Hoc
 dictum cōtinetur in decimono nono versiculo huius Psal-
 mi. Sciamus igitur, quod Christus sua ipsius autoritate
 testificetur, se in hoc Psalmo suas xrumnas, ac aduersa-
 riorum suorum iniurias, & crudelitatem DOMINO Deo
 patri suo exponere, ac iustam vindictam petere. Etsi
 enim David similia quædam à suis inimicis passus, &
 magnis iniurijs ab ijs, quibus ipse benefecit, affectus est,
 Christus tamen filius Dei tenet in omnibus afflictioni-
 bus primas, & Spiritus eius testatur est in Prophetis,
 (quemadmodum Petrus ait) venturas in ipsum afflictio-
 nes, priusquam acciderent, sicut & quæ essent consecu-
 turæ glorias. Quare audiamus in hoc Psalmo primum
 omnium, Christum DOMINVM nostrum loqui, & cala-
 mitates suas Deo patri suo exponere, ac petere, vt op-
 pressis aduersarijs liberetur: Pro quo beneficio recipit
 se gloriam nominis Dei, non inter Iudæos tantum, ve-
 rum etiam inter Gentes, quibus possit laudibus, cele-
 braturum.

1. Pet. 1.

N 3

1. Alter

1. Altercare Domine cum ijs, qui mecum altercantur, belligerare cum ijs, qui mecum belligerantur.
2. Apprehende clypeum & scutum, & exurge in adiutorium mihi.
3. Stringe mucronem, & occurre persecutoribus meis. Dic anima mea, salus tua ego sum.
4. Pudefiant, & afficiantur ignominia, qui insidiantur anime mee, conuertantur in fugam, confundantur qui machinantur mihi malum.
5. Fiant tanquam palea coram vento, & Angelus Domini impellat.
6. Sint via illorum tenebricosa & lubrica, & Angelus Domini persequatur ipsos.

Esai. 53.

Quid? inquires, hæccine est precatio filij Dei DOMINI nostri Iesu Christi? Extat generale præceptum: Diligas proximum, sicut teipsum, & aliàs dicitur: Mea est ultio, dicit DOMINVS, ego rependam, Christus etiam ipse exponens legem de diligendo proximo: Diligite, inquit, inimicos vestros, bene precemini deuonētibus vos: ac peculiariter de ipso scriptum est: Pro transgressoribus rogauit. Quomodo igitur precatio, imò execratio huius Psalmi cum illis dictis conuenit? potuisset ne Christus aliquid seuerius & atroci⁹ aduersus inimicos & aduersarios suos dicere, quàm quod ait: Pudefiant & afficiantur ignominia: qui insidiantur vitæ meæ, & Fiant tanquam palea coram vento, & Angelus DOMINI impellat eos? Via illorum sint tenebricosa & lubrica, & Angelus DOMINI persequatur ipsos? hoc enim est non leuem aliquam rerum iacturam, sed æternum exitium imprecari, nec est tantum liberationem

ab insultu inimicorum petere, sed etiam vindictam postulare. Sciamus igitur, quod aliud sit officium charitatis, aliud seueritatis, & alia sit vocatio generalis, alia personalis. Charitatis enim est, vt non solum amicum, verum etiam inimicum diligas, & non tantum bene preceris benedicientibus, sed etiam deuouentibus te. Seueritatis autem est, charitatis regulam ita seruare, vt interrim crudelitatem & impietatem inimicorum non approbes nec adiunes. Similiter, generalis vocatio est, tam bene factores quam malefactores fauore tuo persequi, & ipsis benefacere, Personalis autem vocatio est, malefactoribus ita fauere, vt tamen officium peculiariter tibi diuinitus demandatum non negligas. Magistratu (exempli gratia) fungeris, & portas gladium, diuinitus tibi porrectum: adducitur autem latro seu incendiarius iuxta diuinam ordinationem coercendus & puniendus. Quid facias? iuxta generalem vocationem dolendum est tibi de proximi casu, & ex charitate precandum, vt Deus clementer condonet ipsi atrocitatem sceleris eius: iuxta personalem autem vocationem, seueriter est in ipsum secundum leges animaduertendum. Quare, cum Christus in cruce de inimicis suis clamat ad Deum: Pater, remitte illis, nesciunt enim quid faciunt, precatio est charitatis, quam Christus perfectissime prestitit, neque enim peccatum fecit, nec inuentus est dolus in ore eius: & cum maledictis incessetur, non regegit maledicta. Cum autem in hoc Psalmo & alijs precatur, vt inimici ipsius pudeant, ac afficiantur ignominia, vt disturbentur sicut palea a vento, vt fiant dies eorum pauci, & filij eorum orphani, ac vxores eorum vidue, (quod est mortem ipsam impreari) sedet pro tribunali, & recitat seueram

ueram sententiam, quam Deus cōtra omnes impios & crudeles persecutores Euangelij definiuit. Itaque non iam petit tantū liberationem à suis hostibus, qui sunt Pontifices, Scribæ, Pharisei, Hypocritæ, Iudæi, & Gentes, verū etiam petit vindictam & ultionem, iuxta de finitiuam sententiam Dei, vt omnes hostes ipsius opprimantur & intereant. Altercare, inquit, DOMINE cum ijs, qui mecum altercātur, belligerare cum ijs, qui mecum belligerantur. Vides DOMINE, quanto furore in me grassentur impij Pontifices, traducunt me per subsellia Iudicum tam Ecclesiasticorū quàm politicorum: contendunt & belligerantur mecum coram Synodo sacerdotum, & vociferantur me esse blasphemū & reum mortis: rixantur mecum coram Pilato, & clamāt me esse seditiosum, ideoq; crucifigēdū: ac breuiter, excogitant & architectantur aduersus me omne malum. Quæso igitur te DOMINE, vt exurgas in mei defensionem, & suscipias cum ipsis pro me certamen & bellū; arripe clypeum & arma, accinge te gladio, & occurre armatus meis persecutoribus, vt manifestè & re ipsa testificeris, te esse meā salutem. Nec id tantū peto, vt me defendas & serues, verū etiam vt de inimicis meis vindictam sumas, & persecutores meos opprimas. Pudeant & afficiantur ignominia, quotquot insidiātur vitæ meæ. Terga vertant summa cum infamia, quotquot conantur mihi malefacere. Disturbentur & disijciantur, quemadmodum quisquiliæ à vēto hinc inde proijci solent. Nec simpliciter dispergantur, sed sicut Angelus DOMINI stetit in ingressu Israëlitarū in mare rubrum inter castra Aegyptiorum, & castra Israëlitis, ac Israël ita tuebatur, vt Aegyptij exclamarent: Fugiamus Israël,

Exod. 14.

lem,

lem, DOMINVS enim pugnat pro eis contra nos: sic & Angelus DOMINI non aliter impellat & deiciat meos aduersarios, quā Egyptij in mari rubro occubuerunt. Præterea, fuga aduersariorum meorum non fiat interdiu, vt videant, quā sit fugiendum; sed noctu, vt tenebris circumfusi, & lubricitate viæ vacillantes, in præcipitia quæq; ferantur. Quemadmodum enim Gideone quondam adoriente cum trecentis militibus castra Midianitarum, in medijs tenebris noctis, Angelus DOMINI Midianitas sic exterruit, vt mox se in pedes conicerent, & præ tenebris nescirent, quò fugerent: ita & Angelus DOMINI exterreat meos inimicos, vt excæcentut, & in æternum barathrum præcipitentur. Habes imprecationem, qua filius Dei Pontifices & Phariseos Iudaicos, inimicos & persecutores suos execratur. Et quia sunt verba filij Dei ad Deum patrem suum, non est dubium, quin, cū sciat quis sit sensus Spiritus, petat, secundum propositum & voluntatem Dei, liberationem. Docet igitur in hac præcatione, primū, quòd Deus suscipiat bellum aduersus omnes illos, qui resistunt Christo filio Dei, & conantur Euangelion eius abolere. Quis autem posset feliciter cum Deo belligera- *Iudi. 7.*
ri? hoc enim est contra stimulum calcitrare, & vt Græci dicunt *θροαχτιν*. Deinde docet, quòd supplicium mereat impios verbi Dei persecutores. Hic enim, et si aliquandiu videntur prosperum habere consiliorum suorum euentum, tamen necesse habet, vel tandem pudes- *Rom. 8.*
fieri, & tanquam paleæ dispergi, quemadmodum etiā in Psalmo 68. dicitur: Exurgat Deus, & dissipentur inimici eius, & fugiant, qui oderunt eum, à facie eius. Sicut deficit fumus, deficiat: sicut fluit cæra à facie ignis, *Acto. 9.*

sic pereant peccatores à facie Dei. Postremò vaticinatur etiam de exc̄catione & abiect̄ione Iud̄eorum, ne sint amplius populus seu Ecclesia Dei: Sint, inquit, viæ illorum, tenebricosæ & lubricæ, & Angelus DOMINI persequatur ipsos. Postquam enim Iud̄ei reiecerunt Christum, cōiecti sunt in tantam c̄citatē, vt etiam si habeant adhuc, & legant scripturā Prophet̄icā, tamē non intelligant, & quacunq; incedunt, in tam lubrica via insistant, vt in æternum exitium ruant. Hoc idcirco nobis commemoratur, vt in horribili illo casu Iud̄eorū non offendamur, sed excitēmur ad gratitudinem erga clementiam Dei, qua quod ablatum est à Iud̄æis, in nos Gentes est collatum, ne, quod nobis est gratuita misericordia datum, in gratitudine nostra iterum auferatur. Nam si Deus naturalibus ramis non pepercit, vidēne quā fiat, vt nec tibi parcat.

7. *Quoniam sine causa clam̄ tendunt mihi pernitiosum suum rete, sine causa faciunt foveam animæ meæ.*

Grauiſſima quidem execratio est, qua Christus in Pontifices & Phariseos inuehitur, sed multo grauiorē sunt causā, cur ipsos excretur. A calix postea commemorabuntur, in hoc autem septimo versiculo vnam recenset: Quoniā, inquit, tendunt mihi clam̄ pernitiosum suum laqueum. Non execror eos temerē, & pro carnis arbitrio, sed quod loquor, sententia est Spiritus sancti. Tanta enim est impietas & immanitas eorū, vt et si nullam prorsus habeāt iustā causā in me sciendi, tamen quemadmodum seu aucupes, seu venatores tendunt auibus & feris sua retia & laqueos, quibus eas ex impro-

improviso capiant, & sodiunt lupis ac vulpibus foueas, in quas præter expectationem incidunt & comprehendantur: ita Pontifices & Pharisei insidiantur mihi, quo quo modo possunt, vt me opprimât. Cæterum, qui sint laquei illi & retia, quæ Pontifices & Pharisei tetenderunt Christo, Euangelistæ haud obscurè tradunt. *Matt. 26.* Matthæus ait: Consiliū inierunt principes Sacerdotū & Scribæ & seniores populi, vt Iesum dolo caperent & occiderent. Ioannes ait: Congregauerunt Pontifices & Pharisei Synedrion, ac dicebāt: Quid facimus, quia hic homo multa signa facit: si permiserimus eum sic, oēs credent ei, venientq; Romani, & tollēt tūm locum nostrū tūm gentem. Et mox: Ab illo die cōsultabant inuicem, vt interficeret eum. *Ioan. 11.* Lucas ait: Iudas abiens, collocutus est cum principibus Sacerdotū ac Magistratibus, quem admodū illum traderet eis. Et gauisi sunt, ac pacti sunt illi pecuniam se daturos, Et ille spondit, quærebatq; opportunitatē, vt traderat eum illis sine turba. Habes laqueos & retia, quæ Pontifices & Magistratus Hierosolymitanus clām tetenderunt Christo, cum ne minimam quidem legitimam causam aduersus ipsum haberent: Homini autem innocenti struere insidias, vt sanguinem eius effundas, quantum hoc est scelus, quātum flagitium? Ac si quidem alium quendam hominem, cætera innocentem, attamen de hominibus non admodū benè meritum, & coram Deo nocentem, dolo circumueniendum, & occidendum susceperis, obnoxius es æternæ maledictioni. Quo autem supplicio dignus es, si insidiatus fueris sanguini illius hominis, qui vt est v-nigenitus filius Dei, ita optimè de vniuerso humano genere meritus, & coram tribunali quoq; Dei innocens

fuerit? Quid ergo supplicij mereatur, mox sequitur.

8. *Eueniat ei calamitas, præter omnem suam expectationē, & capiatur reti suo, quod (innocenti) retendit, ac conijciatur in calamitatem ipsam (quam alteri parauit.)*

Hoc iustissimum est supplicium, vt quem laqueum innocenti paraueris, eo tu ipse constringaris & suffocaris. *Psal. 7.* Lacu aperuit, (inquit alius Psalmus) & effodit eum, & incidit in foueam, quam fecit. Conuertetur dolor eius in caput eius, & in verticem ipsius iniquitas eius descendet.

Psal. 9. Et alius Psalmus: Infixæ sunt gentes in interitu, quæ fecerunt, Et in laqueo isto, quem absconderunt, comprehensus est pes eorum. Quare optimè & rectissimè cecidit, quod cum Pontifices, & Pharisei conati sint Christum de maiestate sua detrahere, & in infernum detrudere, ipsi vicissim priuati sint omni maiestate, & in extremam internitionem cōiecti, Christus autem in summam sublimitatem exaltatus. Vnde & sequitur.

9. *Anima autem mea exultat in Domino, & letetur in salute eius.*

Pontifices & Pharisei, qui insidiati sunt sanguini meo, vt mihi omne cœlestegaudium & salutem adimerent, coniecti sunt in omnem inferni horrorem & interitum. Anima autem mea vicissim ita exhilarata est, vt exultem perpetuò in beneficijs DOMINI Dei patris mei, & gestiam in æterna salute, quam Deus pater in me contulit: Confitebor tibi, inquit Christus in alio Psalmo, quod exaudieris me, & factus sis mihi in salutem.

tem, Lapidem, quem reprobauerunt ædificantes, hic factus est in caput anguli.

10. *Omnia ossa mea dicunt, Domine quis similis tui, qui eripis afflictum ab illo, qui est ipso fortior, afflictū (videlicet) & pauperem ab illo, qui violenter ipsum pradatur.*

Maximum & immane est scelus, quod designant Pontifices & Pharisei in Christum, non solum innocentem, verum etiam optimè de ipsis meritum. Sed vicissim, maximum est etiam beneficium, quod confert Deus pater in Christum, cum in extremis afflictionibus, in quas ipsum impij & crudeles Pontifices dolis & clandestinis suis consilijs coniecerunt, seruat eum ita saluum, ut animo suo exultet, ac propter magnitudinē salutis cœlesti ac æterna lætitiā gestiat. Effert enim ipsum in summam sublimitatē, & dat ei nomen super omne nomē, ut in nomine eius omne genus flectat cœlestium, terrestrium & infernorum. Quare, ut Christus declaret suam erga Deum patrem gratitudinem: Omnia (inquit) ossa mea dicunt, DOMINE, quis est similis tui? Omnes vires meæ confitentur gloriam nominis tui: toto pectore agnosco & prædico immensam tuam clementiam & bonitatem, qui hoc maximè omnium agis, ut superbos deijcias, & abiectos glorifices, ut deponas potentes de sede, & exaltes humiles, ut opprimas Pyrgopolinices, & eripias afflictos, ut tyrannos ex alto præcipites, & miseros ac egentes in sublimitatem efferas. Hæc sententia de oppressione potentum, & exaltatione oppressorum, obliuibilis est, & sepe in scriptis tam Prophetis quam Apostolicis repe-

*Quid differtur
non aufertur.*

rita. Docet autem impios persecutores piæ doctrinæ timorem Dei, & admonet ipsos resipiscentiæ: Pios autem & afflictos docet fiduciam & patientiam in aduersis, ut obedienter expectent cœlestem liberationem, quæ, etsi aliquantisper differtur, non tamen (iuxta vulgatum dictum) aufertur.

11. *Insurgunt testes iniqui, (seu violenti,) quæ non agnosco, imputant mihi.*

Redit ad commemorationem illarum causarum, propter quas Pontifices execratione dignos iudicat. Et cum recensuerit antea versus septimovnam causam: Sine vlla causa (inquiens) tendunt mihi rete, sine vlla causa fodiunt animæ meæ foueam, nunc recenset alteram: Insurgunt (inquiens) in me testes iniqui, falsi seu mendaces, & testificantur de me, ac obijciunt & imputant mihi, quæ nunquam ne per somnium quidem mihi in mentem venerunt, & quorum nihil prorsus mihi conscius sum. Nota autem est historia passionis Christi, in qua testes nunc affirmant Christum publice iactasse, se destructurum templum, & in triduo instauraturum: nunc aiunt docuisse ipsum, tributum non esse dandum Cæsari: nunc mentiuntur, ipsum affectasse regnum Romanum, imò Monarchiam totius terræ: ac breuiter, accusatores eius palam vociferati sunt, ipsum esse blasphemum in Deum, & seditiosum aduersus Magistratum, quibus criminibus nihil potest horribilius & atrocius excogitari, & à quibuscumque alienus fuit, ut nihilo eo fuerit in cœlo & in terra innocentius. Etsi autem grauissima pœna constituitur in Deuteronom. cap. 19. aduersus mendacem

cem testem: Reddent ei, (inquit) sicut fratri suo facere cogitauit. Et: Non misereberis eius, oculum pro oculo, dentem pro dente, &c. samem hic Psalmus multò grauius in mēdacem testem inuehitur. Cū enim inter causas, cur Deus suscipiat bellum contra Pontifices & Phariseos, vt pudefiant & opprimantur, illa non postrema recitetur, quòd falsum testimonium aduersus Christū dixerint, obscurum non est, quin mēdax testis tantum scelus designet, vt mereatur hostem Deum, & dignus sit aeterna internitione. nam, cum Deus sit veritas ipsa, quid magis cum ipso belligeratur, quàm mendacium? Videtur quidem veritas interdum periculosa & perniciofa, multò autem perniciosius est mendaciū, quippe quòd illa, si multum, temporarium tantum periculum, hoc autem perpetuum exitium creet. Discamus igitur fugere mendacium, non aliter quàm satanam ipsum, & loqui veritatem. Vide etiam suprà in explicatione Psalmi vndecimi de Sycophantis.

42. *Reddunt mihi malum pro bono, orbitatem animæ meæ.*

Tertia causa, cur Pontifices & Pharisei execratione & ignominia digni sint: Rependunt (inquit) mihi malum pro bono, sterilitatem videlicet seu orbitatem animæ meæ. In Gen. cap. 42. & 43. cū Patriarcha Iacob summas suas in hoc seculo ærumnas significare vellet: Absq; liberis, inquit, me esse fecistis. Et iterum: Ego quasi orbus absque liberis ero. Similiter Esa. 47. cum Deus minaretur Babylonico Imperio extremam maledictionem: Nunc audi hæc, inquit, delicata, & habitans confidenter, quæ dicis in corde tuo: Ego sum, &
non

*Matt. 21.
Luc. 20.*

non est præter me amplius, non sedebo vidua, & ignorabo sterilitatem. Venient tibi duo hæc subito in vno die, sterilitas & viduitas. Sic & in hoc Psalmo, cum Spiritus sanctus significaret Pontifices & Phariseos rependere Christo pro summo beneficio, summum maleficium, affirmat ipsos reddere animæ suæ sterilitatem seu orbitatem, quod tanto odio grassentur in ipsum, vt nō solum cogitēt eum tollere de terra viuientium, verum etiam ita extirpare, vt nullam perpetuò habeat posteritatem, nec vlla reliqua maneat nominis eius memoria. Hoc illud est, quod apud Matthæum & Lucam dicunt coloni: Hic est hæres, venite occidamus eum, & occupemus hæreditatem eius. Sed audiamus nunc commemorationem beneficiorum, quæ Christus contulit in populum suum Israëliticum, vt cognita beneficiorum magnitudine, cognoscatur etiam magnitudo ingratitude & immanitatis populi.

13. *Ego, cum egrotarent, inducbam saccum, affligebam ieiuniis animam meam, & precationem meam (pro ipsorum salute) roto pectore iterabam.*
14. *Incedebam, quasi qui summum amicum & fratrem lugerē, incuruabar tristis, quasi qui luctu matrem prosequeretur.*

His duobus versiculis exponit Christus insignem suam beneuolentiam, qua populum Israëliticum, Pontifices & Phariseos complexus est. Non est quidem indutus sacco (qui est argumentum mœroris) coram hominibus, nec occupatus fuit alijs externis & solennibus publici luctus signis, qualia solent fieri in funeribus parentum aut amicorum. Commemoratione autem &

metaphora

metaphora harum cōsuetudinum significat, se populū
 Israëliticum summa charitate, & inestimabili beneuo
 lentia persecutum esse: vt omittam, quantum (vt ita di
 cam) doluerit, cū Israëlita in Aegypto affligerentur, &
 postea in Babylone captiui detinerētur, vt per Prophe
 tam exclamaret: Zelatus sum Hierusalem, & Zion, ze- *Zacha. 1.*
 lo magno, & ira magna ego irascor super gentes opulen
 tas. Illud tantū in præsentia cōmemorabo, quòd ad vin
 dicandum populū Israëliticum, adeoq; humanū ipsum
 genus, à tyrannide peccati, satanæ, mortis & inferni de
 scenderit è cælo, & assumpserit carnem, ac suscepit
 omnes humanas imbecillitates, adeoq; probrosissimā
 mortē crucis. Hoc verè est affici aliena calamitate, in
 duere videlicet saccū, affligere animam suam ieiunio,
 & lugere, quāsi in funere charissimorum parentum &
 suauissimorū liberorum. Hac beneuolentia Christi ni
 hil potest maius excogitari, hoc beneficio Christi nul
 lum potest dici excellentius: Vix pro iusto quispiam,
 inquit Paulus, morietur, Christus autem, quum adhuc *Rom. 5.*
 essemus infirmi, iuxta temporis rationem, pro IMPIIIS
 mortuus est. Et Ioannes: Per hoc (inquit) cognouimus *1. Ioan. 3.*
 charitatem, quoniam ille animā suam pronobis posuit.
 Ac rursus: In hoc est charitas, quòd nō nos dilexerimus *1. Ioan. 4.*
 Deum, sed quòd ipse dilexerit nos, & miserit filium suū
 propitiationem pro peccatis nostris. Habes summam
 Christi beneuolentiam, audiamus vicissim summā Pō
 tificum & Pharisæorum ingratitude.

15. *In claudicatione mea latantur, congregantur, congregan
 tur, inquam, cōtra me claudi ex improviso, proscindus (me)
 sine intermissione.*

16. *Vnâ cum dolosis subsannatoribus, frusto panis cōductis, frendunt contra me dentibus suis.*

Ego quidem, inquit Christus, confero in eos omnia genera summorum beneficiorum, ipsi autem vicissim latantur & exultant in claudicatione mea, (hoc est) in aduersis meis, in motibus meis, & in ærumnis meis. Si crus fregero, (hoc est) incommodū aliquod accepero, mirū, quā gestiant, quā tripudiant: nec id solum faciunt manifesti mei hostes & Pontifices, verum etiam claudi, hoc est, claudicantes in vtramq; partē, qui nunc meo Euangelio applaudunt, nunc Pharisaicam doctrinam probant. Conueniunt frequentes, frequentes, inquam, conueniunt aduersus me, præter omnem expectationem, & nulla prorsus à me iniuria affecti, vnâ cū histrionibus, scurris, ioculatoribus, parasitis, a deo q; cū vilissimis quibusq; nebulonibus, qui vel frustulo panis se ad prodendā patriam ipsam conduci paterentur. Hi frendunt in me dentibus suis, & proscindunt me extremis conuicijs: vident enim se execrationibus suis officium Pontificibus gratissimum facere. Non est autem opus, vt diu circumferas oculos, vbi nam hæc in Christo impleta sint: intueri mihi historiam passionis eius, & videbis non solū seruum dare alapam Christo ante tribunal Pontificis, vt Domino suo gratificaretur, verum etiam cateruam illorum nebulonū & scurrarum quibus traditus est Christus noctu illudendus & conspuendus, qui etiam velatis oculis & percussis maxillis eius, vociferantur: Vaticinare nobis Christe, quis te percusserit? In cruce quoque pendentem omni genere opprobrij lacerant: Si est Rex Israël (inquiunt) descendat

scendat nunc de cruce, & credemus ei: alios saluos fecit, seipsum seruare non potest. Quam hanc putas esse contumeliam? certè incredibilis fuerit, necesse est, quòd eam tot antè annis, Spiritus sanctus in Christum venturam præuiderit & adnunciarit. Quantò enim tenerior est animus hominis corpore eius, tãtò grauiore fuerunt hi affectus animi in Christo, quàm transfixio clauorum in manibus & pedibus corporis eius. Visum autem est Spiritui sancto, hæc multis annis antea prænunciare, partim vt cum præter alia argumenta & testimonia Prophetarum, etiam hoc in Iesu filio Mariæ impletum esse cognosceremus, certò sciremus, quòd Deus hunc Iesum, quem vos Iudæi (inquit Petrus) crucifixistis, DOMINVM & Christum fecerit: partim vt intelligeremus, quantis doloribus constiterit Christum expiatio peccatorum nostrorum, & excitaremur ad fugienda peccata, & ad testificandam animi nostri gratitudinem erga tantum benefactorem, quoquo officij genere possumus.

17. *Domine quamdiu conniuebis? Eripe animam meam à fremitu eorum, à catulis leonum vnicam meam,*

Cômémorationi ingratitudeis Israëlitarum addit precationem: Domine, inquit, quamdiu conniuebis? quamdiu aspicias tantam populi ingratitudem & contumeliam, ac non vindicas? At enim, hæc magis videtur (inquies) acerba expositulatio, quàm pia & humilis precatio. Sed aliud est, ex impia cordis amarulenta, aliud ex pia animi imbecillitate, cum Deo expostulare. Impia expositulatio est, cum Hypocritæ apud Esa.

cap. 58. dicunt. Quare ieiunauimus, & non aspexisti? humiliauimus animas nostras, & nescisti? Hypocritæ enim non confidunt gratuita Dei clementia, sed meritis suæ ipsorum iustitiæ, & nisi Deus propter hæc voluntati eorum satisfaciat, iudicant eum iniquum. Querela igitur & expositulatio eorum, non est ex imbecillitate fidei, sed ex virulentia incredulitatis. Expositulatio autem pia extat in Psalmo 13. Vsq; quò DOMINE, obliuisceris mei perpetuò? vsq; quò abscondis faciem tuam à me? Et in Psal. 44. Exurge, quare obdormis DOMINE? exurge, & ne repellas perpetuò. Quare faciem tuam auertis? obliuisceris inopiæ nostræ & tribulationis nostræ? In eundem catalogum pertinet etiam querela & expositulatio huius Psalmi: DOMINE, quamdiu conuinebis? Christus enim filius Dei, non expositulat cum Deo in hoc Psalmo amarulenter, sed obedienter, non arrogiter, sed humiliter. Tamen si autem tales expositulationes oriuntur in reliquis hominibus, quamuis pijs, ex imbecillitate fidei, & sunt cum peccato coniunctæ, tamen quia Christus nullum vnquam peccatum fecit, nec est inuentus dolus in ore eius, idcirco expositulatio eius non oritur ex peccato, sed tantum ex obedientia, qua ad vocationem Dei patris sui exinaniuit se forma Dei, & assumpsit formam serui. Quare, Christus obedientia sua peccatū ita expiauit, vt etiam si expositulatio priorum, credentium in Christū, coniuncta sit cum peccato, tamen peccatum non imputatur eis propter Christum. Ceterum, vt sciamus hanc querelam, qua Christus in hoc Psalmo cum patre suo expositulat, non esse inobedientiæ, sed obedientiæ, vertit se illicò ab expositulatione ad precationem: Eripe, inquit, animam meam

meam à fremitu, videlicet, leonum, seu Pontificum & Phariseorū, qui instar leonum in me innocentem grassantur, & vnicā meam, (quo nomine intelligitur etiam ipsa anima seu vita, idcirco vnica dicta, quod videatur omni tam diuino quā humano auxilio destituta) à catulis leonum, hoc est, turbis Iudæorum, qui tam crudeliter in me sæuiunt. Cum hoc versiculo cōuenit, quod Christus etiam in Psāmo 22. dicit: Erue à gladio animā meam, & de manu canis vnicam meam. Salua me ex ore leonis, & à cornibus vnicornium libera me. Quod ergo gratitudinis officiū præstabis mihi, si eripuerō animam tuam à fremitu leonum, & vitam tuam à catulis leonum? Sequitur.

18. *Gratias agam tibi in Ecclesia magna, in populo ingenti laudabo te.*

Hoc prorsus illud est, quod in Psāmo 22. dicit Christus: Narrabo nomen tuum fratribus meis, in medio Ecclesiæ laudabo te. Et mox: Te laudabo in Ecclesia magna, vota mea reddam coram ijs, qui timent te. Quod autem in his Psalmis se facturum recipit, hoc apud Evangelistam Ioannem testatur, se in eo esse, vt impleat & *Ioan. 9.* absoluat: Ego te, inquit, glorificauī super terram, opus consummaui, quod dedisti mihi vt facerem. Ac mox: Manifestaui nomen tuū hominibus, quos dedisti mihi de mādo. Et rursus: Sicut tu me misisti in mundum, ita & ego misi eos in mundum. In hoc enim patefactum est nomen DOMINI Dei nostri, quod Christus filius Dei non solum prædicauerit Euangelion suum in Ecclesia Israelitarum, verū etiam miserit Apostolos suos, vt

adnunciarent Euāgelion in vniuerso orbe inter omnes gentes, & colligerent magnam & ingentem Ecclesiam tam ex populo circumciso, quā in circumciso, quę ecclesia celebraret nomen Dei perpetuò. Ex Euangelio enim, quòd Christus inter Iudæos adnunciavit, & quòd Apostoli in nomine eius inter omnes gentes diuulgauerunt, cognoscitur & illustratur nomen & gloria potentie, sapientie, bonitatis, clementie & paternę beneuolentie Dei, videlicet, quòd erga omnes, qui credunt in Christū, ita sit affectus, vt cōdonet eis omnia peccata, adoptet eos in filios & hæredes suos, seruet eos in omnibus aduersis, adeoq; in morte ipsa, & doloribus inferni, ac tribuat eis cœlestem hereditatem, & perpetuam felicitatem. Quare, cū Christus recipiat se pro acceptis beneficijis, gratias acturū Deo patri in Ecclesia magna & populo multo, hoc est, se vulgaturū Euangelion suū, in quo nomen Dei illustratur inter omnes gentes, haud obscurè significat, quòd non sit cultus Deo gravior, nec sit organon Spiritus sancti commodius, quā prædicatio Euangelij Christi, quo & gloria nominis Dei illustratur, & homines ad verā Dei cognitionem, ad fidem, ad spem, ad omnia virtutū genera, ad æternam deniq; vitam consequendam (potentia siquidem Dei est, vt Paulus ait, ad salutem omni credenti,) excitentur.

19. *Non latentur de me illi, qui sunt inimici mei immerito, nō irideant me nutu oculi, qui me odio habent gratis (vel sine causa).*

Hic est versiculus ille, quem Christus apud Euangelistam Ioannem allegat, & haud obscurè significat, hūc Psalmum de se ipso, *κατὰ τὸ ῥητόν*, dictū esse. Redit autē ad pre-

ad precationem, & orat patrem, vt se ijs, qui nulla prorsus iusta causa odio ipsum habent, & hostiliter persequuntur, non propinet deridendum, & nutibus oculorum suorum subsannandum. Non illud orat, vt omnino non irrideatur, ipse enim sua sponte se humiliavit, & illudendum præbuit, sed orat, vt inimici non absoluant lætitiā suā, quā ex aduersus eius cōceperunt, nec fiant compotes illius finis, ad quem irrisione & subsannatione sua tendunt: sperāt enim, quod cum iam sit expositus omni generi ærurnarū, necesse habeat omnino & perpetuū interire, quod etiam risu & nutu oculorum suorum respiciunt. Petit igitur, vt hac sua spe frustrentur & pudeant, (hoc est) petit vt è tantis aduersis *Ioan. 17.* saluus euadat. Nam, quemadmodum orans pro Apostolis: Non rogo, inquit, vt tollas eos de mundo, (hoc est) vt confestim transferas eos ex hac vita in cœlestem beatitudinem, quod nihil calamitatis in hoc mundo patiantur, sed vt serues eos à malo: affligantur sanè, & malis afficiantur, sic enim comparatum est, vt qui piè volunt viuere, persecutionem patiantur, sed in his malis seruentur, ne pereant: ita. & in hoc Psalmo non orat, vt prorsus non irrideatur, & ludibrio habeatur, sed vt in his ludibrijs & contumelijs, ad cœlestem & æternam gloriam diuinitus conseruetur. Cum ergo hic dicitur, quod aduersarij Christi habeant ipsum odio gratis, sine causa & immeritò, sciamus prædicari innocentiam Christi, & cognoscamus peccata nostra verè & perfectè coram Deo expiata esse. Non potuerunt enim expiari, nisi ab homine innocente, & ex omni parte iusto, qualis præter Christum, nullus in vniuerso humano genere inuentus est. Deinde obseruemus exemplum precandi,

candi. Non precatur Christus; vt prorsus, sicut antè aliquoties dictum est, nō irredeatur, sed vt consilium irrisoris, æternum exitium meditantis, non succedat. Hoc exemplum sectandum est, Non enim inuocandus est DOMINVS, vt nulla calamitate, nulla ærumna in hoc seculo affligamur, sed vt in calamitate, cui tam pro communi sorte humani generis, quàm pro cōditione sectandæ & profitendæ veræ pietatis obijci solemus, non succumbamus, & vt Deus det euentum, quo ferre queamus. Ac fieri quidem præ carnis nostræ imbecillitate non potest, quin vitam in hoc seculo absq; omni corporali cruce agere affectemus, sed quia Christus suscepit in se, præter alias etiam hanc imbecillitatē, idq; absq; peccato, vt, cum in monte Oliueti inuocaret patrē, & diceret: Transeat à me calix iste, idcirco impetrauit nobis condonationē huius peccati, vt non imputetur nobis, si modò iuxta Spiritum, non iuxta carnem ambulemus, (hoc est) si & nos exemplum Christi sectemur, & quod ipse fecit, seriò & ex vera fide faciamus, ac dicamus: Non quod ego volo, sed quod tu vis: & subijciamus voluntatem nostram diuinæ.

20. *Qui non loquuntur pacem, & excogitant fraudulenta consilia aduersus tranquillos terræ.*
21. *Et dilatant aduersus me os suum, exclamant, Euge, euge, (hoc est) optimè, optimè, oculi nostri summa cum voluptate aspiciunt (hanc calamitatem.)*

Vbi nos legimus: Non loquuntur pacem, ibi Græcus legit: *Εμοι μὲν ἐργονικαὶ ἐλάδω*, & Latinus: Mihi quidem pacifica loquuntur, sensu prorsus contrario. Hoc autem

autem inde adeo euenit, quòd Græcus interpres pro eo quod est in Hebræo לֹא lo, & significat non, legit לֵלִי, quod significat mihi. Ac postea, vbi nos transtulimus: Aduersus tranquillos terræ, Græcus legit, ἐπ' ὄργην, & Latinuseum secutus: In iracundia. Nam quod apud Hebræos est רִיגָה Rigah, & significat quietem, seu tranquillitatem, hoc Græcus legit רִיגָז Rigaz, & significat iram. De qua re visum est studiosos sacrarum literarum aliquoties in hac Psalmorum explicatione admonere, vt sciant, quantum ad scripta Prophetica & Apostolica rectè intelligenda referat, suam operam in cognoscēda Hebræa & Græca lingua impendere. Recitat autem in his duobus versiculis causam, cur Deum patrem tanta seueritate aduersus Pontifices & Phariseos, inimicos & osores suos, inuocet: Quia non loquuntur, inquit, pacem. Pax, pro Hebræo more, significat salutem, & omnia genera bonorum, siue corporaliū, siue spiritualiū. Cum igitur dicit, aduersarios suos non loqui pacem, sed potius excogitare fraudulenta consilia cōtra tranquillos terræ, docet eos meritò maledici, quod nullam prorsus populi salutem quærant, sed consilijs suis cogitent fraudulenter opprimere, & perdere Christū & Apostolos eius, qui tamen sunt tranquilli terræ, hoc est, illi, qui Euangelio suo veram & æternam salutem ac tranquillitatem omnibus hominibus in hac terra offerunt. Inprimis autem dilatant, inquit Christus, aduersus me os suum, irrident me, execrantur me, & cum vident me capi, percuti, flagellis cædi, crucifigi & mori, exclamant, Euge, euge, (hoc est) optime, rectissimè, (est enim vox lætantis, seu sibi applaudentis & cohortantis quoq;) nunc res optimè geritur, nunc res ex ani-

Q

mi

mi nostri sententia succedit, quòd videamus de ipso profusus actum esse, quare nihil potuisset nobis iucundius & gratius accidere. Reuocatur autem nobis toties grauitas passionis Christi in memoriam, vt sciamus quanti constiterit expiatio peccatorum nostrorū. Quid enim acerbius potest honesto & innocēti homini accidere, quàm in summis suis aduersis & doloribus mortis ac inferni, non solum non habere amicum, qui cōpatiatur & consoletur, verū etiam ab ijs, quos omni genere beneficiorum affeceris, irrideri, & conuictijs maxima animi ipsorum voluptate proscindi? Cum igitur Christus susceperit in se hanc doloris acerbitem propter nostra peccata, reputa tu ipse cum animo tuo, quātam vicissim gratitudinem ei debeas?

22. *Tu vides Domine, ne obmutescas, Domine, ne procul absis a me.*
23. *Expergiscere, & euigila ad iudicium meum, Deus meus, & Domine meus ad causam meam.*
24. *Iudica me secundum iustitiam tuam, Domine Deus meus, ne gaudeant de me.*
25. *Ne dicant in cordibus suis, Euge anima nostra, (hoc est, optime, & hoc volebamus) ne dicant, deuorauimus eum.*

Expositis opprobrijs, quibus Christus in passione sua affectus est, reuertitur ad precationē: Tu vides DOMINE, inquit, si iniuriæ, quibus afficior, tibi incognitæ essent, si nō coram oculis tuis paterent, quid mihi spei, quid salutis esset relictum? Nunc autem, o me felicem, omnia tibi cognita sunt & perspecta. Nam si capilli capitis mei numerati sunt, nec vnus eorū cadit de capite absq; tua voluntate, quomodo tam cōtumeliosa opprobria

bria possent, nesciente te, & nō vidente ac audiente, in
 me proijci? Dixisti quondā de me ab initio huius seculi, *Gen. 3.*
 quòd contritus essem caput serpentis, quòd benedi-
 cendæ essent per me omnes gētes, quòd vcturus essem *Gen. 22.*
 Silo, hoc est, populorum saluator, quòd positurus esses
 verba tua in ore meo, vt qui nō obediret, tu vindicares,
 quòd tu esses mihi in patrem, & ego tibi in filiū, quomo-
 do igitur in præsentia nō videres, quid mihi accideret?
 & quanta contumelia turpificarer? Quæso ergo te DO-
 MINE Deus pater meus, vt non taceas, nō obmutescas,
 non conniueas, non cuncteris, nō longius à me ope tua
 discedas, non me deferas in tātis periculis, sed expergi-
 scaris, & euigiles, ac præsenti tuo auxilio testificeris,
 quòd susceperis causam meā, quam habeo aduersus ho-
 stes meos, dijudicandam & tuendam. Non peto, vt sen-
 tentiam pro meo ipsius arbitratu, sed pro TVÀ iustitia
 feras: nec cōmittas, vt gratulentur sibi contra me de fe-
 lici suo successu, & glorientur se prostrauisse me, & radi-
 citus extirpasse: sed re ipsa declares, gaudium & iactan-
 tiam eorum esse extremam vanitatem. Quod aut petijt
 Christ⁹, hoc etiā à Deo patre suo impetrauit. Et si enim
 crucifixus est & mortuus, vt aduersarij eius viderentur
 victoriam reportare, tamen in tantum nō periijt in mōr-
 te, vt tertia die resurgeret, & in summam maiestatem ex-
 tolleretur, ac cōsequeretur nomē, quod est super omne
 nomen, vt in nomine eius omne genu se flecteret: cum
 è contrā aduersarij eius in extremā internitionem con-
 iicerentur. Nec sibi tantum victoriā cōsecutus est, sed
 etiā nobis, vt quotquot in ipsum credimus, in ipso quo-
 que, quicquid accidisset, conseruāremur: In mundo, in
 quit, afflictionē habetis: sed bono animo sitis, EGO VI-
 CI MYNDYM.

26. *Pudescient & erubescant simul, qui voluptatem capiunt ex afflictione mea, induentur erubescencia & ignominia, quot quot erigunt se aduersus me.*
27. *Exultabunt autem & latabuntur, quibuscunq; placet iustitia mea, & dicent semper: Magnificetur Dominus, cui placet, vt pacem habeat seruus suus.*

Post precationem cōmemorat cōlestem sententiā, quam Deus contra impios hostes Christi, & pro pijs, credentibus in Christū, tulit. Quid multis, inquit, opus est? quot quot voluptatem capiunt ex malis & aduersis meis, pudescient vel tandē, & vnā omnes perpetuò erubescant. Nam, quemadmodū homo quispiā in magno frigore vestimentis ita inuoluitur, vt nulla ferē corporis pars nuda appareat, ita impij & hostes Christi, erubescencia & ignominia in tantum obruentur, & quasi induentur & inuoluentur, vt nihil prēterea sani in ipsis cōspiciatur. Contrā verò pij, quibus mea (inquit Christus) iustitia placet, & qui mea iustitia delectantur, (hoc est) qui credunt se coram Deo non suis ipsorum meritis, sed mea solius iustitia iustificari, consequentur æternum gaudium & lætitiā, ac laudabunt DOMINVM Deum perpetuò, quòd visum sit ipsi conferre in Christum seruum suum pacem, hoc est, omnem salutem & benedictionem, qua etiam pij ad omnem æternitatem fruentur. Cæterū, quod Christus nōdum incarnatus verbis huius Psalmi dicit, hoc postea incarnatus, & in cœlum ascensurus suis verbis ad Apostolos ait: Ite in mundum vniuersum, prædicate Euangelio omni creaturæ. Qui crediderit (Euangelio) & baptisatus fuerit, seruabitur, qui verò non crediderit, condemnabitur.

Credere

Credere enim Euangelio Christi nihil aliud est, quàm agnoscere iustitiam Christi, & delectationem in ea habere, vt propter eam consequamur condonationē peccatorum, & habeamus æternam lætitiā & exultationem. Non credere autē Euangelio Christi, est Christo insultare, arguere eum mēdaci, & si quid aduersi ei acciderit, summam voluptatem capere. Continet etiam hic 27. versiculus cōciunculā de iustitia fidei in Christum, quam Paulus scribens ad Romanos cap. 1. 2. 3. & 4. copiosè explicat. Cum enim placeat, seu visum sit Deo patri, vt Christus seruus eius (hoc enim cognomen tribuit Christo etiam Esaïas, quòd exinaniuerit sese, forma serui assumpta,) habeat pacē (hoc est) plenitudinē iustitiæ, salutis, & omnium bonorum, dubium non est, quin perfundat etiam iustitia & salute omnes eos, qui credunt in ipsum, vt iustificentur coram eo ex fide, & consequantur cœlestem salutem: De plenitudine eius, inquit Ioannes, nos oēs accepimus, gratiam pro gratia.

Esa. 43.

28. *Lingua mea pradicabit iustitiam tuam, & laudem tuam omnibus diebus.*

Non solū credentes in me laudabunt & magnificabunt DOMINVM, propter beneficia, quę in ipsos per me cōfert, verū etiam ego ipse declarabo me gratum, Lingua enim mea prædicabit & vulgabit iustitiam, probitatem, bonitatem, beneuolentiam, clemētiā & misericordiam tuam, DOMINE Deus pater meus, & laudabit nomen tuum omnibus diebus, quòd recipias omnes credentes in me in gratiam propter me, & condones eis peccata sua gratis, sine vllō ipsorum merito,

ac adoptes eos in filios, & hæredes omnium cœlestium bonorum. Habes iterum vaticinium de diuulgatione Euangelij Christi in vniuersum orbem terrarum, qua diuulgatione prædicatur iustitia, probitas, & beneuolentia Dei erga credentes in Christum, & laudatur nomen Dei omnibus diebus vsq; ad consummationem seculi.

VSUS HVIVS PSALMI.

Ostendimus literam huius Psalmi non de Dauidis, sed de DOMINI nostri Iesu Christi passione cõcionari. Et tamen ea est inter Christum & inter omnes qui in Christum credunt cognatio, vt hæc concio nõ tantum in Christum, verum etiam tam in Dauidem, quàm in ipsos quosuis, qui sunt membra Christi, suo gradu competat. Primum enim quæ passiones seu afflictiones in Christum venturæ, iam inde ab orbis conditione, cum ad serpẽtem dicebatur: Tu insidiaberis calcaneo eius, prædictæ fuerunt, hæc etiam ad credentes in Christum pertinent: Quos præcognouit, inquit Paulus, hos etiã prædestinauit, vt conformes fierent imaginis filij sui, vt sit ipse primogenitus in multis fratribus. Et Petrus: Si benefacientes suffertis, hæc est gratia apud Deum. In hoc enim vocati estis, quia & Christus passus est pro nobis, relinquens nobis exemplum, vt sequamini vestigia eius. Quare sentiamus eas passiones, quæ de Christo Ecclesiæ suæ capite, prædicatur, pertinere etiã ad membra corporis sui, (hoc est) ad credẽtes in ipsum. Pertinere autem nõ fructu tantum expiationis peccatorũ, sed exemplo quoq; vt quemadmodum ipse varijs ærumnis afflictus est, ita & nos in hoc seculo affligamur. Deinde passiones

passiones Christi pertinent etiam hac in parte ad Ecclesiam eius, quod quem euentum habuerunt in Christo, eundem etiam habituræ sunt in omnibus credentibus in Christum. Manifestum autem est, quod euentus passionis & mortis Christi, nō fuerit interitus, sed resurrectio à morte, & exaltatio eius in summam sublimitatē. Quare eundem euentum habituræ sunt, pro sua conditione, omnes piorum afflictiones: Cohæredes (inquit Paulus) sumus Christi, si tamen cum eo patimur, vt & conglorificemur. Et aliàs: Si commortui sumus, & conuiuemus: si sufferimus, & conregnabimus.

Rom 8.

2. Tim. 2.

PSALMV SXXXVI.

Dixit iniustus, vt delinquat in semetipso, &c.



Id Psalmus diuiditur in tres partes. In prima continetur descriptio ingenij impiorum Hypocritarum, siue Ecclesiasticorum siue politicorum. In secunda continetur descriptio immensæ bonitatis & gratuita clementiæ Dei. Tertia est precatio.

Et si autem Dauid nullum hominem in prima huius Psalmi parte, nominatim perstringit, tamen verisimile est eum proposuisse sibi ob oculos, Saulem regem Israel, qui fuit impius & insignis Hypocrita, & tamplisè ab ipso *τύπος* & imaginem, ad describendum impij Hypocritæ ingenium. Videbatur enim Saul, initio sui imperij,

perij, magna non solum fortitudine, verum etiam pietate præditus. Initurus prælium cum Amalecitis, faciat Deo singulari studio, ut det felicem belli eventum.

1. Reg. 13. 1. Reg. 15. Victoria tam humaniter & pie vitur, ut non victo tantum Regi, verum etiam optimis gregibus parcat: idque non in priuatam suam utilitatem, sed in cultum Dei, ut ex ijs gregibus publica fierent sacrificia in honorem Dei, & ut gratiæ Deo pro beneficio victoriæ agerentur.

1. Reg. 14. In persequendis Philistinis tanta cura continet exercitum suum in sobrietate & ieiunio, ut etiam nomen Dei iuret, ne quis quocumque cibo vescatur, donec victoria absolatur. Et cum casu quodam Ionathas filius eius paululum tantum mellis gustaret, ea est seueritate in seruando suo iuramento, ut maluerit dilectissimum suum filium, futurum imperij sui (ut ipse quidem sperabat) successorem, morte condemnare, quam nomen Dei violare. Quanta hæc est pietatis species? Sed lateat interim in recessu cordis summa impietas & contemptus Dei. Hoc exemplum, & id genus alia ponit sibi Dauid ob oculos, & adumbrat ex his ingenium impiorum Hypocritarum, ut doceat non esse de hominum pietate, iuxta externam speciem iudicandum, nec promissis eorum fidendum, sed operam summam dandam, ut verè in DOMINO renascamur, & solis DOMINI Dei nostri promissis fidamus.

1. *Dixit scelus impij, in medio cordis mei: Non est timor Dei coram oculis eius.*

Propositio primæ partis huius Psalmi, qua propositione

tione Dauid exponit de impijs Hypocritis non esse iudicandum, iuxta externam pietatis eorum speciem, sed iuxta omnia reliqua ipsorum dicta & facta: vt si contuleris opera eorum cum specie, qua alios longè antecellunt, inuenies eos tantū adesse à vero timore Dei, quantum distat cælum à terra: Ego ipse, inquit, cum externa sacrificia Saulis & aliorum Hypocritarum intuerer, & in specie eorum hærerem, non potui aliter arbitrari, quàm ipsos esse verè pios, ac Deum ex animo colere, & quicquid verbis pollicerentur, re ipsa inuiolatè præstare: sed cum diligentius expenderem alia eorum tū dicta tū facta, non potui mihi imperare, quin pronunciam eos esse impios. Ipsa eorum scelera, tecta quidē hypocrisi, sed quæ pressius intuenti facilè in oculos incurrebant: dicunt in corde meo certissimum testimonium, quòd non verè timeant & colant Deum. Non est opus, vt alij homines testificètur mihi de impietate Hypocritæ, siue Saulis, siue aliorum, sed ipsum eius scelus, ipsa crudelitas, sufficiens fert in corde meo testimoniū, quòd nullus sit in animo eius verus timor Dei, nullus verus cultus Dei, nulla vera fides in Deum, & nulla vera charitas in proximum. Quid autem profuerit, honestissimam habere pietatis speciem, & interim gestare animum omni vera fide & charitate vacuum?

Cæterum, quos impios Hypocritas Psalmus dicit à sceleratis suis operibus prodij & conuinci, hos postea Christ⁹ affirmat cognosci à fructibus: *Matth. 7.* Cauete, inquiēs à Pseudoprophetis, qui veniunt ad uos in vestimentis ouium, intrinsecus autem sunt lupi rapaces. *Matth. 23.* A FRUCTIBVS eorum cognoscetis eos. Et iterum: Væ vobis Scribæ & Pharisei Hypocritæ, quia similes estis sepul-

R cris

cris dealbaris, quæ foris apparent hominibus speciosa, intus verò plena sunt ossibus mortuorum, & omni spurcitia. Sic & vos, foris quidem apparetis hominibus iusti, intus autem pleni estis hypocrisi & iniquitate. Et **2. Tim. 3. Ad Tit. 1.** Paulus: Habentes, inquit, speciempietatis, virtutem autem eius abnegantes. Ac rursus: Confitentur se nosse Deum, factis autem negat. Ponamus hominem magna grauitate asseuerantem, se credere futuram mortuorū resurrectionem, & ad hanc testificandā ornare monumentū maiorum suorum, interim autē ducere vitam in ebrietate, imposturis, scortatione, & alijs sceleribus turpissimam. Quid dicemus? Hic certè, quod verbis profitetur, factis ita negat, vt omnes pij in animis suis certò statuere possint, non esse verum timorem Dei, non esse verā fidem de resurrectione ante oculos eius. Hoc prorsus illud est, quod Psalmus dicit, se ex impiorum Hypocritarum sceleribus, certum in corde suo testimonium colligere, quòd non sint veri & synceri cultores Dei.

2. Quoniam blanditur sibi in oculis suis, studet inuenire iniquitatem eius, (videlicet hominis pij) ac reddere eum odiosum.
3. Verba oris eius sunt iniquitas & dolus, renuit doceri, vt bene faciat.
4. Meditatur iniquitatem in cubili suo, insistit in via minimè bona, & malitiam non auersatur.

Propositioni addit rationes, quibus exponit scelera Hypocritæ, quæ de impietate eius testimonium ferunt. Primum enim Hypocrita blanditur sibi ipse in omnibus

bus suis operibus, quicquid agendum suscepit, iactat se in gloriā nominis Dei agere, etiam si manifestè cum verbo Dei pugnaverit. Vide mihi Saulē. Hic pugnaturus cum Amalecitis offert Deo holocausta, ante aduentum Samuelis. Et si autem hoc sacrificiū manifestè pugnat cum verbo Dei, quippe quòd Deus expresso mā ^{1. Reg. 13.} dato iusserat eum non prius sacrificare, quàm Samuel adueniret, tamen defendebat factum, & blandiebatur sibi, quòd sacrificauerit, non in contemptum, sed in honorem Dei, ut cōtineret populum in exercitu congregatum, & victoriam consequeretur.

In trucidando summo Pōtifice & alijs sacerdotibus ^{1. Sam. 22.} & in deuastanda vrbe eorum, ac occidendis omnibus ciuibus, vnà cum liberis & vxoribus ipsorū, designauit Saul extremam crudelitatem, ac tyrānicam immanitatem: & tamen applaudebat sibi, quòd fecisset hoc optimo iure, quippe cui gladius ideo diuinitus sit datus, ut seditiosos è medio tolleret, & publicam trāquillitatem conseruaret, ac exemplum statueret, ne quis postea pacem Reipub. perturbandam temerario ausu susciperet. Vide mihi etiam Pontifices & Phariseos Iudæorum. Hi etsi exercent lanienam manifestè iniquam, in interficiendis innocentibus Apostolis, tamen gloriantur se, ^{Ioan. 16.} eo ipso præstare cultum Deo gratissimū. Habes vnum genus sceleris, ex quo facilè iudicari potest, quòd Hypocrita, etiam si multa sacra, eaq; speciosissima fecerit, non tamen sit verus timor Dei ante oculos eius, ideoq; promissis eius nihil sit fidendum. Deinde, impius Hypocrita non solū blanditur sibi in suis malefactis, verū etiam calumniatur, repræhendit & damnat aliorū benefacta: Studet (inquit) inuenire iniquitatem eius,

1. Reg. 21.

(videlicet pij hominis) & reddere eum odiosum. Scrutatur enim summo studio omnia dicta & facta pij, vt inueniat seu depræhendat in ijs iniquitatem. Calumniatur, & in pessimam partē interpretatur, etiam rectissime dicta, & optime facta eius, vt ipsum omnibus odiosum & inuisum reddat. Habes & hoc ingenium in Saule. Cum enim Dauid diuertisset in fuga sua ad sacerdotem Abimelech, & accepisset gladium Goliathis, etsi fecerat id animo simplicissimo, & necessitate quadā compulsus, tamen Saul, ex proditione Doëgit interpretatur, perinde ac si Dauid & Abimelech contra se conspirassent, & seditionem in regno Israël molirentur. Habes idem ingenium in Pontificibus & Phariseis Iudæorum, contra Christum. Dixerat Christus, reddendum esse Cæsari, quod est Cæsaris, & Deo, quod est Dei: hoc Pontifices ira interpretantur, quasi qui vetuisset Cæsari dare tributum. Eiecerat dæmonia ē demoniacis, hoc sic calumniatur, quod eijceret dæmonia in Beelzebub principe dæmoniorum: idq; eo faciunt consilio, vt reddant eum inuisum apud omnem populum, Testatur & hoc ingenium, quod non sit verus Dei timor ante oculos Hypocritarum, nec sit de ipsis, iuxta dicta vel facta eorum iudicandum.

Ad hæc, verba oris eius sunt iniquitas seu vanitas & dolus. Est & illud impij Hypocritæ ingenium, quod quæcunq; seu docuerit, seu promiserit, vana sint & dolosa. Non est fidendum doctrinæ eius, quia etsi iactat verbum Dei, tamen deprauat sua falsâ sententia aut interpretatione, & quanquam magnifica promiserit, tamen data occasione fallit. Hic mihi iterum intueretur Saulem. Promittit Dauidi, se daturum ei in uxorem filiam suam

suam Merob natu maiorem: Tantummodo, inquit, ^{1. Reg. 18.}
 esto ut fortis, & præliare prælia DOMINI. Sed hæc
 verba ris eius, erant vanitas & dolus. Cogitabat enim
 de Dauide: Non sit manus mea in eum, sed sit super ip-
 sum, manus Philistinorum. Et Merob filia Saulis, data
 est, eliso Dauide, alteri in uxorem. Et quanquam pau-
 lō pōt promittitur ei Michol, quæ & ipsa erat Saulis fi-
 lia, in uxorem, tamē ex hoc erat dolosum. Cogitabat e-
 nim iterum Saul, se hac occasione traditurum Dauide
 in manus hostium ut opprimeretur. Audiamus & alia
 verba Saulis. Intercedit Ionathas pro Dauide apud pa- ^{1. Reg. 19.}
 trem suum Saulem, qui meditabatur Dauide in medio
 tollere, & occidere: Ne pecces, inquit, Rex, in ser-
 uum tuum Dauid, quia non peccauit tibi, & opera eius
 valdē tibi sunt vtilia. Saul igitur placatus voce Iona-
 thæ, iurauit: Viuit, inquit, DOMINVS, quia non oc-
 cidetur, sed hæc verba eius erāt vanissima: paulō enim
 pōt, non tantum ipse nititur Dauide cōfigere lancea
 in pariete, verū etiam cum Dauide manibus eius ela-
 beretur, mittit satellites, qui ipsum ad mortem raperēt.
 Expende etiam mihi, quā multis laudibus ornet Saul
 Dauide, cum cognosceret se à Dauide illasum & in- ^{1. Reg. 24.}
 columen ē manibus ipsius dimissum, vocat eum filiū:
 Nunquid hæc, inquit, vox tua est fili mi? Leuauit
 quoq; vocem suam & flevit: Iustior, inquit, tu es,
 quā ego: tu enim tribuisti mihi bona, ego autem red-
 didi tibi mala. Sed hæc omnia verba Saulis, erant vani-
 tate plenissima. Non enim longē pōt, iterum insidia- ^{1. Reg. 26.}
 tur vitæ eius. Et obserua, quæso, Hypocritæ vanita-
 tem. Et si enim iam secundo in manus Davidis ita tradi-
 tur, ut potuisset impunē occidi, tamen Dauid parcit vi-

ta eius. Quod cum comperisset Saul, virtute Davidis ita delectatus est, vt palam promiserit ei securitatem & reditum: Peccaui, inquit, reuere fili mi David, ne quaquam enim tibi vltra malefaciam: sed hæc omnia erant ficta & falsa, & quod Psalmus ait, verba oris eius erant iniquitas & dolus. Quis igitur pie prudens iudicare potuisset, verum esse in tanta iniquitate & vanitate timorem Dei?

Accedit huc & illud impij Hypocritæ scelus, quod renuat doceri vt benefaciat, repugnat enim pertinaciter omnibus benè monentibus, & vocantibus vel ad re-
 1. Reg. 19. sipiscientiam ab impietate, vel ad meliorem vitam frugē:
 1. Reg. 20 Quoties, obsecro, Saul admonitus est à Ionatha, suo ipsius filio, ne tam crudeliter sæuiat in innocentem Davidem? sed ille non solum surda aure trāsijt, verum etiam lancea sua in admonitorem ipsum grassatus est. Quod exemplum extat in Rege Saule erga Davidem, hoc etiam extat in Rege Zidekia, & vniuerso Hypocritico populo Israël erga Prophetas. Sic enim dicit scriptura in posteriori libro Chronicōp, cap. 36. Zidekias fecit malum in oculis DOMINI Dei sui: nec erubuit faciem Hieremiæ Prophetæ, loquentis ad se ex ore DOMINI. A Rege quoq; Nabuchodonosor recessit, qui adiurauerat eum per Deum, & indurauit ceruicem suam & cor, vt non reuerteretur ad DOMINVM Deum Israël: sed & vniuersi principes Sacerdotum & populus præuaricati sunt iniquè. Et mox: Mittebat autem DOMINVS Deus patrum suorum ad illos per manum nuntiorum suorum, de nocte consurgens, & quotidie commens, eò quod parceret populo & habitaculo suo. At illi subsannabant nuntios Dei, & paruipendebant sermones

mones eius, illud ebantq; Prophetis, &c. hoc illud est, quod Psalmus de Hypocrita ait: Renuit doceri, vt benè agat. Ad hunc Hypocritarum catalogum referri etiam debent, quos Christus apud Matthæum alloquitur: Hierusalem, Hierusalem, quæ occidis Prophetas, & lapidas eos, qui ad te missi sunt: quoties volui congregare filios tuos, quæ admodum gallina cõgregat pullos suos sub alas, **ET NOLVISTI.** Ecce igitur relinquetur vobis domus vestra deserta. Nec mirum, qui enim renuunt doceri, vt respiciant, quomodo ibi verus timor Dei esse posset? Vbi autem non est verus Dei timor, quomodo aut regnum, aut familia, aut domus non collaberetur? *Matt. 23.*

Iam & illud est ingenium Hypocritæ, quod non solum auerfetur pium doctorem & monitorem, sed etiam iniquitatem cumulet iniquitati: Meditatur, inquit Psalmus, iniquitatem in cubili suo, ne noctu quidem conquiescit in strato suo, quin excogitet aliam atq; aliam impietatem, quam si inuenerit, tanta obstinatione, ea via, minime bona insistit, vt nullis consilijs, nullis admonitionibus, nullis rationibus à proposito malitiæ suæ auerti queat. Frons enim meretricis, iuxta Prophetam, facta est ei, erubescere nescit. Quod genus hominum etiam Paul. *ἐπιληυκός*, hoc est, qui dolere desierunt, vocat. Qui autem hoc sunt ingenio, quis non argueret, eos omni vero Dei timore destitutos esse, etiam si specie omnium aliarum virtutum ornati viderentur? Habes *εἰκόνα* & imaginem impij Hypocritæ, quam Spiritus sanctus idcirco nobis intuendam proponit, vt cognoscamus & discamus ex cognitione eius, tam fictos amicos in politia, quàm Pseudopphetas in Ecclesia, qui veniunt ad nos in vestimentis ouium, intus autem sunt lupi rapaces, cauere. *Ephes. 4.*

5. *DOMINE, ad cœlos vsq; pertingit beneficentia tua, & veritas tua vsq; ad nubes.*
6. *Iustitia tua, sicut montes Dei: iudicia tua, abyssus magna, Hominem & iumentum conseruas Domine.*
7. *Quàm preciosa est beneficentia tua Deus, ut filij Adam vmbra alarum tuarum confidant.*
8. *Et inebrientur ex abundantia copia domus tuæ, & torrente deliciarum tuarum potes eos.*
9. *Quoniam apud te est fons vitæ, & in lumine tuo videmus lumen.*

Hæc est secunda pars huius Psalmi. Postquàm enim in prima parte descripsit imaginẽ impij Hypocritæ, & doceret, neq; iuxta externam honestatis eius speciem, a de ipso iudicandum, neque verbis aut promissionibus eius, quamuis prolixis, cõfidendum, quæret quispiam: cur igitur cõfidendum, & in quo fiducia nostra collocanda? Respondet in hac secunda parte, non esse cõfidendum humanis Hypocritarum promissis, sed tantum diuino verbo, & cœlestibus oraculis. Nec esse fiduciam collocandam in meritis nostrorum operum, quæ Hypocritæ & pseudoprophetæ in, immensum extollunt, sed tantum in gratuita Dei bonitate & clementia, cuius plenum est cœlum, terra, & abyssus. *DOMINE*, inquit, beneficentia tua tam latè patet, quàm cœlum ipsum. Quacunq; parte cœlum intuemur, depræhendemus manifesta vestigia & testimonia tuæ gratuitæ bonitatis & clementiæ. In præteritis ætatibus, inquit Paulus, sinebat Deus omnes gentes ingredi vijs suis, quam non expertem testimonij seipsum esse sinebat, dum beneficia conferret, è cœlo nobis dans pluuias, ac tempora

tempora fructifera, implens cibo & lætitia corda nostra.

Deinde: Veritas tua, inquit, vsq; ad nubes. Vbicunque videntur nubes, (hoc est) in toto orbe terrarum, extat constantia, & certitudo tuarum promissionum. Deus promisit quondam Abraham multiplicationem posteritatis suæ, admirabilem liberationem ex Aegypto, & possessionem terræ Canaan. Hanc veritatem tam constanter seruauit & impleuit, vt de ea in toto orbe prædicetur. Deus promisit se è posteritate Abraham & Dauidis missurum Christum filium suum, redemptorem humani generis. Hæc promissio tanta est veritate & certitudine, vt citius cælum & terra interirent, quam vt vana, mendax & falsa fieret. Quod & ipsum suo tempore in toto orbe terrarum, sub omni cælo & nubibus diuulgabitur.

Præterea: Iustitia tua, inquit, sicut montes Dei. Montes Dei dicuntur, iuxta Hebræam phrasin, maximi, altissimi, & firmissimi montes, qui videntur ita fundati & stabiliti esse, vt dum terra steterit, non moueantur, nec aliò transferantur, quorum etiam cacumina videntur ad cælum vsque pertingere. Iustitia autem Dei hoc loco vocatur illa iustitia, de qua Paulus ad Romanos scribens: Iustitia (inquit) Dei, per Euangelion patefit ex fide in fidem. Hæc iustitia est gratuita Dei clementia, qua iuxta Euangelion suum, condonat gratis remissionem peccatorum omnibus, qui credunt in Christum DOMINVM nostrum. Hæc iustitia, hæc clementia, hæc probitas Dei, tam certa, tam firma, tam stabilis est, vt sicut superat certitudine & stabilitate sua maximos & firmissimos quosque montes, ita adnunciabitur per Euan-

gelion in toto orbe terrarum. Et quemadmodum altissimi montes extollunt vertices suos vsq; ad cœlum, ita quicunque hanc iustitiam per fidem accipiunt, exaltantur vsque in cœleste regnum. Vnde & DOMINVS per *Esa. 45.* iam postea dicit: Montes commouebuntur, & colles cōtremiscent, misericordia autem mea non recedet à te, & fœdus pacis meæ non mouebitur, dicit miserator tuus DOMINVS. Dicit & Christus: Ego si exaltatus fuero à terra, omnes traham ad meipsum. Hoc verè est, iustitiâ Dei esse, instar excelsissimorum montium, quibus in altitudinem cœlorum conscenditur.

Adhæc: Iudicia tua (inquit) abyssus magna. Sicut enim iustitia Dei est gratuita eius clementia & bonitas, qua sanctissimè seruat suas promissiones, ac iustificat, (hoc est) condonat omnem iniustitiam ijs, qui credunt in Christum filiū suum, ita iudicia Dei sunt, quibus tueretur credentes in Christum, oppressis & cōiectis in profundum inferni omnibus impijs hostibus & aduersarijs eorum. Qui custodit (inquit alius Psalmus) veritatē in *Psa. 146.* seculū, facit iudicium iniuriam patiētibus. Nam quem admodū abyssus humanocapti imperscrutabilis est, & qui in eā coniiciūtur, descendunt in perpetuū interitū, ita iudicia DOMINI, quibus impij piorū hostes cōdemnantur, & pij ab ipsis liberantur, tanta in impios seueritate exercentur, vt nullus oculus viderit, nulla auris audiuerit, nullus humanus animus cogitare possit, quàm horrenda supplicia impios maneant. Et qui in hanc abyssum dei ciuntur, in tantam profunditatem cadunt, vt nulla spes eis relicta sit redeundi ad superos.

Ac breuiter, tanta est beneficentia Dei gratuita, vt non solum homines conseruet, verum etiam iumenta.

Hoc

Hoc illud est, quod in alijs Psalmis dicitur: Oculi omnium in te sperant DONINE, & tu das illis escam in tempore opportuno. Aperis tu manū tuā, & imples omne animal benedictione. Ac iterum: Qui parat terræ pluviam, qui germinare facit in montibus herbam, qui dat iumento escam suam, & filijs coruorum, qui clamant. Vides ergo hīc sermonem fieri, non de æterna salute, qua soli homines in Christum credentes seruantur, sed de mundana & corporali salute, quā tam homines, quā iumenta, per gratuitam clementiam Dei in hoc seculo, vsque ad definitum suum tempus, salua retinentur. Nam & boues, imò & passerēs, quorum tamen duo vno asse veneunt, Deo curæ sunt. Et si enim hæ bestię non sunt DOMINO Deo nostro eò curæ, vt conseruet eas ad perpetuam felicitatem, sicut homines pios, nec instituat propter eas regna & politias, quò Paulus respicit, cum ad Corinthios scribens: Num boues, inquit, Deo curæ sunt? tamen Deus tantam habet harum animantium rationem, vt ne vna quidem in terram, absque voluntate Dei cadat. Agnoscamus igitur magnitudinem gratuitæ Dei beneficentiæ, quòd non homines tantum, verum etiam iumenta, pro ipsorum conditione, seruet.

Psa. 145.

Psa. 147.

1. Cor. 9.

Sed vt sciamus ingens esse discrimen, quod iam dicebamus, inter hominum & iumentorum salutem, addit Psalmus: Quā pretiosa est beneficentia tua Deus, vt filij Adam confidat tegmine seu vmbra alarum tuarū? Et si enim beneficentia Dei tam latè patet, vt se etiam ad iumenta vsque extendat, tamen extendit se multò pretiosius, illustrius, excellentius & efficacius ad homines. Hi enim, cum collocant in ea fiduciam suam, primū

quidem commorantur securi & tuti in omnibus aduersis, sub vmbra & protectione alarum Dei. Nam, quemadmodum aquila prouocans ad volandum pullos suos, *Dent. 32.* (vt Moses dicit) volitat super eos, & expandit alas suas, vt ab aliarum auium inuasionem & dilaniationem defendantur: ita quotquot adhibent fidem gratuita Dei beneficentiae, quae est in semine Abrahæ, hoc est, in Christo DOMINO nostro promissa, hi tanta cura in tutelam DOMINI suscipiuntur, vt in omnibus afflictionibus, in morte denique ipsa constent, & salui eluctentur. Deinde, qui beneficentia Dei confidunt, inebriantur ex abundanti copia domus Dei, & potantur torrente deliciarum eius. Tanta enim est abundantia beneficiorum in domo Dei, vt merito copiae cornu dicatur, & inebriet omnes, qui ex ea bibunt. Tantus quoque est torrens felicitatis eius, vt ad potum omnibus, qui sitiunt, & aquas ex eo hauriunt, abunde sufficiat. Quoniam, inquit, apud te est fons vite, & in lumine tuo, videbimus lumen. *Esa. 55.* Hoc illud est, quod Esaias dicit: Omnes sitientes venite ad aquas, & qui non habetis argentum, properate, emite, & comedite, venite, emite absque argento, & absque *Joan. 14.* ulla commutatione lac & vinum. Et Christus: Quisquis, inquit, biberit ex aqua, quam ego dabo ei, non sitiet in æternum: sed aqua, quam ego dabo ei, fiet in eo fons aquae salientis in vitam æternam. In his enim tribus versiculis ponit Psalmus describimen inter beneficentiam, quam Deus confert in iumenta, & quam confert in homines. Seruat quidem Deus iumenta corporali salute, & confert in ea beneficia quædam terrena: in homines autem confidentes gratuita eius bonitate, confert tam corporalia, quam spiritualia, tam terrena, quam celestia,

lestra, tam caduca, quā æterna beneficia: defendit eos in omnibus periculis, sicut aquila defendit pullos alis suis: inebriat eos è cornu copię domus suę, & potat eos torrente deliciarum suarum, quia confert in ipsos cœlestia bona, & cumulat in eos perpetuam felicitatē. Nec mirum, quia apud DOMINVM est fons vitę. Hic fons est Christus DOMINVS noster, quem Deus pater misit in hanc terram, vt sit autor vitę & salutis omnium, qui in ipsum credunt. Et additur: In lumine tuo videbimus lumen, Est & illud lumen Christus, de quo Ioan. 1. Ioan. 1. In ipso vita erat, & vita erat lux hominum. Ac mox: Erat lux illa, lux vera, illuminans omnem hominem veniētem in hunc mundum. Et Christus ipse: Ego sum lux mundi, qui sequitur me, non ambulat in tenebris, sed habebit lumen vitę. Hoc autem lumen, de quo in Psalmo dicitur: Videbimus lumen, est iustitia, pax conscientię, & æterna vita ac felicitas. Cum ergo ait: In lumine tuo videbimus lumen, significat, quòd in Christo, per fidem in ipsum, qui est vera lux, consequamur iustitiam coram Deo, quę est remissio iniustitię; pacem conscientię, & cœlestem ac æternam felicitatem. Quid igitur homine gratuita Dei beneficentia, in Christo nobis promissa & exhibita, confidente, felicius? Hęc omnia, quę in his sex versiculis, quos paulò antè recitauimus, continentur, eò respiciunt, vt sint antithesis ad Hypocritarum promissa, & doceant, non horum promissis, sed tantum gratuita Dei bonitate in Christo promissa confidendum. Ab initio enim Psalmi descriptum est ingenium impiorum Hypocritarum, quòd blandiantur sibi in sua impietate, & verba oris ipsorum sint vanitas & dolus. Promittunt quidem

salutem prolixis verbis, sed promissiones eorum sunt vanissimæ & mendacissimæ, non est igitur vlla fiducia in ipsis collocanda. Quæ ergo re confidemus? Nulla alia, præterquam gratuita Dei bonitate, quæ cum declarauerit sese tam in cælo, quàm in terra & abyssu, maxime omnium illustratur in filio Dei vnigenito, DOMINO nostro Iesu Christo, qui solus est fons vitæ & lumen mundi.

10. *Expande beneficentiam tuam ijs, qui te agnoscunt, & iustitiam tuam rectis corde.*
11. *Ne inuadat me pes superbiæ, & manus impiorum non perturbet me.*
12. *In ipso conatu concidant operarij iniquitatis, euertantur, ne possint constare.*

Tertia & postrema pars huius Psalmi, quæ continet precationem. Postquam enim commemorauit & commendauit gratuitam Dei beneficentiam, vertit se precibus suis ad Deum, & orat, vt tam ipse, quàm omnes, qui agnoscunt Deum vera fide, participes eius fiant. Extende, quæso, seu, expande beneficentiam tuam, quæ hactenus descripsi, super omnes te agnoscences, & in te credentes: sed & iustitiam tuam seu veritatem, seruantem promissionis Dei, qua certò condonas peccata gratis propter Christum, expandas, quæso, super rectos corde, hoc est, renatos ex fide, qui soli habent correctum & purum, quippe quod sit fide purificatum. Atque hæc quidem precatio generalis est, pro omnibus pijs. Quod autem peculiariter ad hunc precatorē pertinet, obsecro (inquit) ne inuadat me pes superbiæ, (hoc est)

pes,

pes, seu institutum superborum & arrogantium Hypocritarum, qui præ se quosuis contemnunt & fastidiunt, non conculcet, non opprimat me, nec manus impiorum impellat me, vt cadam & peream. Quod verò ad hostes piorum & operarios iniquitatis attinet, hi potius ibi, in ipso videlicet conatu eorum ita proturbentur, vt constare non queant, sed incidant in foueam, quam mihi effodiunt, & deiiciantur (siquidem imprenitètes fuerint) in perpetuum exitium.

Cæterum, quo consilio Spiritus sanctus inuehatur sæpenuerò in Psalmis grauissimè aduersus impios piorum hostes, & deuoeat ipsos æternis maledictionibus, aliàs sæpè ac multùm explicatum est, & superuacaneum hoc loco repetere. Illud autem in præsentia obseruandum, quòd etsi impij Hypocritæ, & crudeles persecutores piæ doctrinæ diu fruuntur in hoc seculo omni genere corporalium beneficiorum, gloriæ, diuitiarum, potentia, sanitatis, & id genus aliorum donorum, tamen quia extant in Prophetis & Apostolicis scriptis, cœlestia aduersus ipsos iudicia, & Spiritus sanctus interpellat propijs contra impios, in omnibus precibus Sanctorum, sine vlla intermissione, aliquoties quidem obfcuris, aliquoties disertis verbis, idcirco fieri non potest, quin impij, vel tandem è sua felicitate, in æternam infelicitatem proturbentur & detrudantur. Quare nò offendamur prospero impiorum successu, sed quod

Psalmus proximè sequens monet, speremus in DOMINVM, & faciamus,
in festanda vocatione
eius, bonum.

Vsus

VSVS HVIVS PSALMI.

Insigne est, primùm quidem, quòd Psalmus è fructibus impiorum Hypocritarum, ingenuè & confidenter pronunciat, non esse verum timorem Dei ante oculos eorum. Deinde, quòd beneficentiam Dei summis laudibus extollat, vt admoniti Hypocritarum impietate, nō seducamur specie pietatis eorum, sed caueamus nobis ab omni ipsorum doctrina & promissione, magnitudine autem gratuitæ beneficentiæ & bonitatis Dei excitemur, vt sola promissione eius confidamus, etiam si cœlum ruat, & terra dehiscat. Non enim habemus vllam causam, cur de clemētia eius erga nos dubitemus. Si magnitudo & multitudo peccatorum nostrorū nos perturbat, & ad desperationem sollicitat, Christus est, qui omnia nostra peccata in corpore suo super lignum (vt Petrus ait) pertulit & expiauit. Si grauitas periculorū nos perterrefacit, Christ⁹ omnia pericula, adeoque mortē ipsam superauit. Bono igitur animo sitis, (inquit Christus ipse) quia ego, EGO, inquam, vici mundum. Et Ioannes: Maior est, qui in vobis est, quàm qui in mundo.

1. Pet. 2.

Ioan. 16.

1. Ioan. 4.

Psalmus

PSALM. XXXVII.

Noli amulari in malignantibus, &c.

Ec noua, nec insolens est querela
 hominum, quòd cum cœlestiū cor-
 porum motus, quamuis varius, hu-
 mana ratione inuestigari, & in su-
 os Canones conferri potuerit, cur-
 sus humanarum rerum in his terris
 nullo nostro ingenio compræhen-
 di queat. Cùm enim multa alia, tum præcipuè illud mi-
 randum videtur, quòd non tantum eadem aliquoties.
 pio & impio, iusto & iniusto, perfido & perfido, verum
 etià iniqua, & cum iustitiæ norma pugnãtia, ac pio qui
 dem & iusto aduersa, impio autem & iniusto prospera
 accidere soleant. Dicit quispiam ex filijs huius seculi:
 Respice & ad cultus animi, sic nempe pudicum
 Perdidit Hyppolitum non felix cura pudoris,
 At contra illecebris maculosam ducere vitam
 Quem iuuat? Aspice & ad pœnas, & crimina Regum.
 Tereos incesti, vel mollis Sardanapali.
 Perfidiam vitare monent tria punica bella,
 Sed prohibet seruare fidem deleta Sagunthus.
 Viue & amicitias semper cole, crimen ob istud
 Pythagoreorum periit schola docta sophorum,
 Hoc metuens igitur nullas cole, crimen ob istud
 Timon Palladijs olim lapidatus Athenis.

Sed & sacræ literæ de hac iniqua æqualitate conquere
 T
 runtur: *Eccle. 9.*

runtur: Omnibus, inquit, eadem prorsus usu veniunt, iusto & impio, bono & malo, mundo & immundo, sacrificanti & non sacrificanti, sicut bonus, sic & peccator, ut periurus, ita & ille qui abhorret à iuramento falso.

*Homerus.
Cicerolib. 3. de
natu. Deorum.*

Et si autem prudentes huius seculi affirmant eam Rempub. non fore diuturnam, in qua fortis & ignavus eodem honore afficiuntur, & admirantur, qui fiat, quod Deus iustos & iniustos *ἐν τῇ αὐτῇ μοίᾳ* habeat, multò tamen magis etiam in sanctis ipsis hominibus mirandum videtur, ut dixi, quod his felicia, illis autem infelicia contingant.

Zelaui, inquit Psalmus, super iniquos, pacem peccatorum videns.

Quia non est respectus morti eorum, & firmamentum in plaga eorum.

In labore hominum non sunt, & cum hominibus non flagellantur.

Et Hieremias: Quare via, inquit, impiorum prosperatur, bene est omnibus, qui pravaricantur, & iniquè agunt?

Quid enim iniquius, quid iniustius videtur, quam quod Iacob pius exulat, Esau autè impius in patria dominatur? Ioseph pius & castus in squaloribus carceris sortetur, mulier autem impia & adultera splendoribus aulae fruitur? Ioannes Baptista capite plectitur, Herodes cum scortis genio indulget? Dives impius purpura & bysso vestitur, ac epulatur singulis diebus splendide, Lazarus autem pius alget, esurit & sitit?

Quos rerum casus, cum homines suo ingenio intuentur, aut, num sit Deus, qui humanas res curet, dubitant, aut Deum esse, perfricta fronte negant,

Cum

Cùm rapiant mala fata bonos, ignoscite fasso.

Sollicitor nullos esse putare Deos.

Et alius.

Sæpè mihi dubiam traxit sententia mentem,

Curarent superi terras, an nullus inesset

Rector, & incerto fluerent mortalia casu.

Et mox.

Sed cùm res hominum tanta caligine volui

Aspicerem, lætosq; diu florere nocentes

Vexariq; pios, rursus labefacta cadebat

Relligio, causæq; viam non sponte sequebar.

Alterius, vacuo, quæ semina currere motu

Affirmat, magnumq; nouas per inane figuras

Fortuna, non arte regi, quæ numina sensu

Ambiguo, vel nulla putat, vel nescia nostri.

Quid autem pluribus opus? In tanta humanarum rerum varietate, non impij tantùm, verùm etiam pij suas habent cogitationes & tentationes. Et dixi, inquit ille, Ergo sine causa iustificavi cor meum, & laui inter innocentes manus meas, & fui flagellatus tota die, & castigatio mea in matutinis. Quòd si quis in tam grauibus tentationibus non probè munitus fuerit verbo DOMINI, & Spiritu eius, non aliud reliquum est, quàm vt ruat non solùm in contemptum Dei, verùm etiam in omnia genera scelerum: Quia non profertur, inquit Ecclesiastes, citò contra malos sententia, absque timore vllò perpetrant mala filij hominum. Et iterum: Hoc est pessimum inter omnia quæ sub Sole fiunt, quia eadem cunctis eueniunt. Vnde & corda filiorum hominum implentur malitia, & contemptu in vita sua.

Psal. 73.

T 2

Propo-

Proponit igitur Spiritus sanctus nobis Psalmum 37. Noli æmulari in malignantibus, &c. quo hortatur nos ne offensus felicitate impiorum deferamus vocationem Dei, & officium nostrum: ac cōsolatur nos certissimis promissis, vt patienter feramus aduersa, & rectā ire pergamus in via mandatorum Dei. Fore enim, vt & impiorum felicitat euanescat, nostra autē infelicitas permuetur æterna felicitate. Itaq; hic tot⁹ Psalmus exhortatorius est & consolatorius.

Etsi autē *ἐν τῷ* eius versatur præcipuè in tractatione vulgaris illius offendiculi, quòd iustè ac piè negotiantibus in parando victu quotidiano accidere solet, cū vident impostores, defraudatores, & periuros habere prosperum negotiorum suorum successum, parare fibanugis ac imposturis non solūm alimenta necessaria, sed etiam magnam vim diuitiarum, se verò vocationē Dei diligenter sectantes, & negotia sua iustè ac piè administrantes, infelicem agere vitam, ac vix multo sudore posse victum ad propulsandam famem parare: tamen generaliter medetur omnibus generibus offendiculorum, quę pios propter ipsorum infelicitatem, & impiorum felicitatem in his terris perturbant. Quare habendus est pro pharmacopolio, è quo petamus remedium aduersus omnem animi ægritudinem, quæ in nobis ex nostra afflictione, & aliena, eaq; impiorum felicitate excitatur.

Sed priusquam ad Psalmum ipsum explicatione nostra accedamus, nō est oscitanter prætereundum, quòd libuit Spiritui sancto versiculos seu disticha huius Psalmi, non temerè, sed iuxta ordinem literarum Alphabeti Hebraici componere ac recensere, quemadmodum
etiam

etiam fit in alijs quibusdā Psalmis, de quibus suprà Psalmus 25. quibus addēdus erit Psalmus 145. Exaltabo te Deus, &c. Visum autē est Spiritui sancto sic aliquoties quasi ludere, (quod & suprà ostendimus) tūm vt memoriam eorum, qui hęc ediscere cupiunt, adiuuaret, tūm vt susceptum argumētum hac iucunditate, quasi condiret & cōmendaret, tūm etiam, vt tali dispositione constaretur, se esse ordinis amatorem, & confusionis osorem. Sed nunc Psalmum ipsum audiamus.

Non succenseas propter malignos, nec amuleris, propter facientes iniquitatem.

Quoniam tanquam fenum velociter arescent, & quemadmodum viride gramen marcescent.

Psalmus statim in primo versiculo aggreditur rem ipsam, de qua est tractaturus. In hoc enim seculo, homines maligni, versuti, impostores, impij & iniqui, solent prospera seu innegotiationibus, seu in reliquis suis actionibus fortuna uti, & vt Iob ait: Domus eorum securæ sunt, & paratæ, & non est virga Dei super illos. Bos eorum concipit, & non abortit, vacca eorum parit, & non priuatur foetu suo. Et alius Psalmus: Promptuaria eorum plena, et eructantia ex hoc in illud. Oves eorum fetosæ abundantes in egressibus suis. Sed cum alij, qui & pietatem summo studio colunt, & iustitiam pro virili sectantur, hanc impiorum & malignorum hominū felicitatem, suam verò infelicitatem vident, excitantur partim ad iracundiā aduersus Deum, qui ad tantam iniquitatem conniueat, & res humanas negligat, partim ad deliberationem de abiicienda pietate, &

sectandis malis artibus, vt & ipsi prosperum habeant rerum suarum successum. Procedit igitur Spiritus sanctus in medium, & hortatur nos, vt hac impiorum & iniquorum hominum prosperitate nihil perturbemur, nec ad emulationem eorum prouocemur. Noli, inquires, irasci propter malignorum felicitatem, neque deliberes de imitando exemplo iniquorum, propter ipsorum prosperitatem.

Audio quidem, & video, inquires, quid non debeam facere: sed caro corruptior est, quam vt queam tales cogitationes & deliberationes omnino excutere. Quæ soigitur te, vt doceas me rationem, qua hunc affectum, si non radicitus extirpare, at saltem refecare, & compescere possim, ne victoriam ex me reportet, & fructus suos proferat? Si Spiritu, inquit Paulus, facta corporis mortificaueritis, viuetis. Opus igitur est Spiritu sancto, vt cum exurgant in nobis cogitationes & consilia, quæ nos ad impietatem ac iniquitatem sollicitant, compescantur & corrigantur. Benè ergo in præsentia habet, Spiritus sanctus ipse, qui nos hortatur, ne exacerbemur felicitate impiorum, & ne imitemur exempla eorum, porrigit etiam nobis arma, quibus ad resistendum impietati, & ad mortificandam eam vtamur. Addit enim: Quoniam tanquam fœnum velociter arescent, & sicut virens herba marcescent. Hic est gladius Spiritus, quo manu apprehenso, licebit omnem illam impiorum consiliorum vim propulsare. Cùm enim felicitas malignorum hominum sollicitat te ad malitiam & iniquitatem, vicissim cogites, ac probe consideres, quòd ea felicitas etsi magna est, non tamen est diuturna, sed fluxa, caduca, & momentanea. Quod cum

cum multis tam dictis, quàm exemplis cœlestis doctrinæ comprobetur, quemadmodum postea sequitur, voluit Deus hoc etiam in quibusvis virentibus herbis ac graminibus huius terræ pingere. Videas enim herbas & gramina manè multò venustius & iucundius florere, quàm Salomon vnquam in maiestate sua vestitus & ornatus fuit, & tamen si vel sceniseca ea inciderit, vel paulò vehementior solis ardor ea adusserit, mox ita decidunt, ac exarescunt, vt vesperi in horreum ad iumentorum pabula reponantur. Quid existimas ne hoc temerè ac fortuitò fieri? Deus certè, vt est omnipotens rerū omnium creator, ita etiam est sapientissimus earum administrator. Ac proponit quidem aliàs nobis florentes herbas & virentia gramina, vt testificetur suam erga nos liberalitatem, & curam, qua nos complectitur: Qui producit (inquit) in montibus scenum, qui dat iumentis escam ipsorum. Et si Deus gramen agri, quod hodie cum sit, cras in clibanum mittitur, sic vestit, an non multò magis vobis id faciet? Nunc autem proponit ea nobis, vt doceat, felicitate impiorum nihil magis esse caducum.

Itaque flores & gramina agri obijciuntur nobis spectanda, non solum in hunc corporalem vsum, vt alpe-
ctu delectemur, odore perfruamur, & ea vel ad iumentorum pabula refecemus, vel ad morborum medicinā aut decerpamus, aut eradicemus: sed etiam vt concionentur nobis tam de clementia & cura Dei erga pios in ipsorum infelicitate, quàm de seueritate Dei erga impios, in ipsorum felicitate. Tu es diligens & studiosus affectator vocationis Dei, ac summo perè caues, ne cui in emendis ac vendendis mercibus imponas, & tamen

vix tibi reliquus est ater panis, quo famem depellas; cum videas proximum tuum veteratorem nugiuendū. & impostorem tam prospera fortuna uti, ut diuitiæ ei affluant. Quid igitur facias, aut quò te vertas? Tu cœlestem doctrinam & veram religionem tanto studio profiteris, ut ad hoc vnum te natum ac educatum existimes: & tamen necesse habes exulare, pericula vitæ adire, & omnibus rebus indigere, cum interea videas impios cœlestis doctrinæ persecutores dominari, & omni mundana felicitate frui. Quid igitur facias, aut quò te vertas? Huc ad me age, mi fili, Eamus vnà in agrum, En tibi hos flores, en hæc gramina. An putas hæc iumentis tantum in cibum corporis, & non potius etiam tibi in cibum mentis enata esse? Hoc quidem, quod vides nunc virere, & quasi tibi arridere, vesperi, si accesseris, ita marcescet, ut ne aspectu quidem dignū iudices, videlicet hoc vult creatoris sui iussu dicere, quòd impiorum felicitas, etiam si nunc videatur florētissima, tamen mox ita exarescat, ut ea nihil contemptius habeatur. Cur igitur tu ad consequendam talem felicitatem, defereres vocationem Dei, & imitare ris impia & scelerata exempla? Stultitia enim, imò infania, imò furor est, conijcere sese propter momentaneam felicitatem impietate partam, in æternum exitium. Solet latroni morte condemnato lautum conuiuium parari, à quo ad extremum supplicium abducatur. Quæ ergo furis exagitarent eum hominem, quam uis famelicum, qui exemplo latronis suscipiat exercendum latrocinium, ut & ipse tam lauto prandio pascere tur? Sunt autem impij, quamuis in hoc seculo felicissimi, iam sententia ipsa cœlestis iudicis ad perpetuum interitum

teritum condemnari. Quare non est nobis committendum, vthanc felicitatem eis inuideamus, & exempla eorum imitemur, sed potius, vt eorum misereamur, & cōsideratione infeliciſſimæ eorum felicitatis, omnem impietatem detestemur, ac fugiamus. Hæc nobis sunt meditanda & expendenda, vt Spiritus sanctus habeat sua in nobis arma, quibus impios motus carnis nostræ compeſcat, & nos in officio diuinæ vocationis contineat. Sed pergamus in Psalmo nostro, vt quem fructum Psalmo- rum Paulus commendat, Spiritu subinde magis ac magis impleamur. *Eph. 5.*

*Spera in Dominum, & facito quod bonum est, in habita terram.
& quare victum honestè.
Tunc oblectaberis in DOMINO, & dabit tibi petitiones cordis tui.*

Audiuimus, quid in oblato felicitatis impiorum offendiculo, non faciendum sit: audiamus nunc quid in eo sit faciendum: Non succenseas, inquit, nō æmuleris, non inuideas, nec imiteris exempla impiorum. Quid ergo faciam? Sequitur: SPERA IN DOMINVM, & facito quod bonū est, &c. Recitat quatuor præcepta, quibus officium pij hominis describit.

SPERA IN DOMINVM. Non videtur Hypocritis & Epicureis nec abiectior aut contemptior cultus Dei, nec facilius opus, nec vanius institutum, quàm sperare in Deum. Cum enim spes, quæ in animo habetur, non sit illustris in externis hominum oculis, existimāt eam etiam coram Deo floccipendi: & quia putant se suo arbitrio posse spem vel concipere, vel abijcere, ac
V sentiunt

sentiant se spe sua sæpè ac multùm frustrari, iudicant hoc & leuissimum & vanissimum esse, sed longè aliter res habet. Et si enim spes in Deum, non videtur hominibus magnificum opus, tamen coram Deo cultus est maximus & præstantissimus. Nam cum in primo præcepto Decalogi exigitur fiducia in solum verum Deum, exigitur etiam spes in Deum, vt quæ bona fiducia in Deo agnoscit, spes retineat & conseruet. Quo modo autem non esset coram Deo præcipuum, quod primo omnium præcepto ab eo exigitur? Ac nisi sperare in DOMINVM esset singularis cultus Dei, cur Propheticæ & Apostolicæ literæ toties nos sperare iuberent? vel in hoc Psalmo quoties nobis spes & expectatio commendantur? Nec mirum quod spes pro singulari cultu Dei habenda sit, tribuit enim Deo laudem veritatis, clementiæ, omnipotentæ, & quicquid est id genus diuinarum virtutum. Quare de hoc cultu Dei non est iudicandum secundum sententiam humanæ carnis, sed secundum sententiam Spiritus sancti, qui spem in DOMINVM tantò pluris facit, quantò minus habet in conspectu hominum splendoris. Nam quod nonnulli existimant nihil esse facilius quàm sperare in DOMINVM, credo eos, aut nulla vnquam graui tentatione afflictos, aut nunquam seriã spei in DOMINVM rationem habuisse. Spes enim non est earum rerum, quas præsentibus videmus aut sentimus, sed est rerum inuisibilium, & nullo humano sensu comprehensibilium: Spes, si videatur, inquit Paulus, non est spes. Quod enim quis cernit, cur idem speret? Inuisibilia autem, & ratione humana incomprehensibilia sperare, non est opus carnis, sed Spiritus, nō est natura hominis, sed

sed donum Dei. Vnde & aliàs Paulus Deum vocat Deum spei, & addit: Vt exuberetis in spe per potentiam Spiritus sancti, videlicet significans, solum Deum, per Spiritum sanctum suum esse spei donatorem. Quare non sentiamus nos tùm certò in Deũ sperare, cùm tale quid in animo nostro, rebus omnibus feliciter succedētibus, cogitamus, sed necesse habemus DOMINVM Deum nostrum ex corde, imò ex fide inuocare, vt ipse nobis spem in omnibus aduersis donet, ac nos in ea Spiritu sancto suo conferuet.

Nec est, quòd tali spe pudeſciamus, Vulgò quidem dicitur: Spem & expectationem facere multos stultos, hoc est, multos homines sua spe frustrari. Et alius quispian in Comœdia dicit: Vidi ego multos Dijs fretos decipi. Hæc verè dicuntur de spe, quæ ex humana ratione aut promissione concipitur, sed Spes, quæ concipitur de Deo, ex certa verbi eius promissione non potest speratẽ nec fallere, nec pudefacere. Et si enim Hypocritæ quoq; & impij multa sibi de Deo pollicentur, & videntur in Deum sperare, tamen quia aut fingunt sibi ipsi promissiones Dei, aut veras Dei promissiones non rectè intelligunt, spes eorum pereat, necesse est. Sola spes, quæ ex certo verbo Dei, rectè iuxta sententiam Spiritus sancti intellecto, concipitur, non euanescit: Spes, inquit Paulus, non pudefacit, quòd dilectio Dei diffusa est in cordibus nostris, per Spiritum sanctũ, qui datus est nobis, hoc est, Euangelion annunciat nobis, quòd Deus ita nos dilexerit, vt etiam vni-genitum suum filium pro nobis adhuc impijs dederit. Hoc Euangelion de dilectione Dei erga nos, sicut est cœleste oraculum, & certissimum verbum Dei, ita

Sperare ex præstolari, faciunt multos homines morari.

Boffen vnnd barren/ mach en manchen narren.

etiam postquam ei fidem adhibuimus certificat & confirmat corda nostra, per Spiritum sanctum, quod Deus in tantum nos propter Christum filium suum diligat, ut non frustra sinat nos sperare salutem, & liberationem in omnibus nostris afflictionibus. Hæc enim spes non nititur humano somnio, sed cœlesti Euangelio, & pendet non ex impotentis hominis, sed ex omnipotentis Dei fauore, quem Deus tot certissimis argumentis erga nos contestatus est, ut qui de eo dubitat, Deum aut esse non credat, aut mendacij perfrita fronte arguat. Quare sicut veritas verbi seu Euangelij Dei perpetua est, ita perpetuò seruat eum, qui spem suā in eo collocat: & quemadmodum Deus non est mutabilis, nec pœnitet eum fauoris sui semel suscepti, ita fieri non potest, ut qui sibi spem in eo ponit, dimittatur inanis. Multos quidem videas abijci, quos Deus initio, maximo fauore suo prosequi videbatur. Hoc autem non eò fit, quod pœniteat Deum fauoris & vocationis suæ, sed quod illi fauorem Dei spe sua agnoscere non pergant, nec in vocatione Dei perseverent. Quotquot enim aut spem suam in DOMINVM non abijciunt, aut si abiecerint, ad eam reuertantur, etiam si videantur aliquoties coram hominib' p̄deseri, sicut Christus ipse, dum crucifigeretur, & Stephanus protomartyr eius, dum lapidibus obrueretur, coram Pontificibus & Phariseis p̄desacti videbantur: tamen tantum abest, ut coram Deo p̄desiant, ut potius ab ipso cœlestem & æternam gloriam consequantur. Qui saluas, inquit alius Psalmus, sperantes in te. Et alius: In te DOMINE speraui, non confundar in æternum. Et iterum: Beatus homo, qui sperat in te. Ac rursus: Quoniam in me speraui,

Psalm. 31.

uit, liberabo eum, protegam eum, quoniam cognovit nomen meum. Sed de felicitate eorum, qui verè sperant in DOMINVM, Psalmus noster multacôcionabitur, Quare pergemus nunc ad reliqua.

ET FACITO QVOD BONVM EST. Hoc generaliter complectitur obedientiam in omnibus præceptis Dei, ac præcipuè in ijs, quæ sequuntur primum præceptum Decalogi. Nam de opere primi præcepti, quod est sperare in DOMINVM, iam dictum est. Necessariò autè spei in Deum, additur obediètia in reliquis præceptis, in vocatione Dei. Non potest enim in Deum sperare, & nomen eius inuocare, nisi qui ambulet in via mandatorum eius, aut si non ambulauit hætenus, in viam redeat. Est quispiam, exempli gratia, qui quarit victũ rapinis, aut imposturis, nec agit pœnitentiam, sed cogitat tantisper hoc vitæ genus consecrari, dum ingentem vim pecuniæ cõgregauerit. Hic etsi interea iactat se sperare in DOMINVM, tamen vanus est, & suis ipse cogitationibus decipitur. Cum enim non faciat quod bonum est, nec ambulet in vocatione Dei, non potest verè in Deum sperare.

Est, qui virulento odio in proximum fertur, & cogitat ei quauis occasione malum facere. Quomodo is aliquid spei in Deum habere posset, cum habeat animum homicidam? & quomodo in Deum, quem non videt, speraret, cum proximum, quem videt, non diligat?

Est alius, qui contempto honesto coniugio, studet scortationi, nec pœnitet eum huius turpitudinis & impietatis. Is gloriari quidem potest de spe sua in Deum, sed quia non facit quod bonum est, sciamus gloriatio-

nem eius vanissimā esse. Alius colit idola, inuocat mortuos, & exercet magiam, interea autē multa garrit de Deo, & putat se omnem spem suam collocasse in Deo, sed accidit eis, quod Iob dicit: Spes Hypocritæ peribit. Non enim collocat spem suam in vero Deo, sed in Deo manuum suarum, & in figmento cordis sui. Ergo, inquit, sperandum est in Deum, non fiducia gratuita clementiæ eius, sed fiducia meritorum nostræ bonitatis? Nihil certè minus. Exiguntur enim bona opera iuxta præcepta & vocationem Dei, non quòd meritis eorum coram Deo fidendum & sperandum sit, sed quòd spes in Deum nec possit concipi, nec conseruari sine vera pœnitentia. Vt enim verè in Deum speres, necesse habes agnito & detestato peccato, credere peccatū remitti sola gratuita clementia Dei, propter filium eius Iesum Christum, & obedire vocationi præceptorum Dei. Hęc est vera pœnitentia, sine qua, si gloriatus fueris, te vel credere vel sperare in Deum, vel inuocare Deum, res ipsa coarguet te vanitatis. Ac fieri quidem in hac carne non potest, vt peccatum omninò è nobis tollatur, & perfecta iustitia loco eius inferatur: Non enim habitat, inquit Paulus, in me, hoc est, in carne mea bonum. Et: *Rom. 7.* Non quod volo, facio bonum, sed quod non volo malum, hoc ago. Fieri autem potest per Spiritum sanctū, vt cupiditates peccati mortificemus, & bonam conscientiam habeamus, videlicet, si nō iuxta carnem, sed iuxta Spiritum versemur. Nam si secundum carnem vixeritis, inquit, moriemini. Quare, si voluerimus in Deum verè sperare, necessarium est, vt agentes pœnitentiam, faciamus quod bonum est, & ambulemus in vocatione mandatorum Dei,

INHABITA TERRAN. Tertium officium
 pij hominis. Diximus suprà, quòd τὸ πρῶτον huius Psalmi
 præcipuè suscipiat medendum offendiculo, quod ciui
 honesto, & victum suum iustè quærenti accidit, cum
 videt sceleratos homines iniquitate sua magnas diui-
 tias & dignitates parare, se autem cum sua honestate &
 iustitia esurire & algere. In tali igitur fortuna, homi-
 nes variè afficiuntur. Alius cogitat, deserta honestate
 & pietate, ad castra impiorum hominum transfuge-
 re, vt & ipse exemplo eorum ditescat. Alius etsi per-
 durat in vera pietate, tamen cogitat deserto homi-
 num contubernio, ad eremum fugere, & vitam soli-
 tariam ducere: quid enim facias in hominum poli-
 tia, in qua felicior est, qui sceleratior, & beator est,
 qui ditior? Alius alio subinde modo genus vitæ suæ
 mutat. Nunc enim exercet opificium. Quod si non
 respondet voto suo, incipit, deserto opificio, exerce-
 re agriculturam. Hæc si paulò infelicior fuerit, acce-
 dit, abiecta ea, ad mercaturam. Cum huius pertæsum
 est, proficiscitur in militiam. Sed cum ne hæc felici-
 ter succedit, deliberat de alia conditione. Itaque fieri
 solet, vt quò sæpius variorum generum vitæ pericu-
 lum fecerit, eò infelicior, & rerum omnium egentior
 reddatur. Monet igitur Psalmus, vt honestus ciuis,
 qui felicitate hominum iniquorum & impostorum
 offenditur, non deserat terram, sed inhabitet ter-
 ram: non fugiat in eremos aut monasteria, sed ma-
 neat in terra sua, & in vita sua politica: nec te-
 merè mutet genus vitæ suæ, ad quod diuinitus voca-
 tus est, sed perseueret in eo, etiamsi non videatur tan-
 tæ esse felicitatis, quantam videt in aliorū imposturis.

Aliud

Aliud est, si Deus aliò te vocauerit, & legitimam mutandi prioris instituti rationem ostenderit: sicenim vocationi Dei non est resistendum. Sed si fueris in eo vitæ genere, ad quod diuina ordinatio te vocatus es, nec habeas aliam causam mutationis, quàm quòd in eo non omnia iuxta animi sententiã succedant, profectò non est tibi deserendum, sed perdurandum & pergendum. Nam, qui ad parandum victum & ad congregandas opes frequenter & temerè mutat instituta vitæ suæ, hæud obscuram dat animi sui significationem, quòd benedictionem victus, & incrementum diuitiarum magis in externis rebus, & in sua ipsius industria, quàm in clementia & liberalitate DOMINI Dei nostri quærat, sed longissimè errat. Non enim humanus labor, aut carnalis industria, sed BENEDICTIO DOMINI, inquit Salomon, diuites facit. Et: Non in solo pane viuit homo, sed in omni verbo, seu quauis vocatione, quæ procedit ab ore Dei. Et: Nisi DOMINVS ædificauerit domum, in vanum laborant, qui ædificant eam. Ac mox: Vanum est vobis, qui manè surgitis, & serò quietem capitis, edentes cibum doloribus partum, cum interea Deus cõcedat dilectis suis somnum. Et quemadmodum Iona-
 1. Sa. 14. than ad armigerum suum ait: Non est DOMINO difficile saluare vel per multos vel par paucos. Et aliàs: Deus non est Deus montium tantum, sed etiam vallium
 3. Reg. 20 & planities: ita non est Deo difficile, vel per multa vel per pauca præbere ea, quæ suppeditent ad cultum & ad victum. Et nõ est Deus tantum aurifodinarum, & quæstuosissimarum nundinationum, sed etiam exiguorum agrorum & humilium casarum. Quare ad parandum victum non est vt subinde genus vitæ tuæ mutes, aut
 etiam

etiam trans mare curras, sed inhabita tuam terram, per dura in tua præsenti vocatione. Illud autem maximè omnium elaborandum est, vt DOMINVS Deus noster sit tibi propitius, & agnoscas eum patrem tuum, per Iesum Christum filium eius. Quem cum per fidem possideas, fieri non potest, quin cum ipse sit omniũ bonorũ thesaurus, multò plus benedictionis in tuo modico, quàm opulentissimus quisq; in grandi aceruo pecuniæ suæ inueniat.

ET QVAERE VICTVM HONESTE seu fideliter. ^{4.} Quantum officium pij hominis. Et cum suprà dixerit de generali obedientia, nũc exigit obedientiam suæ cuiusq; vocationis propriam. Non enim sic inhabitanda est terrâ, & perdurandum in præsenti vocatione, vt exerceas eã versutè, fallaciter, malitiose, callidè & perfidè, sed vt quæras victum honestè, iustè, simpliciter & fideliter. Non enim potest vlla esse benedictio Dei in versutia, in malitia, in impostura, in improbitate & perfidia. Ac fingamus hæc scelera videri aliquanto tempore felicia, ad extremum tamen afferunt summam maledictionem. Si vocem DOMINI Dei tui, inquit, non audieris, ^{Deut. 28.} venient super te omnes maledictiones istæ, & apprhendent te: Maledictus eris in ciuitate, maledictus in agro, maledictum horreum tuum, & maledictæ reliquiæ tuæ. Inter voces autem Dei, hæ præcipuè continentur: Non fureris. Non dicas falsum testimonium. Non concupiscas rem proximi tui, quibus prohibetur omnis impostura, malitia, perfidia, & vanitas, in negotiationibus. Quare, quicquid opum his sceleribus acquisieris, scias te in domum tuam non benedictionem, sed maledictionem conferre. De hac autem re postea

Psalmus tractabit pluribus. Quid ergo fiet ei, qui hæc officia pii hominis facit, videlicet, qui sperat in DOMINO, & facit quod bonum est, ac inhabitat terram, & querit victum honestè? Sequitur: Tunc delectaberis in DOMINO, & dabit tibi petitiones cordis tui. Delectari in DOMINO, est tranquillam & alacram conscientiam coram Deo habere, & ex ea Deum, vt patrem inuocare. Ac profectò non potest homini maius in his terris beneficium contingere, quàm quod est tranquillo animo coram Deo, & audet alacri mente ad thronum Dei accedere, & ipsum vt patrem inuocare. Quid enim sic affecto deesse posset? Siue enim iudicio peccati perturbatur, siue onere paupertatis, aut alterius incommodi premitur, siue horrore mortis concutitur, patet ei accessus ad thronum Dei, licet ei colloqui cum Deo, vt cum patre, & exponere ipsi suam afflictionem. Quod cum factum fuerit, Deus teneri non potest, quin sic precantem exaudiat, & adiuuet: Dabit, inquit, tibi petitiones cordis tui. Quid amplius requiris? Paucissima verba sunt: Dabit tibi petitiones cordis tui. Sed cogita ipse tecum, & expende, quàm latè pateant, & quàm multa comprehendant. Non enim promittitur exauditio vnius tantùm & alterius petitionis, sed omnium cordis nostri petitionum. Sicut & Ioannes ait: Si cor nostrum non condemnat nos, fiduciam habemus erga Deum, & QUID petierimus, accipimus ab eo. Et Christus ipse: Omnia, inquit, quacumq; orantes petitis, credite, quia accipietis, & euenient vobis. Cum enim Deus alacri mente, & filiali Spiritu vocatur, fieri non potest, vt inuocantem non vicissim hilari vultu & paterno affe-

ctu

Deu respiciat. Quod si patrem sese exhibet, tantum abest, vt innocatus, pro pane lapidem, pro pisce lei pen-tem, pro ouo scorpionum porrigat, vt vniuersam cœlestium bonorum suorum hæreditatem plena manu offerat. Sed hîc nunc quæritur, quomodo ad talem animi tranquillitatem, & ad tantam Spiritus fiduciam & alacritatem peruenire possimus, vt Deum patris loco inuocemus, & ab eo omnes cordis nostri petitiones impetremus? Alius quidem alias sequitur rationes, quibus paret sibi animi tranquillitatem, & reddat sibi Deum propitiû, & ad præstanda omnia postulata propensum. Inter filios huius seculi alius quærit tranquillitatem suam in ocio, alius in diuitijs, alius in voluptatibus corporis, alius in honoribus, alius in magistratibus. Sed his rebus parant sibi magis perturbationem, quàm tranquillitatem. Ocium ipsæ etiam Ethnicorû literæ infamant. Variâ semper dant ocia mentem. Et: Quod multa mortalibus ocium facit mala. De diuitijs autê quid attinet dicere? Non sacra tantum, sed & externa scripta negant diuitijs tranquillitatem animi parari. Christus vocat diuitias, spinas. Et Paulus: Qui volunt, inquit, discere, incidunt in tentationem, & laqueum, & cupiditates multas stultas ac noxias. Quid quod corporis voluptates, dolorum sunt initia, & qui Magistratum gerit, in curarum pelago nauigat. Inter Hypocritas autem alius quærit animi tranquillitatem, seu vt nostræ literæ loquuntur, pacem conscientie, in vita monastica, alius in cultu mortuorum, alius in battologia precum suarum, alius in aliquot dierum ieiunijs. Sed non est pax, inquit Propheta, impijs, sed sunt quasi mare feruens, quod quiescere non potest, & redundant fluctus eius in:

conculcationem & lutum. Quid ergo faciamus, ut cōsequamur eam animi tranquillitatem, & conscientię pacem, qualiceat Deum alacri mente accedere, & ab eo omnes cordis nostri petitiones impetrare? Hoc nec humana Philosophia nos docere, nec humana potentia nobis dare potest.

Sed Spiritus sanctus docet id nos in hoc huius Psalmi versiculo paucissimis: Spera, inquit, in DOMINVM, facito quod bonum est, inhabita terram, & quære vitam honestē. Habes hīc veram & compendiarīam viam ad parandam animi tranquillitatem, & ad impetranda, quę volueris à Deo. Sperandum est in DOMINVM, & obediendum est vocationi eius. Primū enim, qui in DOMINVM sperat, habet etiam DOMINVM non tantū propitium, sed etiam inhabitatorem: Ego, inquit, inhabitabo in illis, & inambulabo, & ero illorum Deus, & ipsi erunt mihi populus. Ac rursus: Veniemus ad eum, & mansionem apud eum faciemus. Quid autem ei, qui tantum hospitem, eumq; propitium habet, deesse posset? Quis intentabit, inquit Paulus, crimina aduersus electos Dei? Deus est qui iustificat. Quis ille, qui condemnet? Christus est qui mortuus est, imō qui & suscitatus est, qui etiam est ad dextram Dei, qui & intercedit pro nobis. Deinde, qui facit quod bonum est, hoc est, obsequitur vocationi Dei. Et si opera obedientię eius per se non sunt perfecta, nec in hoc est iustificatus, sed tantū in Iesu Christo per fidem: tamen quia cor eius non condemnat ipsum, ut Ioannes loquitur, & non excutit inhabitantem in ipso hospitem, sed retinet eum, idcirco fiduciā habet erga Deum, & quicquid petierit, accipiet ab eo. Quid ergo dicemus de Paulo,

Paulo, qui cum interrogasset DOMINVM, vt discederet ab ipso angelus satanæ, passus tamen est repulsam? Num dicemus Paulum non sperasse in DOMINVM, nec fecisse quod bonum est? Quid de Christo ipso filio Dei? In te, inquit, sperauerunt patres nostri, sperauerunt, & liberaſti eos, ad te clamauerunt, & liberati sunt, in te sperauerunt, nec sunt confusi, Ego autem sum vermis & non homo, opprobrium hominum, & abiectio plebis, hoc est, Ego quidē te diu noctuq; inuoco, tamen in tantum non respondes mihi, vt etiam exponas me omnium hominum ludibriō. Dicemus igitur filium Dei nō sperasse in DOMINVM, nec fecisse quod bonum est? Nihil verò minus aut dicendum aut sentiendum est. Etsi enim Deus non est visus exaudire Paulum iuxta voluntatem carnis, tamen exaudiuit eum iuxta voluntatem Spiritus. Ac non sic quidem exaudiuit Christum filium suum in cruce, vt educeret eum mirabiliter coram humanis oculis, & in conspectu Pontificum ac Phariseorum de cruce, exaudiuit tamen eum tanta clementia, vt ipsum tam in cruce quā in morte, verē saluum conseruaret, & ē sepulchro in vitam reduceret, ac ad dextram suam in cælo collocaret. Sed de hac re aliās copiosius. Nunc illud breuiter meminerimus, nos non posse veram animi tranquillitatem consequi, & precum nostrarum compotes apud Deum fieri, nisi sola fide ac spe in DOMINVM Deum nostrum, & obedientia vocationis eius: Iustificati, inquit Paulus, ex fide, pacem habemus *Rom. 5.* erga Deum per DOMINVM nostrum Iesum Christum, per quem habemus accessum per fidem in gratiam istam, in qua stamus & gloriamur, in spe gloriæ filiorum Dei.

Deuolue super Dominum viam tuam, & spera in eum, & ipse faciet.

Et educet, sicut lucem iustitiam tuam, & iudicium tuum, sicut meridiem.

Et si Psalmus eum, qui offensus est felicitate impiorum; satis firmis argumentis & promissionibus in superioribus versiculis munivit, & officij sui admonuit, tamen quia cor conturbatum eget copiosa consolatione & eruditione: idcirco pergit Spiritus sanctus eadem quidem argumenta, easdemq; promissiones & admonitiones, sed alijs magna ex parte verbis repetere, & quasi explicare, ac amplificare, vt sciamus hanc expositionem non esse ipsi temerè in ore natam, sed esse bene meditatam, & rem ipsum seriam agere. Quare igitur te, cum videas me animo meo vehementer perturbatum, quod meus vicinus, quem scio esse contemprorem Dei, & fraudulentum impostorem, vtatur in omnibus negotijs suis prosperrima fortuna, ego autem cum mea verissima & certissima religione erga Deum, & cum iustitia quam pro virili studeo in omnibus meis negotij exercere erga proximum, nullo non genere afflictionis & aduersæ fortunæ obruar: hoc inquam, cum videas, amabo te, quid censes mihi faciendum, vt sim animo pacato & tranquillo? Respondet ergo Spiritus sanctus: Reuela, inquit, seu deuolue super DOMINVM viam tuam, & spera in eum. Sed quid reuelem DOMINO, aut deuoluam super DOMINVM, cum omnia ei antea satis cognita & perspecta sint, & nō tam vniuersa, quàm singula ab ipso administrantur? Hic ergo cognoscendū nobis est, quid sit reuelare DO-

MINO, aut deuoluere super DOMINVM viam suam. Primum, non est, si quid aduersi tibi acciderit, omnia fora, omnes constrinas, omnia conuiuia, querelis, lamentationibus, & execrationibus complere, sed est Deum inuocare, & opem eius ex fide propter Christum filium eius implorare. Et si enim Deo omnia nostra perspecta sunt, priusquam nos ea vel cogitatione vel verbis comprehendimus, tamen exigit, vt & nos ea ipsi precibus nostris exponamus, & indigentiam nostram testificemur, vt postea beneficio affecti, & ex aduersis liberati, illustriorem Dei cognitionem concipiamus, & gratitudinem nostram Deo benefactori, quibus possumus officijs, declaremus. Deinde reuelare DOMINO, seu deuoluere in DOMINVM viam suam, non est meditari vindictam aduersus eum, qui nobis malefecit, sed est Deo vindictam permittere, & interea pro aduersario apud Deum intercedere, & ei benefacere: Mea, inquit, est vindicta, & ego rependam. Tu autem, si esurit inimicus tuus, pascere illum, si sitit, da illi potum. Et: Ne viuicaris à malo, imò vince bono malum. Hæc, inquis, grauiora & duriora sunt, quam quæ aut velim aut possim præstare. Sed audi tu vicissim nisi hæc velis & possis præstare, non voles etiam, nec poteris veram salutem consequi. Aut hæc præstanda tibi sunt, aut tibi celestis hæreditate carendum est. Et quanquam hoc ne sic quidem perfectè fieri potest, in hac mortali vita, tamen inchoandum, conadum, & aliquousq; progrediendum est, vt qualitercunq; possumus, studium obsequij nostri Deo probemus. Quare prima omnium nostra cura sit, vt Iesum Christum filium Dei per euangelion eius cognoscamus, & per fidem in ipsum regeneremur, ac Spiritu adoptionis donemur,

Sic

Sic enim in nobis renatis & donatis, operabitur Spiritus, & velle, & quoad eius in hac carne fieri potest, perficere. Quod si autem Spiritus grauitate offensio-
num aut afflictionum languescere ac defatigari coeperit, tum excitandus est cohortationibus verbi Dei, ac promissionibus eius. Audiamus ergo quid hoc loco promittatur ei, qui impiorum felicitate, & sua infelicitate animo perturbatus, reuelat, & commendat DOMINO vias suas, & sperat in eum: Ipse, inquit, faciet, & educet sicut lumē, iustitiam tuam, & iudicium tuum, sicut meridiem. Hæc duo vocabula, iustitia & iudicium, solent frequenter in scriptura coniungi, præsertim vbi fit sermo de administratione regnorum, & de officio magistratus. Iustitia enim dicitur, cum innocēs seruator, & iusto suo præmio honoratur. Iudicium autem, cum nocens affligitur, & meritum supplicium luit. Quod ergo Psalmus dicit, habet hæc sententiam: Si tu in tua infelicitate & impiorum felicitate non sis animo virulento, non compleas terram execrationibus, nec vindictam quæras, sed relinquo Deo vindictam, & commenda-
ueris causam tuam Deo, ac inuocaueris opem eius firma fide, spe, & expectatione: tunc ecce tibi Deus certissime curam rerum tuarum suscipiet, ac faciet, vt omnia prospera tibi suo tempore eueniāt, & quemadmodum Solis splendor in meridie clarissimus & feruentissimus esse solet, ita Deus reddet tandem innocentiam tuam illustri-
ssimam, & puniet impios aduersarios tuos seuerissime. Non patietur, vt innocentia tua, & aliorum impietas perpetuis tenebris obruta iaceant, sed reddet ea coram omnibus creaturis multo magis conspicua, quam solis lux in meridie esse solet. Quod verbis dicitur, fa-
ctis

etis demonstratur & comprobatur. Ioseph venditus est à fratribus suis in seruitutem, & postea acculatus est adulterij, & coniectus in carcerem. Etsi autem erat innocentissimus, tamen magna erat infelicitas eius, & necesse habebat tam seruitutem, vt hominum ignauissimus, quàm squalorem carceris, vt hominum turpissimus ferre, cum interea crudeles fratres eius domi paterna hereditate & dominatione fruerentur, ac adultera in summis delitijs & honoribus viueret. Quid igitur Ioseph faciebat? obsequebatur, non carni, sed Spiritui sancto, & deuolvebat causam suam in DOMINVM, sicut Psalmus dicit, ac sperabat in eum. Quare DOMINVS teneri non potuit, quin non solum daret Iosepho felicem seruitutis & carceris euentum, verum etiam educeret iustitiam & iudicium eius in clarissimam lucem, vt pro seruitute & carcere reportaret principatum, & pro infamia adulterij consequeretur in vniuersa Ecclesia Dei summam gloriam pudicitia. Dauid vnctus quidem erat diuinitus in regem Israelis, non autem affectabat regnum, nec meditabatur seditionem aduersus Saul, sed seruebat ei, summo, quo potuit, studio & obsequio. Nihilominus tamen audit seditiosus, & exulat. Quid ergo faciebat? Id nimirum, quod ipse in hoc Psalmo recitat: Commendabat DOMINO vias suas, & sperabat in eo. Quare DOMINVS non tantum liberat eum exilio, verum etiam educit iustitiam & iudicium eius in tantam claritudinem, vt vniuersus orbis palam innocentiam eius cognoscat, ac impietatem Saulis detestetur. Maria mater filij Dei DOMINI nostri Iesu Christi, etsi erat virgo pudicissima, & conceperat de Spiritu sancto, tamē habebatur à suo ipsius sponso Iosepho, pro

turpissima adultera. Quas ibi aegritudines, quas animi perturbationes honestissima virgo non pertulit? Etsi enim commemorauit sponso, se non ex viro quopiam, sed de Spiritu sancto esse pregnantem, quis tamen hoc tanto mysterio nondum reuelato, credere potuit? Sed cum piissima virgo prosceretur & deuolueret causam suam in DOMINVM, & speraret in eum, honestas eius tanta luce, diuina clemētia, illustratur, vt virginitati et pudicitiae eius testimonium perhibeant Angeli, Prophetæ, & Apostoli. Quare si quid nobis in vocatione Dei ambulanti- bus, præter spem & infelicitate acciderit, non deferamus nostrum officium, nec deficiamus ad impios, quos videmus summa felicitate frui: sed obsequamur Spiritui sancto, & iactemus curā, viam, causam, & omnia instituta nostrā in Deū, ac petāmus ab ipso celestem opem. Quod cum à nobis factum fuerit, faciet DOMINVS vicissim pro sua clementia, vt maiora beneficia, quam aut petere aut optare audeamus, consequamur. Ac fingamus sanē, nihil nobis felicitatis in his terris retribui, ac necesse nos habere, exemplo Lazari, ege- nos semper & pauperes ante ianuam diuitis, vsq; ad extremum vitæ diem iacere, reliqua tamen est celestis vita, in qua abundantissime, quas arumnas in hac terrena vita pertulimus, compensantur.

*Sile Domino, et expecta eum, Ne succēseas propter eum, cuius
vix est prospera, propter virum, qui designat scēlos.*

Repetit, quod initio proposuit, vt eo commodius per-
gatur officium pii hominis explicare. Ne succēseas,
ne perturbetis animo, propter eum virum, qui cum sit
impius,

impious & sceleratus, prospera tamen vitur fortuna.
 Quid ergo faciam? SILE, inquit, DOMINO, & expecta *Hier. 33.*
 eum. Rem mirandam. Hieremias iubetur clamare: Cla
 ma, inquit DOMINVS, ad me, & exaudiam te. Et in Olee *Ose. 7.*
 exprobratur principibus Israelis, quod nō sit inter eos,
 qui ad DOMINVM clament: & tamen hic iubemur DOMI
 NO silere & tacere. Sed hoc silere, & illud clamare tam
 cognata inter se sunt, vt alterū sine altero esse non pos
 sit. Clamare enim coram DOMINO, est Deum ex vera
 fide inuocare. Silere autem DOMINO, est non murmu
 rare aduersus DOMINVM, nō execrari coram DOMINO,
 coelum & terram: sed est manum DOMINI patienter fer
 re, & quicquid mali contigerit, boni consulere, interea
 autem opem Dei implorare, & eam obedienter ac pa
 tienter expectare. Itaque in aduersis clamandum est in
 silentio, & silendum est in clamore, vt & inuocemus DO
 MINVM patienti animo, & patienter feramus aduersā,
 cum inuocatione nominis Dei. Aliiquidem in rerum
 motibus & perturbationibus alias quærunt placandi a
 nimi rationes, Sed profectō non est alia nec com
 modior, nec utilior, nec efficacior, quā SILE
 DOMINO, non arguere DOMINVM vel crudeli
 tatis vel iniquitatis, non inuehi aut tumultuari in
 Deum & homines execrationibus, non deferere suum
 officium, & ad impios deficere, sed DOMINO laudem
 iustitiæ tribuere, & patienti animo aduersa sufferre, ac
 opem à Deo obedienter expectare. Si reuertamini, in
 quit Esaias, & quiescatis, salui eritis. In silentio & spe
 erit fortitudo vestra. Et Hieremias: Bonus est DO
 MINVS, inquit, expectanti eum, animæ quærenti eum.

Bonum est præstolari cum silentio salutare DOMINI. Bonum est viro cum portauerit iugum ab adolescentia sua, cum desertus tacuerit, dum obruitur aduersis, & posuerit os suum in puluerem, ac bona spe (auxilium Dei) expectauerit. Sic præstolatus est cum silentio salutare DOMINI, & obmutuit quasi agnus coram tondente se, filius Dei, cum accusaretur hæreseos & seditionis, ac crucifigeretur: sed præstolatione & obmutescencia sua in tantum non est pūdefactus, vt non solum liberatus sit cruce & morte, verum etiam exaltatus sit ad dextram Dei, vt quantum ipse coram aduersarijs obmutuit, tantum nunc omnes linguæ maiestatem eius in toto orbe terrarum loquantur. Sic tacuit & obmutuit coram DOMINO David, cum eiiceretur à Saule in exilium; & expelleretur à filio è regno, ac audiret vir sanguinum: sed hanc taciturnitatem & obmutescenciam Deus ita ei cōpensauit, vt non solum viuus restitutus sit maiestati regis, verum etiam nomen eius iam vita defuncti, publicis laudibus in Ecclesia DOMINI celebretur, & ipse apud DOMINVM summa tranquillitate situatur. Curamus igitur vt offensi impiorum felicitate, & nostra infelicitate, fileamus DOMINO, & præstolemur salutare eius taciturni, ac pergamus in vocatione DOMINI. Sic enim fiet, vt etsi videmur à Deo deserti, misereatur tamen nostri Deus secundum multitudinem bonitatis suæ.

¶ Desine ab ira, & derelinque furorem, ne succenseas, vt malefacias.

Quoniam malefactores exterminabuntur, expectantes autem Dominum, hæreditabunt terram.

Iterum

Iterum repetit diuersis quidem aliqua ex parte verbis, sed eadem prorsus sententia, quod in primo versiculo propositum, & in secundo pro ratione additum est. Noli, inquit, prospera sceleratorum hominum fortuna ad tantam iracundiam, ad tantum furorem, & infamiam excitari ac inflammari, vt deserta vocatione Dei, exempla sceleratorum imiteris, & fias ipse quoq; sceleratus, sed perdura in vera pietate, & expecta à DOMINO rerum tuarum prosperitatem. Scelerati enim homines, etsi aliquando in secundis rebus fruuntur, tamen excidentur tandem, & peribunt. Qui autem obediēti fide expectant auxilium & liberationem DOMINI, capient hæreditario iure terram. Hoc David ipse, qui hunc Psalmum architectatus est, suo & Saulis aduersarij sui exemplo comprobatur. Saul enim, quamuis erat crudelis tyrannus, & impius Hypocrita, tamen dominabatur in terra Israël, & fruebatur regia maiestate & felicitate. David autem, quamuis erat diuinitus in regem electus, & veræ pietatis studiosissimus, tamen exulat, ac versatur in summis vitæ periculis. Sed quia moderatè ferebat aduersam fortunam, nec succensebat, vt malè faceret, sed expectabat DOMINVM obediēti fide, idcirco hæreditatem terræ ac regni Israëlita tandem accepit, vt etiam ad posteros suos transmitteret. Saul autem impius & sceleratus, exterminatus & excisus est è regno, vnà cum vniuersa sua posteritate. Hoc vnum (dicet quispiam) exemplum est, sed multò plura recitari possunt, quibus ostenditur longè diuersum, videlicet, quòd impij vsq; ad extremam senectam vsi sint prosperrima fortuna, & terram feliciter tenuerint, pij autem ex omnibus terris fugati sint, ac necesse habue-

*Cicero lib. 3. de
natu. Deo.*

rint in exilijs mori. Diagoras, Atheos ille, cū ei quidam amicus ostēderet tabellas pictas eorum, quæ naufragio seruati essent, & diceret: Tu qui Deos putas humana negligere, nonne animaduertis ex tot tabellis pictis, quā multi votis, vim tempestatis effugerint, in portumq; salui peruenierint? Ita fit, inquit, illi enim nusquam picti sunt, qui naufragium fecerunt, & in mari perierunt. Sic multos etiam his temporibus *alijs* Diagoras inuenias, qui cum audiunt exemplum Saulis & Davidis proponi, vt probetur sceleratos exterminari, pios autem ad hæreditatem terræ venire, suauiter ridendo, sed enim, inquit, vnum hoc exemplum est, quā multa autem produci possunt, quæ palam testificantur, sceleratos terram, magna gloria & felicitate, vsque ad extremum vitæ spiritum possedisse ac plenos tandem dierum, tranquillissimo mortis genere è vita excessisse, pios autem non solum ne vestigium quidem pedis in terra possidere, verū etiam in summa miseria vitam ducere, ac tandem horribili genere mortis interire? Ac profectò negari non potest, quin humana vita plena sit talium exemplorum. Sed primū sciamus Ecclesiam Dei non sic exemplis destitutam esse, vt vnum tantū Saulis & Davidis de exterminio impiorum, & felicitate piorum in his terris recensere queat. An non impiæ gentes Cananæ exterminatæ sunt è terra sua, Israëlitarum autem, qui iuxta vocationem Dei, multis annis exules in deserto vagati erant, terram gentium Cananazarum hæritate acceperunt? In primo libro Samuelis, dei ciuntur è dignitate Pontificatus impij liberi Eli, & surrogatur sacerdos fidelis. Quo etiam loco recitatur memorabile illud dictū

DOMINI

DOMINI: Quicumque honorificauerit me, glorificabo eum, qui autem contemnunt me, erunt ignobiles. In *Esaia* abijcitur impius Sobna magistratu suo, & substituitur pius Eliacim. In historia Ecclesiastica, Iulianus cognomento Apostata, præcipitatur ex altissimo Imperatoris maiestatis gradu, & in locum eius, primum quidem Iouianus, deinde Valentinianus, quos Iulianus antea propter confessionem pietatis in exilium egerat, exaltantur. Sed quid multis opus? Non est dubium, quin multò plura quàm scripta sunt, similia exempla, tam in Principibus, quàm in priuatis hominibus contigerint, quibus comprobatum sit, impios à terra exterminari, pios autem hereditatem terræ accipere. Deinde sciamus, hanc esse generalem regulam diuinę legis, quòd impios maneat maledictio & excisio, pios autem benedictio & salus. Si audieris, inquit, vocem **DOMINI** *Deut. 28.* Dei tui, & custodieris fecerisq; omnia præcepta mea, quæ ego præcipio tibi hodie, venient super te omnes benedictiones istæ, & apprehendent te. Benedictus tu in ciuitate, benedictus in agro, benedictus fructus ventris tui, & fructus terræ tuæ, &c. Quod si audire nolueris vocem **DOMINI** Dei tui, vt custodias & facias omnia mandata eius, venient super te omnes maledictiones istæ, & apprehendent te: Maledictus eris in ciuitate, maledictus in agro, maledictum horreum tuum, &c. Sed quia peccatum intrauit in mundum, considerandum est, quod non solum in impijs, qui secundum carnem viuunt, & non sunt renati, verum etiam in pijs, qui per Spiritum sanctum sunt renati, hæreat adhuc peccatum, & inobedientia, vt si maledictionibus obruuntur, non possint Deum iniustitiæ accusare.

Et si enim habent, quod aduersus homines cōqueri possunt, non tamen habent, quod aduersus Deum iure cōquerantur: Non intres, inquit, in iudicium cum seruo tuo, quia non iustificatur in conspectu tuo omnis uiuens. Et: Si iniquitates obseruaueris DOMINE, DOMINE quis sustinebit? Quid igitur dicemus? Nihil ne prærogatiuæ habet pius præ impio? & frustra dat pius operam pietati? Prohibeat Deus, ne tale quid vel per somnium nobis in mentem veniat. Primum enim pius habet hanc præ impio prærogatiuam, quod hic non sit Deo acceptus, nec habeat remissionem peccatorum suorum, ille autem sit Deo tam acceptus, ut etiam adoptauerit eum in filium, & condonet ei omnia peccata sua.

Deinde, etsi impius aliquoties mirabiliter liberatur è periculis & aduersis in hoc mundo, sicut & pius, tamen ille necesse habet tandem in impietate sua, nisi resipuerit, perpetuò interire: hic autem etiam si concutitur aduersis toto huius vitæ suæ tempore, & moritur horribiliter, tamen seruetur in morte, & donatur æterna vita ac felicitate. Deus enim tanta est clementia & bonitate, ut nō solum eripiat aliquoties pios suos è præsentibus malis admirabiliter, quo testificetur erga ipsos beneuolentiam suam, sed etiam conseruet mirando modo impios in extremis periculis, quod inuitet eos ad pœnitentiam.

Tandem tamen hoc fit discrimen, quod impij & impenitentes coniiciantur in æternos cruciatus, pij autem & pœnitentes, seruentur æterna salute. De quo discrimine extant manifestissima & certissima testimonia Prophetarum & Apostolicorum scriptorum, hoc est,

est, verè cœlestium oraculorū. Quare nihil moueamur impiorum Diagoræorum scommatis & irrisionibus, sed agnoscamus veritatem & certitudinem cœlestium nostrorum oraculorum, vt etiam si videamus pios nō semper terram possidere, tamen sciamus certissimè futurū vt ipsi, exterminatis impijs, æternam hæreditatē in cœlis consequantur.

Et adhuc pusillum, & non erit impius, inuestigabis locum eius, & non erit.

Manfueti autem hæreditabunt terram, & delectabuntur multitudine pacis.

Quid? dicet quispiam. Non dubito quidem, quin scelerati & impij tandem exterminentur, & expectantes DOMINVM seruentur. Sed hoc differetur in tempus longinquum. Cananæi possederunt terram ab eo tempore, quo posteris Abrahæ promittebatur, quadringentos annos. Interea temporis, quas miseras non viderunt, quas ærumnas non pertulerunt posterij Abrahæ? Saul tenuit imperium Israëlīs quadraginta annis, sed interea Dauid, quamuis in Regem vnctus, seruit tamen & exulat, & adit omnia genera periculorum vitæ suæ.

An non igitur videtur DOMINVS iudicium suum diutius, quàm par est, abstinere? De hoc respondet nunc Psalmus: Adhuc pusillum, inquit, & non erit impius. Sed quid? num pusillum sunt, quadraginta aut etiam pauciores anni? certè afflictio omnis mora longa est, & vnus dies centum annorum spacium continere videtur. Etsi etiam huius mundi sapientes iudicant,

Z non

*Cicero pro Mar-
cello, & in Ca-
tone maiore.*

non esse diuturnum, in quo est aliquid extremū, quod cum venerit, inquit, tunc illud, quod præterijt, effluit, & omnis voluptas pro nihilo habenda est, quia postea nulla futura est: tamē nostræ, hoc est, sacræ literæ, docent nos meliorem seu Geometriam seu Arithmeticam, quàm Mathematica disciplina. Achæ quidem dimetiendi & numerandi scientiæ suum habēt in rebus humanis vsum et commoditatem. In dimetiēdo autem spacio eius temporis, quo nos affligi, impij autem feliciter agere, videntur, alia nobis, eaq; cœlesti Mathematica opus est. Neque enim decet, ut qui nos agnoscimus filios & hæredes æterni Dei, patris nostri, qui est in cœlis, aliam in spiritualibus rebus Mathematicam vsurpemus, quàm quæ & ab ipso vsurpatur, & nobis in literis eius traditur. De hac autem cœlesti Mathematica, Moses in Psalmo sic dicit: Mille annicorram te sunt, ut dies hesternus qui præterijt, imò ut vigilia noctis. Et Petrus: Vnum hoc ne lateat vos dilecti, quòd vnus dies apud DOMINVM perinde est, ut mille anni: & mille anni ut dies vnus. Miranda quidem, imò & filijs huius seculi ridicula, dimetiendi temporis ratio: sed multò certior est, quàm illa Philosophica. Quanquàm autem fieri non potest, ut nos homines perdificamus eam perfectè in hac corporali vita: tamen Spiritus sanctus non cessat nos ad cognitionē eius assuefacere, donec tādē Deum ipsum, sicut est, videamus. Primū enim promittit & confirmat nobis, quòd in aduersis nostris Deus non sit à nobis alienato animo, sed propitius propter Christum filium suum, ut quò grauiora sunt aduersa, eò propensiori & clementiori in nos sit animo Deus. Iuxtà est DOMINVS his,

(inquit)

(inquit) qui tribulato sunt corde, & humiles spiritus saluabit. Et sacrificium Deo, Spiritus contritus, cor contritum & humiliatum Deus non despiciet. Et ad Paulum, qui ter rogauerat, ut liberaretur angelo Sathanae, dicitur: Sufficit tibi gratia mea. Quo responso, haud obscure significatur, maximam leuationem malorum esse, si quis cognoscat, se in malis suis à Deo respici, & apud Deum gratiosum esse. Deinde confirmat certam fore nostram victoriâ. Nos enim, si membra Christi sumus per fidem, nō sic belligeramus cum principatibus & rectoribus tenebrarum, ut metuendum nobis sit, ne succumbamus: sed quod certō sciamus, nos in Christo victoriam reportaturos. Oves meae, inquit, vocem meam audiunt, & ego cognosco eas, & sequuntur me, & ego vitam æternam do eis, nec peribunt in æternum, neque rapiet eas quisquam de manu mea, Pater meus, qui dedit mihi eas, maior omnibus est, &c. Et iterum: In mundo afflictionem habetis, sed bono animo sitis, ego vici mundum. Et: Maior est, qui in vobis est, quàm qui in mundo. Ac rursus: Omne, quod natum est ex Deo, vincit mundum. Et hæc est victoria, quæ vincit mundum, fides nostra. Et iterum: Persuasum habeo, quod neque mors, neque vita, neque angeli, neque principatus, neque potestates, neque instantia, neque futura, neque altitudo, neque profunditas, neque vlla creatura alia poterit nos separare à dilectione, qua Deus nos in Christo Iesu DOMINO nostro complectitur. Hæc vnaratio probè considerata & perspecta, potest nobis nō solum grauissima aduersa, quibus cum pugnandum est, leuiora, verū metiam diuturnitatē temporis, quo aduersa ferēda sunt, breuissimā reddere. Postremò cōfirmat pro afflictionibus

hisce, etsi diuturnis, temporarijs tamen, reponenda cœlestia & æterna gaudia: Reputo, inquit Paulus, non esse pares afflictiones præsentis temporis ad gloriam, quæ reuelabitur erga nos. Et iterum: Momentanea leuitas afflictionis nostræ, parit nobis, mirè supra modum, æternum pondus gloriæ, dum non spectamus ea quæ videntur, sed ea quæ non videntur. Hæc ferè sunt, quibus Spiritus sanctus docet nos cœlestem Mathematicam, vt in perferendis aduersis, & expectanda liberatione, non dimetiamur tempus iuxta vulgaria illa horologia, siue muralia, siue horizontalia, sed cœlestia & diuina, quibus mille anni vix pro vno die, imò ne pro vno quidem horæ momento computantur. Adhuc, inquit, pusillum, & non erit impius. Quis ergo est, qui primus hoc dixit? Spiritus sanctus primus quidem & præcipuus autor est, sed primum eius organon est Dauid. Et tamen hic multis annis errauerat in exilio, donec Saul interiret. Hos igitur multos annos, vocat pusillum. Didicerat enim in schola Spiritus sancti cœlestem Mathematicam, vt numeraret tempus iuxta cursum non corporalis illius, sed spiritualis & æterni solis, qui est Deus ipse pater DOMINI nostri Iesu Christi. Et addit de impio: Inuestigabis locum eius, & non erit. Tantus integritus manet impios, vt non solum ipsi pereant, verum etiam ne reliquæ quidem eorum saluæ maneant. Post

2. Sam. 21 mortem Saulis remanserant aliqui ex posteritate eius, ignobiles quidem & abiecti: sed tanta ira Dei succensa erat aduersus impium Saulē, vt publica fame cogeret hos e medio tollere. Et de Ieroboamo rege Israël dicitur: Quia proiecisti me post tergum tuum, idcirco ecce ego inducam mala super domum Ieroboam, & percutiam de Ieroboam

Ieroboam mingētem ad parietem, & clausum & nouissimum de Israēle, & mundabo reliquias domus Ieroboam, &c. Atq; hoc quidem est impiorum iudiciū, etiāsi multum temporis felices ac fortunati esse videantur. Quid autem de pijs? Mansueti (inquit) seu afflicti (hæc enim fors est piorum in hoc seculo, quod sint afflicti. In mundo (inquit) afflictionem habetis) hæreditabunt terram, & delectabuntur multitudine pacis, hoc est, non tantum dominabuntur ipsi in terra, verum etiam transmittent regnum terræ ad posteritatem suam, & fruentur summa in regno suo tranquillitate. Hæc non tantum de regibus & principibus, qui habēt externa huius terræ regna, sed etiam de priuatis quibuscq; , qui ne agrum quidem terræ possident, & tamen pietatem colunt, intelligenda sunt. Quasi morientes, inquit Paulus, & ecce viuimus, quasi correpti & non occisi, quasi dolentes, semper tamen gaudētes, quasi pauperes, multos tamen ditantes, vt nihil habentes, omnia tamen possidentes. Talem certè nullus vnquam præcipuorum Monarcharum huius terræ gloriationem habere potuit. Babylonius rex multa quidem possedit in hac terra, sed non possedit omnia. Alexander Magnus vniuersum penè orbem terræ in suam potestatem redegit, nō tamen possedit omnia. Solus pius, cum penè nihil habeat, omnia possidet, possidet enim Christum, & est membrum Christi. Cum autem Christus sedeat ad dextram Dei patris sui, & habeat regnum cœli & terræ, simul etiam cum ipso sedet pius in suo gradu ad dexterā Dei, & habet in ipso ius regie potentie ac maiestatis. Nunc, inquit Ioannes, filij Dei sumus, & nondum apparuit, quid futuri sumus. Scimus autem, quoniam si appa-

paruerit, similes ei erimus, quoniam videbimus eum si cuti est. Quare cum videmus impios in terrenis his re- gnis florere, nos autem algere & esurire, consolemur nos regia illa & cœlesti maiestate, quam in Christo pos- sidemus, certa fiducia cōcepta, quod non solum hac in futuro seculo fruamur, verum etiam in hoc præsenti se- culo liberaliter conseruemur. Sed quid illud sit, quod pii hereditatem terræ accipiant, paulò antè exposui- mus. Pergamus igitur ad reliqua.

Molitur impius aduersus iustum, et fremit contra eum denti- bus suis.

DOMINVS ridet eum, quoniam prospicit, quòd veniat dies eius.

Gladium euaginant impij, et intendunt arcum suum, vt deie- ant afflictum et egenum, vt mactent rectè egredientes.

Gladus eorum intrabit in cor eorum, et arcus eorum confrin- gentur.

Amplificat interitum impiorum à certitudine & gra- uitate eius, vt contineat pios in officio, ne impiorum exemplo & felicitate perturbati, vocationem Dei de- serant, & sese cum impijs coniungant. Impius (inquit) excogitat varia consilia aduersus pios, & machinatur eis multa mala: Sed DOMINVS, qui est cordium scruta- tor, & rerum omnium conscius, ridet secum omnia consilia & conatus impiorum. Primùm, quòd videat in- teritum eorum, non tantùm certissimè euēturum, sed etiam esse in propinquo. Deinde, quòd videat impios eo ipso sibi calamitatem inferre, quo alijs eam machi- nantur, ac suo se gladio, vt dici solet, iugulare. Euagi-
nant

nant quidem gladium, vt conficiant pium, sed gladius reflectitur in pectus ipsorum. Intendunt arcum, vt sagittis configant pium, sed sagittæ retrò conuersæ, ipsorum corda transuerberant. Hæc sententia, quòd Deus rideat impiorum conatus, & quòd impij suis ipsorū cōsilijs pereant, sæpè in sacris literis repetita est.

Psal. 2. Qui habitat in cœlis, irridebit eos, & **DOMINVS** subsannabit eos.

Psal. 58. Ecce loquentur ore suo, & gladius in labijs eorum, quoniam quis audiuit? Et tu **DOMINE** deridebis eos, & subsannabis omnes gentes.

Iob. 18. Nonne lux impij extinguetur? Et mox: Ardebuntur gressus virtutis eius, et præcipitabit eum cōsiliū suū. Mittitur pedibus suis in laqueum, & incedit implicitus reti. Laqueus comprehendit calcaneum eius, & apprehendit eum grassator.

Psal. 7. Lacum aperuit & effodit eum, & incidit in foueam quam fecit. Conuertetur dolor eius in caput eius, & in verticem ipsius iniquitas eius descendet.

Psal. 34. Veniet illi laqueus, quem ignorat, et captio, quam abscondit, apprehendet eum: & in laqueum cadet ipsum.

Psal. 56. Foderunt ante faciem meam foueam, & inciderunt in eam.

Prouerb. 11. Iustitiae rectorum liberabit eos, & in insidijs suis capientur iniqui.

Quid plura? Testantur exempla ipsa non tantum quæ sacra scriptura, verum etiam quæ præsens rerum experientia suppeditat, quòd & **DOMINVS** derideat conatus impiorum aduersus pios, & quòd impij suis cōsilijs perdant.

Pharao

Pharao cogitat internitionem Israël, ac nunc quidem mandat obstetricibus, ut masculos Israëlitarum in partu interficiant, nunc publico edicto iubet, ut qui masculi Israëlitarum deprehenduntur, in flumen projiciantur, & aqua suffocentur. Sed res ipsa comprobavit DOMINVM in cœlis derisisse hunc conatum Pharao nis, & Pharaonem hoc ipso accelerasse ad suum interitum.

Absolon machinatus est malum parenti suo Dauidi, sed DOMINVS deridebat consilium eius, & Absolon eo ipso incurrit in præsens suum exitium.

Amāparauiit crucem Mardochæo: sed in ea ipsa cruce paulò post ipse pependit, & Mardochæus summa gloria illustratur.

Iudas, Pontifices & Pharisei meditantur perniciem Christo, sed Christus exaltatur in summam sublimitatem, ad dextram Dei, illi verò dijiuntur in extremam ignominiam & perpetua supplicia ad inferos. Etsi enim impij aliquoties ita prævalent, ut non solum externa mala, qualia sunt, exilia, direptiones facultatū, seruitutes, vincula, carceres, & id genus alia, verum etiam mortem ipsam inferant, sicut Pontifices Christo, Herodes Iacobo, Nero Petro & Paulo, Tyranni martyribus intulerunt: tamen nō sic prævalent, ut impunes euadant, & pij intereant. Sed illi quidem crudelitate sua ad certissimum suum exitium properant, hi autem etiam in media morte, ad æternam vitam & felicitatem conseruantur. Hæc nobis diligenter cognoscenda & imitanda proponuntur, ut discamus & ipsi vnà cum DOMINO Deo nostro, aduersus impiorum consilia & conatus, & in nostris afflictionibus ridere. Insani quidem hominis
effect

esset externum in aduersis suis cachinnum tollere: nec hoc à nobis requiritur, cum iubemur in afflictionibus nostris gaudere, gloriari & ridere, sed illud exigitur, vt etsi corpore dolemus, & animo perturbamur, tamen rideamus spiritu, & contemnamus impiorum conatus & consilia, cogitantes, quod ijs nihil sit vanius, & quòd nihil certius sit ipsorum quidem interitu, nostra aut liberatione: & perseueremus in vocatione Dei. Hic est risus, qui à nobis exigitur. Cum enim simus per Christum adoptati in filios Dei, & Deus pater sic rideat impiorum conatus, vt nō patiatur filios suos opprimi, sed cogitet certissimam eorum salutem, officium exigit, vt comparemus nos ad affectum Dei, & vnā cum ipso rideamus spiritu, ac spem cœlestis liberationis firma fiducia concipiamus.

*Melius est modicum iusto, quàm diuitiæ impiorum multæ.
Quoniam brachia impiorum conterentur, Dominus autem sustentat iustos.*

Dicet quispiam. Rectè quidem mones, ne exemplo impostorum & periurorum diuitias & opes consecter, sed interea dum in negotijs meis iustitiā colo, necesse habeo vnā cum familia mea esurire & algere, ac profectò modicum, & vix atrum panem ex iustitia mea reporto, cum alij ex imposturis suis magnam vim auri & argenti congregent. Quid igitur sentiam, aut quò me vertam? Ad hoc respondet nunc Psalmus duobus versiculis. Melius est (inquiens) modicum iusto, quàm diuitiæ impostorum multæ. Hæc est commendatio mediocrium facultatum, quas præ nimij diuitijs commendant

Theognis.

dant etiam externæ literæ. Dimidium, inquit, plus toto. Et: Magis offendit nimium, quàm parum. Et: Modus omnibus in rebus est optimum habitu, nimia omnia, nimium exhibent negotium hominibus ex se. Et si autem etiam externæ ipsæ literæ docent, Malè partum, malè dilabi, Et eos qui sectantur lucra iniuste, videri quidem in præsentia lucrum reportare, postea autem malis diuinitus affligi: tamen non docent, nec quæ sit vera iustitia, quam præstare debemus, nec quis sit verus Deus, à quo vera bona expectanda sint. Sed nostræ, hoc est, diuinæ literæ vtrunque docent. Postquàm igitur hic Psalmus proposuit, quòd iusto modicæ facultates vtiliores sint, quàm iniusto multæ diuitiæ, addit rationem: Brachia (inquit) impiorum conterentur, DOMINVS autem sustentat iustos. Ergo primum omnium considerandum est, quis hic vocetur iustus, vt sciamus cuius modicæ facultates sint feliciores magnis diuitijs. Ac aliàs quidem copiosius de iustitia tractatur, nunc dicemus, quod ad hunc locum satis videbitur. Iustus enim hic dicitur, non qui est omnibus virtutibus, sine vllò vitio, instructus & ornatus. Sic enim non est vllus in terra iustus: Omnes, inquit alius Psalmus, declinant, simul inutiles facti sunt, non est qui faciat bonū, non est vsque ad vnum. Nec iustus hic dicitur, qui cum sit plenus impietate, ac pessimorum affectuum, apparet tamē coram hominibus honestus, quales sunt hypocritæ, & monachi. Sed iustum dicimus eum, qui cum agnoscat peccatum suum, credit in filium Dei DOMINVM nostrum Iesum Christum, quòd propter hunc habeat remissionem peccati, & ambulat ex hac fide in vocatione Dei, vt nec in negotiationibus iniuste agat, nec in reliqua

qua vita turpitudinem exerceat, sed præceptis Dei obediat. Et quanquã talis obedientia, sua soleat vitia habere, tamẽ quia credit in Christũ, & perdurat in obedientia, hæc vitia non imputantur ei, sed condonantur propter Christum. Hæc est vulgaris piorum iustitia, quam pij in Christo renati, & Spiritu sancto donati præstare & possunt & debent. Deinde impius hoc loco dicitur, non qui tantũ in patriam, aut parentes crudelis est, sed qui cum contẽnat Deum, ac verbum eius, in corde suo, inhumanus est in proximos quosq; suos, & dat operam imposturis, ac omne studium suum eò confert, vt opes cõgreget quoquo iure, quaqua iniuria, quid igitur erit illi iusto, & huic impio? Melius (inquit) est modicũ iusto, quàm multẽ diuitiã impij. Quid causẽ est? sequitur, quoniã brachia, hoc est, diuitiã, quibus impij sunt magni & potentes, conteruntur & maledicuntur à DOMINO: Modicum autem iusti cõseruatur, & benedicitur à DOMINO. Quas enim opes cõgregat avarus impostor, nugis & malis artibus, sunt Deo abominabiles. Statera, inquit, dolosa abominatio est apud Deum. Et: Pondus, ac pondus, vtrunq; abominabile est apud Deum. Quæ potest autem esse benedictio, quæ felicitas, in ijs opibus quas DOMINVS abominatur, & auersatur? Qui verò pietatem sequitur, & iustẽ negotiatur, etsi modica tantũ, & pauca acquirat, tamen habet Deum propitium, & paterno ipsum affectu complectentem. Cui autem Deus est propitius pater, quid ei deesse posset? An non Deus est thesaurus omnium bonorum? Vbi igitur vnà cum tribus obolis præsens, ac propitius fuerit Deus, an non ibi multò plus est diuitiarum, quàm vbi fuerint multæ myriades aureorum numorum, absente,

aut abominante & execrante Deo? **Benedictio DOMINI**, inquit Salomon, diuites facit. Non ait, pecunia, diuitiæ, opes, faciunt homines diuites, sed **BENEDICTIO DOMINI**. **DOMINVS** autem benedicit pios, non impios. Et quanquam aliquoties soleat etiam impijs bene facere, & re eorum fortunare, vt inuitet eos ad penitentiam, tamen cum non resipiscunt, ea benedictio non est nisi corporalis, & cedit tandem impijs in extremam maledictionem. Pios autem ita benedicit, vt etsi laborant paucitate, & possident modicum, tamen hæc paucitas & hoc modicū superat utilitate sua omnem huius mundi opulentiam. Vulgò dici solet, sitim tam est fonticulo, quàm est fonte depelli posse. Quo dicto significatur, quod tam possint nobis necessariam vitam suppeditare modicæ facultates, quàm ingens vis auri. Hoc videlicet tum rectè accidit, cum **DOMINVS** Deus ipse susceperit modicas facultates in manu sua benedicendas. In Exodo, cum mitteretur Manna de cælo, qui colligebat modicū, nihil minus se habere comperit, quàm qui collegerat plurimum. Ac præterea, qui aliquid de Manna cupiditate & diffidentia excitatus reponebat contra præceptum **DOMINI** in crastinum, huic pro Manna, relinquebantur vermes. Hoc inde adeò accidit, quia **DOMINVS** receperat illud modicum in manum suam benedicendum, ab hoc autem in crastinum reposito auertebat manū suam, ideoq; necesse habebat cōputrescere. In libris Regum, pauxillum farinæ & olei sufficit toto famis tempore, vniuersæ familiæ viduæ Sarephthanæ, ad quam Elias diuerterat. Hoc enim pauxillum repositum erat in manum **DOMINI**, qua & benedicebatur. In iisdem libris, Elizeus centum viros

viginti

viginti panibus ita pascit, ut etiam non pauca reliqua superessent, quia DOMINVS receperat hos paucos panes benedicendos. Et rursus: Mulier quædam de vxoribus filiorum Prophetarum implet paxillo olei multa vasa, ut ijs diuenditis satisfaciat creditoribus. Nam paxillum illud olei multiplicabatur benedictione DOMINI. In Euangelio Ioannis pascit Christus filius Dei quinquies mille viros, quinque tantum panibus, & duobus piscibus. Et ne quis existimaret illos non admodum liberaliter pastos, superfuerunt duodecim Cophini fragmentorum. Quod enim filius Dei in manum suam benedicendum receperat, non poterat non augeri & multiplicari. Sed hæc, inquires, miracula sunt, non autem in hoc ædita, ut sint nobis ociosa spectacula, sed ut sint sigilla & testificationes huius dicti nostri, & similiū promissionum: Melius est modicum iusto, quam multa diuitiū impiorum.

Voluit enim DOMINVS his miraculis contestari, se paucas opes in manum suam receptas, multo auctiores & feliciores reddere, quam sunt alioqui myriades opum, quæ extra manum eius positæ sunt. Recipit autem DOMINVS in manum suam eas opes, quæ pie, iuste, & bonis artibus acquiruntur. Quare, etsi modica & pauca nobis, in vocatione Dei ambulantibus obveniunt, tamen quia sunt in manum DOMINI proiecta & recepta, non dubitemus, quin sufficiant nobis ad omnem vitam nostræ necessitatem. At enim (iterum dices) ne modicum quidem mihi relictum est, omnes enim facultates abstulit vel hostis, vel persecutor, vel prædo vel incendium, vel alius quilibet casus, nec mihi vel

obolū quidem reliquit. Quid? num abstulit tibi vñ cum facultatibus, etiam DOMINVM Deum tuum? Hæc demum rapina intolerabilis esset, sed nō potes esse pauper aut desertus, dum adhuc reliquus tibi est DOMINVS Deus tuus. Non in solo pane viuit homo, sed in quouis verbo quod procedit ab ore Dei. Israhelitæ erant in deserto egentissimi, & carebant etiam modicis. Sed quia ambulabant in verbo seu vocatione Dei, idcirco, cum terra non daret eis frumenta, aperiebat se cœlum, & effundebat Manna.

At præter summam egestatem, etiam morbis ita affligor, vt ne ostiatim quidem ambulare, & inopiam mē dicitate sustentare queam.

Etsi autem nulla est miseria in terris, quæ nō possit etiam in hominem pijsimum incidere, tamen nō potes miserior & calamitosior fieri Lazaro illo, qui de micis, quæ cadebāt de mensa diuitis, saturari cupiebat. Sed deus te miseriorem esse, tamen ne sic quidē habes, quod iure conqueraris. Dummodo enim DOMINVM Deum tuū per fidem retinueris, fieri non potest, vt ille te deserat: sed aut dabit euentū vt ferre queas, si diutius in hac vita manendū est, aut recipiet te ad æternum suū tabernaculum, vt fruaris cœlesti felicitate. Montes, inquit, cōmouebūtur, & colles cōtremiscent, misericordia autem mea nō recedet à te, & fœdus pacis meæ non mouebitur, dixit miserator tuus DOMINVS. Hæc diligenter & sæpè meditanda sunt, vt præparemus nos verbo DOMINI, ad ferendos casus, quicunq; euenire possunt.

Esa. 54.

Novit Dominus dies immaculatorum, & hæreditas eorum in æternum erit.

Non

Non pudeſcent in tempore acerbo, & in diebus famis ſaturabuntur.

Pergit recenſere & explicare felicitatem, quam pī etiam in medijs aduerſis, apud DOMINVM repositam habent, vt hac excitatio non inflectant animum suum exemplo impiorum. Sunt autem multi, qui cum vident pios esse infelices, impios autem felices, existiment Deū non nosse, nec curare res humanas, & dicāt, quod in Hieremia commemoratur; Ex ore altissimi nec bona nec mala egrediuntur. Sed horū impietas refutatur, cū in vniuerſa ſacra ſcriptura, tū etiam in his verſiculis, quos iam è Psalmo nostro recitauimus. Nouit DOMINVS, (inquit) dies immaculatoꝝ. Quos ſuprà dixit iuſtos, eos nūc vocat immaculatos, nō quod quīſquam hominum etiam ſanctiſſimorum in terris careat omni macula, ſed quod qui credit in Chriſtū, qui ſolus eſt verè immaculatus, habetur et ipſe immaculatus propter Chriſtum, ſi modò iuxta Spiritum, nō iuxta carnē ambulauerit. Tantum igitur abeſt, vt DOMINVS non nouerit aut non curauerit hos immaculatos, vt potius eos ſolos nosſe & curare dicatur. De impijs enim dicit DOMINVS: Nunquam noui vos. Eſi enim nihil eſt Deo incognitum, tamen quia non reſpicit impios clementer, recte dicitur, eos non nosſe. De pijs autem dicit Pſalmus: Nouit DOMINVS dies immaculatoꝝ. Alias dicitur DOMINVS paſſus, lachrymas, & pilos capitis piorum, numerare: Fugas meas, inquit, hoc eſt, paſſus fugæ meæ tu numeras, lachrymas meas reponis in lagunculam tuam, & reſers eas in rationarium tuum. Et capilli capitis veſtri numerati ſunt.

Pſalm. 56.

Nunc

Nunc etiam tempora, siue annos, siue menses, siue dies, siue horas, & momēta horarum, nosse ac numerasse dicitur. Tantam enim habet rationem suorum piorum, vt non solum prouideat, quid quouis tempore, quibusuis diebus & horis, accadat ipsis; verū etiam non pateretur, vt quicquam vnquam mali accideret ipsis nisi antē prouidisset, & constituisset secum, qua via, & quomodo succurreret eis, ac seruaret eos, & à malo liberaret. Nouit dies Israëlitarum, videt tempus, quo Israëlitz affligendi erant in Aegypto. Sed priusquam afflictio acciderat, excogitauit modum, quo eos esset ex Aegypto liberaturus. Nouit dies ciuium Hierusalem, vidit tempus, quo essent abducendi in captiuitatem Babylonicam. Sed priusquam vrbs caperetur, prouidit non solum tempus liberationis, verū etiam Monarcham, cuius opera liberarentur, & ad patriam remitterentur, sicut Esaías & Hieremias concionantur. Quid multa? DOMINVS sic nouit tempora suorum piorum, qui in fide & vocatione eius ambulare pergunt, vt etiam si accidant eis omnia genera afflictionū in hac corporali vita, tamen conseruet eis æternam hæreditatem: Hæreditas eorum, inquit, in æternum, seu perpetua erit, Nam, qui credunt in Christum filium Dei, adoptantur & ipsi propter Christum in filios Dei. Si autem sunt filij, ergo & hæredes, hæredes quidem Dei, cohæredes autem Christi. Sed longè alia est ratio eius hæreditatis, quam accipimus à patre cœlesti, quàm eius, quæ nobis à terrenis parentibus relinquitur. Hæc enim durat tantum ad tempus, nec potest nos aduersus extrema pericula, hoc est, mortem & infernum tueri, & in vita conseruare. Illa autem durat in æternum, estq; tantæ firmitudinis

mitudinis & stabilitatis, vt in omnibus periculis permaneat, ac perpetuò cōstet. Sciamus igitur, quæ sit illa cœlestis hæreditas, vt cognitione & amore eius excitati, diligenter eam assectemur. Dicemus ergo hoc verbis Pauli: Si Deus, inquit, pro nobis, quis contra nos? Qui proprio filio non pepercit, sed pro nobis omnibus tradidit illum, quî fieri potest, vt non & cum eodem omnia nobis donet? Filium, inquit, nobis donauit, & cū filio omnia. Quæ erga sunt illa OMNIA? ea videlicet omnia, quæ ipse habet & possidet. Habet autem innumera bona, inter quæ hoc primum omnium considerare mus, quòd apud patrem suum tam graciosus sit, vt diligat eum ex animo, Hic inquiens, est filius meus dilectus, in quo complacitum est animæ meæ. Deinde, etsi pater conuiuet, vt filius capiatur, affigatur cruci, & moriatur, tamē conseruat eum in his omnibus aduersis, ac non solum excitat eum à morte, verum etiam collocat eum ad dextram suam, vt vnà cum ipso fruatur cœlesti maiestate, & perpetua beatitudine. Cum igitur Deus pater donauerit nobis filium suum, & vnà cum ipso omnia sua bona, manifestum est, quòd & nos gratiosissimus apud Deum, propter Christum, & Deus non tantum conseruet nos in omnibus periculis, sed etiam faciat nos vnà cum Christo sedere ad dextram suam in cœlestibus, sicut Paulus loquitur. En, hæc est hæreditas piorum, quam habent in Iesu Christo filio Dei. Quæ etsi paucissimis verbis recitatur, plura tamen bona continet, quàm quæ oculus vidit, auris audiuit, & mens hominis vnquam cogitare potuit. Consideremus igitur initio, quòd hæc bona vocetur hæreditas, haudquaquã temerè, sed consilio Spiritus sancti. Voluit enim Spi-

Nouit etiam tempora, siue annos, siue menses, siue dies, siue horas, & momēta horarum, nosse ac numerasse dicitur. Tantam enim habet rationem suorum piorum, vt non solum prouideat, quid quouis tempore, quibusuis diebus & horis, accidat ipsis, verum etiam non pateretur, vt quicquam vnquam mali accideret ipsis nisi ante prouidisset, & constituisset secum, qua via, & quomodo succurreret eis, ac seruaret eos, & à malo liberaret. Nouit dies Israëlitarum, videt tempus, quo Israëlita affligendi erant in Aegypto. Sed priusquam afflictio acciderat, excogitauit modum, quo eos esset ex Aegypto liberaturus. Nouit dies ciuium Hierusalem, vidit tempus, quo essent abducendi in captiuitatem Babylonicam. Sed priusquam vrbs caperetur, prouidit non solum tempus liberationis, verum etiam Monarcham, cuius opera liberarentur, & ad patriam remitterentur, sicut Elaias & Hieremias concionantur. Quid multa? DOMINVS sic nouit tempora suorum piorum, qui in fide & vocatione eius ambulare pergunt, vt etiam si accidant eis omnia genera afflictionū in hac corporali vita, tamen conseruet eis æternam hæreditatem: Hæreditas eorum, inquit, in æternum, seu perpetua erit. Nam, qui credunt in Christum filium Dei, adoptantur & ipsi propter Christum in filios Dei. Si autem sunt filij, ergo & hæredes, hæredes quidem Dei, cohæredes autem Christi. Sed longè alia est ratio eius hæreditatis, quam accipimus à patre cœlesti, quàm eius, quæ nobis à terrenis parentibus relinquitur. Hæc enim durat tantum ad tempus, nec potest nos aduersus extrema pericula, hoc est, mortem & infernum tueri, & in vita conseruare. Illa autem durat in æternum, estq; tantæ firmitudinis

mitudinis & stabilitatis, vt in omnibus periculis permaneat, ac perpetuò cōstet. Sciamus igitur, quæ sit illa cœlestis hæreditas, vt cognitione & amore eius excitati, diligenter eam assectemur. Dicemus ergo hoc verbis Pauli: Si Deus, inquit, pro nobis, quis contra nos? Qui proprio filio non pepercit, sed pro nobis omnibus tradidit illum, quî fieri potest, vt non & cum eodem omnia nobis donet? Filium, inquit, nobis donauit, & cū filio omnia. Quæ erga sunt illa OMNIA? ea videlicet omnia, quæ ipse habet & possidet. Habet autem innumera bona, inter quæ hoc primum omnium considerare mus, quòd apud patrem suum tam graciosus sit, vt diligat eum ex animo, Hic inquit, est filius meus dilectus, in quo complacitum est animæ meæ. Deinde, etsi pater conuiuet, vt filius capiatur, affigatur cruci, & moriatur, tamē conseruat eum in his omnibus aduersis, ac non solum excitat eum à morte, verum etiam collocat eum ad dextram suam, vt vnà cum ipso fruatur cœlesti maiestate, & perpetua beatitudine. Cum igitur Deus pater donauerit nobis filium suum, & vnà cum ipso omnia sua bona, manifestum est, quòd & nos gratiosissimi apud Deum, propter Christum, & Deus non tantum conseruet nos in omnibus periculis, sed etiam faciat nos vnà cum Christo sedere ad dextram suam in cœlestibus, sicut Paulus loquitur. En, hæc est hæreditas piorum, quam habent in Iesu Christo filio Dei. Quæ etsi paucissimis verbis recitatur, plura tamen bona continet, quàm quæ oculus vidit, auris audiuit, & mens hominis vnquam cogitare potuit. Consideremus igitur initio, quòd hæc bona vocetur hæreditas, haudquaquam temerè, sed consilio Spiritus sancti. Voluit enim Spi-

ritus sanctus huius vocabuli mentione significare, quòd consequamur hæc cœlestia bona, nullo merito nostro: sed tantùm gratuita clementia eius, qui nos regeneravit. Nam sicut infans terrenus statim cum nascitur, fit hæres bonorum terreni sui patris, non aliquo suo merito, sed tantùm, quia natus est huius patris filius: ita confestim, vt renascimur per fidem, efficimur hæredes Dei, non merito aliquo humanæ nostræ iustitiæ aut industriæ, sed clementia Dei, qui nos gratuitò in filios adoptavit. Admoneamur igitur ipso hæreditatis nomine, quòd cœlestia bona non mereamur, sed gratuitò, propter Iesum Christum per fidem, accipiamus, Deinde sciamus, hanc esse naturam huius cœlestis hæreditatis, quòd in eo, cuius ius eius est, non tantùm sit efficax post hæc vitam, verùm etiam exerceat vim suam in hac quoq; corporali vita. Et si enim nondum apparuit, quid futuri sumus, vt Ioannes loquitur, & nondum cognoscimus, quemadmodum & cogniti sumus, vt Paulus ait, tamen & in hac vita suus est aliquis fructus cœlestis hæreditatis. Quamdiu hæres puer est, non conceditur quidem ei, vt pro sua libidine fruatur facultatibus hæreditatis suæ, sed est sub tutoribus & actoribus, vt Paulus loquitur, nihil vt à seruo differre videatur, interea tamen, ex hac hereditate pro cōditione generis sui pascitur & vestitur: Sic & hæres cœlestis regni, etsi agit in hac terra adhuc sub tutoribus, & concutitur varijs aduersis, tamen & in hoc seculo, etiam sub ipsis aduersis, habet aliquem gustum suę cœlestis hæreditatis. Vnde Psalmus addit: Non pudebunt in tempore acerbo, & in diebus famis saturabuntur (hoc est) quibus parata est æterna hæreditas, non solùm fruuntur ea in cœlis, sed

sed etiam incipient ea in hac vita frui, quia cum inciderint acerba, aspera, difficilia & dura, vel persecutiones vel bellorum, vel pestilentia, vel famis tempora, non deferentur à Deo, non frustrabuntur spe sua, quam de diuina clementia conceperunt, non confundentur, nō pudefient, sed vt sentiant aliquem gustum æternæ suæ hæreditatis, in persecutione conseruabuntur, in bellis euadent, in pestilentia liberabuntur, in fame saturabuntur: Non affliget, inquit Salomon, DOMINVS fame animam iusti. Magna erat fames tempore Iacobi Patriarchæ in Canaan & Aegypto, sed Iacob cum familia sua in his famis diebus saturatur. Grauis erat fames temporibus Eliæ, sed Elias pascitur à coruo, & à vidua. Dura erat fames temporibus Elizæi in terra Israël, sed vidua, quæ hospitium præbuerat Elizæo in fame, vnà cum vniuersa familia conseruatur. Quid ergo? nullus ne pius fame moritur? Certè multi martyres à tyrannis fame necati sunt. Vbi ergo manet illud: Non pudefient in tempore malo, & in diebus famis saturabuntur? Non est dubium, quin certissima sit huius dicti veritas, est enim oraculum Spiritus sancti. Quare etsi nonnulli immaculati, seu pij videntur in aduersis pudefieri, tamen pudefunt tantum coram hominibus, & ad tempus, non autem coram Deo, & perpetuò, & quanquam aliqui pij fame necati sunt, non tamen perierunt fame, sed ita seruati sunt diuinitus, vt & famem corporalem potuerint boni consulere, & pro corporalibus epulis saturati sint cœlestibus, adeoq; pasti sint eo pane, de quo Christus ait: Hic est panis, qui de cœlo descendit, qui ederit hūc panem, viuet in æternum.

2 Quoniam impij peribunt, & inimici Domini, sicut pingues agni absumuntur, in fumo absumuntur.

GOTTES
freund vnd al-
ler welt feind.

Iterum repetit interitū impiorū, vt retineat pios in officio, quòd etiam si impij aliquandiu felices videātur, tamen felicitas eorum pręgnans sit summa & extrema infelicitate. Vocat autem impios, inimicos DOMINI, quos nō tantū interituros cōmemorat, sed pingit etiā interitumeorū similitudine pinguium agnorū & fumi. Quis autem est, pręsertim in populo seu Ecclesia Dei, qui existimet se esse Dei inimicū? Imò etiam hi, qui nō verentur se profiteri totius mundi inimicos, palām vociferantur, se tamen esse amicos Dei. Quos igitur iudicabimus inimicos Dei? Certē nō eos tantū, qui negāt aut Deum esse, aut Deum curare humana, sed etiā eos, qui cum verbis Deum profitentur, factis negāt. Negant autem Deum factis, quotquot vel aliena à verbo Dei sacra sectantur, quales sunt superstitiosi: vel verbum Dei & predicatorum eius odio habent & persequuntur, quales sunt hypocritę & tyranni: vel cōtempto verbo Dei, viuūt secundum carnem, & aut scortantur, aut iniuste negotiantur, & dāt operam imposturis, aut alia scelera contra legem Domini designant. Vides ergo quantus sit numerus inimicorum Dei in terris, & adhuc miraris, quòd aliquoties accidant bella, fames, pestilentię? Quin potius hoc mirum est, quòd cum mundus plenus sit hostium Dei, Deus tanto tempore ad incolumitatē mundi cōniungere possit? Sed benignitas Dei, inquit Paulus, inuitat te ad pœnitentiam. Et longanimis est, inquit Petrus, erga nos, dum nō vult vllos perire, sed omnes ad pœnitentiam recipere. Deinde vbi nos legimus, sicut

sicut preciosi seu pingues agni absumuntur, in fumo absumuntur, alij ita legunt, sicut adeps agnorum, absumuntur, absumuntur (inquam) vnà cum fumo. Vtraque lectio probabilis est, & instituto Psalmi apta. Si priorē lectionem sequeris, duæ sunt similitudines. Impij pereunt, sicut pingues agni, & pereunt, sicut fumus à vento dispergitur. Agni enim in hunc vsum saginari solent, non quòd homines delectētur pinguedine agni per se, sed quòd agni destinati sint mactationi. Sic & impij saginantur felice rerum suarum euentu, non quòd impietas Deo placeat, sed quòd hac felicitate, nisi pœnitenti am agant, præparentur ad summam & perpetuam infelicitatem. Vnde & Hieremias hunc Psalmum imitatus videtur, cum quærit, quare via impiorum prosperetur: & respondet, congregas eos quasi gregem ad victimam seu lanienā, & sanctificas eos ad diem occisionis. Sicut enim pater familiās, exhibiturus amicis magnificū conuiuium, solet vel agnos vel hœdos aliquot diebus reponere, & lautius pascere, vt pinguescant, nō vt bestię his lautitijs semper fruantur, sed vt destinato tempore occidantur & mactentur, ita solent & impij à Deo reservari ad diem iudicij sui, & interea magna prosperitate ornari, non vt perpetuò sint prosperi, sed vt suo tempore ad lanienam sempiterni interitus rapiantur. Quare, nisi velis vnà cum impijs perire, caue ne deseras vocationem Dei, & imiteris exempla impiorum. Sic & de similitudine à fumo sumpta dicendum est. Nam in alio quoque Psalmo depingitur interitus impiorum fumo: Sicut deficit (inquit) fumus, ita deficient. Et in Oseæ: Sicut pulvis turbine raptus ex area, & sicut fumus de fumario. Ac profectò dissipatio fumi ostēdit aptissimè

interitum impiorum. Fumus enim, cum primum emit-
titur, sic dilatur & exaltatur, ut videatur non tantum
totum aërem impleturus, verum etiam cœlum conscē-
surus, sed si paruulo tantum vento affletur, sic vno mo-
mento dispergitur & dissipatur, ut ne vestigiū quidem
eius reliquū maneat: ita impij videntur initio felicissi-
mi & amplissimi, sed quamprimum spiritus DOMINI in-
sufflauerit in eorum felicitatem & amplitudinem, sic
ea euanescent, ut planè nihil istorum reliqui fiat. Vides,
quod quocumq; circumferas oculos, siue ad stabula gre-
gum, siue ad fumaria ædium, semper obijciatur tibi cō-
cionator, qui te admonitu repentini impiorū interitus
ab exemplo eorū deterreat. Si posteriorem lectionem
sequeris, vnā tantum est similitudo, sumpta à sacrificijs
agnorum. In sacrificijs enim adeps agnorum cōijcitur
in ignem, & vnā cum fumo in tenues auras euanescit.
Sic & impiorum pinguedo seu felicitas, quamprimum
inijcitur in ignē diuini iudicij, ita diffuit & absumitur,
ut ne minima quidem particula eius salua relinquatur.
Quis igitur ad impiorum felicitatem non cohorrescat
potius, quàm eorum mores & exempla imitetur?

5 *Mutuo accipit impius, & non soluit, iustus autem liberalis est
& dat.*

*Quoniam benedicti eius hereditabunt terram, & maledicti di-
spersionem.*

Magnum est discrimen impiorum diuitū. Alij enim
non solum ditati sunt omnibus affluentibus copijs, sed
fruuntur etiam ijs bona tranquillitate vsq; ad extremū
vitæ diem. De quibus Psalmus dicit: Quorum filij sicut
nouellæ plantationes in iuuentute sua, filix eorū com-
posita,

positæ, circumornatæ vt similitudo templi, promptuaria eorum plena eructantia ex hoc in illud. Oues eorum fœtosæ, & quæ sequuntur, notus enim est locus. Alij etsi abundant diuitijs, præ avaritia, tamen nec statuunt modum congregandis quoquo modo, quaquā iniuriæ diuitijs, nec vnquam fruuntur eis. De quibus loquitur Ecclesiastes: Qui amat argentum, non saturabitur argento. Et: Qui amat diuitias, non capiet ex eis fructum. Et iterum: Cunctis diebus vitæ suæ comedit in tenebris, & in curis multis, & in ærumna atq; tristitia. Et extant vulgata dicta: Auarus nisi cum moritur, nil rectè facit. Et: In nullum avarus bonus, in se pessimus. Et: Auaro tam deest, quod habet, quàm quod non habet. Alij multas opes iniquitate & imposturis coaceruant, sed varijs morbis, alijsq; aduersis ita affliguntur, vt etsi cupiunt, non possunt tamen partis opibus frui. Alij sunt quidem satis opulenti, sed non contenti suis rebus, suscipiunt magnum æs alienum, vt ad augendas opes, vel mercaturam exerceant, vel domos domibus, agros agris coniungant. Itaq; fit, vt studio cumulandarum opum nunquam se alieno ære liberare queant. De his ergo concionatur hic versiculus Psalmi: Mutuò accipit impius & non reddit, hoc est, impostor contrahit magnum & graue æs alienum, vt opes suas augeat. Sed dum existimat opes suas crescere, alienum æs ita crescit, vt tandem non sit soluendo. Iustus autem suis contentus, & egenos pro suis facultatibus liberaliter adiuuans abundat. Cum hoc conuenit & illud Salomonis: Alij diuidunt, inquit, propria, & ditiores fiunt. Alij rapiunt non sua, & semper in ægestate sunt. Anima, quæ benedicat, impinguabitur, & qui inebriat, ipse

quoq;

quoque inebriabitur. Quid ergo causæ est, quòd impositores aliena ad se coaceruantes, semper egeant: pij aut sua alienis exponentes, abundant? Sequitur. Quoniam benedicti eius hæreditât terram, maledicti autem eius dispereunt, hoc est, piorum facultates benedicuntur diuinitus, impiorum autem maledicuntur. Vbi autem est benedictio Dei, ibi est rerum omnium copia, etiam in inopia. Vbi verò est Dei maledictio, ibi est inopia, etiâ in summa rerum copia.

Sed quid? an non & pijs sæpenumero accidere solet, vt & ipsi suscipiant æs alienum, & postea non sint soluendo? In libris Regum, mulier quædam de vxoribus prophetarum clamat ad Elizæum: Seruus tuus, vir meus, inquit, mortuus est, & tu nosti, quòd fuerit timēs DOMINVM, sed ecce creditor venit, vt tollat duos filios meos ad seruiendum sibi. Hic fuit vir pius, & tamen accidit ei, quod hic Psalmus dicit: Mutuò accipit, & nō soluit. Quid ergo dicemus? Certè, nulla est maledictio corporalis & externa, quam lex impijs minatur, quæ non etiam pijs in hac vita accidere possit & soleat. Impijs dicit lex, percutiet te DOMINVS egestate, feбри, & frigore, ardore & æstu, et aëre corrupto & rubigine. Ac mox: Percutiet te DOMINVS vlcere Aegypti, scabie et prurigine, vt curari non possis. Sed an non etiam pij solent incurabilibus morbis affligi? Ita & de impijs dicitur, quòd hostes eorum sint eos oppressuri. Ipse (hostis tuus) inquit, fœnerabit tibi, & tu non fœnerabis ei. Ipse erit in caput, & tu eris in caudam. Sed & pij solent ab hostibus suis opprimi, & in ære eorum esse. Huius ergo rei causa, quòd, quæ maledictiones impijs debentur, pijs accidunt, scriptus est hic Psalmus, & extant multæ

multæ aliæ paræneses in sacris literis, vt pij hac rerum confusione non perturbentur, nec suum officium deferant, sicut enim benedictiones, seu felicitates impiorum non possunt esse perpetuæ, sed sunt parasceue ad futuram & sempiternam eorum infelicitatem, ita & maledictiones seu infelicitates piorum, non possunt perpetuò durare, sed sunt proœmia ad futuram, eamq; sempiternam felicitatem. In exemplo, quod suprâ è libris Regum recitauimus, pius vir multo plura debuit, quàm fuerit soluendo. Tantùm autē abest, vt liberi eius, propter parentis debita, in seruitutem conijciantur, vt vidua in signi miraculo iuuetur. Pauxillum enim olei diuinitus ita augetur, ut non solùm creditoribus satisfiat, verùm etiam familia eius ex eo alatur. Quod miraculum non quidem eò respicit, vt singuli debitores vasa plena olei ad satisfaciendum creditoribus consequantur, sed vt Spiritus sanctus testificetur, quòd pijs qui plus debent, quàm sint soluendo, DOMINVS semper euentum dare soleat, vt aut hoc onus ferre queant, aut eo prorsus liberentur. Quare nihil nobis prius, nihil posterius sit vero cultu pietatis, vt DOMINVS vertat omnes maledictiones, quæ nobis accidunt, in benedictiones,

A DOMINO gressus hominis diriguntur, et via eius placet.

Cum ceciderit, non colliditur, quia DOMINVS supponit manum suam.

Pius, qui in vocatione & obsequio Dei ambulat, solet aliquoties non tantùm felicitate impiorum offendi,
c sed

sed etiam metu periculorū ab officio suo deterreri: & multa occurrunt, in quibus, cū nō habeas certum & expressum verbum Dei, nescias, quō te veras, & quid vel faciendum, vel omittendū sūcipias. Etsi enim generalis vocatio Dei certa & reuelata est per Decalogū, videlicet, vt nō habeamus alienos Deos, vt nomen DOMINI Dei nostri glorificemus, vt proximum diligamus, vt non occidamus, nō adulterium committamus, non furemur, & id genus alia: tamen Samuel cū appellaretur ab Israëlitis, vt constitueret ipsis regem, & nondum accepisset responsum à Deo, distractus ancipiti via, nescijt quid placeret Deo, & num populo mos gerendus esset, an non. Et Dauid cū fugeret Saulem, & deliberaret secum, quō esset fugiendum, dubitauit num manendum esset alibi in latebris terræ Israeliticæ, an verò migrandum ad finitimum quandam Regem, apud quem aliquandiu commoraretur.

Et Iosaphat, cū audiret Moabitas & Ammonitas maxima hominū multitudine in fines regni sui incurrisse, suspensus & incertus videbatur, num sese in fugam daret, an arma contra hostes, quamuis longè fortiores, pararet. Deniq; innumeri sunt casus, qui obijciuntur pijs, in quibus ex generali vocatione Dei nihil certi, quod sequantur, habere videtur. Quid igitur faciant? Num deserant officium suū, & sequantur exempla impiorum? Nihil minus. Sed primū omnium curent, vt in generali vocatione Dei perseuerent, et quod habent certum verbum Dei sequantur. Deinde, si inciderit aliquid incerti & periculo si, benè confidant de diuina clemētia, et inuocent Deum, qui cū propē ad sit omnibus inuocantibus ipsū in veritate, teneri non potest,

potest, quin ostendat viā, qua sit ambulandū. Sic enim promittit Psalmus noster. A DOMINO, inquit, diriguntur gressus hominis, videlicet iusti & pii, qui ambulat in obsequio DOMINI. Et qua via DOMINVS pium deduxerit, ea etiā placebit DOMINO. Etsi enim pius in eo periculum adit, & collabitur, tamen nō conteretur, nō peribit, quia DOMINVS supponit manū suam, vt etiam si ille cadat, nō tamē frangatur, nec cōminuatur.

Hæc est obseruabilis promissio, qua Spiritus sanctus docet piorum gressus DOMINO curæ esse, & consilia ac instituta eorum diuinitus fortunari, ac ipsos in periculis conseruari. Sciamus igitur, quòd cūm hīc loquimur de gressibus seu institutis piorum, intelligamus ea instituta, in quibus non habemus certum, manifestum, & expressum verbum Dei. Nam vbi est manifestum & expressum verbum Dei, ibi non est locus deliberationi, sed est simpliciter obediendi necessitas, & in tali obedientia certissimum est auxilium diuinum. Vbi autem non est expressum verbum Dei, ibi cūm omnia sint incerta, opus est deliberatione, vt nihil temerè, & contra voluntatem Dei suscipiatur. Quid igitur faciamus? Primum, consideremus quòd non sit nostræ vel industriæ vel prudentiæ excogitare ex nobis ipsis viam rei bonæ & feliciter gerendæ, sed ex Deo pendeamus, necesse sit. A DOMINO, inquit Salomon, diriguntur gressus viri, quis autem hominum intelligere potest viam suam? Et iterum: Cōr hominis disponit viam suam: sed DOMINI est dirigere gressus suos, Et Hier. Scio, inquit, DOMINE, quia non est hominis via eius, nec viri, vt ambulet, & dirigat gressus suos. Deinde, quia solus DOMINVS est, qui dirigat gressus, & fortunet instituta nostra,

idcirco non est fidendum nostra industria, sed attollendi sunt oculi ad Deum, & innocandus est Deus, ut ipse pro sua clementia sit dux & director nostrorum consiliorum. Huc enim vocat nos non tantum illa consideratio, quam modò recitauimus, sed etiam exempla piorum. DOMINE, deduc me, inquit Dauid, in iustitia tua propter inimicos meos, dirige in conspectu meo viam tuam. Et iterum: Vias tuas DOMINE demonstra mihi, & semitas tuas edoce me. Dirige me in veritate tua, & doce me. Ac rursus: Gressus meos dirige secundum eloquium tuum, & nō dominetur mei omnis iniustitia. Et Iosaphat: In nobis, inquit, non est tanta fortitudo, ut possimus huic multitudini resistere, quæ irruit super nos. Sed cum ignoremus, quid agere debeamus, hoc solum habemus residui, ut oculos nostros dirigamus ad te. Cum autem innuocatio nō inueniat locum apud Deum, nisi proficiatur ex fide, fidem autem promissiones Dei excitent, alant & conseruent: idcirco extant etiam promissiones, quibus Deus clementer recipit, piorum suorum viam sibi curæ fore, & se consilia ac instituta eorum gubernaturum. Intellectum, inquit Psalmus, tibi dabo, & instruam te in via hac, qua gradieris, firmabo super te oculos meos. Et in Esaia: Ego DOMINVS Deus tuus, inquit, docens te vtilia, gubernans te in via, qua ambulas. Postquam igitur incurrimus in aliquam rem, & in ea ita hæremus, ut incerti simus, quid faciendum, quid omittendum sit, proijciamus curam nostram in DOMINVM, & innocemus eum fiducia harum promissionum, quas commemorauimus. Quod cum factum fuerit, Deus teneri non potest, quin ostendat nobis viam, qua sit ambulandum, vel arcano mentis no-

stræ motu, vel amici consilio, vel si aliter fieri non potest, angeli legatione. Et quam viam hoc modo sequimur, eam non dubitemus, quin Deo verè placeat, vt & rectè ad nos dicatur, quod ad Saulem dictum est: Cùm euenerint hæc omnia signa tibi, fac quæcūq; inuenerit manus tua, quia DOMINVS tecum est. Et quod Ecclesiastes dicit: Vade comede in lætitia panem tuum, & bibe cum gaudio vinum tuum, quia Deo placent opera tua. Quòd si quid periculi in ea via acciderit, meminisse debemus, quid illud Psalmi sit: Qui habitat in adiutorio altissimi, in protectione Dei cœli commorabitur. Et illud Esaia: Cùm transieris per aquas, tecum ero, & flumina non operient te. Cùm ambulaueris in igne, nõ combureris, & flamma non ardebit in te. Israëlita habuerunt manifestum verbum Dei, vt relicta Aegypto proficiscerentur in terrã auitam. Sed qua via esset eundum, & quibus alimentis essent sustentandi in deserto, incertum erat. Cùm igitur obsequerentur manifestæ vocationi Dei, & dubitarent de via profectiois ac alimentis, tantum abest, vt in ancipiti defererentur, vt Deus proponeret eis interdiu columnam nubis, & noctu columnam ignis, quæ esset dux itineris, ac mitteret eis Manna de cœlis. Dauid errabat in exilio, & quia sentiebat hoc ei voluntate diuina accidisse, tulit exiliũ, vt vocationem Dei, æquo animo. Sed cùm ad urbem Ceilam diuertisset, & Saul statuisset eã oppugnare, hærebatur Dauid quid faceret, num in vrbe maneret, an aliò se cõferret. Quare cùm Dauid obsequeretur manifestæ vocationi Dei, non est desertus à DOMINO in ancipiti casu, sed admonitus est diuino oraculo quid ipsi factu optimum esset. Iosaphat rex Iudæ renouauit & instauit

rauit collapsam doctrinam & sacra veræ religionis, ac etiam politica iudicia in regno suo. Ad hæc enim officia reges manifesto & expresso verbo Dei vocantur. Postquam igitur in incurfione Moabitarum & Ammonitarum incertus erat, quò se verteret, direxit DOMINVS gressus eius, & ostendit ei per Prophetam, qua via ambulandum sit, vt victoriâ ab hostibus reportet. Cùm enim vel principes vel priuati homines manifestæ vocationi Dei piè obsequuntur, dubium non est, quin etiam in obscuris & incertis consilia eorum diuinitus gubernentur, & fortunentur, ac si quid periculi inciderit, conseruentur. Quod non tantùm de ijs periculis, quæ pio in officijs pietatis accidere solent, intelligendum est, verùm etiam de ijs periculis, in quæ peccator sceleribus suis sese ipse conijcit. Etsi enim Deus nō est Deus volens iniquitatem, nec est autor peccati, tamen si is, qui verè in Christo renatus est, & in manifesta vocatione Dei obedienter ambulat, in aliquo scelere occupatus fuerit, ac mereatur æternam abiectonē & damnationem, Deus tantæ est clementiæ, vt supponat manum suam, ac reducat eum in viam, vt resipiscat & seruetur.

Dauid ipse, qui hunc Psalmum primus recitauit, fecit horribilia scelera adulterij & homicidij, propter quæ dignus fuisset à DOMINO in æternum barathrum conijci. Etsi autem Deus vehementer detestabatur hæc scelera, tamē quia Dauid fuerat antea in Christo renatus, & ambulauerat tam in exilio, quàm in administratione regni, secundū manifestam vocationem, & vt scriptura loquitur, secundum cor Dei, idcirco Deus supposuit ruenti Dauidi manum, & sustentauit eum, vt non periret in sceleribus, sed poenitentiam ageret, & salutem conse-

altra explicatio.

videtur in sceleribus, ac tamen non abiectus.

Aug.

consequeretur. Petrus lapsus est grauiſſimo caſu in ne-
ſariâ abnegationem Chriſti, & meruerat à Chriſto in
perpetuum abijci: ſed quia antea officiũ ſuum ſumma
fide in Chriſtum fecerat, ſuppoſuit Chriſtus manũ ſu-
am Petro: Oraui, inquit, pro te, ne deficiat fides tua,
hoc eſt, ne poſtquam fidẽ abieceris, pereas, ſed fidem
recipias, & ſerueris. Ergo, inquit, Deus reſpicit prio-
rem obedientiam, & merita eius, contra quam Eze-
chiel dicit: Omnium iuſtitiarum ſuarum, quas fecit,
nulla erit recordatio, reſtituit lapſum? Nihil certẽ mi-
nus. Veriſſimum enim eſt, quòd Deus in inſtaurando
lapſo, nõ reſpiciat merita prioris iuſtitie, ſed quemad-
modum in regeneratione conuertit ad ſe impium, &
adoptat eum in filium gratuita tantũ clementia, pro-
pter Chriſtum filium ſuum: ita etiã in conuerſione la-
pſi, reſpicit tantũ ſuam ipſius miſericordiam in filio
ſuo exhibitam, & inſtaurat lapſum, ſola liberali ſua be-
nignitate, qua eum, qui lapſus eſt, etiam ante caſum
complexus fuit. Ioſaphat, rex piſſimus, coniunxerat ſe
cum impio Ahab, qua coniũctione peccabat aduerſus
Deum grauiſſimẽ. Audit igitur à Propheta: Impio ne
præbeſ auxilium, & his qui oderunt DOMINVM, ami-
citia adiungeris? Idcirco iram quidẽ DOMINI mere-
baris, ſed bona opera inuenta ſunt in te, eò quòd abſtu-
leris lucos de terra Iuda, et preparaueris cortuũ, vt re-
quireret Deum. Non prædicat Propheta merita iuſti-
tie Ioſaphat, quæ in conſpectu Dei nulla erãt, ſed præ-
dicat clementiam Dei, cuius gratuito fauore Ioſaphat
antea diligentiſſimẽ obedierat: manifeſtẽ vocationi i-
pſius, et inſtaurauerat in regno ſuo cultum veræ religio-
nis. Qua igitur clementia Deus antea Spiritu ſancto
ſuo,

*Ezech. 18.**non abiectioni**2. Paralip. 19.*

suo, Iosaphatum ad veram pietatem excitauerat & re-
genuerat, eadem postea labentem excepit, & conserua-
uit. Quare summo semper studio sectandæ manifestæ
vocationis Dei teneamur, vt non solum non collida-
mur & comminuamur, cū incidimus in pericula pie-
tatis, verū etiam seruemur & liberemur è periculis im-
pietatis.

3 *Iunior fui, ac senui, & non vidi iustum derelictum, nec semen
eius quærens panem.
Indies beneficus est, & mutuum dat, & semen eius benedice-
tur.*

Sæpè ac multum mirari solemus, cū legimus hunc
versiculum Psalmi, quid sibi velit Dauid, quòd affirmet
se nunquam vidisse semen seu liberos & posteros ho-
minis iusti, victum suum mendicitate quærere. Quan-
tus, obsecro, passim numerus est mendicorum? Num
horum omnium parentes & maiores damnādi sunt in-
iustitiæ & impietatis? Scilicet, Lazari parentes dice-
mus fuisse iniustos & impios, quòd filius eorum quæsi-
uerit panem mendicitate? Diuitis autem parentes fuis-
se homines pios, quòd filius eorum magnas possederit
opes? Sed facilis est huius rei explicatio, si considera-
uerimus, quò respiciat Dauid. Ac vt hunc versiculum
suo ordine percurramus, obseruemus primū, quid il-
lud sit, quod dicit: Non vidi iustum derelictum. Quid
ergo iustissimus omnium clamat in cruce: Deus meus,
Deus meus, vt quid me dereliquisti? De hoc clamore
dictum est aliàs copiosius, quare erimus nunc breui-
res. Iustus videtur aliquoties deserui iuxta humanam
ipsius

ipsius voluntatem, nunquam autem deseritur iuxta veram suam utilitatē. Et deseritur quidem nonnunquam in externis afflictionibus, ut ex ipsis non liberetur mirando quodam modo, secundum externam speciem, sed non ita deseritur, ut non conseruetur in afflictionibus, ad veram & æternam salutem.

Sic filius Dei desertus quidem dicitur à Deo in cruce, quòd Deus non liberauerit eum de cruce externo miraculo, & nō fecerit eum visibiliter de cruce descendere, sicut Iudæi postulabant, & aliquoties Patriarcha mirabiliter è suis aduersis etiam externa specie liberati fuerant. Non est autē desertus, quòd perierit cruce, sed ita conseruatus est, ut tertia die à mortuis resurrexerit, & exaltatus sit ad dexteram Dei.

Sic Stephanus visus quidē est à Deo deseri, quòd saxis ita obrueretur, ut ex hac vita excederet. Non est autem ita desertus, ut inter saxa periret, sed cōseruatus est æterna salute. Cœleste enim oraculum est, quòd hic dicitur, iustum nunquam deseri, quòd vel conseruetur in aduersis externo miraculo, sicut tres adolescentes conseruati sunt in igne Babylonico, & Daniel in lacu leonū, vel, etiam si aduersa ita preualeant, ut morte occumbant, reliquum tamen est aliud seculum, in quo sempiterna vita fruetur. Hæc est vera salus, qua iustus nunquam, siue viuat, siue moriatur, destituetur.

Deinde, quod dicit, semē iusti non querere panem, significat liberos & posteros iustorum à DOMINO ita benedici, ut nunquam necesse habeant victū mendicitate querere. Respicit autem ad generalē diuinę legis promissionem & ordinationem. In Decalogo enim dicitur: Faciens misericordiam in mille, his qui diligunt
d me,

me, & custodiunt præcepta mea. Et in Deuteronomio, So audieris vocem DOMINI Dei tui, atq; custodias omnia mandata eius, benedictus erit fructus ventris tui. Quid ergo? Cum videamus liberos honestissimorum parentum aliquoties non pauperes tantum, sed etiam mendicos esse, dicemus ne illam generalē Dei promissionem aliquoties mendacē esse? Nihil verò minus. Primum enim, si Deus seueriter de hominibus iudicare voluerit, nullum inuenit verē iustū: Si iniquitates, inquit, obseruaueris Domine, Domine quis sustinebit? Et: Omnes declinauerūt. Nihil ergo cuiquam, nec parenti, nec liberis, propter iustitiā eorū debet. Deinde etiam si intel ligamus nomine iusti, non eū, qui verē in se sit iustus, sed eum, qui credit in Christum iustū, & profert quos potest iustitiæ fructus: tamen Deus etiam sic multas & legiti mas habet causas, cur coniiciat aliquoties piorū liberos, non in egestatē tantum, sed etiam in mendicitatē, ac maneat nihilominus perpetuū in promissis suis verax, & in ordinationib. suis cōstans. Nā quod dicitur in generali promissione & ordinatione, Deū facere misericordiā multis posteris eorum, qui custodiunt præcepta sua, Ezechiel interpretatur sic intelligendū: Si posterī maiorū suorū pietatem sectentur, Si aut maiores fuerint pij, posterī aut impij, manet etiam ipsos impiorū maledictio. Si vir fuerit iustus, inquit Ezechiel, & fecerit iustitiam ac iudicium, vita viuet, ait DOMINVS Deus. Quod si genuerit filium latronē, effundentem sanguinē, nunquid viuet? Non viuet, sed morte morietur, sanguis eius in ipso erit. Sed demus, non tantum parentē, verū etiam si filium esse pium ac iustū, attamen etiam sic diuino consilio fieri potest, vt filius necesse habeat panē medicamen

Ezech. 18.

te quæ-

re quæfere. Quod enim Christus apud Ioannem de homine à natiuitate cæco, de quo discipuli interrogabant, num ipse, an parentes eius peccassent, vt cæcus nascetur, dicit: Neq; ipse peccauit, neq; parentes eius, sed vt manifestentur opera Dei in illo, hoc idem de mendicis liberis piorum parentum affirmari potest. Coniiciuntur enim aliquoties liberi in mendicitate, neq; propter ipsum, neq; propter parentum eorum peccatum seu iniustitiam, sed vel vt nomen Dei per illos illustretur, quale exemplum est illius cæci mendici, cuius modò mentionem fecimus, vel vt fides eorum probetur, nā sicut morbis, captiuitatibus, seruitutibus, & alijs id genus ærumnis, ita & paupertate ac mendicitate fides piorum probari solet: vel quod Deus velit mendicitatem cōpensare cœlestibus & æternis diuitijs. An non Iob fuit omnium virorum, qui suis temporibus in terra fuerūt, iustissimus? Si negaui, inquit, quod volebā, pauperibus, & oculos viduæ expectare feci, Si comedi buccellam solus, & nō comedit pupillus ex ea? Et tamē liberi eius, nō quidem mendici fiunt, sed quod horribilius est, omnes simul domus ruina opprimuntur. Quid ad hæc dicemus? Si quidem impij fuerunt, meritis luerunt pœnas: si autem pij, accidit hoc eis, vt parentis tolerantia probaretur: & vt veritas diuinæ promissionis cōstet, acceperūt ipsi pro caduca vita, cœlestis & æternæ vitæ felicitatem.

Lazarus, de quo apud, Lucam mendicus est, & habet optimum testimonium pietatis suæ. Quod si piorum liberi non sunt obnoxij mendiciti, quāto minus homines ipsi pij deberent esse mendici. Sed vt Deus in promissis verax, & in ordinationibus suis constans inueniretur, reposuit Lazaro pro breui mendicitate æternas diuitias,

tias. Quare, cū videmus piorum hominum liberos panem mendicitate quærere, non arguamus cœleste oraculum mendacij, nec damnemus vel parentes medicorum, vel mendicos ipsos peccati, & iniustitiæ, sed afficiamur misericordia erga alienas grumnas, & cogitemus Deum non commissurum, quin pio hanc terrenam infelicitatem compensaturus sit cœlesti felicitate.

Eodem planè sensu dicitur, quod sequitur: Iustus beneficus est, & dat mutuū, & semē eius benedicetur, hoc est, Qui iustè negotiatur, & iuuat partis bonis egentem liberaliter, hic nō solū ipse consequitur à DOMINO benedictionem opum suarum, verū etiā posteri eius benedicentur diuitijs. Dispersit, inquit alius Psalmus, dedit pauperibus, iustitia eius manet in seculū seculi. Qui enim ea est iustitia, vt egenis clementer & largiter beneficiat, huic DOMINVS vicissim benefaciet, etiam in futuris hominum ætatibus, in posteritate eius. Id enim est manere iustitiam in seculum seculi. Hoc si non fiat secundum rationem regni Mosi, certè fiet secundum rationem regni Christi.

Alia enim est ratio regni Mosi, alia regni Christi: in illius regno politica tractantur, & externa promittuntur. Quare, cū DOMINVS recipit se gratuita sua misericordia redditurum iusto mercedem, non est alienū à sententia Spiritus sancti, vt intelligas de mercede politica, in hoc externo seculo, siquidem respexeris ad rationem regni Mosi.

In regno autem Christi tractantur spiritualia, & promittuntur cœlestia ac æterna. Quare si non contigerit iusto merces politica, iuxta regnum Mosi, nihil certius est, quàm quòd contingat ei merces spiritualis & cœlestis

stis, iuxta rationem regni Christi. Apud Marcum dicitur: Nullus est qui reliquit domum, aut fratres, aut sorores, aut matrem, aut uxorem, aut liberos, aut agros, mea causa & Euangelij, quin recipiat centupla, nunc in tempore hoc domos & fratres, & sorores, & matres & liberos, & agros cum persecutionibus, (hoc est, quantumuis graues sunt persecutiones) ac in seculo venturo vitam æternam. Non solum autem is reliquit facultates suas propter Christum & Euangelium eius, cui propter huius confessionem tyrannidē auferuntur, verum etiam is, qui ad testificandam fidem ex charitate suam, proximum liberaliter facultatibus suis iuuat. Promittitur ergo ei retributio centupla, & disertè additur, **NON IN HOC, TEMPORE.** Quibus verbis significatur retributionem centuplam non reijci tantum in futurum seculum, sed etiam contingere in hoc seculo. Nihilominus tamen sententia huius promissionis exigenda est tam ad rationem regni Christi, quam ad rationem regni Mosi. Ac in nonnullis quidem impleta est hæc promissio, iuxta rationem regni Mosi, quod pro desertis facultatibus propter confessionem Christi, receperint in hoc seculo centupla politicè. Exempla sunt Iouianus & Valentinianus, qui cum relinquerent cingulum seu dignitatem militarem propter Christum, receperunt postea mercedis loco regnum Romanum, & maiestatem Imperatoriam. Catholicè autem & vniuersaliter impleri solet in hoc seculo, iuxta rationem Regni Christi, vide licet, quod pro ablatis facultatibus, non solum reddatur pio animus sua sorte contentus, & in exilio ac egestate tam tranquillus, quam antea, presentibus adhuc facultatibus, verum etiam excitentur alij homines, qui eum non

minori fauore prosequuntur, nec illiberalius adiuuantur, quam si adhuc haberet omnes amicos & agros, quos deseruit. Hęc est spiritualis & cœlestis in hoc seculo retributio. Nam quę sequitur in altero seculo, nō potest humana lingua satis explicari. Talem retributionē acceperūt Apostoli in hoc seculo. Pro retribus enim suis, quę reliquerunt ad vocationem Christi, nō acceperunt in his terris multas & magnas opes politicę, iuxta rationem regni Moſi, sed acceperunt eas spiritualiter, iuxta rationem regni Christi, quia & lātissimo animo suam extremam paupertatem propter Christum tulerunt, & nihil vnquam necessariorum rerū eis defuit, & quocumque peruenerunt, suos fratres, sorores, matres & agros inuenerunt, Quasi dolentes, inquit Paulus, semper tamen gaudentes: quasi pauperes, multos tamen ditantes: vt nihil habentes, & tamen OMNIA pōsidentes. Et iterum: Testimonium reddo vobis, quōd si fieri potuisset, oculos vestros effoscos dedissetis mihi. Nec vnus est Paulus, nec vnus Petrus, quibus tale quid contigit, sed vt promissio est vniuersalis, ita & singuli pij, qui promissioni credunt, & ex fide vocationem Christ sequuntur, suam accipiunt in his terris bonorum retributionem. Quare vnum hoc sit studium nostrum, vt etſi non sumus Apostoli, credamus tamen Apostolico sermōni, & accipiemus etiam mercedem Apostolicā. Non pro eis tantum rogo, inquit Christus, sed & pro ijs, qui credituri sunt per sermonem eorum in me.

□ *Recede à malo, & fac bonum, & inhabita perpetuò.
Quia DOMINVS amat iudiciũ, & non deseret beneficos suos,
in æternum custodientur, semen autem impiorũ excindetur.*
Vide,

Vide, quoties eandem sententiã, variata tantũ ser-
monis figura, repetat. Cor enim exẽplo et felicitate im-
piorum perturbatũ indiget copioso verbo, vt mitige-
tur et in officio cõtineatur: Recede, inquit, à malo. Nõ
ignoro te exemplo impiorũ sollicitari, ad deserendum
tuum officium, & sectandam malitiã ac impietatẽ. Tu
verò non id agendũ suscipias, ad quod impij te inuitãt,
sed quod verbũ DOMINI iubet: Primũ, recede à ma-
lo. Hoc malum est peccatum, quod est agnoscẽdum &
detestandum, nam hoc est initium verę pœnitentię, &
obedientię erga Deum, vt peccatum agnoscas, deteste-
ris & fugias. Deinde, fac bonum. Non sufficit, vt pecca-
tũ agnoscas, & à peccato recedas, sed necesse habes e-
tiam bonum facere. Hoc bonum præcipuè est agnosce-
re clementiã Dei, & credere in filium Dei DOMINVM
nostrum Iesum Christum, quod Deus propter hunc sit
nobis propitijs, & adoptet nos in filios & hæredes om-
nium cœlestium suorum bonorũ. Hoc bono opere ni-
hil est melius, nihil magis salutare. Deinde faciendum
est & illud bonũ, vt ex hac fide in obsequio præcepto-
rum Dei ambules, sicut Decalogus ea præscribit.

Hęc est generalis obedientia, quam omnes Deo præ-
stare debemus. Postremò, Inhabita, inquit, perpetuò.
Hoc etsi pro promissione intelligi potest, vt sit sensus,
Si recesseris à malo, et feceris bonũ, inhabitabis perpe-
tuò in terra trãquillus, sicut et suprà dictũ est: Mansue-
ti hæreditabũt terrã, et delectabuntur multitudine pa-
cis: tamẽ haud ineptè etiam pro præcepto intelligitur.
Cũ enim his verbis: Facito quod bonum est, requiratur
generalis obedientia Decalogi, nunc illis verbis: Inha-
bita perpetuò, requiritur specialis obedientia, quam
in sua

in sua quisque vocatione præstare debet. Sunt enim qui cum vident se in sua patria, inter suos ciues, & in suo opificio, tanta esse infelicitate, vt vix se à mendicitate tueri possint, deliberant secum, de desertione non tantum pietatis, verum etiam patrię et opificij sui. Ac alius quidem, relicto loco, in quo doctrina verè pia traditur, commigrat spe parandarum diuitiarum in aliam regionem, in qua impius cultus Dei obtinet. Hic certè conijcit se ipse in manifesta pericula. Quę temeritas, quomodo posset esse felix? Alius aliud subinde opificiũ alio commutat & nunc exercet agriculturam, nunc mercaturam, nunc opificiũ mœchnicum, nunc, si Deo placet, medicinam. Videas enim multos, qui cum periculũ fecerint in varijs generibus vitę, ac in nullo eorũ consecuti sint opes, pro suo voto, cõferunt se tandem ad exercitiũ medicinę. Alius deserto politico genere vitę, cõfert se in eremum aut monasteriũ. Sed hanc varietatẽ et inconstantiam improbat Spiritus sanctus, & dicit: Inhabita perpetuò, hoc est, Non hoc volo, vt hinc inde in terra migres, sed vt sedem stabilem, & certum domiciliũ hab eas. Fieri quidem solet, vt de loco in locũ, de regione in regionẽ, singulari vocatione Dei, aut persecutione aut alia quadam necessitate, migrandum sit, sicut Patriarchę aliquoties sedes suas mutarunt, & qui in exiliũ eijciuntur, necesse habent aliò se cõferre, diuina vocatione. Si autem nihil tale sese obtulerit, nõ sunt mutandę sedes, sed inhabita, inquit, perpetuò: Non fines te, infelicem rerum tuarũ euentum, ẽ sedibus tuis exturbare, quasi vnà cũ sedium mutatione, etiam fortunã sis mutaturus, sed man eas stabilis in tuo domicilio, et opificio, & pergas in vera pietate ambulare. Et si enim hoc præ-

fenti

senti tempore, malè tibi euenire videtur, et impijs tuis vicinis, benè, tamen fieri non potest, vt hæc rerum confusio & perturbatio diu constare queat. **DOMINVS** enim amat iudicium Filij huius seculi, cùm vident bonis malè, & malis benè euenire, existimant Deum non curare res humanas, nec delectari iusto & legitimo rerum ordine, nec requirere, quid cuiq; in terris accidat: idcirco vsurpant sibi licentiam peccandi, & hoc solum curant, vt homines lateât, aut hominibus sua probent. Repleta est terra, inquit Ezechiel, sanguinibus, & ciuitas repleta est auersione, quia dixerunt: dereliquit **DOMINVS** terram, & **DOMINVS** non videt. Sed Spiritus sanctus contrarium docet. **DOMINVS**, inquit, amat iudicium, hoc est, **DOMINVS** non dereliquit terrâ, nec despicit humana, nec delectatur rerum confusione & perturbatione, sed amat iustum & legitimũ tam humanarum, quàm omniũ aliarum rerum ordinẽ, (hoc enim est iudicium) nec simpliciter eum amat, sed zelo tuendi & conseruandi eius ardet. Ego sum, inquit **DOMINVS**, Deus tuus fortis Zelotes. Et: **DOMINVS**, Zelotes nomen eius. Hic autem est iustus et legitimus ordo, vt benefici, qui custodiunt mandata Dei, non deferantur, sed sicut ipsi custodiunt mandata Dei, ita vicissim et ipsi et posteriores eorum à Deo custodiãtur, impij autem, non tantũ ipsi pereant, sed etiam semẽ, hoc est, posteritas eorum excindatur. Hunc rerum ordinem constituit lex ipsa diuina: Ego sum, inquit **DOMINVS**, Deus tuus, visitans iniquitatem Patrum, in filijs, vsq; ad tertiam, adeoq; quartã generationem eorum, qui me oderunt, et faciens misericordiam in mille, his qui diligunt me, et custodiunt præcepta mea. Hic est iustus et legiti-

*Cicero lib. 3. de
natura Deor.*

mus rerum ordo, & hoc est iudicium Dei, ut pijs, nō ip-
sistantum, verū etiam posteris eorum benefiat, ab im-
pijs autem, non ab ipsis solū, verū etiā à liberis, à ne-
potibus, à posteris eorum poenæ expetantur. O miram
(iterū vociferantur filij huius seculi) equitatē Dei. Fer-
ret ne vlla ciuitas latorē istiusmodi legis, ut condēna-
retur filius aut nepos, si pater aut auus deliquisset? Non
ferret, non certē ferret. Nam lex etiā ipsa Mosi præscri-
bit, quod in hac re est equissimū: Non occidētur, inqui-
ens, patres pro filijs, nec filij pro patrib. sed vnusquisq;
pro peccato suo morietur. Et repetijt Ezechiel: Anima,
inquiens, quæ peccauerit, ipsa morietur, filius nō porta-
bit iniquitatē patris, neq; pater portabit iniquitatē filij,
sed iustitia iusti erit super eū, & impietas impij erit su-
per eū. Quid igitur dicendū est de diuino illo iudicio et
ordinatione, cuius paulò antè mentionē fecimus, vide-
licet, quòd Deus nō solū benefaciat posteris, propter
maiorum suorum pietatē, verū etiā puniat posteros,
propter maiorum suorum impietatem? Dicamus pri-
mū de eo, quod in Decalogo scriptū est: Faciens mi-
sericordiam in mille, his qui diligunt me, & custodiunt
mandata mea. Et Psalmus noster dicit: Non deseret be-
neficos suos: In æternū custodientur, hoc est, etiam po-
sterieorum seruabuntur. Hæc enim non eò respiciunt,
quòd Patriarcharum merita tātæ sint dignitatis, ut pro-
pterea DOMINVS tam ipsis, quàm posteris eorum be-
nefaciat, sed cōmendant liberalem Dei misericordiam,
quòd sicut Deus contulit beneficia sua in Patriarchas
gratuita clementia, ita velit etiam ea conferre gratuita
clementia in posteros eorum. Recordare, inquit Mo-
ses, Abrahami, Isaac & Iacob seruorū tuorum. Non ia-
ctat

Etat coram Deo merita horum Patriarcharum.

Nam de Abraamo ipso, qui Patriarcharū præcipuus est, scriptura testatur, quòd cū vnà cum patribus suis seruiret dijs alienis, liberatus sit idolatria, diuino & gratuito fauore. Et aliàs scriptum est, Abraamum iustificatum FIDE. Non igitur suis meritis, sed gratuita tantū clementia Dei propter Christum iustificatus est. Quòd si Deus, ne in Abraamo quidē ipso merita iustitiæ, quæ respiceret, inuenit, quomodo propter dignitatem meritorū eius, posteris benefaceret? Sed Moyses idcirco commemorat corā Deo in precibus suis nomina Patriarcharum, vt admoneat Deū gratitiæ suæ promissionis, qua olim ex mera misericordia receperat se posteros eorū augere, & in regno Canaā collocare. Vnde & in precibus Mosi sequitur: Quibus iurasti per te ipsum, dicens: Multiplicabo semen vestrum sicut stellas cœli. Et aliàs: Non propter iustitiā & æquitatē cordis tui ingrederis, vt possideas terras Gentium, sed vt Dominus compleret verbum suum, quod sub iuramento pollicitus est patribus tuis. Sicut ergo Deus patribus nullo meritorū respectu, sed tantū gratuito promisit possessionē terræ Canaan, & alia beneficia, ita & præstitit ea posteris eorum gratuito. In tertio libro Regū, irascitur DOMINVS Salomoni, quòd ædificasset vxoribus templa alienorum deorum: Scindā, inquiens, regnum tuum, & dabo illud seruo tuo. Veruntamen in diebus tuis non faciam, propter Dauid patrē tuum, de manu filij tui scindam illud, nec totum regnum auferā, sed tribum vnā dabo filio tuo propter Dauid seruū meum. Hic iterum non prædicantur merita iustitiæ Dauidis, quæ ne ipse quidem agnoscit: Quis ego sum, inquiēs, & quæ domus

Iosue 4.

mea, quòd me sic extollis? Et aliàs: Non intres in iudiciũ cum seruo tuo, quia non iustificatur in cõspectu tuo omnis viuens, Sed prædicatur gratuita clementia Dei & veritas promissionum eius. Benefacit enim Deus posteritati Dauidis, propterea quòd gratuito promiserat Dauidi se missurum ex familia sua Christum, & conseruaturũ regnum in posteritate eius, donec Christus veniret. Quare sicut hoc promissum est Dauidi gratuito, sine vllõ meritorum eius respectu, ita seruatur est posteritati, sine vllis meritis, sed tantũ gratuita clementia; & vt veritas promissionis Dei illustretur. Sed quod dicitur: Faciens misericordiam in mille his qui diligunt me, & custodiunt mādāta mea, maximè omnium respicit in Iesum Christum filiũ Dei, qui solus tanto dilectionis ardore complexus est Deum Patrem suum, & mādāta eius custodiuit, vt impetrauerit ab eo, quòd suscipiat propter ipsum in gratiam, & adoptet in filios suos omnes illos, qui in ipsum credunt. Quotquot, inquit, receperũt eum, dedit eis potestātẽ filios Dei fieri, his, qui credũt in eum. Et mox: De plenitudine eius nos omnes accepimus, & gratiam pro gratia. Atq; hætenus de eo, quòd Deus benefacit posteris propter maiorum pietatem. Deinde consideremus & illud, quòd Deus puniat posteros propter maiorum suorum impietatem. Nō enim sentiendum est, quòd Deus puniat innocentem filium, propter nocentẽ patrẽ, quid enim esset iniquius? sed quòd Deus tanta sit clementia & bonitate, vt soleat aliquandiu ad maiorum impietātẽ conuiuere, & poenitentiaẽ eorum expectare, adeoq; externum supplicium impietatis differre vsq; ad posteros ipsorum, si fortè vel hi à maiorum impietate resipiscant, & supplicium euadant,

dāt. Si verò posteri impietatem maiorum ita imitātur, vt non solum non resipiscāt ab ea, verū etiam cumulent eam, & propugnent, nec vlla sit amplius spes resipiscētiæ eorum, hic iam tempus est, non inferēdi tantum, sed etiam augend supPLICIJ. Tunc enim non innocens, sed nocētissima posteritas suo ipsius merito puni-
tur. Adam peccauit, & vniuersa posteritas eius cōiecta est in mortem. Quid? num posteritas innocēs? Nequaquam, sed quæ hæreditatem peccati à parente suo accepit. Propter vnum hominem, inquit Paulus, peccatū in mūdum introijt, ac per peccatum mors, & sic in omnes homines mors peruasit, quatenus OMNES peccauius. In libro Samuelis & Regum, deletur nunc posteritas Saulis, nūc posteritas Ierobeami, nunc posteritas aliorū Regum, propter impietatem maiorū suorum. Num autem horum posteritas innocens est? Tātum abest, vt sit innocens, vt etiā maiorum suorū impietatem auxerit. Quare iustissimo Dei iudicio fit, vt pendat pœnas impietatis maiorū suorum. Itaq; quod dicitur: Visitās iniquitatem patrum in filiis in tertia & quarta generatione. Et: Semē seu posteritas impiorū excindetur: intelligendum est de filiis, de generatione seu posteritate, quæ patrum suorū impietatem sēctatur. Tātum enim abest, vt Deus innocentē posteritatem propter nocentes maiores puniat, vt si quis in ea posteritate, quæ iam præsen-
ti supplicio subiecta est, pœnitentiam agat, & cōuertatur ad DOMINVM, huic commutet DOMINVS gratuita sua clemētia supplicium in benedictionem & organon salutis. Leui, filius Iacob, sēuijt vnā cum fratre Symeone, violata fide, aduersus ciues Sichimitas. Maledicitur igitur à Patriarcha Iacob, non ipse tantum, sed &

posteritas eius: Maledictus, inquit Iacob, furor eorum, quia pertinax, & indignatio eorū, quia dura. Diuidam eos in Iacob, & dispergam eos in Israël, hoc est, posteritas eorum non accipiet propriam hæreditatem in terra Canaan, sicut alix tribus, sed necesse habebunt dispersi in aliarum tribuum hæreditatibus habitare.

Sed cum postea Leuitæ conferant opem suam cum Moise, ad vindicandam idolatriā Israëlitarum, commutata est maledictio eorum in benedictionem, vt & sanctissimo Ecclesiæ ministerio præficerentur, & ab alijs tribubus decimas, & partes sacrificiorū acciperēt. Tota Adæ posteritas obnoxia est morti, propter parentis sui peccatum, quod in ipsam propagatū est. Sed quotquot in hac Adæ posteritate conuertuntur ad DOMINUM, & credunt in semen mulieris, seu filium virginis, qui fuit Adæ promissus, ijs mors non amplius erit mors, sed somnus, è quo excitentur ad veram & æternam vitam. Ac breuiter, verissimum est, quod Psalmus dicit, DOMINVS amat iudiciū. Hæc enim est certissima regula, & sacrosanctum ac inuiolatū iudicium Dei, quod etiā si impij diu videātur felices, & pij infelices, tamen impijs vnā cum posteris eorum, qui impietate maiorum suorum sectantur, malè tandem eueniet, pij autem & posteris eorum, qui sunt imitatores pietatis maiorum suorum, benè eueniet, si nō in hoc seculo, quod profectū est fragile & caducum, certè in vcturo, quod est perpetuū constans & firmum. De qua re, cū multa alia dicta & facta, in literis Prophetis & Apostolicis, tum præcipuè, quod scriptum est apud Euāgelistam Lucam de diuite helluone & paupere Lazaro, testimonium dicit. Quare nō offendamur felicitate impiorum, vt desera-

mus nostrum officium, sed recedamus à malo, & faciamus quod bonum est, vt & nobis ipsis, & posteritati nostræ à DOMINO benefiat.

Iusti hæreditabunt terram, & habitabunt semper super ea. 𐤀

Admiratione non indignū est, quòd cūm Dauid suscepit in hoc Psalmo versiculos eius, iuxta ordinē Alphabeti Hebraici recitandos, omittat literam 𐤅 Ain, & pro ea ponat literam 𐤆 Zadik, quam tamen mox suo loco repetat. Fortassis initio, nisi me coniectura fallit, sic scriptum fuit, עֵינֵי צַדִּיקִים Oculi iustorū. Sed scriba qui spiam offensus absurditate, vt putauit, sententiæ, quid enim oculis cum hæreditate terræ? scripsit, omisis oculis: Iusti hæreditabunt terrā. Et si aut non est opus, vt de hac re multū simus solliciti, potuit enim Dauid, vel sine ordine literarum versiculos Psalmorum recitare, sicut multos recitauit, vel transponere literas, à capite versiculorū pro suo arbitrio: tamen cū legimus: Oculi iustorum hæreditabūt terrā, nihil absurdi dicitur. Solet enim scriptura aliquoties visu oculorum, delectationem & voluptatem significare: Videbis, inquit Esaïas, & afflues, hoc est, delectaberis, & hilariseris. Et paulò post in hoc ipso Psalmo: Cū perierint peccatores, videbis, hoc est, gaudio afficeris. Cū igitur Psalmus suprà dixit, pios hæreditare terram, nunc addit etiam oculos eorum hæreditare terram, & commorari in ea semper, videlicet significat, quòd pii non simpliciter possideant terram, verū etiam fruātur ea magna animi delectatione, & habeant in ea firmam & stabilem sedem. Alij sentiunt, quòd cūm singulæ literæ Alphabeti contineant bi-

ant binosque versiculos, omisum sit, incuria scribarum, hemistichium, quod Græcus interpretes exprefit, videlicet: Iniusti punientur. Et pro (iniusti) fuerit apud Hebræos scriptū *עוֹלָם* Hauilin. In qua dictione est litera *ו* Ain initialis. Præponendum est autem hoc hemistichium posteriori præcedentis versiculi, vt legatur: Iniusti punientur, & semen impiorum peribit. Sed quicquid id sit, certè Psalmus iterum opponit inter se iustos, & iniustos, & dicit, quòd iniusti seu iniqui puniuntur, non ipsi tantum, sed etiam semen seu posteritas ipsorum, iusti autem & pii hereditent terrā, & fruuntur beneficijs eius. Hoc impletur in multis pijs, iuxta rationem regni Mosi, sicut supra exposuimus, maximè autem omnium impletur in eis, iuxta rationē regni Christi. Regnum meum, inquit Christus, nō est de hoc mundo: ergo etiam terra eorum, qui sunt Christi, non est de hoc mundo. Primum enim, quia piorum municipatus præcipuè est in cœlis, idcirco sunt ea terræ parte quantumuis parua, quam in præsentia vident & diuina clementia possident, contenti. Filijs huius terræ nullus ager, nulla terra satis ampla est. Et quemadmodū canis, cū videt ante se duo panis fragmenta posita, etsi alterum arripit & deuorat, tamen in alterum sic inhiat, vt illud prius ab alienato planè sensu ac nulla voluptate in ventrem trajcere videatur: ita filij huius seculi quātam cūq; terræ partem possidendam acquisierint, nihil se habere existimant, nisi & vicinam occupauerint.

Alexander Magnus totius orbis domitor ac Monarcha, cū audisset Philosophum differētem, plures esse mundos, ingemuisse dicitur, quòd vix adhuc vno mundo potitus esset. Sic est hominum huius seculi affectus,

quo

quò plura possident, plura appetunt. Cùm enim Deo ipso, qui solus est vera rerum satietas, careant, fieri non potest, vt etiam si totius terræ dominationem haberēt, satis sibi diuitiarū, honoris & potentiz habere viderentur. Sed longè alius est affectus, alia fors piorum. Hi enim etsi vel vnum saltem vestigium pedis in terra possident, tamen quia possident per fidem filium Dei, qui est exaltatus ad dextram Dei, & est Dominus cœli ac terræ, idcirco sunt & ipsi per filium Dei possessores cœli & terræ. Vide mihi nunc, vbi sint maiores diuitiz? Num, vbi quidem est externa totius huius terræ possessio, animus autem Deo vacuus? an vbi vix est vestigij in hac terra possessio, & animus Deo plenus? Didici, inquit Paulus, in his, in quibus sum, contentus esse. Noui & humilis esse, noui & excellere. Vbiq; & in omnibus institutus sum, saturari & esurire, abundare & penuriā pati.

Vnde, quæso, Paulo tanta opulentia & gloria, in media etiam rerum penuria, & ignominia? Omnia, inquit, possum per Christum, qui me corroborat. Et aliàs dicit: Magnus quæstus est, pietas cum animo sua sorte contento. Quare cùm iustis promittitur hæreditas terræ, non dubitemus de huius promissionis veritate, quippe quòd & piorum Patriarcharum familijs data sit possessio terræ Canaan, & multis alijs pijs contigant, diuina clementia, principatus & regna huius terræ. Sed intelligamus hanc promissionem præcipuè secundum rationē regni Christi, qua pijs multo maiora dona in minimis suis facultatibus, liberali Dei benedictione contingunt, quàm impijs, in amplissimis huius terræ regnis. Deinde ponamus etiā nobis accidere, quod Paulus de

se & collegis suis recitat: Ad hoc usque tempus, inquit, esurimus, sitimus, nudi sumus, colaphis cedimur, & incertis sedibus vagamur, idque duret non vno tantum, & altero anno, sed usque ad extremum huius vite spiritum: nihilominus tamen veritas huius promissionis de hereditate terre, in vere pijs impletur. Quod enim pii non consequuntur in hac corporali vita, hoc compensatur eis in ventura et æterna vita, tanto scœnore, ut longè maiora bona eis contingant, quàm quæ oculus vidit, auris audiuit, et in cor hominis ascenderunt. Dum igitur proponuntur nobis promissiones de terrenis bonis, etsi hæc suum quoque locum habent, tamen attollamus nos oculos nostros in cœlum, & sciamus ibi veram nostram hereditatem nobis repositam esse, cuius gustum quidem in hac vita percipere licet, in ventura autem plenitudinem & satietatem accipiemus.

✧ *Os iusti dicit sapientiam, et lingua eius loquitur iudicium.
Lex Dei eius, in corde ipsius, non nutabunt gressus eius.*

Suprà dixit, piũ non collidi, etiã si ceciderit: & additur causa, quia gressus pii diriguntur à DOMINO, & DOMINVS supponit manum suam: Nunc dicit piũ nõ solum nõ collidi, verũ metiã gressus eius nõ nutare, nec vacillare. Et tamen nihil veri dissimilius videtur. Tanta enim est rerum cõfusio, ut existimes nõ pios, sed impios in rebus suis stare, ac erectos sine vlla pedũ offensione ambulare. Nos aut̃ iudicare debemus, non secundũ externam & caducam rerum speciem, sed secundũ firmam & stabilem veritatẽ. Etsi enim gressus piorum videntur varijs casibus ita impelli, ac nutare, ut fieri

non

non possit, quin concidant, & collidantur, tamen cum Spiritus sanctus dicat: Non nutabunt gressus eius, fixum, & in perpetuum ratum est, non quod homini, sed quod Spiritui sancto visum fuerit. Et additur hic etiam perspicua ratio, cur gressus hominis iusti seu pii non vacillent: Quia os iusti (inquit) dicit sapientiam, & lingua eius loquitur iudicium, & lex Dei sui est in corde eius. Iustus idcirco non nutat, non vacillat, non concidit gressu suo, quia non sequitur exempla impiorum, seu multitudinis hominum, nec sequitur sententiã humanæ sapientiæ, sed habet præ oculis cordis sui legem DOMINI, & loquitur ore ac lingua sua verbum DOMINI. Qui autem legem & verbum DOMINI meditatur & sequitur, fieri non potest, ut nutet ac labatur. Primum enim, verbum DOMINI est vera lux, quæ viam, in qua ambulamus, ita illustrat, ut non impingas ad lapidem pedem tuum: Lucerna pedibus meis, inquit aliàs, verbum tuum, & lumen semitis meis. Et iterum: Præceptum DOMINI lucidum, illuminans oculos. Et Petrus: Habemus, inquit, firmiorem sermonem Propheticum, cui dum attenditis, ceu lucernæ apparenti in obscuro loco, rectè facitis. Cum igitur verbum DOMINI sit lucerna nostra, non offendit pedem suum ad lapidem, quæ eam in itinere ad cœlestem salutem sequitur. Deinde verbum DOMINI sola est vera sapientia & rectum iudicium. Est quidem sua sapientia & suum iudiciũ in Oeconomia, in Politia, in Philosophia, quæ & in suo loco & ordine suã habent vtilitatem. Nos autem loquimur nunc de ea sapientia, quæ nos in summis periculis servat, & de eo iudicio, quod nos ad cœlestia & æterna bona cōsequenda dirigit. Hanc sapientiã &

iudicium nulla tradit hominum philosophia, sed solū verbum Domini. Lex Domini, inquit, immaculata, cōuertens animas, testimonium Domini fidele, sapientiā præsians paruulis. Quare, qui proponit sibi ob oculos cordis sui Legem DOMINI, & ore ac lingua confitetur verbum Domini, quod est vera lux, sapientia & iudicium, vt sequatur præcepta Dei, & ambulet in vocatione eius, hic etsi videtur ingressibus suis nutare ac stultè facere coram hominibus, tamen sustentatur à Deo, & habetur coram omni cœlesti cœtu sapientissimus. Quod vt rectius intelligamus, explicabimus aliquot exemplis. Petrus & Ioannes statuuntur Hierosolymis ad Synedrion Pontificum, qui minabantur eis vincula, carceres, & mortem, si deinceps Iesum à se crucifixum, prædicarent esse Christum. Quid ergo facerent, ne gressus eorum nutarent? Hic si adhibuissent in consiliū aliquod prudentem huius seculi, iudicasset eos stultissimè facere, si pergerent confiteri Iesum Christū, & non parère mandatis Pontificum: ac existimasset eos hoc instituto non tantū gressibus suis nutaturos, verū etiam toto corpore collidendos. Cur enim exponerēt se tantis periculis propter eam religionem, quæ non solū incerta esset, verū etiam à summis Pontificibus damnaretur? Ac demus eam veram & certam esse, an non sapientis est, seruire temporari, & tuta potius, quàm periculosa sequi? Sed si Apostoli hoc consilium secuti essent, gressus eorum verè nutassent, & ipsi toto corpore collapsi concidissent.

Nunc autem lex Dei erat in corde eorum, & loquuntur ore ac lingua sua sapientiā & iudicium, hoc est, verbum DOMINI. Non est aliud nomen, inquiunt, sub cœlo da

lo datū hominibus, in quo oporteat nos saluos fieri. Et An iustum sit in cōspectu Dei vos potius audire, quā Deum, iudicate. Nam quod dicitur sapientis esse, tempore seruire, & tuta potius quā periculosa sequi, rectē dicitur, de rebus indifferentibus, & per se coram Deo liberis, impiē autem dicitur de mādatis Dei, & de vera religione. In his enim qui tempore seruit, & tuta sequitur, fugit faciem leonis, vt Propheta loquitur, & occurrit ei vrsus, ingreditur domū, ac innititur manu sua parieti, & mordet eum coluber, deniq; videtur corpus seruare, sed interea perdit corpus & animā, quæ certē est extrema stultitia. An nō enim sapientes ipsi huius mundi iudicant minus periculum subeundum esse, vt effugas maius? & paruum damnum sufferendum, vt euites magnum? Maximum autem omniū damnum est, si re-tenta corporis vita, amittas simul & corporis & animæ vitam. Quare cum Apostoli maluerunt legem DOMINI, & verbum eius sequi, quā iuxta humanā rationem tempore seruire, nō solū rectē sapuerunt, verū etiā conseruauerunt gressus suos, vt non nutarent.

Ioseph appellatur ab adultera de stupro, & nisi consentiat, periculū est, ne impudica mulier cōcipiat odium, & adducat eum apud patrem familiās in extremum discrimen. Quò igitur se verteret Ioseph, ne nutarent gressus eius? Alius quispiam iudicasset voluntati mulieris morem gerendū esse, præsertim cū tali obsequio potuisset per mulierum, etiā apud patrem familiās gratiosus fieri: sed loquebatur ore & lingua sua sapientiam & iudiciū. Quomodo possum, inquit, hoc malū facere, & peccare in Deum? Ac lex Dei: Non committas adulterium, erat in corde ipsius. Et si enim hæc lex non-

dumerat in literas tabulæ Decalogi relata, erat tamen natura scripta in mente eius. Cum igitur in hoc periculo meditaretur legem Dei in corde suo, & loqueretur eam ore suo, ac sequeretur eam facto suo, etsi conijciabatur iniqua adulteræ accusatione in carcerem, tamen gressus eius in tantum non nutantur, vt paulò post in principē Aegypti summa gloria constitueretur, & insigni nominis fama illustraretur. Pauper quispiam vel opifex, vel mercator, videt occasionē, qua aut operas, aut merces suas, nō admodū integras, sed corruptas & vitiosas, quàm carissimè, magno alterius damno, suo autem multo lucro, præsertim si vanitatē orationis addiderit, extrudere queat. Quid ergo faciat, ne nutentur gressus eius? Iudicabitur à filiis huius seculi stultissim⁹, si hanc occasionem sibi è manibus elabi sinat, & non vtatur ea ad suum emolumentum. Pius autē meditatur in corde suo legem Dei: Non fureris. Non dicas falsum testimonium, & loquitur lingua sua sapientiam ac iudicium, hoc est, veritatem: non imponit proximo mēdacijs, & periurijs, nō utitur versutia & dolo malo, sed negotiatur iustè, candidè, & simpliciter.

Quare etsi videtur veritate & iustitia aliquam rerū suarum iacturam in præsentia facere, & in grauiorem paupertatem collabi, tamē gressus eius à DOMINO ita sustentatur, vt quò longius à diuitijs recedere videtur, eò propius ad cōsequendas veras diuitias accedat. Non moueamur igitur alieno exēplo, vt sectemur impietates & imposturas, sed meditemur in lege Domini diu noctuq; & perduremus in via mandatorum Dei, quod vnum est verum compendium, quo erecti ad possessionem cœlestium opum ambulemus.

Obseruat

Obferuat impius iustum, & quarit vt occidat eum.
DOMINVS non deferit ipsum in manibus eius, & non condemnabit ipsum, cum iudicatus fuerit.

Impij varijs modis nocent pijs. Alij exemplo, alij imposturis, alij detractiōe famæ et maledictis, alij infidijs vitæ. Sed in his omnibus seu periculis, seu nocumentis, promittit Deus pijs præsentem suam opem et conseruationem. Ac aliàs quidē de alijs periculis. Nunc autem agitur de infidijs vitæ. Impij enim tanto odio sæuiunt in pios, vt non sint cōtenti direptione facultatum, exilijs, aut carceribus eorum, verūmetiā parant infidias vitæ eorum, & cupiunt eos omnino extinctos.

Sedet, inquit alius Psalmus, in infidijs atriorū, in occultis, vt interficiat innocentem. Oculi eius in pauperem intenti sunt. Infidiatur in abscondito quasi leo in speculunca, Sic infidiatus est Ismael vitæ Isaaci. Sic Elau vitæ Iacob. Sic Saul vitæ Dauidis. Sic Iudæi vitæ Pauli. Nec simpliciter hoc agūt impij, vt interficiant pios, sed etiam quærunt honestum facti sui prætextum, vt non tantū videantur pios iustè damnare & interficere, verūmetiam hac seueritate Deo gratum cultum præstare.

Iubet igitur Spiritus sanctus pios in hoc versiculo, benè animo suo confidere, & promittit eis certā opem, & præsens ac firmum auxilium Dei: **DOMINVS**, inquit, non deferit pium in manibus impij, nec condemnat pium, etiamsi impij iudicauerint eum cōdemnatione dignum, & qui de terra, tanquam catharma, sit tollendus.

Solet quidem aliquoties cōuiuere, vt impij insidientur pijs, & capiant, atq; morte dignos eos iudicent,
 Sed

Sed **DOMINVS** tanta cura complectitur pios, vt non sinat eos nec manibus, nec iudicijs impiorum opprimi.

Saul tanto studio posuit insidias Dauidi, vt aliquoties eum penè manibus suis comprehendisset, ac iudicauit eum meritò vt seditiosum, & affectatorem regni trucidandum: sed **DOMINVS** non deseruit Dauidè in manibus Saulis, nec cõdemnauit eum, cùm iudicaretur à Saule seditiosus & regni affectator. Cùm Apostoli docerent Euangelium Christi. Hierosolymis, conuiuie **DOMINVS** pontificibus, vt iniiceret manus in Apostolos, & conijcerent eos tanquam perturbatores publicæ pacis & religionis in carceres, sed **DOMINVS** in tantum non deseruit eos in manibus Pontificum, vt mitteret Angelum, qui noctu aperiret ianuas carceris, & restitueret eos libertati. Quid ergo dicemus de Abele, de Prophetis, de Christo ipso filio Dei, qui sic deserti sunt in manibus impiorum, vt nõ solum caperentur, verum etiã tanquàm impij et scelerati cõdemnarentur, ac occiderentur? Hanc rem Christus tam doctrina, quàm exemplo suo explicat: Ego sum, inquit, resurrectio & vita. Qui credit in me, etiamsi mortuus fuerit, viuet, & omnis, qui viuit, & credit in me, non morietur in æternum. Et mortuus quidẽ est ipse in cruce: sed vt vniuerso mundo contestaretur, se non perijsse in morte, resurrexit à mortuis tertia die, & intravit in æternam gloriã ac maiestatem patris sui. Quare, sicut ipse, etsi fuit in manibus hostium suorum ita desertus, vt moreretur, non tamen sic desertus est, vt in morte maneret et interiret: ita etsi Abel, Prophetæ, Apostoli, Martyres, & multi alij pii occisi sunt ab impijs, tamen quia crediderunt in Christum, habent etiam vitam suam in Christo: ac tantum abest,

abest, vt sint deserti in manibus hostiū suorum, vt tunc cum occiderentur, maximè omnium Deo curæ fuerint, & æternam salutem acceperint.

Expecta DOMINVM, & custodi viam eius, & exaltabit te, vt hereditate accipias terram, Cum impij excidentur, videbis.

Valde vñtatum est Spiritui sancto, quòd recitatis promissionibus, iubeat nos SPERARE & EXPECTARE. Quod & Prophetis adeo frequens in ore fuit, vt impij ex eo prouerbiū illudendi verbi Dei, apud Esaiam *Esai. 48.* traxerint: Expecta, inquiunt, reexpecta, expecta, reexpecta, modicum ibi, modicum ibi. Sed valeant ludibria impiorum, nos sciamus in diuinis promissionibus requiri à nobis expectationem singulari consilio Spiritus sancti. Primū enim, expectare DOMINVM, & interea dum promissio impletur bona spe in vocatione DOMINI perdurare, cultus est Deo gratissimus, & sacrum acceptissimum. Non enim sentias, te in pia & obediēti expectatione accipiendæ à Deo rei promissæ, inutiliter ocīari, sed te tūm verè iucundissimum Deo sacrificium offerre. Nam qui obediēter expectat rem promissam, & pergit bene sperando in custodienda via præceptorum DOMINI, is tribuit Deo honorem, non tātūm veritatis & omnipotentis, verumetiam prudentis & sapientis. Nisi enim iudicaret Deum esse veracem, qui velit, & omnipotentem qui possit ea, quæ promissit, præstare, & prudentem ac sapientem, qui optimè sciat opportunum præstandi tempus, non expectaret promissa in vocatione Dei, sed potius properaret, deserta Dei

Esai. 8. & 30.

vocatione, ad alienum auxilium. Impiorum enim vox est: Flectere si nequeo superos, Acheronta movebo. Et: Querite à Pythonibus, & à diuinis, qui strident incantationibus suis. Et: Nequaquã, sed ad equos fugiemus. Nolle autem Deum expectare, iuxta promissionem suam, & festinare ad auxilia, quæ Deus verbo suo querere prohibuit, est Deum iudicare mendacem, impotentem, vanum & stultum. Quia contumelia, quid potest dici horribilius?

Quare cum Spiritus sanctus iubet nos expectare DOMINUM, & interea viam eius custodire, sentiamus eum exigere à nobis haudquaquam vanum oculum, sed cultum Deo gratissimum, & negotium longe omnium diuinitissimum. Deinde, promissionibus Dei necessario additum mandatum expectandi, ut hac appendice sententia promissionum aliquo modo explicetur, & illustretur. Alij enim, cum audiunt promissionem Dei, existimant eam statim eo ipso momento temporis, quo dicitur, sensibilibiter implendam, quod si impletio eius extrahitur, arguunt eam mendacij. Alij iudicant eam implendam pro carnali sua sententia, & pro humanæ rationis prudentia. Iubet ergo Spiritus sanctus nos in promissionibus expectare DOMINUM, ut hoc ipso interpretetur veram promissionum sententiam, & significet Deum in promissionibus suis non permittere interpretationem earum prudentiæ nostræ carnis, nec collocare definitionem temporis impletionis earum, in nostro arbitrio, sed reservare eas, & Spiritui suo interpretandas, & opportuno suo tempore mirabiliter implendas, à nobis autem requiri, ut promissionibus eius firmam fidem adhibeamus, & in vera obedientia vocationis eius perduremus, donec visum fuerit DOMINO, promissiones suas in nobis imple

implere: A seculo, inquit Esaias, non audierunt, neque auribus perceperunt, oculus non vidit, Deus, præter te, quæ præparasti expectantibus te. Et Paulus: Animalis, inquit, homo, non accipit ea, quæ sunt spiritus Dei. Quare cum iubemur expectare DOMINUM, in promissionibus eius, sciamus damnari hominum curiositatem, qui Deo definiunt tempus miserendi, & exponunt dicta Dei, iuxta sensum carnis suæ, ac exigi à nobis, ut captivam ducamus omnem sententiâ & cogitationem nostrâ ad obediendum vocationi Dei, certissima fiducia cõcepta, quòd Deus, qui nobis sua beneficia promissit, præstiturus sit ea & opportunissimo tempore, & maiori ac admirabili copia, quàm nos optare aut sperare potuimus.

Quòd autem in hoc versiculo sequitur: Cum impij excidentur, videbis, significat expectantes DOMINUM tanta beneficia consequi à DOMINO, ut nò solum liberentur suo tempore, ab impiorum crudelitate, verum etiam videant horribilem interitum impiorum, magna animi voluptate, Videre enim hoc loco, non significat simpliciter aliquid aspicere, sed cum voluptate videre, & magna lætitia affici. Quid igitur? num licebit alterius ruina delectari, & gaudio exultare? Qui lætatur, inquit Salomon, ruina alterius, non erit impunitus. Et iterum: Cum ceciderit inimicus tuus, ne gaudeas, & in ruina eius ne exultet cor tuum, ne fortè videat DOMINVS, & displiceat ei. Cõsideremus igitur, quòd in ruina impij alia sit delectatiõ seu lætitia carnalis, alia spiritualis. Carnalis lætitia est, quæ excitata invidia proximi, delectatur alieno incõmodo, sui commodi gratia. Hæc lætitia genus est vindictæ, & pertinet ad species homicidij. De

hac loquitur Salomon, & hæc pugnat cum lege DOMINI: Non occidas. Spiritualis autem læticia est, quæ excitata zelo diuinæ gloriæ, delectatur in interitu impiorum, illustratione nominis Dei. Cum enim impij excinduntur, tunc veritas promissionis Dei illustratur, & pij quidem liberantur, reliqui autem metu diuini iudicij ad poenitentiam & pietatem inuitantur. Nec pugnat hæc læticia cum charitate, quæ proximo, etiam inimico debetur. Pij enim, quod ad charitatē quidem attinet, magno dolore afficiuntur, cum vidēt homines tam horribiliter perire: Veritatē dico, inquit Paulus, in Christo, non mentior, attestante mihi simul cōscientia mea, per Spiritum sanctum, quòd dolor mihi sit magnus & assiduus cruciatus cordi meo, videlicet, excæcatio, abiectio, & interitus Israëlitarū, qui me extremo odio prosequuntur. Et Dauid, cum audisset Saulem capitalem suum hostē miserē occubuisse, persecutus est mortem eius lugubri lamentatione: Montes, inquit, Gelboe, necros nec pluvia veniat super vos, neq; sint agri primitiarum, quod ibi abiectus est clypeus fortium, clypeus Saul, quasi non esset vnctus oleo. Hæc sunt officia charitatis, quæ debemus etiam inimicis nostris. Quod autem ad zelum fidei attinet, magnum est gaudiū piorum, cum vidēt homines impios diuinitus puniri & interire: Lætabitur, inquit alius Psalmus, iustus, cum viderit vindictam, manus suas lauabit in sanguine peccatoris. Et Esaias: Gaudebunt mansueti in DOMINO, & pauperes homines exultabunt in sancto Israël. Quum defecerit qui praualebat, consummatus est illusor, succisi sunt omnes, qui vigilabant super iniquitatem. Itaq; pij in interitu impiorū simul dolent, & gaudent: dolent charita-

charitate, quę cupit omnes homines saluos fieri: gaudet fide, quę comparat se ad iudicium Dei, & delectatur eo, quo videt DOMINVM suum delectari, & gloriam Dei illustrari. Curemus igitur, vt in interitu inimicorum nostrorum, sic fide exulemus, vt interea non obliuiscamur charitatis, & ne carnalem nostrum affectum prætextu diuini zeli defendamus, sed clementiam quidem Dei erga nos grati agnoscamus, seueritatē autem eius erga impios hostes nostros, reuerreamur, & alieno exemplo admoniti, in vero Dei timore ambulare pergamus.

Vidi impium potentem, & eleuatum instar lauri viridis.

Et transiui, ecce autem non erat amplius: quæsiui eum, & non inueniebatur.

Quod antè sæpè ac multum de interitu impiorū verbis exposuit, hoc nunc rei experientia testificatur: Vidi, inquit, ipse impium excellentem, & florentem instar viridis lauri: sed paulò post sic concidebat & emarcescebat, vt ne vestigium quidem loci eius reliquum esset, exempla ipsa, quæ mea memoria facta sunt, comprobant impiorum felicitatem non esse æternam. Et si autem non est dubium, quin Dauid potuisset multa talia exempla, quæ suis temporibus acciderunt, enumerare, tamen vnum Saulis exemplum præ cæteris insigne est. Hic Saul euectus erat ex infimo genere in regnū Israël, ac videbatur quidem initio pius, sed res ipsa declarauit, eum fuisse hypocritam, impiissimum & crudelissimum. Nihilominus tamen in tãtam maiestatem peruenit, vt nō solum in suo regno summam gloriam consequeretur, verum etiam exteris regibus & gentibus

formidabilis esset. Præterea familiam suam ita illustravit & instituit, ut videretur non posse fieri, quin regnum ad posteritatem eius transmitteretur, & in ea conseruaretur. Sed quod altius eleuatus est, eò profundius postea deiectus fuit. Cum enim iam quadraginta plus minus annis summa usus esset felicitate & regni maiestate, non solum fœda ipse morte periit, verum etiam regnum vniuersæ posteritati eius ademptum est, & multi præterea ex posteris probrosissimo mortis genere affecti sunt. Sic tolluntur impij in altum, ut lapsu grauiore ruant.

Nec in populo tantum Dei, verum etiam inter Gentes ipsas impias suspecta semper fuit nimia & continuata felicitas. Philippus Rex Macedoniæ, cum allatum esset illi nuncium, multas res feliciter ac prosperè gestas esse, porrectis in cælum manibus, exclamauit: O fortuna, inquit, pro tot tantisque bonis cõtenta sis leui quopiam malo. Sciebat enim vir impius quidẽ, sed prudens nimiam rerum felicitatem in hac hominum vita infelicẽ esse.


Her. in βαλνίᾳ

Policrates Samius, tanta rerum prosperitate usus est, ut etiam ab amico suo Rege Aegypti admoneretur, ut se voluntario quodam damno ab inuidia fortunæ redimeret. Demersit igitur Policrates in mare gemmam, qua nihil preciosius, nihil carius habere videbatur, ut hac iactura & molestia nimiam felicitatem expiaret. Sed cum paulò post gemmam à piscatoribus in præcordijs piscis inuentam recepisset, misso rex Aegypti caduceatore soluit cum illo ius amicitiae & hospitij, quod cogitaret fieri non posse, quin tantam felicitatem mox tam insignis secutura esset calamitas, ut in ea se nihil planè opis amico cõferre posse iudicaret, & ne fortassis etiam ipse vnà cum amico in exitium traheretur.

Quid

Quid ergo accidit? Polocrates à prætore Darij in bello captus, & in crucem actus est. Hunc finē habuit tanta Policratis prosperitas. Itaq; rectè Sophar, nō quidem de Iobe, sed apud Iobem loquitur: Laus impiorū, inquit, brevis, & gaudium Hypocritæ ad instar pun- *Iob 20.*
cti: Si ascenderit vq; ad cælum superbia eius, & caput eius nubes tetigerit, quasi sterquilinium in fine peribit, & qui eum viderant, dicent: Vbi est? Velut somniū auolans nō inuenietur, transibit sicut visio nocturna. Et *Esa. 23.*
Esaïas: Sicut somniat, inquit, esuriens & comedit, cū aut fuerit expergefactus, vacua est anima eius. Et sicut somniat sitiens & bibit, & postquā fuerit expergefactus, lassus adhuc sitit, & anima eius vacua est, sic erit multitudo omnium Gentium, quæ dimicauerunt contra montem Zion, hoc est, omnium impiorum, qui felici-
cem habent rerum successum aduersus pios. Hæc commemorantur nobis, non vt harū rerum narratione delectemur tantū, sed etiam ijs ad veram nostram salutē
vtamur, videlicet, vt admoniti infelici impiorum felicitate, non sectemur exempla impietatis eorum.

Sed perduremus in vocatione Dei, & sequamur pietatem, qua sola fiet, vt etiam si aliquādiu infelices videamur, tamen certissimam consequamur liberationem & salutem.

Custodi innocentiam & attende ad rectitudinem, nouissimum 
enim eius viri est pax.

Iniqui autem exterminabuntur simul, nouissimum impiorum succidetur.

Vnum hoc Spiritui sancto curæ est, vt non offendamur

mur impiorum felicitate, & non deferamus studium veræ pietatis. Iubet igitur nos intueri non in præsentem statum vel piorum vel impiorum, sed in extremum eorum finem. Custodi, inquit, innocentiam seu vitæ integritatem, & desige oculos ad reſtitutionem. Sed quid ex integritate vitæ, & reſtitutione studiorum meorum aliud, quàm ærumnas, exilia, & omnia infelicitatis genera reportabo? Ioseph custodiuit innocentiam vitæ, & ambulauit recta via in timore Domini, sed venditur in seruitutem, & cōiicitur in carcerem. Dauid, cū in aulam regiam Saulis vocatus esset, custodiuit integritatem vitæ, & ambulauit rectā in mandatis DOMINI, sed necesse habet exulare, & quouis tempore vitæ pericula subire.

Eſaias custodiuit innocentiam, & respexit ad reſtitutionem, sed sectus, tanquam regni proditor, in duas partes occubuit. Apostoli & Martyres custodierunt innocentiam, & attenderunt ad reſtitutionem cœlestis tam doctrinæ quàm vitæ, sed crudeliter sunt trucidati. Quis ergo alius finis est innocentiz & reſtitutionis, quàm calamitas & interitus? Nihil profectò minus. Sic quidem incogitantibus & ignauis videtur, sed Psalmus aliud affirmat: Nouissimum, inquit, eius viri, qui dat operam innocentiz & reſtitutioni, est PAX. Significat autem pax, Hebræo more, prosperitatem rerum, & salutem. Docet igitur Psalmus, quòd innocentiz & reſtitutionis nouissimum seu finis sit, non calamitas, sed prosperitas, non interitus, sed salus.

Multa quidem aduersa solent accidere innocentibus & rectis: Multæ, inquit, tribulationes iustorum: hæc autem non sunt verus & nouissimus finis, sed sunt vel

via, vel medium, quo ad verum finem peruenitur. Reprehendunt etiam huius seculi literæ eos, qui res magis ab euentu, quàm exitu notant. Et palàm affirmant, Deum proposuisse sudorem, ante virtutem, & vendere beneficia sua non ignauia, sed laboribus. Neq; iudicant athletam tunc infelicem, cùm luctatur, sed quò fortius aduersario resistit, eò preciosiorem coronam ipsum cõsecuturum sperant. Multò rectius autem diuinæ literæ sudores, labores, ærumnas, & afflictiones commendant. Proponunt enim ea pijs & rectis, non vt nouissimum rerum finem, sed vt media, quibus ad verum finem peruenitur.

*Ouid. Exitus
acta probat, ca-
reat successibus
opto, Quisquis
ab euentu facta
notanda putat.*

Nam verus finis est PAX, hoc est, felicitas & salus. Etsi autem nonnullis pijs solet etiam in hoc seculo pax per medias afflictiones contingere, sicut Ioseph è carcere reperuenit ad principatum Aegypti, & Dauid ab exilio peruenit ad gubernaculum regni Israël, tamen pax maximè omnium tùm demum pijs & rectis verè contingit, cùm ex hac vita excedunt, & corpus eorum humile transfiguratur, vt conforme fiat glorioso corpori DOMINI Iesu Christi filij Dei. Quæ gloria tanta est, vt superet omnem humanam æstimationem: Nò reputo, inquit Paulus, pares afflictiones præsentis temporis ad gloriam, quæ reuelabitur erga nos. Et iterum: Momentanea leuitas afflictionis nostræ mirè supra modũ, æternum gloriæ pondus parit nobis. Hoc vult Paulus dicere: Afflictiones, quas patimur in hoc seculo, habent se ad futurã gloriam, sicut vncia aut dragma, aut myriades talentorum. Et hæc gloria est nouissimus finis piorum, sed ita, vt nullus vnquã sit finis eius: Parit (inquit) æternum pondus gloriæ. Quare cùm molesta est nobis

h affli-

afflictio & infelicitas nostra, referamus cogitationem nostram ad hunc nouissimum finē, vt confirmati animo, integritatem vitæ custodiamus. Nō solū autem in officio pietatis nos contineat finis, qui sequi solet piorum infelicitatem, sed etiā finis, qui sequitur felicitatem impiorū. De hoc fine Psalmus dicit: Iniqui exterminabuntur simul, nouissimum eorū succidetur. Sicut enim nō est iudicandum de pijs, secundum eorum infelicitatē, quam habent in hoc seculo, sed secundum nouissimum eorum finem, qui est æterna salus: ita non est iudicandum de impijs, & iniquis impostoribus secundum presentem eorum felicitatem, quam in impietate & imposturis suis habent, sed secundū nouissimum eorum finem. Hic est æterna exterminatio, & interitus. Felicissimus videbatur Pharaō, qui persequebatur Israelitas, verā tunc Ecclesiam Dei, sed nouissimum eius, fuit exterminatio, non solū de terreno, verū etiā de cœlesti regno. Felicissimus videbatur Aman, qui cogitabat pio Mardocheo suspendiū, & vniuersis Israelitis exitium, sed nouissimū eius fuit, quōd in ea ipsa cruce, quā parauerat Mardocheo, pependit. Plenz sunt horum exemplorum, nō tantū sacra, sed etiam externa litera. Quis autem tā horribilia impiorum nouissima probè cōsiderans, nō deterreretur ab impietate, & non pergeret suum facere officiū, etiā si necesse haberet aliquāto tempore in vera pietate duros casus perferre? Nā quod Salomō de vino dicit: Ingreditur blādē, sed in nouissimo mordet, vt coluber, & sicut basiliscus venenā diffundit, hoc idē de felicitate impiorū affirmandū est. Mirificē blanditur hominibus, sed affert secum praesentissimum exitium. Furor autem & insania est, sese propter

pter præsentium voluptatum blanditias in æternū exitium mancipare. Caueamus igitur ne delinīti impiorū felicitate, exempla eorum sequamur.

Salus autem iustorum à DOMINO, & protector eorum in tempore tribulationis.

Et adiuuabit eos DOMINVS, & liberabit eos, liberabit (inquam) eos ab impijs, & saluabit eos, quia sperant in ipso.

Quid multis opus? inquit, etiam si iusti multo tempore affliguntur, aut ab impijs opprimuntur, nihil tamen certius est, quàm quòd liberentur tandem & seruētur. Sed cū hæc recitantur afflictis, multa incidere solent, quæ fidem eorum concutere, atq; adeò excutere conantur. Primum: Psalmus (inquit) loquitur de iustis: Salus IUSTORVM à Domino. Ego autem sum iniustus, quomodo igitur sperarem salutem? De hac re suprā aliquoties diximus. Sed quia necesse est, vt qui sic tentantur, probè cognoscant, qui veniant in talibus promissionibus nomine iustorū, dicamus & nunc quædam. Nam iusti in hoc versiculo, & similibus dictis scripturæ, nō dicuntur, qui vniuersam iustitiā diuinæ legis perfectè implent, sic enim nullus est iustus in terra: sed iusti dicuntur, qui credunt in Iesum Christum, iustū, & faciunt ex hac fide suum officiū iustè, vt etsi habent adhuc multū carnis & imbecillitatis, tamen non obediunt carni, sed spiritui. Non est hæc Monachorum aut hypocritarum iustitia, sed omnium piorum, qui inserti sunt Ecclesiæ per Baptismum, & adoptati sunt in filios Dei per fidem in Iesum Christum. Omnes, inquit Paulus, peccauerunt, ac destituuntur gloria Dei, iustificātur autem gra-

ris per illius gratiā, per redemptionem, quæ est in Christo Iesu, quem proposuit Deus reconciliatorem. Quare promissio huius versiculi, de salute iustorum, pertinet ad quemuis pium amantem verbi Dei, & credentem in Iesum Christum, ac ambulantem secundum vocationem Dei, etiam si obnoxius sit adhuc multis imbecillitatibus. Ponamus autem, quod occupatus sis aliquo delicto, & caro præualuerit Spiritui, sicut David succubuit tentationi adulterij, & Petrus abnegationi Christi, tamen si volueris, ne sic quidem à fructu huius promissionis, hoc est, à salute excluderis. Deseruisti quidem DOMINVM, peccato tuo, sed ille nondum te

Hier. 3.

Mala. 3.

deseruit. Tu, inquit, fornicata es cum amatoribus multis, tamen reuere te ad me, dicit DOMINVS, & ego suscipiam te. Et aliās: Reuertimini ad me, & reuertar ad vos, dicit DOMINVS Zebaoth.

Donum enim & vocatio Dei eiusmodi sunt, vt eorum illum poenitere non possit. Donum Dei est, quod promissit iustis gratuito veram & æternam salutem. Vocatio Dei est, quod debeamus, agnito peccato, in Iesum Christum filium suum credere, vt habeamus propter ipsum remissionem peccatorum, & adoptemur in filios Dei. Quocunque igitur tempore conuersi fuerimus ad DOMINVM, & amplectamur Iesum Christum per fidem, teneri non potest Deus cœlestis Pater, quin non solum agnoscat nos pro iustis, propter filium suum Iesum Christum, verum etiā offerat nobis omnem cœlestem salutem, quam iustis clemēter promissit. Deinde, cum dicitur salus iustorum à DOMINO, & non continuo nobis salus sensibilibus, idq; per homines, contingit, existimare solemus, aut hanc promissionem ad nos non pertinere,

ante eam non esse cœleste oraculum, sed verba ipsa promissionis ponderanda sunt. Non enim dicitur: Salus iustorum ab hominibus, sed à DOMINO. Alia est salus ab homine, alia à DOMINO. Etsi enim omnes homines nō negant tantum suam opem & salutem, verum etiam pugnant nobiscum totis viribus suis, tamen adhuc reliqua est salus, eaq; vera & æterna, à DOMINO, qui & conferre eam in suos, non terreno, sed cœlesti, nō humano, sed diuino more solet. Non igitur despondeamus animum, etiamsi nō sentiamus aliquam ab hominibus salutem, sed quò lōgius abscedere videtur humana salus, eò propiorem nobis cœlestem & diuinam esse certissime confidamus. Præterea afflicti, cū audiunt salutem suā esse à DOMINO, & DOMINVM esse protectorem ipsorum in tempore tribulationis, cogitāt se ita iuandos, & protegendos, vt nullum planè tribulationis sensum percipiant. Quare, cū tribulationes non tantum incidunt, verum etiam subinde magis ac magis cumulentur, existimāt Deum suarum promissionum obliuisci, & nullam habere salutis ipsorum curam. Sed hic iterum verba promissionis expendenda sūt. Non enim dicitur: Protector eorum ante tempus tribulationis, sed in tēpore tribulationis. Etsi enim Deus semper tuetur & cōseruat iustos suos, siue ante siue post tribulationes, tamen maximè omnium recipit, promissionibus suis se seruaturum eos in tēpore ipso tribulationis, videlicet significās, se non hoc agere, vt iusti nullam sentiant tribulationem: sed vt in tribulationem quidem perueniant, in ea autem conseruentur. Nisi enim tribulatio accideret, Deus non esset protector in tribulatione. Sciamus igitur, quòd cū Deus promittit se in tribulatione

protectorem, tantū absit, vt sentiat, nobis nihil aduersi
 re ipsa sustinendum, vt potius significet, nobis maxima
 quæq; aduersa subeūda esse, sed in ijs nos nō perituros,
 si fide constituerimus. Nam vt de certitudine diuinæ sa-
 lutis nihil dubitemus, vide, quæso, quā sollicitē, quā
 diligenter, quā copiosē verbum seruandi varietur, &
 incūcetur. Non tantū dicit: **SALVS** iustorū à **DOMI-**
NO, sed addit: **PROTECTOR** eorum. Nec hoc verbo
 contentus est, sed addit: **ADIVVABIT** eos. Ac ne sic
 quidem absoluisse sibi videtur promissionē, sed pergit
LIBERABIT, inquit, eos. Et ne quis existimet sibi
 hoc verbum temerē excidisse, repetit planē idem ver-
 bum: **LIBERABIT**, inquit, eos ab impijs. Ac vt com-
 pendio omnia verba, quæ cōseruationem & protectio-
 nem significant, compræhendat, repetit verbū ipsum
 saluandi. **SALVABIT**, inquit, eos. Quid ad concipien-
 dam & cōfirmandam animi fiduciam amplius requiris?
 Si homo, qui est animal natura vanum, & mendax, hæc
 loqueretur, liceret tergiuersari, & iuramenta, ac alias
 testificationes requirere. Nunc autē loquitur hæc Spi-
 ritus sanctus, qui nec falli, nec fallere potest, & loquitur
 ea non oscitanter, sed asseueranter.

Non est igitur aliud reliquum, quā vt hanc promif-
 sionem sine vlla dubitatione excipiamus. Sed quo meri-
 to consequuntur iusti, vt **DOMINVS** sit protector ipso-
 rum, & adiuet eos, ac liberet ipsos ex omnibus afflictio-
 nibus? Num merito iustitiæ ipsorum? Nihil profecto
 minus. Ostendimus enim antea, quod non sit iustus in
 terra, qui legem Dei perfectē impleat, & qui Deum me-
 ritis suis sibi obnoxium facere queat. Sc̃per enim cum
 Paulo confitendum est: Noui quod non habitet in me,
 hoc

hoc est, in carne mea, bonum. Nam velle adest mihi, ar
ut faciam bonum, non reperio.

Quare nemo potest sibi protectionem, & auxilium
Dei polliceri merito suæ ipsius iustitiæ. Sed. Psalmus
addit breuissimam appendicē, quæ perspicuè exponit,
quid illud sit, cuius gratia iustis contingat protectio
Dei, & liberatio ab omnibus aduersis. Dicit enim:
QVIA SPERANT IN IPSVM. Quid ergo? An
DOMINVS ad accipiendum tantum beneficium nihil
aliud à iustis suis requirit, quàm vt SPERENT? For-
tassis hoc vult, vt ponamus spem nostram in ipso, pro-
pter nostram iustitiam, & propter nostra bona opera,
quæ nos fecimus? Minimè omnium. Qui enim sic in
Deum sperant, necesse habent tandem pudeferi, pro-
pterea quòd nostra iustitia, & bona nostra opera, non
possint in iudicio Dei consistere.

Sed hoc vult, hoc exigit, hoc à nobis expectat, vt po-
namus spem nostram in ipso, propter solam & gratuitā
ipsius clementiam ac misericordiā, quam testificatur
promissionibus suis, & exhibet eam nobis in Iesu Chri-
sto filio suo. Beneplacitum, inquit, est DOMINO su-
per timentes eum, & in eis, qui sperant super misericor-
dia eius. Non placet Deo spes, quæ collocatur in
meritis humanæ iustitiæ, sed quæ collocatur in gratui-
ta ipsius clementia, & misericordia. Non in iustifica-
tionibus nostris, inquit Daniel, prosternimus preces
ante faciem tuam, sed in miserationibus tuis multis. Vt
autem verè possis spem tuam in misericordia Dei col-
locare, primùm necessarium est, vt credas in Iesum
Christum filium Dei, quòd propter hunc Deus sit
tibi propitius, & receperit te in gratiam suam.

Quomodo

Quomodo enim posses spem tuam ponere in eius clementia, quem existimares esse animo in te infenso atq; inimico? Deinde necessarium est, vt ambules in vocatione Dei. Quomodo enim sperares tibi eum esse clementē & propitium, cuius mandata tu contemnas, & cuius vocationem tu posthabeas? Quare, sicut spes ponenda est in sola gratuita clementia Dei, ita credendū est in solum Iesum Christum filium Dei, quod propter hunc Deus sit nobis reconciliatus, & obediendum est vocationi Dei, vt spes non sit simulata, sed vera, & vt assequamur ea beneficia, protectionem, videlicet, & liberationē ab omnibus aduersis, ac cœlestem salutem, quæ Deus sperantibus in clementiam ipsius prolixè ac pleno ore promissit.

VSVS HVIVS PSALMI.

Nihil hoc tempore magis vulgare est, quàm quod homines offensi iniquorū prosperitate, suum officium deserant, & praua exempla, spe felicioris successus, imitentur, idq; non politica tantum vita, verum etiam, ac maximè omnium in religione. Postquam enim vident, quod impostores augeant res suas malis artibus, & cōtemptores ac persecutores cœlestis doctrinæ habeant fortunatos instituti sui euentus, arbitrantur aut Deum sanare imposturis, & impietati, aut eas non esse, quod prædicantur, imposturas & impietates, sed potius officia Deo grata. Itaq; hominum turba teneri non potest, quin impudentes & præcipites in omne genus scelerum ruant. Spiritus sanctus igitur suscepit hunc Psalmum illo consilio & vsu decantandum, vt isti vitio, seu potius

potius furori cœlesti remediū afferat. Obseruabile autem est, quòd maluerit institutū suum multa orationis copia recitare, quàm paucis verbis absoluerē. Vna & simplex est propositio: Ne offendaris impiorū felicitate, sed perdures in officio pietatis. Nec minus simplex est ratio eius, quia impij, etiamsi diu fuerint felices, peribunt, pij autem, etiamsi diu fuerint infelices, conseruabuntur. Hanc tamen vnam & simplicē propositionē, cū ratione sua, Spiritus sanctus tanta copia & varietate in hoc Psalmō euoluit, & explicat, vt eā multis versiculis, per singulas hebraici alphabeti literas, aliquoties quidē mutata dicēdi forma ac figura, aliquoties autem repetitis iisdem penē verbis, traducat. Hæc vnius rei tam frequens repetitio & asseueratio, molesta fortassis est homini ocioso & delicato, nec videtur in rebus, præsertim dubijs, multum habere momenti, homini autem pio, & offensione alienæ felicitatis grauitè laboranti, longè omnium gratissima est & iucundissima. Agnoscit enim hæc non esse futilia & inania hominum commenta ac delyria, sed certissima cœlestis doctrinæ oracula. Et quia in commemoranda sententia Dei, aut eadem verba iterantur, aut breuiter commutata ponuntur, intelligit pius, ea non in ore vani alicuius hominis nata, sed ex intimis diuinæ mentis latebris ac recessibus profecta. Nam auditoris etiam animus eò magis ad pietatē accenditur & inflammatur, quò diutius in colloquio Spiritus sancti detinetur: verba enim Spiritus sancti, verba sunt cœlestis vitæ et salutis. Quare, si cuius animum excruciat, & sollicitat impiorum felicitas,umat hunc Psalmum in manus, & audiat, quid Spiritus sanctus de impiorum felicitate, & piorū infelicitate concionetur,

ut habeat ducē, qui ipsum in vera pietatis via deducat,
& in officio vocationis Dei contineat.

PSALM. XXXVIII.

Domine ne in furore tuo arguas me, &c.

*Mar. 1.
Luc. 24.*



Acto. 20.

Vas esse conuersionis peccatoris ad Deum partes, docent non solum duæ præcipuæ conciones Decalogi videlicet, seu legis, & Euangelij de Iesu Christo, verum etiam Christus ipse disertis verbis: Pœnitentiā (inquiens) agite, & credite Euangelio. Et iterum: Oportet in nomine Christi prædicari pœnitentiā, ac remissionem peccatorū in omnes Gentes. Et Paulus: Testificor, inquit, Iudæis simul & Græcis, eam, quæ erga Deum est pœnitentiā, ac fidem, quæ est erga DOMINVM nostrum Iesum. Altera igitur harum partium est agnitio peccatorum, quæ excitatur cōcione Decalogi seu legis. Et si autem pœnitentiæ vocabulum aliās generale est, tamen in illis locis, quæ paulo antè recitauimus, hoc vocabulo, continetur tantum hæc conuersionis pars, quæ vocatur agnitio peccatorū. Altera pars est fides in Christū, propter quem habemus remissionem peccatorū. Et hæc fides datur à Spiritu sancto per prædicationem Euangelij. Ac solet peccatum reuelari, huic quidem remissus & tolerabilis, isti autem grauius & seuerius: sed si consideraueris peccatum per se, semper secum, vbicumque

que fuerint, trahit, & cōtinet omnium malorum camari-
 nam, pugnat enim cum Deo ex diametro. Nam Deus
 est iustitia, bonitas, benedictio, vita, cōleste gaudium,
 & perpetua felicitas, & quotquot Deum possederint
 per fidem in Iesum Christum, hi possident etiam omnia
 hæc bona, in Christo. Cum enim Deus donauerit nobis
 Christum filium suum, qui fieri potest, ut non & cum eo
 dem nobis omnia donet? Relinquitur ergo, quod quia
 peccatum pugnat cum Deo ipso, non sit aliud, nec affe-
 rat secum aliud, quàm iniustitiam, malitiam, maledictio-
 nem, mortem, infernum, & sempiternum interitum, ut
 etiam si hæc peccati camarina non in omnibus homini-
 bus, nec eodem modo, in hoc seculo reueletur, dubium
 tamen non est, quin ubicunq; est peccatum, ibi secū om-
 nia hæc mala, tanquam indiuiduos comites habeat &
 possideat. In Genesi dicitur: Quocunq; die comederis
 ē fructu arboris sapientiæ, (hoc enim est peccare aduer-
 sus legem Dei) morte morieris. Hinc Paulus vocat mor-
 tem, ὁ φῶς peccati, & peccatum, κέντρον mortis, signifi-
 cans, peccatum esse tam venenatum, ut afferat omnem
 maledictionem, corporalem & spiritualē, temporalem
 & æternam, hæc enim omnia mala, mortis nomine con-
 tinentur. Quare cum peccatū dixeris, omne genus ma-
 lorum, siue in hoc, siue in altero seculo dixeris. Hoc id-
 circo præfati sumus, ut intelligamus, quid sibi velint
 grauiſsimæ illæ & horribiles querelæ, quæ in hoc Psal-
 mo commemorantur. Dauid enim, viuebat aliquando,
 ut Pauli verbis utar, sine lege, quod etsi gestabat pecca-
 tum in carne sua, tamen nondum sensu iræ Dei concu-
 tiebatur, nec agnoscebat grauitatem peccati, sed ambu-
 labat pro vulgari hominum vita, in carnis securitate.

Rom. 8.

Genes. 2.

Rom. 6.

1. Cor. 15.

Postquam autem venit mandatum legis, & patefecit ei peccati magnitudinē, ac iræ diuinæ seueritatem, aduersus peccatum, ibi peccatū, quod antè videbatur latere, imò extinctū esse, reuixit, et Dauid mortuus est. Re enim ipsa cōperit, quod peccatū, cum sese aperit, & vires suas sentiendas obtrudit, ab alienet hominem à fauore Dei, accendat iram Dei, congerat in hominem omne genus maledictionis, tam corporalis, quàm spiritualis, adigat in mortem, & conijciat in æternos ignes inferni. Quamiseria, qua calamitate, quid potest horribilius excogitari? Quare, cum peccatum ad hunc modum in Dauide reuiuisceret, & maledictiones omnes, ac mortem quoq; ipsam minaretur, imò & ipse iam in se flammās inferni ardere sentiret, non properat ad fictitia sacra, quibus irā Dei mitiget, (quod est hypocritarum) nec properat ad laqueum, aut gladiū, quo se iugulet, (quod est desperatorum) sed ad vetus suum asylum, hoc est, ad precationē, ad inuocationem nominis Dei, ad Psalmum coram DOMINO Deo recitandū, vt in summis illis periculis gratuita Dei clementia, propter benedictum semen Abraham (quod est Christus) sibi promissum, seruetur. In maledictione enim, nulla potest apud Deū benedictio aut sperari aut peti, nisi in fide illius seminis, de quo dictum est: In semine tuo benedicetur omnes gentes. Nec est aliud nomen, præter Iesum Christum, sub cœlo datum inter homines, in quo oporteat nos saluos fieri.

Acto. 3.

Acto. 4.

1. DOMINE, ne in furore tuo arguas me, neq; in ira tua corripas me.

Precator mox ab initio in hoc primo versiculo, proponit

ponit statum, ad quem tota huius Psalmi expositio respicit. Petit enim, ut DOMINVS non opprimat ipsum gravitate illius afflictionis, quam in præsentia sustinet, nec perdat ipsum magnitudine illius pœnæ, quam nunc afficitur. Obseruanda autem est imprimis prudens modestia peccatoris. Non orat, ut omnino nō arguatur, & corripiatur, nō enim est obscurum, quod duplici nomine obnoxij simus afflictionibus & correptionibus. Altero, quod simus homines, in peccatis cōcepti & nati, quorum generalis fors est, ut in sudore vultus vescantur pane suo, & terra proferat eis spinas & tribulos. Altero, quod qui in Christum credunt, affliguntur, præter generalem humani generis sortem, peculiaribus quoque aduersis: oportet enim nos ingredi in regnū cœlorum, per multas tribulationes. Quare, cum Dauid non ignoret, quæ sententia lata sit cum generaliter in humanum genus, tum peculiariter in homines plos, non recusat, quin arguatur, seu affligatur, & corripiatur à Deo, sed illud deprecatur, ne arguatur, ne affligatur à Deo in ira, & furore eius. Non est autem sentiendum, quod in Deo sit affectus iræ aut furoris, qualis est in hominibus, ebullitio, videlicet, sanguinis circa cor, aut mentis è statu suo emotio, quid enim absurdius, quàm tale quid Deo attribuire? Sed quod in hominibus est pertinax ira & furor, hoc in Deo est immutabile decretum, & irrevocabilis seueritas, qua constitutum est, ut omnes impij peccatores sempiterna internitione pereant. Quare Dauid non deprecatur seu communes, seu peculiare afflictiones, quibus humanum genus, ac præsertim Ecclesia Dei obnoxia est, sed deprecatur tantum æternam mortem, & internitionem. Quid igitur dicemus? Osten-

dimus iam iram & furorem Dei esse immutabile decretum eius in puniendis impijs eterno interitu. An non est igitur effrontis impudentiæ, petere à Deo, vt non affligat nos in ira & furore suo, (hoc est) vt nostri causa mutet immutabile suum decretum, & reuocet inuiolabile suam sententiã aduersus impios ab æterno latam & constitutam? Petere enim, vt Deus mutetur, quid aliud est, quàm petere, vt Deus non sit Deus? Triumphator in Israël, inquit Samuel, non parcat, & pœnitundine non flectetur, neq; enim est homo, vt pœnitentiam agat. Et ego Deus, (inquit) & non mutor. Quare sicut impudentia est, petere à Deo, vt omnino non affligaris, ita non minor impudentia videtur, petere, vt non affligaris in ira & furore Dei, hoc est, vt Deus sit mutabilis & inconstans. Sciamus igitur, quòd quemadmodũ lex Dei, qua honesta mandãtur, & inhonesta vetantur, est æterna & immota Dei voluntas, ita & sententia Dei, qua omnes, qui legem Dei violant, rei æternæ maledictionis pronunciantur, est immutabilis & irretractabilis: Maledictus, inquit, omnis, qui non permanferit in omnibus sermonibus legis. DOMINVS autem Deus noster, non tantũ promulgauit humano generi legẽ suam, sed etiam diuulgauit Euangelion suũ, de vnigenito filio suo, DOMINO nostro Iesu Christo, vt quotquot in Christum credunt, consequantur remissionem peccatorũ, & liberationem ab æterna maledictione. Quare decretum Dei de impijs violatoribus legis perpetuò dammandis, immutabile quidem est per se & irretractabile, sed quia ad cõcionem legis addita est concio Euangelij, idcirco Euangelion interpretatur sententiã legis, quòd sit immota & irreuocabilis in ijs, qui nõ resipiscunt, nec conuertuntur

Deut. 27.

tuntur ad Christum. In illis autem, qui ad Christum cō-
uersi fuerint, sententia legis nihil amplius iuris habet: *Galat. 3.*
Christus (inquit Paulus) redemit nos ex maledictione le-
gis, factus pro nobis maledictio. Et iterum: Lex pædago- *Rom. 8.*
gus noster fuit ad Christū, vt ex fide iustificemur: Ac rur-
sus: Quod impossibile erat legi, ea parte, qua imbecillis
erat per carnem, Deus filium suum misit, sub specie car-
nis peccato obnoxia, & per hostiam pro peccato condē-
nauit peccatum in carne, vt iustificatio legis implere-
tur in nobis, &c. Quare cū Dauid petit, vt non arguatur
in ira & furore Dei, nō petit, vt sententia diuinę legis sim-
pliciter mutetur, sed vt in ipso, iuxta interpretationem
Euangelij intelligatur, videlicet, quod cum agnoscat
Christum, ipsi promissum, furor Dei & maledictio legis
non habeant in ipso locum, sed reponatur in locum eius
benedictio, propter Christum.

2. *Quoniam sagittæ tuæ infixæ sunt in me, & premis super me ma-
num tuam.*

Propositionem sequitur expositio & commemoratio
acerbissimorum dolorum, & grauissimarum calamita-
tum, quas sustineat, & quibus re ipsa sentiat iram & furo-
rem Dei, vt ad deprecandum eum haud immeritò exci-
tatus videatur. Non casu quodam, aut leui affectu venio
ad deprecandā iram tuā, DOMINE Deus noster, et ad im-
plorandā cœlestē tuam opem. Tux enim sagittæ ita in-
fixę sunt, & herent in me, vix vt, pro humano arbitratu,
enelli queant, & potentia manus tuę ita me opprimit,
vt caput attollere nunquam me posse videar. Quęra-
mus igitur, quę sint sagittæ illę Dei, quas Dauid hoc loco
in se infixas esse queritur. Non est autem obscurū, quod
Dauid

David coniectus sit in has ærumnas, ex agnitione peccati sui. Mox enim sequitur: Non est pax oisibus meis, propter peccatum meum. Et: Iniquitates meæ supergressæ sunt caput meum. Paulus autem vocat peccatū, *κέρτος* stimulum seu aculeam mortis, nisi enim peccatum pungeret et acueret mortem, non posset mors quicquam damni inferre. Sagittæ igitur, quas Deus in hominem, propter peccatum, eiaculatur et infigit, sunt metus mortis, sensus flammæ inferni, & horror æternæ damnationis. Postquam enim peccatum intrauit in mundum, introierunt vnà, mors, infernus, & sempiterna condemnationis. Quare, cum David conqueritur sagittas Dei in se infixas, palàm fatetur, se propter peccatum suum summo mortis, inferni, & condemnationis metu ita cōprehensum, vt humana ope, nulla sibi euadendi via pateat. Vnde & additur: Premis super me manum tuam. Manus Dei, omnipotentia eius est, quæ tanta est grauitate, vt si cœperit hominem propter peccatum premere, non cōquiescat, donec eum in profundum vsq; inferni detruferit ac deprefferit. Quid igitur miserius, quid ærumnosius illo homine, in quo propter peccatum hærent sagittæ Dei? & qui graui manu Dei premitur? Discamus autem ex hoc loco, nihil magis venenatum, magis pestiferum esse peccato. Non enim vnum tantum & alterum morbum corporis affert, sed etiam mortem ipsam, infernum, & perpetuam damnationem. Abhorreamus igitur à peccato non aliter, quàm à præsentissimo, & sempiterno nostro interitu. Sed pergit David exponere suam calamitatem.

3. *Non est sanitas in carne mea, à facie iræ tuæ, non est pax in ossibus meis, à facie peccati mei.* Quo-

4. *Quoniam iniquitates meae supergressae sunt caput meum, & grauiiores sunt, quàm vt tam molestum onus sustinere queam.*

Non est arbitrandum, quòd sagittae Dei perstringant leuiter tantum cutem meam, sed penetrant carnem & ossa: conficiunt tam corpus, quàm animam, concutiunt omnes meas vires, tam exteriores, quàm interiores: nihil sanum, nihil integrum relinquunt in omnibus meis vel corporis vel animi facultatibus: ac breuiter, maior est calamitas, quàm quae humano sermone explicari possit, vnde & alij malunt pendere, alij aqua suffocari, alij gladio pectus transfuerberare, alij se de saxo praecipites dare, quàm grauitatē tantae calamitatis diutius ferre. Quid ergo illud est, quòd sagittas Dei tam acutas, tam pestiferas reddit? A facie (inquit) irae tuae, & a facie peccati mei. Non acuit Deus ipse suas sagittas, non efficit eas ipse mortiferas, nec concipit ipse iram, quippe qui natura sua non est, nisi salus, gratia, fauor, vita & felicitas: Sed peccatū, PECCATVM (inquam) illud est, quod exuscitat irā Dei, & acuit ac inficit sagittas eius. Agnosco, n. grauitatem peccati mei, agnosco multitudinem iniquitatum mearum, quibus ita immersus sum, vt etiam caput meum superent, & quib. tolerandis haud quaquam sufficere possim. Ex hac agnitione video iram Dei, sentio intra me maledictionē, extremū metum mortis, flammās inferni, & horrorem perpetuae damnationis. Quid mihi opus? Arbitror me onus Aethna (quod dici solet) grauius gestare. Quid igitur faciam? quò me vertā? Quò, nisi ad te DOMINVM Deū meum, vt non arguas, nec corripas me in hac tua ira, & furore, sed conserues me propter filium tuum, quem ex hac mea posteritate hominē assumpturum praedixisti & promissisti.

Sed pergīt in expositione calamitatis suæ:

5. *Computrescunt, & fatent liuores mei, à facie sapientiæ meæ.*
6. *Affligor, & humilior vehementissimè, toto die tristis incedo.*
7. *Quoniam lumbi mei toti sunt aridi, non est integritas in carne meâ.*
8. *Debilitor ac deijciôr vehementer, rugio præ anxietate cordis mei.*
9. *DOMINE coram te est omne desiderium meum, & gemitus meus non est tibi ignotus.*
10. *Cor meum variè afficitur, deserit me robur meum, ipsi etiam oculi mei non lucent mihi suo lumine.*

Hęc omnia ita cōmemorantur, quasi quòd Dauid laboraret grauiſſimo quodā corporis morbo, & sicut Iob, pessimis ac fœtidissimis vlceribus scateret. Etsi aut grauitas iræ Dei, conscientia patefacta, & metus æternæ mortis ac inferni propter peccata, cōcutiunt animū hominis, tā horribiliter, vt etiā corpus debilitent, & vires eius frangant, & exhauriant, quemadmodum paulò antè dictū est, tamen sentiamus has locutiones esse metaphoricas, & adumbrare potius vulnera conscientia, q̃ membrorū corporis. Sicut .n. in corporib. cacochymis oriūtur aliquando tumores, vomice, apostemata seu vlcera, quæ purulentia & sanie sua tam tetrū fœtorē expirant, vt molesta sint fœditate sua non tantū ijs, qui ea gestant, verū etiā vicinis quibuscq; astantibus: ita Dauid conqueritur se propter insipientiā, seu propter peccata insipienter designata, tantis animi vomicis ac doloribus laborare, vt arbitretur se non tantū Deo ipsi, verū etiam

r̃um etiam cūctis hominibus, quamuis amicissimis, esse
 abominationi & horrore. Et quemadmodum graues &
 diuturni morbi corpus hominis ita effoetum reddunt,
 vt homo non amplius erectus, sed incuruus, non in al-
 tum eleuatus, sed depressus & humilis, non alacer, sed
 m̃estus & atratus incedat, quippe quod interiora
 membra sint exhausta, & quasi arefacta, vt nullæ prorsus
 vires sint reliquæ, quæ imbecillitas tam vehemen-
 ter debilitat & atterit eum, vt nihil aliud præter gemitum
 & rugitum supersit ei: ita Dauid affirmat se ex ag-
 nitione peccati sui, & iræ Dei, tantis animi doloribus
 cruciari, vt hoc etiam in vultu, in omni denique incessu
 suo eluceat. Ac breuiter: Domine, inquit, coram te est
 omne desiderium meum, & gemitus meus tibi non est
 ignotus, (hoc est) tanta est perturbatio animi mei, tan-
 tus gemitus, vt nullus humanus sermo hoc explicare
 queat, sed tibi, Domine, soli sit cognitum. Core enim
 meum tam variè afficitur, concutitur, circumiacetur,
 & palpitat, vt omne robur meum deficiat, ac ne oculi
 quidem ipsi, quamuis adhuc sani videntur, lucē suā mi-
 hi præeant, (hoc est) etiam illa, quæ antea visa mihi
 sunt prospera & felicia, (lumen enim oculorum felici-
 tatem significat) nunc videntur mihi aduersa, & infau-
 sta. Ex his admoneamur primū de grauitate peccati,
 & seueritate iudicij diuini aduersus peccatum, vt sum-
 mo studio & cura caueamus, ne affectus peccati seque-
 mur, & concupiscentiæ eius indulgeamus. Et si enim pec-
 catū natura inhæret nobis, tamē si renati sumus in Chri-
 sto per fidem, peccatum non imputatur nobis coram
 Deo, si modò non secundum carnem, sed secundum Spi-
 ritum ambulauerimus, & membra nostra serua iustitiæ,

Rom. 8.

Rom. 6.

in sanctificationē exhibuerimus. Deinde consideremus consiliū Dei, quo iudicium & iram suam aduersus peccata in nobis patefacit. Non enim idcirco ducit hominē in agnitionē peccati sui, & diuinæ iræ, vt condemnet & abijciat eum in æternū exitium, sed vt excitet eum ad querendam veram salutem in Christo, quem proposuit no-

Ezec. 32. bis reconciliatorem: Viuo ego, inquit DOMINVS, nolo mortem peccatoris, sed magis, vt cōuertatur & viuat. Et

Rom. 11. Paulus: Cōclufit Deus omnes in incredulitatem, vt om-
Galat. 3. nium misereretur. Ac rursus: Conclufit scriptura omnia sub peccato, vt promissio ex fide Iesu Christi daretur credentibus. Quare, si quis iudicio peccati, & sensu iræ Dei concussus fuerit, agnoscat consiliū & voluntatem Dei, quòd Deus cogitet sub hac ira, non mortem, sed vitam, non damnationem, sed salutem.

11. *Amici mei & proximi mei stant à plaga mea auersi, & propinqui mei à longe consistunt.*

12. *Qui autem querunt animam meam, tendunt laqueos, & qui cogitant mihi malum, loquuntur prauitates, & meditantur omni tempore dolos.*

Ad cumulum ærumnarum, quas in me, ex agnitione peccati mei & iræ Dei sustineo, accedit & illud, quòd in tantis meis afflictionibus nullum genus vel auxilij vel solatij, nec apud amicos, nec apud inimicos videam. Amici, consanguinei, familiares & vicini suas res agunt, sua curant, non tanguntur affectu meorum incommodorum, imò quia intelligunt me diuinitus affligi, abhorrent à mea familiaritate, & deserunt me, ac metuentes, ne & ipsi vnà mecum diuinitus puniantur, auersantur me, & declinant à conspectu meo. Inimici autem & hostes

stes mei, non solum me deserunt, verum etiam insidiantur vitæ meæ, spargunt de me horrendas, nescio quas, blasphemias in Deum, & violētās regni inuasionēs, vocant me virum sanguinum, & crudelem tyrannum, ac breuiter cogitant quouis tempore, quibus dolis, quo astu, quoquo iure, quaqua iniuria me opprimant. Itaque quod in Christo futurum est, hoc iam in me atauo eius, suo modo peragitur: Quem tu, inquit Psalmus, percussisti, persequuntur. Aduersarij mei vident me diuinitus ita afflictum, vt nulla mihi penes spes salutis sit relicta. Hac mea miseria non contenti, cumulant insuper calamitatem calamitati, vt me penitus cōculcent & perdant: nihil autē est crudelius, quàm afflicto addere afflictionem. Et si enim afflictus suo quodam peccato meritus est afflictionem, tamen Deus execratur carnalem aliorum insultationem, & crudelitatem, qua in afflicto grassantur. Israëlita meriti erant sua impietate captiuitatē Babylonicam, tamen cum Babylonijs sēuirent in ipsos inhumanius, quàm par erat, haudquaquam ferūt impunē: Iratus sum, inquit DOMINVS per Esaiam, super populum meū, cōtaminaui hereditatem meam, & dedi eos in manu tuā, Nō posuisti eis misericordias, super senem aggrauasti iugum tuū valde, &c. Et in Zacharia: Zelatus sum Hierusalem & Zion zelo magno, & ira magna ego irascor super Gentes opulentas, quia ego iratus sum parum, ipsi verò adiuerunt in malum.

Metuamus igitur DOMINVM, & quem videmus ab ipso affligi, non addamus, nostra crudelitate, dolorem dolori, sed complectamur eum omni, quo possumus, humanitatis officio, vt & nos in nostris aduersis misericordiam à DOMINO consequamur,

13. *Ego autem tanquam surdus non audio, & sum tanquam mutus, qui non aperit os suum.*
 14. *Sum sicut quispiam, qui non audit, & qui non queat abiecta crimina refutare.*

Audiuimus, quid inimici cogitent ac moliantur aduersus afflictum Dauidem, audiamus nunc quid vicissim ipse faciendum suscipiat. Numquid ergo rependit malum pro malo? numquid sicut ipsi cogitant exitium eius, ita vicissim cogitat exitium ipsorum? Nihil minus. Et si enim inuehitur aliquoties in ipsos grauissimè, (id quod aliquot alij Psalmi testantur,) hoc tamen non facit priuata temeritate & carnis suæ libidine, sed excitatur cœlesti spiritu, ut ex vocatione eius recitet publicè sententiam diuinæ seueritatis, quæ est aduersus impios, in tribunali Dei lata. Nam cum priuatim suam ipsius causam agit, non ignorat consistendum sibi esse intra terminos generalis vocationis, qua exigitur, ut quamuis summa iniuria affectus fueris, non tamen malum rependas malo, nec deuou eas deuouenteste, sed ut benè preceris eis, & relinquo DOMINO Deo nostro ultionem. Quare Dauid in præsentia, etiamsi grauissimè ab inimicis suis læderetur, tamen non compensat iniuriam iniuria, sed transiit surda aure, & obmutescit ad omnia aduersariorum conuitia, quasi quis sit surdaster, nec possit quicquam eorum criminum, quæ obijciuntur, diluere. Hoc enim est officium hominis pii, qui non peculiari & heroico quodam Spiritu ad execrandos impios excitatur. Quid ergo? Num, quem admodum mutus es coram hominibus, aduersus inimicos

eorum conuitia, ita etiam mutus es & ociosus coram Deo? Nihil certè minus. Non exprobro quidem inimicis meis sua conuitia; interim autem non desino meum negotium agere coram DOMINO Deo nostro. Sic enim sequitur:

15. *Quoniam TE DOMINE expecto, TV exaudis me Domine Deus meus.*

Non respondeo maledictis & conuitijs inimicorum meorum, non reddo eis malum pro malo, sed relinquo DOMINO Deo meo vindictam, & expecto ipsi tantum opem è cælo. Non enim dubito, quin qua est clementia erga eos, qui agnoscunt peccatum suum, & credunt sibi ipsum remitti propter promissũ semen Abrahæ, exaudiat preces meas, & faciat me voti mei compotem. Quid ergo precaris? Quid petis? Sequitur:

16. *Dico, ne fortè latentur de me, & ne in lapsu pedis mei glorietur aduersus me magnificè.*

Non hoc dico, non hoc peto, non hoc postulo, vt inimici mei horribiliter opprimantur & pereant, sed illud dico, illud peto, vt me DOMINE Deus meus saluum custodias & conserues, ne, si fortè offendam ad lapidem pedes meos, & ruam in exitium, inimici mei de meo interitu latentur, & suæ impietati applaudant. Obseruabilis versiculus, quo Spiritus sanctus docet solenne officium piorum, in precibus suis aduersus iniurias inimicorum suorum. Non enim precandum est pro more vulgi, vt inimici tonitruis & ful-

Acto. 4. & fulminibus exterminentur, sed vt nos à lapsu pedis nostri, à peccato videlicet, & interitu, custodiamur, ne inimici nostri iustam & legitimam causam nobis insultandi habere videantur. In Actis Apostolicis, Principes & Pontifices minaciter interminantur Petro & Ioanni, ne docernet in nomine Iesu. Cum igitur hæc referrentur ad aliquos Apostolos & discipulos, non precantur vt terra Pontificibus dehiscat, aut fulminibus de cælo missis opprimantur, sed DOMINE, inquiunt, respice in minas eorum, & da seruis tuis, vt cum omni fiducia loquantur verbum tuum, manum tuam porrigendo in hoc, vt sanatio, & signa & prodigia adantur per nomen sanctum filij tui Iesu. Sequamur igitur hoc Apostolicum exemplum, & aduersus inimicos nostros ita precemur, vt interim non obliuiscamur officij nostri, sed meminerimus charitatis, quam etiã inimicis, iuxta præceptum Dei, debemus.

Sed quid? Num Dauid ita postulat à Deo seruari, & ab inimicis suis liberari, vt nihil prorsum crucis & afflictionis propter peccata sua in hoc seculo sustineat? De hac re audiamus versiculos, qui vsq; ad finem Psalmi sequuntur.

17. *Ego quidem ad afflictionem paratus sum, & scio me dolori semper obnoxium.*
18. *Quoniam iniquitatem meam fateor ipse, & sollicitus sum propter peccatum meum.*
19. *Inimici autem mei viuentes roborantur, & qui odio me habent iniquè multiplicantur.*
20. *Et qui reddunt malum pro bono, aduersantur mihi, propterea quod sequar, quod bonum est.*

21. *Ne igitur deferas me DOMINE, Deus meus ne longè discedas a me.*
22. *Propera ad adiuvandum me, Domine salutis meæ.*

Non peto DOMINE immunis esse ab omni cruce & calamitate, non rogo, ut in hoc mundo, non pro huius mundi conditione vitam agam, scio me propter iniquitatē meam, quam ingenuè fateor, & propter peccatum meum, quod & agnosco, & horreo, omni afflictionum tam generalium, quàm peculiarium generi obnoxium esse: nec detrecto quicquam illorum dolorum, quos tu mihi ferendos imponis. Quid igitur est, quod tam miserè ad me vocifereris? Si paratus es & promptus ad flagella, quibus te castigo, cur tam impatientes animo, ut ærumnas tuas depreceris? Respondet igitur precator: Non certè imploro opem tuam, ex impia inobedientia, & ex infideli ac virulenta impatientia, sed ex importunitate, robore & multitudine meorum inimicorum. Vides enim DOMINE, quo in statu sint res meæ: ego fero quidem manū tuā obedienter, & sustineo iram tuam patienter, sed inimici mei augēt mihi dolorem, & acuunt meas ærumnas. Hi enim, non sunt homines abiecti & inglorij, sed illustres, & rerū felicitate insignes, ut soli ipsi in hac terra vivere videantur: nec sunt homines imbecilles, sed summa potentia in hoc seculo præditi, ac ornati: nec sunt pauci, sed plurimi, quorum numerus subinde multiplicatur. Hi addunt calamitatē calamitati, & cumulant ærumnas ærumnis: & quod mihi indignissimum videtur, hi habent me odio, ac persequuntur me crudeliter, sine vlla iusta causa, sed tantum quia sequor bonum, hoc est, facio meum officium,

& cupio de omnibus bene mereri. Etsi enim agnosco me coram Deo miserrimum peccatorem, ac sentio quoque in me sagittas Dei, propter meam iniquitatem, tamen nihil peccaui contra inimicos meos, sed potius præstiti eis omne genus beneficiorum, & tamen tam virulento odio in me grassantur, ut cupiant me de terra sublatum, ac prorsus extinctum. Hæc sunt, quæ me mirum in modum excruciant, ac penè enecant, tuus furor DOMINE, & tua ira, quia non dubito, quin sub his mediteris erga me gratiam, fauorem & clementiam, & daturus sis euentum, ut sufferre queam, videntur adhuc mihi tolerabiles, sed illud mihi demum intolerandum esse arbitror, quod inimici mei sint in me tam crudeles, ut prioribus afflictionibus, addant mihi nouas, idque præter omne meum erga ipsos meritum. Tu iratus es aduersus me parum, idque iustissima de causa, ipsi vero sæuiunt in me, veluti leones, idque summa iniuria. Quæso igitur te, DOMINE Deus meus, quod ab initio precabar, ne arguas me in furore & ira tua, (hoc est) ne de me quicquam statuas, iuxta meritum meorum peccatorum, neque iuxta affectum & virulentiam meorum inimicorum, qui hoc vnum optant, ut me prorsus deseras & abijcias, sed iudices de me, pro immensa tua clementia in semine Abraham promissa. Et quia sentio me versari in summis periculis, obsecro, ne auxilium tuum in longum differas, sed properes, ut quem solum agnosco omnis meæ salutis autorem, opem tuam citò, & replea experiar. Multa nos docent hi versiculi. Vnum est, quod etsi ab inimicis nostris iniuste affligimur, tamen agnoscendum est coram Deo peccatum nostrum, & non est vicissim in inimicos virtulenter

lenter grassandum. Exemplo est Dauid ipse, qui cum malediceretur à Simei, & diceretur vir sanguinum, tantum abfuit vt remalediceret, vt etiam amicis seueriter prohiberet, ne in maledicum grassarentur: Dimittite eum, inquit, vt maledicat, DOMINVS enim præcepit ei, vt malediceret Dauid. Et Petrus de Christo: Qui peccatum, inquit, non fecit, nec est inuentus dolus in ore eius: qui cum malediceretur, non remaledixit, cum pateretur, non comminabatur, sed tradidit vindictam ei, qui iudicat iustè. Deinde monet nos Dauid suo exemplo, vt siquidem in hoc seculo vita agenda est, non suscipiamus in hoc mundo conquirendum genus vitæ ita tranquillum, vt nihil afflictionum in eo sustineamus, sententia enim lata est, quòd sicut auis ad volatum, ita homo ad ærumnas natus sit, sed vt præparemus nos ad sufferenda omnia afflictionum genera, quæ in quauis Dei vocatione nobis contigerint. Præparabimus autem nos, si in illud studium summa opera incumbamus, vt iustificati (quod Paulus ait) ex fide, pacem habemus erga Deum, per DOMINVM nostrum Iesum Christum, & sine vlla hæsitacione credamus, Deum esse fidelem, qui non sinat nos tentari, supra id, quod possumus, sed det vnà cum tentatione euentum, vt possimus sufferre.

Iob. 5. 14.

Rom. 5.

1. Cor. 10.

Admonemur etiam his versiculis, quòd de ira Dei non sit iudicandū ex ira hominum. Homines enim si exarserint, nullum ponunt irę suę nec modum, nec finem, sicut suprà de Babylonijs dictū est. Deus autem qui est salus & clementia ipsa, ita irascitur, vt tamen erga credentes & inuocantes nomen eius meminerit misericordiz. Apud Hoseam dicit DOMINVS: quomodo dabo

Osee. 11.

te Ephraim? protegam ne te Israël? quomodo dabo te? sicut Adama, ponam te vt Zeboim? Conuersum est in me cor meum, pariter conturbata est poenitudo mea.

- Thren. 3.* Non faciā furorem iræ meæ. Et in Threnis Hieremiæ: Non repellet in sempiternum DOMINVS. Quia si abiecit, etiam miserebitur secundum multitudinem misericordiarū tuarum. Nec enim humiliavit ex corde suo. Et in Ezechiele: Viuo ego, dicit DOMINVS, nolo mortem peccatoris, sed magis vt conuertatur & viuat. Quid horribilius morte ex ira Dei obiecta? Et tamen Deus iurat, se non hoc consilio mortem minari, vt perdat, sed vt seruet. Hinc est, quod qui veram cognitionem diuinæ in afflictionibus voluntatis habent, & datur eis optio, num malint à Deo ipso affligi, an ab hominibus, longè præferunt manum DOMINI manibus hominum. In
- Iudic. 10.* libro Iudicum merentur Israëlita supplicium, propter idolomaniam suam: & cum tradendi essent hostibus suis, vt affligerentur, obnixè deprecantur, & dicunt ad DOMINVM: Peccauimus: redde TV nobis quicquid tibi placet: tantum nunc libera nos. Illud volunt dicere: Faremur ingenuè nos iram & supplicium tuum propter impietatem nostram meritos, nec tam impudenter sumus, vt petamus ab omni supplicio prorsus liberi esse, verum illud precamur, ne nos hostibus nostris puniendos tradas, sed tu ipse nos pro tua voluntate affligendos suscipias. In posteriori libro Samuelis, cum Dauid numerasset populum temerè, & meritis esset supplicium, datur quidem ipsi optio trium generum poenarum, famis, pestilentiae, & incursionis hostilis: sed eligit manū DOMINI: Coartor, inquit, nimis: sed melius est, vt incidam in manus DOMINI, (multæ enim sunt misericordiae

ricordia eius,) quàm in manus hominum. Non dissimile exemplum extat etiam in libro Iudith, sed qui inter *Iudith. 7.* Apocryphos habetur. Ozias enim precatur DOMINUM cōtra tyrannidem Holopernis: Peccauimus, inquiens, cum patribus nostris, iniuste egimus, iniquitatē fecimus. TV, quia pius es, miserere nostri: aut in TVO flagello vindica iniquitates nostras, & noli tradere confitentes te, populo, qui ignorat te, vt non dicant inter Gentes: Vbi est Deus eorum? His exemplis & id genus alijs edocti, non metiamur iram Dei, ex ingenio crudelium hominum, sed potius ex promissionibus Dei, quibus manifestum est, quòd etiam si Deus affligat, meditetur tamen liberationem & salutem. Postremo cum in Esaia dicatur: Qui crediderit, non festinet, miraberis fortassis, cur Psalmus iuxta vulgatā translationem dicat: Intende in adiutorium meum, quod nos legimus: Propera, seu festina ad adiuvandum me? Sed sciamus, aliud esse ad auxilium Dei ex incredulitate, aliud ex doloris magnitudine & grauitate festinare. Impij enim in afflictione sua properant & ipsi aliquoties ad Deum, sed nisi statim affuisset auxilium, redeunt ad ingenium, & dicunt: Flectere si nequeo superos, Acheronta mouebo. Pij autem cum festinant, & cupiunt sibi continuò subueniri, non defatigantur inuocatione, sed etiam si auxilium differatur, & afflictiones subinde grauiores fiant, perdurant in officio, & expectant tempus, quod non ipsis, sed DOMINO Deo opportunū videtur. Solet enim Deus opem petitam, ac promissam aliquoties differre, non quia nolit eam conferre, sed quia velit fidem inuocantis probare, & dilationem maioribus beneficijs compensare. Quare licebit quidem in precibus festinare, &

opem diuinam velociter, sine vlla dilatione affuturam petere, sed ex fide, vt etiam si videamur repulsam pati, tamen non deseramus inuocandi officium, sed DOMINVM obedienter expectemus.

VSVS HVIVS PSALMI.

Eccle. 3. Tempus belli, inquit Salomon, & tempus pacis: Quarum rerum varietas in hoc mundo est solennis, ea etiam solet esse in hominibus. Aliquoties enim tranquillus est animus, ac non sentit iram & iudiciũ Dei aduersus peccatum. Aliquoties ex agnitione peccati & diuinæ iræ ita perturbatur, vt existimet sibi ex hac vita in æternam internitionem migrandum esse. Vtroque tempore tam pacis quàm belli opportunus & commodus est hic Psalmus. Si enim fruimur præsentī tranquillitate, sumendus est hic Psalmus in manum, vt admoneamur de seueritate diuini iudicij, aduersus peccatum, quod adhuc in carne nostra hæret, & non ducamus vitam carnaliter securam, sed ambulemus in timore DOMINI. Si autem in præsentia affligimur sensu iræ Dei, iterum properandum est ad hunc Psalmum, vt ex eo cognoscamus primum quidem, Dauidem, hominem pium, & secundum cor Dei electum, simili affectu laborasse & liberatum esse, vt & nos exemplo eius benè confidamus. Deinde consilium Dei, quod Deuse iaculetur quidem sagittas suas acutissimas in populum suum, non autem, vt perdat eos, sed vt hac via ducatur ad veram & æternam salutem, illud videlicet agens, vt cum Propheta dicamus: Venite, reuertamur ad DOMINVM, quia ipse discerpit, & sanabit nos, percutit, & curabit nos. Vini-
ficabit

Osea. 6.

ficabit nos post duos dies. In die tertia suscitabit nos, & uiuemus in conspectu eius.

PSALM. XXXIX.

Dixi custodiam vias meas, &c.



Iusdem argumenti est hic Psalmus, cuius tricesimus septimus: Noli x-
mulari, & septuagesimus tertius:
Quàm bonus Israel Deus. Et quam
querelam hi Psalmi continent, ean-
dem continet etiam vicesimum pri-
mum caput in Iobe, & repetunt Pro-

pheta. Hieremias cap. 12. dicit: Quare via impiorum
prosperatur? Benè est omnibus, qui prauaricantur, &
iniquè agunt? Abacuc cap. 1. ait: Quare respicis contem-
ptores & taces, conculcante impio iustiore se? Hec e-
nim est perpetua hominum in hoc seculo querela, quòd
bonis sit malè, malis autem benè. Ex quo quidem homi-
nes ita offendi solent, vt alij applaudant suæ impietati,
quam vident in hoc seculo esse felicem, alij sequantur e-
tiam ipsi, abiecti pietate, impietatem, alij negent esse
Deum omnia gubernantem, & arbitrantur res huma-
nas sursum deorsum, temerario casu ferri. Negotiator
videt imposturas & nugas sui vicini prosperum habere
successum: excitatur ergo, vt & ipse suscipiat impostu-
ras exercendas. Turca videt imperatorem suum in suâ
religione, imò impietate feliciter promouere, & Chri-
stianorum regna fortiter expugnare: stabilitur ergo in
sua

sua Mahumetica impietate, & ridet Christianam religionem. Spiritus sanctus autem munit pios verbo Dei, & hortatur eos, ne offendantur felicitate impiorum, & infelicitate piorum, propterea, quòd nec illa, nec hæc sit perpetua, imò ne diuturna quidem, sed illa compensetur vel tandem perpetua infelicitate, hæc autem perpetua felicitate, sicut & Christus ait: In mundo afflictionem habetis, sed bono animo sitis, ego vici mundum.

Ioan. 16.

Et iterum: Amen, amen dico vobis, vos plorabitis & lamentabimini, mundus contrà gaudebit. Vos autem moerore afficiemini, sed moeror vester vertetur in gaudium. Non igitur deseramus officium, propter impiorum gaudium, sed potius contrà eamus audentiores, confirmati concionibus illis Propheticis, quas visum est Spiritui sancto conferre in Psalmos illo consilio, vt & iucundius memorix insigantur, & ijs non tam publicè, vnà cum alijs, quàm priuatim soli, ore quidem tacito, sed vocali mente vtamur, canentes, (vt Paulus inquit) ac psallentes DOMINO in corde nostro.

Ephe. 5.

1. Dicebam quidem, Custodiā vias meas ne peccem lingua mea, imponam ori meo capistrum, dum impius coram me (obuersatur.)
2. Obmuteſcam silentio, tacebo præ felicitate (impj,) sed dolore meo perturbatus sum.
3. Concaluit cor meum intra me, in disceptatione mea exarsit ignis. Dixi ergo lingua mea.

Initiò recitat Psalter pugnā carnis & Spiritus, quam conspectus felicitatis impiorum, in homine pio excita-
re solet, vt hac occasione ad commemorationem eorū
reme-

remediorum, quæ isti offendiculo opponenda sunt, transeat. Dum impius, inquit, coram me obuersatur, & dum pono mihi ob oculos felicem rerum in impietate eius progressum, soleo quidem dicere, soleo mihi in animo meo proponere, quod velim vias meas ita custodire, & instituere, ut ne lingua quidem peccem, (hoc est) ut non murmurem, ac ne amarulentum quidem verbum aduersus felicitatem impij dicam, sed os meum freno seu capistro compescam, ne quicquam loquar, quo vel iudicium Dei, in benefaciendo impio, reprehendere, vel fortunæ proximi inuidere videar. Et si enim animus meus hac in parte grauitè offenditur, quod pijs sit malè, & impijs bene, tamè illud pro virili conor, ut obmutescam, & sileam à bono, hoc est, ut surda aure transeam bonum seu felicitatem impij, nec eam cogitationibus meis exagitem, sed æquo animo feram. Necessè quidè habeo coram *Iob. 21.* videre, impios esse securos, & durere in bonis, seu *Psal. 44.* in tranquillitate & felicitate dies suos, ac promptuaria eorum esse plena, & boues ipsorum esse crassos, sed hanc mihi operam sumo, ne offendar, & aut damnum iudicij Dei, aut deflectam in partes impiorum. In hoc autè meo conatu, & proposito, quid obsecro fit? quid accidit? Ecce tibi, quo plus compesco os meum, & inijcio ei frenum, eò magis perturbat me ægritudo animi mei, & incalcescit cor meum intra me, ac dum me huc illuc in omnem partem verso, testis magis æstuat ignis. Cogito enim nihil esse iniquius, nihil esse sapientiæ Dei incongruentius, quàm ut pijs sit malè, & impijs bene, id quod; tantisper in me gliscit, dum intrauero, ut alius Psalmus ait, *Psal. 73.* in sanctuarium Dei, & dicam lingua mea (hoc est) inuocem nomen DOMINI. Hac est insignis descriptio pugnae

gnæ inter carnem & Spiritum, in offendiculo, quod ex infelicitate piorum, & felicitate impiorum oriri solet. Ac impij quidem, vt primum vident hanc rerum inæqualitatem, ruunt in exitium, & sequuntur, non quæ iusta sunt, sed quæ in hoc seculo tuta & felicia videntur. Pij autem, etsi sollicitantur & ipsi carne sua ad impietatem, tamen pugnant Spiritu aduersus carnem, de qua pugna copiose scribit Paulus ad Romanos cap. 7. & ad Gal. cap. quinto. In obiectu enim felicitatis impiorum, Spiritus hortatur hominem, vt non offendatur, nec inuehatur in Iudicium Dei, nec excitetur vel ad æmulationem, vel ad virulentiam, sed compescat illegitimos motus animi, & pergat suum officium facere, ac suggerite ei rationes, cur in officio pietatis sit perdurandum, quam mox Psalmus commemorabit. Caro autem tumultuatur, contrà, Quid? inquires, arbitraris ne, cum malis sit bonè, & bonis malè, Deum curare res humanas? Nam si est Deus, nihil est eo nec iustius, nec sapientius, nec potentius. Non est autem iusti gubernatoris, nec sapientis, nec potentis, vt in administratione sua tantam iniustitiam perferat, & ad eam conrueat, quare, aut non est Deus, aut non curat humana. Et hic quidem est carnis instinctus & afflatus, in ipsis etiam hominibus pijs, & Spiritu renatis, qui & tanto est furore, vt quò magis Spiritu restiteris, eò vehementius soleat exardescere, & spiritu repugnare. Delectat me, inquit Paulus, lex Dei, secundum internum hominem, sed video aliam legem (quæ est lex seu instinctus carnis) in membris meis, rebellantem legi mentis meæ, & captiuum reddentem me legi peccati, quæ est in membris meis. Quid igitur faciendum, & quo se in hac pugna videntum?

Rom. 7.

dum? Quod Iasophat rex Iudæ, in subita incurfione suorum hostium fecit, hoc nobis etiã in hac periculosa pugna faciendum est. Propereimus precibus nostris ad DOMINUM Deum nostrum, & dicamus: In nobis quidem nō est tanta fortitudo, vt possimus insano carnis tumultui, qui in nos grassatur, resistere, sed cum ignoremus, quid agere debeamus, hoc solum habemus residui, vt oculos nostros, ad te DOMINE Deus noster dirigamus. Hoc enim illud est, quod Psalmus ait: DIXI lingua mea, (hoc est) Cum sentirem intra me tantum carnis aduersus Spiritum ardorem, vt quo magis respicerem in impiorum felicitatem, eò plus offenderer, & ad partes impiorum sollicitarer, non habui aliud asylum, quò confugerem, quàm vt dicerem lingua mea. Quid autem dicerem? Quod sequitur, inuocarem, videlicet precibus meis nomen DOMINI Dei nostri, vt ipsè suo me Spiritu & cœlesti ope, in tanto certamine iuuet. In periculis enim nihil magis salutare est, quàm vt nos sine vlla mora ad inuocationem nominis Dei conferamus: Inuoca me (inquit) in die tribulationis, eruam te, & honorificabis me. Audiamus ergo preces, quibus psalter Deum in hac pugna inuocat.

4. *Ostende mihi DOMINE finem meum, & mensuram dierum meorum, quæ sit, vt cognoscam, quàm caduca sit vita mea.*
5. *Ecce das mihi dies palmares, & vitam meam, perinde ac nihil esset coram te, certè omnino vanitas est omnis homo, (quamuis) præstantissimus.*
6. *Certè, incedit quisq, sicut umbra, certè frustra tumultuatur, congregat, & nescit, cui colligat ea.*

7. *Nunc ergo, quid exspecto DOMINE? Spes mea TV es.*

In tribus primis versiculis cōmemorauit Psaltes pugnam carnis & Spiritus, in offendiculo felicitatis impiorum, & infelicitatis piorū. Et dictum est, quòd in hoc periculo vertat se ad preces, quæ non recensentur nudè & simpliciter, sed eiusmodi sunt, vt contineant in serationes, quibus precator inuatur, & inflammatur, vt Spiritus superet carnem, & reportet victoriā. Sunt autem precationum tres. In prima commemoratur, quòd nec felicitas impiorum, nec infelicitas piorum sit diuturna, sed caduca, & penè momentanea. Quis igitur propter momentaneam felicitatem recederet ab officio, & conijceret se in perpetuam infelicitatem? In secunda recensetur gratuita cōdonatio peccatorum, quod donum superat omnem huius seculi felicitatem, & compensat omnē mundanam infelicitatem. Quis autem præ tanto dono non fastideret impiorum maiestatem, quamuis illustrem? Tertia significat DOMINVM Deum nostrum dare in tentationibus euentum, vt possimus eas ferre, de qua re si quis certificatur, quid causæ esset, cur infelicitatem suam in hoc seculo impatienter ferret, & ad impietatem deficeret? Dicamus igitur primū, de prima precatione: In certamine carnis cum spiritu, non habui aliud, inquit Psaltes, quàm vt dicerem lingua mea, hoc est, inuocarem DOMINVM precibus meis, vt ostendat mihi finem meum, & notam faciat mihi durationem vitæ meæ. Quid? quæ, inquires, hæc est impudentia, postulare à DOMINO, vt nos certiores reddat, quamdiu simus in hoc seculo victuri, & quàm longè vita nostra sit proroganda? In Actis Apostolicis percontantur Apo-

stoli

stoli Christū: Num in tempore hoc, inquietes, restituis *Act. 17.*
 regnū Israël? Sed audiunt: Non est vestrū nosse tempora
 & articulos temporū, quos pater in sua ipsius potestate
 posuit. An non idem posset DOMINVS Psalta in hac sua
 petitione respondere? De die illo, inquit Christus, &
 hora nemo scit, ne Angeli quidem cœlorum, nisi Pater *Matth. 24.*
 meus solus. Quod de ignorantia diei & horæ generalis
 aduentus DOMINI, ad iudicandum vniuersum orbem,
 primū quidem Iudæorum, deinde etiam omniū Gen-
 tium, dictum est, hoc intelligendum quoq; est de pecu-
 liari aduentu DOMINI, quo priuatim quisq; ex hac vi-
 ta, in alteram euocatur. Quid ergo est, quod Psalter oret
 hic, vt cognoscat, quamdiu sit in hac terra victurus, hoc
 est, vt Deus patefaciat ipsi diem mortis suæ? Sciamus
 igitur, quod Dauid non postulet impudenter, vt illa ar-
 cana, quæ Deus vult nobis in hac vita esse abscondita,
 & quæ vtiliter quoq; ignoramus, cognoscat, sed petat
 obedienter, vt Deus patefaciat ipsi, quanta sit humanæ
 vitæ vanitas, quanta futilitas, & vt retineat ipsum in iu-
 gi huius vanitatis consideratione. Videt enim se, in se-
 ctanda vera pietate, varijs & duris casibus iactari, impi-
 os autem tam prosperos habere suarum rerum succes-
 sus, vt videantur fore perpetuò felices. Quare caro sug-
 gerit, si fortè Deus curam humanarum rerum abiecerit,
 Sed Spiritus opponit his carnis cogitationibus vanita-
 tem humanæ vitæ, & breuitatem felicitatis impiorum.
 Ostende mihi, inquit peccator, finem meum, & quæ sit
 mensura dierum meorū, vt sciam, quàm caduca, quàm
 fugax sit vita mea. Non hoc peto, DOMINE, vt me cer-
 tiorem reddas de tempore & momēto, quo mihi ex hac
 vita excedendum sit, nolo curiosè scrutari, quod tu in
 m 3 tua

tua ipsius potestate cōstituiſti, ſed illud ſcire peto, quod
 tu voluiſti nobis planè eſſe cognitum & perſpectum, vi-
 delicet, vt cum ego multis aduerſis affligar, impij autem
 in ſigni felicitate fruantur, animum meum in vera co-
 gnitione, & cōſideratione varietatis & vaſtitatis hu-
 manarum rerum conſerues, & ſciam, nec me perpetuò
 affligendum, nec impioſ diu ſua felicitate fruituros. O-
 ſtende mihi ſinem meum: effice, vt rectè intelligam, af-
 flictiones meas ſuum habituras ſinem, & infelicem ac-
 triſtem meam vitam non in longum tempus prorogan-
 dā, ſed ſua meſura, ſuis terminis, quos infelicitas tranſi-
 gredi non queat, eſſe definitam. Atq; ecce adeo, tuo DO-
 MINE fauore, agnoſco, dies vitæ meæ vix longitudinem
 ſpithames ſeu palmi, aut meſuram quatuor digito-
 rum æquare, imò, ſi ad tuam Geometriam conſerantur,
 planè nihil eſſe. Quomodo igitur non æquanimiter fer-
 rem tantillo tempore afflictiones, etiam ſi in ijs uſque ad
 extremum huius corporalis vitæ perdurandum eſſet?
 Non loquor autem tantum de meæ, ſed etiam de omni-
 um hominum, ac maximè impiorum vitæ ſeu vanitate,
 ſeu breuitate. Certè vita omnium hominum, quamuis
 excellentiſſimorum, & præſtantiſſimorum, vnà cum
 omni ſua ſapientia, potentia & felicitate, non eſt niſi ex-
 trema vanitas, vt rectè dixerint, qui hominem vocarunt
 bullam, & ymbra ſomnium, & iuxta Eſaiam, omnem
 carnem eſſe fœnum, & omnem gloriam eius, quaſi flo-
 rem agri. Vnde & hîc additur, certè vnusquiſque ince-
 dit in imagine aut ymbra, ſeu ſicut ymbra. Nam quem-
 admodum illa imagine & ymbra, quam homo in ſole
 ambulans, de ſe proijcit, nihil eſt vanius & inanius, ha-
 bet tantum ſpeciem quandam aut laruam hominis,

non

non autem est homo: ita homo ipse, vna cum omni sua gloria & felicitate in hoc seculo, res est longè omniū fragillima. Ac vides aliquoties, tantam eius vanitatem, vt multo sudore, multo labore congreget diuitias (quemadmodum etiam Ecclesiastes Salomonis dicit) *Eccles. 2.* & tamen ignoret, cui eas congreget, & qualem habiturus sit haredem. Cum igitur videas felicitatem impiorum, nec esse stabilem, nec diuinam, ac ne quidem vel dimidia pars felicem, cur, obsecro, ita offendereris, vt pietatis officium desereres? Quò ergo, inquires, in tanta vanitate, & tam repentinarum mutatione, me vertam? quid consilij capiam? Hoc docet te sequens versiculus. Nunc quid expecto, inquires, DOMINE? Reipsa comperio humanam felicitatem esse instabilem, fluxam, momentaneam. Quare igitur confidam? in qua spem meam collocabo? Respondetur: DOMINE, spes mea TV es. Reliqua omnia, siue hæc corporalis vita, siue humana potentia, sapientia, & felicitas fallunt, & pudent faciant sperantem in ea. Solus DOMINVS Deus noster constat: sola benedictio DOMINI Dei nostri in semine Abraham promissæ firma est, & stabilis: sola DOMINI Dei nostri felicitas, nobis per Christum filium eius impetrata, fixa est, rata est, & perpetua. Vt cunque igitur res ceciderit, & siue impijs in hoc mundo bene sit, siue tibi malè, solus DOMINVS Deus tuus sit spes & fiducia tua. Si enim Deus pro te, quis contra te? Et quis separabit te ab ea dilectione, qua Deus te in ipsum solum sperantem complectitur? Num afflictio? num angustia? num persecutio? num fames? num nuditas? num periculum?

Rom. 8.

num

num gladius? Imò persuasum tibi sit, quòd neq; mors, neq; vita, neq; Angeli, neq; principatus, neq; potestates, neq; instantia neq; futura, neq; altitudo, neq; profunditas, neq; vlla creatura poterit te separare, ab ea dilectione, qua Deus tibi propter Christum Iesum DOMINVM nostrũ fauet. Habes primam precationem, in qua Spiritus sanctus munit & confirmat animũ nostrum aduersus offendiculum, ex impiorũ felicitate cõceptum, videlicet, quòd humana omnia sint mera vanitas, & quòd impiorum felicitas non sit veritas, sed vmbra, imò ymbræ somniũ, quo nihil potest esse inanius: Sicut somniat esuriens, inquit Esaias, & comedit, cum autem fuerit expergefactus, vacua est anima eius. Et sicut somniat sitiens, & bibit, & postquam fuerit expergefactus lassus adhuc sitit, & anima eius vacua est: sic erit multitudo omnium Gentium, quę dimicauerunt, & habuerunt felicem belli sui euentum aduersus montem Zion.

Esa. 29.

Hæc ratio consolandi & muniendi animi contra illa offendicula, non solũ commemoratur à Spiritu sancto, in hoc Psalmo, verũ etiam in multis alijs locis scripturæ: Ne succenseas, inquit Psalm. 37. propter malignos, nec amuleris propter facientes iniquitatem. Ob quam causam? Quoniam tanquã scenum velociter arefcient, & quemadmodum viride gramẽ marcescent. Et mox: Adhuc pusillum, & non erit impius. Inuestigabis locum eius, & non erit. Et Psalm. 73. Impij in labore hominum non sunt & cum hominibus non flagellantur. Sed quis huius felicitatis euentus? Certè, inquit, ponis eos in lubrico, deijcis eos ad interitum. Certè vastantur ex improviso, deficiunt & pereunt horribiliter. Et Hieremias cap. 10. Quare via impiorum prosperatur, benè est

est omnibus, qui præuaricantur, & iniquè agunt? Respondetur. Congrega eos quasi gregem ad victimam, & sanctifica eos ad diem occisionis, (hoc est) Deus idcirco conuiuet ad felicitatem impiorum, vt saginet eos ad laniationem, & tantò horribilius pereant, quantò feliciorem vitam in hac terra egerunt. Quid multis? Impij tolluntur in altum, vt grauiori lapsu ruant. Caue igitur, ne felicitate eorum ita offendaris, vt exemplum ipsorum secteris, sed admonitus repentino eorum interitu, officium tuum facere pergas, & omnem spem tuam in sola clementia ac benedictione per semen Abrahæ, quod est Christus DOMINVS noster, promissa, colloces.

7. *Ab omnibus iniquitatibus meis libera me, opprobrium stultitie ne ponas me.*

Secunda precatio, in qua petitur condonatio peccatorum, & liberatio ab opprobrio impiorum. Quid, inquires, hæc ad offendiculum, quod ex impiorum felicitate oritur? quæ est harum preclararum connexio? Aptæ profectò & cõsentanea. In priori enim precatione, confessus est precator omnem humanam gloriam & felicitatem esse vanitatem, & petijt se in vera huius vanitatis consideratione cõseruari, ne felicitate illa, qua in primis gloriantur impij, offendantur, & officium suum deserat. Quid ergo? dicet quispiam: Si DOMINVS contulerit in te humanam gloriam, & alia huius seculi dona, num tu ea proijcies, & pedibus conculcabis, quia sunt vanitas? Respondeo. Si hæc, beneficio Dei, mihi contigerint, non apponam cor meum, nec ijs confidam. Scio enim possessionem eorum non esse veram felicitatē, nec esse stabilem

lem & firmam, sed agam Deo gratias, & dabo quo ad eius fieri potest operam, ut ijs ad gloriam nominis Dei, & ad utilitatem proximi pie utar. Si verò non contigerint, aut antè collata auferantur, non magnoperè requiram, non tumultuabor, non grassabor virulenter vel in Deum, vel in prædonem. Dicam cum Iobe: DOMINVS dedit, DOMINVS abstulit. Sicut DOMINO placuit, ita factum est, sit nomen DOMINI benedictum. Illud autem requiram, illud maximè omnium spectabo, illud agam, ad illum exitum properabo, ut habeam remissionem iniquitatis meæ, ut habeam propitium DOMINVM Deum meum, qui mihi peccata mea, gratis, propter benedictum semen Abraham, condonet. Hoc donum, si consecutus fuero, quis me beator? quis felicior? Si enim habuero remissionem peccatorum coram Deo, nihil mihi incommodi afferre potest, nec corporis imbecillitas, nec paupertas, nec fames, nec exiliū, nec mors ipsa, imò hæc omnia necesse habent, mihi ad iumentum esse in bonum. Si autem quispiam remissione peccatorum coram Deo caruerit, quid obsecro, proderit homini vel sano, sua sanitas, vel diuiti, sua opulentia, vel regi, suum regnum. Melius tibi est (ut Christi verba sequamur) claudum, mutilum, & grotum, pauperem, famelicum, & omni genere calamitatis oppressum, ad vitam ingredi, (quod cōtingit ijs, qui habent peccatorum remissionem, quàm habentem duos pedes, sanum, diuitem, saturum, regem & Monarcham mitti in æternum ignem, quod ijs contingit, qui remissione peccatorum carent. Quare, siue prospera siue aduersa in hoc seculo euenerint, illud imprimis oro, DOMINE Deus noster, ut me ab omnibus iniquitatibus meis liberes; & omnia mihi peccata condones.

Deinde

Matth. 18.

Deinde illud etiam oro, ne me ponas stulto opprobriū. Intelligamus aut stultum, non eum, qui etiam iuxta homines huius seculi emota est mente, & audit morio aut fauus, sed illum, qui est impius, etiam si habeatur in hoc mundo sapientissimus. Oro igitur, ut conserues me, ne impijs viam ludibrio, & opprobrio. Non hoc peto, ut nō afficiar probis propter studium verę pietatis, scio enim hanc esse sortem hominum verē piorum, ut in hoc mundo malē audiant, & sint opprobrio impijs: sed illud peto, ut me Spiritu sancto tuo custodias, ne in scelera ruam, propter quæ meritō ab impijs affligar. Hoc prorsus illud est, quod Pet. Apostolus scripsit: *Qualis est laus,* *1. Pet. 2.* *inquiens, si, cum peccantes, a lapis cedimini, suffertis?* At si beneficientes & patientes suffertis, id demum est gratia apud Deum. Et iterum: *Ne quis vestrum affligitur,* *1. Pet. 4.* *ut homicida, aut fur, aut facinorosus, aut ἀνομιος, ἢ ἀπειρος:* si verō, ut Christianus, ne pudeat, imō glorificet Deum in parte hac. Petit igitur Dauid, ut non solum cōsequatur remissionem peccatorum, quod est beneficium longē omnium maximum, utut alia ceciderint, verū etiam ut conseruetur, ne occupetur (ut Paulus ait) aliquo delicto, ut impij non habeant, quo sibi propter ipsius lapsū blandiantur, & ipsum probis haud immeritō lacerare videantur. Cæterum, ut significet, se nec affectare felicitatē, qua fruuntur impij in hoc mundo, nec detractare afflictiones, quibus pij diuinitus obruuntur, sed contentum esse hoc dono, & hac gratia, videlicet, ut peccata non imputentur ipsi, & ut retineatur in officio, ne se sceleribus polluat, addit.

2. *Obmutescam, & non aperiā os meum, quoniam TV facies.*

u 3 Si

Si mihi condonaueris peccata, vt non dubito, & seruaueris me ab opprobrio impij, nihil est, quod amplius desiderem, reliqua omnia tuæ curæ commendo. Quæcunque enim, siue prospera, siue aduersa euenerint, obmutescam, nec aperiam os meum. Non contradicam, non repugnabo, etiam si me in extremas ærumnas conieceris. Quoniam TV FACIES, quicquid acciderit, TV optimè administrabis, TV rectissimè gubernabis, TV omnia diriges ad gloriam nominis tui, & ad meam salutem, TV nunquam committes, vt vera & æterna mea salus, ne quidem à morte ipsa, & inferni doloribus, aliquid detrimenti capiat. Quare, tu mihi tantum sis propitius, tua tantum gratia me cõplectaris, reliqua omnia tuæ voluntati obedienter permitto. Memorabilis versiculus, quo docemur, non esse commodiorem & magis compendiarium viam, ad veram tranquillitatem & felicitatem, quàm vt assecuta peccatorum remissione, nostrum faciamus officium, & quicquid acciderit, reijciamus in manum DOMINI, certa fiducia concepta, quòd cum absq; voluntate eius non cadat nec capillus de capite, nec passer in terrâ, nullæ nobis ærumnæ accidant, quarum felicem euentum non longè præuiderit & constituerit. Iacta super DOMINVM, inquit alius Psalmus, curam tuam, & ipse gubernabit, nec dabit in æternum fluctuationem iusto. Et alius: Reuela DOMINO viam tuam, & spera in eo, & ipse faciet. Et Petrus: Humilimini sub potenti manu DOMINI, vt vos extollat, opportuno tempore, omni vestra cura in ipsum coniecta. Habes secundam precationem.

Psal. 55.

Psal. 37.

1. Pet. 5.

10. Tolle à me plagam tuam, ego à conflictu manus tuæ absumor.

Tertia

Tertia precatio, qua petitur, vt Deus auferat ærumnas & afflictiones, quas immisit. Dices autem, quomodo hæc precatio conuenit cum præcedentibus, in quibus peccator recipit se patienter toleraturū, quicquid acciderit? Obmutescam, inquiens, & nō aperiam os meum, etiamsi multa mihi aduersa euenerint, tantummodo Deus sit mihi propitius: nunc autem videtur precari, vt prorsus non affligatur. Sed hic versiculus rectè intelligendus est. Non enim precatur, vt omnino nullas habeat in hac terra ærumnas, quæ enim hæc esset impudentia? sed precatur, vt Deus tollat à se plagam suam, (hoc est) vt mitiget aduersa, ne magnitudine flagelli diuini prorsus opprimatur. Excipit quidem obedienter & patienter, quiduis incommodi & aduersi Deus immiserit, illud tantū precatur, vt reddat calamitatē mitionem, nec à conflictu, & grauitate manus eius absumat, & pereat. Ad hunc modum orat Christus pro Apostolis suis, non rogo, inquiens, vt tollas eos de mundo, (hoc est) vt nullas prorsus in hoc mundo ærumnas habeant, sed vt serues eos à malo, videlicet, ne in ærumnis huius mundi succumbāt. Hoc idem significat diuinum oraculum Paulo, cum oraret, vt Angelus satanæ à se discederet, audit enim: Sufficit tibi gratia mea. Qua voce docet, nō esse in hoc seculo quærendam talem tranquillitatem, quæ omni cruce careat, sed nos contentos esse debere gratia & fauore Dei, quo fiat, vt in aduersis conseruemur, & non pereamus. Vnde & Paulus aliàs scribit: Fidelis est Deus, qui non sinet vos tentari, supra id, quod potestis, imò faciet vñà cum tentatione euentum, quo possitis sufferre. Hac promissione confirmati, non deferamus officium, propter crucem & aduersa, sed su-

1. *Thef. 5.*

ſcipiamus ea obedienter, quòd fidelis ſit, qui nos ad ea vocat, & efficiat, vt illa ſi euadamus.

11. *Si enim tu caſtigationibus quempiam, propter iniquitatem corripueris, ſolet contabescere deſiderabile eius, ſicut tinea (veſtem abſumit) certè vanitas eſt omnis homo.*

Addit hoc verſiculationem, cur petat in plaga & flagello Dei mitigationem & euentum, vt poſſit ſufferre, quia, inquit, ſi tu D O M I N E Deus meus, ſuſceperis quempiam caſtigandum & corripiendum, propter peccatum, tam grauis ſolet eſſe manus tua, vt nullus hominum ſuis viribus eam ferre queat, ſed quemadmodum tinea veſtem arrodit & abſumit, ita plaga tua deſiderabile hominis, hoc eſt, animam ſeu vitam eius, qua homini nihil eſt aut precioſius, aut magis deſiderabile, paulatim conficit & tabefacit. Nec mirum, tanta enim eſt cuiuſuis hominis vanitas, ſua ipſius natura, vt ne minimam quidem increpationem Dei ſaluus & incolumi ſufferre poſſit. Spiritus ſanctus autem ſæpè proponit nobis ex vna quidem parte grauitatem iræ Dei aduerſus peccata, ex altera autem parte vanitatem hominis confiderandam, non hoc conſilio, vt conijciat nos in veræ ſalutis deſperationem, & abducatur in æternam condemnationem, ſed potius, vt abducatur nos à noſtri ipſorum fiducia, & excitet ad quærendam condonationem peccatorum, & veram ſalutem in ſolo D O M I N O noſtro Ieſu Chriſto, per fidem, qui & ſolus nobis propoſitus eſt, vt placator iræ Dei, & autor omnis noſtræ ſalutis.

12. *Audi (igitur) precationem meam D O M I N E, & auribus percipe clamorem meum. Ad lacrymam meam ne obſurdeſcas, quia peregrinus ſum apud te, & advena ſicut omnes patres mei.*

13. *Deſin.*

Gene. 8.

Pſal. 60.

Pſal. 62.

Pſal. 94.

Eccle. 1.

Eſai. 41.

Hier. 10.

Iob. 14.

13. *Desine à me, vt corrobore, priusquam (ex hac vita) excedam. & non amplius inter mortales vitam agam.*

Reperit & concludit tertiam precationem, vt Deus mitiget suas afflictiones, priusquam pereat: Omnis, inquit, homo vanitas. Nullus est hominum natura sua tanto animi robore, vt in iudicio Dei constare queat. Non iustificatur in cōspectu Dei ullus viuens: nec potest qui ipsam hominum, plagam manus Dei sustinere, nisi Deus ipse det euentū, vt ferri possit. Obsecro igitur te DOMINE, vt propitius precationē meā exaudias, & ad gemitus atq; clamores meos animū aduertas. Vides meas lacrymas, quas corā te, propter summas meas ærumnas effundo. Quæso igitur te, vt ad has & oculos & aures tuas conuertas, præsertim cum sim coram te peregrinus & incola, seu hospes, sicut omnes patres mei, nec alium habeam, præter te, liberatorem & seruatorem. Iterum ergo, atq; iterum rogo, vt desinas & cesses à me affligēdo, & mitiges dolorem meum, priusquam moriar (hoc est) perpetuò inteream. Nisi enim tu subueneris, omnino mihi in tantis aduersis pereundum erit. Obseruemus igitur in his duobus versiculis, primū, quod pij precatōres soleant in precibus suis coram Deo, gemitus, clamores, & lacrymas suas prætexere, non vt significant se expectare cœlestem opem, meritis suorum clamorū & lacrymarum, quæ est hypocritarum sententia, sed vt his testentur angustias animi sui, ac magnitudinē miserationum & ærurnarū suarum, quibus nō tam Deum, quàm seipsos commonefacerent promissionū Dei, quæ de miseris, afflictis & oppressis hominibus dictæ sunt, & fidem suam confirmarent. De populo enim seu Ecclesia Dei dicit DOMINVS ipse: Vidi afflictionem populi
mei

Exod. 3.

mei in Aegypto, & clamorem eius audiui, propter duriciam eorum, qui præsunt operibus, & sciens dolorem eius, DESCENDI VT LIBEREM eum de manibus Aegyptiorum. Hæc promissio, dicitur quidem iuxta τὸ ἔντεπ de Israëlitis & liberatione ipsorum è tyrannide Aegyptia, caincludit autem in se generalē promissionē, qua Deus recipit se omnium eorum, qui verè sunt de Ecclesia populi sui, afflictiones respecturum, & ipsos liberaturum, vnde & Moses ipse postea interpretatur: Non est alia (inquiens) natio tam grandis, quæ habeat Deos appropinquantés sibi, sicut Deus noster adest cunctis obsecrationibus nostris. Et Dauid: Iuxta est DOMINVS ijs, qui tribulato sunt Spiritu, & humiles Spiritu saluabit. Ac iterum: Clamat ad me, & ego exaudiam eum. Cum ipso sum in tribulatione, eripiam eum & glorificabo eum. Et Esaïas: DOMINVS habitat cum contrito & humili Spiritu, vt viuificet Spiritum humilium, & viuificet cor contritum. Quid plura? Deus idcirco his epithetis, clemens, misericors, & miserator, gaudet, quòd amplectatur miseros, & ad iuuandos ipsos cunctus propendeat. Quare compendiaria via ad consequendam cœlestem in miserijs opem, est, vt eas precibus nostris, DOMINO Deo nostro, non vt in scio, sed vt ad subueniendum promptissimo exponamus, si modò nos ipsi eas seriò agnouerimus, & auxilium eius per fidem quæsiuerimus. Deinde, illud etiam non oscitanter prætereundum est. quòd prelator vocet se peregrinum. & aduenam apud DOMINVM, facit enim & hoc ad impetrandum auxiliū Dei in miserijs. Peregrini enim & aduenæ seu hospites, non eodem loco in rebus publicis habentur, quo indigenæ & ciues. Et si enim commemorantur aliquoties in

Dent. 4.

Psal. 34.

Psal. 91.

ter ciues, non tamen fruuntur ciuium prærogatiuis, nisi & ipsi in ciuium catalogum recipiatur, aut singulari fauore tolerantur: alioqui enim non permittitur eis communio bonorum ciuitatis, nec patet eis accessus ad publicos honores, ac magistratus, sed necesse habet locum mutare, cum ciuibus visum fuerit. Interim, odio etiam habentur, quod non vnà cum ciuibus publica onera ferant, & si quid iniuriæ aut contumeliæ acceperint, non est, qui tueatur, aut vindicet. Deniq; magna est eorum, inter alienos, vbi nec amicum nec cognatum habent, miseria, multaq; aduersa dissimulare ac deuorare coguntur. Et vel hinc æstimare potes, quàm misera sit ipsorū conditio, quod quem nunc peregrinum vocamus, is autore Cicerone quondā hostis dicebatur. Huc etiā refer, *Cicer. in Offic. Genes. 19.* quod ciues Lotho aduenæ exprobrant: Ingressus es, inquit, vt aduena, nūquid vt iudices? Te ergo ipsum magis, quàm hos affligemus. Quæ peregrinorum conditio, cum DOMINO Deo nostro optimè sit bona, idcirco suscepit eos in tantā curam, vt seuerissimè præceperit Israëlitis suis, ne sint peregrinis & aduenis molesti, & palàm testificetur, se, quia tam contēpti sint ciuibus, singulari ipsos fauore prosequi: Aduenam (inquit) non contristabis, nec affliges eum, aduenæ enim & ipsi fuistis in terra Aegypti. Et iterū: Si habitauerit aduena in terra vestra, & moratus fuerit inter vos, non exprobretis ei, sed sit inter vos, quasi indigena, & diligetis eum, quasi vosmetipsos. | Fuistis enim et vos aduenæ in terra Aegypti. Ac rursus: Deus facit iudicium pupillo & viduæ, amat peregrinū, & dat ei victum & amictum. Et vos ergo amate peregrinos. Ex his legib. manifestū est, quod conditio peregrinorum & aduenarum tam abiecta sit

inter homines, vt Deus ipse necesse habuerit singulari rem ipsorum curam & tutelam suscipere. Quare, cum precatore agnoscit se coram Deo aduenam & peregrinum, haud obscurè significat, primum, se ab omnibus hominibus desertum, & omni humano praesidio destitutum. Deinde, se certò confidere, quod etiam fruiturus sit illo fauore, quo Deus palàm testificatus sit, se peregrinos amare, & tueri.

Quod autem addit: Sicut omnes patres mei, reuocat hoc quoque appendice in memoriam illas promissiones, quibus Deus recepit se maiores suos in omnibus aduersis defensorum, & conseruatorum, vt ex his fidem suam confirmet, & spe sua non pudeat. Nam & Patriarchæ ipsi agnouerunt, se in hac terra non esse ciues, sed peregrinos: Iuxta fidem, inquit Epistola ad Hebræos, mortui sunt hi omnes, cum non accepissent promissiones, sed proculeas vidissent & credidissent, & salutassent, & confessi fuissent, se hospites & aduenas esse in terra. Nam hæc qui dicunt, declarant se patriam inquirere. Vnde quod Dauid in hoc Psalmo fatetur, hoc postea repetit in oblatione eorum, quæ ad ædificationem templi necessaria videbatur. *1. Par. 29.* Tua, inquit, DOMINE, sunt omnia, & quæ de manu tua accepimus, dedimus tibi. Peregrini enim sumus coram te, & aduenæ, sicut omnes patres nostri. Dies nostri, quasi umbra super terram, & nulla ætæ mora. Sequamur ergo in precibus nostris, tam fidem, quàm verba Patriarcharum, & agnoscamus nos in hac terra non ciues, sed peregrinos, non indigenas, sed aduenas, non domesticos, sed hospites, vt excitemur ad quærendam & consequendam veram & coelestem patriam. Postremò, quod vltimus versiculus dicit: Desine à me,

me, vt corroborem, priusquam abiero, & nō amplius sim superstes, videtur mutuatū, paucis modō verbis mutatis ex Iobis cap. decimo, & decimo quarto: Dimittat me, vt corroborem paululum, priusquā abiero, & non reuertar. Et iterum: Recede paululum ab eo, vt quiescat. Non docet aut̃ his verbis animam hominis vnā cum corpore interire, & nō esse vitā post hanc vitā, quid enim à vera pietate alienius esset? Sed tantū petit, vt diuinitus iueatur, ne in extremis suis aduersis prorsus pereat. Petit, vt Deus det euentum, quemadmodū suprà dictum est, quo possit afflictiones suas sufferre, & non moriatur, à Deo desertus & abiectus. Est & hæc obseruabilis ratio, qua siue Deum, vt ita dicam, excitemus ad cōferendam nobis celestem opem, siue fidem nostram cōfirmemus, si vide licet exponamus Deo res nostras in summo discrimine & periculo versari, in quo nisi clementer succurrat, de salute nostra actum sit. Deus enim gaudet hoc epitheto, quòd sit refugium oppresso, refugium opportuno tempore, in afflictionibus, hoc est, adiutor in extremis periculis. Quare cum admonetur de summo discrimine, vt teneri nō potest, quin iuxta promissionem suam succurrat afflicto, ita afflicto hac admonitione confirmat fidem suam, vt certissimam liberationem speret.

VSVS HVIVS PSALMI.

Monumenta veteris Ecclesiæ testantur, studiosum Pambo. Vide
 quendā pietatis venisse ad Eremitā, eruditione, sanctita Socratem in hi-
 te vitę, & senectā venerabilem, ac petiisse ab ipso, vt di- sto. Eccle. li. 4.
 gnaretur sibi hunc Psalmum interpretari. Eremita haud cap. 23.
 grauatim hoc oneris suscipit, & exponit ei disertē ac
 o 2 perspicuē

perspicuè primum huius Psalmi versiculum: Dixi, custodiam vias meas, ne peccem lingua mea, imponā ori meo custodiam, dum impius coram me constiterit. Quem cum absoluisset, & in interpretatione pergere vellet, sufficit, reuerende pater, (inquit discipulus) hoc tempore, dabo interea operam, quān possū, vt hunc versiculum memoriæ mandem, & sententiam eius perspectam habeam: Quem postquam rectè perdidicero, redibo, vt & reliquum Psalmi cognoscā. Abit igitur, sed tam longo tempore non reuertitur, vt senex miraretur. Itaque vocato ad se, quid? inquit, abiecisti ne studium pietatis, quòd tanto tempore me hactenus non inuiseris? Nihil minus, inquit discipulus, sed interea meditatus sum hūc versiculum noctesq; diesq; summa diligentia, & tamen non potui hoc tempore consēqui, vt quod vtcunque intelligo, re ipsa præstem: cur igitur exhibuissem tibi, in suscipienda reliquæ partis Psalmi explicatione, molestiam? Commendanda quidem est reuerentia discipuli erga senem, non est autē ex hoc constituēda regula, quòd non sit pergendum in cognoscenda veræ pietatis doctrina; si vnum & alterum versiculum Psalmorum, aut aliorum cœlestium oraculorum, vel intelligentia non assequaris, vel opere non præstiteris. Attende, inquit Paulus, lectioni, exhortationi & doctrinæ. Ac mox: Attende tibi ipsi, & doctrinæ, persiste in his. Nam si id feceris, te ipsum seruabis, & eos qui te audiunt. Et iterum: Tu persistito in his, quæ didicisti, & quæ tibi concredita sciens, à quo didiceris, & quòd à puero Sacras literas noueris, quæ TE POSSUNT ERVDITVM REDDERE AD SALVTVM, per fidem, quæ est in Christo Iesu. Non igitur arbitreris studiosum piæ doctrinæ suo officio.

1. Tim. 4.

2. Tim. 3.

ficio defunctum, si in vna tātū & altera periodo sacra scripturæ cognoscenda hæreat, sed si pergat, pro sua vocatione legere, audire, repetere, euoluere & scrutari, quæ Spiritus sanctus legenda & scrutanda proposuit. Nam si loquendū est de sententia sacra scripturæ, quod in vno loco obscurum videtur, in altero clarius explicatur. Si autem loquendum est de impletione præceptorum eius, quod in vno loco paucis præcipitur, hoc in altero ita illustratur, vt auditorem per Spiritum sanctum ad obedientiam excitet ac inflammet. Quare non est vnquam in studio piæ doctrinæ cessandum, sed semper progrediendum, donec omnes perueniamus in vnitatem fidei, (vt Paulus loquitur) & agnitionis filij Dei, *Ephes. 4.* in virum perfectum, in mensuram ætatis plenæ adultæ Christi, vt non amplius simus pueri, qui fluctuemus, & circumferamur quouis vento doctrinæ. Vel hunc ipsum Psalmum nobis ob oculos ponamus, primus eius versiculus monet nos exemplo precatoris, vt in illo offendiculo, quod nobis ex impiorum felicitate obijcitur, custodiamus vias nostras, & coërceamus linguam nostram capistro, ne in gubernationem Dei virulenter inuehamur, & eam iniquitatis accusemus. Hic, si confiteris, exemplo discipuli, de quo antè dictū est, habes quidem, quod te erudiat, quid sit faciendum, sed nondum habes, quod te ad faciendum accendat & inflammet. Perge igitur in Psalmo, & inuenies rationes, quæ tibi, autore Spiritu sancto, stimulos ad præstandam obedientiam admoveant. Harum vna est, vt consideres vanitatem humanæ in hoc mundo felicitatis. Quid enim hæc felicitas aliud est, quàm vmbre somnium, aut si quid est inanius? Cur igitur ob rem tam euanidam, vel inuideres homini,

vel cōtumeliosus esses iu Deum? Altera est, quòd etiam si impius habet suam in bonis huius seculi felicitatē, tu tamen habes remissionem peccatorū coram Deo, quod bonum, vt excellit omnem huius mundi felicitatem, ita affert secum perpetuam & cœlestem beatitatem. Quid ergo succenseres gubernationi Dei, quòd in hominem impium, non etiam in te, vnà cum summo beneficio, in finem quoq; contulerit? Hoc enim perinde esset, ac si quis ornatus omnibus tam ingenij, quàm corporis dotibus, indignaretur se non posse etiam volare, instar auicularum, quid hoc affectu esset vanius? Tertia est, quòd etiam si impius felicem ducat vitam in hoc seculo, tu autem in vera pietate afflictionem habeas, tamen impio, (nisi resipiscat) in sua huius seculi felicitate, pereundum est, tibi autem Deus dat euentum, vt sufferre queas, & per afflictionem ingrediaris in cœleste regnum. Vtram igitur conditionem meliorem, & exoptatiorem arbitraris? Discamus igitur ex hoc Psalmo fortitudinem animi, vt propter impiorum felicitatem in hoc seculo, nō commoueamur, nec à statione officij nostri deiiciam⁹, sed agnoscamus iustum iudicium Dei, qui vt est sapientissimus omnium rerum gubernator, ita habet optimas causas, cur conniueat, vt malis in hoc seculo benè sit, bonis autem malè. Quæ causæ, cum aliàs copiosè recitari solent, supernacaneum est hoc loco repetere: & si quid in harum recitatione, humanę curiositati non satisfecerit, compescenda est exclamatione Pauli: O profunditatem diuitiarum & sapientiæ, & cognitionis Dei, quàm inscrutabilia sunt iudicia Dei, & im-
peruestigabiles viæ eius?
&c.

Rom. 11.

Psalmus

PSALMVS XL.

Expeclans expeclani DOMINVM, &c.

Egari quidem nō potest, quin Dauid multis in rebus fuerit typus DOMINI nostri Iesu Christi et adumbrauerit eum. In hoc autem Psalmo Dauid nō loquitur de seipso *κατὰ τὸ πρῶτον*, seu literaliter, et de Christo typicē, sed Christus ipse de se, iuxta literam, per os Dauidis loquitur. Extat enim in Epistola ad Hebrēos *Heb. 10.* manifestum testimonium, quōd hīc fiat sermo, nō de Dauidis, sed de Christi obedientia, qua peccata nostra coram Deo expiata sunt. Cum (Christus) ingrederetur, inquit Epistola, in mundum, dicit: Sacrificium & oblationem noluiisti, corpus aptasti mihi, holocausta mata & pro peccato non comprobasti. Tunc dixi: Ecce venio, &c. Ac videntur quidem ea, quæ in decimo tertio versiculo continentur: Compræhenderunt me iniquitates meæ, & non potui, vt viderem, in Dauidem magis, quā in Christum, qui nullum vnquam peccatum fecit, competere. Loquitur autem ibi Christus sicut aliās sepe, non de suis iniquitatibus, quas ipse fecerit, sed quas ipse expiandas in se suscepit. Quare sentiamus precationem huius Psalmi, non esse, iuxta literam, alterius, præterquam DOMINI nostri Iesu Christi, cuius Spiritus, sicut in alijs Prophetis, ita & in hoc Psalmo vaticinatus est de venturis in Christum, priusquam acciderent, afflictio- *1. Pet. 1.* nibus,

Expe-

1. *Expectans expecto DOMINVM, & inclinabit se ad me, & ex audiet clamorem meum.*
2. *Et educet me, ex horribili lacu, & è cænoſo luto, ac ſtatuet pedes meos ſuper petram, ſtabiliendo greſſus meos.*
3. *Ac dabit in os meum canticum nouum, laudem Deo noſtro.*
4. *Videbunt multi & timebūt, & confident in DOMINVM.*

Chriſtus filius Dei, cum ingrederetur, vt Epistoſa ad Hebræos loquitur, in hunc mundū, hoc eſt, cum incarnaretur, & in hoc mundo miniſterium ſuum peragendum ſuſciperet, videt futurū, vt non ſolū vulgaribus humani generis calamitatibus affligeretur, verū etiā probroſiſſimæ cruci affligeretur, & grauiffimis doloribus exerceretur, donec in cruce Spiritum emitteret. Intelligebat enim, vniuerſam ſacram ſcripturā, vnā cum ſacrificijs diuinitus inſtitutis eò tendere & ſpectare, vt ipſe fieret ſacrificium ad expianda peccata hominum.

Matt. 17.

Luc. 9.

Audiuerat etiam in monte à Moſe, & Elia, cum figuraretur, quā horribili exceſſu diſcedendum ſibi eſſet Hieroſolymis ex hac vita: legebat Pſalmos & reliquos Prophetas, è quibus cognoſcebat, quantē ipſum in hoc ſeculo calamitates manerent. Cum igitur formam ſerui, eiꝯq; longè omnium obedientiſſimi ſuſcepiffet, procumbit ante Deum Patrem ſuum in genua, & implorat cœleſtem opem eiꝯ, vt in tam difficilibus periculis ſeruetur. Nec arbitremur, eum preces, vel breuiſſimas, vel oſcitanter recitaſſe, ſed ardentiffimo affectu

Heb. 4.

oraſſe: Obtulit, inquit Epistoſa ad Hebræos, in diebus carnis ſuæ, precationes & ſupplicationes, apud illum, qui poterat ipſum à morte ſeruare, cum CLAMORE valido & lacrymis. Teſtantur & Euangeliftæ, quòd in mon-

tibus

ribus sæpè ac multùm, in oratione pernoctauerit solus. *Matt. 14. Lu. 6. 21.*
 Et in monte Oliueti tanto affectu orat, vt etiam sanguinem sudet. Existimas autem eum preces suas vno & altero verbo abioluiffe, & maximam noctis partem somno indulsisse? Nihil certè minus. Dubium enim non est, quin maximè omnium recitauerit, iterauerit, & summo studio euohierit Psalmos illos, quos Spiritus sanctus tot antè annis ipsi præscripserat. Inter quos, cum hic quadragesimus Psalmus, quem in præsentia interpretandum suscepimus, nõ sit postremus, debet nobis esse commendatissimus. Expectans, inquit, expecto DOMINVM. Video, in quantis periculis verser, cogito, quæ arumnaræ mihi sint fubeunda, nec video vllum in his terris humanũ auxiliũ. Attollo igitur oculos meos in cælum, & solius DOMINI Dei nostri opem, maximo animi desiderio expecto: nec dubito, quin quo est erga me paterno affectu, aures suas ad me inclinèt, ac meum clamorẽ exaudiat. Videt me coniectũ in horribilem foueam grauissimarum calamitatum, & hërere ac volutari in profundissimo cœno ac luto maximarum arumnarũ. Confido igitur certissima spe, quòd sit me potenti sua manu educturus, & clementer liberaturus, vt in firma petra consistam, nec amplius gressibus meis nutem ac yacilem. Liberabit autè me, nec veteri, nec vulgari, sed tam nouo & mirando modo, vt etiam ad gratias eragendas, nouum & mirandum carmen in laudem nominis eius decantem. Quòd beneficiũ, non vnus tantum populus, sed multi videbunt, & ita obstupescunt & admirabuntur, vt & ipsi agnoscant et confidant in DOMINVM. Diuulgabitur enim in toto orbe terrarum, vt non tantum Iudæi, verum etiam Gentes excitentur ad agnitionem

gloria Dei, ad fidem & inuocationem nominis eius. Ha-
 bes hic breuissimo compendio varicinium de passione,
 cruce, morte & resurrectione DOMINI nostri Iesu
 Christi, & de diuulgatione Euangelij eius in vniuersum
 mundum, vt quisquis crediderit, saluus fiat. Horribilis
 enim ille lacus, & caenosum lutum, de quo hic fit sermo,
 & ex quo certò sperat se educendum, sunt dolores mor-
 tis, & inferni, quibus Christus obrutus fuit: sunt confixi-
 ones manuum & pedum eius in cruce, & mors ipsa, qua
 videbatur coram hominibus in extremum interitū de-
 merfus & conculcatus. Deinde, statuere pedes super pe-
 tram, & stabilire gressus suos, & resurgere à morte, ac
 non solum nō amplius mori, verum etiam ascendere in
 cœlum, sedere à dextris Dei, & omnem potestatem in
 cœlo & in terra perpetuò habere. Postremò, dare in os
 nouum canticum, & laudem, vt multi videant, obstupescant,
 & confidant DOMINO, est mittere Apostolos in vni-
 uersum mundum, vt Euangelion adnuncient in toto or-
 be terrarum, & Gentes audiant, ac videant τὰ μεγάλα
 Dei, & excitentur ad fidem, quæ est in Iesum Christum
 DOMINVM nostrum.

5. *Beatus vir, qui ponit DOMINVM fiduciam suam, & non
 vertit se ad rebelles, & declinantes ad mendacium.*

Vbi Hebræus habet דב שמ, quod significat posuisti
 ibi Græcus legit βω Schē, quod significat nomē, et inter-
 pretatus est: Beatus vir, cuius est NOMEN DOMINI
 spes eius. Sed eadem est sententia. Postquam igitur filius
 Dei commemorauit in superioribus quatuor versiculis
 imminere sibi extremas calamitates, & tamē se in tantū
 non despondere animum suum, vt certissimē, ac sine vl-

la tergiuersione confidat se ex his mirando modo seruatum iri, exponit nunc rationes, propter quas tantam liberationis suæ certitudinem conceperit. Quarum vna est, quòd cum beatus sit, qui non se conuertit ad idolomaniam, sed collocat omnem suam fiduciam in solo DOMINO Deo nostro, fieri non possit, quin & ipse in summa sua afflictione salutem & beatitudinem cōsequatur, quia ponit fiduciam suam in solo DOMINO, & detestatur omnem idolomaniam. Altera ratio est, quòd Deus Patriarchas & maiores è maximis suis periculis, idq; mirando modo, & sæpius quàm numerari queat, clementer liberauerit: cur igitur ipse, qui sit vnigenitus filius Dei, non speraret certissimam liberationem? Tertia, quòd hæc pericula susceperit, non temeritate quadam, sed cōsilio & voluntate Dei, & vt testificaretur promptissimam suam erga Deum patrem obedientiam. Quomodo igitur spe sua pudefieret? Hæ rationes tanto diligentius sunt cognoscendæ, quanto maiorem & certiore salutis fiduciam, etiã nobis in omnibus aduersis nostris asferre possunt. Prima igitur ratio in hoc quinto versiculo recensetur. Dixit enim suprà: Magno desiderio expecto opem cœlestem, nec dubito, quin Deus exaudiat meum clamorem, & sit me ex horribili perditionis lacu educturus. Vnde ergo concepit tantam liberationis & salutis certitudinem? Beatus, inquit, vir, qui ponit DOMINVM, fiduciam suam, & non respicit, aut vertit se ad rebelles, hoc est, ad idolatras, qui verbo DOMINI peruicaciter & arroganter resistunt, ac declināt ad mendacem & impiam vanitatem idolorum. Illud vult dicere. Primum ac præcipuum præceptum Dei est: Non habeas coram me alienos Deos. Et additur insignis promissio: Ego,

(inquit DOMINVS) facio misericordiam in millia; his qui diligunt & custodiunt praecepta mea. Hoc quid aliud est, quam beatum & misericordia Dei in omnibus periculis tutum esse illum; qui non agnoscit alienos Deos, sed qui fiduciam suam in solo vero DOMINO Deo nostro collocat? Absit autem à me, vt agnoscam alienos Deos, & sequar exemplum eorū, qui pugnant cum verbo Dei, & conferunt se ad mendacia & vanitatem idolomaniae, sed adoro solū DOMINVM Deum nostrum, in quo solo etiam pono omnem spem & fiduciam meā, Quare non dubito, quin Deus faciat mecum misericordiam, & tueatur me in omnibus meis aduersis, ac reddat me beatum. Sep̃e autem & multū repetitur in scriptis Prophetiis & Apostolicis (quemadmodum aliquoties in explicatione piorum Psalmorum ostendimus) beatos esse illos, qui credunt in DOMINVM, confidunt DOMINO, sperant in DOMINVM, & expectant DOMINVM. Quae omnia eò spectant, vt in periculis non dubitemus de coelestiope, nec defatigemur in inuocatione nominis Dei, sed perseueremus in officio, certissima persuasione concepta, quòd etiam si fractus illabatur orbis, tamen DOMINVS redimet animas seruorum suorum, & non peribunt, quotquot sperant in eo, vt verbis Psalmi tricesimi quarti vtamur.

6. *Multi sunt mirabilia tua, quae fecisti tu DOMINE Deus meus, et non est, qui cogitationes tuas de nobis, ordine coram te recensere queat. Si suscepero ea enarranda & explicanda, plura sunt, quam quae numerari possunt.*

Secundaratio, cum non dubitet de coelesti liberetione,

ne, sed speret certissimā salutē. Et est hæc ratio sumpta ab exemplis Patriarcharū. Nam Patriarchæ & posterorum versati sunt sæpenumero in maximo discrimine, & audierunt difficillima quæq; pericula. Alij eiecti sunt in exiliū, alij inclusi sunt in carceres, alij abducti sunt in seruitutē, alij perpessi sunt famem, alij non solum obiecti sunt periculis mortis, verū etiam crudeliter sunt trucidati. Ac breuiter, nullū est calamitatis genus, in quo Patriarchæ, & quotquot fuerunt pii iam inde ab initio orbis, non sint iactati & exercitati. Et tamen DOMINVS tanta semper clementia eos cōplexus est, vt in ijs omnibus aduersis seruauerit eos mirandis modis. Etsi enim non omnes seruati sunt in hoc seculo, mundano modo, & externa felicitate, tamen seruati sunt mirabiliter in morte ipsa, ad aternā vitam. Multa sunt, inquit, mirabilia tua, quæ fecisti tu DOMINE Deus meus; hoc est, innumera extant exempla maiorum nostrorum, quæ probant, te ipsos sæpē ac multū in summis periculis mirando modo conseruasse & liberasse: imò, manifestum est, quod cogitationes, cōsilia, & instituta tua de nobis eiusmodi sint, vt nō conuiueres, nec permitter es quicquam aduersi nobis accidere, nisi antea excogitasses, & constituisses rationem qua nos conseruares & liberares. Non extruisses Abrahamum ē patria in exilium, nisi antea præparasses ei terram, in qua tutus commoraretur, non eduxisses Israëlitas ex Aegypto, & induxisses in horrendam ieremum, nisi antea prouidisses, qua ratione eos ab interitu defenderes. Quid multis opus? miracula, quibus pijs à conditione mundi, in extremis suis periculis, mirandum in modum tutatus es, plura sunt, quàm quæ ab homine commemorari possint: quæ si coner ordine

recensere, nihilopprudētius facerem, quā si susceperem
arenam maris numerandam. Quare, si tu DOMINE De-
us meus, tuam voluntatem in seruandis ijs, qui omnem
suam spem in te collocarunt, tot exemplis, tot miracu-
lis testificatus es, idq; in hunc vsum, vt fiducia nostra in
te confirmetur, nullo modo mihi dubitandum est, quin
me in ista summa mea calamitate sis clementer & mira-
biliter seruaturus. Habes alteram rationem, cur Chri-
stus non dubitet de liberatione, sed speret in exinaniti-
one sua, & in forma serui, certissimam salutem. Obser-
uamus autem hoc loco, verum vsum exemplorum, &
miraculorum, quibus Deus confidentes gratuita ipsius
clementia, in periculis suis cōseruauit. Aedidit enim ea
miracula, nō propter illos tantum, qui liberati sunt, sed
maximē omnium propter vniuersam Ecclesiam suam,
vt his voluntatem suam erga omnes inuocantes ipsi
ex fide, patefaceret, promissiones suas de præsencia cœ-
lestis salutis, in quouis discrimine stabiliret, & fiduciam
nostram certam redderet. Et si enim Christus aliās, Psal-
mo vicesimo secundo conqueritur, quòd Deus adiuue-
rit quidem & liberauerit Patriarchas è suis periculis, se
ipsum autem videatur deserere: In te inquires, speraue-
runt Patres nostri, sperauerunt, & liberaſti eos, ego ve-
rò sum vermis & non homo, opprobrium hominum, &
abiectio plebis: tamen hæc querela non pugnat cum il-
lo nostro versiculo. Ibi enim conqueritur, se non libera-
ri ab externa & corporali morte, sicut sæpè Patriarchæ
in periculis mortis, mirando modo ita seruati sunt, vt in
hac corporali vita, ad suum vsq; tempus, incolumes per-
manerint: hic autem affirmat se exemplis vetustatis,
& miraculis æditis in Patriarchis ita iuari, vt etiam si

non seruatur à morte, tali modo, quali Patriarchæ aliquoties sunt seruati, seruetur tamen, ne in morte ipsa pereat, sed tertia die ad æternam vitam, gloriam & maiestatem resurgat. Sciamus igitur exempla Patriarcharū, & miracula in liberationibus eorum ædita, ita demum nobis prodesse, non vt concipiamus fiduciam, nos semper eodem modo liberandos, sed vt exemplis eorum excitati & confirmati, credamus nos quoq; certissimè liberandos & conseruandos, si non eodem modo, certè non minus mirando, si nō corporaliter, certè spiritualiter, si nō ad hanc mundanā & caducam, certè ad cœlestem & perpetuam vitam ac felicitatem. Accedite ad eum (inquit Psalmus 34.) & accurrite, & facies vestræ non confundentur. Iste enim pauper (seu afflictus) clamauit, et DOMINVS exaudiuit eum, & de omnibus tribulationibus eius liberauit eum. Et Paulus: Certus, inquit, sermo, & dignus quem modis omnibus amplectamur, quòd Christus Iesus venit in mūdum, vt peccatores saluos faceret, quorum ego primus sum: verū ideo misericordiā sum adeptus, vt in me primò ostenderet Iesus Christus omnē clementiam, ad exprimendum exemplarijs, qui credituri essent in ipso, in vitam æternam. Agnoscamus igitur miracula in Patriarcharū liberationibus diuinitus ædita, non tanquam priuata solū, sed etiam publica beneficia, et manifesta monumenta, ac testificationes voluntatis Dei, quòd cogitet in aduersis mirabiliter tueri, quotquot nomen ipsius ex fide inuocant.

1. Tim. 1.

7. *Victimam & oblationem non voluisti, aures autem perfodisti mihi, holocaustum & sacrificium pro peccato non postulasti.*
8. *Tunc dixi: Ecce præsens adsum, in volumine libri scriptum est de me.*

V.

9. *Ut faciam, quod tibi placet, Deus meus. Volo igitur, & lex tua in medio ventris mei.*

Tertia ratio, propter quam Christus dicit, se certissimam sperare liberationem & salutem. Non enim coniecit se ipse sua aliqua temeritate in hæc crucis & mortis pericula, sed suscepit ea ex voluntate, vocatione & mandato Dei patris sui. Quod autem periculum ex vocatione Dei suscipitur, fieri non potest, quin felicissimum habeat beneficio Dei, euentum. Non voluisti, (inquit) ad expianda peccata humani generis victimam & oblationem, nec postulasti holocaustum, & hostiam pro peccato, sed perfodisti mihi aures, (hoc est) multa genera oblationum præscripta sunt in lege Mosi. Aliud est victima, (vt vocarunt) pacificorum seu perfectorum, aut sanctificatorum, de quo Leuit. 3. aliud est munus oblationis, quod vocarunt Minha, de quo Leuiti. 2. aliud est holocaustum, de quo Leuiti. 1. aliud est hostia pro peccato, quod Hebræi vocant חטאת Hatha, & significat hostiam peccati, Græci autem simpliciter transtulerunt *περί ἁμαρτίας* (hoc est) de peccato. Ac sic quoq; vsus est Paulus in Epistola ad Ro. ca. 8. *περί ἁμαρτίας κατήργησεν τὴν ἁμαρτίαν ἐν τῇ σαρκί*, de peccato, (hoc est) per hostiam pro peccato condemnauit peccatum in carne. De hoc oblationis genere, vide Leuit. 4. Habes varia sacrificiorum genera in lege Mosi. Deus autem nullum horum ad expiandum peccatum humani generis exigit, nec reputat sibi operibus eorum satisfieri, nec sinit se his placari. Quid ergo exigit? quo sacrificio placatur? Aures (inquit) perfodisti mihi. Pro, (aures) quæ Hebræo vocabulo אַזְנַי Aznaim dicuntur, transtulit Græcus inter-

Interpres *σωμα*, quod est corpus. Verisimile autem est, quod hoc acciderit, non interpretis, sed Scribæ vitio. Interpres enim videtur transtulisse *ωτα*, quod & ipsum significat aures. Scriba autem quispiam, pro, *ωτα*, quod vidit sic *ωτα* scriptū esse, legit *σωμα*. Sed hoc utcunq; sit, certē non *σωμα* seu corpus, sed *ωτα* seu aures, legendum est. Quid igitur est: Aures perfodisti mihi? In lege Mosi visitatum fuit, (quemadmodū Exodi 21. & Deut. 15. scriptū est) ut seruus cupiēs Domino suo seruire perpetuū, applicetur ianua domus ipsius, & perforetur auris eius subula: qui ritus publicū erat testimonium, quod hic seruus reciperet se perpetuū fore seruum domini huius, & dictis eius obedientem. Cū igitur Christus dicit, quod Deus non voluerit victimas & holocausta ad expiandum peccatū humani generis, sed perfoderit sibi aures, haud obscurē significat, quod Deus voluerit, ut assumeret formam serui, & obediret mandato eius ad suscipiendam mortem, eamq; crucis, videlicet, ut ad præstandam veram obedientiam, & ad perfectē gratificandum diuinæ voluntati, non arietē quendam aut bouem, sed ipsum se in holocaustum, pro mundi expiatione obediēter offerret. Vnde & sequitur: Tunc dixi. Ecce præstō adsum. In volumine legis scriptum est de me, ut faciam, quod tibi placet, DOMINE Deus meus. Volo igitur, et lex tua in medio ventris mei. Hoc est. Postquā intelligo Deū patrē non velle sacrificia legis, ad placandā irā suam aduersus peccatum, sed ut cunctus obediam voluntati eius, & mea ipsius passione & morte peccatum expiem, teneri nō possum, quin me proptissimum & obsequentissimum exhibeam. Video enim vniuersum volumen libri, quod est scriptum Mosi, in me respi-

Philip. 2.

gere, de me vaticinari, me adumbrare, meq; exposcere, vt mea ipsius morte pro peccato humani generis satisfaciam. Extat in hoc volumine prima de me promissio: Semen mulieris, seu filius virginis conteret tibi (serpenti) caput, & tu conteres calcaneum eius. Hæc promissio manifestè concionatur de mea morte & passione, qua satanâ vnâ cū potentia eius sim contriturus. Extat etiam in eo volumine institutio & vsus variorū sacrificiorum, quæ omnia eò spectant, non vt ijs sacris Deus reconcilietur cum humano genere, sed vt me adumbrent, & ego ipse fiam passione & morte mea sacrificium, quo solo ira Dei mitigetur. Et inter sacrificia huc pertinent maximè omnium agnus Paschalis, & hircus emissarius, de quo Leuiti. 16. Extant etiam in eo libro descriptæ multæ & magnæ afflictiones Patriarcharum, quæ omnes sunt quasi præemia earum afflictionum, quas ego ad redimendum humanum genus sufferre debeam. Quid multis opus? Non promulgatio tantum Decalogi, verum etiam institutio serpentis enei, adeoq; vniuersa historia populi Israelitici, eò spectant, vt sit populus in quo seruarentur promissiones de me, & expiatione peccatorum per me absoluenta, donec ego ipse adessem, & omnia perficerem. Cum igitur videam me, in volumine sacræ scripturæ, hoc est, manifesta voluntate Dei Patris mei (est enim sacræ scripturæ Epistola Dei ad humanum genus) ad sacrificium, ad passionem & mortem vocari, ecce præsto adsum DOMINE Deus meus, & illud vnum ex corde, ex animo, ex intimo affectu ago, vt voluntati tuæ, quæ verbo legis tuæ est patefacta, gratificer, & toto pectore obediam. Mirabitur autem quispiam, quid illud sibi velit, quod genera sacrificiorum,

ficiorum, quæ in Leuitico libro describuntur, fuerint tam à Patriarchis iam inde à conditione mundi vſitata, quàm poſtea diuinitus in lege Moſi vt cultus Deo gratiſſimus, confirmata, & tamen in hoc Pſalmo dicatur: Victimam & oblationem non voluiſti, holocauſtum & hoſtiam pro peccato nõ poſtulaſti. Cui ſententiæ adſcribunt ſe etiam omnes ferè alij Prophetæ. Dauid aliàs dicit: Si voluiſſes ſacrificium, dediſſem vtiq; , holocauſtis non delectaberis. Eſaias dicit: Quò mihi multitudo victimarum veſtrarum, dixit DOMINVS? Oſeas inquit: Miſericordiam volo, & non ſacrificiũ. Hieremias ait: Non ſum locutus cum patribus veſtris, & non præcepi eis in die qua eduxi eos de terra Aegypti, de verbo holocaustum & victimarum: & tamen manifeſtum eſt, quòd hæc ſacrificia ſint diuinitus inſtituta? Sciamus igitur, quòd etſi negari non poteſt, quin ſint diuino Spiritu inter Patriarchas & Iſraëlitas præſcripta & inſtituta, tamen inſtituta ſint longè alio conſilio, quàm impij hypocritæ vtebantur. Deus enim non voluit hac inſtitutione ſignificare, quòd operibus horum ſacrificiorum expiarentur eoram ſe peccata, ſed tantũ, vt veſtam peccatorum expiationem per Chriſtum filium ſuum (quemadmodum paulò antè dicebamus) conficiendam adumbrarent, & fidem in venturum Chriſtum confirmarent. Quare cum Pſalmi & Prophetæ damnant ſacrificia Leuitica, non reiſciunt diuinam eorum inſtitutionem, & legitimũ ipſorum uſum, ſed damnant impietatem hypocritarũ, qui poſthabita recta poenitentia, & contempta vera fide in promiſſum Chriſtum, ſectabantur tantũ opera ſacrificiorũ, ac ſentiebant, ſe horũ meritis placare iram Dei, & conſequi peccatorũ remiſſio-

Pſalm. 51.

Eſa. 1.

Oſea. 6.

Hier. 7.

nem. Itaq; cum hîc & alibi dicitur, Deum non voluisse victimam, oblationem, aut holocaustum, intelligēdum est, quòd Deus non quidem abominatus sit legitimum eorum vsum, suis temporibus, sed excretur illegitimum & impium eorum abusum, quo hypocritæ sacrificia diuinitus instituta sordidabant. Ac Propheta repræhenderunt quidem abusum eorum, institutionem autem & verum vsum iuxta præscriptum legis, inuiolatum reliquerunt. Postquam autem Christus aduenit, & sacrificium, quod his adumbrabatur, peregit, nō solū abusus eorum repræhenditur, verū metiam externus eorum v-sus omnino tollitur & aboletur. Non potest, (inquit Epistola ad Heb.) sanguis taurorum & hircorum auferre peccata. Quapropter cum ingrederetur in hūc mundū, (hoc est) cū filius Dei incarnaretur, & assumeret hominem, dicit: Sacrificium & oblationem nolui. Et mox: Tollit prius, vt secundum statuatur. Prius est sacrificium, oblatio, holocaustum, & aliæ oblationes legis: posterius seu secundum est, voluntas Dei, obedientia Christi, & oblatio corporis Iesu Christi semel peracta. Tollit igitur Psalmus, quod prius erat, quia vaticinatur sacrificia legis in aduentu Christi abolenda: Statuit autem posterius, quia docet nos sanctificari, non sacrificijs legis, sed solo sacrificio DOMINI nostri Iesu Christi, quod est mors eius, ad expianda peccata nostra suscepta.

Videtur & Paulus aliàs ex his Psalmi versiculis concionari. Ad Romanos dicit: Quemadmodum per inobedientiam vnus hominis peccatores cōstituti fuimus omnes, ita per OBEDIENTIAM vnus iusti constituentur multi. Et ad Phil. Christus Iesus, cum esset in forma Dei, non rapinam arbitratus est, vt esset æqualis Deo, sed

sed semetipsum inaniuit, forma serui sumpta, in similitudine hominū constitutus, & figura repertus vt homo, humilem præbuit semetipsum, factus O B E D I E N S vsq; ad mortem, mortē autem crucis. Hoc prorsus illud est, quod Christus in Psalmo dicit : Aures perfodisti mihi, (hoc est) factus sum, (sicut suprà diximus,) seruus, obediens tibi perpetuò vsq; ad mortem. A memus igitur Psalmos, & ediscam⁹, vt manifestè cognoscamus, quā probe Prophetica & Apostolica doctrina de D O M I N O nostro Iesu Christo conueniant.

10. *Euangelisabo iustitiam in Ecclesia magna, ecce labijs meis non cessabo, DOMINE tu nosti.*
11. *Iustitiam (inquam) tuam non abscondam, in medio cordis mei, veritatem tuam, & salutem tuam prædicabo. Non cælabo misericordiam tuam, & fidelitatem tuam in Ecclesia magna.*

Sacerdotis officium est, non solum sacrificare, verum etiam verbum Dei concionari. Cum igitur Christus in proximis versiculis receperit se volūtatī Dei Patris sui gratificaturum, in officio offerendi semetipsum ad expiationem peccatorum humani generis, nūc recipit etiā se gratificaturum volūtatī Dei, in altera parte officij Sacerdotalis, videlicet, in prædicando & diuulgando Euangelio suo, ad gloriam nominis Dei, in toto orbe terrarum : Euangelisabo, inquit, iustitiam in Ecclesia magna, adnunciabo & diuulgabo Euangelion, non tantum in angustis finibus Iudææ, verum etiam in magna Ecclesia Gentium. Tu enim DOMINE, qui es rerum omnium conscius, nosti ipse, quod cum ingrediar in mun-

dum, & induam seruale corpus, non sim labijs meis cessaturus, quin gloriam nominis tui celebrem, & non abscondam intra me iustitiam tuam. Sed nō solum ego ipse coram adnunciabo eam, verum etiam emittam Apostolos, donato Spiritu sancto, in omnem orbem terrarum, ut predicent tuam fidem, & palam testificentur salutem.

Acto. 1. misericordiam, & veritatem tuam inter omnes Gentes, non tantum Hierosolymis, verum etiam in vniuersa Iudaea, Samariaq; deniq; vsq; ad extrema terrarum. Obseruamus igitur, cum Christus dicit se euangelisaturum iustitiam, & quæ sequuntur, quid sit Euangelion illud, quod se adnunciaturum recipit, quidue beneficij nobis apporet. Euangelion igitur, de quo in praesentia loquimur, est concio, qua adnunciatur Deum Patrem misisse filium suum DOMINVM nostrum Iesum Christum in hunc mundum, ut peccata nostra sua passione & morte expiaret, iram eius placaret, nos per Spiritum sanctum renouaret, & nos, superata morte, ad sempiternam vitam ac felicitatem assereret. Hæc illa est concio, quam propriè Euangelion, hoc est, lætum & gratum nuncium vocamus. Quid autè beneficij apporet, Psalmus his versiculis, quos iam recitauimus, particulatim ita explicat, ut nihil sit, quod amplius desiderare queas. Primum enim: Euangelisabo, inquit, iustitiā, Quam? Non certè iustitiā legis, quæ in monte Sinai est promulgata, & in Decalogo cōtinetur, sed iustitiam fidei, quæ est in monte Zion patefacta, & per Apostolos in totum orbem vulgata.

Philip. 3. Propter Christum Iesum DOMINVM meum, inquit Paulus, omnia pro damnis duxi, habeoq; pro reiectamentis, ut Christum lucrifaciam, & inueniar in illo, non habens meam IUSTITIAM EX LEGE, sed eam, quæ per fidem est

est Christi, quæ est ex Deo, IUSTITIAM IN FIDE, vt cognoscam illum, & potentiam resurrectionis, &c. Cum igitur Euangelion apporet nobis iustitiam fidei, & illam certitudinem, quod habeamus gratuitam condonationem peccatorum propter Christum, quoniam nihil potest homini peccati agnitione perturbato lætius & acceptius contingere, manifestum est, quod apporet nobis beneficium omnibus huius seculi facultatibus excellentius. Deinde Euangelion prædicat fidem seu fidelitatem Dei, quod etiam si pij, qui habent iustitiam ex fide, affligantur in hoc seculo, tamen Deus receperit eos propter Christum filium ita in tutelam, vt defendat ipsos in omnib. aduersis casibus, ac in morte quoq; ipsa: Fidelis est Deus, inquit Paulus, qui non sinet vos tentari supra id quod potestis, imò faciet vnà cum tentatione euentum, quo possitis sufferre. Ad hæc, Euangelio prædicatur salus Dei. Varia sunt diuinæ salutis genera. Alia est salus mundana & corporalis, quæ & ipsa non nisi à Deo confertur in homines, sed non est vera salus. Alia est spiritualis & cœlestis, quæ confertur diuinitus in illos tantum, qui credunt in Christum, & est condonatio peccatorum, conseruatio in morte, liberatio ab horroribus inferni, & donatio æternæ vitæ, propter Christum. Hanc salutem prædicat Euangelion Christi. Quare, si quis veræ & æternæ salutis sitiens fuerit, ad agnoscendum vera fide Euangelion properet, necesse est. Præterea, In Euangelij adnuntiatione patet, quod antea de misericordia & beneficentia Dei absconditum erat. Et si enim haud obscura extabant testimonia in scriptis Prophetis, quod misericordia seu beneficentia Dei non concludere-

- deretur intra fines tantum Iudææ, sed vulganda etiam esset inter Gentes, ut & ipsæ beneficijs Dei fruerentur,
- Dent. 4.* & salutem consequerentur, tamen scriptum erat: Non est alia natio tam grandis, quæ habeat Deos appropinquantes sibi, sicut Deus noster adest cunctis obsecrationibus nostris. Et iterum: **TE** elegit **DOMINVS** Deus tuus, ut sis ei populus peculiaris de cunctis populis, qui sunt super terram. Ac rursus: **Qui** annunciat verbum suum Iacob, iustitias & iudicia sua Israel. Non fecit taliter omni nationi, & iudicia sua non manifestavit eis. Ex his & id genus alijs dictis scripturæ iudicabat imperitum vulgus, quod beneficentia Dei definita esset terminis Iudaicæ & circumcisæ Gentis, nec quisquam incircumciscus posset veram & æternam salutem consequi. Vnde
- Rom. 16.* & Paulus propagationem Euangelij inter Gentes vocat
- Colo. 1.* mysterium temporibus æternis tacitum, à seculis & generationibus reconditum, non quod scriptis Propheti-
- Acto. 15.* cis fuerit ignotum, Apostoli enim horum testimonio
- Ro. 9. 15.* Gentium vocationem perspicue probant, sed quod ante revelationem Christi nec vulgo Iudæorum fuerit cognitum, nec inter Gentes divulgatum. Ac discipuli ipsi Apostolorum, cum audivissent, quod & Gentes receperint sermonem Dei, admirabundi dicunt: Igitur & Gentibus Deus prænitentiam concessit ad vitam. Quare debemus Euangelio, quod Spiritus sanctus per ipsum patefecit beneficentiam Dei, non tantum ad circumcisos Iudæos, verum etiam ad incircumcisos Gentes patere, ut quisquis, siue circumciscus, siue incircumciscus credit in Christum, consequatur æternam iustitiã, vitam & felicitatem. Quid multis opus? Euangelion prædica veritatem Dei, idq; in Ecclesia magna, videlicet,
- in vni-

in vniuerso mundo, inter Iudæos & Gentes. Testificatur enim Deum certissima veritate præstare, & summa constantia seruare, quod promittit. Promisit Abraham se posteros suos multiplicaturum, sicut est aranea maris, & stellæ cæli: hoc cumulativè præstitit. Promisit se daturum eis in possessionem, terram Canaan: hoc implevit abundanter. Quod autem maximum omnium est, & è quo salus nostra pendet, promisit iam inde à conditione mundi, se missurum filium suum, ex muliere virgine, de semine Abraham & Davidis, qui seruet omnes in ipsum credentes, æterna salute: hoc ita implevit, ut de ipso prædicetur, & testimonium feratur in vniuerso mundo. Agnoscamus igitur hanc veritatem Dei, & sentiamus Deum tanta esse in promissis suis constantia, ut potius conuinceret ad interitum huius mundi, quàm ut in verbis suis vanus & mendax inueniretur.

12. *Tu (igitur) DOMINE, non abstineas misericordias tuas à me, beneficentia tua, & veritas tua semper me seruent.*

Commemorationem certitudinis spei suæ de liberatione & salute, concludit Christus precatione: DOMINE, inquit, ne abstineas miserationes tuas à me. Non dubito, quin, cum non secederem idola, sed te solum verum Deum adorem, & sint innumera exempla, quibus in seruandis Patriarchis tuam beneficentiam testificatus es, ac suscipiam crucem & mortem, nulla temeritate, sed tua vocatione & ex obedientia, completa-

ris me singulari fauore, & seriuò cogites me seruare. Quæso igitur te, vt non prohibeas, non tam diu differas, non abscondas diutius à me, sed patefacias mihi tuas erga me miserationes, vt quod verbis promissisti, re ipsa in me impleas, ac me in tam duris meis casibus pro singulari tua beneuolentia, conserues. Sicut autem Christus in hac & similibus id genus petitionibus suis, non dubitat de voluntate Dei patris sui, & de ope eius in aduersis, sed tantum vrget patefactionem eius, vt quod certò credit, re ipsa comperiat: ita discamus non solum exemplo, verum etiam Spiritu Christi preces nostras instituere, vt de bona Dei erga nos voluntate & certissima liberatione ex aduersis, haudquam dubitemus. Et tamen nihilominus pergamus precando, & persequeremur, vt quod certò credimus, certò etiam in nobis reueletur: & sicut afflictiones ingrauescunt, ita preces quoque ardentiores fiant. Huc vocat nos Christus, cum docet nos semper orare, nec defatigari. Vnde & addit in hoc Psalmo causam, cur ipse, etiam si certissimam habet spem liberationis, tamen orando pergat. Sequitur enim.

Luce 18.

17 *Quoniam circumdant me aduersa, quorum non est numerus, iniquitates meae in tantum me apprehendunt, vt non queam ipsas perspicere, plures sunt, quam capilli capitis mei, ita vt deficiat cor meum.*

Non mirum, quòd pergam in precatione mea, & vream opem Dei, quia etiam aduersa pergunt in me ingraue-

grauescere. Tot enim ærumnis obruor, vt non queam numerare, & tantæ iniquitates in me grassantur, vt magnitudinem & grauitatem earum, nec oculis nec animo perspicere & compræhendere possim, propterea, quod superent numerum capillorum capitis mei: ac ita me premunt, vt cor meum planè deficere & contabescere incipiat. Quid plura? Iniquitates meæ, & afflictiones, quæ propter iniquitates in me grassantur, ad summum peruenerunt.

Dices autem: Etiam si reliqua omnia in hoc Psalmo competerent in Christum, tamen quod dicitur: Iniquitates meæ in tantum me apprehendunt, vt non queam ipsas nec oculis nec animo perspicere, &c. non videtur vlllo modo posse in Christum, qui peccatum non fecit, nec inuentus est dolus in ore eius, competere: quid igitur dicendum? Rectè sentis, quisquis hæc obieceris, quod Christus nullam vnquam iniquitatem fecerit, sed primùm manifestū est, autoritate Epistolæ ad Hebræos, quemadmodum suprà dictum est, quod hic Psalmus sit precatio, in qua Christus ipse commemorat suam, erga Deū patrem suum, obedientiam. Deinde verba ipsa Psalmi testificantur, nō Dauidē de se, sed Christum de se per os Dauidis loqui, non enim scriptum est de Dauidē in volumine libri, hoc est, in vniuersa Prophetica scriptura. Tametsi enim in Propheticijs historijs Dauidi suus est locus, tamen scopus totius scripturæ respicit in Christum, quod solus ipse, non Dauid, impleuerit legem & voluntatem Dei perfectè, & expiauerit holocausto sui corporis peccatum humani generis. Quare cum dicit Christus, iniquitates suas grauiores esse,

quàm quas sufferre, & plures, quàm quas numerare possit, non loquitur de iniquitatibus, quas ipse suo ipsius facto, aut actione fecerit, sed quas suo sacrificio expiandas coram Deo suscepit. Sicut enim Deus testatur seipsum ab Israëlitis reiectum, cum Samuelem ab officio Iudicis eijcerent: Non te, inquit, sed ME abiecerunt, ne regnem super eos. Et Christus filius Dei, cum Paulus persequeretur adhuc Ecclesiam: Saul, Saul, (inquit) quid ME, ME, inquam, persequeris, cum tamen ne capillum quidem de capite personæ Christi mouisset: ita & Christus in hoc Psalmo agnoscit peccata totius mundi, pro suis ipsius peccatis, quòd non alio charitatis affectu suscepit ea expianda, quàm si ipse ea designasset. Nec est in alijs etiam Psalmis inusitatum, quòd Christus peccata hominum faciat sua. Vt Psalmus 41. Sana animam meam, quia peccaui tibi. Et Psalmus 69. Deus tu scis insipientiam meam, & delicta mea à te nō sunt abscondita. Itaq; cum Christus vocat iniquitates hominum suas, duplex nobis consolatio proponitur. Vna est, quòd tam pio sit affectu erga homines, vt alienas iniquitates suas proprias ducat. Altera, quòd eas per seipsum expiandas suscepit. Quis est igitur, qui intentabit crimina aduersus nos? Deus est qui iustificat, quis est, qui condemnet? Christus est, qui mortuus est, imò, qui resuscitatus est, qui etiam est ad dextram Dei, & intercedit pro nobis.

Rom. 8.

14. Placeat tibi DOMINE, vt liberes me, DOMINE ad adiuvandum me festina.

Repetit

Repetit precationem, quam paulò antè proposuerat. Iniquitates & afflictiones meæ peruenērunt ad summum gradum. Obsecro igitur te DOMINE, vt me pro tua erga me beneuolentia liberares, & opem tuam non in longum tempus extrahas. Vides iterum, liberationem vrgeri, sed ex fide. Nam & impius vrget, sed ex incredulitate. Pius enim, quia in aduersis suis certò & constanter, iuxta promissionem Dei, credit se liberatum iri, idcirco clamat: DOMINE ad adiuuandum me festina, quia arbitratur se in summo discrimine versari, nec posse diutius sufferre, non defecturus tamen à DOMINO, nec abiecturus preces, etiam si plura & maiora mala sustinenda essent. Impius autem, etsi clamat & ipse iisdem planè verbis ad DOMINVM, non tamen clamat eadem fide, sed ex incredulitate, quippe quòd precibus suis tentet DOMINVM, ac nisi confestim, pro suo arbitrio, cœlestem opem consequatur, deserat officium, & aliò se vertat, Hæc impietas maior & vulgarior est, quàm paucis dici potest. Incumbamus igitur diligenter in studium verbi Dei, vt fidem nostram in inuocatione nominis Dei confirmemus, & quicquid acciderit, in officio perseueremus.

15. *Confundentur, ac vnà pudebunt, qui quarunt animam meam, vt perdant eam, retrocedent, & ignominia afficientur, qui cupiunt mihi malum.*

16. *Peribunt, propter impudentiam suam, qui dicunt mihi, Euge, euge.*

17. *Gaudetunt, & latabuntur in te, quotquot quarunt te, & quotquot*

quosquid diligunt salutem tuam, dicent semper, magnificetur DOMINVS.

18. Ego autem egenus sum & pauper, DOMINO sum cura. Auxilium meum, & liberator meus tu es. Deus meus, ne cunctis ceteris.

Sicut Christus antea repetijt precationem, ita nunc repetit certitudinem; quam de exauditione precationis suæ habet. Est enim sententia. Precatus sum, vt me misericordia & veritate tua complectaris: precatus sum, vt sine diutina morâ me adiuues. Sum aut in optima & certissima spe, me in his meis precibus haudquam pudefactum iri. Non enim pudefunt, qui quærunť DOMINVM, sed qui quærunť animam meam, qui insidiantur vitæ meæ, vt perdant eam. Non confunduntur, qui diligunt salutem DOMINI, sed qui diligunt & cupiunt mihi inferre mala. Non pereunt, qui semper eò spectant, vt gloria nominis Dei promoueat, sed qui in aduersis meis sibi applaudunt, & dicunt: Euge, euge. Pro his dictionibus Hebræus habet, **החיה** Heah, heah, quæ sunt voces vel applaudentis, vel cohortantis, quod vulgò vocant, Hui. Vnde & Iob. cap. 39. dicitur de equo: Vbi audierit buccinam, dicit, Hui. Significat igitur Christus hos perituros, qui in afflictionibus ipsius in tantum nõ dolent, vt etiam gaudeant, rideant, & applaudant sibi de æumnis eius, ac hortentur tortores, vt subinde crudelius in ipsum grassentur. Respicit autem in immanes illas voces, quibus Iudæi Christum ad mortem postularunt: Tolle, tolle, crucifige eum. Et: Si hunc dimiseris, non es amicus Cæsaris.

Et;

Et: Sanguis eius super nos & super filios nostros; quibus etiam coniecerunt se & posteritatem suam; in æternam confusionem, ignominiam & interitionem. Confundentur ergo & pudebunt Iudæi, qui querunt (inquit) animam & vitam meam, ut perdant eam; & qui illud vnum agunt, ut me opprimant. Contra autem, exultabunt & lætabuntur, qui querunt te, DOMINE, & diligunt salutem tuam; atque illud semper agunt, ut nomen tuum glorificetur. Cum igitur ego sum pauper & egenus, ac peruenerim in hanc paupertatem, egestatem; miseriam & arumias, nulla mea temeritate, sed tua, DOMINE, voluntate, tua vocatione, tuo mandato, ut testificer palam meam erga te obedientiam, & nomen tuum in vniuerso mundo glorificem, nullo modo dubito, quin me in tuam curam & tutelam receperis, & me, nulla mora interposita, mirabiliter defendas & conserues. In his versiculis initio continetur vaticinium de abiectione Iudæorum, ex hereditate DOMINI, ut discamus timorem Dei, quod cum Deus non pepercerit illi Genti, à qua filius eius vnigenitus carnem assumpsit, propterea quod impiè egerint, & tam filium ipsum, quam Euangelion eius immaniter persecuti sint, multò minus parceret populo Ethnico, si & ipsi impietatem sectati fuerint. Deinde continetur vaticinium de liberatione Christi à morte, & resurrectione eius à morte: Ego (inquit) sum egenus & pauper, sed DOMINO sum cura, qui est auxilium & salus mea, ac liberabit me sine omni cunctatione, (hoc est) ego affligar quidem miserrimè, & moriar in cruce, ut videar destitutus omni diuino & humano

humano auxilio, DOMINVS autem Deus meus non differet meam redemptionem in longum tempus, sed excitabit me tertia die à morte, vt cunctus orbis videat mihi datam esse omnem potestatem in cœlo & in terra. Postremò docet, Christum sua obedientia meritum esse, vt quotquot quærunt DOMINVM, & exhibent ei gloriam veritatis, ac diligunt salutem, quam Christus Euangelio suo in vniuersum mundum diuulgauit, gaudeant, latentur & exultent æterna felicitate. Ac breuiter, hi versiculi illud dicere volunt, quod est apud Ioannem.: Pater diligit filium, & omnia dedit illi in manum. Qui credit filio, habet vitam æternam. Qui verò non credit filio, non videbit vitam, sed ira Dei manet super eum.


VSVS HVIVS PSALMI.

Principiò hic Psalmus testimoniũ fert, quis sit Prophetica scripturæ scopus, quò ea tendat, ad quem exitum properet, quæ sit eius prora (vt prouerbio dicitur) & puppis. In volumine, inquit, libri de me scriptum est. Hæc est vox Christi, qua apertè docet. Prophetica scripta à capite vsq; ad calcem in ipsum respicere, & ipsum nobis, vt solum & verum seruatorem nostrum commendare. Manifestum & illud est, quòd Apostolica scripta, quæ, posteaquam Christus hominem assumpsit, & consedit ad dextram Patris sui, accesserunt, sint Propheticoꝝ scriptoꝝ apocalypsis, & vt ita dicam, commentarius. Versemus igitur hæc duo scripta, diurna, nocturnaq; manu, nec vllam aliam salutis doctrinam.

doctrinam cum his pugnantem, quamvis Angelicam
 agnoscamus, vt veram cognitionem DOMINI nostri
 Iesu Christi, per Spiritum sanctum assequamur. Ad-
 hæc, Paulus ad Corinthios scribens: Non iudicaui me, *1. Cor. 2.*
 inquit, quicquam inter vos scire, nisi Iesum Christum,
 & hunc crucifixum. Hic ergo Psalmus Christum cru-
 cifixum, ita nobis ob oculos pingit, vt haud obscure
 significet, illum omnia, quæ ad iustitiam & salutem su-
 am necessaria sunt, scire, & possidere, qui Christum
 crucifixum sciat, & possideat: In volumine, inquit, li-
 bri de me scriptum est, vt faciam, quod tibi placet.
 Placuit autem Deo patri, vt Christus pro peccato hu-
 mani generis crucifigeretur, & nobis vnà cum Chri- *Rom. 8.*
 sto omnia donaret. Incumbamus igitur in hoc studi-
 um maximè omnium, vt Christum per fidem posside-
 amus. Sed nec illud prætereundum est, quòd hic Psalmus
 suppeditet nobis insignem consolationem, cum
 tentamur in precibus de indignitate propter peccata
 nostra. Postquam enim suscipimus Deum in aduersis
 nostris inuocandum, confestim obijcitur nobis, quòd
 indigniores simus, quàm quorum preces Deus exaudi-
 at, quippe qui non solum fœda & turpia flagitia de-
 signauerimus, verumetiam peccatum adhuc in carne
 nostra vestemus. Hic autem Psalmus docet, quòd
 Christus ^{iniquitates} nostras non suscepit in se frigi-
 do affectu, sed ^{taliter} & ardenti, vt eas sibi quasi
 proprias fecerit: Apprehendit, inquit, me iniquita-
 tes, non ait, hominum, sed MEAE, inquit, me iniquita-
 lam vnquam iniquitatem fecerit. Suscepit autem in se
 nostras iniquitates, vt eas perferret in corpore suo lu-

4. Pet. 2.

per lignum, (quemadmodum Petrus loquitur) & non
aliter coram Deo Patre suo expiaret, quàm si eas ipse
designasset. Quare, si in precibus tua tibi indignitas
propter peccata tua obiecta fuerit, confer te ad Chri-
stum DOMINVM nostrum, qui cum peccata tua,
fecerit sua, reddidit etiam eo ipso te di-
gnum, quia Deo patre suo exaudia-
ris, & beneficijs eius
fruaris.



TVBINGÆ, EX OF.

ficina Typographica Viduæ Vlrici
Morhardi, Anno,

M. D. LXIX.



TO THE EDITOR

OF THE

NEW YORK

TRUSTEES

Breuis & perspicua
explicatio Psalmorum
Dauidis.

AVTORE

Iohanne Brentio.

DECAS QVINTA.



TVBINGÆ,
Apud viduam Vlrici Morhardi.
Anno 1568.

PSALMI QVINTÆ
DECADIS.

41. *Beatus, qui intelligit super egenum & pauperem, &c.*
42. *Quemadmodum desiderat ceruus ad fontes aquarum.*
43. *Iudica me Deus, & discerne causam meam.*
44. *Deus auribus nostris audiuiimus.*
45. *Eruclauit cor meum verbum bonum.*
46. *Deus noster refugium & virtus.*
47. *Omnes gentes plaudite manibus.*
48. *Magnus DOMINVS & laudabilis nimis in ciuitate Dei.*
49. *Audite hac omnes gentes.*
50. *Deus Deorum DOMINVS locutus est.*

Psalms 41.

Beatus, qui intelligit super egenum & pauperem, &c.



Vm autoritas DOMINI nostri
 Iesu Christi maior sit omni ex-
 ceptione, non est alia huius
 Psalmi interpretatio recipien-
 da, quàm quæ à Christo ipso
 nobis est in manus tradita. A-
 pud Ioannem enim Euangeliz. *Ioan. 13.*
 itam cōcionatur Christus de prodicione Iudæ Ischa-
 riotis, & allegat in testimonium versiculum nonum
 ex hoc Psalmo: Ego scio, inquit, quos elegerim,
 sed vt adimpleatur scriptura: Qui edit mecum pan-
 nem, sustulit aduersus me calcaneum suum. Qua al-
 legatione aperte docet, non Dauidem, nec alium
 quemuis hominem, sed seipsum in hoc Psalmo, iuxta
psalm. loqui. Etsi enim, quod in quarto Psalmi versis-
 culo dicitur: Sana animam meam, quia peccaui tibi,
 videtur, non in Christum, sed in Dauidem competi-
 re, tamen cum Christus vocatur peccator, aut pecc. *Rom. 8.*
 catum, non est intelligendum de peccato, quod suo *2. Cor. 5.*
 ipse opere designauerit, sed quod in se, corpore suo
 expiandum suscepit, & sit hostia pro peccato fa-
 ctus, quemadmodum in Psalmo proximè preceden-
 ti ostendimus. Quare sentiamus hunc Psalmum, iux-
 ta literam, esse vocem DOMINI nostri Iesu Christi,
 conquerentis de ingratitude & immanitate pros-
 ditoris sui, ac reliquorum suorum *quod pñd.* Prædixit

A 2 autem

autem hæc de se futura, tam in Psalmis & Prophetis, ante suam incarnationem, quam in concionibus suis, quas ad Apostolos, post incarnationem habuit:

Ioan. 13. Vt cum factum fuerit, (inquit) credatis, quod EGO sim.

1. *Beatus, qui habet rationem pauperis, in die afflictionis liberat ipsum DOMINVS.*
2. *DOMINVS tuetur eum, & viuificat eum, beatificat eum in terra, & non tradis eum libidini inimicorum suorum.*
3. *DOMINVS sustentat eum in lecto infirmitatis, vniversum stratum eius subuertis, in agrotatione eius.*

Non est dubium, quin hæc ~~verbum~~ Beatus, qui intelligit super egenum, seu, qui habet rationem pauperis, vnâ cum suis promissionibus, possit generaliter usurpari, sicut & illa: Beati misericordes, quoniam ipsi misericordiam consequentur. Sed in hoc loco, quod aliâs generale est, accommodatur peculiariter ad Christum. Ac planè illud significat, quod Christus apud Matthæum cap. 11. dicit: Beatus est, quisquis non fuerit super me offensus. Ille enim pauper & egenus, de quo Psalmus loquitur, est Christus DOMINVS noster, qui & in præcedenti Psalmo vocatur egenus & pauper. Et Psalm. 22. Vermis & non homo, opprobrium hominum & despectio plebis. Et in Esa. cap. 53. Virorum nouissimus. Qui ergo intelligit super hunc pauperem, qui habet illam huius egeni & abiecti rationem, vt egestate, miseria, ærumnis & deformitate eius nō offendatur, sed agnoscit

agnoscit eum verum Messiam, filium Dei, & credit in eum, quemadmodum latro in cruce, qui non de-
 territus abiectissima specie Christi in cruce pen-
 dentis & lacerati, fatetur eum Messiam: DOMINE,
 inquit, memento mei, cum veneris in regnum tu-
 um: qui (inquam) sic super hunc pauperem intellis-
 git, vt non offendatur, sed credit in eum, is verè bea-
 tus est. Quæso igitur te, DOMINE Iesu Christe, dis-
 gnare nobis explicare, quæ sit illa beatitudo, quam
 consequitur is, qui non offenditur in deformi illa
 specie tua. Primum, DOMINVS (inquit) liberat
 eum in tempore afflictionis suæ, ex omnibus aduer-
 sis: Venite, inquit, ad me omnes, qui laborati &
 onerati estis, & EGO REFOCILLABO VOS.
 Deinde DOMINVS custodit seu tuetur eum: Oues *Ioan. 10.*
 meæ, inquit, audiunt vocem meam: neque rapiet eas
 quisquam è manu mea: Pater meus, qui dedit mihi,
 maior omnibus est. Et: Nemo potest rapere è manu
 Patris mei. Ego & Pater vnum sumus. Adhæc DO-
 MINVS viuificat eum: Ego sum, inquit, resurrectio
 & vita. Qui credit in me etiam si mortuus fuerit, vi-
 uet. Et: Omnis, qui viuit & credit in me, non morietur
 in æternum. Præterea, DOMINVS beatificat eum
 in terra. In hac quidem terrena vita fit beatus
 spe, in futura autem & cœlesti, re ipsa. Cernimus em̃ *1. Corinth. 13.*
 nunc per speculum, in ænigmate, tunc autem facie
 ad faciem. Nunc cognosco ex parte, tunc verò cognos-
 scam, sicut & cognitus sum. Deinde, DOMINVS
 non tradit eum inimicis, vt tractent ipsum pro sua
 anima, seu animi voluptate & libidine. Sicut enim
 Christus ipse traditus quidem est hostibus suis, non

autem permissum est eis, vt iuxta animę suę desiderium conculcarent, & perderēt ipsum: sed quò magis exitio eius inhiarunt, eò gloriosius seruatus est: ita quotquot in Christum credunt, non offensi cruce eius, etsi traduntur & ipsi aliquoties in manus inimicorum suorum, tamen hæ manus ita diuinitus continentur & cohibentur, vt eas vltra terminos, quos Deus eis posuit, extendere non queant. Quod manifeste testificatur exemplum Iobis. Quid plura?

Iob. 1. & 2. DOMINVS illum, qui non offenditur abominabili specie Christi, sed credit in eum, ita sustentat & conseruat, in lecto infirmitatis, ac mortis eius, vt tandem liberato & sanato ipso, subuertat vniuersum stratum eius, & perducatur ipsum, sublatis omnibus morbis, ac etiam morte ipsa, ad æternam sanitatem & felicitatem. Hoc planè illud est, quod Esaïas ca. 25. ait: Præcipitabit in monte isto faciem vinculi colligati super omnes populos, & telam quam sortitus est super omnes nationes. Præcipitabit mortem in semperpiternum, & auferet DOMINVS Deus lacrymam ab omni facie, &c. Aut si libet in pauciora conferret: Qui credit filio, habet vitam æternam. Et: Qui crediderit & baptisatus fuerit, saluus erit. Intelligamus igitur super pauperem Christum, & habeamus rationem eius, etiam in contemptissima crucis specie, vt paupertate eius diuites reddamur, & omnibus beneficijs eius fruamur.

4. *Ego dixi: DOMINE miserere mei, sana animam meam, quia peccaui tibi.*

In prioribus versiculis hortatus est Christus, vt rationem sui pauperis habeamus, & nō offendamur abiecta specie sua, & forma serui, quam suscepit. Nunc igitur commemorat, quæ sit abiecta sua species, & quæ serui forma, vt ostendat, quod etsi præ paupertate, & miserijs suis, tantum abesse videtur, vt reddat sperantes in ipsum beatos, vt etiam se ipse non possit seruare, tamen ex his omnibus eluctetur, & in tantam maiestatem exaltetur, vt omnibus in ipsum credentibus sit autor æternæ salutis. Ego dixi, (inquit) DOMINE miserere mei, hoc est, ego ipse quidem agnosco & fateor, externam meam speciem esse ita deformatam & turpificatam, vt imperiti homines facile offendantur. Nam, vt aliquot huius deformitatis genera commemorem, vnum est, quod tanta sim miseria, tanta calamitate, vt necesse habeam misericordiam Dei implorare, & dicere: Miserere mei DOMINE, & sana animam meam, tot morbis afflictam. Quis autem arbitraretur illum esse salutis & beatitudinis autorem, qui ipse necesse habet Deum pro sua ipsius salute & beatitudine inuocare? Quid ergo causæ est, quod Christus hanc deformitatem in se suscepit? Sana, inquit, animam meam, QUIA PECCAUI TIBI. Ostendimus supra, quod in hoc Psalmo, non Dauid, aut alius quispiam id genus homo, sed Christus ipse loquatur. Manifestum autem est, quod Christus nullum peccatum fecerit, nec sit inuentus dolus in ore eius, Quare, cum dicit hoc loco: Peccaui tibi, nō loquitur de suo aliquo aduersus Deum Patrem peccato, sed loquitur de peccato humani generis, quod ex voluntate Dei Patris in se

2. Cor. 5.

in se expiandū suscepit, quemadmodum supra Psalm
mo 40. ostendimus. Exponit autem causam, cur tam
abominabilem, & offendiculo plenam pauperis &
contempti serui formam assumpserit: Quia peccavi
(inquit) tibi, (hoc est) vel quia factus sum coram te
hostia pro peccato, vel quia tu, cum non nossem pec-
catum, fecisti me pro hominibus peccatum, ut ipsi es-
ficerentur per me iustitia Dei, quemadmodum Pau-
lus loquitur. Christus enim assumpsit seruilem for-
mam, non sua aliqua necessitate, sed spontanea vo-
luntate, ad gratificandum volūtati & vocationi Dei
Patris sui, ut hominum peccata, sua faceret, & ea suo
ipsius corpore expiaret. Non igitur offendamur pau-
pertate, & fœda specie Christi, sed potius consolas-
tionem capiamus, & gratias agamus, quod quam des-
formitatem in se suscepit, nostri causa suscepit, ut
nos formosos & speciosos coram Deo Patre suo red-
deret. Habes vnum genus deformitatis.

5. *Inimici mei maledicunt mihi, Quando (inquiunt) mo-
rietur, & peribit nomen eius?*
6. *Et si venerit, ut inuisat, (me) vana loquitur, cor eius
colligit sibi iniquitatem, egrediendo foras diuulgat.*
7. *Omnes oſores mei, vnà aduersus me muſſitant, excogi-
tant mihi contra me malum.*
8. *Verbum Belial ſtabiliat ſibi, & qui iacet, non adijciat, ut
reſurgat.*

Aliud genus deformitatis, alia forma serui. Innus-
meros habeo inimicos, qui mihi impunè maledicūt:
nec verentur palam mihi mortem optare, ut nomen
meum

meum ex omni hominum memoria deleatur. Ac si quando venerit quispiam eorum, vt me inuisat, aut aliquod humanitatis officium mihi præstet, ficta loquitur, & illud vnum agit, vt apud se in animo suo aliquid iniquitatis aduersus me colligat, & postea in vulgus spargat. Breuiter. Omnes qui me odio habent, (hi autem nullo numero comprehendendi possunt) si quando inter se conuenerint, mussitant pariter, vnanimi consensu aduersus me, & communicato consilio de me opprimendo, ac è vita tollendo delibent, nec vlllo rubore me execrantur. Verbum (inquietes) Belial, hoc est, pessimum quodque malum obruat eum, & firmam ac stabilem in ipso mansionem habeat, nec, cum iaceat, seu oppressus fuerit, vnquam resurgat. Notum autem est è scriptis Euangelistarum, quibus simulationibus & insidijs, Pontifices, Scribæ, Pharisei, & Sadducei adorti sint Christum, vt ipsum in sermone caperent, quæ etiam consilia inter se, de interficiendo ipso contulerint. Quæ omnia in præsentia non solum impune tulerunt, verum etiam feliciter promouerunt. Hæc est species deformissima, ac forma prorsum seruilis: videntur enim Prophetæ formam longè honestiorem, & speciem multò venustiore habuisse. Hieroboam Rex 3. Reg. 13. Israël instituit impia sacra in Bethel, & reprehensus à Propheta, extendit manum suam, & iubet Prophetam apprehendere. Ecce igitur tibi, manus regis continuo ita exaruit, vt non potuerit eam ad se retrahere. Elias vocatur à Principe quinquagenario ad regem Ahaziam. Cum igitur Princeps ad Eliam diceret; Homo Dei, Rex præcepit, vt descendas, 4. Reg. 1.

B respon-

respondet Elias: Si homo Dei sum, descendat ignis de cœlo, & deuoret te, & quinquaginta tuos. Descendit itaq; ignis de cœlo, & deuorauit eum, vnâ cum suis militibus. Rex Syriæ inuit consilium dē interficiendo Elizæo. Mittit igitur exercitum, qui circumdaret ciuitatem, in qua Propheta commorabatur, & eam vnâ cum Propheta perdat; sed Deus exercitū tanta cæcitate percussit, vt Elizæus duceret eum in Samariam, & traderet regi Israhëlis. Nihil tam speciosum, & tam magnificum videtur Christo DOMINO nostro in his terris publicè contigisse. Etsi enim hostes eius, qui ad capiendum ipsum emissi erant, retrocesserunt, audita voce eius, & in terram ceciderunt, confestim tamen, recuperatis viribus, iniecerunt in eum manus suas, & ad crucem abduxerunt. Prophetis autem patefacta sunt cruenta suorum hostium consilia, nec hostes tulerunt ea impunè. Multo igitur deformior apparuit species Christi, quàm Prophetarum, vt haud immeritò videatur in Christo, scandalo obnoxia fuisse. Sed hanc deformem speciem suscepit in se Christus, quia, inquit, peccaui tibi, (hoc est) tu Deus Pater fecisti me peccatum, vt homines fierent per me iustitia tua.

9. *Quin etiam amicus meus, cui fidebam, conuictor meus
petit me calce.*

Alia deformitatis & offendiculi plena species, quod nō tantum inimici mei communicant sua contra me consilia, & insidiantur vitæ meæ, verumetiam vnus ē præcipuis meis amicis, vnus ex familiaribus

ribus meis, quem dignabar honore mensæ meæ, cui credebam mysteria mea, de quo mihi bona quæque policebar, quem inter Apostolos seu legatos meos elegeram, is, inquam, petit me calce, cupit me oppressum, & tradit me hostibus meis è medio tollendum. Hic est versiculus ille, quem Christus ipse de *Ioan. 13.* Iuda Ischariota proditore suo interpretatur, & qui iuxta vulgatam æditionem sic legitur: Qui manducabat mecum panem, leuabit contra me calcaneum suum. Ad hunc versiculum respicit etiam Christus, *Ioan. 17:* cum in precatione sua ait: Quos dedisti mihi, ego custodiui, & nemo ex eis perijt, nisi filius ille perditus, vt scriptura completeretur. Huc pertinent quoque ea, quæ Petrus Apostolus de Iuda in Actis Apostolorum *Acto. 1.* lícis, è Psalmo 69. & 109. recitat: Fiat commoratio eius deserta, & non sit qui inhabitet in ea: & Episcopatum eius accipiat alter. Magna autem est deformitas, magna videtur imbecillitas, in seligendo amico, & cõuicatore sic hallucinari, & aberrare, vt quem arbitraris tibi ex corde fauere, & cui secreta tua omnia credis, is tibi ita imponat, vt te etiam hostibus tuis prodat, & in Ianienam tradat. Sed Christus hanc quoque deformitatem, & hoc offendiculum in se suscepit, vt scripturæ, (hoc est) voluntati Dei Patris morem gereret, & peccata nostra, hac etiam crucis parte, expiaret.

10. Tu igitur DOMINE, miserere mei, & resuscita me, ac retribuam eis.

Enumerationi aliquot deformitatum & imbecillitatum,

Phil. 2.

litatum, quas ex voluntate Dei suscepit, addit pre-
 cationem, vt Deus Pater tueatur ipsum, in his im-
 becillitatibus, & perducatur ipsum, per eas, in maiestas-
 tem regni sui. Insidiantur mihi, (inquiens) non tan-
 tum inimici, verum etiam amici mei, & cupiunt me
 prorsus extinctum: obsecro igitur DOMINE Deus
 Pater, vt, siquidem consilia eorum omnino, in me
 opprimendo & occidendo promoueant, me resuscis-
 tes, & me meæ maiestati restituas. Hactenus gestas-
 ui abiectissimam formam serui, & præbui me humilē
 & obedientem vsq; ad mortem crucis. Quæso igitur
 te, vt me è morte resuscites, & efferas me in eam
 sublimitatem, quæ iam olim mihi decreta est. Sed,
 quid illud est, quod additur: Vt retribuam eis? Num
 petit se ideo resuscitari, vtumat vindictam de ini-
 micis, & de proditore suo? Manifestum quidem est,
 quod si alius quispiam homo sic loqueretur, aperte
 proderet carnalem suam vindictæ cupiditatem. Nunc
 autem loquitur ea Christus, CHRISTVS, inquam,
 ea loquitur. Testificatur igitur, se non tantum esse
 hominem, sed etiam verum DOMINVM Deum nos-
 trum, adeoque illum ipsum, qui in Deutero, cap. 32.
 dixit: Mea est ultio, & EGO RETRIBVAM. Et
 quod futurum prædixit, hoc etiam suis temporibus, re-
 ipsa ita impletum est, vt totus orbis cohorrerit. Nam
 initio proditor Iudas Ischariotes miserrimè pepens-
 dit: deinde Pontifices, Pharisei, & reliqui id ges-
 nus inimici Christi, non solum eieci sunt ex a-
 uitis in hac terra possessionibus, & immanissime
 tractati, verum etiam exheredati sunt vnà cum pos-
 teris suis, ex omnibus celestibus bonis, vt non sit
 vlla,

vlla gens, vel maiori hominum odio exposita, vel grauioribus maledictionibus obnoxia.

11. *Ex hoc cognosco, te fauere mihi, quòd inimicus meus non reportet ex me victoriam.*
12. *Et quòd me mihi integrum tuearis, ac constituas me ante faciem tuam perpetuò.*

Postquam Christus in præcedenti versiculo præcatus est, vt liberetur sua deformitate, ac resuscitetur à morte, exponit nunc, quam gloriam resurrectionis eius patefaciat: Ex hoc, (inquiens) cognosco, (hoc est) si me, sicut non dubito, resuscitaueris ex morte, tunc manifestè & palàm cognoscetur, (ponitur enim (cognosco) personale pro impersonali) primum quidem, quòd mihi faueas, quòd me summa charitate complectaris, quippe qui non deserueris (vt alius Psalmus ait) animam meam in inferno, nec Psal. 14. dederis sanctum tuum, vt videret corruptionem, sed notas mihi feceris vias vitæ, & adimpleueris me lætitia. Et apud Euangelistam Ioannem cap. 5. ait: Pater diligit filium, & omnia demonstrat ei, quæ ipse facit, & maiora his demonstrabit ei opera, vt vos miremini. Deinde ex resurrectione cognoscetur, quòd inimici non reportauerint victoriam ex Christo. Insidiæ & consilia eorum, hætenus quidem promouent, vt adigant ipsum in crucem, & in cruce moriatur, ac sepulcro, tanquam de ipso prorsus actû esset, condatur, non possunt autem eum in sepulcro detinere, sed tertia die ita excitatur à morte, vt non Rom. 6. amplius moriatur, nec mors illi amplius dominetur.

Postremo cognoscetur ex resurrectione, quòd cum tempore exinanitionis, & in forma serui visus fuerit deformissimus, & hominum abiectissimus, reuera sit præ omnibus filijs hominum speciosus, & tanta perfectione ac integritate, vt non solum corpore sit glorificatus, quemadmodum alij pñj & sancti homines glorificabuntur, verumetiam constituatur perpetuò ante faciem Dei, (hoc est) sedeat ad dextram Dei Patris sui, & omnia tam in cœlo, quàm in terra gubernet. Ac breuiter, Christus in his versiculis prorsus illud dicit, quod Paulus ad Romanos scribens: Declaratus est, inquit, filius Dei cum potentia secundum spiritum sanctificationis, ex eo, quòd resurrexit ex mortuis. Et ad Ephesios: Exercuit in Christo, inquit, efficaciam roboris fortitudinis eius, quũ suscitaret eum à mortuis, & sedere fecit ad dexteram suam in cœlestibus, supra omnem principatum ac potestatem, & virtutem, & dominium, & omne nomen, quod nominatur, non solum in seculo hoc, verumetiam in futuro. Et omnia subiecit sub pedes illius, &c. Hæc & alia id genus scripta Pauli, sunt expositio, ac paraphrasis horum versiculorum, quibus dicitur, quòd ex resurrectione Christi cognoscatur, reportare ipsum victoriam ex inimicis suis, & ita conseruatum, vt consistat ante faciem Dei perpetuò.

13. *Benedictus DOMINVS Deus Israel, à seculo & usque in seculum, Amen & Amen.*

Concludit Psalmum doxologia, qua exclamando significat

significat, quòd cum Deus (quem vocat Deum Israël, partim quòd promiserit Patriarchæ Israël, seu Iacobo, se è familia eius Christum in has terras missurum, partim, quòd agnouerit familiam Israël pro electa sua Ecclesia, quemadmodū dicit ad Moysen: Filius meus primogenitus Israël,) tantam maiestatem in ipsum Christum contulerit, meritò sit laudandus & celebrandus, non vno tantum tempore, sed in omnem æternitatem, non leuiter & inconstanter, sed Amen & Amen, hoc est, certissimè, firmissimè & sanctissimè. Amen enim Hebræis est certum, verum, firmum ex fixum.

VSVS HVIVS PSALMI.

Magna fuit expectatio ab initio mundi de aduentu Messia, quòd sit venturus ad liberandum humanum genus, ex omnibus suis miseris ac ærumnis: sed modum liberationis alij aliter intellexerunt. Maxima hominum pars arbitrabatur, Messiam dominaturum regio more, in terris, ac summum fore Monarcham, qui mundana sua sapientia & potentia pacem & tranquillitatem in populo suo tueretur & cōseruaret. Nam quæ dicta sunt ad Abrahamum: *Gen. 21.* In semine tuo benedicentur omnes Gentes: & ad Dauidem: Suscitabo semen tuum post te, quod egredietur de vtero tuo, & firmabo regnum eius, promissiones sunt de Messia seu Christo, sed a carnalibus de carnali benedictione & regno intellectæ. Quare hic Psalmus interpretatur regnum Christi non esse mundanum, sed spirituale & cœleste, quia docet Christum

Christum venturum in egestate, in ærumnis, in multis aduersis, quibus tam ab inimicis, quàm amicis sit affligendus. Visum autem est Spiritui sancto hanc interpretationem in Ecclesia extare, vt muniret nos aduersus offendiculum crucis, & hortaretur, ne de Christo & regno eius iudicaremus iuxta externas huius seculi calamitates, sed iuxta Propheticas explicationes, & iuxta resurrectionem eius à mortuis, iuxta ascensum in cœlum, & sessionem eius ad dextram Dei Patris sui. Et si quando illi, qui in Christum credunt, affliguntur, non arbitrentur sibi aliis quid præter vsitatum morem euenire, sed agnoscerent, se, si cupiant regni Christi participes fieri, necesse etiam habere, participes passionis eius esse. Sumamus igitur hunc Psalmum in manum, quoties aduersis obruimur, vt cognoscamus nos beatos esse, cum credimus in Christum, etiamsi aduersis grauissimè premamur: Si enim commortui sumus, inquit *1. Tim. 2.* Paulus, & conuiuemus: si sustinemus, & conregnabimus.

Psalmus 42.

Quemadmodum desiderat ceruus ad fontes aquarum, &c.



Inter Psalmorum interpretes nondum conuenit, nec de autore huius Psalmi, alij enim sentiunt autorem eius esse Dauidem, alij filios Coræ, de quibus *1. Paral. 6. & 26.* nec de occasione, qua hic Psalmus conscriptus

scriptus est. Alij enim arbitrantur eum compositum esse occasione illius exilij, in quod David eiectus est à rege Saule: alij, istius fugæ, in quam se David, orta seditione filij sui Absolomis, dedit: nonnulli reserunt ad tempus exilij Babylonici. Sed hoc utcunq; se habet, certè ex ipsis Psalmi versiculis facile colligi potest, hanc querelam esse hominis exulis, qui necesse habeat in maximis ærumnis, contumelijs & periculis, procul à tabernaculo Dei, in quo Ecclesia DOMINI publica sacra peragebat, & laudem nominis Dei decantabat, versari, significans interim inter beneficia Dei, illud non esse postremum, vitam in eo loco agere, ubi publicè sonat vox Dei, & gloria nominis eius illustratur. Hinc enim petere licet in omnibus aduersis, præsentem consolationem & cœlestem opem, quippe quòd ubi Deus patefecerit se verbo suo, ibi etiam coràm offerat beneficiorum suorum promptuarium. Quare, si quis in grauissimis suis afflictionibus suscepit ad Deum confugiens dum, ad verbum, seu promissionem Dei confugiat, necesse est.

1. *Quemadmodum ceruus vociferatur ad riuos aquarum, ita anima mea vociferatur ad te Deus.*
2. *Sicut anima mea ad Deum, ad Deum viuum, quando deum veniam, & appaream ante faciem Dei.*

Initio hi duo versiculi ponuntur loco propositio-
nis, qua exul exponit Deo angustias animi sui, &
commemorat, quàm ardenti desiderio tabernaculi
seu domus Dei, (hoc est) cœlestis & diuinæ or-
tes
C neatur.

*Aristoteles,
de historia ani-
malium, lib. 6.
cap. 29.*

neatur. Quemadmodum, inquit, ceruus, vociferatur aut desiderat riuos aquarum, ita anima mea desiderat & sitit ad te Deum. Natura enim cerui est, vt cum venatores & canes persequuntur eum, & vrgent, properet *ὅτι τὸ κούμαρον, καὶ τὸ ἔσθμα*, propter æstum & anhelitum, ad aquas, quibus se recreet. Idem (inquit exul) mihi contingit. Multi sunt venatores & canes, multæ sunt ærumnæ, magnæ sunt calamitates, quibus ego affligor, & impellor, vt sicut ceruus à canibus fugatus, ad aquas, quibus refocilletur, anhelat, ita ego TE DOMINUM Deum meum, quo adiuuer, perquiram & inuestigem. Monent igitur hi versiculi, quò nobis in maximo ærumnarum nostrarum æstu confugiendum sit, vt recreemur, & conseruemur. Sitit anima mea, inquit, non ad hominem quensdam, sed ad Deum, non ad idolum quoddam mortuum, sed ad Deum viuum: Deus noster, inquit alius Psalmus, in cœlo, omnia, quæcunq; voluit, fecit. Simulacra gentium, argentum & aurum, opera manuum hominum. Os habent, & non loquuntur, &c.

Psal. 114.

Cæterum, desiderium Dei, quo æstuo, eò me propellit, vt dies noctesq; cogitem, ecquando tandem fiat, vt ab exilio liberer, & redeam, ac appaream ante faciem Dei? Quid ergo dicemus? Num exul non versatur in loco exilij ante faciem Dei? An non DOMINUS est terra, & plenitudo eius? An non aliàs dicit: Quò ibo à spiritu tuo, & quò à facie tua fugiā? Sciamus igitur, quòd etsi DOMINVS Deus noster implet cœlum & terram, tamē, quia instituta arca propitiatorij in lege Mosi, promiserat se ibi præsentem fore, & responsa daturum, idcirco Israëlita dicebatur

Psal. 139.

Hier. 10.

Exod. 25.

tur

tur tunc ante conspectum Dei venire, cum venirent ad locum, in quo arca illa collocata erat. Hinc etiam extant illæ leges: Non apparebis in conspectu meo vacuus, (hoc est) Non accedas ad locum, in quo est *Exod. 23.* arca Testamenti, absq; oblatione. Et: Ter in anno apparebit omne masculinum tuū coram DOMINO Deo tuo, (hoc est) in loco, vbi erat arca Testamenti. Quare, cum exul tenetur desiderio veniendi ante faciem Dei, palam significat, se cupere liberari ab exilio, & redire in patriam, vt liceat ipsi vnā cum populo Dei in conspectum Dei, hoc est, ad tabernaculum, vbi collocata erat arca propitiatorij, accedere, dies festos ibi celebrare, conciones verbi Dei audire, ac legitima sacra peragere, vt fidem suam confirmet, ac Deo pro beneficijs suis gratias agat. Hic locus admoneat nos, quòd cœlum quidem sit sedes *Esa. 66.* Dei, & terra scabellum pedum eius, propriè autem Deus ibi habitare dicatur, vbi sese verbo, & sacramentis suis patefacit. Vnde, cum Deus apparuit Iacobo Patriarchæ, (in Gen. cap. 28.) & promisit posteritati eius terram Canaan, & Christum è familia eius venturum, exclamat Patriarcha: Quàm reuerendus, inquit, est locus iste? non est hîc aliud, nisi domus Dei, & porta cœli. Sic & post diuulgationem Euangelij Christi, in vniuersum mundum, sedet quidam Christus ad dextram Dei Patris sui, & omnia tam in cœlo, quàm in terra coram gubernat: sed quia in cœna sua adnuntiatur beneficium mortis eius, & offert ipse nobis manifesto verbo corpus & sanguinem suum, pane & vino edendum & bibendum, idcirco, qui ad cœnam sumendam accedunt, veniunt

ante faciem Christi, & inueniunt ibi domum Christi, ac portam cœli. Sentiamus igitur, nos DOMINUM nostrum Iesum Christum, vnâ cum beneficijs suis, ibi inuenire, vbi verbum eius adnunciatur, & sacramenta ab ipso instituta dispensantur.

3. *Lacryma mea panis mihi est diu noctuq̃, cum dicitur ad me singulis diebus, vbi est Deus tuus?*

4. *Que cum mecum recorder, effundo in me animam meam, & venit mihi in mentem illius temporis, quo incedebam cum cœtu (Ecclesiæ,) & progrediebar cum ipsis, vsq̃ ad domum Dei, alacri voce & laude, vnâ cum multiudine diem festum agente.*

Græcus inter-

pres. pro ארדם

Edadē, quod si-

gnificat progre-

diebar cū ipsis,

legit ארדם Eda-

derij sui, quod capiebat è tabernaculo Dei.

Nūc expo-

nit causas, cur tanto desiderio eius teneatur: Quid es

nim in exilio aliud mihi, præter conuitia & blasphemias,

audiendū est: Cogor singulis diebus, blasphemiam illam vocem audire, vbi est Deus tuus? Hactenus sæpè ac multum gloriatus es, te habere Deum propitium, tutorem, propugnatorem & seruatorem. Nunc autem res ipsa testatur, gloriationem tuam vanissimam esse. Nam si Deus tibi propitius esset, quomodo conuiuisset, vt in tam graue exilium eijcereris? quomodo te in tantis aduersis absq̃ vlla consolatione defereret? Sed quia destitutus es tam humana, quam diuina ope, reliquitum est, quod aut Deus te suo favore indignum iudicet, aut humanas res non curet. Hæc & id genus conuitia, ac blasphemias, cum audiro, quomodo arbitraris me affe-

In primis duobus versiculis exposuit æstum desiderij sui, quod capiebat è tabernaculo Dei. Nūc exponit causas, cur tanto desiderio eius teneatur: Quid es nim in exilio aliud mihi, præter conuitia & blasphemias, audiendū est: Cogor singulis diebus, blasphemiam illam vocem audire, vbi est Deus tuus? Hactenus sæpè ac multum gloriatus es, te habere Deum propitium, tutorem, propugnatorem & seruatorem. Nunc autem res ipsa testatur, gloriationem tuam vanissimam esse. Nam si Deus tibi propitius esset, quomodo conuiuisset, vt in tam graue exilium eijcereris? quomodo te in tantis aduersis absq̃ vlla consolatione defereret? Sed quia destitutus es tam humana, quam diuina ope, reliquitum est, quod aut Deus te suo favore indignum iudicet, aut humanas res non curet. Hæc & id genus conuitia, ac blasphemias, cum audiro, quomodo arbitraris me affe-

ctum?

Etum? Certè teneri non possum, quin diu noctuq;
tantam lacrymarum vim effundam, vt præ ijs, ne ci-
bum quidem capiam, nec vlllo cibi desiderio tenear.
Non alio nunc pane vescor, quàm vt meas ærumnas
deplorem: quod ad dolorem tantò mihi acerbius
accidit, quantò magis huc priorem meam felicitas-
tem confero. Quoties enim mihi in mentem venit
illorum temporum, quibus vnà cum Ecclesia popu-
li Dei dies festos egi, nomen Dei alacri voce cele-
braui, laudem D O M I N I lætis carminibus decantas-
ui, & gloriã eius summa animi iucunditate prædica-
ui, toties effundo in me animã meam, (hoc est) toto
pectore perturbor & affligor. Speraui quidem futu-
rum, vt cum recordarer promissionum Dei, quas
mihi dies festi publica carmina & sacrificia in mens-
tem reuocabant, caperem ex ijs aliquam consolatio-
nem, sed res longè aliter cadit, vnde enim consolati-
onem spero, inde augetur mihi dolor. Hic nunc
cum animis nostris cogitemus, nihil posse homini
pio molestius, nihil acerbius accidere, quàm quòd
necesse habeat inter impios commorari, & manifes-
tas eorum blasphemias singulis penè momentis au-
dire, nec licere laudem nominis Dei prædicare, nisi
libeat impijs maiorem occasionem] blasphemandi
dare. Illud enim impiorum ingenium est, vt cum vis-
dent pios affligi, addant afflictionem afflictioni, ac-
rideant & insultent, arbitantes tantum abesse, vt
Deus fauore suo complectatur ipsos, vt prorsus eos
à se repulerit, & abiecerit, nec quicquam ipsis spei
in D O M I N O Deo nostro relictum sit. Quid igitur
in tanta rerum difficultate, in qua tam homines quàm

Deus ipse videtur nos deseruisse, faciendum? Quò respiciendum? Num impiorum vociferationibus assentiendum? Nihil certe minus. Et si enim acerbissimus dolor est, audire impiorum blasphemias, & susserre insultationes eorum, tamen nondum est de salute hominis sic afflicti conclamatum. Insultant quidem homines, exprobrant & augent etiam afflictio afflictionem, non autem insultat Deus, sed tantò propior est favore suo, quantò grauior sit afflictio: Iuxta est (inquit) DOMINVS his, qui tribulato sunt corde, & humiles spiritu saluabit. Et: DOMINVS in sancto habitat, & cum contrito & humili spiritu, vt viuificet spiritum humilium, & viuificet cor contritorum. Huc referendum est exemplum DOMINI nostri Iesu Christi. Qui cum in cruce penderet, audit & ipse: Alios saluos fecit, saluet seipsum, si est hic Christus electus Dei: Confidit in Deo, liberet eum nunc, si vult eum. Quid potuisset in Christum contumeliosius dici? quid Christo acerbius accidere? Sed suscepit in se huius doloris magnitudinem & grauitatem, vt hanc in se vinceret, & victa non haberet in nobis amplius vincendi potestatem. Quare, etiam si impij vociferantur in nostris aduersis, vbi est Deus vester? tamen benè confidamus, quòd Christus, qui easdem voces à suis hostibus audiuit, & vicit, daturus sit nobis, si in ipsum crediderimus, euentum, vt & nos vincere, & eluctari queamus.

Psalm. 34.

Esa. 57.

5. *Quid deiecta es anima mea, & perturbaris intra me?
Spera in Deum, quia adhuc agam ei gratias, propter
salutem faciei sue.*

6. *Deus*

6. *Deus meus, anima mea in me deiecta est. Ideo recordor tui de terra Iordanis & Hermonim, de modiciis (videlicet) montanis.*
7. *(Sed) abyssus abyssum accersit, ad sonitum cataractarum tuarum, omnes fluctus tui & procellae tuae super me transeunt.*

Perseuerat adhuc in querela illarum calamitatum, propter quas anhelat ad Deum, sicut ceruus sitis gatus ad riuos aquarum. Et facit apostrophon ad suam ipsius animam, quasi indignans aut reprehendens, quod in afflictionibus tam pusilla sit mente. Quid, inquiens, tam tristis, tam deiecta es, quod necesse habeas in exilio versari, & blasphemias impiorum audire? Nunquid idcirco nulla reliqua est salus? Quin potius agetum, spera in DOMINUM, colloca omnem spem tuam in Deo, & cum Deus tot modis, tot promissis, tot miraculis, tot exemplis testificatus sit, se sperantem in ipsum non deserturum, non dubito, quin me adhuc tam propitius vultu respiciat, & tantam in me salutem conferat, ut propter eam summas ei gratias agam, & gloriam nominis eius celebrent. Sed quid ago? Cum suscipio ad hunc modum meam ipsius animam consolandam & recreandam, ibi tum perturbatio animi confestim ita recurrit, ut necesse habeam exclamare: Deus meus, anima mea, nulla consolationis ratione habita, adhuc est in me deiecta, & aspernatur omnem, quam admoueo meo dicinam. Quid igitur faciam? Pergam urgere, & nihil remittam. Recordor igitur tui, DOMINE, de terra Iordanis, & de montanis Hermonim, quae praes-

lijs

Ihs videntur esse parua & modica. Quid autem hoc
 sibi velit, considerandum est. Nam si Dauid autor
 esset huius Psalmi, & loqueretur de illo exilio, in
 quod eiectus est à suo ipsius filio Absolome, non est
 obscurum, quod fugerit à Hierusalem, trans Iordas
 nem ad ea loca, quæ pertingunt montana Hermonim,
 quemadmodum scriptum est in posteriori libro
 Samuelis, cap. 17. & 19. Nunc autem hic Psalmus in-
 scriptus est non Dauidi, sed filijs Core. Videtur igitur,
 quod precator in hoc versiculo non respiciat in
 exilium Dauidis, sed in aliam historiam, quæ in terra
 Iordanis, & montanis Hermonim finitima contigerit.
 Nam Moses commemorat in Deutero, cap. 2.
 & 3. quod in ijs locis, quæ sunt trans Iordanem, ad
 montana Hermonim, factum sit initium victoriarum,
 quas Israëlitaë ab aduersarijs suis regibus & gentibus
 reportarunt: Hodie (inquit DOMINVS) incipiam
 mittere terrorem atque formidinem tuam in populos,
 qui habitant sub omni cælo. Ac paulò post: Tulimus
 illo tempore terram de manu duorum regum Amorrhæorū,
 qui erant trans Iordanem, à torrente Arnon vsque
 ad montem Hermon. Quare ea loca erant insignia ijs
 miraculis & victorijs, quibus Deus cœpit recreare
 Israëlitas, post lōgam ipsorum peregrinationē in deserto,
 & spem ostendere, quòd etiam vniuersam terram
 regum Cananæorum, in hæreditatem suam accepturi
 essent. Accedit & illud, quòd Deus ex ijs locis ostenderit
 Mosi terram Canaan, non autem concesserit ei, Iordanem
 transire, sed iusserit eum ibi mori & sepeliri.

Habes, quid quondam gestum sit in terra Iordanis

ni finitima, & non longè à montanis Hermonim. Postquam igitur exul non inuenit consolationem & animi sui tranquillitatem in recordatione dierum festorum, & in cohortatione ad spem in DOMINO collocandam, uertit se ad recordationem rerum gestarum in terra Iordanis & Hermonim, si fortè ex ijs aliquod solatium capere posset: Recordor (inquit) tui, DOMINE, quantam consolationem attuleris populo tuo Israël post diuturnum ipsorum exiliū, cum in ijs terris conferres in eos victoriam, super duos potentissimos reges, & traderes regna eorum in manus Israëlitis. Hoc diuinæ clementiæ exemplo admoneor & ego, vt cum hactenus durissimas exiliū calamitates sustinuerim, sperem te DOMINUM, me quoq; clementer respecturum, & vel tandem ex afflictionibus liberaturum. Sed quantum me exemplū victoriarum Israëlitis solatur, tantum me à spe deijcit exemplum Moysi, cui Deus ostendit quidem à longè terram Canaan, non autem permisit, vt in eam ingrederetur. Itaque metuo, (heu me miserum) ne & mihi liberatio à calamitatibus ostendatur quidem, non autem exhibeatur. Quò magis enim spero, eò vehementius afflictio ingrauescit: abyssus accersit abyssum; alia afflictionis abyssus, aliam trudit: alia tribulatio alteram secum trahit. Nam quemadmodum in turbulentissimis tempestatibus, aquæ quidē pluuiæ desuper è nubibus, tanquā è cataractis, Dei, (hoc est) ex abruptissimis cœli locis & canalibus, maximo sonitu & fragore effunduntur, ventus autē mare ita perturbat, vt abyssus abyssum impellat, & fluctus nunc quidem ascendant (iuxta alium Psalmum)

D mum)

Psal. 107.

num) in cœlum, nunc verò descendant in abyſſos, ita & tu videris mihi omnes procellas & fluctus afflictionum in me cumulatim effundere, vt parum abſit, quin deſperẽ, me poſſe incolumem euadere. Hæc eſt inſignis deſcriptio pugnæ carnis & ſpiritus, ſpei & dubitationis, ſeu etiam deſperationis in afflictione. Pijs enim & renati in Chriſto, eſſi habent condonationem peccati per fidem, propter Chriſtum, tamẽ geſtant adhuc carnem, peccato corruptam, quo cum pugnandum eſt ſpiritu, donec ex hac vita excedamus. Quare, exoriente afflictione, aliò propendet caro, aliò ſpiritus. Caro ſubijcit grauitatem, magnitudinem, & diuturnitatem afflictionis, ſubijcit etiam ſeueritatem iræ Dei, propter peccatũ, cuius nos ipſi conſciũ ſumus, & iubet ſpem abijcere: ſpiritus autem viciffim opponit promiſſiones Dei, expiationẽ peccati per mortem Chriſti, & reconciliationem cum Deo. Sed caro viciffim reſclamat, & pergit animum perturbare, vt, etiamſi cõmemores, quicquid eſt promiſſionum, rerum geſtarum, & miraculorum, quibus Deus certiffimam ſuam opem, & liberationem teſtificatus eſt, nondum tamen vllam animi tranquillitatem conſequaris. Hæc enim pugna illa eſt, quam Paulus deſcribit: Caro, inquit, concupiſcit aduerſus ſpiritus, ſpiritus autem aduerſus carnem. Hæc autem mutuò inter ſe aduerſantur, vt non quæcunq; volueritis, eadem faciatis. Et iterum: Reperio per legem, volenti mihi facere bonum, quòd mihi malũ adiunctum ſit. Delectat enim me lex Dei ſecundum: internum hominem, ſed video aliam legem in membris meis rebellantem legi mentis meę, & captiuum reddens

*Galat. 5.**Rom. 7.*

reddentem me legi peccati, quæ est in membris meis. Nos autem in hac carnis rebellionem non defatigemur, sed repugnemus fortitudine Spiritus, ut etsi caro rebellat, non tamen victoriam reportet. Huc enim vocat nos hic Psalmus suo exemplo. Sic enim sequitur.

8. *Per diem iubet DOMINVS (adnunciare) misericordiam suam, & per noctem canticum eius mecum est, oratio ad Deum vitæ meæ.*
9. *Dico Deo, ô petra mea, Quamobrem obliuisceris mei? quamobrem tristis incedo, affligente inimico.*
10. *Occisio est, sciens in osibus meis, cum aduersarij mei afficiunt me opprobrio, & dicunt singulis diebus ad me, vbi est Deus tuus?*

Post commemorationem magnitudinis afflictionum, quam caro suggerit & amplificat, redit Spiritus, & opponit promissionem seu ordinationem ac mandatum Dei. DOMINVS (inquit) iubet, disponit & ordinat verbo suo, ut misericordia seu beneficentia eius diu noctuq; adnunciatur & celebretur. Vnde & ipse ego non cesso, noctu quoq; gloriam nominis eius decantare, & Deum, quem solum veram vitam meam agnosco, oratione mea inuocare: Bonum est, inquit alius Psalmus, confiteri DOMINO *Psal. 92.* & psallere nomini tuo altissime: Ad adnuncians dum manè (seu interdiu) misericordiam tuam, & veritatem tuam noctu. Et Iob: Non dicit, Vbi est *Iob. 35.* Deus meus, qui dat carmina in nocte? Nisi autem Deus vellet misericordiam & beneficia sua tam in-

terdiu quàm noctu, tam in prosperis, quàm aduersis præstare, & nisi vellet inuocationem nominis sui, tam in rebus lætis, quàm tristibus exaudire, certè non instituisset, nec iussisset misericordiam suam diu noctuq; celebrare, & nomen suum sine intermissione inuocare. Quare, si magnæ & multæ sunt afflictiones, cogites maiores & plures esse promissiones misericordiæ Dei, vt fidem tuam contra carnis rebellionem confirmes. Sed quid sit? nondum est finis pugnae. Agnosco quidem & fateor solum Deum esse petram meam, robur & firmamentum meum, in terea autem caro mea non conquiescit, sed queritur & vociferatur: Deus meus, quamobrem obliuisceris mei? quamobrem tristis incedo? vides, quàm grauius affligant me inimici mei: vides, aduersarios meos exprobrare mihi afflictiones meas, & insultare mihi, non semel & iterum, sed totis & singulis diebus, vociferantes, vbi est Deus tuus, de cuius clementia gloriabar? quem toties à parte tua stare iactabas? Et cum hæc fiunt, non aliter afficior, quàm si mors ipsa sagittas suas in ossa mea contorqueret: & tamen tu adhuc taces, & conniues, perinde ac si meæ afflictiones tibi non essent vlllo modo curæ. Magna hæc est fidei imbecillitas, quæ ex carne oritur, quod arbitremur Deum nostri oblitum, cum affligimur aduersis. Etsi autem hæc imbecillitas coniuncta est in nobis cum peccato, tamen, quia Christus filius Dei suscepit eam in se absq; peccato, cum clamat: Deus meus, Deus meus, vt quid me deseruisti, idcirco non imputatur nobis, si modò in hac pugna non cesserimus carni, nec versemur, sicut Paulus

lus

Ius loquitur, iuxta carnem, sed iuxta spiritum, Vñ Rom. 8.
de & in hoc Psalmo sequitur.

11. *Quid deiecta es anima mea, & perturbaris intra me? Spera in Deum, quia adhuc agam ei gratias, propter salutem faciei meae & Dei mei.*

Hæc est victoria, quam Spiritus reportat ex carnis pugna. Et si enim idem supra, versiculo quinto, recitatum est, tamen quia tum nondum erat depugnatum, sed sequebatur aliud certamen, idcirco nunc in fine Psalmi idem repetit, ut significet, iam etiam certaminis, hac quidem vice, finem esse, Sentio (inquit) adhuc intra me animi mei deiectionem & perturbationem: sed age, spera in Deum firmiter, colloca omnem spem tuam in gratuita clementia Dei. Non enim dubito, quin futurum sit tempus, quo DOMINVS exhilaraturus sit faciem meam, & testificaturus, se esse Deum, (hoc est) protectorem, tutorem & servatorem meum, ut propter hoc beneficium celebrem nomen eius, & agam ei gratias. Obseruemus igitur, Spiritum reportare tum victoriam, cum spes, depulsa dubitatione, aut desperatione, confirmatur. Beatus enim homo, sicut alius Psalmus loquitur, qui *Psal. 84.* sperat in DOMINVM. Et iterum: Quoniam in me *Psal. 91.* sperauit, liberabo eum, protegam eum, quoniam cognouit nomen meum.

VSVS HVIVS PSALMI.

Sicut magna est hominū imbecillitas in sufferens

D 3 da afflis

da afflictione, ita multus est huius Psalmi vsus, ad medendum imbecillitati. Sunt enim, qui arbitrantur, se nec Deo esse acceptos, nec posse certò salutem sperare, cum sentiunt adhuc immundiciem cordis sui, & rebellionem aduersus Spiritum. Sed hic Psalmus eximit hunc metum. Testatur enim suo exemplo, illud esse in hominibus pijs solenne, vt cum renascuntur Spiritu, nō mutantur in Spiritum, & nullam deinceps repugnantiam carnis in hac vita sentiant, sed potius, manente carne, instruantur, vt Spiritu cum carne pugnent. Dicit quidem Paulus aliàs:

Ephes. 6. Non est nobis lucta aduersus carnem & sanguinem, sed aduersus principatus, aduersus potestates, aduersus mundi dominos, rectores tenebrarum seculi huius, aduersus spirituales astutias in cœlestibus. Hoc autem non significat, non esse nobis luctandum cum carne, sed significat nostrum bellum in hoc seculo non esse externum, terrenum aut mundanum, quælibet bella gesserunt in hoc seculo Alexander Macedo, aut Iulius Cæsar: sed esse internum, spirituale & cœleste. Ac si quidem nomine carnis & sanguinis intellexeris ipsam carnis & sanguinis substantiam, non est nobis aduersus eam belligerandum, quippe quod sit bona Dei creatura, & extet vnus è præcipuis nostræ religionis articulus, carnis resurrectio: sed si hoc nomine intellexeris, corruptionem, quæ caro propter peccatum, turpificata est, certè tantisper cum ea belligerandum erit, dum in hoc seculo vitam agimus. Postquam enim peccauimus, grassatur satan in corrupta carne & sanguine, & illud vnum agit, vt victo & eiecto Spiritu sancto, quo renati

nati sumus, solus dominetur. Induamus igitur totam
 armaturā Dei, sicut Paulus nos monet, vt possimus
 stare aduersus assaultus diaboli, & sciamus, in tantum
 abesse, vt Deus nos propter hos diaboli assaultus ad
 hominetur, & reſciat, vt potius pugnantibus opem
 suam promittat, & conferat: Cum ipso, inquit, sum *Psalm. 91.*
 in tribulatione, eripiam eum, & glorificabo eum. *Ephes. 6*

Psalmus 43.

Iudica me Deus & discerne, &c.



Hic Psalmus, vt est breuis, continet enim quinque tantum versiculos, ita est Psalmi proximè præcedentis epitome, ac planè eiusdem argumenti. Precator enim videns se in maximis suis periculis & afflictionibus non habere in his terris hominem iudicem, magistratum aut principē, qui causam ipsius cognoscat, & ab impijs tueatur, appellat ad cœleste iudiciū, & ad DOMINUM Deum nostrum, ac precatur, vt ipse causam suam cognoscendam suscipiat, ac faciat officium boni magistratus, cuius est, innocentes tueri, nocentes autem supplicio afficere, & cum post hanc appellationem adhuc videretur auris atq; animus Dei ab ipso abhorrere, instat & vrget, ac recepto animo, certissimè futurum confidit, vt spe sua non pudes fiat.

v. Iudica

1. *Iudica me Deus, & dispice causam meam. A gente minime sancta, à viro dolofo & prauo libera me.*

Psalm. 18.

2. Reg. 21.

Sciamus ergo, quæ sit illa causa, quam precator petit à D O M I N O ipso iudicandam & dispiciendam, Num est causa innocentiae & immunitatis ab omni peccato coram conspectu Dei? Minime omnium. Solus enim Christus, qui peccatum non fecit, nec est dolus in ore eius, talem habet coram Deo causam: & solus verè dicere potuit, quod est in alio Psalmo: Retribuit mihi D O M I N U S secundum iustitiam meam, & secundum puritatem manuum mearum in conspectu oculorum eius. Sed est causa, quam habet quidem coram Deo, collatus autem cum impijs suis aduersarijs. Nam si precator confertur coram iudicio Dei, in causa, quam habet contra hostes suos, fieri quidem potest, quod exulet aut affligatur, propter peccata sua, impius autem aduersarius, non habet iustam causam grassandi in eum, & insultandi, ut exprobraret & dicat, ubi est Deus tuus? Non enim impietas idcirco approbanda est, quod pius affligatur, nec Deus idcirco deserit pium, quod obijciat eum varijs ærumnis, sed si vel resipuerit, vel in officio & vocatione Dei perseuerauerit, tantò arctius complectitur ipsum, quantò grāuiores sunt afflictiones. David ipse eijcitur à suo ipsius filio in exiliū: ac meruerat quidem exiliū, propter peccatum suum, dicit enim Propheta: Ecce ego, inquit D O M I N U S, suscitabo super te malum de domo tua: non habuit autem iustam causam, nec filius persequēdi Patrem, nec Simeï maledicēdi Regem, nec alijs impij, exprobrandi,

brandi, ubi est Deus tuus. Quare David potuit alas
 cri fronte caput ad cœlum attollere, & dicere: Iudica
 me Deus, & dispice causam meam, aduersus gens
 tem minimè sanctam. Iudæi abducuntur, vastatis
 Hierosolymis, à Babylonijs, in horribilem seruitus
 tem, & tractati sunt ab hostibus crudelissimè. Et si
 autem dederunt meritas impietatis suæ pœnas, ta
 men nulla erant verecundia Babylonijs obstricti,
 quin sublato in altum capite, dicerent ad Deum: Iu
 dica me Deus, & dispice causam meam, aduersus
 gentem minimè sanctam. Rectè igitur noster exul,
 qui necesse habet ab impijs in exilio suo, blasphemias
 voces de Deo, & execrationes audire, appellat, siue
 exilium peccato meruerit, siue non meruerit, iudici
 um Dei: & petit se à prophanis gentibus, ab iniquis
 & dolosis hominibus, quibus cum vita sibi in exilio
 agenda est, liberari. Sed cuius rei fiducia appellet ad
 iudicium Dei, sequitur.

2. *Tu enim Deus, fortitudo mea es. Quare proiecisti me?
 quare tristis incedo, affligente inimico?*

Appello ad iudicium Dei, & defero causam me
 am, quam habeo aduersus inimicos meos, D O M I N O
 Deo diiudicandam: nec dubito, quin liberandus sim
 ab impijs Gentibus, fretus, non meis viribus, non
 meis meritis, non mea aliqua coram Deo iustitia,
 sed tantum D O M I N O Deo meo, qui est fortitudo
 mea. Et si enim ego infirmior sum, quàm qui coram
 Deo, etiam in bona causa, contra impios meos
 aduersarios consistere queam, tamen D O M I N U S
 E est

est fortitudo mea. Primum quidem, quod promiserit in semine Abrahamæ, (qui est Christus) benedictionem, ut etiam si meritis sim peccato meo exilium, & alias afflictiones, tamen quia colloco omnem meam fiduciam in hoc semine, non dubito, quin peccatum meum mihi clementer sit condonatum. Deinde, quod DOMINVS iusserit oppressos ad suum iudicium appellare, & sibi vindictam relinquere: Mea, *Deuter. 32.* inquit, est vindicta, & ego rependam: ac liberam liter receperit; se sperantes & inuocantes ipsum, clementer in omnibus aduersis seruaturum. Itaque DOMINVS gratuita sua clementia & promissione, mea est fortitudo, cuius solius fiducia appello ad iudicium eius, & spero eum à partibus meis, contra omnes aduersarios meos staturum: Etiam si, inquit alius *Psal. 23.* Psalmus, ambulauero in medio umbræ mortis, non timebo mala, quoniam tu mecum es. Et Paulus: *Rom. 8.* Si Deus pro nobis, quis contra nos? Sed quid sit? Rem mirandam. Appello quidem ad iudicium Dei, relinquo Dei ultionem, & agnosco solum Deum, meam petram & fortitudinem: interea autem tu DOMINE Deus meus, ad afflictiones meas ita conuiues, ut non solum me non iuuare, verum etiam abiectis videaris. Afflictiones enim, quibus me inimici mei indies cruciant, ita ingrauescunt, ut necesse habeam tristis semper & demissus incedere. Obseruemus igitur, quod illud sit in sanctis solenne, ut quò magis inuocent Deum in aduersis, eò plus aduersa crescere & augeri videantur. Clamabo ad te, *Iob. 30.* inquit Iob, & non exaudis me. Sto & non respicis me. Mutatus es mihi in crudelem, & in duritia manus

nus tuæ aduersaris mihi. Idem conqueritur Christus ipse: Deus meus, inquit, Deus meus, quare deseris me? vociferor quidem, sed longè abest à me salus. Vide enim mihi precationem eius in monte Oliueti. Ter precatur, vt transeat à se calix iste: sed quò prolixius orabat, eò maior angustia ita ingrauescit, vt sudor eius decurreret, sicut guttæ sanguinis, in terram. Quare, ne defatigemur in oratione, & abijciamus animum, considerandum est consilium, quo Deus ad nostram precationem ita conuiuet, vt afflictiones subinde grauiores fiant. Nō enim conuiuet, quòd abiecerit precantem, & nomine eius confidentem, sed partim, vt fidem precatoris probet: partim, vt gloriam nominis sui illustret, & tantò maiorem laudem reportet, quantò mirabilior est liberatio: partim etiam, vt quò grauior sit afflictio, eò excellentior quoque contingat felicitas. Quare benè confidamus in afflictione: & simus interea contenti gratia Dei, dum liberatio patefiat.

3. *Mitte lucem tuam & veritatem tuam. Hæc deducunt me, vt veniam ad montem sanctum tuum, & ad tabernacula tua.*
4. *Vi introeam ad altare Dei, ad Deum qui es letitia & exultatio mea, vt gratias agam tibi cibaria, Deus, Deus meus.*

Sicut pergunt afflictiones exiliij ingrauescere, ita pergit exul, (quod est officium pñ precatoris,) insistere, & precibus suis liberationem vrgere. Oportet semper (inquit Christus) orare, & non defatigari. *Luc. 18.*

Dicit ergo Psalmus : Mitte lucem & veritatem tuā. Nomine lucis, intelligenda sunt beneficia Dei, liberatio, felicitas, & quicquid hoc felicitatis nomine continetur. Vtenim tenebrarum nomine significatur afflictio, ita & lucis nomine significatur gaudiū, lætitia & felicitas. Exortū est (inquit alius Psalmus) in tenebris lumen rectis, (hoc est) in aduersis exorta sunt prospera. Et in Micha: Si sedero in tenebris, DOMINVS lux mea est, (hoc est) si fuero infelix, DOMINVS mea est felicitas. Veritas autē, de qua versiculus huius Psalmi loquitur, est certitudo promissionū Dei. Deus enim promissit, se exauditurū preces inuocantium ipsum vera fide, qui & promissi sui tam seruans est, vt sustineat potius inuersionem rerum naturæ, quàm culpā mendaciū. Orat igitur precator : Et si, inquit, videris me ita abieciſſe, vt necesse habeā, propter afflictionū grauitatem, mœstus incedere, tamen nihil remittā de inuocatione nominis tui : pergo insistare. Mitte, quæſo, lucem & veritatem tuam: reuela vel tandem liberationem, & felicitatem, quam verbo tuo certissimo & verissimo afflictis promissiſti. Sed in quem finem? in quem vsum? Num, vt domi delitijs corporalibus fruar, & ætatem in carnali ocio & tranquillitate transigam? Nihil minus, sed vt tibi DOMINO Deo meo officia mea probem, tuas laudes celebrem, & gratias tibi pro beneficijs tuis agam. Hæc (inquit, videlicet lux tua & veritas tua) doceant me, vt veniam ad montem sanctum tuum. Nam si me liberaueris è tenebris exilij mei, iuxta veritatem verbi tui, illud maximè omnium agam, vt vadam ad montem sanctum tuum Zion, in quo loco est

est tabernaculum tuum, vbi est altare tuum, vbi legitima tua sacra peraguntur, vbi concione verbi tui gloria nominis tui illustratur, vbi pro beneficijs tuis gratia tibi aguntur: hic est meus scopus, hoc volo, hoc spectro, ad hunc exitum propero. Sed quid? An non habuit in exilio DOMINUM Deum praesentem? An non dicit: Cum ipso sum in tribulatione, *Esai. 57.* et
 ripiam eum? An non affirmat, se habitare cum Spiritu contrito & tribulato? Quid ergo opus erat, vt ad celebrandum nomen DOMINI, & ad gratias ei pro beneficijs agendas, aspiraret ad montem Zion, & ad altare, in quo sacrificia peragebantur? Veri adoratores, (inquit Christus) adorabunt Patrem, (quod *Ioan. 4.*
 & exul in loco exilij, & in medijs afflictionibus facere potuisset) in Spiritu & veritate. Sciamus igitur aliud esse tempus paedagogiae, aliud reuelatae veritatis. Nos, cum essemus, inquit Paulus, pueri, sub *Gal. 4.*
 elementis mundi eramus, in seruitutem adaecti. Nam cum adhuc staret politia Mosaica, erat tempus illud paedagogiae, quo, qui Deum in exilio inuocabat & coelestem opem petebat, necesse habuit faciem suam conuertere versus urbem Hierusalem, & ad locum *Exo. 25.*
 Templi, in quo arca Testamenti fuerat collocata: *3. Reg. 8.*
 hoc erat elementum mundi. Et tamen, qui vere pii erant, etsi vertebant & ipsi orantes, faciem suam ad arcam propitiatorij, & restarentur obedientiam suam in paedagogia diuinitus instituta, nihilominus tamē inuocabant Deum in Spiritu & veritate. Quare, quod precator anhelat montem Zion, tabernaculum, & altare DOMINI, vt ibi laudet nomen DOMINI cithara, & gratias ei pro beneficijs suis agat,
 E 3 paedagog

pædagogia est. Quod autem interea credit, **DOMINUM** Deum sibi etiam in exilio præsentem esse, & preces suas exaudire, veritatis est, quam & pñ Patriarchæ, Christo nondum incarnato, & Euangelio eius nondum in orbem terræ diuulgato, sectati sunt. Deinde, nec illud prætereundum est, quod hi versiculi docent, in quem vsum externa beneficia Dei petenda sunt. Exul petit liberationem ab exilio, & reditum ad patriam: afflicti morbo petit corporis sanitatem: agricola petit fertilitatem agrorum: mercator petit prosperam navigationem. Hæc & id genus alia beneficia petere, idq; à solo **DOMINO** Deo nostro, pium est. Sed in quem vsum? Num, vt domi voluptate fruaris? helluationi operam dare liceat? fruges & merces precio longè omnium carissimè extrudas, & multam pecuniæ vim, ad sectanda conuiuia, colligas? Nihil certè minus. Tales precatore, qui beneficia Dei petunt, non nisi ad licentiam peccandi, Deus non exaudit, sed beneficia Dei petenda sunt in illum vsum, quem Psalmus docet, videlicet, vt veniamus ad montem sanctum Zion, & introeamus ad altare **DOMINI**, (hoc est) vt audiamus verbum Dei, & discamus doctrinam veræ pietatis, ac excitemur ad fidem, spem & charitatem, & celebremus gloriam nominis Dei, gratias agentes ei, pro immensis suis beneficijs, quibus nos immeritos affecit. Vnde & alius Psalmus ait: Saluos nos fac, **DOMINE** Deus noster, & congrega nos de nationibus. Quid? vt domi delitijs fruamur? Nequaquam, sed vt confiteamur nomini sancto tuo, & gloriemur in laude tua. Postremo, illud etiam diligenter considerandum

Psalm. 106.

derandum est, quòd vocet Deum lætitiā & exultationem suam. Alij lætantur & exultant in diuitijs, alij in pulcritudine & fortitudine corporis, alij in eruditione, alij in rebus, vt Salomon ait, pessimis. Sed hæc & similes exultationes sunt vanissimæ: Non *Prover. 2.* gloriatur, inquit Hieremias, sapiens in sapientia sua, non gloriatur fortis in fortitudine sua, & non gloriatur diues in diuitijs suis: sed in hoc gloriatur, qui gloriatur, scire & nosse me, quia ego sum DOMINVS, qui facio misericordiam & iudicium, & iustitiam in terra. Quare, ad concipiendam veram lætitiā & exultationem, non est opus, vt cumules diuitias diuitijs, & iungas agrum agro, sed vt habeas Deum propitium, quo, si pro nobis, quis contra nos? Cæterum, quod iuxta Hebræam veritatem legitur: Ad Deum, qui est lætitia & exultatio mea, hoc Græcus interpres transtulit, & secutus est Latinus: Ad Deum, qui lætificat iuuentutem meam. Apparet igitur, quòd pro eo, quod est apud Hebræos גילי Gil-li, & significat exultatio mea, Græcus legerit ἡλικία Almi, quod significat iuuentutem meam. Qui enim cæcutit, facillimè legit, pro duabus literis גי gi, vnam literam א Ain. De qua re fortassis non est superuacaneū admonere lectorem, vt sciat, tutius & iucundius esse aquam intelligentiæ, ex ipso sacræ scripturæ fonte, quàm ex lacunis eius haurire.

7. *Quid delecta es anima mea, & perturbaris intra me? Speram in Deum, quia adhuc agam ei gratias, propter salutem faciei meæ, & Dei mei.*

Hic versiculus est etiam in Psalmo proximè precedenti

cedenti postremus, & docet, qua ratione possimus in sauis animi tempestatibus constare, & victoriam reportare. Postquam enim precator petijt ardenti affectu, vt DOMINVS emittat lucem & veritatem suam, quo vel tandem afflictionibus exilij liberetur, nullam sentit adhuc animi tranquillitatem: sed quò ardentior est precatio, eò turbulentiores fiunt animi tempestates, vt miretur & exclamet: Quid tam deiecta es mea anima? Quid est, quòd quanto feruentius oro, tanto perturbatior est animus? Quò ergo me vertam? Si nihil remittit tempestas, nec ego remittam aliquid de spe mea. Age igitur, perge, mea anima, confidenter sperare in DOMINVM, & expectare opem eius. Magna est animi perturbatio, fateor: sed maior est certitudo veritatis Dei, qua promissa est salus omnibus sperantibus in eum, & expectantibus in fide auxilium eius. Quare non dubito, quin Deus ita me sit liberaturus, vt summas ei gratias agam, quòd beneficio salutis suæ exhilarauerit faciem meam, & testificatus sit, se mihi Deum esse propitium & clementem, etiam si in præsentia non videam, nisi miserias & æumnas. Non autem est nec nouum, nec inusitatum, vt quòd DOMINVS Paulo Apostolo ter roganti, vt Angelus satanæ discederet, respondit, sufficit tibi gratia mea, idē etiam multis alijs pñs de grauitate afflictionis conquerentibus respondeat, vt humilientur sub potenti manu DOMINI, quò extollat ipsos, omni cura in eum cōiecta. Nam & alijs affert Paulus in tanta æumnarum magnitudine & incremento, consolationem & remedium; Fidelis, inquit, est Deus, qui non sinet

2. Cor. 12.

1. Pet. 5.

1. Cor. 10.

vos tentari, supra id quod potestis, imò faciet vnà cum tentatione euentum, quo possitis sufferre. Et iterum: Sicut abundant afflictiones Christi in nobis ^{2. Cor. 1.} bis, ita per Christum abundat & consolatio nostra.

VSVS HVIUS PSALMI.

Idem prorsus, qui est & Psalmi proximè præcedentis. Ea enim est hominum, præsertim piorū, conditio, vt aut in hoc seculo, quamdiu vitam in eo egeris, cruci, aduersis, & calamitatibus sis obnoxius, aut ex hac vita sit excedendum. Tanta autem & tam odiosa est nostra morositas, vt nec aduersa patienter feramus, nec mortem, qua ab omnibus molestijs liberemur, ad vocationem Dei, obedienter subeamus. Quomodo igitur exhibeat sese erga nos DOMINVS Deus noster? Nam, vt hoc seculum, animo semper tranquillo, & nulla afflictione transigamus, fieri non potest: aut enim ex hoc seculo exeundum est, aut afflictiones sufferendæ sunt. Libet hoc loco commemorare, quod de hac re apud Cæcilium Cyprianum extat scriptum. Cum quidam de collegis, *In sermone de mortalitate.* inquit ille, & confacerdotibus nostris, iam infirmitate defessus, & de appropinquante morte sollicitus, cōmeatum sibi precaretur, astitit deprecanti & iam penè morienti, iuuenis, honore & maiestate venerabilis, statu excelsus, & clarus aspectu, & quem assistentem sibi vix posset humanus aspectus oculis carnalibus intueri, nisi quod talem videre iam poterat de seculo recessurus. Atq; ille non sine quadam animi & vocis indignatione infremuit, & dixit: Pati

F timetis,

timetis, exire non vultis. Quid faciam vobis? Idem in nostra morositate ad nos dici sentiamus, vt excitemur ad ferendam manum DOMINI obsequenter, & inuocemus nomen DOMINI, certissima spe concessa, quod qui nos discerpserit, etiam sanabit, & qui nos percussit, etiam curabit.

Psalmus 44.

Deus auribus nostris audiuiamus, &c.



Leui. 26.

Deut. 28.

Etus & vltata hominum sapientia est, quod arbitrentur felicem rerum successum necessario comitari omnia honesta piorum instituta, nec fieri posse, vt quod ex fide & obedientia Deo agendum suscipitur, parum prosperos habeat euentus. Cum enim Deus praedicetur iustus, quomodo iustae causae non faueret? & opem suam ad eam non conferret? Sed & ipsa lex Dei manifeste promittit ei, qui audit vocem DOMINI Deisui, & custodit mandata eius, benedictionem, seu prosperam fortunam in ciuitate, in agro, in domo, in bello, denique in omnibus operibus manuum suarum. Nec desunt exempla coelestis doctrinae, quibus Deus palam testificatus est, se honesta piorum instituta, tum domi, tum belli, magno favore profectum qui

qui & fortunare. Quod si autem res præter expecta-
tionem, aliter ceciderit, ac pia instituta infelicem in
hoc seculo euentum habere videantur, ibi tum aus-
dias diuersissima humanæ seu sapientiæ, seu impie-
tatis indicia. Alius sentit, aut nullum esse Deum,
aut Deum non curare res humanas. Nam si aliqua
harum cura teneretur, quomodo ad piorum infelici-
tatem, & ad impiorum felicitatem conuieret? pos-
set ne piorum consilia deferere, & impiorum insti-
tuta adiuuare, ac illustrare? Alius, etsi non potest
homines pios externæ impietatis aut iniquitatis
damnare, tamen quia videt eos in instituto suo in-
feliciter esse, arguit ipsos occultæ alicuius impietatis
aut sceleris reos esse. Sicut Eliphaz apud Iobem: *Iob. 4.*
Recordare, (inquit) obsecro, quis vnquam innocens
perierit, aut quando recti deleti sunt? Alius, quod
antè approbavit iustum & legitimum, postquam vi-
det esse infelix, iudicat esse iniustum & illegitimum.
Breuiter. Inter homines nihil magis solenne est,
quàm quod ibi iudicent esse peccata & iram Dei,
vbi vident esse aduersa, ærumnas, & infelicitatem.
Sed hæc non solum est vana & odiosa, verumetiam
impia sapientia. Ac extat quidem de hoc argumen-
to Psalmus tricesimus septimus: Noli æmulari in
malignantibus, &c. & aliæ quedam Prophetica con-
siones, quemadmodum in explicatione eius Psalmi
ostendimus. Nunc autem ordo instituti nostri exi-
git, vt explicemus Psalmum quadragesimum quar-
tum, qui, vt eodem argumento constat, ita continet
etiam exemplum, quo docemur, quod pius in optis-
sima causa, in qua & Deum inuocat, & opem Dei con-

Roma.8.

fidenter expectat, pessimè in hoc seculo affligatur, & fortunam maximè aduersam experiatur. Nec est obscurum, quòd Ecclesia post ascensum Christi in cœlum, & diuulgationem Euangelij eius per Apostolos, in vniuersum orbem, etsi secuta est veram religionem & pietatem, perpeffa tamen sit immanissimas ab impijs, præter omne meritum, persecutiones, ac planè id euenerit, quod Paulus ad Romanos scribens, ex hoc Psalmo commemorat: Propter te, iniqui, mortificamur tota die, æstimati sumus, velut oves destinatae mactationi. Sed quæritur, vbi illa in Propheticijs scriptis historia extet, cuius occasione hic Psalmus initio conditus, & populo Dei recitandus atq; decantandus traditus sit. Recenset enim verbis minimè obscuris innocentiam & pietatem populi Dei: Hæc omnia, inquit, venerunt super nos, nec oblitus sumus te, & iniquè non egimus in testamento tuo, Et nō recessit retrò cor nostrum, &c. Et mox: Si oblitus essemus nominis tui, & expandissemus manus nostras ad Deum alienum, Deus merito ista requireret: ipse enim nouit abscondita cordis. Nunc autem propter te mortificamur singulis diebus, & habemur sicut oves mactationi destinatae, hoc est, affligimur non alio nomine ab impijs, quàm propter nominis tui confessionem, & propter pietatem, quam excitati verbo tuo sectamur, & quam impij prorsus extinctam cupiunt. Hæc est manifesta professio innocentiae & iustitiae populi Dei. Ac negari non potest, quin hic Psalmus rectè accommodari queat priuatis pijs, qui ab impijs propter professionem piæ doctrinae affligebantur, quales fuerunt

fuerunt Elias, centum Prophetæ, quos Abdias in spelunca pavit, Eſaias à Manasse diſſectus, Martyres ab Antiocho occiſi, ac multi alij: ſed quia hæc fit mentio publici belli & exercituum, apparet, inſignem aliquam cladem innocenti Dei populo illatã, dediſſe huic Pſalmo occaſionem. Quæramus igitur, ubinam vnquam Iſraëlitæ, (qui ipſi temporibus, quibus hic Pſalmus conditus eſt, erant electi Dei Eccleſia) aduerſam belli fortunam, innocentes, iuſti & pii experti fuerint. Non reſpicimus hæc ad illa tempora, quibus Iſraëlitæ adhuc in Ægypto ſerui erant: ſed ad ea, quibus iam in ſua terra Canaan habitabãt, & ducibus ac regibus è ſuo corpore electis, guberabantur. Ac manifeſtum quidem eſt, quod quemadmodum Bileam cenſuit, & Ahior in Iudith affirmat, quotieſcunq; Iſraëlitæ coluerunt alterum, præter ſuum verum Deum, traditi ſint in prædam, in gladium, & in opprobrium, & quotieſcunq; egerunt poenitentiam, dederit eis Deus cœli virtutem vincendi hoſtes ſuos. Quod autem innocentes, & verum Dei cultum ſectantes, ab impijs ſuis hoſtibus victi, ſuſi, ac fugati fuerint, ac iuxta hunc Pſalmum, diſperſi ſint inter gentes, & facti opprobrium, ſubſannatio, ac ludibrium vicinis ſuis, hoc nobis in ſacris literis quærendum relinquitur.

In libro Iudicum, Iſraëlitæ, cum quidẽ haberent optimam & iuſtiſſimam cauſam bellandi aduerſus Benlamiſas, & excitarentur ad capiendã arma, mandato diuino, bis à Benlamiſis vincuntur, & plurimi ex ipſis occiduntur. Sed res ipſa haud obſcurẽ teſtatur, quod hoc exemplum non dederit occaſionem

Numeri 24.
& 31.
Iudith. 5.

Iudi. 20.

condendi huius Psalmi: & arguuntur etiam Israelitę nimia securitatis & confidentię in arma & multitudinem suam, ac vel tandem victoriam reportant.

In 4. Reg. cap. 18. Ezechias, etsi instaurauit legem sacra, & habet testimonium maximę pietatis, nec peccauit coram Deo defectione sua ab impio rege Assyriorum, tamen hic impius rex tam prospere aduersus pium Ezechiam belligeratur, vt & vniuersas ciuitates regni Iuda capiat, & Ezechiam eò adigat, vt necesse habeat multo auro & argento, confractis etiam templi valuis, pacem redimere. Sed nec hoc exemplum Psalmo nostro occasionem dedisse videtur. Nam si Dauid autor est huius Psalmi, longe antè conditus est hic Psalmus, quàm hæc de Ezechia gesta fuerunt. Si verò autores eius sunt filij seu posterij Chorę, quemadmodum è titulo Psalmi apparet, ne sic quidem exemplum Ezechię satis congruenter argumento huius Psalmi seruire videtur. Etsi enim Ezechias & incolę regni Iuda, ab Assyrijs grauissimè affliguntur, tamen paulò post tam illustri miraculo seruantur, vt Assyrij necesse habuerint, amissis vna nocte, plurimis militibus diuinitus interfectis, salutem sibi foedissima fuga quærere.

In secundo libro Paralip. cap. 35. Iosias rex Iuda, postquam abrogasset heroico Spiritu omnem publicam in Israel impietatem, & renouasset Ecclesiam, instauratione pię doctrinę & legitimorum sacrorum, misere occubuit in eo bello, quod aduersus Pharaonem susceperat. Cum igitur vniuersus populus, ac præsertim Hieremias, deflerent mortem eius, lugubri carmine, an nō potuerunt verbis huius Psalmi

mi dicere: Posuisti nos opprobrium vicinis nostris, subannationem & derisum, his, qui in circuitu nostro sunt. Et: Hæc omnia venerunt super nos, nec obliti sumus te, & iniquè non egimus in testamento tuo: Sed reclamat nonnihil inobedientia Iosæ, quòd nulla verbi Dei admonitione potuerit à suscipiendo bello isto auerti.

In Macchabæis, Iudas dux piorum, cum heroica stratagemata designasset, & legitima sacra restituisset, interficitur in prælio, & auditur publica omniū vox: Quomodo cecidit potens, qui saluum faciebat populum Israel? An non & tunc potuerunt, qui superstitēs erant, dicere verbis huius Psalmi: Humiliaſti nos inter Dracones, & cooperuit nos vmbra mortis. Si obliti essemus nominis Dei nostri, & si expandissemus manus ad Deum alienum, merito hæc pateremur. Nunc autem propter te mortificamur tota die, &c. Sed Iudas reprehenditur, quòd non satis confisus diuina ope, inierit fœdus cum Romanis. Cum igitur hoc fœdus initum fuerit publico populi consensu, videtur non potuisse ab ipsis, conscientia omnino alacri corā Deo, illud Psalmi huius dici: Non iniquè egimus in testamento tuo, & non recessit retro cor nostrum, &c.

Arbitrabuntur fortassis nonnulli, hunc Psalmum solis pijs, qui in publicis populi Dei calamitatibus, vnà cum impijs, ab hostibus in bello opprimebantur, accommodandum esse. Etsi enim externi hostes reportarunt aliquoties victoriam ab Israelitis, propter ipsorum impietatem & Idolomaniam, tamen non est dubium, quin in exercitibus eorum fuerint multi

multi pii, qui non curuauerunt genua sua ante Baal, nec consenserunt in publicam ciuium suorum idolomaniam, quorum pars, vna cum alijs morte occubuerunt, pars in seruitutem abducti fuerunt, aut è manu hostium liberati, domum magna infamia redierunt. Sed hi non fuerunt tam impudentes, vt cum Deus immitteret publicam populo suo cladem propter peccata, ipsi soli sese innocentes, & ab omni culpa alienos, etiam precibus suis coram Deo iactarent. *Esa. 64.* Esaias, cum preiret illis, qui in captiuitatem Babylonicam abducendi erant, formula precationis, etsi sciebat nonnullos pios inter ipsos fore, nec esse hos tantę calamitatis suo aliquo scelere autores, tamen coniungit omnes in confessionem peccatorum, & iubet eos vna voce dicere: Iniquitates nostrę, quasi ventus abstulerunt nos. Et: Ne vltra memineris iniquitatis nostrę. Et Daniel, Propheta tantus & tam sanctus, cum DOMINVM pro liberatione captiui populi inuocaret, non excipit se è catalogo peccatorum, sed ingenuè confitetur: Propter peccata, inquit, NOSTRA, & iniquitates patrum nostrorum, Hierusalem & populus tuus in opprobrio sunt omnibus per circuitum nostrum. Et ne quis existimet, eum modestiæ tantum gratia coniungere se cum alijs, statim addit: Cum loquerer, & orarẽ, & confiterer peccata mea, MEA, inquit, & peccata populi mei Israël, &c. Quare non est verisimile, quod pii in ijs cladibus, quę Israëlitis propter peccata diuinitus fuerunt immissę, exceperint sese ab alijs, huius Psalmi precatione. Certè, quęcunque exempla scripta sunt, quantum ego meminisse possum, testantur populum

pulum Dei, aut propter impietatem & scelera ab hostibus victum & oppressum, aut pœnitentia & inuocatione conuersum ad Deum, hostes suos vicisse & fugasse. Cum igitur precatores huius Psalmi clarè affirmant, se à Deo repulso, confuso, & hostibus ad diripiendum traditos, cum tamen non iniquè in testamento Dei egerint, nec manus suas ad Deos alienos expanderint, facile cõijci potest, aut non omnes res gestas inter Israëlitas, literis mandatas, & ad nos usq; propagatas esse, ac Psalmum hunc non tantum loco precationis, verum etiam loco historiæ habendum: aut Spiritum sanctum voluisse Martyribus tam veteris, quàm noui Testamenti, hac precandi formula præire, vt assuefaciat eos ad tolerandas afflictiones obedienter, quæ propter professionem nominis Dei, & obedientiam verbi eius eueniunt. Neq; enim dubitandum est, quin cum DOMINVS soleat Ecclesiam suam, non semper propter peccata, sed aliquoties propter alias causas, aduersis obijcere, multiq; & innocentes afflictionibus, tam priuatim quàm publicè ita oppressi fuerint, & adhuc opprimantur, vt bona conscientia dicere possint, vel cum hoc Psalmo: Hæc omnia venerunt super nos, nec oblitus sumus te, & iniquè non egimus in testamento tuo, vel cum Iob: Hæc passus sum absq; iniquitate manus meæ, cum haberem mundas ad Deum preces. Sed hæc in interpretatione Psalmi copiosius sese explicanda offerent. Sumamus igitur Psalmum ipsum in manus.

Iob. 16.

Constat autem hic Psalmus tribus præcipuè partibus. Prima continet antithesin seu collationem

G

præter

præteritorum beneficiorum Dei, & præsentium populi Dei ærumnarum. Secunda continet commemorationem innocentiae populi. Tertia continet præcationem, quæ est præcipuus huius Psalmi status. Audiamus igitur initio priorem antitheseos partem, quæ est de præteritis beneficijs Dei.

1. *Deus auribus nostris audiuiimus, patres nostri commemorarunt nobis opus, quod temporibus ipsorum, temporibus vetustis operatus es.*
2. *Tu manu tua expulisti gentes, & plantasti eos (patres nostros,) afflixisti populos (Cananaeos,) & immisisti eos, (maiores nostros in terram Canaan.)*
3. *Neg enim gladio suo possederunt terram, & brachium ipsorum non seruauit eos. Sed dextera TVA, & brachium TVVM, & lumen vultus tui, quia amabas eos.*
4. *Tu ipse es Rex meus, ô Deus, promittens Iacobo salutem.*
5. *Tua ope faciebamus impetum in hostes nostros, tuo nomine conculcabamus illos, qui aduersus nos insurgebant.*
6. *Non enim confidebam meo arcu, nec gladius meus seruabat me.*
7. *Sed tu seruabas nos ab aduersarijs nostris, & pudefaciebas illos, qui nos odio prosequabantur.*
8. *Itaq; gloriabamur de Deo singulis diebus, & nomen tuum celebrabamus semper.*

Hæc est prior pars Antitheseos seu collationis, in qua recitantur illa beneficia, quæ Deus iam inde ab initio liberationis ex Ægypto in Ecclesiam suam contulit.

contulit. Vſitatum autem eſt in precationibus, præterita beneficia & promiſſiones Dei, cum præſenti calamitate conferre, vt Pſal. 80. Qui regis Iſrael, intende. Et Pſal. 89. Miſericordias DOMINI in æternum cantabo. Et Eſa. 63. Miſerationum DOMINI recordabor. Hæc veterum beneficiorum & promiſſionum Dei commemoratio in precationibus, non eſt ocioſa & ſuperuacanea, ſed in aduerſis valde oportuna, & maximi uſus. Excitat enim in præſentibus ærumnis fidem, & accendit eam, vt ſicut Deus antea contulit in populum ſuum, magna & miranda beneficia, iuxta promiſſiones ſuas, ita precator conſidat fore, vt Deus etiam in præſentia periclitantem clementer adiuuet, & ſperantem in ipſum mirando modo ſeruet. Vnde & Pſal. 77. manifeſtè confirmat ſe recordatione veterum beneficiorum & miraculorum: An obliuiſcetur, inquiens, miſereri Deus? aut retrahet in ira miſericordias ſuas? Tandem cogitare cœpi, quàm inſipiens eſſem. Dextera excelli mutat vices. Recordabar operum DOMINI, memoria reſpetebam miracula, quæ olim ædidisti, adeoq; meditabar omnia opera tua, (hoc eſt,) Eſi præſentes calamitates me ita perturbabant, vt exiſtimarem me à Deo deſertum, tamen cum reuocarem in memoriã vetera Dei beneficia, ſentiebam, cõfirmata fide, dexteram excelli non ſic abbreviatam eſſe, quin ſit me potenter ſeruatura. Sic & Paulus colligit e præteritis Dei beneficijs, præſentem & futuram liberationem: Ne conſideremus, inquiens, in nobis, ſed in Deo, qui ad vitam ſuſcitatur mortuos, qui ex tanta morte eripuit nos, & eripit, in quo ſpem fixam habemus,

bemus, quod etiam posthac erepturus sit. Sed perscringemus nunc, quæ in versiculis iam enumeratis peculiariter obseruanda veniant.

Ac initio, cum Psalmus dicit: Patres seu maiores natu commemorasse iunioribus illa Dei beneficia & miracula, quæ sequuntur, docet, quod sit officium patrum & maiorum natu erga liberos suos, & iuniores. Liberi enim non contingunt parentibus temerè, sed donantur eis diuinitus. Donantur autem non in hunc usum, ut parentes habeant tantum corporalis eorū vitæ rationem, & relinquant ipsis magnam vim terrenæ hæreditatis: sed ut maximam omnium rationem habeant veræ & perpetuæ ipsorum salutis, ac propagent in liberis suis piam doctrinam & Ecclesiam Christi ad posteros. Abrahamo patefit diuinitus incendium Zodomiticum, non ut admiraretur tantum, sed ut memoriā eius ad posteros transmitteret: Scio, inquit DOMINVS, quod præcepturus sit filiis suis, & domui suæ post se, ut custodiant viam DOMINI, & faciant iudicium & iustitiam. Et Psalm. 78. Quanta mandauit patribus nostris nota facere ea filiis suis, ut cognoscat generatio altera. Filij, qui nascentur & exurgent, & narrabunt filiis suis. Et additur vsus huius narrationis: Ut ponant, inquit, in Deo spem suam, & non obliuiscantur operum Dei, & mandata eius exquirant.

Deinde, quod Psalmus de admirabili oppressione gentium in terra Canaan, & de plantatione & germinatione Israëlitarum commemorat, notius est sacris literis, quam quod hoc loco multis explicari debeat. Postquam enim Deus promiserat Abrahamæ, se daturus

se daturum posteris eius possessionem terræ Canaan, & multiplicauerat eos in Ægypto innumerabili copia, liberauit ipsos à seruitute Ægyptiaca magnis & multis miraculis. Deinde conseruauit eos mirando modo in deserto, donec peruenissent in terram Canaan. Et si autem videbantur homines inermes, egeni, miseri, famelici, & diutina in deserto peregrinatione exhausti, Gentes verò, incolæ & possessores terræ Canaan erant homines fortissimi, non viribus tantum corporis, verumetiam armis, muris, & omni genere humanæ potentiæ muniti: tamen Deus fecerat Israëlitas suos tam formidabiles, vt Canaanæi ad nominis tantum Israëlitici mentionem cor-
 horrescerent, & in morem parturientium, sicut Scriptura loquitur, contremiscerent. Ac suscipiebant quidem Reges Canaanæi bellum aduersus Israëlitas gerendum, sed Deus conferebat in hos victoriam tam manifestis miraculis, vt res ipsa palam testaretur, hostes non humana aliqua vel sapientia vel potentia, sed tantum diuina oppressos esse: TE, (inquit *Deut. 7.* Moses) elegit DOMINVS Deus tuus, vt sis ei populus peculiaris de cunctis populis, qui sunt super terram. Non quia cunctas gentes numero vincebatis, iunctus est vobis DOMINVS, & elegit vos, cum omnibus sitis populis pauciores: sed quia dilexit vos DOMINVS, & custodiuit iuramentum, quod iurauit patribus vestris, &c. Et in Iosua: Misi (inquit DOMINVS) ante vos crabrones, & eieci eos de locis suis, duos reges Amorrhæorum, nō in GLADIO & ARCV TVO, dediſſi vobis terram, in qua non laborastis, &c. Nec minori cura & potentia des-

fendit eos Deus à finitimis hostibus, cum iam terram Canaan possiderent, vt Psalmus rectè confiteatur, solum DOMINUM Deum esse regem illum, qui & promiserit Israeli omnem salutem, & re ipsa quoque manifestissimè præstiterit, vt ipsius solius gladio, brachio, dextera, fauore & potentia, non solum gentes in terra Canaan deletæ sint, verum etiam excussum sit iugum omnium finitimorum hostium, qui omnem opem suam, ad opprimendam crescentem in medio ipsorum Israeliticam gentem, contulerant. Itaque merito excitati sunt Israelitæ, vt non confiderent suo arcu & gladio, sed omnem suam spem in sola clementia & potentia Dei collocarent, & vt singulis temporibus nomen DOMINI celebrarent, atque gloriam eius prædicatione sua, ad posteros propagarent.

Porro autem, celebratio nominis Dei, & prædicatio beneficiorum ac miraculorum eius, non sunt tanti momenti, vt ipsi Deus per se delectetur, & nos horum operum peractione satis simus nostro officio defuncti, sed quia Paulus dicit, quod inuisibilia Dei cognoscantur ex visibilibus, idcirco nomen Dei laudibus celebratur, & miracula eius prædicantur, vt ex his visibilibus rebus cognoscamus inuisibiles Dei virtutes, & excitemur ad veram fidem, timorem, inuocationem & obedientiam Dei. Percurramus igitur breuiter, quæ nobis hæc miracula, quorum Psalmus mentionem facit, de Deo patefaciant.

Ac primum, cum Deus partim expulit, partim deleuit incolas terræ Canaan horribiliter, reuelatur seueritas eius aduersus impios & impoenitentes. Hæ
gentes

gentes duxerunt originem suam à sancto Patriarcha Noë, sicut & aliæ gentes, & fuerunt fortissimæ. Cum aut ducerent impiam ac sceleratam vitam, & sectarētur tam idolomaniam, quàm immania quæq; flagitia, admoniti sunt prædicatione Patriarcharum, Abrahami, Isaac, & Iacob, ad agēdam pœnitentiam, & colendū verum DOMINVM Deum nostrum, ac ducendam honestam vitam. Nec confestim, vt non obedierunt admonitioni, deleti sunt, sed cōcessi sunt eis diuinitus quadringenti anni, in spacium suscipiendæ pœnitentiæ, quemadmodum Gen. cap. 15. scriptum est. Postquam igitur ne sic quidem egerunt pœnitentiam, sed potius cumularunt impietatem impietate, & scelera sceleribus, animaduertit in eos DOMINVS tanta seueritate, vt iubeat ipsos ad interitionem vsque delere. Hac Dei seueritate excisandi sumus ad timorem Dei, vt vocati verbo eius ad pœnitentiam, nō reiiciamus eam in longum tempus, sed statim obsequamur, quò venturam iram Dei effugiamus: Securis, inquit Ioannes, ad radicem arborum posita est. Omnis igitur arbor, quæ non facit fructum bonum, exciditur, & in ignem mittitur.

Deinde, cum Deus victoriam, oppressis fortioribus, in Israelitas, penè inermes, ac viribus exhaustos, contulit, & conseruauit miseros, præter omnem humanam expectationem, in omnibus periculis, patet sunt potentia simul & clementia Dei. Summæ enim potentiæ est, inermes facere superiores, & fortes ac armatos deiicere. Summæ item clementiæ est, miseros & abiectos homines, nulla nec iustitia, nec potentia, nec etiam insigni sapientia præditos, iuuare,

& in

& in extremis periculis seruare. Hæc autem cum de Deo cognoscuntur, inuitant nos ad fidem, vt etſi ſumus miſeri, afflicti & abiecti, tamen quia Deus eſt omnipotens & clemens, fieri non poteſt, vt qui eo confidunt, & ipſum ex fide filij ſui inuocant, pudeſcant.

Præterea, cum Deus collocauit expulſis gentibus poſteros Abrahæ, in terra Canaan, iuxta promiſſionem ad Abrahamum, & alios Patriarchas dictam, manifeſtauit & confirmauit veritatem ac certitudinem promiſſionum ſuarum. Etſi enim Iſraelitę indigniores erant, propter impietatem ſuam, quàm vt acciperent regna Patriarchis promiſſa, voluit tamen Deus conſtanter ſeruare, quod olim promiſerat, vt comprobaret, promiſſione ſua nihil firmius, nihil certius eſſe. Confirmata autem & comprobata veritate Dei, excitatur & confirmatur fides noſtra: vt etſi indigni ſumus propter peccata, in quos Deus beneficia ſua conferat, tamen quia habemus promiſſionem remiſſionis peccatorum, per filium Dei, non eſt dubitandum, quin ſi credimus in filium Dei, habeamus peccatorum remiſſionem, & ſeruemur in omnibus aduerſis. Deus enim verax eſt & fidelis, ſe ipſum negare non poteſt. Hi ſunt cultus, hæc ſunt ſacra, quæ Spiritus ſanctus ex commemoratione veterum beneficiorum Dei, & ex prædicatione ſeu eritatis, potentiæ, clementiæ ac veritatis eius, in nobis excitat, videlicet, timor Dei, & fides in Deum, per Ieſum Chriſtum, ex quibus ſtatim oriuntur inuocatio & obedientia, quibus officijs Deo nihil gratius præſtari poteſt.

Sed quam promissionū veritatem præstitit Deus in collocanda Ecclesia Israelitarum, in terra Canaan, & tuenda ea aduersus omnes hostes suos, illam præstitit etiam, & adhuc præstat in colligenda postmissum Spiritum sanctum in die Pentecostes, Ecclesia ex Iudæis & Gentibus, & in conseruanda ac defendenda ea in medio inimicorū suorum. Deus enim promisit olim per Prophetas, quòd Christus dominaturus sit à mari vsq; ad mare, in toto orbe terrarū: & quòd per diuulgationem Euangelij eius, Ecclesia congreganda sit ex omnibus gentibus, idq; nullis humanis armis, gladijs & arcubus, sed tantum diuina potentia, per vocem quidem Apostolicam, sed Spiritu sancto excitatam & inflammata: deniq; quòd Ecclesia, quæ Euangelion Christi vera fide cōplectitur, habitatura sit in tanta Dei tutela, vt non solum inter externos tyrannos & persecutores eius, verumetiam in ipsa morte, salua & incolumis euadat. Quid autem impletione huius promissionis manifestius? quid ea illustrius? Nam Euangelion Christi prædicatum est apud vniuersam, vt Paulus ait, creaturam quæ sub cœlo est, & regnum Christi propagatum est, sine vlla humana potentia, per Euangelij prædicationem in toto mundo. Et quamquam tam Iudæi quam Gentes coortæ sunt, collatis omnibus viribus suis, ad tollendam e terra prædicationem Euangelij de Christo, & ad delendam Ecclesiam Christi, tamen quo magis eam persequabantur, eò amplius dilatata, & copiosius aucta est.

Vide mihi, quæso, quanta paucitas fuerit eorum, qui cum Christus crucifigeretur, ac postea à mortuis
H resurgeret,

resurgeret, veram Euangelio fidem adhibuerunt. Initio pauci admodum discipuli, quibus Christus postquam à mortuis resurrexisset, sese patefecit, agnouerunt fide sua Euangelij veritatem, & fuerunt vera Ecclesia Dei. Mox, postquam Christus assumptus esset in cœlum, conuenerunt quidem in cœnaculo Hierosolymitano centum & viginti: sed quantillus est hic numerus, collatus ad tot myriades Iudæorum & Gentium? Nunc cum animo tuo confidera, ad quantam multitudinem paulò post excreuerit. Ab eo enim tempore, quo missus est Spiritus sanctus, tanta hominum multitudo accessit ad Ecclesiam, vt in oculis totius orbis impleretur, quod dictum est per Esaïam de monte Zion: Fluent ad eum omnes gentes, & ibunt populi multi. Et iterum: *Esa. 60.* Leua in circuitu oculos tuos, & vide, omnes isti congregati sunt: venerunt tibi, filij tui de longè venient, & filia tuæ de latere surgent. Tunc videbis, & afflues, & mirabitur & dilatabitur cor tuum, quando conuersa fuerit ad te multitudo maris, &c. Sed quò latius fines imperij Christi seu Ecclesiæ eius proferebantur, eò crudelius grassabatur in eam Sathan. Incurrebat in eam, primum tyrannide impiorum, deinde varijs hæresibus, mox Arianismo, adde & Monachismo, deinde Mahumetismo, interea etiam Papiismo: breuiter, omni genere doli, astus, insidiarum, crudelitatis & immanitatis. Et tamen in his omnibus superauit, quemadmodum Paulus ait, vera Ecclesia, per eum, qui diligit ipsam, vt verè illud Psalmi recitare possit: Per te inimicos nostros excusimus, & in nomine tuo conculcauimus eos, qui aduersus

Esa. 2.

Esa. 60.

Roma. 8.

uersus nos insurgebant. Quare illud etiam quod sequitur, summo studio faciendum suscipere debuit, ut clementiam Dei singulis diebus celebraret, & nomen eius laudibus semper prosequeretur.

Hæc beneficia Dei, in Ecclesiam collata, maiora sunt, quàm quæ humanis verbis satis dignè & copiosè explicari possunt. Cogitanda tamen sunt pro virili, & quoad eius fieri potest, prædicanda, ut ad timorem Dei, ad fidem & inuocationem nominis eius, per Iesum Christum filium eius, Spiritu sancto excitemur, & in vera obedientia vocationis eius semper ambulemus. Perstrinximus priorem partem culam Antitheseos. Accedamus nunc ad posteriorem.

9. *Nunc autem repulisti & pudefecisti nos, nec es egressus in exercitibus nostris.*
10. *Vertisti nos in fugam coram hoste, & inimici nostri conculcant nos.*
11. *Fecisti nos similes gregi maculationi destinato, & dispersisti nos inter gentes.*
12. *Vendidisti populum tuum nullo precio, & non contendisti in venditione eorum.*
13. *Exposuisti nos ludibrio vicinis nostris, subsannationem & derisum finitimis nostris.*
14. *Posuisti nos fabulam inter gentes, & commotionem, (hoc est) illusionem inter populos.*
15. *Contumelia qua afficior, versatur mihi assidue ob oculos, & pudor occupat faciem meam.*
16. *Propter vocem exprobrantis & conuitiantis, propter truculentum aspectum inimici & grassatoris.*

Hæc est posterior pars antitheseos, qua præsentia res calamitates & afflictiones Ecclesiæ opponuntur præteritis beneficijs Dei. Nec est obscurum, quod quæ hæc commemorantur, sæpe ac multum euenierint Israelitis.

In libro Iudicum, quoties vincuntur à finitimis hostibus, toties non solum pudefunt in gloriatione sua de vero Deo, & præsentia auxiliij eius, coram omnibus vicinis gentibus, verumetiam diripiuntur, captiui abducuntur, & alienis venduntur.

In priori libro Samuelis cap. 4. cum in primo congressu vincerentur à Philistinis, asportant ad se arcam DOMINI in exercitum, cuius præsentia ita confidunt, vt policerentur sibi certissimam victoriam, & incuterent Philistinis magnum metum. Sed hac sua spe ita pudefunt, vt non solum à Philistinis vincerentur & fugarentur, verumetiam arca Dei caperetur, & impijs præda fieret.

In secundo libro Paralip. cap. 12. Sefac rex Ægypti reportat è regno Iuda tam illustrem victoriam, vt expugnatis vrbibus regni, diriperet etiam thesauros templi & regis Rehabeam, ac secum auferret clypeos aureos, quos Salomon fecerat. Quanta hæc fuit ignominia populi Dei? quantis opprobrijs affecti sunt à finitimis populis, coram quibus solebant de maiestate & potentia Dei sui, ac de præsentia auxilio eius in bello gloriari, & præ ipso omnes omnium aliarum gentium Deos irridere & condemnare? Longum esset enumerare, quoties tam Iuda quam Israel à finitimis hostibus ita victi, fusi, fugatique sunt, vt alij trucidarentur, alij in perpetuam seruitutem abducerentur.

cerentur. Ad extremum delerum est vniuersum regnum Israel ab Assyrijs, deinde vniuersum regnum Iuda à Babylonijs. Quas ibi misérias captiui non viderunt? quas fannas, quæ conuitia, quas contumelias non sunt perpessi? vt longè melior fuerit conditio eorum, qui interfecti erant, quàm qui superstites remanserant. Vide Threnos Hieremiæ, & teneri non potes, quin cohorrescas. Sed hæc mala acciderunt Israelitis, (qui tunc erant Ecclesia Dei) propter impietatem, & propter certa ipsorum peccata, quemadmodum Scriptura in descriptione singulorum bellorum testificatur, Noster autem Psalmus affirmat ea, quæ hæcenus in hac particula antitheseos commemorauit, accidisse populo Dei iusto & innocenti: mox enim sequitur: Hæc omnia euenerunt nobis, nec obliuimus te, & iniquè non egimus in testamento tuo, &c. Quare verisimile est, quòd tale quoddam factum, (quemadmodum supra attigimus) precationi huius Psalmi occasionem dederit, quale fuisse, si rex Iosaphat, postquam summa cura & studio restituit piam doctrinam in Ecclesia, & emendauit publica iudicia in politia, victus esset in bello à Moabitis & Ammonitis, & fuisset vnà cum multis ciuibus captiuus abductus. 2. Paralip. 20.

Aut si rex Ezechias, post memorabilem illam Ecclesie suæ reformationem, & omnium impiorum sacrorum abrogationem, ab Assyrijs ita oppressus esset, vt captiuus traductus fuisset per ora hostium suorum, & abductus in perpetuam seruitutem. Sed de hac re paulò post. Videamus nunc, quid sibi velit Psalmus, quòd præsentem suam calamitatem non

solum commemoret, verumetiam Deo adscribat. Non enim accusat hostem, sed TV, inquit, repulisti nos, TV vertisti nos in fugam, TV vendidisti populum tuum. Quid igitur dicemus? Num expostulat cum Deo propter afflictiones suas? Num accusat Deum iniustitiæ? num exprobrat Deo crudelitatem? Nihil certè minus: sed commemorat hæc longè alio consilio. Primum enim confitetur obedienter se agnoscere maiestatem Dei, quod Deus administret non solum prospera, verumetiam aduersa, & quod hostes ne pilum quidem capitis, in populo Dei, loco suo, absque voluntate Dei mouere queant. Quis est ille, inquit Hieremias, qui dixit, quod fieret DOMINO non iubente? Ex ore altissimi non egredientur nec bona nec mala? Deinde hac miseriæ commemoratione, & Dei autoris eius agnitione, significat se certam à Deo liberationem & salutem sperare. Cum enim Deus vocetur misericors & miserator, quid miseriam coram eo exponere, aliud est, quàm de misericordia eius benè confidere, & miserationes eius implorare? Præterea, consilium Dei in affligendo populo suo, non hoc est, vt perdat populum, sed vt

Thre.3 seruet: Non repellit, inquit Hieremias, in sempiternum DOMINVS. Quia si abiicit, etiam miserebitur secundum multitudinem miserationum suarum. Non enim humiliat & abiicit ex corde suo filios hominum. Et Abacuc. Cum iratus fueris, misericordia recordaberis. Et Oseas. Venite, inquit, & reuertamur ad DOMINUM, quia ipse discerpit, & sanabit nos, percussit, & curabit nos. Viuificabit nos post duos dies, in die tertia suscitabit nos, & viue-

mus in cōspectu eius. Quare, qui ex agnitione huius diuini consilij in aduersis recitant afflictiones suas, & adscribunt eas auctori Deo, haud obscure significant, se etiam ab eodem auctore, opem & liberationem expectare, vt qui discerpserit, idem & sanet, & qui percusserit, idem & curret. Itaq; plus quàm dimidium salutis iam habet, qui afflictiones suas verè agnoscit, & eas ab auctore Deo proficisci rectè intelligit.

Atque hæc quidem de Antithesi, hoc est, prima parte huius Psalmi. Sequitur secunda pars, quæ est commemoratio innocentiae & pietatis illorum, qui aduersis, quæ iam recitata sunt, affliguntur.

17. *Omnia hæc euenerunt nobis, non tamen obliui sumus tui, & non transgressi sumus perfidè fœdus tuum.*
18. *Non deflexit retrò cor nostrum, nec declinauit gressus noster à semita tua.*
19. *Et tamen attriuiisti nos inter Dracones (seu Tyrannos) & operuiisti nos vmbra mortis (hoc est, extremis aerumnis).*
20. *Si obliui fuissetis nominis Dei nostri, & expandissemus manus nostras ad Deum alienum.*
21. *An non Deus meritò requireret illa? Ipse enim nouit abscondita cordis.*
22. *Sed propter te occidimur singulis diebus, æstimamur veluti oves destinatae maculationi.*

Affligimur, inquit precator, horribiliter, & tamen non sumus nostra impietate talem afflictionem meriti. Non violauimus perfidia nostra fœdus, quod Gen. 17. nobiscum, Inijisti in circumcisione pepigisti nobiscum, te fore

te fore Deum nostrum, vt vicissim nos, te Deum nostrum agnosceremus, & promissisti te, per semen Abrahamæ, hoc est, per Christum, benedictionem in omnes gentes collaturum, vt quotquot in eum crederent, veram & æternam iustitiam ac salutem consequerentur. Hoc fœdus tanta constantia seruauimus, vt nec alienum Deum adorauerimus, nec in alio, præterquam in Christo per fidem, salutem quaesierimus.

In promulgatione Legis pepigisti nobiscum, te defensurum nos ab omnibus hostibus nostris, vt & sacra ecclesiastica, & iudicia politica iuxta regulam verbi tui administraremus. Et cum nõ queamus Decalogum tuum perfecte implere, iussisti nos audire Prophetam, (videlicet Christum) quem sis missurus, & propter quem sis nos iustos reputaturus per fidẽ, perinde ac si Decalogum impleuissemus. Hoc fœdus tanta fide custodiuius, vt non solum abrogatis impijs sacris legitima restituerimus, verumetiam toto animi desiderio expectemus Christum tuum, & in eo omnem salutis nostræ fiduciam collocemus. Ac non negaremus quidem nos iuste à Draconibus, à Tyrannis, qui in nos grassantur, conculcari, & deberi nobis extrema quæuis supplicia, si contempto verbo tuo impietatem sectaremur, & idola coleremus: tu enim, qui es scrutator cordium, & iustus iudex, iustam habes causam affligendi & puniendi impios & idolomanitas. Ecce autem nunc tradidisti nos hostibus nostris affligendos & conculcandos, non propter impietatem, sed propter pietatem nostram, & non propter iniustitiam, sed propter iustitiam

tiam

tiam nostram. Propter te enim, PROPTER TE, inquam, (hoc est) quia TVVM fœdus inuiolatum, TVVM verbum illustratum, TVVM Euangelion diuulgatum cupimus, & nostram hactenus operam ad eam rem contulimus, idcirco inuadit & opprimit nos hostis: & quemadmodum in laniena ouium, altera post alteram mactatur, ita singulis nobis crus dele mortis genus, quouis temporis momento, ab aduersarijs imminet.

Hic ergo duo nobis præcipuè consideranda proponuntur. Alterum est, qua fronte audeat precator huius Psalmi, pietatem & iustitiam suam Deo tam confidenter obtrudere? An non hæc est summa impudentia, quòd iactet se, idq; coram Deo, tantæ esse se pietatis, vt nec corde à Deo deflectat, nec operibus à semitis Dei declinet? Quis enim potest dicere, mundum est cor meum? Omnis (inquit) homo mendax. Et: Omnes declinauerunt, non est, qui faciat bonum, ne vnus quidem. Et: Non iustificatur in conspectu tuo omnis viuens. Mirum igitur videtur, quid sibi velit precator, quòd instituat in hoc Psalmo tantum innocentia & pietatis suæ præconium. Alterum est, quomodo conueniat iustitiæ Dei, quòd pios & innocentes, impijs crudeliter affligendos & conculcandos obijciat? De his rebus admoneri nos necesse est, vt consilium Dei in aduersis cognoscamus, & in vocatione eius confidenter pergamus.

Ac initio, nihil aptius, quantum ego quidem iudicare possum, ad huius rei explicationem proponi potest, quàm dictū illud Pauli, quod extat in priori

ad Corinthios epistola : Nihil mihi conscius sum, sed in hoc non sum iustificatus. Significat enim Paulus his paucis verbis, duplicem esse, quantum ad hoc institutum attinet, iustitiam seu innocentiam. Altera est perfecta & absoluta diuinæ Legis impletio, quæ est, diligere Deum ex **TOTO** corde, ex tota anima, & ex tota fortitudine, & diligere proximum sicut seipsum. Dilectio enim Dei & proximi, non est contenta leui quadam cordis cogitatione, sed exigit animum ardentissimum, Spiritu sancto ita accensum & inflammatum, vt voluntati Dei nulla prorsus carenis rebellionem obedias, & proximo candide, sine vlla maleuolentia faueas ac benefacias. Hanc iustitiam seu innocentiam, nullus vnquam hominū in hac quidem corporali vita, perfecte aut præstitit, aut præstare potest, quāuis Spiritu sancto præditus. De hac iustitia loquitur alius Psalmus: Non intres in iudicium cum seruo tuo, quia non iustificatur in conspectu tuo omnis viuens. Et alius: Si iniquitates obseruaueris Domine, Domine quis sustinebit? Et quod paulo ante commemorauimus: Omnis homo mendax. Ac rursus: Omnes declinauerunt. Et si enim pij donantur in regeneratione Spiritu sancto, tamen Spiritus sanctus non facit eos in hac vita *ἀναμάρτους*, sed suscipit quidem pugnam cum carne, & mortificat affectus eius, non abolet aut omnino carnem, nec prorsus tollit in hac vita naturam & ingenium eius. Vbi autem vita carnis adhuc reliqua est, ibi Spiritus non potest pro ordinaria sua operatione, perfectum in homine opus iustitiæ exercere. Lex, inquit Paulus, *Rom. 7.* imbecillis est per carnem, Et iterum: Video aliam legem

legem in membris, rebellantem legi mentis meæ, & captiuū reddentem me legi peccati, quæ est in membris meis. Ac rursus: Affectus carnis inimicitia est *Rom. 8.* aduersus Deum. Nam legi Dei non subditur, si quis dem ne potest quidem. Et aliàs: Caro concupiscit aduersus Spiritum, Spiritus autem aduersus carnem. *Gal. 5.* Hæc inter se mutuo aduersantur, vt non quæcunq; volueritis, eadem faciatis. Si lex imbecillis est per carnem, si lex membrorum repugnat legi mentis, si caro non potest subdi legi Dei, si caro assidue concupiscit aduersus Spiritum, idq; in ijs, qui renati sunt Spiritu sancto, certè perspicuum est, quod non solum impij, sed etiam pii non possint legem Dei in hac mortali vita perfecte implere, (hoc est) Deum ex toto corde, & proximum sicut seipsum, absq; omni vitio & corruptela diligere. Quare, quod ad hanc iustitiam seu innocentiam attinet, omnes homines sese coram Deo reos, & æternæ damnationi obnoxios fateantur, necesse est. Solus autem filius Dei, DOMINVS noster Iesus Christus, hanc iustitiam & innocentiam in hac vita ita præstitit & absoluit, vt ad obediendum voluntati Dei patris sui non detrectauerit, ne vlla quidem vitiosa rebellione, probrosissimum mortis genus suscipere: & ad benefaciendum proximis suis, non dubitauerit sanguinem suū, sine vlla iniqua tergiversatione profunderet. Quæ etiam obedientia & innocentia Deus pater sic delectatus est, vt etsi homines natura sua sunt iniusti, legis violatores, & manent tales in carne sua vsq; ad mortem, tamen si credunt in filium Dei Iesum Christum, recipiuntur à Deo in gratiam, & imputatur

eis iustitia Christi, perinde ac si & ipsi legem Dei perfectè impluissent. Quare, quam iustitiam & innocentiam pñj, in se, seu sua carne non habent, eam possident in Iesu Christo per fidem, vt & ipsi iusti coram Deo propter Christum reputentur.

Altera est iustitia bonæ conscientia, quæ iustitia in hoc consistit, vt nihil earum rerum sciens, ac volens, quoad eius in hac corrupta hominum natura fieri potest, vel facias, quod cum vocatione Dei pugnat, vel omittas, quod vocatio eius exigit. Hæc iustitia, etsi per se non satisfacit legi Dei perfectè, tamen necessaria est nobis: & potest in hac vita, ope Spiritus sancti præstari. Vnde Paulus: Finis (inquit) præcepti est charitas ex puro corde, & conscientia bona, & fide nō simulata. Et petrus: Sitis parati (inquit) semper ad respondendum cuilibet petenti, vt loquamini de ea, quæ in vobis est, spe cum mansuetudine & reuerentia, conscientiam habentes bonam, &c. Vides iustitiam bonæ conscientia, & diligenter exigi, & necessariam esse. Hanc iustitiā proficitur Moses coram Deo aduersus seditiosos: Tu scis, inquit, quod nec asellum quidem vnquam acceperim ab eis, nec afflixi quemquam eorum.

1. Timo. 1. Hanc innocentiam commemorat Iob: Non reprehendit me cor meum in omni vita mea. Et iterum: Si ambulauit in vanitate, & festinauit in malis pedes meus. Et mox: Si negaui, quod volebant, pauperibus, & oculos viduæ expectare feci, &c. Hanc innocentiam exponit Deo Ezechias in extremis vite sue periculis: Obsecro D O M I N E, inquit, memento, quæso, quomodo ambulauerim coram te in veritate & corde

& corde perfecto, & quod placitum est coram te, fecerim. De hac iustitia intelligit Lucas, quod de Zacharia & Elizabetha scribit. Erant ambo iusti coram Deo, versantes in omnibus præceptis & iustificationibus DOMINI irreprehensibiles. De hac iustitia loquitur Paulus coram concilio: Ego, inquit, *Atho. 23,* omni conscientia bona conuersatus sum coram Deo usq; in hodiernum diem. Et iterum: Vos scitis *Atho. 20.* à primo die, quo ingressus sum Asiam, quomodo vobiscum per omne tempus fuerim, seruiens DOMINO, cum omni animi humilitate, cumq; multis lacrymis & tentationibus, quæ mihi acciderunt ex insidijs Iudæorum, vt nihil suffugerim eorum, quæ essent in rem vestram, &c. Et mox: Argentum & aurum & vestem nullius concupiui. Ac rursus: *2. Cor. 1.* Gloriatio nostra hæc est, testimonium conscientia nostræ, quod cum simplicitate & synceritate Dei, non sapientia carnali, sed per gratiā Dei conuersati fuimus in mundo. Cum igitur Paulus suprà dixerit: Nihil mihi conscius sum, sed in hoc non sum iustificatus, complectitur has duas, quas enumerauimus, species iustitiæ, vt, cum dicit: Nihil mihi conscius sum, significet, iustitiam bonæ conscientia non negligendam, sed necessario præstandam esse: cum autem addit: Sed in hoc non sum iustificatus, significet aliam esse iustitiam perfectæ impletionis diuinæ legis, quam iustitiam non præstet suis operibus, nec satisfaciat ei per iustitiam bonæ suæ conscientia, sed se necesse habere aliunde coram Deo iustificari, videlicet, per iustitiam filij Dei Iesu Christi, quæ per fidem imputatur. Hoc idem docet etiam Christus,

cum ad Apostolos ait: Cum feceritis omnia, quæ præcepta sunt vobis, dicite, serui inutiles sumus, quod debuimus facere, fecimus. Iubet eos facere iustitiam bonæ conscientiæ, (hoc est) nihil eorum operum, quæ vocatio ipsorum exigit, omittere, sed omnia, quæ præcepta sunt, diligentissimè perficere. Interea autem iubet eos fateri, se esse seruos inutiles, Non docet simulare hypocriticam humilitatem, sed docet confiteri ingenuam veritatem, quòd etsi sunt in vita sua irreprehensibiles, tamen quæ bona faciunt, sicut debent ea facere, ita non possint ipsi legi Dei perfectè satisfacere, nec coram Deo iustificari, sed habeant veram suam iustitiā tantum in filio Dei per fidem. Quare, cum precator huius Psalmi nostri instituat præconium suæ pietatis, iustitiæ & innocentiae, non arbitremur eum gloriari de perfecta legis Dei impletionem, de qua nullus hominum gloriaripotest, nisi in Iesu Christo per fidem, qui solus factus est nobis à Deo iustitia, sapientia, sanctificatio & redemptio: sed sentiamus eum loqui de iustitia bonæ cōscientiæ, videlicet, quòd tam publicè quàm priuatim in vocatione Dei ita ambulauerit, vt non sit sibi vllius impietatis aut iniquitatis conscius.

Dices autem, concesserim sanè libenter, quòd iustitia bonæ conscientiæ sit necessaria, & quòd ab vno quouis præstari debeat: sed quid sibi vult, quòd precator eam coram Deo recitet, & ipsam in precibus suis Deo obtrudat? Etsi enim sunt homines pii, qui hanc iustitiam in vna & altera officij sui parte habent, tamen reperiuntur in alijs præuaricatores, David potuit quidem in causa aduersus Saulem, &
in admis

In administratione regni sui, illud Psalmi dicere:
 Iudica me DOMINE secundum iustitiam meam, &
 secundum innocentiam meam super me: non potuit
 autem hoc dicere in causa Vriæ. Ezechias verè di-
 xit: Ambulaui coram te in veritate, & in corde per-
 fecto: sed non verè idem dixisset, in legatione prin-
 cipum Babyloniorum. Paulus intuens in functionē
 Apostolatus sui, potuit bona conscientia dicere: Ni-
 hil mihi conscius sum, sed fortassis hoc non dixisset
 in ea contentione, quam susceperat cum Barnaba de
 Marco. Quare, cum non solum vulgus hominum,
 sed etiam sanctissimi ruant aliquoties in horrenda
 peccata, magnæ impudentiæ videtur, iustitiam su-
 am in precibus coram Deo commemorare. Ac po-
 namus aliquot esse pios, qui vitam suam tanta hones-
 tate transigant, vt possint cum lobe dicere: Non re-
 prehendit me cor meum in omni vita mea, nihilos-
 minus tamen necesse habent addere cum Paulo: Sed
 in hoc non sum iustificatus, propterea quòd omnes
 pñ, qui suscipiunt faciendum bonum, reperiant sibi
 malum adiunctum esse, nec iustificentur operibus
 suis in conspectu Dei. Qua igitur fronte audebunt
 Deo suam iustitiam in precibus obtrudere? Ad hæc
 respondendum est, quod vt turpe est de sua iustitia
 coram hominibus thraſonice gloriari, ita multò tur-
 pius esset, si pñ commemorarent eam coram Deo, vt
 iactarent, vel omnes in omnibus esse innocentes, vel
 confidere ea in causa consequendæ remissionis pec-
 catorum & æternæ salutis. Sed sunt aliæ causæ, pro-
 pter quas solent eam coram Deo commemorare.
 Vna est, vt iniuste ab impijs accusati & afflictī, fe-
 rant

2. Paralip. 32.

Acto. 15.

rant testimoniū veritati, & tueantur quod in se est, iustam aduersus impios causam. Solent enim impij & felici successu consiliorum suorum aduersus pios de rectitudine impietatis suæ gloriari, & piorum studia damnare. Mendacium autem impiorum non est approbandum, nec veritas neganda. Quare, cum pij recitant iustitiam & innocentiam suam, non hoc agunt, vt eam Deo pro expiatione peccatorum suorum obtendant, sed vt officium, quod Deus in confitenda veritate exigit, faciant, & ipsi obedientiam suam probent. Altera est, vt hac commemoratione excitent fidem suam, & accendant ardorem inuocationis suæ. Manifestum enim est, quod Deus non dissimulet perpetuū crudelitatem, qua impij grassantur in pios, & extant multæ promissiones, quibus Deus recipit se ope sua affuturum illis, qui iniusta patiuntur, & oppressurum iniustos: Brachia, inquit alius Psalmus, peccatorum conterentur: confirmat autem DOMINVS iustos. Et iterum: Iniusti disperibunt simul, reliquix impiorum interibunt: salus autem iustorum à DOMINO, & protector eorum in tempore tribulationis. Commemoratio autem iustitiæ ac innocentix admonet precatores de his Dei promissionibus. Hæc igitur cōmemoratio non est vana & carnalis iactantia de sua sanctitate, sed est ad excitandam & inflammandam in inuocatione fidem, pia & utilis recitatio.

Sed hæc de iustitia bonæ conscientix, & de commemoratione eius sufficiant. Cognoscamus nunc, quomodo diuinæ iustitiæ conueniat, quod pudefaciat, & pedibus impiorum conculcandos obijciat illos,

los, qui optimam causam habent, ac in ea Deum ardentissimis precibus inuocant, & felicem eius euentū magna spe expectant. Dicit enim Psalmus: Deus *Psal. 25.* meus, in te confido, non confundar. Et iterum: In te *Psal. 31.* DOMINE speraui, non confundar in æternum. Sciamus igitur quæ sit spes illa, quæ nos non confundit nec pudefacit. Ac primum, si loquendum est de bonis spiritualibus & cœlestibus, quæ Christus filius Dei nobis morte sua impetrauit, vt sunt remissio peccatorum, adoptio in filios Dei, & felicitas æterna, fieri non potest, vt quisquis crediderit in Christum, & sperauerit hæc bona propter Christum, confundatur & pudeat. Sic Deus (inquit Christus *Ioan. 3.* ipse,) dilexit mundum, vt filium suum vnigenitum daret, vt omnis, qui credit in eum, non pereat, sed habeat æternam vitam. Deinde, si loquendum est de bonis mundanis & terrenis, quæ in aduersis à Deo petere & sperare solemus, suum est discrimen. Aliquoties enim extat certa & perspicua promissio, qua Deus recepit se bona illa mundana & corporalia sine omni conditione daturum. Cum igitur Deus sit omnipotens & verax, dubitari nō debet, quin quod promissum est, certissimè eueniat. Sic Abraham promisit Deus, se posteritati suæ daturum suo tempore possessionem terræ Canaan, & hæc promissio impleta est, etiamsi maxima pars Israëlitarum erant increduli. Sic Deus promisit per Prophetam Ierobeam *3. Reg. 11.* mo præfecto Salomonis, regnum decem tribuum Israëlitis. Est & hæc promissio impleta, etiamsi Ierobeam gestabat impietatem in penetralibus cordis sui. Incredulitas enim impiorum non facit fidem Dei *Rom. 3.*

K irritam.

irritam. Aliquoties aut extant quidem certæ promissiones Dei, de terrenis beneficijs, sed conditione poenitentiae, quales sunt illae promissiones, quae continentur in precibus Salomonis, cum dedicaret templum. Qualis est & illa promissio apud Hieremiam: Si poenitentiam egerit gens illa à malo suo, quod locutus sum aduersus eam, agam & ego poenitentiam super malo quod cogitavi, vt facerem ei. Quare, si quis non egerit veram poenitentiam, nō habet quod conqueratur, etiam si spe sua pudeat.

3. Reg. 8.
Hier. 18.

Sed quid? si quis non solum egerit veram poenitentiam, verum etiam ambulauerit in vocatione Dei, & habuerit optimam causam aduersus hostes suos, ac polliceatur sibi spe sua certam victoriam, & tamen tantum abest, vt cōsequatur, quod sperauit, vt etiam tradatur pedibus hostium conculeandus, ac coram amicis & inimicis pudeat, id quod hīc noster Psalmus populo Dei accidisse commemorat? Quid ad hāc dicemus? Nunquid Deus aut mendacij, aut iniustitiae arguendus erit? Nihil certē minus. Nam praeter causam peccati, sunt etiam multae aliae grauissimae causae, cur Deus soleat impios in hoc seculo exaltare, & pios, praeter omnium spem & expectationem, deijcere.

Prima est, vt infelici rectorum consiliorum euentu affuefaciat Ecclesiam suam, ne vnquam bonitatis causae confidat, sed collocet omnem fiduciam suam in sola gratuita misericordia Dei, propter Iesum Christum. Vulgus enim hominum solet bonitatis causae suae ita fidere, vt nisi Deus eam pro ipsorum arbitrio, fortunet, arguat eum iniustitiae, aut accuset

eum

eum iniuriæ. Ac summa quidem semper danda est opera, vt nihil mali faciamus, nec nos ipsos vel temeritate, vel iniquitate in pericula conijciamus: Ne quis vestrum, inquit Petrus, affligatur vt homicida, aut fur, aut facinorosus, aut curiosus alienarum rerum: non est autem ipsa causæ bonitate fidendum: quòd bonitas causæ, etsi insigne quidem donum Dei est, tamen non est Deus ipse, creator, sed tantum creatura Dei. Confidere autem creatura, est creaturam adorare, & coram Deo idolomaniam designare. Quare, quemadmodum filius Dei permisit initio vulgati Euangelij, vt Ecclesia sua, tam à Iudæis, quam à Gentibus crudeliter discerperetur, & tanquam in laziæna mactaretur, idque illo consilio, vt re ipsa doceret, regnum suum non esse de hoc mundo: ita etiam permittere solet, vt pii in optima causa concidant, quo vniuersa Ecclesia discat, felicem rerum euentum in hoc seculo, non propriè pendere à bonitate causæ, quam homines habent, sed tantum à gratuita Dei clementia, qua sola est fidendum, & cuius solius voluntate ac beneficio prosper rerum casus euenit.

Dices autem, si ad hunc modum res se habet, pius homo nunquam poterit, etiam in optimis causis, felicem euentum certo sperare, sed semper de occulta Dei voluntate dubitet, necesse est? Si autem dubitat, quomodo inuocabit Deum ex fide? Hæc reuocandum est in memoriam, quod paulò antè dictum est, aliud esse, si felix instituti euentus seu victoria, seu aliud mundanum & corporale beneficium peculiari & certo verbo Dei, nominatim promissa sunt: aliud, si tantum generales habemus promissiones.

Nam si corporalia beneficia, peculiari verbo Dei dis-
sertè sunt promissa, nullo modo dubitandum est de
veritate verbi Dei, sed certa & firma fides adhiben-
da est diuinæ promissioni, & felix euentus nulla hæ-
sitacione expectandus.

Iosu. 6.

In libro Iosue promittitur Iosue victoria aduersus urbem Iericho & regem eius, certo & singulari verbo Dei: Ecce dedi, inquit DOMINVS, in manu tua Iericho, & regem eius, omnesq; fortes viros. Quare, cum Iosua circumiret urbem Iericho FIDE, reportauit insignem & admirandam victoriam.

Iudi. 6.

In libro Iudicum promittitur Gideoni certo verbo Dei, victoria aduersus Midianitas: Ego ero (inquit DOMINVS,) tecum, & percuties Midian, quasi vnum virum. Cum igitur Gideon aggredere-
tur fiducia huius promissionis hostes suos, vicit eos multo admirabilius, buccinis & lampadibus, quam alij gladijs & alabardis vicissent.

4. Reg. 19.

In libro 4. Regum promissa fuit Ezechie perspicuis verbis strages exercitus Assyriaci. Ponam (inquit DOMINVS de Assyrio) circulum in naribus tuis, & chamum in labijs tuis, & reducam te in via, qua venisti. Quod cum Ezechias obedienti fide expectaret, liberatus est admirando modo. Quare, ubi est certa, expressa ac peculiaris promissio de externa victoria aut liberatione, ibi etiam certa fides est concipienda, & promissus euentus sine vlla dubitatione expectandus.

Si aut non extat nisi generalis promissio de ope & auxilio Dei, ibi magna quidem fide aggrediendū & suscipiendum est, ad quod diuinitus vocamur, sed euentus

uentus est voluntati Dei permittendus. Neque enim ponendū est, vt Iudith ait, tempus miserationis Dei, nec est ei dies pro nostro arbitrio constituendus, sed faciendū est, quod Dauid in fuga sua, de reportanda arca dicit: Reporta arcam Dei in urbē, Si inuenero gratiam in oculis DOMINI, reducet me, & ostendet mihi eam, & tabernaculum suum: Si autem dixerit mihi. Non places, præsto sum, faciat quod bonum est coram se. Et quod dixit Ioab ad fratrem suum Abisai: Esto vir fortis, & pugnemus pro populo nostro, & ciuitate Dei nostri, DOMINVS autem faciat et quod bonum est in conspectu suo. Docuit & filius ipse Dei suo exemplo in periculis sic orare: Pater, si possibile est, transeat à me calix iste: veruntamen non mea, sed tua voluntas fiat. Itaque, si concepta tali fiducia, ac facta tali precatione, & voluntatis suæ in diuinam resignatione, DOMINVS dederit liberationē aut victoriam, est quod summas agamus Deo gratias: nec est, quod quicquam nostræ vel iustitiæ, vel prudentiæ, vel fortitudini, sed soli gratitiæ clementiæ Dei adscribamus. Si autem non dederit victoriam, sed potius tradiderit nos hostibus opprimendos, non despondeamus animum, sed perferamus aduersa fortiter, & cogitemus nos versari in summo cultu Dei, quod nostrum exemplum documento sit vniuersæ Ecclesiæ, DOMINVM Deum nostrum non sic bonitati causæ alligatum esse, vt necesse habeat eam semper externa felicitate, & pro humana voluntate fortunare, sed esse liberrimum rerum gubernatorem & administratorem, qui possit victoriam, pro suo arbitrio, nunc in dignos, nunc in indignos conferre.

- Secunda causa. Deus solet impiorum consilia, op^{er} pressis p^{ro}p^{ri}is, adiuuare, vt talibus exemplis veram sententiam generalium promissionum legis de auxilio Dei in periculis, & miraculorum, quæ in scriptura extant, quasi commentario, exponat & interprete-
Leuit. 26. tur. Generalis promissio est: Si in præceptis meis ambulaueritis, & mandata mea custodieritis, & feceritis ea, persequemini inimicos vestros, & corrumpent coram vobis. Persequetur quinq; de vobis, centum alienos, & centum de vobis, decem millia. Et iterum: Si exieris ad bellum contra hostes tuos, & videris equitatus & currus, & maiorem quam tu habearis aduersarij exercitus multitudinem, nolite metuere, nolite cedere, nec formidetis eos, quia DOMINUS Deus vester in medio vestri est, & pro vobis contra aduersarios dimicabit, vt eruat vos de periculo. Huc accedunt miracula, quæ sunt harum promissionum quasi sigilla. Gideon trecentis tantum militibus vertit in fugam innumerabilem hostium multitudinem. Ionathas & armiger eius, soli hostes Philistinos ita exterruerunt, vt in castris eorum, alter in alterum, tanquam in hostem sæuirent, & in fugam conijcerentur. Cum Iosaphat proficisceretur cum suis in bellum aduersus Moabitas & Ammonitas, qui exercitui Iosaphat & robore & multitudine antecellebant, vicit tamen Iosaphat, non gladijs, non alabardis, sed Psalmis & Canticis, quæ cantores exercitum antecedentes præcinebant. Ezechias nondum in bellum egressus, sed adhuc Hierosolymis hærens, exercitum Saneherib precibus suis itafregit & vicit, vt vna nocte centum octoginta millia

millia fortium virorum ab angelo interficerentur, & Saneherib cum reliquijs fuga sibi salutem quæreret. Hæ promissiones & miracula solent ferè eò trans-ferri, perinde ac si corporalis salus, & externa victo-ria semper deberent, bellum populi Dei, & consilia piorum sequi. Sed exemplum huius Psalmi nostri & alia id genus, interpretantur illas generales promissiones & miracula, videlicet, quòd significant ac testificentur certam quidem, corporalem & mundanam in periculis salutem, firma fiducia tunc expectandam esse, cum ea singulari promissione & discretis verbis promissa est: sed cum non extat expressa de externa & corporali salute promissio, sciamus, quòd cum non contigerit externa & corporalis salus, expectanda nobis sit, sine vlla dubitatione, spiritalis & cœlestis. Non enim dubium est, quin hi, qui primi hunc Psalmum recitarunt, fuerint Ecclesia populi Dei, & egressi ad bellum, fecerint magna pietate, ea quæ Deut. cap. 20. mandatur, videlicet, quòd ad solennem Sacerdotis concionem susceperint prelium committendum forti & pio animo, ac sperauerint multa fiducia, DOMINUM Deum suum dimiscaturum pro ipsis contra aduersarios, ac liberaturum ipsos è periculis. Hoc enim significant, cum dicunt: Non oblitus sumus tui, & inique non egimus in testamento tuo. Et non recessit retrò cor nostrum. Nihilominus tamen ab hostibus suis ita victi, fusi & fugati sunt, vt aliq, veluti oues macerationi destinatæ, fuerint iugulati, aliq in perpetuam seruitutem abducti & venditi, adeoq; facti sint opprobrium omnibus vi. inis suis. Quid igitur dicemus? Num accusabimus

bimus Deum mendacij, quòd non contulerit exteram victoriam in Ecclesiam populi sui, còfidentem & inuocantem ipsum, iuxta verba promissionis sue? Nihil minus. Etsi enim non contigit externa victoria, reliqua tamen adhuc est spiritualis & cœlestis, quæ pijs certissimè contingit, etiamsi omni corporali salute destituantur. Ad hunc enim modum prædicatio Euangelij de regno Christi interpretatur promissiones legis & miracula eius: Gaudete, inquit, & exultate, quia merces vestra copiosa est in cœlis. Disertè addit, IN COELIS. In his enim terris fieri solet, vt pijsissima consilia habeant infelicitissimos euentus: nec lex Dei minatur impijs vllam tam grauem & seueram in hoc seculo afflictionem, quæ non etiam, imò maximè omnium pijs & sanctis

Deut. 28. accidere soleat. De impijs dicit lex: Mittet **DOMINVS** in te famem & esuriem. De pijs autem dicit

Pro. 10. Scriptura aliàs: Non affliget **DOMINVS** fame animam iusti. Et iterum: Non confundentur in tempore malo, & in diebus famis saturabuntur. Et tamè

Psal. 36. multi Martyres fame necati sunt. Quæ est ergo hæc

Vide Euse. in histo. Ecclesia. còfusio, quòd quæ lex minatur impijs, accidunt pijs, & quæ promittuntur pijs, accidunt impijs? Hanc *Et Augu. lib. 1. cap. 10. de ciui. Dei.* confusionem componit & conciliat prædicatio Euangelij, cum dicit: Gaudete & exultate, quia merces vestra copiosa est in cœlis. Promittuntur quidem pijs multa & magna beneficia Dei, sed si non contigerint ipsis in hac terra corporaliter, certè còtingent eis in cœlo spiritualiter, ac longè maiori utilitate, quàm si accepissent ea in his terris. Omnia, inquit Paulus, adiumento sunt in bonum his, qui diligunt

Rom. 8.

ligunt

ligunt Deum. Quare etiã si vincuntur & opprimuntur ab hostibus, reportant tamen longè meliorem victoriam, quàm impij hostes, propterea quòd hi vnà cum victoriã sua in æternum pereant, p̃j aut̃ suis æumnis illustrentur coram cœlesti cœtu, & conseruentur æterna salute. Hanc enim piorum victoriam, in media quoq; strage, qua ab impijs opprimuntur, exponit idem Paulus, allegato etiã versiculo ex hoc Psalmo: Quis nos, inquit, separabit à dilectione, qua Deus nos complectitur? Num afflictio? num angustia? num persecutio? num fames? num nuditas? num periculum? num gladius? Quem admodum scriptum est: Propter te morti tradimur tota die, habiti sumus velut oves destinatæ macerationi. Et mox addit de victoriã: Verùm in his omnibus, inquit, superamus per eum, qui nos dilexit. Habes victoriam magis memorabilem & illustriorem, quàm fuit quondã Alexandri Magni de Dario, vel etiã Davidis de Goliathe. De tali victoriã conuocatur etiã Ioannes: Omne, inquit, quod natũ *1. Ioan. 5.* est ex Deo, vincit mundum. Et hæc est victoriã, quæ vincit mundum, fides nostra. Reportent sanè impij victoriam externam, qua occupant facultates & corpora piorum. P̃j autem reportant victoriam, qua vincunt non vnã tantum & alteram terræ regionem, sed vniuersum mundum: Hęc (inquit) est victoriã, quæ vincit *MUNDUM*, fides videlicet nostra. Hanc fidem, si ex prælio saluam reportaueris, omnia sunt salua. Et si enim non vincitur hostis homo, vincitur tamen hostis sathan: ac si non reportas victoriam è prælio terreno, reportas tamen eam

*Euseb. in Ec-
clesiast. histo.
lib. 8. cap. 5.*

ex morte ipsa. Quantò hæc victoria illi antecellit?
Cuius quispiam Nicomediensis, insignis & genere &
pietate, cum vidisset publicè in foro affixū esse crue-
dele & blasphemum edictum Diocletiani aduersus
Christianos, excitatus est heroico spiritu, & acce-
dens iniecit palam manus in literas Imperatorias, ac
discerpsit eas, spectante magna populi multitudine
frustatim. Sed mox affectus est ab Imperatore, im-
mani supplicio. Quid ergo factum est, quòd hic he-
ros habuit similem penè causam & zelum cum Mats-

1. Maccha. ca. 2.

rathia, qui Iudæum idolis sacrificantem in ara truci-
dauit, & mox etiam legatum impij regis occidit, non
tamen habuerit similem fortunam: Mattathias enim
non solum seruatus est, verumetiam excitauit hoc
stratagemate reliquos pios, vt caperent arma, & in-
ciperent patriam suam à tyrannide liberare: ille autē
Nicomediensis cuius crudeli morte occisus est. Sed
facilis est explicatio. Mattathias est exemplum cle-
mentiaē Dei, de externa liberatione, cuius autem
Nicomediensis est exemplum clementiaē Dei de spi-

*Euseb. Eccle.
hist. lib. 8. ca. 11.*

rituali & æterna liberatione. In Phrygia fuit ciuis
tas, cuius non solum ciues vulgares, autore Euse-
bio, verumetiam Senatus & Magistratus omnes es-
sant Christiani, & recusabant constanter sacrificare
idolis. Susceperunt igitur Romani aduersus hanc
ciuitatem bellum, & cinxerunt eam obsidione. Etsi
autem dederunt ciuibz optionem, vt qui velleret,
ciuitatem liber exiret, sed illa conditione, vt idolis
sacrificaret, tamen ciues, vnā omnes cum magistra-
tibus, senatoribus, mulieribus & pueris, maluerunt
extrema perferre, quàm abnegato Christo ad impie-
tatem

tatem reuerti. Itaq; ad vnum omnes vnà cum ciuitas
 te, iniecto à Romanis igni, exusti sunt. Quid ergo
 est, quòd Deus non miserit in Romanum exercitū,
 qui urbem tam piā obsidebat, Angelum exterminato-
 rem, sicut quondam miserat in exercitum Sane-
 heribi regis Assyriorum? Sed sic visum est DOMI-
 NO, in conseruanda vrbe Hierusalem, ædere exem-
 plum externæ liberationis, qualis tunc regno politi-
 co cōueniebat: in concremanda autem vrbe Phry-
 giæ, ædere exemplum liberationis spiritualis, qua-
 lis conueniebat regno Christi. Quare, cum videmus
 consilia impiorum fortunari, & pios in optima sua
 causa opprimi, sentiamus hoc illo consilio diuinitus
 fieri, vt Deus proponat vniuersæ Ecclesiæ cōmen-
 tarium, quo discat, generales promissiones de diui-
 na ope & liberatione in periculis, non intelligendas
 esse de externa tantum & corporali, qualis conuenit
 regno politico: sed præcipue de spiritali & æterna
 liberatione, qualis regno Christi, quod non est de
 hoc mundo, conuenit: nisi fortè externa liberatio-
 ne, quemadmodum antea ostendimus, expressis ver-
 bis promissa sit diuinitus: tunc enim non solum spi-
 ritualis, sed etiam externa illa liberatio, petenda est
 firma fide, & expectanda certissimè.

Tertia causa. Deus immittit multa aduersa Ec-
 clesiæ suæ, quamuis iuxta bonæ conscientiæ iusti-
 tiam innocenti, & in vocatione Dei ambulanti, vt
 fiat conformis imaginis filij sui. Non enim est disci-
 pulus supra præceptorem, neq; seruus supra domi-
 num suum. Et si Ecclesia petit vnà cum Christo Do-
 mino suo glorificari & regnare, vnà etiam compas-

tiatur & conculcetur necesse est. Nihil autem maius
festius est, quàm quòd Christus filius Dei in hoc mū-
do, & in causa longè omnium optima, passus sit ex-
tremam infelicitatem. Vides quanta animi angus-
tia in monte Oliueti ter deprecetur crucem, & pe-
tat, vt transeat à se hic calix. In cruce tanta tristitia
obruitur, vt exclamet, se à Deo desertum. Et notum
est è Psal. 22. quòd conqueratur coram Deo patre,
se vnigenitum filium Dei, ne tantum quidem in sua
afflictione iuari, quantum veteres Patriarchæ, ho-
mines, vt nihil aliud dicam, in peccatis concepti &
nati, diuinitus & mirando modo in suis aduersis ad-
iuti sunt: In te, inquit, sperauerunt patres nostri, spe-
rauerunt, & liberaasti eos. Ad te clamauerunt, & sal-
ui facti sunt, in te sperauerunt, & non sunt confusi.
Exempla horum versiculorum, vide supra Psal. 22.
quibus accedunt & multa alia, De Dauide, 1. Reg. 23.
De Abia rege Iuda, 2. Paral. 13. De Mose, Num. 16.
De Elia, 4. Reg. 1. De Elizæo, 4. Reg. 6. De Eze-
chia, 4. Reg. 19. Dies me deficeret, si pergerem com-
memorare omnia Patriarcharum exempla, quæ
testificantur ipsos sperasse, clamasse in aduersis suis
ad DOMINUM, & consecutos esse admirabilem li-
berationem. Ego autem (inquit Christus filius Dei)
sum vermis, & non homo, opprobrium hominum, &
abiectio plebis. Ego spero quidem in Deum, & cla-
mo ad eum, vt qui maximè & confidentissimè, attas-
men nullus venit nec homo, nec angelus, qui me è
manibus hostium meorum eripiat, sed ita conculcor,
perinde ac si vermis essem & non homo, adeoq; fas-
ctus sum omnibus, etiam abiectissimis, extremo lu-
dibrio

dibrio. Habes exemplum Christi. Si autem Christus filius Dei sperauit & clamauit ad Deum patrem suum, in causa longè omnium optima, & innocentissimus, non tamen consecutus est talem externam liberationem, qualem humana voluntas optabat & expectabat, qui nos sumus, aut quæ est vniuersa Ecclesia Dei, quòd detrectaret hac in parte conformis imaginis filij Dei fieri: imò tantum absit, vt in aduersis, quæ innocenti sibi, post confidentissimam inuocationem, præter omnem expectationem accidunt, expostulet cum Deo, & abijciat animum, vt potius gaudeat se dignari honore imaginis filij Dei, & maiorem ac certio rem de vera liberatione & salute fiduciam concipiat.

Quarta causa. Deus solet populo suo beneficia, quæ antea contulit, auferre, & aduersis affligere, nō vt perdat ipsos, sed vt maioribus eos beneficijs afficiat, deijcit vt exaltet, mortificat vt viuificet, deducit ad inferos vt reducat. Vide mihi iterum Christum filium Dei, cum vociferaretur in cruce: Deus meus, Deus meus, vt quid me deseruisti? non sic quidem exauditur à Deo patre, vt mittat cohortem Angelorum, qui ipsum de cruce, corā omnibus spectatoribus, palam, admirabiliter deponant: sed excitat eum tertio die à mortuis, educit eum de sepulchro, & palam testificatur, eum ad dextram suam collocatum, ac supra omnem humanam & angelicam maiestatem euectum. Quanto igitur beneficiorum cumulo, compensauit pauci temporis humilitatem & deiectionem? Sed audiamus non tantum in æterno & naturali filio Dei, verum etiam in filijs Dei ad

optiuis idem Dei patris institutum. Ioseph venditur
à suis fratribus, & conijcitur in carceres, nō quidem
hoc Dei consilio, vt periret, sed vt hac via ad illu-
strissimum Ægypti principatum duceretur. Iob tes-
timonio Dei collaudatus, spoliatur non tantum fa-
cultatibus, verūmetiam liberis suis, ac sanitate cor-
poris sui, quæ beneficia Deus antea singulari fauore
in ipsum cōtulerat. Spoliatur autem his, non vt ma-
neat rerum omnium egens, sed vt plura & maiora à
Deo beneficia recipiat. Dauid expellitur in exilium,
non vt in exilio pereat, sed vt hoc quasi gradu ad
thronum regium ascendat. Quid autem necesse est
commemorare exempla verè piorum & innocentū,
cum Deus idem suum consilium, etiam in sceleratis,
& ijs, qui propter peccata meriti sunt supplicia, sæ-
pe ac multum declarauerit? In primo libro Regum,
cap. 4. belligerantur Israelitæ cum Philistinis, Israe-
litę autem meriti erant supplicium propter impietas-
tem suam: quare non tantum vincuntur bello à Phi-
listinis, sed etiam arca testamenti, in qua Deus se ha-
bitaturum promiserat, & quæ erat præcipuū populū
Dei Sacramentum, abducitur captiua. Itaque vides
bantur non tam ipsi, quàm vniuersa ipsorum religio
perhisse. Sed Deus permiserat arcam abduci, vt ma-
iori gloria restitueretur. Ciues vrbs Hierusalem
ducuntur captiui in exilium Babylonicum, & vrbs
eorum, quæ fuerat sedes verbi Dei, solo æquatur,
sic enim meriti erant sua impietate & impœnitens-
tia. Deus autem coniecit eos in tantam miseriam,
non vt gloria religionis eorum interiret, sed vt in-
ter gentes multis miraculis illustraretur, & ipsi ac
posterī

posteriores eorum, patriæ magna gloria restituerentur. Postquam igitur Deus non meditatur perditionem, sed salutem, cum affligit populum suum sceleratum & nocentem, quomodo non meditaretur salutem, cum affligit populum suum iustum & innocentem?

Iouinianus, insignis heros in aula Cæsaris Iuliani, eijcitur ex aula propter confessionem Christi, & priuatur contumeliosè omni militiæ dignitate. Cur ergo *Tripar. lib. 7.*
 go Deus conuiuit ad hanc pñ Principis contumeliā *cap. 1.*
 am? num vt in ignominia periret? Nihilminus, sed vt maiori gloria restitueretur. Paulo post enim non solum reuocatur in aulam, sed etiam creatur ipse loco persecutoris sui Imperator. Erat & Valentinianus *Euse. in Eccl. histo. lib. 11.*
 vir magna animi fortitudine & pietate nobilis in aula Iuliani. Sed cum & ipse propter confessionē *cap. 2.*
 Christi eijceretur in exilium, tantum abfuit, vt passus sit magnam honoris sui iacturam, vt & ipse post *Tripar. histo. lib. 6. cap. 35.*
 Iouinianum electus sit in Imperatorem, & pro ignominia breui durabili, acceperit gloriam & maiestatem Imperatoriam. Quid ergo dicemus? Num horum exemplo sperandū est cuius propter Christū & Euangelion eius contumelia affecto, & aut in exiliū eiecto, aut in captiuitate detento, quod sit etiam in hac vita cōsecuturus maiorem gloriam, quā ante amisit? Dicit quidem Christus apud Marcum & Lucam: *Mar. 10. Luc. 18.*
 Nullus est, qui reliquit domum, aut parentes, aut fratres, aut uxorem, aut liberos, aut agros mea causa & Euangelij, quin recipiat centupla nunc in tempore hoc, ac in seculo venturo vitam æternam. Hoc autem dictum Christi non est intelligendum de crasso & Arithmetico recipiendi modo in hoc seculo,

culo, videlicet, quòd qui vnā externā domum propter Christum relinquit, recipiat pro ea centum externas domos, & qui vnā vxorem relinquit, recipiat pro ea in hoc seculo centum vxores: quę enim hæc esset absurditas? Sed intelligendum est de Geometrico, analogico, aut potius Theologico recipiendi modo, videlicet, quòd si propter Christū aut Euāgelion eius reliqueris parentes, domum, vxorem, liberos, agros, & alias mundanas opes, Deus tam prosperum det euentum, etiam in hoc seculo, vt non solum sufferre queas hanc tentationem, verū etiam multò felicius & tranquillius vitam agas, quā si abnegatione Christi retinuisses & tuā domum, & præter eam alias decem aut centum accepisses. Vide mihi exemplū Petri. Hic reliquit propter Christum suum rete, sed ita compensatum est ei, vt & ante mortem & resurrectionem Christi, cum emitteretur absq; vlla pecunia ad prædicandum Euāgelion, fateatur ipse, nihil vnquam sibi defuisse, & post resurrectionem Christi, cum ablegaretur in mundum, ad diuulgandum Euāgelion, exceptus sit à pñs quibusq; magna animi promptitudine, & tractatus summo honore. An non hoc verè est pro vno reti, recipere centum, etiam in hoc seculo? Negari quidem non potest, quin Deus queat suos pro vna domo amissa, centum domibus mundano modo in hoc seculo ditare, & victos in carcere educere, ac in regno collocare, neque enim manus eius hisce temporibus abbreviata est: sed quia vera piorum felicitas & maiestas consistit maximè omnium in futuro, nō in præsentī seculo, idcirco, si cui ablata fuerint facultates propter

propter Christum, aut aliæ calamitates acciderint, non pugnet cum voluntate Dei, sed dicat cum Dauid: Si inuenero gratiam in oculis DOMINI, reducet me, si autem dixerit mihi, non places, præstosum, faciat quod coram se bonum est. Nihil enim certius est, quam quòd homini pio eò maior contingat apud Deum in æterna vita felicitas, quò minus eam in hoc seculo assequitur. Nam, quod apud Deum differtur, in tantum non aufertur, vt etiam augeatur & cumuletur. Momentanea (inquit Paulus) leuitas *2. Cor. 4.* afflictionis nostræ, mirè supra modum, æternum pondus gloriæ parit nobis, dum non spectamus ea, quæ videntur, sed ea quæ non videntur. Et iterum: *Rom. 8.* Reputo non esse pares afflictiones præsentis temporis, ad gloriam quæ reuelabitur erga nos.

Quinta causa. Deus solet aliquoties aduersa in pios congerere, ac etiam augere, non ad puniendum præteritum peccatum, sed ad cauendum futurum. Exemplo est Paulus, qui ad Corinthios scribens: Ne *2. Cor. 12.* excellentia, inquit, reuelationum supra modum effe-
ferret, datus est mihi stimulus per carnem, nuncius Sathanæ, vt me colaphis cederet, ne supra modum efferrer. Super hoc ter rogavi DOMINVM, vt discederet à me. Et dixit mihi, sufficit tibi gratia mea, nã virtus mea per infirmitatem perficitur. Memorabile exemplum, quo primum admonemur, iustitiæ Dei non tantum competere, vt supplicijs præterita peccata puniat, aut de præsentibus in carne admoneat, verum etiam vt à futuris per aduersa arceat. Cogita ergo mihi, num & Deus pñs huius Psalmi nostri præcatoribus idcirco nō contulerit victoriam in hostes
M suos,

Rom. 8.

suos, ne felicitate elati, ruerent in pessima quæque scelera. Deinde docemur, quod Deus videatur quidem aliquoties preces piorum repellere, semper tamen exaudiat eas, si non secundum humanam precantium voluntatem, certè secundum spiritualem eorum utilitatem: Spiritus, inquit Paulus, intercedit pro nobis, gemitibus inenarrabilibus. At ille, qui scrutatur corda, nouit, quis sit sensus Spiritus, quoniam secundum Deum intercedit pro Sanctis. Quare, si vota precum nostrarum videntur magis retrocedere, quàm promouere, sufficiat nobis, sicut dictum est ad Paulum, gratia Dei: & simus contenti, quod Deus sit nobis propitius propter filium suum. Si enim Deus pro nobis, quis contra nos? Et si Deus fauet, dubium non est, quin declaraturus sit suo tempore fauorem magna & miranda liberalitate.

Ioan. 9.

Sexta causa. Deus obijcit Ecclesiam suam aduersis, ut gloria nominis sui illustretur. Neque hic, inquit Christus, peccauit, neque parentes eius, sed ut manifestarentur opera Dei in illo. Ac liquidem Deus punit aduersis & supplicijs certa manifesta scelera, reportat gloriam iusti iudicis. Non solum autem vocatur iustus iudex, verum etiam habet multa alia nomina, videlicet, sapiens, clemens, omnipotens, verax, & quæ sunt id genus alia. Solet igitur Deus aduersa in Ecclesiam suam, ac nonnunquam etiam in alienos immittere, ut hæc nomina sua fiant illustria, & excitent homines ad agnitionem Dei, ad timorem Dei, ad fidem & inuocationem ac obedientiam Dei. In Ægypto mandat rex seueriter, ut masculi Israëlitarum in partu interficerentur. Quod mandatum, cum

cum neglectum esset, iubet masculos populi Dei in flumen proijci, & aquis suffocari: adultos autem & seniores tam duris laboribus exercebat, vix vt respirare possent. Hanc calamitatem, si quis ordine, priusquam accideret, Israëlitis exposuisset, cum adhuc recenti Iosephi memoria in Ægypto florent, nunc quid arbitraris eos potuisse aliquid salutis sperare? Certe, aut non credidissent talia futura commemoranti, aut si credidissent, existimassent de salute & incolumitate populi Dei actum fore. Dictum quidem erat quondam ad Abrahamum: Semen tuum peregrinum futurum est in terra non sua, & subiicient eos seruituti & affligent: sed tantam esse venturam in ipsos immanitatem, quis cogitasset? Nihilominus tamen DOMINVS Deus noster permittit hæc accidere, interim autem excogitat modum, quo non solum seruat populum suum, sed etiam multiplicat eum, ac liberat à tyrannide Regis potentissimi. Illustratur ergo nomen sapientiæ & omnipotentiae eius, vt in toto orbe cognoscatur, quod sit Deus sapiens & omnipotens.

Gen. 15.

In primo libro Regum cap. 4. vincuntur Israëlites à Philistinis, & Arca propitiatorij abducitur ab hostibus captiua. Hoc, si quis futurum exposuisset Israëlitis ante bellum, aut Philistinorum victoriam, maxima pars exclamasset: Hoc si futurum fuerit, actum erit, non tantum de Israëlitis, verum etiam de vniuersa ipsorum religione. Sed DOMINVS Deus noster inuenit rationem, qua & conseruat suam Ecclesiam ac religionem, & efficit, vt Arca propitiatorij restitatur Ecclesiae suæ maxima nominis sui gloria,

ria, & summa hostium ignominia. Illustratur igitur nomen Dei, vt cognoscatur esse verè sapiens, potens & clemens.

In Macchabæis vides, quanta crudelitate, quanta immanitate sequiat Antiochius in Iudæos, qui tunc erant Ecclesia Dei. Vrbs Hierusalem, quæ erat sedes Ecclesiæ, occupatur à tyranno ethnico & impio idolatra, prohibentur sacra legitima, prophanatur templum, instituuntur idola & sacra impia, traditur incendio sacra Scriptura, trucidantur qui legi Dei constanter adhærent, trucidantur & mulieres, quæ pueros suos circumciderant, ac pueri suspendebantur à ceruicibus ipsarum, deniq; plurima erat vbiq; mortis imago. Si hæc fuissent Iudæis ante euentum commemorata, quis non existimasset extremam Ecclesiæ Dei internitionem instare? Sed DOMINVS Deus noster, qui promisit se affuturum afflicto populo suo, ea est industria, potentia, clementia & veritate, vt & tyrannum deiciat, & populum suum mirando modo conseruet. Reportat igitur gloriam non tantum sapientiæ & potentiæ, verumetiam clementiæ & veritatis.

Dices: Quomodo gloria nominis Dei illustratur aduersis casibus populi Dei, cum potius res ipsa testificetur, quod impij hostes, consecuta victoria aduersus pios, applaudant sibi de sua impietate, & passim vociferari non vereantur: Vbi est Deus eorum? vbi Christus, de quo gloriantur, quod Ecclesiam suam perpetuò tueatur? vbi Euangelion? vbi preces eorum? cur non defenderunt eos in his tantis periculis? an non Deus tali victoria quasi publicis
cum

cum dedit testimonium, nostram religionem esse verissimam, illorum autem esse vanissimam? Hæ & id genus aliæ impiorum vociferationes, non certè videntur esse gloria, sed potius contumelia nominis Dei, & veritatis piæ doctrinæ. At enim inter titulos DOMINI Dei nostri non recitantur hæc tantum epitheta, misereator, misericors, clemens, sapiens, potens, verax, & id genus reliqua, sed etiam patiens & longanimis. Et aliquoties quidem illustratur nomen misericordiæ, clementiæ, potentiæ, sapientiæ, & veritatis: sed & nomen patientiæ & longanimitatis est illustrandum. Si enim omnes virtutes sunt in Deo perfectissimæ, certè etiam longanimitatis virtus in ipso perfectissima sit, necesse est. Itaque audit quidem blasphemias impiorum voces, sed quia longanimis est, non solet ad vindictam præcipitè festinare, sicut homines carnales: sed solet prodigiū suā sapientia opportunum tempus expectare. Cum vnigenitus filius Dei penderet in crucē laceratus & perfossus, quid horribilius, quā magis blasphemum dici potuit, quā quod tū ab impijs audiebatur: Vah, qui destruis templum, & in triduo reedificas illud, seruā te metipsum, si es filius Dei, desce de cruce? Et tamen Deus ad has tam impias voces, ita tū conuiuit, perinde ac si filius eius nulli prorsus sibi curæ esset. Sed vt nihil dicam de æterno horum impiorum supplicio, confer queso cogitationem & oculos tuos ad ea tempora, quibus Titus Imperator expugnauit urbem Hierusalem. Quas ibi miseras, quas calamitates non viderunt? An non cum re ipsa comprobatum est, quod Deus nō solum

blasphemias voces, quas impij aduersus filium suum euomuerunt, audiuerit, verumetiam tantò seuerius in impios animaduertit, quantò diutius supplicij distulit. Quare non moueamur impiorum iactantia & blasphemijs, sed agnoscamus lōganimitem Dei, qui vt non sinat suos tentari vltra id quod ferre possunt, ita gloriam nominis sui multò illustrius, quam quisquam ratus esset, opportuno suo tempore vindicabit.

Septima causa. Deus exercet Ecclesiam aduersis vt cribretur, & triticum à paleis dignoscatur. Nam si Deus permittit hæreses aut sectas esse, vt qui probati sunt, quemadmodum Paulus ait, manifesti fiant, multò magis permittit accidere aduersa, vt conspiciuntur fiat, qui verè, & qui non verè credant. Apud *Matth. 13.* Matthæum, semen Euangelij spargitur in agrum Ecclesie, sed quod cadit in loca saxosa, adumbrat eos, qui excipiunt quidem Euangelion cum gaudio, cum verò sol exoritur, (hoc est) æstus afflictionis aut persecutionis inuiderit, offenduntur & deficiunt. Etsi autem separatio honorum à malis, tum demum perfecte fiet, cum DOMINVS venerit ad iudicandos viuos & mortuos, interea tamen temporis libet ipsi aliquoties ventilabrum afflictionis in manum sumere, & aliquod specimen excussionis palearum à tritico ædere: idq; non hoc consilio, vt ipse tamprimum discat suos agnoscere, qui enim est cordium scrutator, nouit, qui sint sui: sed vt verè pñ fiant sibi ipsis noti, & comperiant re ipsa filium Dei verè esse viuificantem & seruatorem. In Psal. 94. dicitur: Secundum multitudinem dolorum meorum in corde meo, consolabor

consolationis tuæ lætificauerunt animam meam. Et
 2. Cor. 1. Sicut abundant afflictiones Christi in nobis,
 ita per Christum abundat & consolatio nostra.
 Quanquam enim perfecta consolatio tum demum
 pijs contingit, cum mortale hoc induerit immortalis
 tatem, tamen in hoc seculo accipiunt in aduersis suis
 primitias consolationis, per Christum filium Dei,
 cuius nomine lætificantur in doloribus, vt habeant
 intra se viuum testimonium, quod filius Dei, D O S
 MINVS noster Iesus Christus, sit verus viuificator &
 seruator. Qui non exercetur afflictionibus, nec tenta-
 ntur, nullam habent cœlestis consolationis aut vi-
 uificationis notitiam & experientiam: qui enim non
 est tentatus, quid scit? Quare, cum Deus cribrat *Eccle. 54.*
 Ecclesiam suam aduersis, sciamus eum illud agere,
 vt qui verè pijs sunt, accipiant etiam in hoc seculo, &
 in medijs afflictionibus aliquem futuræ felicitatis
 gustum.

Octaua causa, Deus permittit impios, oppressis
 pijs, vincere & dominari, vt impij propter obstina-
 tam suam impietatem & impœnitentiam excæcens-
 tur, & iniquitates suas compleant, ac tandem æter-
 na & digna factis suis supplicia accipiant. In diem
 perditionis, inquit Iob, seruatur malus, & ad diem *Iob 21.*
 furoris ducetur. Et in Psalmo: Ecce ipsi (inquit) pec- *Psal. 72.*
 catores, & tamen felices sunt in hoc seculo: obtine-
 runt diuitias. Et mox: Veruntamen propter dolos
 posuisti eis, hoc est, constituisti eos in lubrico, seu
 præcipitio, vt quò altius extolluntur, eò grauiori la-
 psu ruant. Et in Prouerb. Contritionem præcedit su- *Prouer. 16.*
 perbia, & ante ruinam exaltatur Spiritus, (hoc est)
 impij

impj, cum extolluntur & superbiunt, proximi sunt
Hiere. 12. deiectioni & ruinæ. Et Hieremias: Quare via im-
 piorum prosperatur, benè est omnibus, qui præuaris
 cantur & iniquè agunt? Et mox respondet: Congres-
 ga eos quasi gregem ad victimam, & sanctifica eos
 in diem occisionis, (hoc est) quemadmodum boues
 & porci saginantur, non ipsorum causa per se, sed
 ad lanienam, vt mactentur, ita impj fruuntur felici
 rerum suarum successu, vt deſciantur in perpetuam
 infelicitatem. Quare pj præstant Deo gratissimum
 cultum, si interea, dum impj saginantur & exaltan-
 tur, deiectionem suam obedienter sustineant, donec
 D O M I N U S impjjs sufficienter saginatis incipiat
 eos, ad declarandam potentiam & seueritatem su-
 am, mactare, & in barathrum æternæ damnationis
 præcipitare.

Nona causa. Deus affligit piam suam Ecclesiam,
 vt perspicuum fiat, quanta seueritate Deus sit puni-
 turus impios. In Hieremia cap. 25, dicitur: Ecce in
 ciuitate, in qua inuocatum est nomen meum, ego in-
 cipio affligere, & vos quasi innocentes & immunes
1. Pet. 4. eritis? Et Petrus: Tempus est, inquit, vt iudicium à
 domo Dei incipiat. Quod si primùm incipit à nobis,
 quis erit finis eorū, qui non credunt Euangelio Dei?
 Et Christus ipse in sua passione dicit: Si hoc in ligno
 viridi, quid fiet in arido?

Decima causa. Deus affligit populum suum, vt
 excutiat ipsis carnalem securitatem, & doceat eos,
 non aliena intercessione, sed sola gratuita clementia
 Dei confidere. Extant enim in scriptis Prophetiis
 & Apostolicis exempla, quibus aliena intercessio
 ita

ita commendatur, vt Deus propter eam, etiam impijs & extrema meritis beneficiat. In Gen. cap. 18. dicit DOMINVS ad Abrahamum: Si inuenero Zosdomis decem iustos, non delebo propter decem. Quoties Mose seruat sua intercessione Pharaonem *Exo. 9. 17.* & Israëlitas, etiam internitionem meritis? In priori *Num. 14.* libro Samuelis cap. 7. Propheta Samuel liberat sua intercessione Israëlitas à Philistinis. In Actis Apostolicis cap. 27. donantur vni Paulo ducenti septuaginta sex homines, ne naufragio pereant. In Ecclesiastica *Euseb. lib. 5. cap. 5.* historia, milites Christiani impetrant exercitui Cæsaris Marci Aurelij, qui maxima parte ex Idolatris constabat, in summa siti, pluuiam & victoriam aduersus hostes. Possent autem homines arbitriari, hæc & id genus alia exempla proponi, vt liceat nobis securis aliena intercessione cōfidere, ac nostrum ipsorum officium deferere. Sed ne his exemplis abuteremur, solet Deus aliquoties populum suum nulla alienæ intercessionis ratione habita, affligere, vt assuefaciat eos suum ipsorum officium facere, & sola gratuita Dei clementia confidere. Et ex tant alia diuersa exempla. Neq; enim septem illa millia virorum, qui non curuauerant genua sua ante Baal, neq; Elias ipse, neq; centum Prophetæ, quos Abdias clam pauerat, potuerunt Israëlitas à publica rerum penuria & fame seruare. Et ad Hieremiam *Hier. 15.* dicitur: Si steterint Moses & Samuel coram me, nō est anima mea ad populum istum. Quid ergo sibi vult DOMINVS Deus noster, quod nunc quidem parcat etiam nocentibus, propter aliorum intercessionem, nunc autem nullam prorsus habeat talis inter-

tercessionis rationem: Non est quidem inquirendū
curiosē in iudicia Dei, quæ vult ipse à nobis abscon-
dita esse, nec est Deo ex aduerso respondendum:
sed pars officij est illa cognoscere, quæ Spiritus san-
ctus in sacra Scriptura nobis cognoscenda tradit.
Docet igitur Scriptura, quod p̃ij tantæ sint curæ
Deo, vt non solum capillos capitis ipsorum in nu-
merato habeat, & ipsis solis benefaciat, verū etiam
Gen. 12. benefaciat alijs propter ipsos: Benedicam, inquit
DOMINVS ad Abrahamum, benedicientibus te. Et
in Decalogo: Faciens misericordiam in millia, his,
qui diligunt me, & custodiunt mandata mea. Itaq;
cum alijs aliorum intercessione benefacit, agnos-
scamus immensam Dei clementiam & bonitatem, &
excitemur ad ardentius pietatis studium. Si autem
visum fuerit DOMINO, in inferendis aduersis per-
gere, ac nullam alienæ intercessionis rationem ha-
bere, non accusemus eum crudelitatis, sed agnos-
scamus tam libertatem, quàm seueritatem eius, &
sciamus, quòd quicquid fiat, certe Deus semper com-
plectatur & tueatur credentes in ipsum, summa cura
& fauore: Cum peccauerit terra, inquit DOMINVS
Ezech. 14. apud Ezechielem, vt præuaricans præuaricetur, ex-
tendam manum meam super eam. Ac mox: Et si fu-
erint in medio eius tres viri isti, Noë, Daniel & Iob,
ipsi iustitia sua liberabunt animas suas. Et Petrus:
Novit (inquit) DOMINVS, pios è tentatione eris-
pere, iniustos autem in diem iudicij puniendos ser-
uare. Quare, officium exigit quidem, vt nos mutuò
Rom. 15. ad preces exhortemur, & alius alium orationibus
2. Cor. 1. iuueamus, non est autem interea in nostra vocatione
stertens

stertendum, & alieno auxilio confidendum, sed col-
locanda est omnis spes in sola gratuita clementia
Dei per Iesum Christum, vt quæcunq; aduersa acci-
derint, seruemur.

Recensuimus hætenus aliquot causas, cur Deus
conniueat, vt impij exaltentur, & in hoc seculo, po-
tentia, maiestate, victoria, diuitijs, & omni genere
corporalium bonorum illustrentur, pñ autem, etiam
in optimis causis opprimantur & obscrentur. Pos-
sent quidem & aliæ causæ commemorari, sed hæ in
præsentia sufficiunt, vt cognoscamus, quòd etsi af-
flictiones exortæ sunt in hoc mundo propter peccas-
tum, & omnes homines sunt peccatores, ac si D O M I N
V S obseruauerit iniquitates, inuenit in omnibus
hominibus, quod tam corporali, quàm æterno sup-
plicio puniat, non tamen respiciat semper in afflis-
gendo homine peccatum, nec approbet, quòd hy-
pocritæ, quales erant amici Iobis, condemnent pec-
cati, ad tuendam iustitiam Dei, hominem afflictum,
propterea quòd sint multæ aliæ grauissimæ causæ,
præter peccatum, propter quas Deus iuste queat
etiam innocentissimos homines affligere. Quare pñ
debent quidem semper in omnibus, siue prosperis,
siue aduersis sua peccata coram Deo agnoscere, non
autem debent propter afflictionem studium veræ
pietatis abijcere, & quod rectum est, prauum iudic-
care, sed potius cogitare, se in ærumnas, optimo Dei
consilio conijci, quas, si ex fide obedienter sustinues-
rint, dubium non est, quin pro semuncia afflictionis, 2. Cor. 4.
recepturi sint centumpondium gloriæ in æterna fe-
licitate.

Sed de altera huius Psalmi parte hactenus. Accedamus nunc ad tertiam eius partem.

23. *Exurge, quare obdormis DOMINE? Euigila, ne projicias in eternum.*
 24. *Quare faciem tuam abscondis? obliuisceris afflictionum & arumnarum nostrarum?*
 25. *Quoniam deiecta est ad puluerem anima nostra, adhaeret terra venter noster.*
 26. *Exurge, adiuuu nos, & redime nos, propter bonitatem tuam.*

Hac est tertia & postrema pars huius Psalmi, quæ continet precationem. Ac initio, cum precatores vertunt se inuocatione sua ad DOMINUM Deum nostrum; non existimes ipsos sentire, quod DOMINVS ita sit inuocandus, vt liceat vnà cum ipso inuocare vel Patriarchas, vel Prophetas, vel Apostolos; vel alios sanctos mortuos, sed quod solus ipse DOMINVS noster sit inuocandus, & nullus alius vel angelus vel homo. Sicut enim DOMINVS de maiestate sua per Esaiam dicit: Nunquid non ego DOMINVS, & non est vltra Deus absq; me? Et: Ego Deus, & nō est alius: ita & intelligendum, eum de nominis sui inuocatione dicere: Nunquid non ego inuocandus sum, & non est alius absq; me inuocandus? Ego inuocandus, & non alius. Quare idolomanitæ sunt, qui in aduersis alium, præter solum DOMINUM Deum nostrum inuocant. Deinde, quod precatores sic alloquuntur Deum, perinde ac si dormiret: Exurge, inquiunt, quare obdormis Domine?

mine, euigila, non sentiunt Deum somno, sicut homines, corripit, aut æruminarum Ecclesiæ suæ humas
no more obliuisci: Ecce, (inquit) non dormitabit, *Psal. 120.*
neque dormiet, qui custodit Israel. Et iterum: Nunc *Esa. 49.*
quid obliuisci potest mulier infantis sui, ut non misereatur filio uteri sui? Et si illa obliuiscitur, ego tamen non obliuiscar tui. Sed illa loquendi forma exponunt coram Deo vehementiam affectus sui: quod cum non dubitent de summa vigilantia & cura DOMINI erga Ecclesiam suam, ac certo confidant, Deum ipsos his præsentibus malis liberaturum, (nisi enim hac fide præditi essent, Deum non inuocarent) cupiant ingenti desiderio, quam citissimè propter malorum magnitudinem liberari. Itaque his verbis exprimunt magis ardorem humani sui ipsorum desiderij, quàm quòd Deo aliquid humani attribuant.

Præterea, quòd precatores non sint contenti vno exurgendi & obliuiscendi verbo, sed subinde ea repetant & iterent, non est superuacanea *ταυτολογία*, sed afflicti cordis in precatione assiduitas. Significant enim precatores his verborum repetitionibus se, non oscitanter, non aliud agentes, sed magna animi contentione, ac sine vlla intermissione diuinam opem implorare. Increduli, si verba precum semel & iterum recitauerint, & non continuò præsens auxiliù senserint, abijciunt inuocationem Dei, & vertunt se ad quærenda aliena auxilia. Oportet autem, ut apud *Luc. 18.* Lucam dicitur, semper orare, nec defatigari. Quare precatores repetunt subinde in hoc Psalmo eadem verba, & instant ac vrgent, ut significant, se precando non defatigari, ideoque vel tandem, si non propter

suam dignitatem, at certè propter improbitatem suam & necessitatem exaudiantur.

Sed quæso te, cuius rei fiducia inuocant precatos res huius Psalmi diuinam opem? Num fiducia suæ innocentia? Recitarunt quidem antea suam innocentiam, non autem recitarunt eam, vt significant se ea coram tribunali Dei confidere, & merito eius auxilium petere, quis enim in conspectu Dei sua ipsius innocentia iustificatur? Sed vt confirment fidem suam de promissione, qua Deus recepit se afflictis, & propter nomen suum oppressis, ope sua affuturū. In petitione enim diuinorum beneficiorum omnino recitandum est ex animo illud Psalmi: Non nobis Domine, non nobis, sed nomini T V O da gloriam. Et illud Danielis: Nobis confusio faciei, tibi autem DOMINO Deo nostro misericordia & propitiatio. Ac mox: Non in iustificationibus nostris prosternimus preces ante faciem tuam, sed in miserationibus tuis multis. Vnde & in nostro Psalmo in fine additur: Propter bonitatem seu beneficentiam T V A M. Hæc appendix non est oscitanter intuenda. Precatores enim vna hac voce beneficentiæ, quæ est gratuita Dei clementia, comprehendunt omnes rationes, quibus in hoc Psalmo vsi sunt, & ad fidem ac inuocationem excitati, & quibus certissima spe impetrandi tenentur. Primum enim recitarūt initio Psalmi vetera beneficia, quæ Deus olim in Ecclesiam populi sui contulit. Beneficentiæ autem Dei est, vetera beneficia nouis cumulare: Dona, inquit Paulus, & vocatio Dei eiusmodi sunt, vt eorum illum poenitere non possit. Et iterum: Si increduli sumus, ille

Psalm. 113.

Danie. 9.

Roma. 11.

1. Tim. 2.

Ille fidelis manet, negare seipsum non potest. Quare, cum precatore inuocant Deum propter beneficentiam suam, significant se confidere non suis meritis, sed tantum gratuita clementia Dei, ut qui antea liberaliter & misericorditer contulerit multa & magna beneficia in Ecclesiam suam, ne nunc quidem veteris, & toties confirmata & experta suae beneuolentiae obliuiscatur. Deinde recitarunt praesentes suas afflictiones, ærumnas & oppressiones: Nunc respulisti nos, inquiunt, & confudisti nos. Et mox: Deiecta est in puluere anima nostra, (hoc est) sumus prorsus abiecti & oppressi. Beneficentiae autem Dei est, afflictis opem ferre, & oppressis subuenire. Precatores igitur, admonentes Deum beneficentiae suae, significant se confidere ipsius promissionibus, quibus Deus recepit se afflictos & oppressos clementer seruaturum & liberaturum.

Præterea recitarunt suam innocentiam: Hec omnia, inquiunt, venerunt super nos, & tamen non sumus tui oblitii, nec iniquè egimus in testamento tuo. Beneficentiae autem Dei est, ut innocentibus succurrat: Faciens, inquit alius Psalmus, misericordias *Psalm. 102.*
 DOMINVS, & iudicium omnibus iniuriam patientibus. Et rursus: Qui custodit veritatem in seculum, *Psalm. 145.*
 facit iudicium iniuriam patientibus. Quare, cum precatore appellant ad beneficentiam Dei, significant, se commemoratione suae innocentiae non fidere sua ipsorum iustitia, quemadmodum supra demonstrauimus: sed fidere gratuitis illis promissionibus, quas Deus iniuriam patientibus proposuit. Deinde exposuerunt se pati ab impijs aduersarijs persecutio-

nem,

nem, non propter sua aliqua scelera aduersus impiorum designata, sed propter doctrinam Dei, quam profitentur, & propter gloriam nominis Dei, quam illustrare, & ad posteros propagare student. Propter TE, inquiunt, morti tradimur singulis diebus, & habemur veluti oves macrationi destinatae. Beneficentiae autem Dei est, pios & studiosos gloriae nominis sui, oppressis & extinctis impijs conseruare, & gloriam nominis sui tueri. DOMINVS (inquit Psalmus) amat iudicium, & non derelinquet sanctos suos, in aeternum conseruabuntur: Iniusti punientur, & semen impiorum peribit. Et in Esaia: Propter me, dicit DOMINVS, propter me faciam, vt non blasphemem, & gloriam meam alteri non dabo. Quare, cum precatores faciunt mentionem beneficentiae Dei, significant, se ex eo, quod Deus non sinat gloriam nominis Dei ab impijs perpetuo sordidari & contumelari, certissimam spem liberationis concepisse.

Postremo, vertunt se precibus suis ad solum DOMINVM Deum nostrum, & Inuocant eum vere ac ex animo: Exurge, inquiunt, DOMINE, & adiuua nos, & redime nos. Beneficentiae autem Dei est, precibus Ecclesiae suae exaudire: Inuoca me (inquit) in die tribulationis, & eruam te, & honorificabis me. Et iterum: Propè est DOMINVS omnibus inuocantibus eum, inuocantibus eum in veritate. Admonent igitur precatores Deum beneficentiae suae, vt significent, se firmam habere fidem promissionibus eius, de preciarum precum exauditione: nec dubitare, quin Deus sit factis praestiturus, quod verbis se facturum recepit. Habes, quàm latè pateat vocabulum bonitatis seu

vis seu beneficentiæ Dei, propter quam precatore
 sperant & confidunt se exaudiendos.

VSVS HVIUS PSALMI.

Principio, hic Psalmus est memorabile & insigne
 exemplum, quo probatur, DOMINUM Deum nos
 strum esse liberrimum agens, nec pati se in angustos
 humanę sapientiæ carceres includi. Nam, cum Deus
 prædicetur iustus, imò iustitia ipsa, arbitrantur ho-
 mines amittere eum nomen & laudem iustitiæ, si
 quenquam præter meritum peccati afflixerit. Hic
 autem Psalmus recitat exemplum, quo precatore
 apertè fatentur, se oppressos esse nulla peccati sui
 causa, sed tantum propter nomen Dei. Et tamen De-
 us retinet perpetuò nomen & gloriam iusti. Sentias
 mus igitur afflictiones non tantum propter peccas-
 tum & ex ira Dei accidere, sed multas alias esse cau-
 sas, propter quas Deus Ecclesiam suam aduersis ob-
 iiciat, idq; nulla planè ira, sed summa beneuolentia
 & fauore. Quas causas, cum suprà copiosè recensue-
 rimus, superuacaneum est hîc repetere. Deinde hic
 Psalmus excitat nos, vt diligenter inquiramus &
 perscrutemur argumenta ac rationes, quibus Deum
 in precationibus nostris persuadeamus, & impetre-
 mus, vt quod petimus beneficium, liberaliter in nos
 conferat. Magna & admiranda est illius hominis es-
 loquentia, qui potest oratione sua permouere homi-
 nes, vt quemcunq; instituerit, animi affectum susci-
 piant, & voluntati suæ obsequantur. At multò ma-
 ior & admirabilior est istius eloquentia, qui potest
 O oratione

oratione sua DOMINUM Deum nostrum omnipotentem permouere, & persuadere, vt quod petit, impetret, & quod cupit, assequatur. Agitedum igitur, suscipiamus studium huius eloquentiæ, & cognoscamus eas rationes, quibus possimus Deum in sententiam animi nostri ita pertrahere, vt quod volumus & petimus, clementer & promptè nobis exhibeat. Supplicationes vocant, quas subditi solent principibus suis offerre, vt ipsi beneuolentiam principis captent, & beneficia impetrent: sed hæc hominum beneficia sunt terrena & vanitati obnoxia. Discamus igitur facere supplicationes, quas DOMINO Deo nostro offeramus, & quibus eum persuadeamus, vt conferat in nos beneficia cœlestia & æterna.

Priusquam autem ostendamus locos, è quibus petenda sunt argumenta cœlestis supplicationis, sciamus ante omnia necessarium esse, vt qui cum supplicatione sua accessurus est ad Deum, adoptatus sit in filium Dei, per fidem in Iesum Christum: aut si propter peccatum exheredatus est, reuertatur ad Deum per pœnitentiam. Nō enim patet impio, nec impenitenti accessus ad thronum Dei: Oratio eius, inquit, fiat in peccatum. Et cum extenderitis manus vestras, auertam oculos meos à vobis: & cum multiplicaueritis orationem, non exaudiam: Manus enim vestre sanguine plene sunt. Quare oblaturi supplicationem nostrā DOMINO Deo nostro, curæ nobis sit ante omnia, vt audito Euangelio Christi, credamus Christum impetrasse nobis adoptionem filiorū Dei, aut si propter peccata iterū abiecti à Deo videmur, agamus veram pœnitentiam, vt ab accessu ad thronū Dei non excludamur.

Sed

Sed de supplicatione ipsa facienda nunc dicendū est. Nam vt conficiamus efficacem supplicationem, necessarium est, vt cognoscamus naturam, ingeniū, affectum & voluntatem Dei: Si quid, inquit Ioan. *1. Ioan. 4.* nes, petierimus secundum voluntatem eius, audit nos. Cognoscimus autem ingenium & voluntatem Dei ex promissionibus eius, quæ summam comprehenduntur ijs nominibus, cognominibus & epithetis, quæ tribuit ei Spiritus sanctus. Quare nomina & epitheta Dei diligentissimè sunt cognoscenda, vt ex ipsis ducamus argumenta & rationes, quibus supplicatio nostra fiat coram Deo efficax, & impetret, quod petendum instituimus.

Ac initio. Nomen seu epitheton Dei est, Pater. Agnoscit enim Israel, (hoc est) Ecclesiam suam, vt pater filium: Filius meus, inquit, primogenitus, Israël. Et apud Esaiam: Tu Domine, PATER noster *Esa. 64.* & redemptor noster, à seculo nomen tuum. Sed Deus misit illo maxime omnium consilio naturalem & vnigenitum filium suum in hunc mundum, vt resuscitaret & se vere esse patrem populi sui, & adoptare eos in filios: Vbi venit (inquit Paulus) plenitudo temporis, emisit Deus filium suum, factum ex muliere, factum legi obnoxium, vt eos, qui legi erant obnoxij, redimeret, & adoptione ius filiorum acciperemus. Precaturi igitur & inuocaturi Deum, producamus in medium nomen PATRIS, & appellesmus Deum constanti & firma fiducia PATREM. Sic enim vera fide appellatus, teneri non potest, quin omnem paternam beneuolentiam precatori exhibeat. Quis est, inquit Christus, ex vobis pater, a quo,

si filius petierit panem, num lapidem dabit illi? aut si pisces, num pro pisce serpentem dabit? aut si os uuum, num porriget illi scorpionem? Si ergo vos, cum sitis mali, nostis bona dona dare filiis vestris, quanto magis PATER vester cœlestis dabit poscentibus se Spiritum sanctum. Sic Christus ipse vtrens hoc PATRIS epitheto, orat: Pater, inquit, venit hora, glorifica filium tuum, vt filius te glorificet. Quod autem orauit, etiam impetrauit, assecutus gloriam & nomen supra omne nomen. Sic & nos orare aut supplicare docuit: Pater noster qui es in cœlis. Non docuit nos Deum appellare patrem honoris tantum gratia, sed vt hoc vocabulo significaret impetrationis certitudinem.

Deinde, Deus vocatur misericors, beneficus, respector afflictionum, pater orphanorum, exaltator humilium, saluator contritorum, adiutor in necessitatibus, medicus, & multa id genus alia. In Exo. ca. 34. & Psal. 102. recitantur diserte illa epitheta Dei, misericors, clemens, & multæ miserationis seu beneficentiae. Item Exo. 15. Ego sum Deus medicus tuus. Et Psal. 9. Adiutor in opportunitatibus, in tribulatione. Ac iterum: Tibi derelictus est pauper, Orphano tu eris adiutor. Ac rursus Psal. 50. Sacrificium Deo spiritus contribulatus: cor contritum & humiliatum Deus non despicias. Et Psal. 101. Prospexit de excelso sancto suo, DOMINVS de cœlo in terram aspexit, vt audiret gemitus compeditorum, & solueret filios interemptioni destinatos. Et Esa. 57. Habituat cum contrito & humili spiritu, vt viuificet spiritum humilium, & viuificet cor contritorum. Quare
si vos

si volueris Deo offerre efficacem supplicationem, exponas ei tuam miseriam, tuas ærumnas, tuos morbos, calamitates, abiectiōem, oppressiōem, summam & extremam tuam necessitatem, ac admoneas eum firma fide, nominum & epithetorum eius, ut nō patiatur ea esse vana, & inania. Quid enim magis conuenit misericordi, quā ut subueniat miseræ? Et quod tempus adiutori in necessitatibus, ad ferendam opem aptius est, quā cum afflictus extremis periculorum necessitatibus comprehenditur?

Adhæc, nomen Dei est verax in promissis. Rom. 3. Deus est verax, omnis autem homo mendax. Et aliās: Deus fidelis est, seipsum negare non potest. Et Psalm. 117. Veritas DOMINI manet in æternum. Ac Psalm. 119. Principium verborum tuorum veritas, hoc est, tota summa tuarum promissionum constat veritate. Promisit autem Deus se remissurum peccata propter Christum filium suum, promisit se exaudieturum omnes inuocantes ipsum ex fide: Prope est DOMINVS inuocantibus eum, inuocantibus ipsum in veritate. Promisit se seruaturum Ecclesiam suam in medijs periculis: Cum transieris per aquam, *Esa. 43.* (inquit) tecum ero, & flumina non operient te. Cum ambulaueris in igne, non combureris, & flamma non ardebit in te, quia ego DOMINVS Deus tuus, sanctus Israel, saluator tuus. Admoneas igitur Deum in supplicatione tua veritatis promissionum suarū, nec dubites, quin sis consecuturus diuinam opem ac liberationem, etiamsi eam non statim corporali sensu percipias. Tali supplicatione conseruauit Moses Israelitas ab interitu: Recordare, inquit, Abra-

ham, Isaac, & Iacob seruatorum tuorum, quibus iurasti per te ipsum, dicens: Multiplicabo semen vestrum, &c. Non supplicat Moses Deo fiducia meriti Patriarcharum, ut imperiti interpretantur, sed fiducia veritatis promissionum, quas Deus ad Patriarchas dixerat. Tali supplicatione rex Iosaphat reportauit victoriam ab hostibus suis, Moabitibus & Ammonitis. Admonet enim Deus eius promissionis, quæ dicta erat in dedicatione templi, &c.

2. Paralip. 20.

Esa. 48.

Ezech. 20.

Præterea Deus vocatur vindex gloriæ nominis sui, videlicet, qui non patiatur, ut impij nomen ipsius impunè blasphemetur: Propter me, inquit, propter me faciam, ut nō blasphemetur. Et iterum: Feci propter nomen meum, ut non violaretur coram gentibus, ne gentes dicant, ubi est Deus eorum. Quare, cum vides impios applaudere sibi propter suam impietatem ac felicitatem, & propter Ecclesiæ Dei infelicitatem, ac audis eos nomen & doctrinam Dei conuictijs proscindere & contumelia afficere, proximum est, ut commemorares coram Deo in supplicatione tua blasphemias impiorum voces, & cōcipias certissimam spem, horribile impiorum supplicium in propinquo esse. Tali commemoratione vsus Moses pro populo suo, reuocauit Deum ab ira, ne populum deleret: Ut audiant, inquit, Ægyptij, de quorum medio eduxisti populum hunc, & habitatores terræ huius. Et mox: Ac dicant, Non poterat introducere populum, &c. Tali blasphemiarum cōmemoratione abegit Ezechias Saneheribum e terra Iude, & seruauit urbem Hierusalem.

Exod. 32.

Num. 14.

Deinde, Nomen Dei est Saluator, Et hoc est ingenium

nium Dei, vt etiam si affligat, tamen meditetur salutem: percutit enim vt sanet; mortificat vt viuificet: deducit ad inferos vt reducat. Cum igitur magnitudo afflictionum perturbat animum tuum, verte te supplicatione tua ad DOMINUM, ac primum quidem agnosce afflictiones non incidisse in te fortuito ac temerè, sed Deo volente & ordinante. Nam, cum sine voluntate eius, ne passer quidē in terram cadat, quomodo potuissent afflictiones absq; ipsius voluntate, in te, qui omnem passerum multitudinem excellis, cadere? Deinde agnosce in afflictionibus nomen Dei, quod est SALVATOR. Hoc enim nomen exponit naturam, ingenium & volūtatem Dei, videlicet, quòd Deus in omnibus aduersis, quæ immitit suæ Ecclesiæ, cogitet, non perditionem, sed liberationem, non interitum, sed salutem. Huc respicit Oseas, cum ait: Venite, reuertamur ad DOMINUM, quia ipse discerpfit, et sanabit, percussit, & curabit nos, viuificabit nos post duos dies, &c.

Sed quid multis opus est: si volueris vno tantum & altero verbo animum Dei tua supplicatione expugnare, & paucissimis omnia ea, quibus Deus ad adnuendum petitioni pertrahitur, comprehendere, propone ei suppliciter vnigenitum filium suum DOMINUM nostrum Iesum Christum, vt propter hunc te respiciat & saluet. In hunc enim vnum & solum, Deus omnem plenitudinem gratiæ, clementiæ, bonitatis, omnipotentæ, & maiestatis suæ effundit: in hoc vno & solo omnes Dei promissiones, omnia eius pacta & conuenta consistunt: Plenus, inquit Ioannes, gratia & veritate. Et; De plenitudine eius accipimus

accipimus omnes, gratiam pro gratia. Et iterum: Pater diligit filium, & omnia tradit in manum eius. Et

2. Cor. 1. Paulus: Quotquot sunt promissiones Dei, per ipsum sunt etiam, & per ipsum sunt Amen. Ac rursus:

Ephes. 1. Placuit ei recapitulare, (hoc est) summatim cōplecti, instaurare, & adimplere omnia per Christum, quę in cœlis sunt, & quę in terra. Quare, si vnum Iesum Christum supplicationi tuę adiunxeris, & Deum propter Iesum Christum inuocaueris, omnia quęcūq; vel de nomine Dei explicari, vel de voluntate & benevolentia Dei dici possunt, comprehendisti. Ac si quidem affligeris propter peccata, Christus peccata expiavit, & Deus propter Christum iustificat seu reputat iustum, cum, qui credit in Christum. Si autem affligeris non propter certum peccatum, sed propter confessionem nominis Dei & Euangelij eius, aut propter aliud genus iustitię, Christus est, qui confitetur nomen tuum coram Deo patre suo, & impetrat omnem salutem.

Porro, vt capita huius cœlestis supplicationis nobis sint in promptu, visum est ea breui tabella ob oculos ponere.

Omnipotens & clementissime Deus, pater DOMINI nostri Iesu Christi, precor te suppliciter, vt me in præsenti periculo clementer respicias ac tuearis, & fiduciam, quam erga te habeo, Spiritu sancto tuo augeas, ac omnia consilia & actiones meas gubernes. Nam,

Ego	{	Peccator, & ira	{	Tu aut	{	Propitijs, iustificas
sum						
						propter Christum.

Ego

Ego sum	Miser.	Tu aut es	Misericors.
	Afflictus.		Afflictorū respe
	Orphanus & des		Orphano: (tor,
	sertus ab omnib.		rum pater.
	Contrito corde.		Contritorū sana
	Ægrotus.		Medicus. (tor.
	Indignus tuis be		Verax & fides
	neficijs.		lis.
	Qui audio blas		Vindex gloriæ
	phemias noīs tui.		tuæ.
	A te ipso discer		Sanans, quos dis
	ptus.		scerpis.
	Extrema necessi		Adiutor in nes
	tate cōprehens.		cessitatibus.
	Periculo mortis		Viuificator &
	obrutus.		saluator.

Reliquum igitur est, quod opem tuam certo mihi
adfuturam confidenter & patienter expectem.

Pertinet & hoc ad cœlestem supplicationem, vt
recipias te pro beneficijs, quæ accepturus es, gratum
erga Deum fore, ac laudem nominis eius celebratus
rum. Hoc enim officiū præcipuè exigit DOMINVS
Deus noster pro beneficijs suis: Laudabo, inquit *Psal. 69.*
Psalmus, nomen Dei cum canticò, & magnificabo
eum in laude. Et placebit Deo super vitulum nouels
lum producentem cornua & vngulas. Et iterum: *Psal. 71.*
Multiplicasti magnificentiam tuam, & conuersus
consolatus es me. Nam & ego confitebor tibi in vas
sis Psalmi veritatem tuam Deus, psallam tibi in cis
thara, sanctus Iſrael.

P Quod

Esa. 65.

Quòd si ad hunc, quem exposuimus modum, supplicaueris Deo firma fide propter Iesum Christum filium eius, nihil amplius obstat, quò minus in te compleatur, quod DOMINVS in Esaia dicit: Erit antequam clament, ego exaudiam: adhuc loquentibus illis, ego audiam. Etsi enim exauditio videtur in longum reiſci, nec continuò fruimur, iuxta externum sensum, beneficiorum Dei, tamen veniens veniet, vt Propheta ait, & non tardabit: & vt maxime videatur Deus nos non exaudire iuxta carnis voluntatem, exaudit tamen nos iuxta voluntatem spiritus, & nostram vtilitatem. Ac si non contingunt nobis mundana & peritura beneficia, nihil certius est, quàm quòd reposita sint nobis cœlestia & æterna.

Quare prima omnium cura sit, vt siue propter iniustitiam, siue propter iustitiam affligimur, accedamus cum supplicatione nostra ad thronum gratiæ Dei, & iactemus firma fide & pijs precibus omnem sollicitudinem nostram in Deum, certissima spe cōcepta, quòd qui nos sibi per Christum filium suum charos fecerit, & quem nos salutis nostræ curatorem agnouerimus, declaraturus sit magna nominis sui gloria, se verè illum esse, qui dicitur: Seruator & redemptor noster.

Psalms:

Psalmus 45.

Eruſtavit cor meum verbum bonum, &c.Pistola ad Hebræos explicans *Heb. 1.*

maiestatem DOMINI nostri
Iesu Christi, & antefereſs eam
excellentię omnium angelorū,
recitat ex hoc Psalmo duos ver-
siculos. Ad angelos quidem
(inquiens) dicit: Qui creat an-

gelos suos spiritus: & ministros suos flammā ignis.
Ad filium autem: Thronus tuus, Deus in seculum
seculi: virga rectitudinis, virga regni tui. Dilexisti
iustitiam, & odisti iniquitatem, propterea vnxit te
Deus, Deus tuus oleo exultationis, vltra consortes
tuos. Hoc est præclarum & certum testimonium,
quod hic Psalmus nec de Dauide, nec de Salomone,
nec de alio quouam vel Patriarcha vel Monarcha,
sed tantum de vnigenito filio Dei, DOMINO nostro
Iesu Christo intelligendus sit. Est autem Epithalamis-
on, (hoc est) carmen nuptiale, in quo summis laudi-
bus effertur Christus tanquam sponsus, & admons-
tur Ecclesia tanquam sponsa, vt hunc sponsum, non
tantum amore suo complectatur, & propter ipsum
deserat patrem & matrem suam, (quod lex coniugij
exigit) verum etiam veneretur, colat & adoret ip-
sum, vt verum Deum, & vnicum ac perpetuum su-
um seruatoſem.

1. *Spirat cor meum iucundum carmen, recito ego operationes meas Regi, lingua mea calamus est expeditus scribe.*

Hic primus versiculus est propositio totius Psalmi, qua cantor exponit institutum suum. Suscipit enim decantandum epithalamion, seu carmen nuptiale, in gloriam & honorem noui sponsi, regis videlicet, Messiae seu Christi DOMINI nostri. In quo carmine laudat & commendat Christum ab eximia pulchritudine, & admiranda venustate, ab insigni eloquentia, ab heroica fortitudine, à maiestate tam personæ, quàm regni eius, à iustitia & æquitate, à magnificentia aulae, & gynæcei eius, breuiter, ab omni ferè id genus regio splendore, vt excitetur sponsa, quæ est Ecclesia, ad mutuum amorem, & ad verum eius cultum atq; adorationem: Eructat, inquit, cor meum (vt habet vulgata tralatio) verbum bonum, (hoc est) spirat animus meus rem bonam, seu carmen iucundum: Statui in animo meo decantare laudes Christi, & quod statui corde, hoc etiam ore profiteor, volo enim recitare operationes seu lucubrationes meas, quas in honorem regis Messiae meditatus sum. Nec simpliciter recitabo ore, verum etiam expoliam, seu vt Musici loqui solent, colorabo eas lingua mea, vt quemadmodum expeditus & exercitatus scribe solet scriptum suum venustis characteribus exornare, ita ego hoc carmen lingua mea excollam. Hæc est simplex & propria sententia huius propositionis, qua nihil aliud significatur, quàm quod cantor instituerit recitare seu decantare carmen encomiasticum,

comiaſticon, aut epithalamion in laudem Ieſu Chriſti
ſit D O M I N I noſtri, qui eſt verus & ſolus ſponſus, &
caput Eccleſiæ ſuæ, ac expoſuit ſemetipſum pro ea,
vt illam ſanctificaret, & adhiberet eam ſibi ipſi glori- *Ephes. 5.*
oſam, non habentem maculam aut rugam, aut quic-
quam eiſmodi, ſed vt eſſet ſancta & irreprehenſi-
bilis.

2. *Excellis pulchritudine filios hominum, effuſa eſt gratia
in labijs tuis, propterea quòd benedixerit te Deus
in æternum.*

Propoſitionẽ ſequitur expoſitio & *ἡρώδης* virtutũ
& maiestatis D O M I N I noſtri Ieſu Chriſti. Ac pri-
mum commendatur à pulchritudine & venuſtate,
qua omnes homines ſuperat: Excellis, inquit, pul-
chritudine filios hominum. Regem nõnihil cõmen-
dat formæ dignitas, ſponſum commendat corporis
venuſtas. Chriſtus autem rex & ſponſus, quem hic
Pſalmus prædicare inſtituit, etſi dubiũ nõ eſt, quin,
quod ad corporis conditionem attinet, honeſta fue-
rit forma præditus: in hoc autem verſiculo non fit
mentio de corporali eius forma, ſed de ſpiritali &
cœleſti. Chriſtus non eſt terrenus, ſeu rex ſeu ſpon-
ſus, ſed cœleſtis, cuius aliquo modo ſpecimen dedit
in monte, cum coram tribus ſuis diſcipulis transfor-
maretur. Quare, quod hęc de pulchritudine & venu-
ſtate dicitur, intelligendum eſt de cœleſti pulchritu-
dine: Chriſtus enim pulcherrimus eſt inter omnes
filios hominum, quòd non ſit tantum homo, ſed etiã
Deus, qua pulchritudine ſuperat omnes, tam homi-

nes, quàm angelos. Quid igitur venustate eius excellentius? Nam, quod apud Esaiam cap. 53. de Christo dicitur: Non est ei species, neque decor, non est intelligendum de cœlesti eius maiestate, qua ut Deus ab æterno splenduit, & ut homo ab initio cōceptionis, ex vnione, cum Deo, personali ornatus fuit: sed intelligendum est, de exinanitione sua, qua obediens fuit Deo patri vsq; ad mortem crucis, & qua, ceu gradu, ad illustrationē diuinę suę maiestatis conscendit.

Deinde commendatur ab eloquentia: Effusa, inquit, est gratia in labijs tuis, sermo tuus perfusus est omni gratia, verba tua constant summa eloquentia. Ac siquidem sermo fuerit de ciuili eloquentia, in qua apud Græcos Demosthenes, & apud Latinos Cicero principes habentur, non est obscurum, quòd Christus sicut nō fuit corpore Giganteo, sed mediocri, nec fuit externa pulchritudine ad prodigium vsque venusta, sed honesta, ita etiā fuit eloquentia mediocri, quantum ad peragendum suum ministerium in his terris satis erat. Quāquam enim potuisset eloquentia in sermone suo omnes huius seculi oratores superare, & plusquam angelica lingua loqui, tamē quia exinaniuerat semetipsum, forma serui sumpta, maluit loqui vsitato suę gentis more, quàm cœlesti maiestate.

Matth. 7. Testatur quidem Euangelista, quòd turbæ obstupuerint super doctrina eius, & docuerit velut habens auctoritatem, & non sicut Scribæ. Et apud Ioannem, ministri Pontificum ingenuē fatentur, nunquam sic locutum esse hominem, sicut hic homo: sed externus eius sermo, ut maximē superauerit elegan-

tia sua infusitatem Scribarum, tamen non respon-
 dit fortassis ex omni parte Rhetorum præceptis, nec
 enituit Oratorum flosculis. Quare, quod hîc dicitur:
 Diffusam esse gratiam in labijs Christi, intelligendum
 est propriè de ipsa Euangelij prædicatione, quæ etsi
 Iudæis est offendiculum, & Græcis stultitia, tamen ^{1. Cor. 1.}
 est potentia Dei, vt Paulus ait, ad salutem omni crea- ^{Rom. 1.}
 denti. Magna virtus est, fateor, eloquentiæ ciuilis,
 & habet in rebus humanis suam laudē & energiam.
 Prædicatio autem Euangelij, vt maximè est sermo
 ne horrido & inculto, organon tamen est Spiritus
 sancti, quo comparatur æterna iustitia & vita. Hæc
 est illa eloquentia, qua Christus filius Dei vsus est,
 non solum, cum ipse coram in his terris suo ministe-
 rio defungeretur, verum etiam cum ab initio orbis,
 per Patriarchas & Prophetas, ac post resurrectionē
 suam, per Apostolos in vniuersam terram emissos,
 Ecclesiam suam colligeret, iustificaret, & æterna fe-
 licitate seruaret. De qua etiam Esaias concionatus ^{Esa. 50.}
 est, apud quem Christus ita dicit: DOMINVS dedit
 mihi linguam eruditam, vt sciam sustentare eum, qui
 lassus est verbo. Et iterum: Spiritus DOMINI super ^{Esa. 60.}
 me, eò quod vnxit me. Ad prædicandum Euan-
 gelion afflicti misit me, vt mederer contritis corde,
 & prædicarem captiuis indulgentiam, & clausis as-
 pertionem. Ac breuiter: Euangelion Christi elo-
 quentia illa est, qua peccatores ad iustitiam tradus-
 cuntur, afflicti consolatione exhilarantur, mortui ad
 vitam reuocantur, & coniecti in dolores inferni eri-
 piuntur, ac in cælo collocantur. Adhibeamus igitur
 summū in hac eloquentia audienda & cognoscenda
 studium,

studium, vt fructum eius, qui est æterna iustitia & vita, percipiamus.

Sed vnde, inquires, Christo tanta venustas & eloquentia? Sequitur: Propterea quòd benedixerit te Deus in æternum. Christus ornatus est insigni præ omnibus hominibus, & miranda pulchritudine ac eloquentia, quia Deus benedixit eum in æternum. Nam si diuinitatem eius consideraueris, sicut natus est ab æterno à Deo patre, ita etiam possidet ab æterno omnem benedictionem, imò æterna ipsa est benedictio, quòd eiusdem sit cum Deo patre suo essentia. Si autem consideraueris eum secundum humanitatem, quam in plenitudine temporis, in eandem personam ex Maria virgine assumpsit, negari non potest, quin quam benedictionem possedit ab æterno, à Deo patre suo, eam etiam effuderit personaliter in suam humanitatem, vt nullum sit genus benedictionis, quod filius Dei non habeat cum sua humanitate commune. Quare, cum inter genera cœlestis benedictionis, venustas & eloquentia suum habeant locum, non est mirandum, quòd effusa sint diuinitus in Christum præ omnibus alijs, siue angelis, siue hominibus, opulente & sine vlla mensura. Porro autem, quemadmodum filius Dei nō sibi tantum, verum etiam nobis homo factus est, ita & non sibi tantum benedictus, hoc est, venustus & eloquens est, sed etiam nobis: de plenitudine enim eius accipimus nos omnes. Quare, si crediderimus in eum, ornatur & nos tanta venustate, vt condonatis peccatis, habeamur in cōspectu Dei, propter Christum, iusti, & donemur cœlesti felicitate: Qui enim pro-

prio

prio filio non pepercit, inquit Paulus, sed pro nobis *Rom. 8.* omnibus tradidit illum, quæ fieri posset, ut nō & cum eodem omnia nobis donaret. Quod de venustate dictum est, idem dicendum erit de eloquentia. Si enim credimus in Christum, tantum eloquentiæ donum nobis contingit, ut etiam si coram hominibus simus vel infantes, vel elingues, tamen simus coram Deo tam facundi oratores, ut quicquid à Deo propter *Ioan. 15.* Christum petierimus, impetremus. Si manseritis (inquit) in me, & verba mea in vobis manserint, quicquid volueritis, petetis, & fiet vobis. Ac iterum: Amen amen dico vobis, quæcunq; petieritis patrem *Ioan. 16.* in nomine meo, dabit vobis.

3. *Accinge gladium tuum ad latus, ô heros, Hac est laus tua & magnificentia tua.*
4. *In hac tua magnificentia feliciter promoue & progredere, ut adnuncietur veritas, & ut contingat afflictis iustitia, ac dextera tua conficiat miranda.*
5. *Sagittæ tuæ acutæ, populi sub te cadent in medio inimicorum regis.*

Mutatio personæ:
In medio inimicorum regis, hoc est, in medio inimicorum tui Christi.

Alia commendatio Christi ab heroica eius fortitudine. Vocatur enim Christus hoc loco, & Esa. 9. גִּבּוֹר Gibbor, quem Græci vocant ἥρωα heroem, qui non sit simpliciter corpore robustus, sed tanta animi magnitudine præditus, ut nihil extimescat, nec ternereri possit, quò minus omnibus oppressis & iniuriis am patientibus opem ferat, & ab omnibus, quos aggredditur, hostibus, insignem victoriâ reportet. Hortsatur ergo Psalter hunc herocem, ut pro excellentiss

Q ma

ma sua fortitudine expergiscatur, accingat gladium lateri suo, & capiat arma. Hæc enim est heroica laus & magnificentia, non vt domi ociosus stertat, sed vt armis suis ciues ab alienis iniurijs tueatur, & hostes aut depellat, aut opprimat, quod alijs dicitur: Parcere subiectis, & debellare superbos. Nos igitur non optamus tantum, sed etiam certo speramus, vt hac tua magnificentia & heroica fortitudine feliciter promoueas, & efficias, vt veritas Euangelij tui, inuisit omnibus etiam inferorum portis, prosperum habeat successum, & omnes afflictis ac oppressis consequantur iustitiam, quam hactenus esurierunt & sistierunt. Ea enim est magnitudo animi tui, vt non dubitemus, quin dextera & potentia tua confecturus sis stratagemata miranda & stupenda. Id etiam est acumen sagittarum tuarum, vt quoscunq; populos ijs attigeris, accidant tibi, etiam in medio inimicorum tuorum exercitu, ad genua, & dedant sese totos tuæ voluntati ac potestati.

Quod ergo Psalmus his versiculis de heroicis stratagematis Christi futurum vaticinatur, hoc Christus re ipsa ita perfecit, vt eo in toto orbe terrarum nihil sit decantatius. Non iam loquor de insignibus illis miraculis, quibus mundauit leprosos, cæcis reddidit visum, paralyticos & claudos restituit sanitati, ac deoq; excitauit mortuos, quæ & ipsa tã heroica sunt stratagemata, vt nullus vnquam fuerit vel Patriarcha vel Monarcha, qui huiusmodi miranda opera peregerit: sed loquor de officio & ministerio eius, propter quod de cœlo in terram missus, (hoc est) homo factus est. Primum enim suscepit excelsis & inuicto

uicto animo bellum, non carnale, pro more regum huius terræ, sed spirituale, contra peccatum, mortem & satanam. Et si enim terreni hostes sua possunt corporibus & facultatibus terrenis incommoda afferre, tamen hæc non sunt tanti momenti, vt extremam inferant calamitatem: & possunt in his terris aliquo modo compensari. quæ autem incommoda afferunt non vni tantum, & alteri seu homini seu regioni, verum etiam vniuerso humano generi peccatum, mors & satan, ea longè omnium maxima sunt, & perpetuò durant. Quare Christus suscepit cum his spiritualibus & perniciosissimis hostibus bellum, imò monomachiam, ac reportauit insignem victoriam. Tradidit enim sese ex voluntate patris sui omni generi ærurnarum, vsq; ad probrosissimam crucem, qua obedientia peccatum humani generis ita expiauit, vt nulli amplius, qui in Christum crediderit, à Deo patre cœlesti imputetur. Suscepit etiam cum morte pugnandum, sed eam tam heroicè deuicit, vt non solum ipse tyrannidem eius euaserit, verum etiam abstulerit ei omne ius opprimendi illos, qui in ipsum credunt: Ego sum, inquit, resurrectio & vita, qui credit in me, etiamsi mortuus fuerit, uiuet. Et: Omnis, qui uiuit & credit in me, non morietur in æternum. Satanam quoq; summum humani generis hostem ita expugnauit, vt etiamsi adhuc circumeat sicut leo rugiens, quærens quem deuoret, tamen ademptæ sint ipsi omnes vires nocendi ijs, qui fide sua in Christo constant: Nunc, inquit, princeps huius mundi eijcietur foras. Et iterum: Princeps huius mundi iam iudicatus est, Habes heroicum bel-

Ioan. 12.

lum & victoriam Christi aduersus peccatum, mortem & infernum.

Deinde, non solum reportauit ex his hostibus insignem victoriam, verum etiam ablegauit, misso Spiritu sancto, Apostolos suos in vniuersum orbem, qui hanc victoriam omnibus gentibus adnuntiarent, & Ecclesiam suam ex omni natione, quæ sub coelo est, colligerent. Etsi autem restiterunt Apostolis & Euangelio eorum, tam Iudæi, quàm Gentes, tam Reges, quàm Principes, tam docti, quàm indocti, tamen tanta est maiestas Christi, vt dominetur in medio inimicorum suorum, & tam acutas habeat sagittas, (quæ sunt Euangelion, quod est potentia Dei ad salutem omni credenti) vt quemcunq; populū n̄s tetigerit, statim in genua sua procumbat, & manus ei tradat, idq; in medio hostium. Tanta enim est potentia eius, vt etiamsi tyranni fremant, & totis viribus resistant, tamen necesse habeant populum, quem sagittæ Christi tetigerint, liberū dimittere, vt Christo seruiant, & nomen eius celebrent. Hoc testatur Iudaicum regnum, in quo, cum nec Christo ipsi, qui occidebatur, nec Apostolis locus dabatur Euangelij liberè adnunciandi, vastatum est per Romanos, vt deinceps liceret, quod quidem in Iudæis iam oppressis erat, Ecclesiam per Euangelion colligere. Cum enim Iudæi suscepissent cursum Euangelij impediendum, sublata est e medio omnis potentia eorum, vt vellet, nollent, prædicatio Euangelij promoueret. Hoc idem testatur Imperium Romanū, in quo tam incolæ ipsi, quàm Monarchæ eorū, summa inmanitate restiterunt, ne quisquam nomē suum Christo Domino daret

daret: & maluerunt innumeros martyres crudeliter
 discerpere, quàm liberum locum Christo & Eccle-
 siæ eius concedere. Sed heros noster Iesus Christus,
 qui sedet ad dextram Dei patris sui, potentiam suam
 ita exeruit, vt extinctis tyrannis, & abolit is idolis,
 quæ tuebantur, hospitium Ecclesiæ suæ inter Gentes
 constituerit. Stat enim sententia per Esaïam, de Ec- *Esa. 60.*
 clesia Christi prolata: Gens & regnum, quod non
 seruiert tibi, peribit, & Gentes (quæ te oppugnant)
 solitudine vastabuntur. Habes igitur in his tribus ver-
 siculis heroicam Christi fortitudinem, & insignem
 eius victoriam, quæ idcirco nobis decantatur, vt in
 omnibus periculis, siue publicis siue priuatis, bene
 speremus, & confisi heroë nostro, certissimam salus-
 tem expectemus.

6. *Thronus tuus, ô Deus, semper & perpetuo (constat,) Sce-
 ptrum rectum, sceptrum regni tui.*

Quem antè vocauit Gibbor, hoc est, Heroem, eū
 nunc vocat Elohim; (hoc est) Deum. Et hic est vnus
 ex illis versiculis, quos Epistola ad Hebræos allegat,
 vt probet Christum non simpliciter excellere ange-
 los, verum etiam esse verum Deū. Etsi enim hic sex-
 tus huius Psalmi versiculus vtitur vocabulo Elohim, *Exod. 7.*
 quod & Iudicibus ac Magistratibus, imò etiam om- *Exod. 22.*
 nibus pijs hominibus tribui solet: Ego dixi, inquit *Psal. 82.*
 Psalmus, dij estis, tamen in reliquis versiculis, quos
 Epistola ad Hebræos è Psalmo 102. recitat, tribuitur
 Christo disertè nomen יהוה Iehoua, quod vocant Tes-
 tragrammaton, & soli vero ac æterno Deo cōuenit.

Sciamus igitur Christum predicari in hoc versiculo, & commendari nobis, vt verum ab æterno Deum, qui in plenitudine temporis, assumpta in vnitatem personæ, humanitate, perpetuò regnet in cœlo & in terra, verus Deus, & verus homo: Thronus tuus, inquit, ô Deus, semper & perpetuò constât, sceptrum rectum, sceptrum regni tui. Thronus, regia sedes est; & significat regnum ipsum Christi. Neq; enim somnium est, Christum sedere in corporali quodam tribunali, & in vno loco, è quo det iura gentibus, iuxta morem terrenorum Regum, sed thronus eius est cœlum & terra, & dominatio ac gubernatio omnium creaturarum, siue cœlestium siue terrestrium, siue infernarum. Dedit enim Deus Christo filio suo nomen, quod est super omne nomen, vt in nomine eius omne genu se flectat. Et hæc dominatio non est vel annua tantum, qualis fuit Consulû Romanorum, vel iuxta hominis tantum ætatem diuturna, qualis est terrenorum Monarcharum, sed durat in omnem æternitatem. Ad Dauidem enim de Christo dicitur: Stabiliam thronum regni eius vsq; in sempiternum. Ego ero ei in patrem, & ipse erit mihi in filium. Et apud Esaiam: Super solium Dauid, & super regnum eius sedebit, vt confirmet illud, & corroboret in iudicio & iustitia à modo, & vsq; in sempiternum. Et Gabriel apud Lucam: Dabit illi DOMINVS Deus sedem Dauid patris sui, regnabitq; super domum Iacob in æternum, & regni eius non erit finis. Ac ne quis intelligeret has promissiones de externa aliqua sede, & de corporali ac mundano in his terris regno, exponit Christus ipse in cœlum ascēsurus: Data est, inquiens,

2. Samu. 7.

Esa. 9.

Luc. 1.

Matth. 28.

Inquiens, mihi OMNIS potestas, in cœlo & in terra.
 Et Paulus: Fecit eum sedere ad dexteram suam in *Ephes. 1.*
 cœlestibus, super omnem principatū ac potestatem,
 & virtutem, & dominium, & omne nomen, quod no-
 minatur, non solum in seculo hoc, verum etiam in
 futuro, & omnia subiecit sub pedes illius. Quod igitur
 de maiestate Christi aliās copiosè explicatū ex-
 tat, hoc paucis in illo versiculo: Thronus tuus, Deus,
 semper & perpetuò constat, comprehenditur, Cæ-
 terum, cum reges huius terræ soleant sceptrā, quæ
 sunt insignia regni, gestare, quod est ergo sceptrum
 illud, quo Christus regit & gubernat cœleste suum
 regnum? Sceptrum rectum, inquit Psalmus, sceptrū
 regni tui. Aliorum regum sceptrā, quibus populum
 suum dirigunt, solent aliquoties esse praua, curua &
 distorta, quia multæ sunt leges (quæ per sceptrā si-
 gnificantur) in regnis & politicis huius seculi, quæ
 si diligenter expenduntur, à natura & æquitate re-
 cedunt: aliquoties, etiam si leges fuerint optimæ, ta-
 men homines sunt tam distorti, vt his non queant in
 officio contineri. Sceptrum autem, quo Christus su-
 um regnum gubernat, est rectissimum & æquissimū:
 quæ enim sunt distorta, reddit plana, quæ sunt pra-
 ua, efficit recta, quæ sunt incurua, reddit æqua. Scia-
 mus igitur quod sit sceptrum illud, vt & nos ipsos, sic
 satis distortos, ei formādos tradamus. In alio Psalmo *Psalm. 110.*
 dicitur: Virgam seu sceptrum virtutis tuæ emittet
 DOMINVS ex Zion, dominare in medio inimicorū
 tuorum. Emisit autem DOMINVS ex Zion Evans-
 gelion suum, cum misso Spiritu sancto in vrbe Hie-
 rusalem, ablegauit Apostolos suos in vniuersum or-
 bem

hem terræ , vt prædicarent Euangelion suum omni creaturæ. Quare prædicatio Euangelij de Iesu Christo, est sceptrum illud rectum & æquum , quo Christus regnum suum in his terris in medio inimicorum suorum gubernat & cōseruat. Nam qui peccati prauitate distortus est, audiat Euāgelion Christi de expiatione peccati, & adhibeat ei fidem, tunc cōsequetur veram in Christo iustitiam, quæ est cœlestis reſtitutio. Qui affligitur aduersis, & his ita incuruatur, vt metuat , ne in mortem præcipitetur, arripiat hoc sceptrum, & nitatur eo , tunc fieri non potest, vt opprimatur & pereat. Qui metu mortis ita tenetur, vt non aliud spectet , quàm ad æternum interitum , attingat hoc sceptrum fide, & eripietur è medijs faucibus mortis & inferni, atq; collocabitur in cœlesti vita & regno . In historiola Esther , extat edictum regium in Persia , quòd quisquis , siue vir, siue mulier, non vocatus, intrauerit interius atrum Regis, statim interficiatur , nisi fortè rex auream virgam seu sceptrum ad eum tetenderit, pro signo clementiæ , atq; ita possit viuere . Hoc Persico sceptro admonemur de sceptro regni Christi, seu de prædicatione Euangelij , quòd necesse habeant omnes homines in vniverso orbe terrarum perire , si intrauerint cum Deo in iudicium , & non arripuerint sceptrum Euangelij fide sua, vt in vita conseruentur . Non pudeat igitur nos Euangelij Christi, quod etsi Iudæis est offendiculum, & Græcis stultitia, tamen vocatis & credentibus sit potentia & sapientia Dei, qua ad æternam iustitiam & beatitudinem conseruantur.

Esth. 4.

1. Cor. 1.

7. *Diligis iustitiam, & odio habes iniquitatem, propterea quod vnxit te Deus, Deus tuus oleo latitiæ, plusquam consortes tuos.*

Sicut paulò antè commendauit Christum ab æternitate regni sui, & à rectitudine sceptri eius, ita nunc commendat eum ab amore iustitiæ, & odio iniquitatis. Officium enim Regum est facere iustitiam & iudicium, (hoc est) tanto zelo iustitiæ ardere, & tanto odio iniquitatem prosequi, vt non solum ipsi iusta faciant, & iniquitatem fugiant, verumetiam iustos & innocentes fortiter defendant, iniquos aut, & iustorum oppressores seueriter coërceant: Reges (inquit Petrus) & præsidēs mittuntur, ad vindictam *Hier. 22.*
1. Pet. 2. quidem nocentium, ad laudem verò rectè agentium. Nullus autem vnquam Rex in terris fuit, qui maiori zelo iustitiæ faciendæ & tuendæ inflammatus fuerit, & vehementiori odio iniquitatē persecutus sit, quàm Christus DOMINVS noster. Vniuersam enim legem, tam de dilectione Dei, quàm de dilectione proximi ita impleuit, vt non solum ipse nihil mali fecerit, verumetiā alios ex omnibus malis, siue illis culpæ, vt vocant, siue pœnæ, eripiat: Prædicate (inquit) Euangelion omni creaturæ: qui crediderit & baptisatus fuerit, saluus erit: qui verò non crediderit, cōdemnabitur. Nam, cum suscepisset opẽ humano generi ferendam, primùm omnium expiauit suo ipsius sanguine peccatum, vt quotquot credunt in ipsum, habeant remissionem peccati coram Deo patre suo, & constent coram tribunali eius iustitia Christi.

R Deinde

Deinde vicit afflictionibus & morte sua omnes afflictiones & mortem, vt quotquot in ipsum credunt, euadant illæsi & inuiolati, ad æternam vitam & felicitatem. Hoc verè est populum suum tueri, & ex omnibus malis eripere ac seruare, (hoc est) diligere iustitiam, odisse iniquitatem, & verum regis officium facere.

Sed vnde tanta virtus, tanta animi fortitudo huic regi Christo? Additur: Quia vnxit te Deus, Deus tuus oleo lætitiæ, plusquam consortes tuos. Hæc est insignis descriptio personæ & maiestatis Christi, ac obseruabile testimoniū trium personarū in vna Deitate. Nam, quemadmodū in Gene. cap. 19. cum dicitur: DOMINVS pluit super Zodomam & Gomorram sulphur & ignem, à DOMINO de cœlo, intelligitur Deus filius pluuisse à Deo patre: & in Deut. cap. 6. cum dicitur: Audi Israel, DOMINVS Deus vester, Deus vnus, ter recitatur vocabulum Domini seu Dei, vt significetur tres esse personas in vna Diuinitate, patrem, filium & Spiritum sanctum, sicut Christus ipse in Baptismo (quem & ipse accepit & postea in Ecclesia vtendum commendauit) manifestè exponit, & tamen non esse nisi vnā diuinitatis essentiam: ita & in hoc Psalmi versiculo tres vnus diuinitatis personæ denotantur. Primum dicitur: Vnxit te DEVS. Hoc nomine denotatur Deus pater, quæ persona, etsi non assumpsit hominem, nec est incarnata, tamen cooperata est vnā cum Spiritu sancto in incarnatione filij. Deinde additur: Deus TVVS. Hæc est persona filij: Deus, inquit, TVVS, videlicet, illa in diuinitate persona, quæ te hominē in suæ personæ vnā

nã vnitatem assumpsit. Non enim alia persona in di-
 uinitate assumpsit humanitatem, nisi filius ab æterno
 à Deo patre suo genitus. Adhæc, subiicitur: Oleo
 lætitiæ. Hoc oleo denotatur Spiritus sanctus. Oleū
 enim seu Balsamum, quo quondam vngebantur Re-
 ges & Sacerdotes, Spiritus sancti symbolon est. Spi-
 ritus DOMINI, inquit Christus ipse apud Esaiam, *Esa. 61.*
 super me, eò quòd VNXERIT me. Et Petrus: Ipsi *Luc. 4.*
 nostis, vt Iesum Nazarenum VNXERIT Deus Spi- *Acto. 10.*
 ritu sancto & virtute. Ac Ioannes: Vnctio, (hoc est *1. Ioan. 2.*
 Spiritus sanctus) quam vos accepistis ab eo, manet
 in vobis. Et non necesse habetis, vt quisquam doceat
 vos, sed sicut ipsa VNCTIO docet vos de omnibus.
 Vocatur autem Spiritus sanctus oleū lætitiæ, quòd,
 quemadmodum ex omnibus animantibus homines
 miram ex odoribus, quos Balsamum spirat, voluptas-
 tem capiunt, vnde & Psalmus 104. ait: Exhilarat fa-
 ciem olis: ita Spiritus sanctus exhilaret corda cre-
 dentium, & confirmet, vt ne in media quidem morte
 animum despondeant. Postremò additur: Plusquam
 consortes tuos. Nomine autem consortium seu so-
 ciorū, intelliguntur alij homines, ac imprimis Apo-
 stoli, quos Christus ipse vocat fratres suos: Narrabo *Psal. 22.*
 (inquit) nomen tuum fratribus meis: & Vade ad fra- *Ioan. 20.*
 tres meos. In incarnatione enim Christi, (sic enim *Heb. 2.*
 visum est maioribus nostris, ex illo Ioannis dicto:
 Verbum caro factum est, loqui) assumens in vtero
 virginis hominem, in personæ suæ vnitatē, ita eum
 sibi vniuit, vt & collocauerit eum secum ad dexte-
 ram Dei patris sui, & effuderit in ipsum plenitudinē
 Spiritus sui plusquam in omnes fratres & collegas

suos, siue illos Apostolos, siue Prophetas & Patriarchas, siue alios in ipsum credētes. Et si enim hi quoque facti sunt participes Spiritus sancti, & acceperunt multa ac varia eius dona, fruuntur etiam maiestate eius, tamen non sunt propriē collocati ad dextram Dei patris, nec acceperunt omnia Spiritus dona, sed tantum per partes. Et si quando ex illo Pauli loco: *Eph. 2.* Simul cum eo resuscitauit nos, & simul cum eo sedere fecit inter cœlestes, in Christo Iesu, dicitur etiam credentes in Christum sedere cum ipso ad dextram Dei patris, non est intelligendum, quod sint assumpti à filio Dei in vnitatem personæ, & sint natura filij Dei, in omni simpliciter maiestate Dei collocati, sicut Christus ipse: sed quod fruantur quidem pro suo modo sessione Christi ad dexteram Dei, & maiestate ac felicitate eius: solus autem Christus sedeat propriē ad dextram Dei patris sui, & sit perfructus omnibus donis Spiritus: Requiescet, inquit, super eum Spiritus DOMINI, Spiritus sapientiæ et intellectus, Spiritus consilij & fortitudinis, Spiritus scientiæ & pietatis, & replebit eum Spiritus timoris DOMINI, hæc est omnis plenitudo Spiritus. Et apud *Ioan. 3.* Ioannem: Nō dat Deus (Christo) Spiritum ad mensuram. Ac Paulus: In ipso, inquit, sunt omnes thesauri sapientiæ ac scientiæ reconditi. Et iterum: In illo inhabitat omnis plenitudo deitatis corporaliter. Vides nunc quantus sit Christus, & quanta sit maiestas eius. Vides etiam, vnde tantam habeat iustitiam & potentiam, quod & iustificet populum suum, qui sunt credentes in ipsum, & tueatur ac eripiat eos à morte & doloribus inferni in cœlestem & æternam vitam.

vitam. Non enim tantum est homo, qualis apparet in oculis hominum, sed etiam assumptus est à filio Dei in unitatem personæ suæ, non quidem ut detraheret diuinitatem in suam humilitatem & deiectionem, sed ut ipse à filio Dei in summam celsitudinem & maiestatem eueheretur, ac in æquali cum ipso dominatione in cœlo & in terra collocaretur, utq; tale habeat nomen, in quo solo oporteat nos saluos fieri, *Act. 4.* & omne genu se flectat, cœlestium, terrestrium ac infernorum. *Philip. 2.* Quare amplectamur eum fide, ut etiam maiestatis & æternæ salutis eius participes fiamus.

8. *Mirrham, Aloen, & Casiam (spirant) omnia vifimenta tua, è domibus eburneis (prolata,) vnde lætificant te.*

Myrrham & Aloen in numero Aromaticarum & odoriferarum specierum haberi, Scriptura sacra passim testificatur. Exo. 30. Sume tibi aromata præcipua Myrrhæ electæ quingentos siclos. Prouer. 7. Asperfi cubile meum Myrrha & Aloe, & Cynamomo. Cant. 3. Quæ est ista, quæ ascendit per desertum, sicut virgula fumi, ex aromatibus Myrrhæ & Aloes. Et cap. 4. Myrrha & Aloe cum omnibus præcipuis aromatibus. Affert & Nicodemus apud Ioannem cap. 19. mixturam Myrrhæ & Aloes, qua Christus in cruce mortuus, sepulchro, siue odoramenti, siue diu conseruandi corporis gratia conderetur. Kesium autem, quam nostri transtulerunt Casiam, alij interpretantur pro flexuris seu angulis, maior verò pars pro genere aromatū, quod & ipsum suauem odorem spiret: sed quale sit genus, non explicant. Nam as-

R. 3 firmant

firmant aliud esse ab eo, quod vulgò vocant, Cassiam fistulam. Vtunque verò hoc se habet, certè quæ hîc recensentur aromatum species, vtilis sunt ad vestes tam conseruandas, quàm odoratas reddendas. Quare, sicut Psalmus antea commendauit sponsum & regem Christum à maiestate regni sui, & à iustitia eius, ita nunc cōmendat eum à sua uolentia regionum suorum vestimentorum: Omnia, inquit, vestimenta tua, quibus indutus es, & quæ proferri solent in vsum tuum, non è ligneis & vilibus receptaculis, sed ex eburneis & pretiosissimis repositorijs, (hec enim dicuntur domus seu palatia vestimentorum) non aliud spirant & redolent, quàm Myrrham, Aloen & Cassiam, (hoc est) suauissimum odorem, vnde tu ipse summam capis voluptatem. Sed quæ sunt illa tam odorata vestimenta, quibus Christus indutus fuit, & quæ tam suauem odorem exhalauerunt, vt & ipse ihs fuerit delectatus? Testantur quidem Euangelistæ, quòd in transfiguratione Christi in monte, vestimēta eius tam splendida, refulgentia & candida fuerint, quàm nullus fullo in hac terra facere queat: sed de hoc vestitū Christi splendore non fit hîc sermo, quippe quòd apparuerit paucis tantum discipulis, & fuerit ad paucum tantum temporis assumptus. Fit & aliàs apud Ioannem mentio tunicæ Christi, quæ erat inconsutilis, à summo contexta per totum: tangit etiam mulier hæmorrhousa simbriam vestimenti eius, & consecuta est sanitatem. Sed hæc non effecerunt, vt vestimentū Christi redoleret externa aromata & thymiamata. Quid igitur est, quòd hic Psalmus de odoratis vestimentis Christi loquitur? Hac vestimentorum

Matth. 17.

Mar. 9.

Ioan. 19.

Matth. 9.

rum & odoris eorum metaphora, Spiritus sanctus describit iucundissimam illam famam, quam Christus ipse prædicatione Euangelij sui, & Apostoli eius, non tantum in Iudæa, verumetiam in toto orbe terrarum ita sparserunt, ut odore huius Euangelij excitati fuerint tam Iudæi, quam Gentes in vniuerso mundo, & secuti sint suaueolentiam eius, ex qua etiam, sicut Christus ipse maxima voluptate affectus est, ita, quotquot crediderunt coelesti lætitia, perfusi sunt. Apud Lucam, cum septuaginta discipuli reuer- Luc. 10. si essent à sua legatione, & cum gaudio narrarent, etiam demonia subiici ipsis, per nomen Christi, exultauit Spiritu, & dixit: Confiteor tibi pater, quod abscondisti hæc à sapientibus & prudentibus, & reuelasti ea paruulis, etiam pater, quoniam sic complacitum est coram te. Habes gaudiū & lætitiā Christi è felici successu Euangelij sui, (hoc est) ex odore vestimentorum suorum. Paulus autem ad Corinthi- 2. Cor. 2. os scribens: Deo gratia, inquit, qui semper triumphat per nos in Christo, & odorem notitiæ suæ manifestat per nos in omni loco. Quoniam Christi bona fragrantia sumus Deo, in his, qui salui fiunt, & in his qui pereunt, his quidem odor mortis ad mortem, illis vero odor vitæ ad vitam. Habes lætitiā Ecclesiæ in toto orbe terrarum, quam cōcipit ex odore vestimentorum Christi, (hoc est) e suaueolentia Euangelij de Christo per fidem. Nam, quemadmodū sol excæcat quidem splendore suo oculos imbecilles, propter nimiam lucem, quam hi non possunt ferre, natura autem sua illustrat sanos & claros oculos, ita excellentia odoris Euangelij infert quidem impijs mor-
tem

tem propter incredulitatem ipsorū, viuificat autem & latificat omnes credentes æterna felicitate, vt quacuncq; Christus & Apostoli eius cum Euangelio incedunt, tam fragrantem & suauem spargant odorem, vt quotquot olfecerint, teneri non queant, quin ad sequendum eum excitentur & recreentur. Quod autem Psalmus de odore vestimentorum Christi, seu de suaueolentia Euangelij eius dicit, hoc Christus ipse parabola de thesauro in agro abscondito, & de inuenta margarita preciosissima explicat: *Matth. 13.* Simile est, inquit, regnum cœlorum, hoc est, prædicatio Euangelij Christi, thesauro abscondito in agro, quem respertum homo abscondit, & præ gaudio abit, & vendit omnia quęcuncq; habet, & mercatur agrum illum. Et rursum: Simile est regnum cœlorū homini negotiatori, quęrenti pulchras margaritas, qui cum inuenisset vnā preciosā margaritā, abiens, vendit omnia quę possidebat, & mercatus est illam. Nihil igitur prius nobis faciendum putemus, quā vt odorem, thesaurū & margaritā Euangelij de Christo sectemur, quod sit potentia Dei, ad salutem omni credenti.

9. *Filiæ regum sunt in gynæceo tuo, astat vxor ad dexteram tuam in auro Ophir.*

Habent Reges huius terre sua gynæcea, & excellentissimas puellas, non è vulgo & sordidis familijs, sed è filiabus Regum & Principū selectas, quę sunt Reginarū indiuiduę comites & pedissequę, & quę, cū Regina assistit ad dexteram Regis sui, in auro Ophir,

Ophir, (hoc est, vel in vestitu deaurato, vel in diademate auro, ex optimo auro, quod aduectū est ex Ophir, quam alij Indiam, alij Aphricam interpretantur, ex quo etiam loco Salomon curauit aduehi aurum, in priori libro Paralip. cap. 29. & Iosaphat, in 3. Regum. cap. 22.) assunt & ipsæ, apparatu visendo & plane regio, eorū magnificentissimo. Commendatur igitur hoc versiculo aula regis nostri Christi à magnificentia & splendore gynæcei eius. Regina enim astat regi suo decentissimè ornata, quæ comitantur & circumdant nobilissimæ & excultissimæ puellæ, quas non vulgarium hominum, sed Regum filias dixeris. Manifestum autem est, regnum DOMINI nostri Iesu Christi non esse mundanum, nec habuisse eum vnquam in his terris tale externū gynæceum, quale litera Psalmi hâc describere videtur: sed qualis est rex, tale etiam habet gynæceum. Quare, cum sit rex spiritalis & cœlestis, habet etiā spirituale & cœleste gynæceum. Itaq; Regina, (seu sponsam, seu vxorem dixeris) est Ecclesia, de qua Christus ipse apud Oseam dicit: Sponsabo te mihi *Ose. 2.* in sempiternum, & sponsabo te mihi in iustitia & iudicio, & in misericordia, & miserationibus, & sponsabo te mihi in fide, & scies, quia ego DOMINVS. Et Ioannes Baptista: Qui habet sponsam, sponsus *Ioan. 3.* est, loquitur autem de Christo & Ecclesia eius. Et Paulus: Adiunxi, inquit, vos vni viro, vt virginem *2. Cor. 11.* castam exhiberetis Christo. Ac iterum: Vir est caput *Ephes. 5.* put vxoris, quemadmodum & Christus est caput Ecclesiæ, & idem est, qui salutem dat corpori: sed quemadmodum Ecclesia subdita est Christo, sic &

Ephes. 5.

vxores suis viris subditæ sint in omnibus: Viri diligite vxores vestras, sicut Christus dilexit Ecclesiam, & semetipsum exposuit pro ea, vt illam sanctificaret. Filiaæ autem Regum, (hoc est) comites & pedisequæ Regine, sunt, quotquot credunt in Christum, & sunt membra corporis eius, per fidem: Membra sumus, inquit Paulus, corporis eiusdem, ex carne eius, & ex ossibus eius. Sed quis est huius Reginæ & filiarum eius ornatus? An non Ecclesia Christi constat ex peccatoribus, qui sunt in conspectu Dei turpissimi? An non vnus è præcipuis & sanctissimis filijs eius clamat: Non intres in iudicium cum seruo tuo, quia non iustificatur in conspectu Dei omnis viuens? Quanta hæc est foeditas & deformitas? De hac re docet nos Paulus: Christus, inquit, dilexit Ecclesiam, & semetipsum exposuit pro ea, vt illam sanctificaret, mundans lauacro aquæ in verbo, vt adhiberet eam sibi ipsi gloriofam, Ecclesiam non habentem maculam aut rugam, aut quicquam eiusmodi, sed vt esset sancta & irreprehensibilis. Ecclesia enim Christi, siquidem consideretur iuxta carnem suam, in semetipsa, negari non potest, quin sit propter sordes peccati, quæ adhuc ipsi inhaerent, turpior & foedior, quàm quæ possit sese oculis Dei spectandam obtrudere. Quis enim potest dicere, cor meum mundum est? Sed si confideretur in Christo DOMINO nostro, in quem credit, nihil ea est, in hoc genere, speciosius, & aspectu iucundius. Nam Christus primum quidem exponit se pro Ecclesia sua in mortem probrosissimam, qua peccata eius ita expiat, vt Deus pater non amplius meminerit.

minerit eorum, & donet ei iustitiam Christi, qua nihil est sanctius, nihil purius. Et hic est deauratus vestitus, ac vestimentum regium, quo Regina astat Regi suo comptissima. Quare Ecclesia meritò dicitur, non amplius habere maculam aut rugam, aut quicquam eiusmodi, idq; per fidem, propter Christum. Deinde donat eam Spiritu sancto, ut etiam si adhuc habeat aliquid carnis, tamen nō ambulet iuxta carnem, sed iuxta Spiritum, sanctè & irreprehensibiliter. Postremò, collocat eam ad dextram Christi filij sui, non quòd fiat ipsa Christus, sed quòd fruatur omnibus beneficijs Christi, sicut sponsa bonis sponsi sui, & conseruetur in omnibus aduersis, in morte deniq; ipsa, ad æternam felicitatem. Quid igitur vera Ecclesia Christi beatus?

10. *Audi filia, & vide, & inclina aurem tuam, ac obliuiscere populi tui, & domus patris tui.*
 11. *Et concupiscet Rex decorem tuum, quoniam ipse est Dominus (seu maritus) tuus, & adores eum.*

Hactenus descripsit & cōmendauit Spiritus sanctus potentiam, magnificentiam & virtutes Regis nostri, DOMINI Iesu Christi. Nunc autem facit Apostrophen ad Reginam, & ad gynæceum eius, hoc est, ad Ecclesiam, & hortatur eam ad fidem & obedientiam: Audi, inquit, filia, & vide, (hoc est) quem tibi hactenus commendaui seu sponsum, seu Regem, Iōgè omniū venustissimus et magnificentissimus est. Da igitur, mea filia, summā, quam potes, operam, ut facias tuum officium, & exhibeas tē ei obsequentem.

Sed quo ille officio, quo obsequio delectatur? Primum, **AVDI.** Quisquis enim voluerit Christo gratum cultum facere & placere ei, Evangelion eius audiat, necesse est: Fides, inquit Paulus, ex auditu est, *Rom. 10.* auditus aut per verbum Dei. Deinde addit: **VIDE.** *Ioan. 14.* Non solum audiendum est Evangelion Christi, sed etiam videndum, (hoc est) diligentissime expendendum, considerandum & observandum. Beati enim, inquit Christus, qui audiunt verbum Dei, & custodiunt illud. Præterea addit: Inclina aurem tuam. Evangelion Christi non solum est aure audiendum, verum etiam auris, ad ipsum audiendum inclinanda est, videlicet, ut excipias fide, & colloques in Christo, qui per Evangelion adnuntiatur, omnem tuam fiduciam. Postremo dicit: Obliviscere populi tui, & domus tuæ paternæ. Hoc partim eo respicit, quod Paulus Galat. 4. dicit: Nos cum essemus pueri, sub elementis mundi eramus, in servitutē adacti. At ubi venit plenitudo temporis, emisit Deus filium suum, factum legi obnoxium, ut eos, qui erant legi obnoxii, redimeret, ut adoptione ius filiorum acciperemus: hoc enim est deferere populum suum, & domum paternam. Partim illud est, quod Christus apud Lucam cap. 9. dicit: Si quis vult post me venire, abneget semetipsum, & tollat crucem suam cottidie, & sequatur me. Ac iterum cap. 14. Si quis venit ad me, nec odit patrem suum, ac matrem, & uxorem, & filios, & fratres, & sorores, præterea autem & animam suam, non potest meus esse discipulus. Et rursus: Omnis ex vobis, qui non renunciat omnibus, quæ possidet, non potest meus esse discipulus.

lus. Et si aut durissimum ac propemodum intolerabile videtur, obliuisci populi & patrię sue, ac ad vocatiōem nē Christi deserere parentes, vxorē, liberos, cognatos, hereditatem, imo & suam ipsius animam, hoc est, omnem penē humanū affectum exuere, tamen addit Christus aliās promissionem, cuius fide, quæ per se videntur impossibilia, non solum possibilia, verum etiam facilia fiunt: Omnis, inquit, qui reliquerit *Matth. 19.* domos, aut fratres, aut sorores, aut patrem, aut matrem, aut vxorem, aut filios, aut agros, propter nomen meum, centuplum accipiet, & vitæ æternæ sortietur hæreditatem. Ac rursus: Nemo est, qui relinquit *Luc. 18.* domum, aut parentes, aut fratres, aut vxorem, aut liberos, propter regnum Dei, qui non recepturus sit multo plura in hoc tempore, & in seculo venturo vitam æternam. His ergo promissionibus coniunge nunc, quod in hoc Psalmo sequitur: Concupiscet rex decorem tuum. Nam si quis audierit, viderit, inclinauerit aurem suam Euangelio Christi, & maluerit omnium suarum rerum in his terris iacturam facere, quàm Christum, quem fide amplexus est, abnegare & amittere, is primùm habet in Christo remissionem omnium peccatorum: deinde donatur iustitia Christi, vt propter eam habeatur coram tribunali Dei sanctus & irreprehensibilis: præterea, donatur Spiritu sancto, qui efficit, ne regnet peccatum in mortali suo corpore. Quid multis opus? fides in Christum ita expolit et exornat credentem, vt vestustate sua, quam in Christo habet, superet omnem humanam & angelicam pulchritudinem. Quare, etsi homo, si naturam eius peccato corruptam intuearis,

videbitur abominatione dignissimus, tamen si res
 spexeris ornamenta eius, quibus gratuita clementia
 Dei per fidem excultus est, Christus rex & sponsus
 teneri non potest, quin talem sponsam gratia & fa-
 uore suo prosequatur. Nec frustra & immerito exi-
 gitur à te, qui volueris esse sponsa Christi, vt audias,
 videas, & inclines aurem tuam ad Euangelion Chris-
 ti, quia ipse (inquit Psalmus) est Dominus tuus,
 ideoq; omnino debes ei hoc officium, vt adores eum.
 Et si autem hoc loco non ponitur vocabulum יהוה Ie-
 houa, quod soli vero & æterno Deo competit, sed
 vocabulum אדוני Adonai, quod etiam hominibus tri-
 buitur, vt videatur Christum non esse ~~deum~~ & coeles-
 ti, sed tantum ciuili modo, sicut reges huius seculi, ad-
 dorandum, tamē & aliàs Christus dicitur verus יהוה
 Iehoua, quemadmodum supra indicauimus: & in
 Ecclesia non est ignotum, quod filius Dei, qui est
 verus Deus ab æterno, à Deo patre suo genitus, as-
 sumpserit semen Abrahe, seu filium Marię virginis,
 in eandem personam. Quare Christus adorandus
 est coelesti modo, non tantum secundum suam diui-
 nitatem, verum etiam secundum suam humanitatem,
 propterea quod sit vna persona, in qua post incarna-
 tionem, vbicunq; fuerit diuinitas, ibi secum habeat
 humanitatem sibi vnitam, vt nullo vnquam vel tem-
 pore vel loco diuinitas ab humanitate, aut humani-
 tas à diuinitate separetur.

12. *Et filia Tyri munere (honorabit te,) faciem tuam ve-
 nerabuntur diuites populi.*

Filia regis est Ecclesia filij Dei DOMINI nostri Iesu Christi, quæ initio collecta est ex posteritate Abrahamæ, seu è populo Israel. Filia autem Tyri est populus Gentium, quæ nomine ciuium Tyri cõprehenduntur, quòd vrbs Tyrus, Gentium possessio, finitima esset Israelitis. Et aliàs quoque cum agitur in sacris literis de vocatione Gentium, numeratur inter Gentes ad Euangelion Christi accessuras: Ecce, inquit Psalmus, Palæstina & Tyrus cum Æthiopia, *Psalm. 87.* iste natus est ibi. Est & in Euangelica historia vrbs Tyrus, vnà cū Sidone, nobilis. Ecclesia igitur Christi non solum constabit è ciuibus Hierusalem, (hoc est) ex Israelitis, verumetiam è ciuibus Tyri, (hoc est) è Gentibus, ipsq; non abiectissimæ sortis, sed nobilissimis & ditissimis, quales fuerunt ciues Tyri, quemadmodum testatur Ezechiel cap. 27. Itaque vaticinatur Psalmus hoc duodecimo versiculo, futurū esse, vt Gentes vulgato in orbem Euangelio accedant ad Ecclesiam: & sicut in nuptijs amici solent sponsæ munera offerre, ita & Gentes venient ad nuptias, quas Christus cum Ecclesia instituit: & resificabuntur suam fidem, ac venerabuntur, quibus possunt officijs, sponsam regis. Ex hoc versiculo videtur Esaias de vocatione Gentium concionatus: *Esa. 60.* Ambulabunt, inquit, Gentes in lumine tuo, & Reges in splendore ortus tui. Et mox: Omnes de Saba venient, aurum & thus deferentes, & laudem DOMINO adnunciantes. Ac iterum: Edificabunt filij peregrinorum muros tuos, & reges eorum ministrabunt tibi.

13. *Omnis gloria filiae Regis intrinsecus, vestimentum eius intertextum est auro.*
14. *Statuitur ad Regem variegatis vestibus, post ipsam adducuntur tibi virgines consanguineae eius.*
15. *Ducuntur in gaudio & letitia, adveniunt in palatium Regis.*

Descriptionem magnificentiae Regis, sequitur descriptio magnificentiae Reginae. Quam enim supra vocavit uxorem seu coniugem, hanc nunc vocat filiam Regis, (hoc est) Reginam. Haec enim, quia commoratur intrinsecus, seu in interiori thalamo Regis, nitet & fulget omni genere gloriae & decoris: gestat vestitum auro intertextum: statuitur ad Regem, non unicoloribus, sed variegatis & acupictis vestibus. Nec sola, sine comitatu adstat, sed adducuntur una cum ipsa, magno gaudio & laetitia virgines propinquae eius, quae & ad celebrandas has regias nuptias, una in thalamum Regis ingrediuntur. Porro autem hac apparatus nuptiarum metaphora, non aliter intelligendum est, quam gloria, qua Christus sponsus ornat electam suam sponsam, quae est Ecclesia, una cum omnibus virginibus suis, hoc est, cum omnibus ihs, qui vere credunt in Christum. Primum enim Christus ornat Ecclesiam in interiori suo thalamo, (hoc est) coram se, in suis oculis, omni genere gloriae, quia eligit eam in suam sponsam, & adoptat eam in suam filiam. Et quomodo, inquires, poterit eadem esse sponsa & filia? Scias igitur inter Christum & Ecclesiam non esse carnales, sed spirituales, non humanas,

manas, sed diuinas nuptias. Ecclesia enim sponsa Christi est, quod sicut in humano coniugio vxor conruseat radijs mariti, & est particeps omnis maiestatis eius, ita & in hoc cœlesti cōiugio Ecclesia fruitur omni gloria & honore Christi: De plenitudine eius, *Ioan. 1.* inquit Ioannes, accepimus nos omnes. Et Paulus: *Ephes. 2.* Cum mortui, inquit, essemus per delicta, conuiuisti cauit nos vnā cum Christo, (per gratiam estis seruati) simulq; cum eo resuscitauit, & simul cum eo sedere fecit inter cœlestes, in Christo Iesu. Vocatur etiā Ecclesia, filia Christi, quod, quemadmodum in his terris adoptatur quispiam ab alieno in filium, qui etsi non est naturalis illius filius, tamē transit adoptione in nomen ipsius, & fit legitimus eius hæres: ita & Ecclesia adoptata à Christo in filiam, etiamsi non sit naturalis filia eius, tamen transit in nomen ipsius, vt vocetur Ecclesia Christi, & fit particeps omnis cœlestis eius hæreditatis. Quanta igitur illa est gloria, esse sponsam cœlestis & æterni Regis, & esse filiam a hæredem summorum bonorum in cœlo? Deinde Ecclesia ornatur vestibus auro intertextis & variegatis. Hæ sunt virtutes, quibus Spiritus sanctus Ecclesiam illustrat & augustam reddit. Ac siquidem loquendum est de personalibus virtutibus, ornauit Spiritus sanctus Apostolos, ad Ecclesiæ ædificationem in die Pentecostes, admirandis donis, non tantum, vt diuersis linguis loquerentur, sed etiam, vt claudos sanarent, dæmonia ejicerent, adeoq; mortuos excitarent. Si autem loquendum est de donis generalibus, quæ cuius ad æternam salutem necessaria sunt, ornatur Ecclesia per Spiritum sanctum,

T fide,

fide, spe, & charitate, quibus virtutibus nihil est in oculis Dei splendidius & magnificentius. Hæ sunt auratæ & variegatæ vestes, quibus Ecclesia adstat regi suo, DOMINO nostro Iesu Christo. Postremo, Ecclesia, sponsa & filia Christi, non sola ingreditur ad sponsum & regem suum, sed venit comitata plurimis virginibus & pedissequis. Ecclesia enim non cõstat ex vna tantum gente Israëlítica, sed ex omnibus gentibus, tam Israëlíticis, quàm Ethnícis: Omnis qui fidit illi (inquit Paulus) non pudefiet. Non enim est distinctio vel Iudæi vel Græci. Nam idem Dominus omnium, diues in omnes inuocantes se: Quisquis enim inuocauerit nomen DOMINI, saluus erit. Quotquot igitur credunt in Christum, ex quacunque gente aduenerint, ingrediuntur vnà cum magno gaudio & lætitia in palatium Regis, (hoc est) in cœleste regnū & æternam felicitatem. Cæterum, quod Ecclesia dicatur sponsa virgo, & habeat comites virgines, non eò intelligendum est, quod nemo ingreditur in cœleste regnum, nisi fuerit corpore suo virgo, sicut nonnulli abutuntur dicto Hieronymi: Cõiugium replet terram, virginitas cœlum. Et illo Apocalypseos dicto: Virgines sequuntur agnū, quoscunque ierit. Et si enim virginitas corporis non est temere, impudicè & sceleratè violanda & commaculanda, quippe quod impudicitia & scortatione, in conspectu Dei nihil sit fœdus & abominabilius, tamen non est sentiendum, quod solæ virgines corpore, sint participes cœlestis regni: sed quod qui cupiunt hoc regno frui, necesse habeant virgines spiritu esse, videlicet, non alienos Deos colere, sed vni sponso,

sponſo, Domino noſtro Ieſu Chriſto fidere & adhæ-
rere, ſicut & Paulus ait: Adiunxi vos vni viro, vt ^{2. Cor. 11.}
virginem caſtam exhiberetis Chriſto. Et quemad-
modum in Chriſto non eſt nec mas nec ſcœmina, ita
non eſt nec virgo (corpore) nec coniunx, ſed quiſ-
quis inuocauerit nomen Domini, ſaluus erit. Et, vt
aliàs Petrus ait: Reipſa comperio, quòd non ſit per ^{Acto. 10.}
ſonarum reſpectus apud Deum, ſed in quauis gente,
qui timet ipſum, & operatur iuſtitiam, iſ acceptus
eſt illi. Quare non ſolæ virgines corporis pertinent
ad regnum Chriſti, verùm etiam honeſti & pñ con-
iuges, adeoq; quotquot, ſiue in cœlibatu, ſiue in con-
iugio credunt in Chriſtum, & ducunt ex fide hone-
ſtam & pudicam vitam, fiunt propter Chriſtum par-
ticipes cœleſtis beatitudinis.

16. *Pro patribus tuis erunt filij tui, conſtitues eos principes
in vniuerſa terra.*

Haſtenus, ô filia Regina, habuiſti patres, qui fue-
runt Patriarchæ & Prophetæ, qui, etſi erudierunt te
diligentiſſimè in vera pietate, & oſtenderunt tibi
regem ſponſum tuum, cuius fide iuſtificeris, & ſalus
tem conſequaris, ſuis temporibus aduenturum, tamẽ ^{Gal. 4.}
detinuerunt te, tanquam paruulam aut ſeruam, ſub
elementis mundi in ſeruitutem adaſtam. Nunc autẽ
hiſ patribus ſuccedent filij tui, qui ſunt Apoſtoli, &
qui non, vt Prophetę, in vna tantum Iſraëlitica gens
te præerunt piæ doctrinæ: ſed erunt principes in
vniuerſa terra: In omnem, inquit alius Pſalmus, ter-
ram exiuit ſonus eorum, & in fines orbis terrę verba

Psal. 68. eorum. Et alius: In Ecclesijs benedicite Deo, Domino de fonte Israelis. Ibi Benjamin paruulus, dominator eorum, principes Iuda, diadema eorum, principes Zebulon, principes Nephthali. Quod quid sit, & de quibus hi versiculi loquantur, exponit Christus ipse: Constitui (inquiens ad Apostolos) vos, vt eatis, & fructum afferatis, & fructus vester maneat. Ac rursus: Ego dispono vobis, sicut disposuit mihi pater meus, regnum, vt edatis & bibatis super mensam meam in regno meo, & sedeatís super thronos, iudicantes duodecim tribus Israel. Qua voce significat, Apostolos in hoc electos & emissos, vt in vniuerso orbe dominarentur, (hoc est) vt doctrina Euangelij colligerent Ecclesiam Christo ex omni natione, vt quotquot crederent Euangelio, confesquerentur æternam salutem, quotquot autem non crederent, interirent perpetuo. Hoc enim est duodecim tribus Israelis iudicare, & in vniuerso orbe dominari, quemadmodum etiam vltimus, qui in hoc nostro Psalmo versiculus sequitur, clare exponit, inquiringens:

17. *Recordabor nominis tui in omni generatione & generatione, propterea laudabunt te populi in seculum & in æternum.*

Dices: Quales erunt hi principes in regno Christi? num erunt terreni & mundani? Respondet ergo cœtus ipse Apostolicus: Non dominabor, (inquiens) in Ecclesia regio & mundano more, sed recordabor nominis tui in omni generatione & generatione,

ratione : prædicabo nomen tuum, ô Christe, adnuntiabo Euangelion tuum inter omnes gentes, vt propagetur ad omnem posteritatem, donec hoc seculum steterit. Qua ex re fiet, vt populi, non solum ex Iudæis, verumetiam ex gentibus agnoscant te, & celebrent nomen tuum, tam in hoc, quàm in futuro seculo in omnem æternitatem. Hic est principatus, hæc est dominatio Apostolorum, qui successerunt Patriarchis & Prophetis, videlicet, non mundanus principatus, sed spiritualis, vt sint principes prædicandi Euangelij, quod est potentia Dei ad salutem omni credenti: Arma militiæ nostræ, (inquit Paulus 2. Cor. 10.) non carnalia sunt, sed potentia Deo, ad demolitionem munitionum, quibus armis consilia demolimur, & omnem celsitudinem, quæ extollitur aduersus cognitionem Dei, & captiuam ducimus omnem cogitationem ad obediendum Christo. Sciamus igitur hoc versiculo significari, quod Propheta Malachias concionatur impletum iri prædicatione Apostolorum: Ab ortu, inquit, solis vsq; ad occasum, magnum est nomen meum in gentibus, & in omni loco sacrificatur & offertur nomini meo oblatio munda, quia magnum nomen meum in gentibus, dicit DOMINVS Zebaoth. Principes enim regni cælorum, Apostoli, circūtulerunt prædicatione Euangelij Christum, qui solus est munda oblatio pro peccatis nostris inter omnes gentes, & nomen eius ita illustrarunt, vt omnis, qui crediderit in eum, non pereat, sed habeat æternam vitam.

Res ipsa testatur, hunc Psalmum esse epithalamium
 & encomium cōiugij, quod est inter Christum spon-
 sum, & Ecclesiam spōsam eius. Ornatur autem spon-
 sus mirificè, & commendatur maximis laudibus. Sed
 inter laudes vel sanctorum vel heroum, & inter lau-
 des Christi summum est discrimen. Illi enim laudan-
 tur & prædicantur non eo consilio, vt virtutibus
 ipsorum confidamus, & nomen ipsorum inuocemus:
 sed tantum, vt diuina dona in ipsis agnoscamus, ac
 Deum celebremus, & testimonium fauoris Dei er-
 ga suam Ecclesiam habeamus, atque virtutes eorum
 imitemur. Christus autem prædicatur, non solum vt
 exemplum imitationis, sed etiam vt omnis salutis
 nostræ autor, & vt venustate, iustitia & fortitudine
 eius confidamus. Venit enim, assumpto homine, in
 has terras, vt nos ornaremur, siquidem in ipsum cre-
 diderimus, venustate eius, & iustificaremur iustitia
 eius, ac conseruaremur heroica eius fortitudine in
 omnibus aduersis, in horroribus mortis & inferni,
 frueremurq; felicitate eius perpetuo. Quare, si quis,
 siue propter grauitatem & multitudinem peccato-
 rum, siue propter magnitudinem afflictionum tristitia
 afficitur,umat hunc nuptialem Psalmum in ma-
 num, quo Spiritus sanctus recitatione maiestatis
 Christi sponsi, & felicitatis sponsæ eius, quæ est
 Ecclesia, accipiat occasionem pellendæ
 omnis tristitiæ, & excitandi in
 ipso omnis cœlestis
 gaudij.

Psalmus 46.

Deus refugium nostrum, & virtus, &c.

Vacunque occasione hic Psalmus initio scriptus sit, certè si recitatus fuerit, accepto iam beneficio victoriæ, aduersus hostes Ecclesiæ Dei, gratiarum actio est: si in præsentis periculo, consolatio est, vt periculum forti animo sufferatur: si in metu venturi periculi, cohortatio est, vt propter periculum, siue certum, siue incertum, officium non deseramus. Docet enim & testificatur, nullas esse afflictiones tã graues, nulla aduersa tam horrenda, nullam persecutionem tam crudelem, nulla pericula tam magna, in quibus, seu priuatus quispiam pius, seu Ecclesia ipsa veræ pietatis studiosa, non reportet, fauente & seruante Deo, victoriam: adeoque illud agit totus hic Psalmus, quod Paulus ad Romanos scribens, paucissimis verbis dicit: Si Deus pro nobis, quis contra nos? Excipiamus *Rom. 8.* igitur eum obuijs, quod aiunt, vlnis, vt ipso aduersus omne genus fortunæ armemur & muniamur.

1. *Deus nostra est tutela & fortitudo, auxilium in aduersis præsentissimum.*
2. *Quare non metuimus, etiamsi subuertatur terra, & transferantur montes in medium maris.*
3. *Etiamsi*

3. *Etiamsi cumultuentur & intumescant aqua eius, conueniantur montes, in aestu eius.*

Recitemus initio aliquot insignia pericula, quæ populus Dei post ingressum in terram Canaan, & post Dauidem adiit, & seruatus est diuinitus, vt interpretatio huius Psalmi planior procedat, & verum eius vsum cognoscamus.

In tertio libro Paralipomérop, cap. 20. incurrunt Moabitæ & Ammonitæ in fines regis Iosaphat ex improviso, vt nō tam oppugnarent, quàm expugnarent, & delerent regnum Iuda. Hæc Ecclesia Dei fuit in máximo periculo. Quid igitur faceret? Num ita sibi metueret, vt omnem spem salutis abijceret?

In quarto libro Regum, cap. 16. & apud Esaiam cap. 7. mouent bellum rex Syriæ & rex Israel aduersus Hierusalem, electam ciuitatem Dei. Familia autem Dauidis ad hanc famam toto pectore ita contremuit, vt commoueretur cor eius, (quemadmodum apud Esaiam dicitur) & cor populi eius, sicut mouentur ligna sylvarum à facie venti. Quid ergo faceret? Num desponderet animum, & nullam amplius salutis spem conciperet?

In secundo libro Paralipomérop cap. 32. oppugnat Saneherib rex Assyriorum Ezechiam, & regnum Iuda tanto furore & impietate, vt etiam horrendas aduersus Deum blasphemias palam euomeret, ac de incolumitate populi Dei actum videretur. Quò igitur verteret sese Ezechias? Num de salute desperaret?

In libris Regum & Paralipomérop abducuntur Iuda, &

daei, qui tum erant Ecclesia Dei, in exilium Babylonium, in quo etiam necesse habent septuaginta annos commorari. Quid igitur interea faciendum susciperent? num delicerent à vera religione, & sectarentur idolomaniam & impietatem Babyloniorum?

In Macchabæis opprimitur Ecclesia Dei ab Antiocho tanta immanitate, ut & libri sacri igni absumerentur, circumcisio prohiberetur, mulieres, quæ filios circumciderant, trucidarentur, & filij à cervicibus earum suspenderentur, adeoque plurima ubique erat imago mortis & extremæ interitionis. In tantis ærumnis, quò erat confugiendum?

Quid dicam de persecutionibus Ecclesiæ, quæ post divulgatum in vniuerso mundo Euangelion, à Iudæis, ab Ethnicis, à Tyrannis, ab Arrianis, & ab alijs hostibus pietatis exortæ sunt? quibus temporibus Ecclesia filij Dei ita opprimi & conculcari vis debatur, ut nulla amplius spes, iuxta humanam quidem rationem, relicta esset, adeoque terra videretur subuerti, & præcipitarentur, iuxta hunc Psalmum, montes in medium mare. Quæ salus in tanta immanitate expectanda erat?

Atque hæc quidem de publicis populi Dei periculis. Quid autem de priuatis singulorum piorum calamitatibus commemorem? Ut de Patriarchis sileam, certè Dauid ipse, quanta pericula adiit? quanta Prophetæ, quanta Apostoli, quanta singuli quique priuati, qui pietatis professionem secuti sunt? Hos omnes remitemus ad hunc Psalmum, ut siue in maximis periculis incolumes seruati sint, siue in præsentibus ærumnis hæreant, siue metu venturæ calamitatis

mitatis contremuerint, fumant eum in manum, in a-
 nimum, in linguam, & dicant: Non metuemus, etia-
 msi terrâ dehiscat, etiamsi montes præcipitentur in
 medium mare, etiamsi & aquæ maris, & montes ter-
 ræ inter se commisceantur, breuiter, etiamsi fractus
 illabatur orbis: non cohorrescamus animo, etiamsi
 effundantur super nos omnia periculorum genera,
 quæ vel superna vel inferna minari & inferre poss-
 sunt. Audio quidem, inquires, fortissima verba, au-
 dio professionem impauidi & infracti animi, sed
 vnde mihi tantum roboris comparabo? vnde sumam
 tantum fortitudinis? In carne mea non reperio,
 (præsertim reuelante DOMINO iram suam) nisi me-
 tum, trepidationem & fugam. Quò igitur me vers-
 tam? Hic iam Psalmum nostrum inspiciamus. Non
 enim iubet tantum, nos in aduersis esse constanti &
 infracto animo, sed addit etiam rationes, quibus &
 metum excutiamus, & fortitudinem animi cōcipia-
 mus. Ac prima quidem ratio commemoratur statim
 in primo versiculo: Deus, inquit, nostra est tutela,
 Deus nostra est fortitudo, Deus nostrum est auxiliū
 in aduersis præsentissimum. Quid igitur metueres?
 quid trepidares? fateor, ingentes sunt ærumnæ, gra-
 uissimæ sunt afflictiones, quibus vel iam in præsen-
 tia obrutus es, vel expectatione cruciaris, vt cœlum
 terræ misceri videatur. Sed bono sis animo, non ha-
 bes in terris, qui te tueatur, habes autem in cœlis,
 qui te non deseret. Deus enim, Deus, inquam, ipse
 est nostra tutela: ipse est nostra in omnibus aduersis
 fortitudo & robur: ipse est nostrum in omnibus af-
 flictionibus, quàmuis grauissimis, auxilium, idq; nō
 in lone

in longinquum tempus dilatū & reiectum, sed præsentissimum, vt quò tristius videtur exitium, eò propinquiorē & præsentiorē sciamus esse opem DOMINI Dei nostri: luxta est (inquit alius Psalmus) *Psal. 34.* DOMINVS ijs, qui tribulato sunt corde, & humiles spiritu seruabit. Hic iterum respondes: Scio quidem DOMINVM esse nostram tutelam & fortitudinem, scio DOMINVM respicere super contritos corde, & humiles spiritu seruare: sed illud me à certa fiducia deijcit, quod in eodem Psalmo sequitur: Multæ tribulationes iustorum, & de omnibus liberat eos DOMINVS. Custodit DOMINVS omnia ossa eorum, vnum ex his non conteretur. Hic fit mentio tribulationis & liberationis, sed iustorum tantum, IUSTORVM, inquam, non iniustorum, qualis ego sum: quid igitur mihi spei relictum est, cum tam liberales & prolixæ Dei promissiones, ad iustos tantum & sanctos, non ad me, cuius iniquitates supergrediuntur caput meum, pertineant? Rectè tu quidem & iustè facis, quòd iniustitiam & iniquitatem tuam agnoscas, & quòd id magis ex animo feceris, eò propior es veræ salutis. Non est autem hanc consistendum, sed pergendum est illò, vbi iustitiam coram Deo inuenias, & consequaris. Ersi enim non inuenis iustitiam, nec in te, seu in carne tua, nec in tuis operibus, tamen inuenis eam in semine Abrahamæ, (hoc est) in Iesu Christo DOMINO nostro, vt si credideris in eum, non solum non imputetur tibi tua iniustitia, verumetiā doneris & orneris iustitia Christi, qua coram tribunali Dei, aduersus omnes assultus Satanæ firmus constare, & in vocatione Dei

ambulare queas. Quare, si te peccata tua ad dubitationem de salute tua, aut etiam ad desperationem sollicitant, vt nec nomen iusti agnoscere, nec Deum ad tui tutelam, fortitudinem & auxilium inuocare audeas, confer statim te ad filium Dei, DOMINUM nostrum Iesum Christum per fidem, & habebis in ipso gratuitam peccatorum condonationem, ac nomen iusti ita reportabis, vt etiam veram in omnibus aduersis salutem consequaris.

4. *Riuuli fluminis lætificant ciuitatem Dei, sanctuarium habitationum altissimi.*
5. *Deus in medio eius, non commouebitur. Adiuvat eam Deus ante auroram.*

Alia ratio, cur Ecclesiæ Dei non sit metuendum in periculis: Riuuli (inquit) fluminis lætificant ciuitatem Dei. Metaphora sumpta ab hortis seu pratis, quæ riuulis aquarum irrigantur. Nam quemadmodum riuuli à proximo flumine in hortum quendam deducti, ita eum rigant & humectant, ac quodammodo exhilarant & lætificant, (vnde & virentia prata vulgo ridere dicuntur) vt etiam si reliqua vicina loca aestu solis exurantur, ille tamen florere & virere pergat: ita & ciuitas Dei, (quo nomine tam externa vrbs Hierusalem, quam vera & spiritualis Ecclesia Dei significatur) ac sanctum habitaculum altissimi, siue in vrbe Hierusalem collocatum, siue in alijs locis constitutum, cœlesti irrigatione aduersus omnem ventorum sæuitiem semper vigeat & florebit. Quos igitur turbines metueremus, ad quas tempestas

tempestates trepidaremus? Sed vnde certum habeamus, quòd Hierusalem & sanctuarium, seu Ecclesia Dei, firmiter constent, ac semper floreat, nec possint ullis tempestatibus, quamvis saeuissimis, exarescere, docet versiculus qui sequitur: Deus, inquit, est in medio eius, videlicet vrbs Hierusalem aut Ecclesiae, quare fieri non potest, vt commoueatur aut conculcetur. Tametsi enim contingat ei aliquid aduersi, vt varia solet esse fortuna populi Dei in hoc seculo, tamen Deus statim praesto adest, & adiuuat eam ante auroram, hoc est, summo mane, & satis tempestiue, ac illo praesertim tempore, quo & necesse est & opportunissimum. Sed & illud operae precium est cognoscere, vnde sciamus, quòd Deus sit in medio Hierusalem seu Ecclesiae suae. An non enim coelum est thronus Dei, & terra scabellum eius? An non Deus implet coelum & terram? Certè implet, sed maxime omnium est in medio vrbs Hierusalem & in tabernaculo eius, promissione gratiae, ac certitudine auxiliij sui. Ac primum de externa vrbe Hierusalem, quae fuit suis temporibus praecipua sedes Ecclesiae Dei, dicit DOMINVS:

Elegi Hierusalem, vt sit nomen meum in ea, & 2. Paral. 6. elegi Dauid, vt constituerem eum super populum meum Israel. Et iterum:

Elegi & sanctificaui locum istum, vt sit nomen meum ibi in sempiternum, & permaneant oculi mei, & cor meum ibi cunctis diebus.

Elegit DOMINVS Zion, elegit eam in habitacionem sibi. Hæc requies mea in seculum seculi, hæc habitabo, quoniam elegi eam.

2. Paral. 12.

Esa. 7.

Esa. 38.

Cum igitur ciuitas Hierusalem & templum eius tam claras & insignes habeant promissiones Dei, nō est metuendum aut desperandum de incolumitate eorum, etiamsi vel Sefac rex Ægypti, vel Rezin rex Syriæ, vel Saneherib rex Assyriorum minetur eis deuastationem & extremam internitionem.

Gen. 22.

Dices autem: Quid ergo est, quod NebucadNeszar rex Babylonius deuastauit urbem Hierusalem, & exussit templum in ea, ac abduxit ciues captiuos in Babylonem? Vbi tunc erant riuuli aquarum, quibus ciuitas lætificaretur? Intelligamus igitur recte, quod de conseruatione Hierusalem dicitur. Nam si loquendum est de externa vrbe Hierusalem, non est dubium, quin iam inde à temporibus Abrahami electa sit diuinitus, vt esset ibi domicilium Arcæ testamenti seu propitiatorij, ac sedes piæ doctrinæ, quæ & suo tempore excitanda esset, & tantisper salua cōseruaretur, dum externum semen Abrahamæ nomen Ecclesiæ Dei retineret, ac periodon suam completeret. Tamen si enim sæpè ac multum afflicta est ab hostibus suis, ac tandem quoq; à Babylonijs vastata, tamen DOMINVS Deus noster aut conseruauit eam mirando modo, aut cum propter populi impietatem, Babylonijs deuastanda tradita esset, curauit, vt post septuaginta exilij annos iterum instauraretur, donec adueniret Christus, & spargeretur Euangelion eius in vnīuersum orbem terræ. Quare, promissio de sempiterna conseruatione vrbis Hierusalem, hac in parte haudquaquam vana est & mendax, videlicet, si hanc sempiternam conseruationem intelligas de ea duratione, qua Deus semper urbem Hierusalem, vsque

vsque ad definitam suam periodon, vel oppugnatam
 mirabiliter defendit, vel conculcatā restituit, quem
 admodum etiam de circumcisione dicitur : Statuam *Gen. 17.*
 pactum meum inter me & te , & inter semen tuum
 post te, in generationibus suis fœdere sempiterno,
 videlicet, dum semē Abrahę esset Ecclesia Dei, vsq̃
 ad aduentum Christi: nam postea amisit circumci-
 sio nomen Sacramenti, & abrogata est. Et de posses-
 sione terrę Canaan: Dabo tibi & semini tuo terram,
 peregrinationis tuę , & omnem terram Canaan in
 possessionem æternam, (hoc est) vsq̃ ad illud tem-
 pus , quo externum semen Abrahę desinet esse po-
 pulus & Ecclesia Dei. Et de seruo recipiente se apud *Exod. 21.*
 dominum suum mansurum : Assumes subulam , & *Deut. 15.*
 perforabis aurem eius in ianua domus eius, et seruiet
 tibi vsque in æternum, hoc est, vel vsq̃ ad iubilęum,
 vel vsq̃ ad mortem. Si autem loquendum est de spi-
 rituali vrbe Hierusalem , quo nomine intelligitur
 vera Ecclesia D O M I N I, non ex Iudæis tantum, ve-
 rum etiam ex omnibus gentibus collecta , proluxę
 extant promissiones , quòd Deus conseruaturus sit
 eam, non vno tantum seculo , non vno tantum iubi-
 læo, sed in omnem æternitatem, in hoc quidem se-
 culo, in omnibus aduersis, in morte deniq̃ ipsa, in fu-
 turo autem seculo , felicitate in æternum nunquam
 finienda : Cum transieris, inquit D O M I N V S, per a- *Esa. 43.*
 quas , tecum ero , & flumina non operient te : cum
 ambulaueris in igne, non combureris, & flamma nō
 ardebit in te , quia ego D O M I N V S Deus tuus , san-
 ctus Israel saluator tuus. Et iterum: Non occidet vl- *Esa. 60.*
 tra sol tuus, & luna tua non minuetur, quia erit tibi

Matth. 16.

Ioan. 10.

DOMINVS in lucem sempiternam, & complebuntur dies luctus tui. Ac rursus: Super hanc petram ædificabo Ecclesiam meam, & portæ inferi non præualebunt aduersus eam. Et iterum: Oues meæ vocem meam audiunt, & ego cognosco eas, & sequuntur me, & ego vitam æternam do eis, nec peribunt in æternum, neque rapiet quisquam eas è manu mea. Et aliàs: Ego vobiscum sum omnibus diebus vsq; ad consummationem seculi. Extant infinitæ id genus promissiones, quibus Christus filius Dei recepit se Ecclesiam suam, non generaliter tantum, sed etiam peculiariter, quemuis in ipsum credentem, perpetuò conseruaturum.

Confidamus igitur optimè in quauis fortuna, nec dubitemus, quin cum Deus sit in medio Ecclesiæ suæ, clementer & potenter efficiat, vt, quod hic Psalmus dicit: Riui fluminum Ecclesiæ non exsiccantur, sed recreent & lætificent eam, nec vnquam cōmoueatur vt pereat, sed iuuetur diuinitus in omnibus aduersis, mirabilius, quàm quisquam optare, nedum sperare possit.

6. *Fremant (licet) gentes, commoueantur regna, (tamen simul atq; DOMINVS) dederit vocem suam, defluit terra.*
7. *DOMINVS Zebaoth nobiscum, protector noster Deus Iacob.*

Quod suprà versiculo secundo & tertio de subuersione terræ, de translatione montium in mare, ac de tumore aquarum dixit, hoc nunc exponit de fremitu

mitu gentiū, & concursatione regnorum ac populorum aduersus Ecclesiam Dei, vt hac occasione reperat & inculcet etiam, quod de præsentia, fauore, & tutela seu protectione DOMINI Dei nostri dixit: Multæ sunt, inquit, & magnæ afflictiones Ecclesiæ: fremunt aduersus eam gentes: cooriuntur in eam non vna tantum & altera ciuitas, sed tota regna, & potentissimæ Monarchiæ, ac illud vnum conantur, vt ipsam subuertant & deleant: sed simulatq; DOMINVS dederit vocem suam, ac seu tonitru, seu alia significatione iram suam testificetur, non solum vnū & alterum regnum, verumetiam vniuersa terra contremiscat & contabescat necesse est, tantum abest, vt aduersus Ecclesiam Dei consistere queat. Huic versiculo Psalmi testimonium fert, quod extat in Exo. cap. 14. Respiciebat DOMINVS super castra Aegyptiorum per columnam ignis & nubis, interfecit exercitum eorum, &c. Et illud, quod dicit DOMINVS Deute. cap. 2. Hodie incipiam mittere terrorem atq; formidinem tuam in populos, qui habitant sub omni cælo, vt audito nomine tuo paueant, & in morem parturientium contremiscant, ac dolore teneantur. Et exemplum apud Samuelem: Intonuît DOMINVS 1. Samu. 7. fragore magno in die illa super Philistiim, & exterminauit eos, & cæsi sunt à filijs Israël. Similiter exemplū æditum in exercitu regis Iosaphat, probat, DOMINVS 2. Paral. 20. NVM non tonitruis tantum, verumetiam citharis & canticis hostes Ecclesiæ suæ ita perterrefacere, vt in semetipsos vertantur, & mutuis vulneribus concidant. Quid autem commemorem Apostolica tempora? Apostolis ablegatis in orbem terrarum, ad

adnunciandum Euangelion Christi, obfistebant Iudæi, Gentes, maiores, minores, domini, serui, politæ, Monarchiæ, principes, reges & subditi, breuiter, omne hominum genus: & tamen necesse habuerunt voci Euangelij locum dare, vt Ecclesia Christi in vniuerso mundo colligeretur. Quod autem generaliter de Ecclesia dicitur, hoc etiam peculiariter de quouis homine, Ecclesiæ per fidem insito, intelligendum est, vt etiam si totus Satanarum chorus, vnà cum peccato, morte & inferno in ipsum fremant, sequant, & grassentur, eluctetur tamen & euadat. Sed quid illud est, quod reddat nos certos, & confirmet animum nostrum, vt sciamus DOMINVM oppressurum hostes nostros, siue illos corporales, siue spirituales, & nos miserrimè afflictos seruaturum? Hic iam tertio repetit, quod in primo & quinto versiculis dictum est: Deus nostra est tutela, & Deus in medio eius. Dicit enim: DOMINVS Zebaoth nobiscum, protector noster Deus Iacob. Si DOMINVS Zebaoth nobiscum, quis contra nos? Si Deus Iacob noster est tutor, defensor & protector, quem metuemus? quis nocere poterit? Rectè: sed cognoscere, num DOMINVS sit nobiscum, & sit protector noster, hoc opus, hic labor est, multa enim cum hac fidei noticia & certitudine pugnant. Scimus Deum esse iudicem seuerissimum, scimus nos esse peccatores sceleratissimos, quid igitur spei nobis de præsentia & fauore Dei in aduersis nostris relictum est? De hac re admonuimus precatorem etiam paulò antè. Et respondet nobis Paulus: Quis (inquiens) intencabit crimina aduersus electos Dei? (sunt aut electi Dei,

Rom. 8.

Dei, qui credunt in Christum filium Dei, de quo pater ipse Deus dixit : Hic est filius meus dilectus, in quo mihi complacitum est,) Deus est, qui iustificat, quis ille, qui condemnet? Christus est, qui mortuus est, imò qui & suscitatus est, qui etiam est ad dexteram Dei, qui & intercedit pro nobis. Quis nos separabit à dilectione Dei? (qua videlicet Deus nos propter Christum cōplectitur) num afflictio? num angustia? num persecutio? num fames? num nuditas? num periculum? num gladius? Huc faciunt etiā epitheta, quæ Deo in hoc versiculo tribuuntur. Vocatur enim Deus Zebaoth, hoc est, exercituum, seu militiarum, quòd cum Deus habeat in sua potestate, omnem tam angelicum, quàm humanum principatum, exercitum, virtutem & dominium, satis potens sit, qui queat nos in omnibus aduersis, & contra omnes hostes, siue corporales, siue spirituales defendere ac tueri. Vocatur & Deus Iacob, quòd, cum promiserit Patriarchæ Iacob, se in semine eius, (qui est Christus) benedicturum cunctas tribus seu familias terræ, & se fore custodem eius, quòcūq; perrexerit, satis clemens & misericors sit, qui VELIT nos protegere & cōseruare. Incumbamus igitur in illud studium, vt fide nostra complectamur Iesum Christum filium Dei, sic enim non erit dubitandum, quin Deus Zebaoth, & Deus Iacob sit nobiscum, & protector noster in omnibus afflictionibus.

8. *Venite, videte opera DOMINI, quasnam faciat variationes in terra.*

9. *Compescat bella vsq; ad fines terræ, arcum conterat, & abscindat lanceam, bellicos currus comburat igni.*

Suprà consolatus est Spiritus sanctus afflictum & gravitate ac magnitudine ærumnarum perturbatū, verbis & promissionibus, de præsentia & favore Dei: Ne metueamus, inquit, etiamsi omnia videntur conclamata, quia Deus est spes, fortitudo & auxilium nostrum: Deus est in medio nostri, & rigat Ecclesiam suam, ut floreat: Deus adiuuat eam, ut non exarescat: DOMINVS Zebaoth nobiscum est, Deus Iacob refugium nostrū est, & protector noster. Nunc autem quod verbis dixit, & promissionibus confirmavit, hoc factis testificatur, & exemplis probat: Venite, inquit, & videte opera DOMINI. Illud vult dicere: Si non creditis verbis promissionum mearum, credite operibus, credite exemplis, quibus reipsa patefeci & comprobaui, quod ad tuendam & conseruandam Ecclesiam meam, deuastem regna & Monarchias, quæ suscipiunt eā opprimendam, & compescam bella in toto orbe terrarum, ac confringam hastas, & conteram, adeoque comburam omnes hostium arcus, ut Ecclesia mea seruetur & liberetur. Vide mihi exemplum Abrahæ. Rex Ægypti rapit vxorem eius, quæ est maxima iniuria: Sed Deus flagellauit regem plagis maximis, & familiam eius, ut cogeretur reddere Abrahamo vxorem suam inuiolatam. Et iterum rapitur ei vxor ab Abimelech rege Gerare: sed Deus minatur regi præsentē mortem, nisi Abrahæ suam restituat mulierem. In Exodo, quoties & quàm horrendis plagis affligitur Pharaon & vniuersa Ægyptus, quod cogitarent Ecclesiā Dei opprimere: Et tandem vniuersus exercitus Pharaonis obruitur aquis maris rubri, ut Ecclesia Dei Ægyptiaca

Ægyptiaca tyrannide liberaretur. Et quid? an non omnes gentes Cananææ deletæ sunt, & vniuersa regna eorum deuastata, vt Ecclesia Dei in terra diuinitus promissa collocaretur? Hoc certè est vastationes in terra facere, bella compescere in toto orbe Cananæo, conterere arcum, confringere lanceas, & comburere arcus bellicos hostium, vt Ecclesia Dei seruetur, & trāquillam vitam consequatur. Et si autē Israelitæ, qui suis temporibus erant electa Dei Ecclesia, iterū è sua terra propter idolomaniam populi eiiciuntur, & in exiliū Babylonicum abducuntur, tamen tantum curæ sunt DOMINO, vt ad liberandum eos, tradat Babylonicam Monarchiam Persis & Medis diripiendam & vastandam: Propter vos, inquit DOMINVS per Esaiam, emisi in Babylonem, & detraxi vectes vniuersos, & Chaldæos in nauibus suis gloriantes. Ac rursus: Hæc dicit DOMINVS Christo meo Cyro, cuius apprehendi dextram, vt subiiciam ante faciem eius gentes. Et mox: Dabo tibi thesauros absconditos, & arcana secretorū, vt scias, quia ego DOMINVS, qui voco nomen tuum, Deus Israel, propter seruum meum Iacob, & Israel electum meum, &c. Quod de Ecclesia Israelitica dicitur, hoc etiam de vniuersa gentium Ecclesia, post diuulgatū Euangelion Christi, idem Propheta futurum vaticinatur: Gens (inquiens) & regnum, quod non seruiuerit tibi, peribit, & Gentes, (quæ in te grassantur) solitudine vastabuntur. Huc referendi sunt omnes Tyranni, qui iam inde à Nerone persecuti sunt Ecclesiam Christi crudeliter, ac in primis Imperator Iulianus, qui statuerat, quoquo modo posset, nomen

*Vide historiam
Iosue.*

Esa. 43.

Esa. 45.

Esa. 60.

Christi, vnà cum Ecclesia sua delere, sed Deus defendit, & pergit conseruare eam tam potenti dextra, vt in media etiam morte, & inferni tentationibus salua constet, ac ad æternam felicitatem euadat. In hæc & alia id genus miranda opera Dei iubet nos Spiritus sanctus intueri, vt fidem nostram in omnibus nostris aduersis confirmemus.

10. *Estote tranquilli, & cognoscetis quòd ego sim Deus, qui glorificer inter Gentes, glorificer in terra.*
11. *DOMINVS Zebaoth nobiscum, protector noster Deus Iacob.*

Concludit Psalmũ cohortatione, qua docet, quòd promissiones & opera Dei, seu miracula seu alia exempla, quæ iussit intueri, non cesserint tantum in vsum eorũ, de quibus nominatim scripta sunt, sed cedant etiam in vsum omnium illorum, qui ex ijs fidẽ suam confirmant, & opem Dei in omnibus suis afflictionibus firma spe expectant: Estote, inquit, tranquilli: nolite quouis doctrinæ vento circumferri: nolite fluctuanti animo in vestris æumnis, nunc de illo, nunc de alio remedij genere periculum facere: nolite properare (quod increduli faciunt) ad auxilia illicita, & diuinitus prohibita, sed sitis tranquillo animo, & expectate coelestem quisq; opem, quæ & promissionibus Dei significata est, & varijs exemplis ac miraculis comprobata. Sic enim cognoscetis tandem reipsa, & vestra ipsorum experientia, quòd Ego, inquit, sim Deus, qui glorificer tam inter Gentes, quàm in vniuersa terra, (hoc est) qui collatione coelestis auxiliij, & liberatione ex omnibus periculis patefas

patefaciam & illustrem gloriam nominis mei, non paucis tantum Patriarcharū exemplis, & in angustis tantum finibus terre Cananæ, sed etiam inter omnes gentes, & in vniuersa terra. Omnis enim, *Rom. 10.* inquam, qui fidei illi, non pudebit. Nō est distinctio vel Iudæi vel Græci. Nam idem Dominus OMNIVM, diues in OMNES inuocantes se. QVISQVIS enim inuocauerit nomen DOMINI, saluus erit. Hortatur & alius Spiritus sanctus nos in aduersis ad silentium, ad tranquillitatem & expectationem: Si reuertamini, *Esa. 30.* (inquit) & quiescat, salui eritis. In silentio & spe erit fortitudo vestra. Ac rursus: Et si visio in longum *Abac. 2.* differri videtur, tamen fiet vel tandem, & non mentietur: Si moram fecerit, expecta eum, quia veniens veniet, & non tardabit. Quare in aduersis opus est tranquilla expectatione & inuocatione nominis Dei, ex fide, ut veram salutem consequamur. Et quod animus noster fiat confirmator, repetit in fine septimum versiculum, tanquam epiphonema, quo nobis omnis dubitatio de præsentia & clementia Dei eximatur: DOMINVS, inquit, Zebaoth nobiscum, protector noster Deus Iacob. Quid ergo metueremus? quid ad insultum vel hominum vel Satanarum contremisceremus? Si DOMINVS Zebaoth (qui est omnipotens rerum omnium administrator) nobiscum, quis contra nos? Si Deus Iacob (qui promissit Patriarchæ Iacobo, se è posteritate eius missurū Christum, ac iam quoque misit, verum nostrum & æternum seruatore) protector noster est, quis de salute sua dubitaret? Scimus autem ex fide in Christū, Deum illum Zebaoth & Deum Iacob esse nobiscū, scimus

*Ioan. 14.**Rom. 8.*

scimus eum esse protectorem nostrum, iuxta illud dictum Christi: Si quis diligit me, sermonem meum, (qui est sermo Euangelij) seruabit, & pater meus diligit eum, & ad eum veniemus, & mansionem apud eum faciemus. Et iterum: Qui proprio filio suo non percutit, sed pro nobis omnibus tradidit illum: quid fieri potest, ut non & cum eodem omnia nobis donet? Non est igitur nobis de vera nostra salute ullus dubitationis locus relictus.

VSVS HVIVS PSALMI.

1. Cor. 10.

Nullum non est tempus, quo non sit aliquis huius Psalmi vsus. Nam si liberatus es diuino beneficio, ex ingenti periculo, & magnis calamitatibus, licebit eo vti pro gratiarum actione, quemadmodum ab initio dicebamus. Si in praesenti periculo irretitus teneris, exhortatio est ad ferenda aduersa forti animo, certissima spe concepta, quod qui te vocatione sua in hoc periculum coniecit, dabit etiam euentum, ut feliciter euadas. Si autem metuis imminens periculum, muniendus est animus hoc Psalmo, ut quicquid acciderit, excelsa animo aggrediaris, & obedienter toleres, quod fidelis sit Deus, qui non sinet nos tentari supra id, quod possumus, sed faciet vna cum tentatione euentum, quo possimus sustinere.

Psalmus

Psalmus 47.

Omnes gentes plaudite, &c.

Vbium non est, quin Decalogus *Exo. 19. 20.*
 gus promulgatus sit in monte
 Sinai, singulari maiestate: &
 manifestum est, arcam propiti- *3. Reg. 8.*
 atorij translata & depositam
 esse insigni magnificentia, in
 templum à Salomone excitatū.
 Sed hæc spectacula nō fuerunt *2. Paral. 5.*

tanti momenti, vt dederint huic Psalmo decantando
 occasionem. Decalogus enim vni tantum genti in
 deserto promulgatus est, et obstupescit ac exterruit
 magis auditores, quàm vt ad lætitiā & carmina gras
 rulatoria excitārit. Arca verò testamenti deportata
 quidem est maximo populi applausu, in templum re
 cens à Salomone ædificatum: hæc autē non erat veris
 tas, sed tantum qualiscuncq; veritatis adumbratio.
 Quare sentiamus Spiritum sanctum in hoc Psalmo
 longē maiora & excellentiora meditatū esse, quàm
 quæ in vna tantum Iudaica gente, & vmbartiliter
 gesta sint. Cæterum, vt veram & propriam huius
 Psalmi sententiam assequamur, Psalmus ipse dili
 genter est considerandus, & res ipsæ in his terris ges
 stæ, huc conferendæ sunt. Nihil autē est in vniuerso
 orbe terrarum magis insigne, & excellentius actum,
 quàm quod in die Pentecostes, de Spiritu sancto A

Y postolis

postolis misso commemoratur. Cum enim temporibus Augusti Cæsaris Messias seu Christus filius Dei, natus esset homo, ab initio orbis promissus, & maximo omnium desiderio expectatus, etsi conuersabatur in terris, & ædebat miracula, tamen humilitate, exinanitione, & forma crucis, ita tectus erat, ut à paucissimis agnosceretur verus Messias filius Dei, sed potius ad mortem, ut *καθάρμα*, cōdemnaretur. Postquam autem resurrexisset à mortuis, & ascendisset in cœlum, ac mitteret in die Pentecostes discipulis suis Spiritum sanctum, ibi tum cœlestibus testimonijs ac miraculis palam patefactum & confirmatum est, primum, quod is Iesus filius Mariæ virginis, nō tantum sit verus homo, sed etiā verus Deus, (hoc est) assumptus à vero & æterno filio Dei, in vnā personam, non quidem conuersione diuinitatis in carnem, ut verbis Athanasij utar, sed assumptione humanitatis in Deum. Deinde, quod is Iesus sit verus ille Messias seu Christus, Patriarchis promissus, & à Prophetis adnunciatus, ut esset redemptor humani generis, à morte & æterna damnatione. Ad hæc, quod huic Iesu data sit omnis potestas in cœlo & in terra. Ac breuiter, quod Deus Pater collocauerit eū ad dextram suam, ut esset æqualis cum ipso maiestatis, & omnia gubernaret, adeoque in tantam celsitudinem eueheretur, ut in nomine eius omne genu se flecteret, cœlestium ac terrestrium & infernorum. Hæc omnia de Iesu Christo patefacta sunt, misso Spiritu sancto in die Pentecostes. Quare, cum Spiritus sanctus videret hæc tam magnifica, & mirifica suis temporibus futura, excitat vniuersam ecclesiam, ad concipiendū summum

summum gaudium : & hoc Psalmo, quasi præit ei, vt agnoscat maiestatem Iesu Christi vera fide, & excipiat eum maxima animi gratitudine.

1. *Omnes populi plaudite manibus, iubilare Deo voce bilari.*

Primum omnium hortatur & vocat non vnũ tantum populum Israëliticum, sed omnes in vniuerso orbe terrarum, tam Iudæos, quàm Gentes, ad gaudium, & hilarem iubilationem. Christus enim non Iudeorum tantum Deus est, sed etiam Gentium, qui iustificat circumcisionẽ, vt Paulus loquitur, ex fide, & *Rom. 3.* præputium per fidem. Deinde addit rationes, cur sit gaudendum & iubilandum. Aduertamus igitur animum, quid causæ sit, quod omnes populi seu circumcisi seu incircumcisi, seu maiores seu minores debeant manibus plaudere, & præ gaudio exultare. Sequitur.

2. *Quia DOMINVS est excelsus, reuerendus, Rex magnus super omnem terram.*

Ostendimus paulò antè, hunc Psalmum describere & decantare maiestatem DOMINI nostri Iesu Christi. Quis ergo & qualis est Iesus Christus, vt sciamus nobis merito propter reuelatam eius magnificentiam gaudendum, & manibus plaudendum esse? Principio, Iesus Christus est DOMINVS Iehoua, (hoc est) non est tantum homo, sed est etiã verus Deus: non est tantum filius hominis, sed etiam filius Dei. Non tamen sunt duo, sed vnus tantum Christus. Vnus autem, (quemadmodum paulò antè ex Athanasio recitauimus)

mus) non conuersione diuinitatis in carnem, sed assumptione humanitatis in Deum. Vnus omnino, non confusione substantiæ, sed vnitatem personæ. Homo igitur ille Iesus, filius Mariæ, dicitur & est verus Deus Iehoua, duplici nomine. Altero, quod verus filius Dei, secunda persona in deitate, qui ab æterno, à Deo Patre suo, eiusdem cum Patre substantiæ & maiestatis, inenarrabiliter genitus est, assumpsit eum in vnitatem suæ personæ, ut quemadmodum anima rationalis & caro, vnus est homo, ita Deus & homo vnus sit Christus. Altero, quod æternus filius Dei ornauerit eum omni sua maiestate, & euexerit eum, ad dexteram Dei Patris sui, ut omnia per ipsum, tam in cælo, quam in terra gubernet. Deinde, etsi, cum dicitur, hominem Christum esse DOMINUM Iehoua, vno nomine omnis cœlestis & diuina maiestas continetur, tamen visum est Spiritui sancto copiosius explicare. Homo igitur Christus, est excelsus, summus, & altissimus: Filius (inquit Angelus) altissimi vocabitur. Postquam enim assumptus est à filio Dei in vnitatem suæ personæ, exaltatus est in summam maiestatem, & collocatus ad dextram Dei, ut superaret omnem celsitudinem, siue humanam, siue angelicam, adeoque esset & dominaretur, ubicunque æternus ipse filius Dei est & dominatur. Deus exercuit in Christo, inquit Paulus, efficaciam roboris fortitudinis suæ, cum suscitaret eum à mortuis, & sedere fecit ad dexteram suam in cœlestibus super omnem principatum, ac potestatem, & virtutem & dominium, & omne nomen, quod nominatur, non solum in seculo hoc, verum etiam in futuro. Quid ergo inter creaturas excelsius est &

sublimius

Luc. i.

Ephes. i.

sublimius illo, qui assumptus est à filio Dei in vnitas
 tem suæ personæ, & collocatus super omne tam huius
 manum, quàm angelicum nomen? Hoc verè est, non
 quidem in diuinam maiestatem mutari, sed diuina
 maiestate ornari. Præterea, homo Christus est re-
 uerendus, (hoc est) eò euectus, vt metuant & adorent
 eū omnes fines terræ. Hoc illud est, quod Paulus ad
 Philipenses scribens: Deus, inquit, extulit eum in *Philip. 2.*
 summam sublimitatem, ac donauit illi nomen, quod
 est supra omne nomen, vt in nomine Iesu omne genu
 se flectat, cœlestium ac terrestrium & infernorum,
 omnisq; lingua confiteatur, quod DOMINVS sit Ie-
 sus Christus, ad gloriam Dei Patris. Vnde & merito
 reportat illud, quod in hoc Psalmi versiculo sequi-
 tur, epitheton: Rex magnus super omnem terram.
 Spiritus sanctus non tribuit facile creaturæ, quam-
 uis excellenti, cognomen, Magni. Creatura enim ius
 dicatur in conspectu eius tam pusilla, vt Propheta *Esa. 40.*
 dicat eum metiri aquas pugillo, & ponderet cœlos
 palmo, ac libret in pondere montes, & colles in sta-
 tera. Et mox: Ecce Gentes, quasi stilla situlæ, & quasi
 momentum stateræ reputantur. Ecce insulæ, quasi
 puluis exiguus. Sed cum hoc loco tribuat homini
 Christo cognomen Regis MAGNI, idq; super omnē
 terram, manifestum est, magnitudinem eius excelle-
 re omnem tam corporalem, quàm spiritualem crea-
 turam. Quod et Christus suis ipse verbis palam testi-
 ficatur: Data est mihi (inquiens) OMNIS potestas in
 cœlo & in terra. Quid est omnis potestas, nisi omnis
 potentia: idq; non in vno tantum angulo terræ, aut
 in vno & altero terræ regno, qualis potestas fuit

Salomonis, in regno Israel, aut NebucadNezaris in Monarchia Babylonica, sed in vniuersa terra, nec in terra tantum, verum etiam in coelo. Quis tantam potestatem vel mente cogitare, vel sermone explicare posset? Dicunt quidem *περιπατάει*, & hostes maiestatis Christi, tantam duntaxat potestatem homini Christo collatam, quanta creaturae conferri potuerit, & hominem Christum dici quidem nomine, non autem esse re ipsa omnipotentem. Sed nos ipsi quoque fateamur, hominem Christum esse natura sua creaturam, neque enim fuit humanitate sua ab aeterno, sed in plenitudine temporis, in vtero virginis creatus. Hæc autem creatura excellit omnes alias creaturas, dignitate & maiestate. Primum, quod assumpta sit à creatore filio Dei, in vnitatem suæ personæ: hæc dignitas nulli alteri creaturae, nec humanæ, nec Angelicæ contigit. Deinde, quod collocata sit ad dextram Dei Patris omnipotentis: quod & ipsum nulli alteri creaturae contigit, neque enim ad vllum vnquam Angelorum dictum est: Sede à dextris meis, donec posuerō inimicos tuos scabellum pedum tuorum. Ac si forte pii homines dicuntur consedere cum Christo in coelestibus, non intelligendum est, quod Christo ad dextram Dei in maiestate sedenti, sint æquales, sed quod maiestatis Christi suo modo participes fiant, quemadmodum & apud Matthæum dicuntur sedere super duodecim sedes, iudicantes duodecim tribus Israel. Quid autem collocari ad dextram Dei Patris omnipotentis aliud est, quam collocari in omnipotentia? Dexterā enim Dei, omnipotentia Dei est. Cum igitur homo Christus sedeat ad dexteram Dei,

*Heb. 1.**Ephes. 2.**Matth. 19.*

& æquali sit cum Deo potentia & maiestate, ac omnia tam in cœlo, quàm in terra, non absens, sed præsens gubernet, vocatur optimo iure nō nomine tantum, sed & re ipsa Rex magnus super omnem terram. Et quia Deus voluit, iuxta Prophetica & Apostolica *Col. 2.* *Eph. 1.* ca testimonia, vt in hac creatura inhabitaret omnis plenitudo deitatis corporaliter, & vt eueheretur supra omnem principatum, ac omne nomen, quod nominatur tam in hoc, quàm in futuro seculo, ad dextram ipsam Dei, idcirco potuit eam etiam ad tantam celsitudinem euehere, & extollere, propterea quòd velle Dei, sit posse Dei, vt rectè dixerit alius *Psal. 135.* mus: Omnia, quæcunq; voluit Deus, fecit in cœlo & in terra, in mari & in omnibus abyssis. Ac aliæ quidem creaturæ suam quæque mensuram à Deo accipiunt, in illa autem, quæ est homo Christus, complacitum est Patri vniuersam plenitudinem sine mensura inhabitare. *Col. 1.* Agnoscamus igitur fide hunc magnū *Ioan. 3.* Regem Christum DOMINUM nostrum, vt & nos magnitudine eius fruamur, & plenitudinis eius participes fiamus.

3 *Ducit populos subitus nos, & nationes subitus pedes nostros.*

Pro verbo (Ducit,) Hebræus habet ידבר Iadber, Et quia vocabulum דבר Deber, non tantum significat sermonem, sed etiam pestem, ac interficere, idcirco nonnulli interpretantur hunc versiculum, de interfectione & vindicta, quam rex Christus sumpturus sit de hostibus Ecclesiæ suæ, & eos oppressurus. Sed idem vocabulum, & eadem sententia habetur in Psalmo 13. vbi Christus dicit: Subdis, (aut iuxta ver-

bi eius proprietatem, ducis, quemadmodum pastor oues ad pascua ducit) populos sub me, idcirco sequemur & hoc loco eandem sententiam. Postquam igitur Psalmus proposuit nobis Christum DOMINUM Iehoua, excelsum, reuerendum, seu adorandum, & Regem magnum, super omnem terram, pergit nunc hoc versiculo exponere, quomodo hic Rex magnus administret ac gubernet regnum suum, in hoc mundo. Alij enim Reges, si quando suscipiunt alienos populos & nationes imperio suo subiugandas, parant arma, ducunt exercitum equitum & militum, vastant longè lateq; regiones, & subiiciunt eas sibi, quia possunt violentia. Rex Christus autem, subiicit sibi & Ecclesie sue populos & nationes, longè alia ratione. Dicit enim Apostolicus cœtus, seu Ecclesia ipsa, cuius Apostoli sunt ministri: Tu Rex Christe, non adiungis, non subiicis nobis populos & nationes, violenta manu, & externa coactione, sicut Monarchæ huius seculi, sed ducis, DUCIS, inquam, eas subtus nos & pedes nostros. Quemadmodum enim pastor non cogit gregem suum ad pascua, manu gladio armata, sed vocat, ducit & minat eum suauis sonu fistulæ, & iucunda oris voce: ita & tu Rex Christe colligis Ecclesiam tuam ex omnibus populis, qui est sub cœlo, & adducis eos nobis, vt subtus nos & pedes nostros subiiciantur, (hoc est) vt Euangelion, quod Apostoli in Ecclesia adnunciant, obedienter agnoscant, & se imperio eius magna animi promptitudine & alacritate tradant. Hoc prorsus illud est, quod Esaias de vocatione Gentiũ in Ecclesiam Christi dicit: Leua in circuitu oculos tuos, & vide, Omnes isti
cons

congregati sunt, venerunt tibi: filij tui de longe venient, & filia tua de latere surgent. Tunc videbis & afflues, & mirabitur & dilatabitur cor tuum, quando conuersa fuerit ad te multitudo maris, fortitudo Gentium venerit tibi. Et mox: Venient ad te curui filij eorum, qui humiliauerunt te, & adorabunt vestigia pedum tuorum omnes, qui detrahebant tibi. Et Christus ipse: Animam meam pono pro ouibus, *Ioan. 10.* Et: Alias oues habeo, quæ nō sunt ex hoc ouili, illas quoq; oportet me adducere, & vocem meam audient, & fiet vnum ouile, vnus pastor. Plaudamus igitur manibus, & agamus Deo gratias, quod dederit nobis Christum, talem regem & pastorem, qui ducat nos ad optima Euangelij sua pascua, quibus ad cœlestem & æternam vitam enutriamur.

4. *Eligit nobis hereditatem nostram, magnificentia Iacob.*

Quod in versiculo proximè præcedenti de vocatione Gentium in Ecclesiam Christi dixit, hoc nunc alia sermonis forma exponit. Et quia hæc fit mentio magnificentia Iacob, repetenda erit ex libro Geneseos historia illa, in qua promittitur Patriarchæ Iacobo Christus, & vocatio Gentium ad Ecclesiam Christi, vt quid sibi hic versiculus velit, rectius intelligamus. In Genesi enim cap. 28. cum Patriarcha Iacob (quem Deus singulari fauore prosequabatur, & vt per Prophetam postea dixit: Iacob dilexi, Esau autem odio habui) fugeret fratrem suum Esau, & proficisceretur in exiliū, vidit in somnis scalam stantem super terram, & cacumen illius tangens cœlum, angelos quoq; Dei ascendentes & descendentes per

eam. Et DOMINVM innixum scalæ dicentem sibi: Ego sum DOMINVS Deus Abraham patris tui, & Deus Isaac. Terrā, in qua dormis, dabo tibi, & semini tuo: eritq; semen tuū quasi pulvis terræ. Dilataberis ad Orientem & Occidentē, & Septentrionē, & Meridiē, & benedicetur in te & in semine tuo cūcūq; tris busterre. Et ero custos tuus, quocūq; perrexeris, &c. Hæc est promissio longè omniū magnificentissima. Vnde & Iacob vocat eum locū, in quo hæc promissio facta est, Bethel, hoc est, domum Dei, & portam cœli. Ac videtur quidem, quod hæc promissio iuxta literam, nihil aliud contineat præter terrena bona, hæreditatem regionis Canaan, multiplicationē carnalis posteritatis Iacob, & dilarationem eius vsq; ad terminos Cananaeos. Sed Spiritus sanctus lōgè maiora & excellentiora intelligit. Cū enim promittit benedictionem in semine Iacobi, promittit Christū DOMINVM, è posteritate Iacobi nasciturum, vt in ipso omnes, qui credunt, veram, cœlestem & æternā benedictionem consequantur. Cum promittit dilarationem seminis seu posteritatis Iacobi, vsq; ad quatuor plagas terræ, promittit vocationem Gentium ad Ecclesiam Christi, è toto orbe terrarum, ab Oriente, Occidente, Septentrione, & Meridie. Quæ promissio facta est Iacobo insigni magnificentia, & visendo apparatu. Videbat enim Iacob scalam stantē in terra, & porrigentem se vsq; ad cœlum: videbat angelos in scala descendentes & ascendentes: videbat item DOMINVM scalæ in superiori extremitate incumbentem, & promittentem ipsi maiorem hæreditatem, quàm vnquam optare, nedū sperare potuisset.

Recte

Rectè igitur Psalmus vocat eam, magnificentiâ Iacob, & significat hoc versiculo, impleri per Christum, quod & ipse sit semen illud benedictum, Iacobo promissum, & seligat atq; colligat per Euangelion suum ex omnibus populis & nationibus in toto orbe terrarum veram Ecclesiam, quæ est vera posteritas Patriarcharum, Abraham, Isaac & Iacob. Seligit (inquit) nobis hæreditatem nostram, Iacobo magnificentissimè promissam, (hoc est) Christus, quod lōgè antè, de vocatione Gentium ad Ecclesiam promissum erat, copiosè & abundanter implet. Seligit enim & adducit in Ecclesiam suam non Iudæos tantum, sed etiam Gentes, quæ dicuntur hæreditas tam Christi, iuxta illud Psalmi secundi: Postula à me, & dabo tibi Gentes hæreditatem tuam, quàm Ecclesiæ, quod iam olim promissum erat, Gentes ad Ecclesiā Christi accessuras. Non arbitremur aut vocationem Gentium tradi nobis in scriptis Prophetiis & Apostolicis osciose. Primum enim Gentium vocatio ad Ecclesiam populi Dei, certissima testificatio est, quod Iesus Nazarenus filius Mariæ, sit verus ille Messias seu Christus, qui ab initio orbis, seruator mundi, promissus est. Patriarchæ enim & Prophetæ, Spiritu sancto excitati, adnuntiauerunt futurum, vt temporibus Messiae, Gentes accessuræ sint ad Ecclesiam populi Dei. Nō est autē quispiam in vniuerso humano genere, cuius nomine & prædicatione Gentes Idolatræ abiecerint suam Idolomaniam, & acceperint cognitionem veri Dei, præterquàm in nomine DOMINI nostri Iesu Christi, per Euangelion eius, quod concionibus Apostolicis adnuntiatum est in toto orbe terrarum

Esa. 60. 61. 62.

Rom. 9.

Ioan. 15.

inter omnes Gentes. Quare, cum Gentes agnouerint verum Deum, & accesserint ad Ecclesiam populi Dei, per prædicationē Euangelij de Iesu filio Mariæ, manifestum est, & comprobatum, hunc Iesum esse verum Messiam seu Christum, ab initio conditionis mundi promissum. Deinde, Gentium vocatio palam declarat, quale sit regnum Christi in his terris. Nam, cum Gentes nullis mūdānis armis coactæ, sed tantum credentes Euangelio per Apostolos adnunciato, accesserint ad Ecclesiam populi Dei, & victoriam, in mediā etiā morte, ab hostibus suis per Christum reportauerint, dubitandum non est, quin regnum Christi in hoc seculo nō sit carnale & mundanum, sed spirituale & cœleste. Postremò Gentium vocatio docet, quomodo iustificemur coram Deo.

Rom. 9.

Iudæi enim, qui sectabantur legem iustitiæ, vt Paulus ait, ad legem iustitiæ non peruenerunt. Propter quid? Quia non ex fide, sed tanquam ex operibus legis. Impegerunt enim in lapidem offendiculi. Gentes autem, quæ non sectabantur iustitiam, apprehenderunt iustitiam, iustitiam autem eam, quæ est ex fide. Quare nomine vocationis Gentium admoneamur de modo, quo coram Deo iustificamur, videlicet, quod accipiamus remissionem peccatorum, & reputemur coram Deo iusti, nō propter vlla merita operum, non propter vllam humanam nostram iustitiam, sed tantum gratis, ex mera & gratuita clementia Dei, propter solum Iesum Christum, si in ipsum credimus. Huic Christo, inquit Petrus, omnes Prophetæ testimonium ferunt, quod remissionem peccatorum accepturus sit per nomē eius, quisquis cre-

diderit

Acto. 10.

diderit in eum. Et iterum: Quid tentatis Deum, vt *Acto. 15.*
 imponatur iugum super ceruices discipulorū, quod
 neq; Patres nostri, neque nos portare potuimus: sed
 per gratiam DOMINI Iesu Christi credimus nos sal-
 uos futuros, quemadmodum & illi. Ac rursus: Arbi-
 tramur fide (in Iesum Christum) iustificari hominem,
 absque operibus legis.

5. *Ascendit Deus Iubilo, DOMINVS voce tubæ.*

Epilogus non quidem totius Psalmi, sed prioris
 tantum partis de maiestate Christi. Illud autem vult
 dicere. Commemorauimus Christum esse DOMI-
 NV M excelsum, adorandum, Regem magnum su-
 per omnem terram, & adiungere Ecclesiæ suæ Gens-
 tes, sicut quondam promissum fuit Patriarchæ Iacob.
 Quid verò pluribus opus? Conferam summam mai-
 estatem Christi in pauca. Christus verus Deus &
 DOMINVS ascendit maximo omnium tam Ange-
 lorum, quam piorum hominum gaudio, & cœlesti
 apparatu. Quò autem ascendit? In cœlum. Recte,
 Notissima enim est historia de ascēsu Christi in cœ- *Acto. 1.*
 lum, quæ testificatur, eum quadragesimo die à resur-
 rectione sua à mortuis, spectante choro Apostolos
 rum & aliorū discipulorum, eleuatum esse in altum,
 & à nubibus ab oculis ipsorum sublatum. Sed quidē
 num hæsit in nubibus immotus, & adhuc ibi visibili
 forma commoratur? Nihil minus. Sed ascendit in
 cœlum. Quid? Num, vt in corporali cœlo, corporali
 modo, aut in vno tantum loco circumscribatur, aut
 nunc ibi sedeat, nunc stet, nunc deambulet? Sic quis-

dem somniant ἡσδύμοι περὶ τὸ πῶς. Sed ita ascendit in
 cœlum, vt euadat super omnes cœlos, quemadmo-
 dum Paulus ait, & sedeat ad dexteram Dei Patris
 omnipotentis, hoc est, vt æqualem cum Deo Patre
 habeat potentiam & maiestatem, & gubernet præ-
 sens cum ipso omnia, in cœlo & in terra. Ac æter-
 nus quidem filius Dei, cum assumeret hominē in v-
 nitatem suæ personæ, auexit eum, vt ita dicam, secū,
 in cœlestem gloriam, ad dextram Dei Patris sui om-
 nipotentis, arcano quodam, & inuisibili ascensu,
 quam tamen gloriā & maiestatem Christus tempore
 suæ humiliationis & exinanitionis non voluit, nisi
 ædendis aliquot miraculis, & alijs quibusdam argu-
 mentis palam ostentare. Postquam autem resurrexit
 à mortuis, et ascēdit in cœlū, ac misit discipulis in die
 Pentecostes Spiritum sanctum, ibi tum cœpit maies-
 tatē suam palam ita patefacere, vt manifestē cognos-
 ceretur, Deum Patrem omnia, quæ habet, dedisse ei.
 Sicut & Petrus testatur: Hunc Iesum, inquit, susci-
 tauit Deus, cuius omnes nos sumus testes. Dextera
 igitur Dei exaltatus, & promissione Spiritus sancti
 accepta à Patre, effudit hoc, quod nunc vos videtis
 & auditis. Ac mox: Certò sciat tota domus Israël,
 quòd Dominum et Christum fecerit, (hoc est) decla-
 rauerit Deus hunc Iesum, quem vos crucifixistis. Et
 Paulus: Chirographum, quod erat contrarium nos-
 bis per decreta, sustulit è medio, affixum cruci, expo-
 liatosq; principatus ac potestates, ostentauit palam,
 triumphās de illis, per semetipsum. Hæc expoliatio
 & ostentatio principatuū, & potestatum, & hic tri-
 umphus Christi, est iubilus ille, & clangor tubæ, quo
 ascendit

Ioan. 16.

Acto. 2.

ascendit in cœlum ad dextram Dei Patris sui omnis potentis. Cum igitur habeamus tantum ac talem triumphatorem, ad dexteram Dei, quæ non includitur in vnum tantum locum, sed porrigit sese in cœlum & terram, quid nobis faciendum est? Sequitur.

6. *Psallete Deo, psallite, psallite Regi nostro, psallite.*
7. *Quoniam Rex totius terræ, Deus, psallite sapienter.*
8. *Regnat Deus super Gentes, Deus sedet in sancto suo throno.*

Illud videlicet faciendum est, quòd cum habeamus Regem, non hominem tantum, sed heroem, adeoq; Deum ipsum, psallamus ei, laudemus eum, & celebremus nomen eius sapienter, hoc est, maxima diligentia, & summo studio. Nam, ut sciamus Psalmum, canticum, & laudem Christi exigi à nobis serio, nō semel tantum dicit, psallite, seu canite, sed repetit, & ingeminat, bis, ter, quaterque: Psallite, inquit, Deo, Psallite Regi nostro, psallite, psallite, inquam, sapienter seu studiosè. Hoc prorsus illud est, quòd in alio Psalmo dicitur: Cantate Deo, (Christo) Psalmum dicite nomini eius, parate viam ascendenti in lucem inaccessam. Et iterum: Regna terræ cantate Deo, psallite DOMINO, ascendenti in cœlos cœlorum æternos. Ac in alio Psalmo: Laudabo nomen Dei cantico, & magnificabo eum laude. Et placebit Deo magis, quàm taurus aut iuuenus, qui producit cornua & ungulas. Quis ergo est Psalmus ille? & quod est carmen illud, quo tantoperè Deus delectatur? Num Deus placatur suauitate modulationis

tionis rhythmicæ: Non est quidem obscurum, quòd Psalmi seu carmina, quæ hypocritæ Deo, ad expianda hoc operis merito peccata sua obtrudunt, non sint ei grata: Væ vobis, inquit Propheta, qui canitis ad vocem Psalterij, sicut David, putant se habere vasa cantici. Hoc autem loco nō fit sermo de hypocritarum canticis, sed de prædicatione Euangelij de Christo, quod Spiritus sanctus iubet ad omnem posteritatem propagari. Hic enim cantus, hic cultus Deo longè omnium gratissimus est, videlicet, vt maiestas Christi prædicatione Euangelij sui, siue id Psalmis fiat, siue simplici adnuntiatione, in toto orbe terrarum diuulgetur & illustretur. Officium autem hoc Deo gratū est, non quòd per se humana laus delectetur, Deus enim non indiget aliena laude, sed illud vult, vt homines agnitione Christi verā & æternam salutem consequantur. De hominum salute agitur, vt ex prædicatione Euangelij de Christo cōcipiant fidem, corroborentur in spe, & accendantur ad charitatem. Hæc exigit Deus à nobis, dum hortatur ad canendos Psalmos, (hoc est) ad doctrinam Euangelij propagandam, hæc vult Deus à nobis præstari, hæc illa sunt, quæ nobis propter Christum, ad æternam salutem cedunt. Agnoscamus igitur cōsiliū Spiritus sancti, & sciamus, quòd cum tam sollicitè nos ad nomen & laudem Christi Psalmis & carminibus celebrandam, cohortatur, cogitet nos ad fidem, spem & charitatem, qui sunt cultus Deo gratissimi, & nobis maximè omnium salutare, excitare, & inflammare. Cæterum, vt consiliū & voluntatem eius clarius intelligamus, ac nihil intermittat, quo

quo ad hos cultus excitemur, non piget eum repetere descriptionem maiestatis Christi, quam & paulo ante commemorauit: Psallite, inquit, psallite. Ob quam causam? Quia Deus (qui est Christus,) Rex est omnis terræ. Regnat enim non inter Iudæos tantum, sed etiam inter Gentes, quas prædicatione Evangelij sui vocat ad Ecclesiam populi Dei. Et sedet in sancto throno suo. Ecquis est thronus ille, in quo Christus sedet? Audi Prophetam: Cœlū mihi thronus est, & terra scabellum pedum meorum. Audi & Psal. 66. Psal. 119. Dixit DOMINVS Domino meo, Sede à dextris meis. Dextra igitur Dei, quæ cœlum & terram implet, thronus Christi est, è quo omnia, quæ in cœlo & terra sunt, gubernat, & cū tam insignem, tam magnificum habeamus Regem, agite, credamus Evangelio eius, confirmemus spem nostram in omnibus aduersis, & complectamur proximum charitate nostra, vt hoc Rege adiuti, & seruati, euadamus per mortem ad perpetuam vitam.

9. *Principes populorum coniunguntur cum Deo Abrahami, quia super Deos, scuta terra, valde exaltatus est (Deus.)*

Vbi nos in hoc versiculo legimus *וַיִּמְ* Im, cum puncto Hirick, & significat cym, ibi alij legunt *וַיִּאֵם* Am, cum puncto Patha, & significat, populus. Et tamen eadem est sententia, siue interpreteris, Principes populorū cōgregati sunt, vt sint populus Dei Abrahami, siue Principes populorū consociantur cum Deo Abrahami. Deinde, vbi nos interpretati sumus, super Deos, Hebræus textus habet *וַיִּבְרַךְ* Lelohim, & ponitur

nitur pro מַלְאָכָיו Al Elohim. Significat aut hoc loco, nō Deum cœlestem, sed Iudices & Magistratus, quos vocant scuta, hoc est, defensores & protectores hominum, qui in terra morantur, quemadmodum idem vocabulū in eodem significato sumitur in illo dicto Exodi: Dñs, (hoc est) Iudicibus & Magistratibus non detrahes. Cum igitur Psalmus supra commemoravit, Christum Regem dominari tam inter Iudeos, quā inter Gentes, & vocare eas in Ecclesiā populi sui, nūc in hoc ultimo versiculo cōmemorat, eum ex Gentibus vocare non tantum vulgum & fecem populi, verūmetiam Principes & Magistratus, adeoq; illos, qui sunt scuta, & protectores terræ, ad Ecclesiā Dei Abraami. Hoc illud est, quod Christus

Matth. 8. apud Matthæum ait: Multi ab Oriente & Occidente venturi sunt, & accumbent cum Abraam & Isaac & Iacob in regno cœlorum, filij verò regni ejciuntur in extremas tenebras. Et antea, apud Esaiam:

Esai. 49. Reges erunt nutritij tui, & Regina nutrices tuæ. Ac rursus: Ambulabunt Gentes in lumine tuo, & Reges in splendore ortus tui. Et mox: Ædificabunt filij peregrinorum muros tuos, & Reges eorū ministrabunt tibi. Vides magnificentiam Regis Christi superare & excellere omnium mundanorum Principum, Regum & Monarcharum maiestatem, & ut hoc verbis huius Psalmi dicam, Christū DOMINVM valde et incomparabiliter exaltatū esse, super omnes Deos, super omnia scuta, super omnes Magistratus & tutores huius terræ. Agnoscamus igitur tantam Christi maiestatem venerabundi, & celebremus eam, quibus possumus officijs, ut beneficijs eius perpetuò fruamur.

VSVS HVIVS PSALMI.

Perspicuum est, quòd hîc Psalmus contineat encomium maiestatis DOMINI nostri Iesu Christi, qua superat omnem tam humanam, quàm angelicam celsitudinem. Quare, quemcunq; vsus habet Euangelion de Christo, eundē habet & hic Psalmus. De prædicatione autem Euangelij, Paulus ad Romanos scribens: Euangelion, inquit, potentia Dei est ad salutē omni credenti. Quisquis igitur in Ecclesia populi Dei, ante incarnationem Christi, excisatus grauissimis calamitatibus, vel publicis Ecclesiæ Dei, vel priuatis suis ipsius, variè afficiebatur, & de salute sollicitabatur, potuit ex recitatione, & pia consideratione huius Psalmi animum recipere, fiduciam suam confirmare, & veram ac certam spem salutis concipere. Finxerit enim vel cœlum ipsum rursitutum, tamen verus ille Rex & Messias, quem hic Psalmus describit, & qui suo tempore in hunc mundum venturus, & hominem assumpturus erat, non committet, vt vel è throno maiestatis suę deiciatur, vel populum suum in aduersis non tueatur & conseruet. Qui verò post incarnationem Christi affligitur, & confert se ad commemorationem & considerationem huius Psalmi, re ipsa comperiet ea, quæ tot antè annis de Christo & regno eius adnūtiata sunt, nunc his temporibus, quoad eius in hoc seculo fieri potest, patēfacta esse, & impleta. Quid igitur de salute vel Ecclesiæ, vel tua ipsius, adhuc dubitas? Qui nos seruat, & tuetur, Christus DOMINVS Deus est, Rex magnus est, super omnem terram. Selegit

in hæreditatem suam, non Iudæos tantum, sed etiam Gentes. Ascendit, expoliatis omnibus spiritualibus potestatibus, in cœlum, & excellit maiestate sua omnes Principes & Reges huius seculi. Quid multis? Sedet ad dexteram Dei Patris sui omnipotentis, & intercedit pro nobis, vt quotquot in ipsum credunt, non pereant, sed habeant æternam vitam. Quare, etiamsi fractus illabatur orbis, tamen non accedet ad nos malum, (vt alius Psalmus loquitur) nec flagellum appropinquabit tabernaculo nostro.

Psal. 91.

Psalmus 48.

Magnus DOMINVS & laudabilis nimis, &c.



Vm Salomon excitasset, diuino mandato, templum DOMINI in Hierusalem, & dedicasset publica precatone, ac Sacrificijs, testificatus est DOMINVS cœlestibus tam miraculis, quam promissionibus, hoc institutum sibi mirifice placere. Et dixit: Elegi, & sanctificaui locum istum, vt sit nomen meum ibi in sempiternū, & permaneant oculi mei, & cor meum ibi cunctis diebus. Hæc est liberalissima promissio, qua Deus gratuita sua clementia recipit se urbem Hierusalem & templum in ea ædificatum, aduersus omnes hostiū assultus semper defensurum & conseruaturum. Etsi enim hæc & id genus aliæ promissiones de conseruatione vrbis & templi Hierosolymitani, respiunt et
princi

2. Paral. 7.

principaliter in conseruationem verę & æternę Ecclesię Christi, aduersus quam, ne portę quidem infetri præualere possunt, tamen externa vrbs Hierusalem, & templum eius, non sunt omnino ab illis promissionibus excludenda, sed potius includenda, vt intelligamus, DOMINVM externa illa tantisper salua conseruaturum, dum populus Israel verampietatem sectetur, & tempus diuinitus de incarnatione DOMINI nostri Iesu Christi, qui his externis vnā cum Ecclesia sua adumbratus est, definitum aduenierit. De qua re supra, in explicatione Psalmi 46. non nihil dictum est.

Quod autem Deus de tuenda externa illa vrbe Hierusalem, & templo eius, verbis promisit, hoc etiā mirandis factis, & re ipsa præstitit.

In 2. Paralip. cap. 12. Sefac Rex Ægypti cœpit munitissimas ciuitates in Iuda, & venit vsq; ad Hierusalem. Etsi autem spoliat templum, & aulam regiam omnibus suis thesauris, tamen non diruit, tuente DOMINO, nec templum, nec urbem.

In eodē libro cap. 20. incurrunt Moabitæ & Ammonitę in regnum Iuda, & minantur extremum tam templo, quā vrbi Hierusalem exitium. Sed DOMINVS ita terret hostes, vt mutuis suis vulneribus conscidant.

In 4. libro Regum cap. 16. & Esa. 7. ascendunt rex Syrię, & Israel, & oppugnant urbem Hierusalem, sed expugnare non potuerunt.

Et iterum cap. 18. Rex Assyriorum tanta spe opprimendę vrbs Hierusalem tenerur, vt arbitretur, ne Deum quidem ipsum posse eam defendere, & cō-

seruare. Sed opinione sua ita fallitur, vt non solum exercitum, supplicio diuinitus immisso, amittat, verum etiam ipse domi à suis ipsius liberis immaniter trucidetur: adeoque id ipsum prorsus contigit, quod hic Psalmus commemorat: Ecce Reges, inquit, congregati sunt, (aduersus Hierusalem) & simul transierunt. Viderunt hoc, & admirati sunt, conturbati sunt & metu percussi, Terror inuasit eos ibi, & angustia, vt parturientem.

Hec & multa id genus alia miracula, quibus vrbs Hierusalem diuinitus, in aduersis suis casibus, sæpe numero defensa est, psalter cum animo suo considerans, excitatur à Spiritu sancto, & erumpit in hunc Psalmum, ad commendandam bonitatem & clementiam Dei, & ad illustrandam veritatem promissionum eius, vt excitet nos ad fidem, & retineat in officio fidei, ne propter aduersa dubitemus de veritate Dei, & delabamur ad impietatem.

1. *Magnus DOMINVS, & laudatissimus, in ciuitate Dei nostri, in monte sancto eius.*
2. *Pulcer surculus, latificans vniuersam terram, mons Zion, ad latera Aquilonis, ciuitas regis magni.*
3. *Deus in palatijs eius notus est, quod sit protector eius.*

Propositio Psalmi, continens topographiam vrbs Hierusalem, in qua gloria nominis Dei maxime omnium celebrari debet. Magnus, inquit, est DOMINVS, & omni laude dignissimus. Quid? Magnus ne est corporea mole? Nihil minus, Deus. n. Spiritus est, non corporea moles: sed magnus est essentia, qua omnia implet: magnus potentia, qua omnia creat, conseruat

conseruat & gubernat: magnus veritate, qua omnium promissionum suarum seruantissimus est: magnus bonitate & clemētia, qua sperantes in ipsum in omnibus aduersis tuetur: magnus felicitate, qua se omnibus in ipsum credentibus fruendum exhibet. Quid plura? tam magnus est, ut sit ipsa essentiae, potētia, veritatis, clemētia & felicitatis magnitudo, ac superet non tantum omnes humanas & Angelicas excellentias, verum etiam omnium hominum & Angelorum voces. Non enim habemus vocabula propria & apposita, quibus summam illam maiestatem verē & aptē exprimamus. Quemadmodum autem DOMINVS est longē omnium maximus, ita etiam laudatissimus. Et sicut magnitudinis eius non est finis, ita laudis eius nullus est numerus. Sed ubi nam terrarum aut Gentium tanta DOMINI maiestas elucet, & conspicua redditur, ut laude, qua fieri potest, celebretur? Non est quidem obscurum, quod maiestas DOMINI cognoscatur ex conditione huius mundi, (sicut Paulus testatur) ex gubernatione coeli & terrae, & ex multis admirandis rebus, quas Deus operatur, sed maxime omnium cognoscitur ex ijs, quae in ciuitate Dei nostri, & in monte sancto eius hactenus peracta sunt, & adhuc peragentur. Quae est ergo illa ciuitas Dei, & quis ille mons sanctus, in quo tam miranda opera sunt aedita? Non certe est Ninive Assyriorum, non Babylon Chaldeorum, non Susa Persarum, non Roma Latinorum, sed est mons Zion. Hic mons primum est mons sanctus Dei, quia Deus elegit hunc montem, ut in eo aedificaretur templum Dei, & collocaretur arca testamenti, ac peragerentur legitima sacrificia.

sacrificia, diuinitus ordinata. Deinde hic mons est speciosus & amœnus surculus, latificans vniuersam terram, quia futurum erat, vt Christus eo loco annuntiaret Euangelion suum, & expiaret sacrificio suo peccata nostra; ac mitteret Apostolos suos in vniuersum mundum, vt proferrent tanquam fertilis surculus, copiosissimum fructū, & gaudio afficerent cunctam Ecclesiam Christi, in toto orbe terrarum. Postremò ad hunc montem versus Aquilonem, sita est ciuitas magni Regis, ciuitas videlicet Dei nostri. Hæc est ciuitas Hierusalem, quæ posita est ad illud montis Zion latus, quod ad Aquilonem prospicit. Vnde & Rex Babylonius apud Esaïam cap. 14. dicit: Sedebo in monte testamenti, in lateribus Aquilonis, (hoc est) in tantam maiestatem conscendam, vt subiiciam potestati meæ montem Zion, & urbem Hierusalem, quæ ad montem istum versus Septentrionem sita est. De illo videlicet glorians, se non solum in potestatem suam redacturum alias Gentes finitimas, alijs dijs seruientes, verumetiam illam Gentem, quæ iactat se esse populum veri & æterni Dei, & quem vnum in Zion & Hierusalem colit & adorat. Habes topographiam ciuitatis Hierusalem. Sed quid sit in ista ciuitate? In palatijs, (inquit) in magnificis ædibus eius palam cognoscitur, quod DOMINVS sit protector eius. Palatia & magnifica eius ædificia publicum ferunt testimonium, quod DOMINVS suscepit eam in suam tutelam, & defendat eam aduersus omnium hostium suorum impetum. Quare, etsi DOMINVS dignissimus est, qui in toto orbe terrarum suo præconio celebretur, tamen
propter

propter singularem eius fauorem, quo complectitur urbem Hierusalem, magnificandus est & laudandus. Sed qua in re Deus curam suam & tutelam erga urbem Hierusalem testatus sit, versiculi, qui sequuntur, exponunt.

4. *Quoniam ecce Reges pepigerunt inter se, susceperunt vnà profectionem.*
5. *Cum vidissent, ita perturbati sunt, vt cohorrerint, & ad fugam properauerint.*
6. *Tremor inuasit eos ibi, dolor, sicut parturientem.*
7. *Vento orientali conteris naues maris.*

Propositionē & topographiam vrbs Hierusalē, sequitur narratio, in qua cōmemoratur, quantis sæpenumero miraculis vrbs Hierusalem defensa sit & conseruata diuinitus. Ecce, inquit, Reges conueniunt, seu pepigerunt inter se, in exitiū vrbs Hierusalem, susceperunt vnanimi consensu oppugnandam hanc urbem, & delendam: sed vide mihi præsentissimam Dei opem. Tantum enim abest, vt potuerint eā expugnare, vt quāprimū eam in prospectu haberint, cohorrerint, tam corpore, quam animo: ac ita sint diuinitus conterriti, vt magis de fuga, quā de vrbs oppugnatione cogitauerint: nec aliter contremuerint, quam si mulier prægnans subito partus dolore obruatur. Hoc autem factum est, nō excogitato aliquo humano consilio, aut obiectis carnalibus viribus, sed cœlesti & diuino miraculo. Nam quemadmodū naues maris solent, excitato vehementissimo vento, (quem Eurum, aut Cæcian vocant) vel repentina procella hinc inde disijci, dissipari, & conteri, ita

DOMINVS dissipauit & cōtriuit hactenus, immisso diuinitus terrore, omnes hostes vrbis Hierusalem. Hoc testantur & confirmant exēpla, quæ paulo antè recensēbamus de Moabitīs & Ammonitīs, de rege Syriæ & Israhēlis, & de rege Assyriorum. Reliquum igitur est, vt ex his miraculis agnoscamus, urbē Hierusalem singulari curæ esse DOMINO Deo nostro, & cōmendemus gratuitam clementiā eius, erga populum suum, qua cōfirmati, speremus eum nunquam nobis cœlesti sua ope defuturum. Vnde & sequitur.

8. *Quemadmodum audiuius, ita & videmus in ciuitate DOMINI Zebaoth, in ciuitate Dei nostri. Deus stabilis eam perpetuò.*

Quid multis opus est? Quemadmodum hactenus audiuius ex diuinis oraculis & promissionibus, quòd Deus suscepit tutelam vrbis Hierusalem & populi sui, ita re ipsa comperimus, Deum esse in promissis suis veracem, & urbem ac populum suum mirandis modis defendere & stabilire. Dixit DOMINVS ad Moysen: Ego DOMINVS. Assumā vos mihi in populum, & ero vester Deus, & scietis, quòd ego sum DOMINVS Deus vester.

Exo. 6.

2. Paral. 7.

Ad Salomonem dicit DOMINVS: Elegi & sanctificauī locum istum, vt sit nomen meum ibi in sempiternum, & permaneant oculi mei, & cor meum ibi cunctis diebus.

Ps. 132.

Et Psal. 132. Elegit DOMINVS Zion, elegit eam in habitationem sibi. Hæc requies mea in seculum æculi, hæc habitabo, quoniam elegi eam.

Hæc & his similia dicta audiuius sæpè ac multū recitari nobis è sacris monumentis. Quod igitur dis
cūm

Etum est verbis, hoc etiam impletum esse factis ita videmus, vt de veritate diuinorum oraculorum non amplius nobis vlla dubitatio relinquatur. Et si enim populus Israël sæpe afflictus est, & vrbs Hierusalem tandem à Babylonijs vastata, tamen post annos desinit à Deo exiliij, restituta est mirabiliter, ac tãtis per incolumis perdurauit, donec Christus homo factus, absolueret in ea suum sacrificium, & instauraret in toto orbe terrarum veram Zionem, quæ est Ecclesia DOMINI nostri Iesu Christi, per Euangelion in vniuerso mundo collecta.

9. *Expectamus (igitur) Deus misericordiam tuam, in medio templi tui.*
 10. *Secundum nomen tuum, sic & laus tua est, ad fines vsque terræ, iustitia plena est dextera tua.*

Accommodat exempla seruatae vrbs Hierusalem, in periculis suis, ad generalem vsum, vt cum Deus constantissimè semper promissiones suas in tuenda vrbe Hierusalem impleuerit, non dubitemus ò DOMINE, sed certissimè expectemus, vt & in nos beneficia tuæ misericordiæ conferas in medio templi tui, (hoc est) in Ecclesia populi tui. Sumus enim & nos Ecclesia tua, sumus populus tuus. Et habemus atq; agnoscimus promissiones, quibus recepisti, te credentes ita protecturum, vt ne portæ quidem inferi aduersus eos præualeant. Nam quàm late patet nomen tuum, (patet autem, non ad vnum tantum angulum, aut regionem, sed vsq; ad fines terræ) tam late etiam patet laus & gloria nominis tui, videlicet, quòd dextera tua plena sit iustitia, (hoc est) quòd quanta est potentia tua, (quæ per dexteram si-

gnificatur, & est omnipotentia) tanta etiā sit iustitia, probitas, veritas & cōstantia in seruandis promissis tuis. Memorabilis versiculus de dextera, seu potentia & iustitia Dei. Sunt enim, qui fatentur, se agnoscere quidem dextram seu omnipotentiam Dei, dubitare aut de iustitia seu probitate, & clementi eius voluntate erga se. Agnoscunt Deum posse quidem ipsos in omnibus aduersis, ac in morte ipsa seruare, non aut agnoscunt eum id VELLE. Hos reprehendit hic versiculus, dum dicit, dexteram Dei plenam esse iustitia. Quod enim Deus verbis promissit, hoc sicut POTEST, ita etiam VULT reipsa præstare, quia non tantum est omnipotens, sed etiam iustus, seu probus & verax, atq; constans in pactis & promissis suis, ut quā patet dextera seu omnipotentia eius, eā etiam pateat iustitia, probitas, aut veritas eius. Promissit aut, ut omnis, OMNIS, inquam, nullo vel misero, vel peccatore excepto, qui credit in vnigenitum suum filium, non pereat, sed habeat vitam æternam. Et iterum: OMNIS (inquit) qui credit in illum, non pudeat fieri. Non enim est distinctio Iudæi, (siue honesti) & Græci, (siue inhonesti & scelerati) OMNIS enim, quicumq; inuocauerit nomen DOMINI, saluus erit. Quare dubitari non debet, quin cum Deus possit credentem in Christum seruare, quia est omnipotens, VELIT etiam eum, iuxta promissa sua seruare, quia dextera eius plena est iustitia.

Ioan. 3.

Rom. 10.

11. *Latetur mons Zion, exultent filia Iudæ, propter iudicia tua.*

12. *Circundate Zion, & cingite eam, numerate turres eius.*

13. *Ponite*

13. *Ponite cor vestrum ad antemurale eius, munite palatia eius, vt enarretis posteritati.*
14. *Quod hic Deus, sic Deus noster in æternum, & in seculum seculi. Ipse ducit nos, sicut iuuentutem.*

Concludit Psalmum cohortatione, vt ciues vrbs Hierusalem agnoscant alacri & confidenti animo iudicia DOMINI, & conseruent, ac tueantur, quod in ipsis est, ciuitatem Hierusalem, quæ est sedes piæ doctrinæ, propagandæ ex eo loco in vniuersum mûdum, de DOMINO nostro Iesu Christo. Lætetur, iniquiens, mons Zion, exultent filiæ Iudæ. Mons Zion, in quo extructum fuit templum DOMINI, significat hoc loco ciues vrbs Hierusalem. Filiæ autem Iudæ significant incolas finitimæ tribus Iudæ. Solæ enim hæ duæ tribus, Beniamin videlicet, in qua est mons Zion seu vrbs Hierusalem, & tribus Iudæ, manserunt in separatione regni Salomonis, sub gubernatione regiæ familiæ Dauidis. Iubentur igitur hæ duæ tribus lætari & exultare propter iudicia Dei, hoc est, propter clementiam Dei erga se, & seueritatem eius erga hostes ipsorum. Iudicâte enim DOMINO, pii conseruantur, & liberantur, impij autem opprimuntur & pereunt. Hortatur etiam, vt circumeant Zionem, ac circumspiciant urbem Hierusalem, & numerent turres eius, num sufficiant ad defensionem eius, ac diligentissimè considerent antemurale eius, ne fortè aut corruerit, aut casum mines tur: ac breuiter, muniant, quoquo studio possunt, palatia seu propugnacula eius, vt reddatur vrbs inexpugnabilis, & conseruetur in ea, atque transmittas.

tur ex ipsa, ad omnem posteritatem, doctrina verè
 pia: videlicet, quòd hic Deus, quem cœlestis pater
 promissit assumpturum è familia Patriarcharum ho-
 minem, qui dedit terram Canaan posteritati eorum
 in possessione, qui hætenus sacris, in templo Hie-
 rosolymitano institutis, adumbratus est, qui & vsq;
 ad hoc tempus tutatus est urbem Hierusalē, & tem-
 plum eius ab omnibus hostibus eius, sit verus, & æ-
 ternus D O M I N V S Deus noster, & foueat nos, ac res-
 gat & deducat, sicut suauissimus parens adolescētes
 suos filiolos fouere solet. In Hebræo enim textu, vbi
 nos transtulimus, iuuentutem, habetur, חַל מוֹת Hal-
 muth, & potest esse vel vna tantum dictio, vel duæ.
 Si igitur diuiseris in duas dictiones, vt חַל מוֹת Hal, &
 מוֹת Moth, tunc significat vsq; ad mortem, quemad-
 modum nonnulli interpretes transtulerunt: si autem
 vna tantum dictio fuerit, significat, aut in seculum,
 aut iuuentutem. Quodcuncq; igitur legeris, sententia
 plana est, quòd D O M I N V S noster Iesus Christus,
 qui hætenus defendit urbem Hierusalem, conseruet
 nos, credentes in ipsum, in omnibus periculis, vsque
 ad mortem, perpetuò, sicut parens solet iuuenes suos
 filios ducere, & gubernare. lubetur autem ciues Zi-
 onis seu Hierusalem, & incolæ finitimæ tribus Iude
 munire & defendere urbem Hierusalem, quòd etsi
 Deus ipse eam defendit, (nisi enim D O M I N V S cus-
 todierit ciuitatem, frustra vigilat, qui custodit eā)
 tamen officium piorum hominum exigit, vt & ipsi
 suam operam ad tuendam & conseruandam Ecclesia-
 am D O M I N I Dei nostri, conferāt, & sint administri
 cœlestis ac diuinæ defensionis. Quid est (inquit A-
 postolus)

postolus) Apollo: quid Paulus? nisi ministri eius, 1. Cor. 3. cui credidistis, secundum gratiam, quam DOMINVS dedit ei. Ego plantaui, Apollo rigauit, sed Deus dedit incrementum. Nam quemadmodum solus Deus sustentat nos cibo, in hac vita, & tamen parandum est nobis nostro labore frumentum, molendum est, pinsendus panis, & edendum: ita solus Deus tuetur & conseruat Ecclesiam populi sui, & tamen exigit, vt exhibeamus nos organa & instrumenta, per quæ Deus tutelam suam perficiat. Quare non simus in extruenda, & conseruanda Ecclesia populi Dei cessatores, sed faciamus suum quisque officium, vt DOMINO Deo nostro fidem nostram probemus.

VSVS HVIVS PSALMI.

Quod ⁷⁰ ⁷¹ ⁷² ⁷³ ⁷⁴ ⁷⁵ ⁷⁶ ⁷⁷ ⁷⁸ ⁷⁹ ⁸⁰ ⁸¹ ⁸² ⁸³ ⁸⁴ ⁸⁵ ⁸⁶ ⁸⁷ ⁸⁸ ⁸⁹ ⁹⁰ ⁹¹ ⁹² ⁹³ ⁹⁴ ⁹⁵ ⁹⁶ ⁹⁷ ⁹⁸ ⁹⁹ ¹⁰⁰ ¹⁰¹ ¹⁰² ¹⁰³ ¹⁰⁴ ¹⁰⁵ ¹⁰⁶ ¹⁰⁷ ¹⁰⁸ ¹⁰⁹ ¹¹⁰ ¹¹¹ ¹¹² ¹¹³ ¹¹⁴ ¹¹⁵ ¹¹⁶ ¹¹⁷ ¹¹⁸ ¹¹⁹ ¹²⁰ ¹²¹ ¹²² ¹²³ ¹²⁴ ¹²⁵ ¹²⁶ ¹²⁷ ¹²⁸ ¹²⁹ ¹³⁰ ¹³¹ ¹³² ¹³³ ¹³⁴ ¹³⁵ ¹³⁶ ¹³⁷ ¹³⁸ ¹³⁹ ¹⁴⁰ ¹⁴¹ ¹⁴² ¹⁴³ ¹⁴⁴ ¹⁴⁵ ¹⁴⁶ ¹⁴⁷ ¹⁴⁸ ¹⁴⁹ ¹⁵⁰ ¹⁵¹ ¹⁵² ¹⁵³ ¹⁵⁴ ¹⁵⁵ ¹⁵⁶ ¹⁵⁷ ¹⁵⁸ ¹⁵⁹ ¹⁶⁰ ¹⁶¹ ¹⁶² ¹⁶³ ¹⁶⁴ ¹⁶⁵ ¹⁶⁶ ¹⁶⁷ ¹⁶⁸ ¹⁶⁹ ¹⁷⁰ ¹⁷¹ ¹⁷² ¹⁷³ ¹⁷⁴ ¹⁷⁵ ¹⁷⁶ ¹⁷⁷ ¹⁷⁸ ¹⁷⁹ ¹⁸⁰ ¹⁸¹ ¹⁸² ¹⁸³ ¹⁸⁴ ¹⁸⁵ ¹⁸⁶ ¹⁸⁷ ¹⁸⁸ ¹⁸⁹ ¹⁹⁰ ¹⁹¹ ¹⁹² ¹⁹³ ¹⁹⁴ ¹⁹⁵ ¹⁹⁶ ¹⁹⁷ ¹⁹⁸ ¹⁹⁹ ²⁰⁰ ²⁰¹ ²⁰² ²⁰³ ²⁰⁴ ²⁰⁵ ²⁰⁶ ²⁰⁷ ²⁰⁸ ²⁰⁹ ²¹⁰ ²¹¹ ²¹² ²¹³ ²¹⁴ ²¹⁵ ²¹⁶ ²¹⁷ ²¹⁸ ²¹⁹ ²²⁰ ²²¹ ²²² ²²³ ²²⁴ ²²⁵ ²²⁶ ²²⁷ ²²⁸ ²²⁹ ²³⁰ ²³¹ ²³² ²³³ ²³⁴ ²³⁵ ²³⁶ ²³⁷ ²³⁸ ²³⁹ ²⁴⁰ ²⁴¹ ²⁴² ²⁴³ ²⁴⁴ ²⁴⁵ ²⁴⁶ ²⁴⁷ ²⁴⁸ ²⁴⁹ ²⁵⁰ ²⁵¹ ²⁵² ²⁵³ ²⁵⁴ ²⁵⁵ ²⁵⁶ ²⁵⁷ ²⁵⁸ ²⁵⁹ ²⁶⁰ ²⁶¹ ²⁶² ²⁶³ ²⁶⁴ ²⁶⁵ ²⁶⁶ ²⁶⁷ ²⁶⁸ ²⁶⁹ ²⁷⁰ ²⁷¹ ²⁷² ²⁷³ ²⁷⁴ ²⁷⁵ ²⁷⁶ ²⁷⁷ ²⁷⁸ ²⁷⁹ ²⁸⁰ ²⁸¹ ²⁸² ²⁸³ ²⁸⁴ ²⁸⁵ ²⁸⁶ ²⁸⁷ ²⁸⁸ ²⁸⁹ ²⁹⁰ ²⁹¹ ²⁹² ²⁹³ ²⁹⁴ ²⁹⁵ ²⁹⁶ ²⁹⁷ ²⁹⁸ ²⁹⁹ ³⁰⁰ ³⁰¹ ³⁰² ³⁰³ ³⁰⁴ ³⁰⁵ ³⁰⁶ ³⁰⁷ ³⁰⁸ ³⁰⁹ ³¹⁰ ³¹¹ ³¹² ³¹³ ³¹⁴ ³¹⁵ ³¹⁶ ³¹⁷ ³¹⁸ ³¹⁹ ³²⁰ ³²¹ ³²² ³²³ ³²⁴ ³²⁵ ³²⁶ ³²⁷ ³²⁸ ³²⁹ ³³⁰ ³³¹ ³³² ³³³ ³³⁴ ³³⁵ ³³⁶ ³³⁷ ³³⁸ ³³⁹ ³⁴⁰ ³⁴¹ ³⁴² ³⁴³ ³⁴⁴ ³⁴⁵ ³⁴⁶ ³⁴⁷ ³⁴⁸ ³⁴⁹ ³⁵⁰ ³⁵¹ ³⁵² ³⁵³ ³⁵⁴ ³⁵⁵ ³⁵⁶ ³⁵⁷ ³⁵⁸ ³⁵⁹ ³⁶⁰ ³⁶¹ ³⁶² ³⁶³ ³⁶⁴ ³⁶⁵ ³⁶⁶ ³⁶⁷ ³⁶⁸ ³⁶⁹ ³⁷⁰ ³⁷¹ ³⁷² ³⁷³ ³⁷⁴ ³⁷⁵ ³⁷⁶ ³⁷⁷ ³⁷⁸ ³⁷⁹ ³⁸⁰ ³⁸¹ ³⁸² ³⁸³ ³⁸⁴ ³⁸⁵ ³⁸⁶ ³⁸⁷ ³⁸⁸ ³⁸⁹ ³⁹⁰ ³⁹¹ ³⁹² ³⁹³ ³⁹⁴ ³⁹⁵ ³⁹⁶ ³⁹⁷ ³⁹⁸ ³⁹⁹ ⁴⁰⁰ ⁴⁰¹ ⁴⁰² ⁴⁰³ ⁴⁰⁴ ⁴⁰⁵ ⁴⁰⁶ ⁴⁰⁷ ⁴⁰⁸ ⁴⁰⁹ ⁴¹⁰ ⁴¹¹ ⁴¹² ⁴¹³ ⁴¹⁴ ⁴¹⁵ ⁴¹⁶ ⁴¹⁷ ⁴¹⁸ ⁴¹⁹ ⁴²⁰ ⁴²¹ ⁴²² ⁴²³ ⁴²⁴ ⁴²⁵ ⁴²⁶ ⁴²⁷ ⁴²⁸ ⁴²⁹ ⁴³⁰ ⁴³¹ ⁴³² ⁴³³ ⁴³⁴ ⁴³⁵ ⁴³⁶ ⁴³⁷ ⁴³⁸ ⁴³⁹ ⁴⁴⁰ ⁴⁴¹ ⁴⁴² ⁴⁴³ ⁴⁴⁴ ⁴⁴⁵ ⁴⁴⁶ ⁴⁴⁷ ⁴⁴⁸ ⁴⁴⁹ ⁴⁵⁰ ⁴⁵¹ ⁴⁵² ⁴⁵³ ⁴⁵⁴ ⁴⁵⁵ ⁴⁵⁶ ⁴⁵⁷ ⁴⁵⁸ ⁴⁵⁹ ⁴⁶⁰ ⁴⁶¹ ⁴⁶² ⁴⁶³ ⁴⁶⁴ ⁴⁶⁵ ⁴⁶⁶ ⁴⁶⁷ ⁴⁶⁸ ⁴⁶⁹ ⁴⁷⁰ ⁴⁷¹ ⁴⁷² ⁴⁷³ ⁴⁷⁴ ⁴⁷⁵ ⁴⁷⁶ ⁴⁷⁷ ⁴⁷⁸ ⁴⁷⁹ ⁴⁸⁰ ⁴⁸¹ ⁴⁸² ⁴⁸³ ⁴⁸⁴ ⁴⁸⁵ ⁴⁸⁶ ⁴⁸⁷ ⁴⁸⁸ ⁴⁸⁹ ⁴⁹⁰ ⁴⁹¹ ⁴⁹² ⁴⁹³ ⁴⁹⁴ ⁴⁹⁵ ⁴⁹⁶ ⁴⁹⁷ ⁴⁹⁸ ⁴⁹⁹ ⁵⁰⁰ ⁵⁰¹ ⁵⁰² ⁵⁰³ ⁵⁰⁴ ⁵⁰⁵ ⁵⁰⁶ ⁵⁰⁷ ⁵⁰⁸ ⁵⁰⁹ ⁵¹⁰ ⁵¹¹ ⁵¹² ⁵¹³ ⁵¹⁴ ⁵¹⁵ ⁵¹⁶ ⁵¹⁷ ⁵¹⁸ ⁵¹⁹ ⁵²⁰ ⁵²¹ ⁵²² ⁵²³ ⁵²⁴ ⁵²⁵ ⁵²⁶ ⁵²⁷ ⁵²⁸ ⁵²⁹ ⁵³⁰ ⁵³¹ ⁵³² ⁵³³ ⁵³⁴ ⁵³⁵ ⁵³⁶ ⁵³⁷ ⁵³⁸ ⁵³⁹ ⁵⁴⁰ ⁵⁴¹ ⁵⁴² ⁵⁴³ ⁵⁴⁴ ⁵⁴⁵ ⁵⁴⁶ ⁵⁴⁷ ⁵⁴⁸ ⁵⁴⁹ ⁵⁵⁰ ⁵⁵¹ ⁵⁵² ⁵⁵³ ⁵⁵⁴ ⁵⁵⁵ ⁵⁵⁶ ⁵⁵⁷ ⁵⁵⁸ ⁵⁵⁹ ⁵⁶⁰ ⁵⁶¹ ⁵⁶² ⁵⁶³ ⁵⁶⁴ ⁵⁶⁵ ⁵⁶⁶ ⁵⁶⁷ ⁵⁶⁸ ⁵⁶⁹ ⁵⁷⁰ ⁵⁷¹ ⁵⁷² ⁵⁷³ ⁵⁷⁴ ⁵⁷⁵ ⁵⁷⁶ ⁵⁷⁷ ⁵⁷⁸ ⁵⁷⁹ ⁵⁸⁰ ⁵⁸¹ ⁵⁸² ⁵⁸³ ⁵⁸⁴ ⁵⁸⁵ ⁵⁸⁶ ⁵⁸⁷ ⁵⁸⁸ ⁵⁸⁹ ⁵⁹⁰ ⁵⁹¹ ⁵⁹² ⁵⁹³ ⁵⁹⁴ ⁵⁹⁵ ⁵⁹⁶ ⁵⁹⁷ ⁵⁹⁸ ⁵⁹⁹ ⁶⁰⁰ ⁶⁰¹ ⁶⁰² ⁶⁰³ ⁶⁰⁴ ⁶⁰⁵ ⁶⁰⁶ ⁶⁰⁷ ⁶⁰⁸ ⁶⁰⁹ ⁶¹⁰ ⁶¹¹ ⁶¹² ⁶¹³ ⁶¹⁴ ⁶¹⁵ ⁶¹⁶ ⁶¹⁷ ⁶¹⁸ ⁶¹⁹ ⁶²⁰ ⁶²¹ ⁶²² ⁶²³ ⁶²⁴ ⁶²⁵ ⁶²⁶ ⁶²⁷ ⁶²⁸ ⁶²⁹ ⁶³⁰ ⁶³¹ ⁶³² ⁶³³ ⁶³⁴ ⁶³⁵ ⁶³⁶ ⁶³⁷ ⁶³⁸ ⁶³⁹ ⁶⁴⁰ ⁶⁴¹ ⁶⁴² ⁶⁴³ ⁶⁴⁴ ⁶⁴⁵ ⁶⁴⁶ ⁶⁴⁷ ⁶⁴⁸ ⁶⁴⁹ ⁶⁵⁰ ⁶⁵¹ ⁶⁵² ⁶⁵³ ⁶⁵⁴ ⁶⁵⁵ ⁶⁵⁶ ⁶⁵⁷ ⁶⁵⁸ ⁶⁵⁹ ⁶⁶⁰ ⁶⁶¹ ⁶⁶² ⁶⁶³ ⁶⁶⁴ ⁶⁶⁵ ⁶⁶⁶ ⁶⁶⁷ ⁶⁶⁸ ⁶⁶⁹ ⁶⁷⁰ ⁶⁷¹ ⁶⁷² ⁶⁷³ ⁶⁷⁴ ⁶⁷⁵ ⁶⁷⁶ ⁶⁷⁷ ⁶⁷⁸ ⁶⁷⁹ ⁶⁸⁰ ⁶⁸¹ ⁶⁸² ⁶⁸³ ⁶⁸⁴ ⁶⁸⁵ ⁶⁸⁶ ⁶⁸⁷ ⁶⁸⁸ ⁶⁸⁹ ⁶⁹⁰ ⁶⁹¹ ⁶⁹² ⁶⁹³ ⁶⁹⁴ ⁶⁹⁵ ⁶⁹⁶ ⁶⁹⁷ ⁶⁹⁸ ⁶⁹⁹ ⁷⁰⁰ ⁷⁰¹ ⁷⁰² ⁷⁰³ ⁷⁰⁴ ⁷⁰⁵ ⁷⁰⁶ ⁷⁰⁷ ⁷⁰⁸ ⁷⁰⁹ ⁷¹⁰ ⁷¹¹ ⁷¹² ⁷¹³ ⁷¹⁴ ⁷¹⁵ ⁷¹⁶ ⁷¹⁷ ⁷¹⁸ ⁷¹⁹ ⁷²⁰ ⁷²¹ ⁷²² ⁷²³ ⁷²⁴ ⁷²⁵ ⁷²⁶ ⁷²⁷ ⁷²⁸ ⁷²⁹ ⁷³⁰ ⁷³¹ ⁷³² ⁷³³ ⁷³⁴ ⁷³⁵ ⁷³⁶ ⁷³⁷ ⁷³⁸ ⁷³⁹ ⁷⁴⁰ ⁷⁴¹ ⁷⁴² ⁷⁴³ ⁷⁴⁴ ⁷⁴⁵ ⁷⁴⁶ ⁷⁴⁷ ⁷⁴⁸ ⁷⁴⁹ ⁷⁵⁰ ⁷⁵¹ ⁷⁵² ⁷⁵³ ⁷⁵⁴ ⁷⁵⁵ ⁷⁵⁶ ⁷⁵⁷ ⁷⁵⁸ ⁷⁵⁹ ⁷⁶⁰ ⁷⁶¹ ⁷⁶² ⁷⁶³ ⁷⁶⁴ ⁷⁶⁵ ⁷⁶⁶ ⁷⁶⁷ ⁷⁶⁸ ⁷⁶⁹ ⁷⁷⁰ ⁷⁷¹ ⁷⁷² ⁷⁷³ ⁷⁷⁴ ⁷⁷⁵ ⁷⁷⁶ ⁷⁷⁷ ⁷⁷⁸ ⁷⁷⁹ ⁷⁸⁰ ⁷⁸¹ ⁷⁸² ⁷⁸³ ⁷⁸⁴ ⁷⁸⁵ ⁷⁸⁶ ⁷⁸⁷ ⁷⁸⁸ ⁷⁸⁹ ⁷⁹⁰ ⁷⁹¹ ⁷⁹² ⁷⁹³ ⁷⁹⁴ ⁷⁹⁵ ⁷⁹⁶ ⁷⁹⁷ ⁷⁹⁸ ⁷⁹⁹ ⁸⁰⁰ ⁸⁰¹ ⁸⁰² ⁸⁰³ ⁸⁰⁴ ⁸⁰⁵ ⁸⁰⁶ ⁸⁰⁷ ⁸⁰⁸ ⁸⁰⁹ ⁸¹⁰ ⁸¹¹ ⁸¹² ⁸¹³ ⁸¹⁴ ⁸¹⁵ ⁸¹⁶ ⁸¹⁷ ⁸¹⁸ ⁸¹⁹ ⁸²⁰ ⁸²¹ ⁸²² ⁸²³ ⁸²⁴ ⁸²⁵ ⁸²⁶ ⁸²⁷ ⁸²⁸ ⁸²⁹ ⁸³⁰ ⁸³¹ ⁸³² ⁸³³ ⁸³⁴ ⁸³⁵ ⁸³⁶ ⁸³⁷ ⁸³⁸ ⁸³⁹ ⁸⁴⁰ ⁸⁴¹ ⁸⁴² ⁸⁴³ ⁸⁴⁴ ⁸⁴⁵ ⁸⁴⁶ ⁸⁴⁷ ⁸⁴⁸ ⁸⁴⁹ ⁸⁵⁰ ⁸⁵¹ ⁸⁵² ⁸⁵³ ⁸⁵⁴ ⁸⁵⁵ ⁸⁵⁶ ⁸⁵⁷ ⁸⁵⁸ ⁸⁵⁹ ⁸⁶⁰ ⁸⁶¹ ⁸⁶² ⁸⁶³ ⁸⁶⁴ ⁸⁶⁵ ⁸⁶⁶ ⁸⁶⁷ ⁸⁶⁸ ⁸⁶⁹ ⁸⁷⁰ ⁸⁷¹ ⁸⁷² ⁸⁷³ ⁸⁷⁴ ⁸⁷⁵ ⁸⁷⁶ ⁸⁷⁷ ⁸⁷⁸ ⁸⁷⁹ ⁸⁸⁰ ⁸⁸¹ ⁸⁸² ⁸⁸³ ⁸⁸⁴ ⁸⁸⁵ ⁸⁸⁶ ⁸⁸⁷ ⁸⁸⁸ ⁸⁸⁹ ⁸⁹⁰ ⁸⁹¹ ⁸⁹² ⁸⁹³ ⁸⁹⁴ ⁸⁹⁵ ⁸⁹⁶ ⁸⁹⁷ ⁸⁹⁸ ⁸⁹⁹ ⁹⁰⁰ ⁹⁰¹ ⁹⁰² ⁹⁰³ ⁹⁰⁴ ⁹⁰⁵ ⁹⁰⁶ ⁹⁰⁷ ⁹⁰⁸ ⁹⁰⁹ ⁹¹⁰ ⁹¹¹ ⁹¹² ⁹¹³ ⁹¹⁴ ⁹¹⁵ ⁹¹⁶ ⁹¹⁷ ⁹¹⁸ ⁹¹⁹ ⁹²⁰ ⁹²¹ ⁹²² ⁹²³ ⁹²⁴ ⁹²⁵ ⁹²⁶ ⁹²⁷ ⁹²⁸ ⁹²⁹ ⁹³⁰ ⁹³¹ ⁹³² ⁹³³ ⁹³⁴ ⁹³⁵ ⁹³⁶ ⁹³⁷ ⁹³⁸ ⁹³⁹ ⁹⁴⁰ ⁹⁴¹ ⁹⁴² ⁹⁴³ ⁹⁴⁴ ⁹⁴⁵ ⁹⁴⁶ ⁹⁴⁷ ⁹⁴⁸ ⁹⁴⁹ ⁹⁵⁰ ⁹⁵¹ ⁹⁵² ⁹⁵³ ⁹⁵⁴ ⁹⁵⁵ ⁹⁵⁶ ⁹⁵⁷ ⁹⁵⁸ ⁹⁵⁹ ⁹⁶⁰ ⁹⁶¹ ⁹⁶² ⁹⁶³ ⁹⁶⁴ ⁹⁶⁵ ⁹⁶⁶ ⁹⁶⁷ ⁹⁶⁸ ⁹⁶⁹ ⁹⁷⁰ ⁹⁷¹ ⁹⁷² ⁹⁷³ ⁹⁷⁴ ⁹⁷⁵ ⁹⁷⁶ ⁹⁷⁷ ⁹⁷⁸ ⁹⁷⁹ ⁹⁸⁰ ⁹⁸¹ ⁹⁸² ⁹⁸³ ⁹⁸⁴ ⁹⁸⁵ ⁹⁸⁶ ⁹⁸⁷ ⁹⁸⁸ ⁹⁸⁹ ⁹⁹⁰ ⁹⁹¹ ⁹⁹² ⁹⁹³ ⁹⁹⁴ ⁹⁹⁵ ⁹⁹⁶ ⁹⁹⁷ ⁹⁹⁸ ⁹⁹⁹ ¹⁰⁰⁰ ¹⁰⁰¹ ¹⁰⁰² ¹⁰⁰³ ¹⁰⁰⁴ ¹⁰⁰⁵ ¹⁰⁰⁶ ¹⁰⁰⁷ ¹⁰⁰⁸ ¹⁰⁰⁹ ¹⁰¹⁰ ¹⁰¹¹ ¹⁰¹² ¹⁰¹³ ¹⁰¹⁴ ¹⁰¹⁵ ¹⁰¹⁶ ¹⁰¹⁷ ¹⁰¹⁸ ¹⁰¹⁹ ¹⁰²⁰ ¹⁰²¹ ¹⁰²² ¹⁰²³ ¹⁰²⁴ ¹⁰²⁵ ¹⁰²⁶ ¹⁰²⁷ ¹⁰²⁸ ¹⁰²⁹ ¹⁰³⁰ ¹⁰³¹ ¹⁰³² ¹⁰³³ ¹⁰³⁴ ¹⁰³⁵ ¹⁰³⁶ ¹⁰³⁷ ¹⁰³⁸ ¹⁰³⁹ ¹⁰⁴⁰ ¹⁰⁴¹ ¹⁰⁴² ¹⁰⁴³ ¹⁰⁴⁴ ¹⁰⁴⁵ ¹⁰⁴⁶ ¹⁰⁴⁷ ¹⁰⁴⁸ ¹⁰⁴⁹ ¹⁰⁵⁰ ¹⁰⁵¹ ¹⁰⁵² ¹⁰⁵³ ¹⁰⁵⁴ ¹⁰⁵⁵ ¹⁰⁵⁶ ¹⁰⁵⁷ ¹⁰⁵⁸ ¹⁰⁵⁹ ¹⁰⁶⁰ ¹⁰⁶¹ ¹⁰⁶² ¹⁰⁶³ ¹⁰⁶⁴ ¹⁰⁶⁵ ¹⁰⁶⁶ ¹⁰⁶⁷ ¹⁰⁶⁸ ¹⁰⁶⁹ ¹⁰⁷⁰ ¹⁰⁷¹ ¹⁰⁷² ¹⁰⁷³ ¹⁰⁷⁴ ¹⁰⁷⁵ ¹⁰⁷⁶ ¹⁰⁷⁷ ¹⁰⁷⁸ ¹⁰⁷⁹ ¹⁰⁸⁰ ¹⁰⁸¹ ¹⁰⁸² ¹⁰⁸³ ¹⁰⁸⁴ ¹⁰⁸⁵ ¹⁰⁸⁶ ¹⁰⁸⁷ ¹⁰⁸⁸ ¹⁰⁸⁹ ¹⁰⁹⁰ ¹⁰⁹¹ ¹⁰⁹² ¹⁰⁹³ ¹⁰⁹⁴ ¹⁰⁹⁵ ¹⁰⁹⁶ ¹⁰⁹⁷ ¹⁰⁹⁸ ¹⁰⁹⁹ ¹¹⁰⁰ ¹¹⁰¹ ¹¹⁰² ¹¹⁰³ ¹¹⁰⁴ ¹¹⁰⁵ ¹¹⁰⁶ ¹¹⁰⁷ ¹¹⁰⁸ ¹¹⁰⁹ ¹¹¹⁰ ¹¹¹¹ ¹¹¹² ¹¹¹³ ¹¹¹⁴ ¹¹¹⁵ ¹¹¹⁶ ¹¹¹⁷ ¹¹¹⁸ ¹¹¹⁹ ¹¹²⁰ ¹¹²¹ ¹¹²² ¹¹²³ ¹¹²⁴ ¹¹²⁵ ¹¹²⁶ ¹¹²⁷ ¹¹²⁸ ¹¹²⁹ ¹¹³⁰ ¹¹³¹ ¹¹³² ¹¹³³ ¹¹³⁴ ¹¹³⁵ ¹¹³⁶ ¹¹³⁷ ¹¹³⁸ ¹¹³⁹ ¹¹⁴⁰ ¹¹⁴¹ ¹¹⁴² ¹¹⁴³ ¹¹⁴⁴ ¹¹⁴⁵ ¹¹⁴⁶ ¹¹⁴⁷ ¹¹⁴⁸ ¹¹⁴⁹ ¹¹⁵⁰ ¹¹⁵¹ ¹¹⁵² ¹¹⁵³ ¹¹⁵⁴ ¹¹⁵⁵ ¹¹⁵⁶ ¹¹⁵⁷ ¹¹⁵⁸ ¹¹⁵⁹ ¹¹⁶⁰ ¹¹⁶¹ ¹¹⁶² ¹¹⁶³ ¹¹⁶⁴ ¹¹⁶⁵ ¹¹⁶⁶ ¹¹⁶⁷ ¹¹⁶⁸ ¹¹⁶⁹ ¹¹⁷⁰ ¹¹⁷¹ ¹¹⁷² ¹¹⁷³ ¹¹⁷⁴ ¹¹⁷⁵ ¹¹⁷⁶ ¹¹⁷⁷ ¹¹⁷⁸ ¹¹⁷⁹ ¹¹⁸⁰ ¹¹⁸¹ ¹¹⁸² ¹¹⁸³ ¹¹⁸⁴ ¹¹⁸⁵ ¹¹⁸⁶ ¹¹⁸⁷ ¹¹⁸⁸ ¹¹⁸⁹ ¹¹⁹⁰ ¹¹⁹¹ ¹¹⁹² ¹¹⁹³ ¹¹⁹⁴ ¹¹⁹⁵ ¹¹⁹⁶ ¹¹⁹⁷ ¹¹⁹⁸ ¹¹⁹⁹ ¹²⁰⁰ ¹²⁰¹ ¹²⁰² ¹²⁰³ ¹²⁰⁴ ¹²⁰⁵ ¹²⁰⁶ ¹²⁰⁷ ¹²⁰⁸ ¹²⁰⁹ ¹²¹⁰ ¹²¹¹ ¹²¹² ¹²¹³ ¹²¹⁴ ¹²¹⁵ ¹²¹⁶ ¹²¹⁷ ¹²¹⁸ ¹²¹⁹ ¹²²⁰ ¹²²¹ ¹²²² ¹²²³ ¹²²⁴ ¹²²⁵ ¹²²⁶ ¹²²⁷ ¹²²⁸ ¹²²⁹ ¹²³⁰ ¹²³¹ ¹²³² ¹²³³ ¹²³⁴ ¹²³⁵ ¹²³⁶ ¹²³⁷ ¹²³⁸ ¹²³⁹ ¹²⁴⁰ ¹²⁴¹ ¹²⁴² ¹²⁴³ ¹²⁴⁴ ¹²⁴⁵ ¹²⁴⁶ ¹²⁴⁷ ¹²⁴⁸ ¹²⁴⁹ ¹²⁵⁰ ¹²⁵¹ ¹²⁵² ¹²⁵³ ¹²⁵⁴ ¹²⁵⁵ ¹²⁵⁶ ¹²⁵⁷ ¹²⁵⁸ ¹²⁵⁹ ¹²⁶⁰ ¹²⁶¹ ¹²⁶² ¹²⁶³ ¹²⁶⁴ ¹²⁶⁵ ¹²⁶⁶ ¹²⁶⁷ ¹²⁶⁸ ¹²⁶⁹ ¹²⁷⁰ ¹²⁷¹ ¹²⁷² ¹²⁷³ ¹²⁷⁴ ¹²⁷⁵ ¹²⁷⁶ ¹²⁷⁷ ¹²⁷⁸ ¹²⁷⁹ ¹²⁸⁰ ¹²⁸¹ ¹²⁸² ¹²⁸³ ¹²⁸⁴ ¹²⁸⁵ ¹²⁸⁶ ¹²⁸⁷ ¹²⁸⁸ ¹²⁸⁹ ¹²⁹⁰ ¹²⁹¹ ¹²⁹² ¹²⁹³ ¹²⁹⁴ ¹²⁹⁵ ¹²⁹⁶ ¹²⁹⁷ ¹²⁹⁸ ¹²⁹⁹ ¹³⁰⁰ ¹³⁰¹ ¹³⁰² ¹³⁰³ ¹³⁰⁴ ¹³⁰⁵ ¹³⁰⁶ ¹³⁰⁷ ¹³⁰⁸ ¹³⁰⁹ ¹³¹⁰ ¹³¹¹ ¹³¹² ¹³¹³ ¹³¹⁴ ¹³¹⁵ ¹³¹⁶ ¹³¹⁷ ¹³¹⁸ ¹³¹⁹ ¹³²⁰ ¹³²¹ ¹³²² ¹³²³ ¹³²⁴ ¹³²⁵ ¹³²⁶ ¹³²⁷ ¹³²⁸ ¹³²⁹ ¹³³⁰ ¹³³¹ ¹³³² ¹³³³ ¹³³⁴ ¹³³⁵ ¹³³⁶ ¹³³⁷ ¹³³⁸ ¹³³⁹ ¹³⁴⁰ ¹³⁴¹ ¹³⁴² ¹³⁴³ ¹³⁴⁴ ¹³⁴⁵ ¹³⁴⁶ ¹³⁴⁷ ¹³⁴⁸ ¹³⁴⁹ ¹³⁵⁰ ¹³⁵¹ ¹³⁵² ¹³⁵³ ¹³⁵⁴ ¹³⁵⁵ ¹³⁵⁶ ¹³⁵⁷ ¹³⁵⁸ ¹³⁵⁹ ¹³⁶⁰ ¹³⁶¹ ¹³⁶² ¹³⁶³ ¹³⁶⁴ ¹³⁶⁵

to indignationis abscondi faciem meam parumper à te, & in misericordia sempiterna misertus sum tui, dixit redemptor tuus DOMINVS.

Et mox: Montes commouebuntur, & colles contremiscent, Misericordia autem mea non recedet à te, & fœdus pacis meæ non mouebitur, dixit miserator tuus DOMINVS.

Et cap. 60. Pro eo, quod fuisti derelicta & odio habita, & non erat, qui per te transiret, ponam te in superbiam seculorum, gaudium in generationem & generationem.

Ac mox: Non occidet vltra sol tuus, & luna tua non minuetur, quia erit tibi DOMINVS in lucem sempiternam, &c.

Et Matth. 16. Super hanc petram ædificabo Ecclesiam meam, & portæ inferi non præualebunt aduersus eam.

Ioannis 10. Oves meæ vocem meam audiunt, & ego cognosco eas, & sequuntur me. Et ego vitam æternam dō eis, & non peribunt in æternum, & non rapiet eas quisquam de manu mea, &c.

Rom. 8. Certus sum, quod neque mors, neque vita, neque angeli, neque principatus, neque virtutes, neque instantia, neque futura, neque fortitudo, neque altitudo, neque profunditas, neque alia creatura poterit nos separare à charitate, qua Deus nos complectitur in Christo Iesu Domino nostro.

His & similibus promissionibus muniti, si quando oppugnat, et grassatur in Ecclesiam Dei vel Nero quispiam, vel Diocletianus, vel Iulianus, vel Constantius Arrianus, vel alius siue tyrannus, siue hæreticus,

ticus, siue Antichristus, siue diabolus ipse, sumamus hunc Psalmum in manus, & confidenti mente ac voce exclamemus: Magnus DOMINVS & laudatissimus, in ciuitate Dei nostri, in monte sancto eius. Ac imprimis obseruemus, quod dicitur de Deo: Iustitia plena est dextera tua, quia tanta est DOMINI Dei nostri iustitia, seu probitas & veritas in seruandis promissis suis, quanta est dextera, seu potentia eius. Quis autem posset dexteram ac potentiam Dei definire? quis posset ei terminum ponere? Quis mensus est, inquit Esaias, pugillo aquas? & coelos palmo pō, *Esa. 40.* derat? quis appendit tribus digitis molem terræ, & librat in pondere montes, & colles in statera? Cum igitur tanta sit veritas Dei, quanta potentia eius, nō trepidemus ad insultum vel hominū vel diabolorū, sed cōsistamus, certi de victoriā, in Iesu Christo DOMINO nostro, qui cū perpetuas agat excubias pro Ecclesia sua, dabit euentum, vt non solum aduersa sufferre queamus, verūmetiā felicissimē euadamus.

Psalmus 49.

Audite hæc omnes Gentes, &c.



Ex DOMINI, quæ est æterna Dei voluntas, dicit: Si audieris *Deut. 28.* vocem DOMINI Dei tui, benedictus seu fortunatus eris in ciuitate, benedictus in agro, benedictus eris ingrediens, &

Cc egres

egrediens, si autem nolueris audire, maledictus, (hoc est) infortunatus & infelix eris in ciuitate, in agro, & in omnibus operibus tuis. Sed cum circumtuleris oculos tuos in humanos casus, re ipsa comperies, longe aliter accidere, quam hæc verba legis præ se ferre videntur. Qui enim audiunt vocem DOMINI, & morem gerunt pro sua virili mandatis Dei, malediscuntur, & aduersis obruuntur: qui verò nō audiunt, sed sectantur sua desideria, benedicuntur, & ducunt vitam felicissimam. Esaias Propheta audit vocem DOMINI, & medius secatur. Manasses nō audit vocem DOMINI, & regnat. Ioannes Baptista obsequitur mādatis Dei, & decollatur. Herodes obsequitur suis cupiditatibus, & agit vitam in summis delitijs. Nec vnum tantum & alterum huius rei exemplum extat, sed mundus talium exemplorum plenus est.

2. *Tim.* 3. Et Paulus generali dicto explicat: OMNES, inquit, qui pie volunt vivere in Christo, persecutionem patientur. Quod cum ita fiat, homines mirifice offendentur, & alij quidem, qui erant cultores pietatis, incipiunt deserere officiū, quod vident esse infelix: alij, qui pietati medium (quod aiunt) digitum ostendunt, applaudunt sibi in sua impietate, quam vident prosperum habere successum: adeoq; in hac humana vita prorsus obtinere videtur, quod Ecclesiastes scribit: Quia non profertur, inquit, cito contra malos sententia, filij hominum perpetrant mala, absq; vllō timore. Spiritus sanctus igitur suscipit tam in Prophetis, quam in Apostolicis scriptis huic offendiculo medendum, & pios quidem in officio retinendos, impios verò ab impietate sua deterrendos. In

quem

quem vsum scripti sunt multi Psalmi, videlicet Psalmus 4. Psalmus 37. Psalmus 73. & conciones Propheticae, Hierem. ca. 12. & Abacuc cap. 1. In hunc catalogum conferendus etiam est hic quadragesimus novus Psalmus, qui cum intelligeret hoc offendiculum longe omnium periculosissimum esse, & grassari non inter paucos tantum homines, sed in vniuerso humano genere, non est contentus vocatione vnus tantum hominis & gentis, sed conuocat omnes gentes & homines ad audiendam & animo percipiendam cohortationem, quae in ipso decantatur: vt non moueantur praesenti felicitate impiorum, & ad impietatem ipsi quoque deficiant, sed potius excitati consideratione perpetuae impiorum infelicitatis, certissime venturae, in officio pietatis retineantur.

1. *Audite illud omnes populi, auribus percipite omnes incolae huius vitae.*
2. *Tam vulgus, quam procures, tam diues, quam pauper.*
3. *Os meum loquetur sapientiam, & meditatio cordis mei prudentiam.*
4. *Audiamus memorabilia dicta, & recitemus cithara insignes sententias.*

Hi quatuor versiculi, sunt exordium Psalmi, in quo excitantur ad attentionem omnes Gentes, & omnia hominum genera, vt diligentissime audiant hoc carmen, quod Psalter suscepit cithara, in remedium grauissimi offendiculi cantandum. Offendiculum enim, quod oritur ex impiorum felicitate, et piorum infelicitate, latissime vagatur, & corrumpit non tantum fecem, sed etiam Principes populi: nec pauperes tantum, sed

etiam diuites & opulentos, (hoc est,) vniuersum orbem terræ: Audite, inquit, omnes Gentes, auribus percipite omnes huius terræ incolæ, & caducæ huius vitæ participes. Cum enim vulgò omnes, tam infimi quàm summi, hoc morbo tenentur, omnes etiam remedium cognoscant, necesse est. Audiamus igitur omnes & singuli, quid citharædus sit cantaturus. Nō dicam, non cantabo ociosa, non superuacanea, non vana, sed loquar obseruāda dicta, è medio verbi Dei petita, non commemorabo fictitia hominum somnia, sed verissima & certissima Dei oracula: Ex abundantiā, inquit, cordis, os loquitur. Ego igitur meditor in corde meo, non stultam aliquam fabulam, sed summam sapientiam & prudentiam, vt, quotquot attente audierint, & alta mente reposuerint, præsentissimam aduersus offendiculum, quod vbiuis in orbe terrarum grassatur, medelam habeant. Sciamus aut, quòd Psalmus vocet parabolas, & ænigmata, (sic enim nōnulli, pro eo, quod nos dicimus memorabilia dicta, & insignes sententias, transtulerunt,) non similitudines inuolucris tectas, & dicta obscura, ac ab intelligentia vulgi abscondita, sed *voluptate* perspicua, & sententias præclaras, quibus pius auditor accenditur & inflammatur, vt felicitate impiorum, & sua infelicitate, ab officio non declinet. Illud enim vult dicere, Spiritus sanctus sæpè iam & multum cohortatus est pios, ne offensi prospero rerum successu, quo impij fruuntur & glorientur, ab officio pietatis recedant: sed tanta est hominum malitia, vt hæc omnia in ventum esse prolata videantur. Faciam igitur & ego hoc Psalmo periculum, si quo modo fieri possit, vt hos

vt homines vel tandem veterum excutiant, & ex-
pergiscantur.

5. *Cur metuerem (mibi) tempore afflictionis, (quo) iniqui-
tas conculcantium me, circumdat me?*

Exordium sequitur Psalmi propositio, quæ pri-
mum formata est interrogatione, vt animum audito-
ris acius pungat: deinde accomodata est singulari
personæ, cum tamen vniuersaliter sit intelligenda.
Quod enim Psaltes de se solo dicere videtur: Cur es-
go mihi tempore afflictionis, qua me aduersarij mei
opprimendum suscipiunt, metuerem? illud generalis-
ter dicere vult, Nullus metuat sibi in aduersis suis,
nec in prospero successu aduersariorum suorum of-
fendatur, & ab officio suo deſiciatur felicitate suorum
supplantatorum & aduersariorum, etiam si iniquitas
ipsorum prosperè promouere, & tu pedibus ipsos
rum penitus conculcari videaris. Hic est huius Psal-
mi status, huc spectant, & hoc volunt omnia argu-
menta, quæ in versiculis huius Psalmi sequuntur, vi-
delicet, vt animus confirmetur in aduersis, ne offens-
us sua infelicitate, & impiorum suorum hostium fe-
licitate, ab officio recedat, & ipse quoque ad impieta-
tis castra transfugiat. Audiamus igitur rationes, quibus
Spiritus sanctus munit animum offendiculis
perturbatum, vt in officio retineatur.

6. *Collocant fiduciam in opulencia sua, & gloriantur mul-
titudine diuitiarum suarum.*
7. *Ne fratrem quidem suum quisquam redimere poterit, (di-
uitijs suis) aut Deum placare.*

3. *Multò enim plus precij exigitur ad redimendam animam ipsorum, quàm ut (diuitijs) vnquam præstari queat.*

Prima ratio, qua animus aduersus offendiculum crucis munitur. Magna quidem videtur felicitas impiorum: Promptuaria eorum plena, eructantia ex hoc in illud. Oves eorum fœtosæ, abundantes in egressibus suis, boves eorum crassæ: nec contenti sunt possessione & usu suæ potentia & opulentia, verumetiam collocant omnem spem & fiduciam suam in multitudine suarum diuitiarum. Sed nihil certius est, quàm quòd hac sua spe frustrentur, & pudefiant. Sperant se in aduersis, non se tantum, verumetiam quoscunq; fratres & amicos opibus & potentia sua adiuturos & seruatuos, adeoq; etiam Deum ipsum placatuos, & iram eius mitigatuos. Sed nullæ sunt humanæ opes, nullæ humanæ vires, quæ possint, ius dicante Deo, vel huius vel illius hominis animam aut vitam redimere ac seruare. Quantæcunq; enim fuerint, necesse habent, vel tandem possessorem suum deferere ac pudefacere, quippe quòd maioris sit molis hominem coram tribunali Dei tueri & conseruare, quàm quòd vel pecunia, vel alia quadam humana potentia, sapientia & iustitia vnquam confici queat. Cur igitur offensus felicitate, qua impij, propter suas opes, illustres habentur, & te oppugnant, transfugeres, abiecto pietatis studio, ad castra impietatis? Obserues hîc, quo loco habeantur diuitiæ, coram Spiritu sancto. Et aliàs quoque diuitiæ pefsismè audiunt in diuinis oraculis: Non proderunt, inquit

quit Salomon, diuitiæ in die ultionis. Et apud Mat^{th.} 13. theum diuitiæ vocantur spinæ, quod qui eas tractas re solet, nunquam possit ferè tam circumspectus esse, quin ab ipsis lædatur. Ac iterum: Facilius est Ca^{Matth.} 19. melum per foramen acus transire, quàm diuitem, (hoc est) confidentem diuitiis, intrare in regnum cœlorum. Quid ergo dicemus? Si diuitiis non est confidendum, & si diuitiæ non redimunt animas in iudicio Dei, qua in re fiducia nostra erit collocanda? Certe, in nulla re alia, quàm in DOMINO nostro Iesu Christo, qui cum reconciliauerit nos sanguine suo cum Deo Patre, effecit, vt cum credimus in ipsum, Deus sit nobis propitius, & conseruet nos in omnibus aduersis propter Christum. Quare, non offendamur felicitate diuitum, vt deseramus nostrum officium, & sequamur impia eorum studia, sed potius ponamus nobis ob oculos iudicium Dei, & instabilem conditionem diuitiarum, ac recondamus nobis per Christum thesauros in cœlo, vbi nec ærugo, nec tinea corrumpit, & vbi fures non effodiunt, nec furantur.

9. *Vivat (licet) adhuc diutius, nec videat sepulcrum.*
 10. *Tandem tamen videbitur, quod & sapientes moriantur, & vnâ stultus & insipiens pereant, ac relinquunt alienis facultates suas.*

Alia ratio, cur nō debeamus offendi felicitate diuitū, qui nos miseros & egenos opprimūt. Dices. nō. Audio quidē diuitias esse caducas & instabiles, nec posse tueri possessorē suum in die iudicij Dei: interea
 autem

autem video eum non vno tantum die, non vno tantum anno, sed plurimo tempore felicissimam ducere vitam, me autem summa miseria affligi. Quid igitur non offenderer? Ad hoc respondent hi duo versiculi: Fateor, Impij diuites solent longo tempore esse in opprimendis miseris felices, & prosperum in consilijs suis habere successum. Sed longum tempus (quod dici solet) non est sempiternum. Etsi enim impij diu felicissimam ducunt vitam, nec vident annis vel centum vel ducentis sepulcrum, seu interitum, nihil tamen certius est, nihil re ipsa magis comperietur, quam quod tales impij secundum hunc mundum sapientes, qui videntur omnia sua prudentissimè administrare, non aliter sint suo tempore diuinitus desinito perituri, quam stultissimi & insipientissimi quicquid. Ac verè tandem fiet, vt quod maximè omnium sperauerunt, se relicturos liberos ac hæredes suos quàm opulentissimos, opinione tamen sua longissimè fallantur. Relinquent enim facultates suas, quas multo sudore, magna impietate, crudeli tyrannide, ac sæuitia parauerunt, non suis, quibus cogitaue-
Eccle. 6. runt, sed alienis, quos summo odio persecuti sunt. Hoc illud est, quod etiam Ecclesiastes Salomonis exponit: Est aliud (inquiens) malum, quod vidi sub Sole, & quidem frequens apud homines. Vir cui Deus dedit diuitias, & substantiam, & honorem, & nihil deest animæ suæ, ex omnibus, quæ desiderat: nec tribuit ei Deus potestatem, vt comedat ex eo, sed hos
Luc. 12. MOEXTRANEVS vorabit illud. Et apud Lucam, dicitur ad diuitem: Stulte, hac nocte animam tuam reperent à te: quæ autem paraasti, cuius erunt? Disca-

mus igitur ex hoc diuino iudicio timorem Dei, & admoniti impiorum interitu, etsi sero, tamen certissimo, non sequamur exempla impietatis ipsorum, sed pergamus in vocatione Dei, nihil dubitantes, quin quò illi sunt in hoc seculo feliciores, & nos infeliciores, eò grauior immineat eis interitus, & certior nostra liberatio.

11. *In cordibus suis cogitant, quòd domus ipsorum sint perpetua, & habitacula ipsorum in generationem & generationem, ac illustres sint nominibus suis in terra.*
 12. *Sed homo in honore non perdurat, similis est bestiis, quæ intereunt.*

Vbi nos transtulimus, perdurat, Hebræus habet יָלִין Ialín, à verbo לָן Lon, quod significat pernoctare, commorari & permanere. Græcus autem interpreter, qui interpretatus est στανειν (hoc est) intellexit, legit, בִּין à verbo בִּין, quod significat intelligere, quo verbo Hebræus non in hoc duodecimo, sed postea in vltimo huius Psalmi versiculo vtitur. Pergit ergo Psalter securitatem impiorum describere, vt & inexpectatum eorum interitum adiiciat: Cogitant, inquit, in animo suo impij diuites, qui festi opulentia sua, miseros opprimunt, quòd cum in præsentia fruuntur prospero rerum successu, hæc felicitas perpetuò sit duratura. Pollicentur sibi, quòd domus seu familia ipsorum, maneat in æternum salua & illustris, ac propagetur summa nominis eorum gloria ad omnem posteritatem, nec possit aliquid accidere, vt vel infamia obscuretur, vel obliuione

deleatur, sed spes impiorū est vanissima. Fieri enim non potest, vt homo impius constet in honore, & in felicitate ac maiestate, qua aliquandiu sibi applausus & blanditur, sed necesse habet, vel tandem ius mentorum more perire, & non solum inglorius, verum etiam insigni contumelia, sicut immundarum bestiarum morticina, in foueas abijci, ac sepultura asini sepeliri. Vidi impium, inquit alius Psalmus, superexaltatum, & eleuatū, sicut cedros Libani. Transiui, & ecce non erat. Quæsiui eum, & non est inuentus locus eius. Quod cum ita se habeat, quæ te intemperies exagitar, vt deserta pietate, exemplum impiorum sectareris?

Psal. 37.

13. *Hoc impiorum diuitum studium, etsi stultitia est ipsis, posteritamen eorum commendant illud ore suo.*

Admiratio est stuporis hominum, quod nec domesticis quidem exemplis moueantur, vt caueant sibi ab impietate. In præcedenti enim versiculo exposuit, quod etsi impij cogitant se familiæ suæ gloriam in multa secula propagaturos, & dant summam operam, vt eam quibus possunt rationibus muniant & stabiliant, tamen ex improviso & ignominiose pereunt. Nunc igitur admiratur, quid fiat, quod domestici & posterit ipsorum non fiant maiorum suorum exemplo prudentiores, & voluntati Dei obsequentiores. Posterit, inquit, re ipsa comperiunt, quod institutum & studium maiorum suorum, in congregandis & augendis diuitijs, quibuscumque potuerunt artibus, & in opprimendis miseris ac pauperibus,

cesses

cesserit ipsis in summam stultitiam. Spe enim sua in
 tantum pudefacti sunt, vt non solum non ceperint
 vllum è diuitijs suis fructum, verumetiam necesse
 habuerint eas alienis extraneis, ipsq; ingratis
 relinquare: posterius tamen eorum pergunt adhuc ex
 emplum ipsorum summis laudibus vehere, ac pleno
 ore commendare, adeoq; cupidissime sectari, tan-
 tum abest, vt aliena infania fruantur. An non hic est
 immanis furor, & admirandus stupor? Sed hæc est
 potentia satanæ, excæcantis mentes incredulorum,
 vt in suum ipsorum exitium præcipientes ferantur. In-
 creduli enim præfenti rerum fortuna inebriati, non
 intelligunt nec requirunt consilium Dei: quòd cum
 Deus inuitet ipsos beneficijs suis ad pœnitentiam,
 arbitrentur eum sceleribus suis fauere, & licere sibi
 non impune tantum, verumetiam magno suo com-
 modo peccare. Sed Paulus exponit peripicuè, quòd *Rom. 2.*
 sit in impiorum felicitate consilium Dei: An diui-
 tias, inquiens, bonitatis eius & patientiæ & longa-
 nimitatis contemnis? ignorans, quòd bonitas Dei
 inuitet te ad resipiscentiam? Tu autem, secundum
 duritiam tuam, & impœnitens cor, thesaurifas tibi
 iram, in die iræ, reuelationis iusti iudicij Dei.
 Idem conqueritur etiam Salomon, vt supra dictum
 est: Quia, inquiens, non profertur citò contra ma- *Eccle. 8.*
 los sententia, filij hominum perpetrant mala, absq;
 vllò timore. Etsi autem peccator centies impiè as-
 git, & videtur ei feliciter cedere, tamen sciamus,
 quòd illis solis benè erit, qui timent Deum, & ve-
 rentur faciem eius. Quare non cõmendemus institut-
 um impiorum, quamuis felicissimum, nec sequamur

exempla eorum, sed potius cum animo nostro consideremus, quod Deus benefaciendo impijs, non applaudat impietati eorum, sed cogitet eos ad agendam poenitentiam excitare. Quod cum hoc Dei consilium spreuerint, tantum abest, ut colligant sibi imposturis & crudelitate thesaurum diuitiarum, ut potius recondant sibi thesaurum seuerissimæ iræ Dei, & æterni supplicij.

14. *Sicut grex ouium, collocabuntur in inferno, mors depascet eos. Recti dominabuntur eis citò. Robur autem illorum absumentur. Infernus erit habitaculum ipsorum.*
15. *Sed Deus liberabit animam meam de manu inferni, quia assumpsit me.*

Redit ad expositionem certissimi interitus impiorum, etiamsi habeant longo tempore felicem rerum suarum successum. Et quia ad interitum impiorum sequitur liberatio piorum, idcirco addit antithesin de piorum salute. Collocabuntur (inquit) impij in fovea, in sepulcro, in inferno, in perpetua videlicet interitione. Quemadmodum enim grex ouium cogitur in vnum stabulum, in quo vna ita concluduntur, ut non liceat eis, quò libet, euagari: ita impij conijciuntur in vnam foueam, in vnum sepulcrum, hoc est, in infernum, ut ibi perpetuò detenti, non queant amplius euadere, quia mors, non illa tantum corporalis, sed etiam æterna depascet, & absument eos, imò verò non absument, sed cruciatu in sempiternum durabili affliget eos. Quid autem multis opus, Infer-

nus erit habitaculum eorum, vbi nullus ordo, vt Job *Iob. 10.*
 ait, sed sempiternus horror inhabitat, & vbi erit, si-
 cut Christus dicit, fletus & stridor dentium: vbi quo-
 que impij, quemadmodum Paulus ait, dabunt in in- *2. Thes. 1.*
 teritu æternas pœnas à facie DOMINI, & à gloria
 virtutis eius, vt nihil aliud reliquum sit, quàm quòd
 impij omni sua fortitudine & robore destituantur,
 omni sua fiducia pudefiant, omni sua gloria, qua frues-
 bantur quondam, exuantur, & æterna perditione
 crucientur. Hæc est pars & hæreditas impiorum.
 Vicissim autem pij, qui nihil offensi impiorum in
 his terris felicitate, recta in vocatione Dei ambula-
 runt, dominabuntur impijs summo mane, hoc est, ci-
 to, & sine vlla dilatione: non quòd impij confestim
 subiiciantur pedibus piorum, cum ipsis malefaciunt,
 multò enim tempore opprimunt eos, sed quòd
 mox, cum Deus sententiam suam aduersus impios
 suo tempore patefecerit, piorum pedibus sine vlla
 mora conculcandi tradantur. Nam quemadmodum
 Christus filius Dei, etsi sedet ad dextram Dei Patris
 sui, & omnia habet sibi subiecta, iuxta illud Psalmi:
 Omnia subiecisti sub pedibus suis: Et Christus ipse
 ait: Data est mihi omnis potestas in cœlo & in ter-
 ra, tamen nondum videmus, (vt ait Epistola ad Hebr. *Heb. 2.*
bræos) omnia ei subiecta esse: ita & pij in Christum
 credentes, collocati quidem sunt propter Christum,
 in maiestate dominationis super impios, tamen
 hæc maiestas nondum est patefacta coram mundo.
 Non est autem dubitandum, quin suo tempore pates-
 fiat, & impleatur, quod Esaias dixit: Egredientur, *Esa. 66.*
 (pij) & videbunt cadauera virorum, qui præuaris

Sapientia 7.

cati sunt in me. Vermis eorum non morietur, & ignis eorum non extinguetur. Et erunt usque ad faciem eternam visionis omni carni. Et illud sapientiæ: Tunc stabunt iusti in magna constantia, aduersus eos, qui se angustiauerunt, & qui abstulerunt labores eorum. Videntes turbabuntur timore horribili, & mirabuntur de subitanea & insperata salute. Et mox: Nos insensati, vitam illorum æstimabamus insaniam, & finem illorum inglorium. Ecce quos modo computati sunt inter filios Dei, & inter sanctos fors illorum est. Caterum quod Psalter generatim dicit, rectos seu pios dominaturos super impios, & subiecturos eos sub pedibus ipsorum, hoc etiam peculiariter accommodat ad seipsum: Deus, inquit, liberabit animam meam de manu, de potestate inferni, quia assumpsit me. Impij quidem peribunt in æternum, pii autem seruabuntur, & dominabuntur impijs. Et quia persuasus, non vano cordis mei somnio, sed certissima Dei promissione de benedicto semine Abraham, quod est Iesus Christus DOMINVS noster, in quo omnem meam fiduciam colloco, non dubito, quin & mihi reliquus sit locus inter pios & sanctos DOMINI. Quare confido certissime futurum, ut Deus sit me liberaturus de potestate inferni, & in media ipsa morte conseruaturus perpetua felicitate. Quid enim de hac re dubitarem? quam dubitationis causam haberem? cum DOMINVS ipse assumpserit me? Quid ergo est à DOMINO assumi, ut cognoscamus, quam causam certitudinis de salute sua habeat Psalter? Manifestum quidem est, quod filius Dei assumpserit semen Abraham,

brahæ, (hoc est) filium virginis Mariæ, sed Deus aliter assumit Christum, qui seipsum vocat filium hominis, aliter Dauidem regem, aut Petrum, & Ioannem Apostolos. Assumit Christum in vnitatem personæ, non assumit Dauidem aut Petrum in vnitatem personæ. Collocat Christum ad dextram suam, non collocat propriè Dauidem aut Petrum ad dextram suam. Dat Christo omnem potestatem in cœlo & in terra, non dat propriè Dauidi aut Petro omnem in cœlo & terra potestatem. Quid ergo hoc loco est assumi à Deo? In alio Psalmo dicitur: Pater meus et mater mea dereliquerunt me, DOMINVS autem assumpsit me. Quare cum dicitur de Christo, quod DOMINVS assumpsit eum, significat filium Dei ita assumpsisse filium hominis, vt vniuerit sibi eum in vnitatem personæ suæ, ac ornauerit eum omni sua maiestate, (hoc est) euexerit eum super omnes principatus, potestates & virtutes, ac dederit ei nomen super omne nomē, vt in nomine Iesu omne genu se flectat, cœlestium, terrestrium & infernorum. Cum autem dicitur, quod DOMINVS assumpsit Dauidem, aut Petrum, significat assumpsisse eum in suam gratiam, in suam tutelam, & promississe ei conseruationem in omnibus aduersis, & liberationem ab omnibus malis. Etsi autem Deus non ita assumit Dauidē aut Petrum, sicut Christū filium suū, tamen tanto amore cōspicitur filium suū, vt quotquot credūt in eum, adoptet & ipsos in suos filios, & faciat eos coheredes Christi filij sui, vt & ipsi maiestate eius fruantur, & collocentur, suo modo, in hæreditate omnium cœlestium bonorum. Dicit enim Pater ipse de Christo filio suo: Hic est filius meus dilectus, in quo mihi com-

placitum

placitum est. Hunc audite : Et Paulus : Proprio filio suo non pepercit , sed pro nobis omnibus tradidit eum. Quis ergo fieri posset , vt non & omnia cum eodem nobis donauerit ? Postquam igitur Psalter credidit in benedictum semen Abraham , (hoc est) in Christum , non potest , nec debet amplius dubitare , quin assumptus ac receptus sit in gratiam Dei , ideoque certissime liberandus est potestate & faucibus inferni , ac collocandus in coelesti hereditate : quam enim haberet amplius dubitationis de salute sua causam ? Huc enim pertinet , quod Paulus ad Romanos scribit : Persuasum , inquit , habeo , quod neque mors , neque vita , neque angeli , neque principatus , neque virtutes , neque instantia , neque futura , neque altitudo , neque profunditas , neque vlla alia creatura poterit nos separare , ab ea dilectione , qua Deus nos in Iesu Christo Domino nostro complectitur .

16. *Ne obstupescas , cum quispiam factus fuerit diues , & cum multiplicabitur gloria domus eius .*

Epilogus , in quo repetitur propositio , & admoneamur , ne offendamur impiorum felicitate , & nostra infelicitate . Postquam enim interitus impiorum , etiam si differatur in longinquum tempus , tamen certissime venturus est , salus autem piorum non potest non vel tandem reuelari , & cumulatim restitui . Agite dum amicissimi , non admiremur , non metuamus , non obstupescamus , cum homo quispiam peruenerit impietate sua ad magnas diuitias , ad summum in his terris honorem , ad insignem potestatem , et gloria familiæ

milie eius illustretur maximo splendore, vt nos videamur præ ijs abiectissimis, & crassissimis tenebris obscurati. Repetit autem, quod in epilogo fieri solet, præcipua exhortationis argumenta, quæ suprà sunt commemorata. Sic enim sequitur:

17. *Quia in morte sua nihil secum auferet, non comitabitur ipsum gloria eius.*
18. *Sed anima eius in hac tantum vita sua felix est, & laudant te (impij) cū benefeceris tibi, (in hoc seculo.)*
19. *Abit (anima eius) ad generationem patrum suorum, in æternum non videbunt lumen (felicitatis.)*
20. *Breuitèr, homo, qui est in honore, & non intelligit, similis est bestijs, quæ pereunt.*

Quod suprà dixit: Relinquent alienis facultates suas, hoc nunc dicit: Nihil secum in morte sua auferet, nec comitabitur ipsum gloria eius. Et quod antè dixit: Posterì eorum commendant studium impiorum ore suo, hoc nunc ait: Laudant te impij, cū benefeceris tibi. Ac iterum, quod prius dixit: Collocabuntur in inferno gregatim, & mors depascet eos, hoc nunc dicit: Abit anima impij ad generationem maiorum suorum, hoc est, ad cœtum impiorum, nec vnquam videbit vllum felicitatis lumen. Postremò, sicut suprà dixit: Homo (impius) in honore non perdurat, similis est bestijs quæ pereunt, hoc totidem ferè verbis, mutato tantum vno verbo, quemadmodum suprà ostendimus, in fine huius epilogi dicit: Homo, qui est in honore, & non intelligit, (videlicet consilium Dei) similis est bestijs, quæ intereunt.

Sententia igitur huius Epilogi est. Quod ab initio Psalmi admonui, hoc nunc in fine eius repeto & inculco, videlicet, ut nō metuas, non trepides, non cos horrescas animo tuo, si videris te infelicem, & aduersarios tuos felices, ac tam opibus, quā dignitate & potentia illustres. Primum enim, felicitas eorum non est perpetua, sed si multum, in hac tantum vita sunt felices: nec auferunt secum suam felicitatem in futuram vitam, sed torquebuntur ibi æterno cruciatu. Huc pertinet, quod Abraham ad diuitem epulos nem dixit: Fili, inquit, recordare, quod receperis bona tua in vita tua, & Lazarus similiter mala: nunc autem hic solatio fruitur, tu verò cruciaris. Et aliās applaudit sibi (quod et antè recitauimus) diues: Anima, inquit, habes multa bona reposita in multos annos, requiesce, ede, bibe, gaude: sed mox audit: Stulte, hac nocte animam tuam repetunt abs te: quæ verò parasti, cui cedent? Deinde, impij ne in hac quidē vita quicquam eximij, præter vanissimam quandam hominum laudem reportant: Laudant (inquit) te, cum benefeceris tibi, (hoc est) homines eo sunt ingenio, ut quem viderint diuitem, in delitijs viuentē, & vitam Epicuræorum more ducentem, hunc miris ficiis laudibus vehant, & in omnibus constrictis & compitis beatum prædicent: En, (inquiunt ad suos quosq; proximos) hic est vir ille optimus, & eximius, cui ad summam felicitatē nihil prorsus deesse videtur. Si corpus respexeris, optima fruitur valetudine, si diuitias, tantam vim pecuniæ possidet, ut si ea (quod dici solet) vefci liberet, abunde suppeteret: si auctoritatem, vicini eius tantum non adorant ipsum.

Quid

Luc. 16.

Luc. 12.

Quid multis opus? Et genus & formā regina pecunia donat. Sed quid, obsecro, illa sunt, nisi somnia illa, quæ apud Esaiam de felicitate hostium populi *Esa. 29.* Dei recitantur: Sicut somniat (inquit Propheta) esuriens, & comedit, cum autem fuerit expergefactus, vacua est anima eius, & sicut somniat sitiens, & bibit, & postquam fuerit expergefactus, lassus adhuc sitit, & anima eius vacua est: sic erit multitudo, (hoc est) felicitas omnium Gentium, quæ dimicauerunt contra montem Zion? Interea autem, quem populus ita beatum iudicat & prædicat, seruus est turpissimorum suorum affectuum, & necesse habet, vel tandem vnā cum impijs perire. Abit (inquit) anima eius ad generationem patrum suorum, non illorum patrum, qui in fide seminis Abrahamæ, seu in Christo ex hac vita excedunt, sed istorum Epicuræorum, qui dicunt: Edamus & bibamus, cras enim moriemur. *1. Cor. 15.* Hi enim tantum abest, vt fruantur ea felicitate, qua in hoc seculo videbantur beatissimi, & commendatissimi, vt perpetuò, nulla vnquam beatitudinis luce illustrentur, sed necesse habeant in extremis tenebris interire. Quid autem plura addam? Homo ille impius & Epicuræus, non est propriè homo, sed bestia, gestat quidem hominis imaginem, sed animo, ac aliquoties etiam, externis moribus similis est bestijs. E sapientibus quispiam *Quid. in 1. lib. Metamorph.* huius seculi dicit: Pronaq; cum spectent animantia cætera terram, Os homini sublime dedit, cœlumq; videre. Epicuræi igitur, non illud agunt, vt respondeant figuræ suæ, ac cœlestia meditentur, sed potius spectant in modum bestiarum, proni, ad

omnia terrenarum voluptatum genera. Etsi enim sunt in honore, ac diuinitus multis insignibus donis ornati, tamen non intelligunt, non cum animo suo considerant, quo consilio Deus contulerit in ipsos tam excellentia dona, videlicet, non vt his donis ad impietatem, ad Epicureismum, ad contemptum omnis honestatis abutantur, sed vt ad poenitentiam inuidentur, & ad cognitionem ac verum cultum Dei excitentur. Cum ergo more bestiarum, quæ nullam habent diuinæ cognitionis rationem, vitam ducant, non est etiam incongruens, vt bestiarum more pereant: imò multo peior est impiorum hominum, quam porcorum, aut aliarum bestiarum conditio. Porci enim ita intereunt, vt post mortem nihil amplius sentiant. Impij autem ex hac vita sic excedunt, vt tandem incipiant vitam longè omnium infelicissimam, idq; perpetuò agere, cum pietatis studio summa & æterna felicitas fuisset expectanda. Hæc est illa sapientia & prudentia, hæc sunt illa ænigmata, & parabolæ, (hoc est) memorabilia dicta, & obseruabiles sententiæ, quas Psalmus in exordio, cithara sua ludendas suscepit, & ad audiendas eas omnes populos, & omnia genera hominum vocauit: quibus hortatur vniuersam Ecclesiam populi Dei, vt nihil offensa suis aduersis, & impiorum prosperis rebus, contineat se in officio pietatis, & pergat in vocatione Dei ambulare, certa persuatione concepta, quod qui viriliter agit, & expectat DOMINVM, spe sua, quam habet in Christo, non pudeat.

Vsum eius iam exposuimus. Est enim remedium aduersus offendicula, quæ inde adeò oriuntur, quod in hoc seculo pijs sit male, impijs autem bene. Ceterum, sunt qui sentiunt, hunc Psalmum non esse vocem alicuius vulgaris Psaltæ, sed esse vocem Christi ipsius. Ac sunt quidem aliquot alij Psalmi, qui offendiculo illi medicinam pollicentur, quemadmodum supra dictum est: sed si his addideris exemplum DOMINI nostri Iesu Christi, habebis remedium longè omnium efficacissimum. Confer enim mihi inter se, Christum & hostes eius, Pontifices ac Phariseos, & cognosces, quantum sit inter ipsos, et causæ & fortunæ discrimen. Nam Christus fuit longè omnium innocentissimus, Pontifices autè & Pharisei celeratissimi: & tamen nullum genus est afflictionis, quo Christus innocens nō fuit obrutus: esuriit, eguit, exulauit, contumelia affectus est, capitalibus suis hostibus proditus est, captus est, a lapis & flagellis percussus est, consputus est, crucifixus est, in cruce mortuus est: quo afflictionis genere, nullum maius in his quidem terris excogitari potest, vt haud iniuria apud Prophetam dicatur Christus virorum nouissimus. *Esaiæ. 53.* Contra verò Pontifices & Pharisei hostes eius, in summa erant autoritate & dignitate, decreta eorum habebantur pro oraculis Spiritus sancti, consilia eorum contra Christum promouebant felicissimè, & videbantur ipsi beatissimā ducere vitam: sed nondum (quod dici solet,) sol omnium dierum occidit. Exitus acta probat: non ab externo euentu, sed à fine res est æstimanda. Intueamur ergo Christi & hostium eius finem. Postquam enim Christus mortuus est, tantum

abfuit vt in morte perierit, vt mox tertia die à morte resurrexerit, & exaltatus fit in summā sublimitatem, ac acceperit nomen super omne nomen, vt in nomine eius omne genu flectatur, cœlestium, terrestrium & infernorum. Pontifices autem & Pharisei cœperūt ab eo tempore omni maledictionis genere insigniri. Non solum enim ipsi seditionibus perturbabantur, & extremis calamitatibus obſciebantur, verumetiam excluderentur vnà cum Gente sua, quā se occisione Christi sperauerant conseruatuuros, & cœlesti hæreditate, vt sicut ipsi horribiliter tam corpore, quàm animo perierunt, ita posterī eorum semper in his terris exulent, & nunquam pateat ipsis, ad cœlos, in hac quidem ipsorum impœnitentia, receptus. Vide, quàm diuersi sunt Christi suo tempore infelicis, & hostium eius fortunatissimorum fines. Ponamus igitur hoc exemplum nobis ob oculos, vt non sinamus nos vllò crucis offendiculo ad impietatem inflecti. Sed dices: Alia est ratio Christi & suorum hostium, quàm mea, & meorum aduersariorum. Christus enim fuit longè omnium innocentissimus, ego autem sum peccator: & quamuis sciam aduersarios meos iniquam habere contra me causam, tamen in illo statu sunt res meæ, vt si DOMINVS obseruet meas iniquitates, sustinere non queam. Quomodo igitur possum me exemplo Christi solari? & e meis ærumnis gloriosam liberationem sperare? Sed bono sis animo. Si peccata te perturbant, Christus passus est pro peccatis tuis, & expiauit ea, vt si credideris in eum, non amplius tibi coram tribunali Dei imputentur. Si ærumnæ grauiores videntur, quàm quas
ferre

ferre possis, factus es, per fidem, membrum Christi, ut in qua gloria Christus ipse collocatus est, ea tu quoque, ut membrum eius, fruaris: Si cum ipso, inquit Paulus, patimur, vna cum ipso quoque glorificabimur. *Rom. 8.* Et si sumus filij Dei per fidem, sumus etiam hæredes, hæredes quidem Dei, cohæredes autem Christi. Quare, non committamus, ut patiamur nobis exemplum Christi è manibus excuti, sed retineamus morem dicis, ut omnia offendicula, quantumcunque graua, illasi per Christum euadamus, & superemus.

Psalmus 50.

Deus deorum DOMINVS locutus est, &c.



Israelitæ gloriabantur quondam in hoc mundo duobus præcipue nominibus. Altero, quod essent populus a Deo electus. Altero, quod accepissent legem & ritum sacrificiorum diuinitus præscriptum. Qua dignitate ita sibi blandiebantur, ut non solum reliquas Gentes præ se f. fidirent, verumetiam arbitrarentur, se propter obseruationem sacrificiorum & ceremoniarum, quæ lex Dei præscripserat, Deo acceptissimos, etiamsi alioqui nullum non impietatis & scelerum genus sectarentur. Hanc perversam sententiam, ac præposteram religionem reprehendit Asaph (qui fuit vnus è principibus Cantorum, 1. Paralip. 15. et 16.) in hoc Psalmo: et vaticinatur, primum, quod etiamsi Israelitæ electi sint ab initio in populum, seu Ecclesiam Dei, tamen, quia fuerunt ingrati, & abiecerunt

cerunt Messiam filium Dei, abiicientur & ipsi in adventu Messiae, ne sint amplius populus Dei, (quod *Deut. 32.* & Moses in carmine suo perspicue testificatus est,) & eligentur in populum Dei Gentes ex omnibus huius terrae nationibus. Deinde, quod etsi Deus praescripsit Israelitis sua sacrificia, & suos cerimoniarum ritus, non tamen praescripsit illo consilio, ut sentirent se actione & merito sacrorum illorum coram Deo iustificatos, sed ut ipsi fidem suam in verum Messiam, (cuius sola fide iustificamur) & in sacrificium eius, exercerent & confirmarent. Quare, cum Israelitae abuterentur his sacrificijs ad impietatem, & contra iustitiam Messiae, non solum damnat ea Psalmus, verum etiam vaticinatur prorsus abroganda, & e medio tollenda, ac per Euangelion Christi, quod in toto orbe adnuntiabitur, veros Dei cultus instaurandos.

Continet autem hic Psalmus tres praecipue partes. Vna est, de vulgando Euangelio Christi in totum orbem terrae. Altera, de abrogandis Leuiticis sacrificijs, & instaurandis veris cultibus Dei, qui sunt fides, inuocatio nominis Dei, & gratiarum actio. Tertia est reprehensio hypocritarum, qui cum impiam & sceleratam vitam ducunt, nec agunt veram poenitentiam, pollicentur sibi impunitatem meritis suorum sacrificiorum, & aliorum id genus cultuum.

1. *Fortis Deus, DOMINVS loquitur. Vocat terram, ab ortu Solis vsq. ad occasum eius.*
2. *Ex Zion perfectus splendor Dei emicat.*
3. *Venit Deus noster, & non silet, ignis ante ipsum vorax, & circa eum vehemens turbo.*
4. *Vocat*

4. *Vocat cælum de super, & terram, vt iudicet populum suum.*

Hæc est prima pars huius Psalmi, in qua describitur promulgatio Euangelij de Christo in vniuerso orbe terrarum: Fortis (inquit) Deus DOMINVS loquitur. Pro (fortis) apud Hebræos est אל El, quod significat tam Deum, quam fortem. Est autem propriè epithethon DOMINI nostri Iesu Christi, quod tribuit ei Esaias ca. 9. Sciamus igitur hunc fortem DOMINVM Deum esse Christum, qui etsi non prædicauit Euangelion suum Gentibus, affirmat enim se non esse (externo quidem ministerio suo) missum, nisi ad oues Israël, quæ perierunt, tamen multa dixit de vocatione Gentium, & abiectione Iudæorum: ac postquam resurrexit à mortuis, & misit Spiritum sanctum, ablegauit Apostolos suos ad omnes Gentes, qui suo nomine prædicarent Euangelion in vniuerso mundo, & vocarent omnes populos ad cōmunionem cœlestium bonorum in Christo. Hic ergo Christus, fortis Deus, & verus DOMINVS Iehoua, loquitur: Quis autem loquente tanto DOMINO, non attentè audiret? quis non arrectis auribus astaret? Ecce igitur tibi nos attentos, ecce arrectas aures nostras. Quid autem loquitur? Vocat, (inquit Psalmus) terram, ab ortu Solis, vsq; ad occasum eius. Tu quidem, Iudæe, applaudis tibi, quòd Deus collocutus sit tecum de cœlo, & promulgauerit tibi Decalogum de monte Sinai, ac receperit te in populum suum peculiarem, quæ certè magna est, (fateor) & illustis dignitas: sed non est tanti momenti, vt Deus conclus

Ff ferit,

ferit se in vnam tantum Iudaicā gentem. Nunc enim in plenitudine temporis vocat de cœlo, è quo Spiritum sanctum in Apostolos suos misit, omnem terram, omnes terræ incolas, ab ortu solis vsq; ad occasum eius, idq; non de monte Sinai, sicut quondam in deserto, sed de monte Zion, è quo sparsum est Euangelion Christi inter omnes Gentes. Ac lex quidem

Heb. 7. & 10. DOMINI, quæ patefacta & promulgata est in monte Sinai, etsi suum habuit splendorem, & in se, ac suo genere perfectissima est, tamen tanta est hominum

Rom. 8. imbecillitas & corruptio, vt nō potuerit eos ad perfectum perducere, quia infirmabatur per carnem. Euangelion autem, quod emicuit in monte Zion, & quod initio factum in Hierusalem, promulgatum est in vniuersam terram, splendor est perfectissimus, illustrans omnes illos perfecta iustitia & beatitate, qui adhibent ei fidem. Venerat etiam quondam Deus de cœlo in montem Sinai, magna maiestate: Totus, inquit scriptura, mons Sinai fumabat, eo, quod descendisset DOMINVS Deus super eum, in igne, & ascenderet fumus ex eo, quasi de fornace. Et paulo antè: Cœperant audiri tonitrua, ac micare fulgura, & nubes densissima operire montem, clangorq; buccinæ vehementius perstrepere. Sed nunc venit Deus, Christus DOMINVS noster in montem Zion, ad promulgandum Euangelion suum multo maiori maiestate, quàm vnquam in terris visum est, & auditū.

Exo. 19. Et venit non mutus, non tacitus, sed sonantissimus, & manifestissimus. Apostoli enim, missi in die Pentecostes Spiritu sancto, loquebantur novis & varijs linguis, eniciebant per nomen Christi dæmonia, tollebant

lebant serpentes, sanabant impositis manibus claudos & paralyticos, denique mortuos etiam suscitabant. Et quanquam initio resistebant promulgationi Evangelij tam Iudæi, quam Gentes, tamen tanta erat virtus & potentia eius, ut brevissimo tempore percurreret totum orbem, & subijceret Christo, non quidem mundano, sed coelesti modo, uniuersam terram; nec afferret tantum externam in hoc mundo honestatem, verum etiam perpetuam salutem, omni credenti. In carne ambulantes, inquit Paulus, non secundum carnem militamus. Quia arma militæ nostræ non sunt carnalia, sed potentia Deo ad demolitionem munitionum, quibus armis demolimur consilia & omnem cellitudinem, quæ extollitur aduersus cognitionem Dei, & captiuam ducimus omnem cogitationem ad obediendum Christo. Hæc est maiestas illa, quam Psalmus nomine voracis ignis, & vehemens turbinis præcedentis & comitantis Christum, ac Euangelion eius, intelligit. Postquam enim mundus audiuit Euangelion Christi, & vidit miracula, quæ aliàs nunquam ab initio orbis, nec visa, nec audita fuerunt, multò magis obstupuit, quam cum Israëlitarum ad tonitrua & fulgura in monte Sinai contremuerunt: & multò promptius se in obsequium Christi tradidit, quam Israëlitarum in obsequium legis Moysi. Ac breuiter: Christus vocat per Euangelion suum, non vnā tantum gentem, sicut quondam Moyses, sed vocat cælum & terram, hoc est, promulgat Euangelion suum, sub omni cælo, & in vniuersa terra, ut iudicet populum suum. Hoc illud est, quod Christus apud Ioannem capite 16. ait: Cum

venerit Paracletus, arguet mundum de peccato, de iustitia & de iudicio. De peccato quidem, quia non credunt in me. De iustitia verò, quia vado ad Patrē, & posthac non videtis me. De iudicio autem, quia Princeps huius mundi iam iudicatus est. Per Euangelion enim, quod missō Paracleto, promulgatū est, iudicat Christus populum suum in vniuersa terra, quia illos, qui credunt Euangelio, iustificat, condonat ipsis omnem ipsorum iniustitiam, idē gratuita sua clementia, defendit ipsos in omnibus aduersis, conseruat ipsos in morte, tuetur eos in incurſu satanæ, ac facit ipsos hæredes omnium cœlestium bonorum: istos autem qui non credunt, condemnat, tradit satanæ, & abicit in æternum barathrū. Agnoscamus igitur grati beneficium Christi, & amplectamur Euangelion eius, quia possumus, fidei obedientia, vt bonis eius perpetuò fruamur. Habes primam partem Psalmi, de promulgatione Euangelij in toto orbe terrarum, & vocatione omnium Gentium in Ecclesiam Christi.

5. *Congregate mihi sanctos meos, quibus cum pepigi pactum, de sacrificio.*
6. *Et adnuntiabunt cœli iustitiam eius, quia Deus iudex est.*

Exordium secundæ partis, quo ad hanc concionem audiendam excitantur & conuocantur in præsens Leuitæ, ac ipsorum nomine, omnes reliqui Israëlitarum. In hac enim parte suscipit Psalmus concionandum de abrogatione Leuiticorum sacrificiorum, & abiectione

abiectione Israeliticæ Gentis ex Ecclesia Dei. Dicit ergo: Congregate mihi sanctos meos, cum quibus institui pactum de sacrificijs, vt hanc seu cantionem seu concionem audiant. Nec dubito, quin etiam cœli ipsi adnuntiaturi sint iustitiam eius, (hoc est) Non dubito, quin iustitiam, rectitudinem & veritatem huius rei, ita sim patefacturus, vt etiam meridiana luce Solis, in cœlo lucentis, & radios suos in totum nostrum hemisphærium proijcientis, clarior ac illustrior fiat. Quia Deus iudex est, (hoc est) quod commemorabo in hoc carmine, non est meum humanum somnium, sed est cœleste oraculum, non est carnale figmentum, sed est diuinum iudicium. Deus ipse iudex est, Deus ipse, quod de sacrificiorum ratione commemorabo, pronuntiat, Dei, non hominis sententia est, quam recitabo: & quod loquar, ecce coram Deo summo omnium iudice loquar. Quare, magnopere cauendum & providendum est, ne quisquam eo temeritatis perueniat, vt hanc sententiam, & hoc iudicium reprehendat atq; condemnet. Obseruemus autem, quòd quos hîc interpretes, transulerunt sanctos, apud Hebræos vocantur hoc loco חסידים Hasidim, quod significat homines beneficos & pios. Sic autem vocantur Sacerdotes & Leuitæ, Deut. 33. & 2. Paralip. 6. siue, quòd demandatum fuerit ipsis officium benedicendi, siue quòd verum cultum Dei, tanta erga Deum pietate defenderint, vt præ diuino zelo, ne liberis quidem suis, ac fratribus pepercerint. Conuocat igitur DOMINVS ad hanc cantionem, inprimis quidem Sacerdotes & Leuitas, quibus cum pactum fecerat, (quemadmodum

Deut. cap. 10. & Num. 18. & Mala. cap. 2. scriptum est de sacrificijs peragendis, qui cū præcipui debuissent esse tutores veri vsus sacrificiorum, primi fuerunt, qui ea violarunt. Deinde vocat omnes Israelitas, vt doceat eos veram rationem & legitimum vsu sacrificiorum. Sed cū non solum ijs ad impietatem abuterentur, verūmetiam impoenitentes essent, vaticinatur tam sacrificia illa abroganda, quā ipsos ex Ecclesia DOMINI abiiciendos, sicut & postea apud Malachiam dicitur: Quis est in vobis, qui claudat ostia, & incendat altare meum gratuito? Non est mihi in vobis voluntas, dicit DOMINVS exercituum, & munus non suscipiam de manu vestra. Ab ortu enim solis vsque ad occasum magnum est nomen meum, &c. Et apud Oseam. Quia tu scientiam repulisti, repellam te, ne sacerdotio fungaris mihi.

Mala. 1. & 2.

Ose. 4.

7. *Audi mi popule, & loquar, Israel (audi) & monebo te, Deus, Deus tuus ego sum.*

Quod antè cœpit, de conuocandis Sanctis, (hoc est) sacerdotibus & Leuitis ad hanc concionem audiendam, hoc nunc transfert ad omnes Israelitas, & facit eos commendatione autoritatis & maiestatis suæ attentiores. Non arbitreris, gregarium quendam, (mi popule Israel) & vilem homuncionem tecum loqui, & te tanta testificatione monere: sed ego sum ille Deus tuus, qui tecum loquor, Deus, inquam, DEVS TVVS EGO SUM, qui testificatione nominis mei te de vera & æterna salute tua admonéo.

neo. Cogita ergo nunc tu ipse, & cum animo tuo considera, quanta cura, quanta vigilantia, quanta attentione audiendum sit, quod commemorabo. Si angelus quispiam, aut saltem homo Rex & Monarcha tecum loqui, & te cohortari dignaretur, quàm arrectis auribus adstares, quàm sollicitè curares, ne vel verbulum aliquod somnolentè exciperes? Quanto magis curandum est, ut quod ego, ego inquam, qui sum Deus tuus, loquor, summa diligentia cognoscas? Excitemur & nos hoc versiculo, ut non simus ignavi auditores verbi Dei, quod nobis è scriptis Prophetiis & Apostolicis recitari solet. Non expectemus novas de cœlo Apocalypses, sed teneamus, quod dictum est apud Lucam ad diuitem epulonem: Si Moſen & Prophetas non audiunt, neque si quis ex mortuis resurrexerit, credent. Neque causamur humilitatem & abiectionem humanæ vocis, in ministro Ecclesiæ. Verbum enim, quod ex Prophetiis & Apostolicis scriptis nobis proponit, & iuxta sententiam Spiritus sancti explicat, non est humani cordis somnium, sed est cœleste oraculum: Qui recipit, inquit Christus ipse, Prophetam in nomine Prophetæ, mercedem Prophetæ accipiet. Et Paulus: Agimus, inquit, Deo gratias indefinenter, quod cum acciperetis sermonem à nobis, quo Deum disceratis, accepistis non sermonem hominum, sed sicut erat verè, sermonem Dei, qui & agit in vobis credentibus. Sed audiamus nunc, quid Deus de sacrificiis loquatur.

Matth. 10.

1. Thess. 2.

3. *Non propter sacrificia tua arguam te, holocausta tua coram me sunt semper.*

9. Non

9. Non accipiam de domo tua virulum, neq; de caulis tuis hircos.
10. Quoniam mea sunt omnia animantia sylue, iumenta in mille montibus.
11. Noui omne volatile montium, & volucris agri mecum est.
12. Si esuriero, non dicam tibi, quia meus est orbis & plenitudo eius.
13. Nunquid manducabo carnem taurorum, aut sanguinem hircorum bibam?

Hæc est concio illa, ad quam audiendâ Deus ipse non sacrificulos tantum, verum etiam omnes Israelitas conuocat, sed qua in auribus hypocritarum nihil videtur absurdius, & à veritate magis abhorrens. Negari enim non potest, quin victimæ, sacrificia, holocausta, & alia oblationum genera, sint in lege DOMINI, non solum instituta, & ordinata, verum etiam singulari studio commendata. Holocaustum,

Exod. 29. inquit scriptura, suauissimi odoris, & incensi est DO-

Num. 28. MINO. Quid est igitur, quod hæc Leuitica sacrificia, in omnibus fere Prophetis scriptis reiiciantur?

1. Sam. 15. Samuel ait. Nunquid vult DOMINVS holocausta & victimas, & non potius vt obediatur voci DOMI-

Esaia 1. NI? Et Esaia: Quo mihi multitudo victimarum ves-

Hier. 7. strarum, dicit DOMINVS? Et Hieremias: Holocausta vestra addite victimis vestris, & comedite carnes, quia non sum locutus cū patribus vestris, & non præcepī eis, in die, qua eduxi eos de terra Ægypti, de verbo Holocaustum & victimarum. Et Oseas: Misericordiam volo, & non sacrificium: & scientiam

Dei

Dei plusquam holocausta. Quid multa? Spiritus
 Propheticus sacrificia ita abominatur, vt Esaias ite- *Esai. 66.*
 rum dicat: Qui immolat bouem, quasi qui interficit
 at virum. Qui mactat pecus, quasi qui excerebret
 canem. Qui offert oblationem, quasi qui sanguinem
 suillum offerat. Qui recordatur thuris, quasi qui be-
 nedicat idolo. Quid potuit de sacrificijs cōtemptius
 & abiectius dici? Et tamen manifestum est, quod lex
 Dei cōmendat ea de meliori nota. Quid igitur est in
 ipsis reprehensione dignum? Principiò, illud dignū
 est reprehensione, quod etsi sacrificia Leuitica insti-
 tuta sunt a Spiritu sancto, in sanctum & pium vsum,
 tamen impij hypocritæ abutebantur ipsis ad impie-
 tatem. Instituta enim erant, vt adumbrarent expia-
 tionem peccatorum, per vnicum sacrificium Christi
 absoluendam, & docerent veram fidem in Christum,
 quod per hunc solum habeamus condonationē pec-
 catorum coram Deo, & ius cœlestis hæreditatis. Im-
 piij autem hypocritæ abutebantur ipsis contra fidem
 in Christum, quippe quod sentiebant, se horum me-
 ritis expiare peccata sua coram Deo, & placare iram
 Dei, ac mereri æternam felicitatem. Hoc non erat
 sacrificare ex fide, sed cōtra fidem: Israël, inquit Paulus *Rom. 9.*
 Ius, qui sectabatur legem iustitiæ, (hoc est) qui sa-
 crificabat, & multa opera iusta faciebat, ad legem ius-
 titiæ non peruenit. Propter quid? Quia non ex fide,
 sed tanquam ex operibus legis. Non enim sacrificas-
 bant, vt fidem suam in Christum, cuius sacrificia vms-
 bra erant, pascere, & confirmarent, sed vt meritis
 horum operum Deo pro peccatis suis satisfacerent.
 Hoc autem pugnat cum fide in Christum, qui, qui

bus peccata condonat, ea condonat gratis, & absque
 villo operum & meritorum respectu, si crediderimus,
 quod solus ipse sua passione et morte peccata expia-
 uerit: Si per gratiam, inquit Paulus, non iam ex ope-
 ribus, quandoquidem gratia, iam non est gratia: sin-
 ex operibus, iam non est gratia. Quare, quemadmo-
 dū Rex Ezechias optimo iure contriuit serpentem
 æneum, quo vulgus Israëlitarum ad idolomaniam
 abutebantur, ita Prophetæ meritò condemnauerunt
 sacrificia, quæ hypocritæ, ad honorem quidem Dei,
 sed contra fidem in Christum, impie vsurparunt. Sed
 inquires: Vulgò dici solet: Abusus rei non tollit sub-
 stantiam eius. Non sunt igitur sacrificia tollenda,
 propter impiorum abusum. Rectè. Tollamus ergo
 abusum, relinquamus autem verum & legitimum
 vsum. Prophetæ igitur, cum reprehendunt & ab-
 ominantur Leuitica sacrificia, non tollunt e medio
 legitima sacrificia, suis quidem temporibus, sed ad-
 monent de vero eorum & pio vsum, vt omnem glo-
 riam expiationis peccatorum, Christo, per sacrifi-
 cia adumbrato, acceptam ferant. Atque hoc illud
 est, quod versiculi, quos paulo antè commemoras-
 uimus, docent: Non arguam te, inquit DOMINVS,
 propter sacrificia tua. Tu quidem, hypocrita, arbitras-
 ris te grauiter in me peccare, quod non offeras plus-
 ra sacrificia, & holocausta, quàm hactenus vsitas-
 tum est: & existimas, te summo me honore affice-
 re, si frequentissimè mihi tuas oblationes ob oculos
 posueris. Sed ego non sistam te ad tribunal me-
 um, quod parum sacrificaueris, nec delector his tu-
 is ho-

is holocaustis, quamuis sumptuosis & magnificis. Obtrudis enim ea mihi tanquam indigenti, & tam humiliter, tam pueriliter, tam sordide affecto, quasi qui sinam me istis bestiarum macerationibus & nidoribus ita capi & deliniri, vt conniueam ad omnem impietatem tuam, & necesse habeam, tanta, scilicet, tua merita, omni benedictionis tam corporalis, quam spiritualis, tam terrenæ, quam cœlestis genere compensare. Sed quid his opinionibus stultius, ac furiosius? Quæso enim te, quid potes mihi ex omni siue animantium, siue aliarum rerum genere offerre, ac reddere, quod non antea meum est? Si attuleris in holocaustum, aut in aliud genus oblationis, vitulos, boues, hircos, oues, volatilia, & quicquid est animantium, quod per legem offerre licet, num putas mihi ea antè defuisse, & nunc primum mea fieri? Hoc, si serio senseris, certè sacrificium tuum, non est diuini nominis honor, sed summa in diuinam maiestatem contumelia. Iudicas enim, Deum non esse rerum omnium creatorem, Dominum & possessorem, ac tanta esse penuria, vt necesse habeat expectare, donec tu egestati eius, allato boue aut vitulo, subuenias. Hoccine est Deum honore afficere? Quòd si senseris Deum esurire, & aut cibo sacrificiorum fami suæ mederi, aut nidore eorum delectari, quid potest de tanta maiestate puerilius, aut magis Ethnicè cogitari? Hæc nunc transferenda sunt ad alia quoque sacra, & opera, quorum meritis hypocritæ pollicentur sibi condonationem peccatorum coram Deo, & vitam æternam.

nam. Ecce enim tibi, vel cantum septem horarum
 Canonicarum, vel Missam Pontificiam, vel ieiunia
 triduana aut quatríduana, vel peregrinationes ad
 templa diuorum, vel alia id genus sacra. Certè cum
 hæc obruſeris Deo, tanquam placationes iræ Dei,
 & expiationes peccatorum coram Deo, potest tibi
 congruentissime verbis ab hoc Psalmo mutuatis res
 sponderi: Nō arguam te, inquit D O M I N U S. propter
 tua carmina, nec accipiam de domo tua panem & vi
 num, quæ mihi ad expianda peccata mortuorum &
 viuorum offers, non delector tuis ieiunijs aut pere
 grinationibus. Quid enim? Arbitraris ne, me tam
 impotenti esse animo, vt qui sine vlla intermissione
 audiam ineffabilem angelorum harmoniam, necesse
 habeam ad alacritatem humana voce excitari? An
 tantillum panis & vini, quæ mihi in sacrificium cor
 poris & sanguinis vnigeniti filij mei pro peccatis
 hominum obrudis, cōmoueat me, vt iustam meam
 iram remittam? Et quid mihi proderit ventris tui va
 cuitas? An non satan ipse perpetuò ieiunat, & tamē
 ne pilo quidem vel iustior vel sanctior redditur?
 Habent quidem nōnulla ex ijs, quæ enumerauimus,
 suum legitimum vsum, quod alijs suis locis explicar
 ri solet, sed quem hypocritæ in suis operibus somni
 ant, non est pius vsum, sed impius abusus. Quare sicut
 in faciendis sacrificijs, ita & in reliquis sacris operi
 bus non est operis species, sed operantis fides consi
 deranda: nec est dubium, quin quod, quantumuis in
 speciem iustum & sanctum, non est ex fide, sit coram
 tribunali Dei peccatum. Deinde, vt reuertamur ad
 rationem Leuiticorum sacrificiorum, illud etiam
 repres

reprehensione dignum est, quod imperiti arbitrantur, hunc cultum in populo Dei non solum esse summum, verum etiam perpetuò duraturum. Sed sacrificia Leuitica longè alio consilio diuinitus sunt instituta. Sicut enim non sunt instituta, vt expient suis ipsa meritis peccata hominum, ita non sunt instituta, vt vsus eorum sit in Ecclesia DOMINI perpetuus. Dictum quidem est: Perpetuus erit cultus per successiones eorum coram filijs Israel, & : Agnos anniculos duos quotidie in holocaustum sempiternum vnũ *Exod. 27.* offeratis manè, & alterum ad vesperum. Hoc autem intelligendum est, non de eo, quod simpliciter sit perpetuò, & in sempiternum duraturum, sed sicut alijs additur, & explicatur: In generationibus vestris, *Num. 18.* hoc est, dum respublica carnalis & externi Israelis constiterit. Quare, etiamsi hypocritæ non abuterentur sacrificijs ad impietatem, tamen diuinitus est desinitum, vt tempore incarnationis Christi, & diuulgationis Euangelij de Christo in orbe terrarum, abrogarentur & tollerentur. *Gen. 17.*

Dices: Audio quidem cultum Leuiticorum sacrificiorum resciri, audio eum tempore aduentus Christi in carnem abrogandum, sed prudentis est, vetera non prius mutare, quàm meliora substitueris. Quæ igitur sunt illa meliora sacra, quæ in locum veterum succedant? De his rebus concionantur versiculi, qui sequuntur.

14. *Sacrificia Deo laudem, & redde altissimo vota tua.*
 15. *Inuoca me in die tribulationis, liberabo te ita, vt sis me glorificaturus.*

In libro Leuitico cap. 8. præter alias oblationum species, enumerantur etiam sacrificium laudis seu gratiarum actionis, quod vocatur תודה Thoda, quod significat laudem seu confessionem: & sacrificium ex voto, quod vocatur נדר Neder, & significat votum. Mirandum igitur est, quod cum Spiritus sanctus antea reiecerit Leuitica sacrificia, nunc affirmet sibi hæc duo genera sacrificiorum, præ omnibus alijs placere, cum tamen & ipsa in numero Leuiticorum contineantur? Sed facilis est responsio. Cum enim reiecerit antea Leuitica sacrificia, inter quæ & hæc duo numerantur, obscurum non est, quod & ipsa vnà cum alijs generibus, quatenus quidem sunt Leuitica, rejiciat. Cum autem hisce duobus versiculis commemoret sacrificia Leuiticis, in nouo Testamento, tempore aduentus Christi, substituenda, vtitur quidem pristinis & vsitatis in veteri Testamento vocabulis, intelligit autem nominibus ipsorum sacra, & cultus noui Testamenti. Vera igitur sacra, quæ Deo exhibenda sunt, & quæ Deo maxime omnium placent, non tam in nouo, quam quondam etiam in veteri Testamento, sunt, primum quidem, sacrificium laudis, (hoc est) confessio nominis DOMINI nostri Iesu Christi. Deinde, sacrificium ex voto, (hoc est) fides cordis in Iesum Christum, quam Ecclesia DOMINI vouit Deo, vnanimi acclamatione, cum post promulgationem Decalogi in monte Oreb, peterent à Mose, vt audiret ipse vocem DOMINI, & reciperent se omnia, quæ Moses à Deo

Exod. 10.

Deo afferret, facturos, ac inprimis Prophetam illum, *Deut. 5.*
 lum, (qui est Iesus Christus) quem Moses promiserat, *Deut. 18.*
 audituros. Postremò, inuocatio nominis Dei per
 Christum. Quid multis opus? quod hi duo versicus
 li de sacris, quæ sola, præ omnibus Deo placent, sus
 is veteris Testamenti verbis concionantur, hoc A
 postolus Paulus, verbis noui Testamenti, maxi
 ma omnium perspicuitate interpretatur. Ad Ro
 manos enim capite 10. scribens: Quod si, inquit,
 confessus fueris ore tuo (hoc laudis seu confessio
 nis sacrificium est,) D O M I N V M Iesum, & crea
 dideris in corde tuo, (hoc voti est sacrifici
 um,) quod Deus excitauit illum à mortuis, sal
 uus eris. Corde enim creditur ad iustitiam, ore
 autem fit confessio ad salutem. Et sequitur mox:
 Quisquis inuocauerit nomen D O M I N I, saluus
 erit. Desideras ne vel sanctiorem, vel apertio
 rem interpretem? Tria enumerat ex his versiculis sa
 cra, quæ Deo sunt longè omnium gratissima. V
 num est, fides cordis in Christum, alterum est
 confessio oris, tertium, inuocatio Dei per Chris
 tum. Hæc sacrificia si præstiteris, nullum am
 plius dubium de vera & æterna tua salute relin
 quitur. Vnde & in altero versiculo additur: In
 uoca me, (videlicet ex fide, & confessione nomi
 nis Christi,) in die afflictionis & angustiae tuæ,
 ac tam mirifice, tam liberaliter te seruabo, vt lau
 dem nominis mei celebraturus sis in omnem æter
 nitatem. Insignis est hæc promissio, ac prorsus
 illa ipsa, quæ extat apud Ioannem: Quicquid *Ioan. 14.*
 petes

Ioan. 14.

Ioan. 16.

petieritis, inquit Christus, nomine meo, hoc faciam, ut glorificetur pater per filium. Ac iterum: Amen, Amen dico vobis, quæcunque petieritis patrem in nomine meo, dabit vobis. Ac alij quidem, impij & hypocritæ, properant in aduersis & angustijs suis ad idola, ad magicas incantationes, ad execrationes. Tu vero, si volueris & Deo ipsi gratissimum cultum præstare, & tuæ ipsius saluti verè consulere, properato fide & inuocatione tua ad DOMINUM Deum nostrum, per Iesum Christum, & re ipsa experieris, quod promissio Psalmi dicit: Inuoca me in die tribulationis, liberabo te, & glorificabis me. Et in alio Psalmo: Inuocat me, ideo exaudiam eum. Cum ipso sum in tribulatione, eripiam eum, & glorificabo eum.

Psal. 91.

16. *Impio autem dicit Deus, cur tu explicas statua mea, & usurpas pactum meum ore tuo?*
17. *Et tamen odio habes disciplinam, & proiecisti verba mea retrorsum.*
18. *Cum vides furem, curris cum ipso, & cum adulteris portio tua.*
19. *Os tuum assuefacis ad maledicentiam, & lingua tua nequit dolum.*
20. *Sedens, loqueris aduersus fratrem tuum, filium matris tuæ afficis probro.*
21. *Hec facis, & taceo. Cogitas igitur, me esse cui similem. Sed arguam te, & statuam ante oculos tuos.*

Tertia pars huius Psalmi, in qua reprehenduntur
impij

impj hypocritæ, primum quidem Iudæi, vt doceat, eos meritò ex Ecclesia Dei abiectos, deinde omnes impœnitentes, qui propter longanimitatem Dei applaudunt sibi in sceleribus suis, & pergunt in impietate sua præfractè ambulare. Hoc enim hominum genus non intelligunt veram sententiam & vim diuinæ legis, sed arbitrantur se ei satisfacere, si vel externam honestatem sectati fuerint, vel, cum peccauerint, sacrificium aliquod bouis aut vituli, pro peccati expiatione, Deo offerant, aut aliquot diebus ieiunent. Sed obseruemus, quibus coloribus Psalmus hypocritas & impœnitentes depingat. Tu quidem hypocrita (inquit) gloriaris de diuina lege, quam pepigisti te obedienter seruaturum: Omnia, inquit ens, quæ locutus est DOMINVS, faciemus, & erimus *Exo. 24.* obediens: vnde & Moses, sumptum sanguinem resperlit in populum, & ait: Hic est sanguis fœderis, quod pepigit DOMINVS vobiscum super cunctis his sermonibus. Hos legis sermones tu hypocrita iactas, & suscipis veram eorum sententiam explicandam, & tamen non doces, nisi externam quandam honestatem, & detestaris, si multum, externa tantum & crassa scelera ac peccata, interea autem nec vllam habes rationem internæ impietatis, nec vlli tibi curæ est cordis tui impuritas. Si quis, exempli gratia, reprehenderit te impietatis ex verbo DOMINI, & damnauerit tua sacrificia, prosequeris eum odio plusquam Vatiniano. Si Deus supplicio suo te ipse castigauerit, propter tuam impietatem, parum abest, quin eum iniustitiæ palam & impudentissimè accuses, certè animo tuo nihil est impatientius,

& virulentius. Si vides furem seu impostorem, et si sentis externum & crassum furtum esse contra legem Dei, tamen iudicas fraudulentas negotiationes, & astutas imposturas, quibus & tu ipse delectaris, & in proximo tuo, non ea, quæ exigitur, seueritate detestaris, cum lege DOMINI non pugnare. Si vides vel audis adulterum, et si fortassis tu non designas externum adulterium cum vxore proximi, tamen vel scortatio cum scortis tibi ludus est, vel corruptum æstu nefariæ libidinis ardet, quod, quid aliud est, quàm cum adulteris communionem habere? Si quis te verbo læserit, aut damno affecerit, tanta maledicentia in eum grassaris, vt videaris in hoc ludo ab ineunte ætate edoctus & assuefactus. Si quis in te iniurius aut contumeliosus fuerit, nihil prius habes, quàm vt quocunq; æstu & dolo potueris, vindictam de eo sumas. Si in aliquo hominum cœtu, aut familiarari conuiuio fueris, & de absente quodam vicino aut ciue mentio fiat, ibi tum nemo te est in eum vt eloquentior, ita & virulentior, vsq; adeo, vt probris tuis ne quidem coniunctissimo fratri tuo, quamuis vterino, parcas. Quid? arbitraris ne hæc scelera non esse peccata, nec pugnare cum lege Dei? aut si quid vitij fuerit, expiari posse sanguine hircorum, & taurorum? Et quia Deus solet aliquandiu ad ea conuiuere & dissimulare, putas ne ipsum esse tui similem, hoc est, approbare ea, & iudicare, non esse peccata aduersus legem Dei, sicut tu iudicas? Hoc quid aliud est, quàm Deum in ordinem hypocritarum redigere, & ex ipso carnalẽ hominem facere? quæ contumelia maior est, quàm humanis verbis explicari queat.

queat. Quare, etsi Deus aliquanto tempore ad hanc impietatem conniuet, & longanimitèr contumeliis am tolerat, tamen puniet eam vel tandem, idq; tantò seuerius, quanto serius: Arguam, inquit, te, & stas tuam ante oculos tuos, vt re ipsa conuincaris, & videas te esse damnatum peccatorem. Nunc quidem videris tibi iustus, quia sacrificas aut ouem aut bouem, & polliceris tibi propter tuas oblationes summam in cœlo felicitatem. Sed cum Deus patefecerit iudicium suum, & seueritatem iræ suæ aduersus eos, qui legem suam iuxta veram sententiam Spiritus sancti non seruauerunt, ibi tum nulla proderit externa morum honestas, nulla hypocrisis, nullum sacrificium, sed maledictus erit, quisquis non perDeut. 27. manserit in omnibus, IN OMNIBVS (inquam) tam minimis, quàm maximis sermonibus legis Dei, nec eos opere perfecerit. Eadem prorsus est sententia, quam Paulus ad Romanos de hypocritis scribit, Rom. 2. vt videatur eam vel ex his versiculis mutuò accessisse, vel in ipsos commentarium scripsisse: Inexcusabilis, inquiens, es, ô homo, quisquis es, qui iudicas. Nam hoc ipso, quo iudicas alterum, te ipsum condemnas: eadem enim facis tu, qui iudicas. Et iterum: Ecce tu Iudæus cognominaris, & acquiescis in lege, & gloriaris in Deo, & nosti voluntatem, ac probas eximia, institutus ex lege, confidisq; te ipsum ducem esse cæcorum, &c. Qui igitur doces alium, te ipsum non doces: qui prædicas, non furandus, furaris: qui dicis, non adulterandum, adulterium committis, &c.

Quid igitur faciamus, inquires, aut quò nos vers

Hh 2 tamus?

Rom. 1.

tamūs? Siquidem enim, non hi tantum digni sunt morte, (vt idem Paulus ait) qui externa & manifesta scelera faciunt, verumetiam illi qui assentiuntur ijs, qui faciunt, quid tandem suscipiemus agendum, vt veram coram Deo iustitiam & salutem assequamur? Certè non est alia huius rei agendæ ratio, nisi vt veram agamus pœnitentiam. Non iubeo te sacrificare pro peccatis, non exigo à te hecatomben, ad consequendam iustitiam, non mando tibi lauationes manuum, poculorum, vrceorum, æramentorum, & lectorum, vt purifies cor tuum: sed volo,

Mar. 7.

iubeo, exigo, vt veram agas pœnitentiam. Hoc illud est, quod ad assequendam veram iustitiam & salutem requiritur. Principiò enim, necesse habes rectam sententiam diuinæ legis cognoscere, vt scias legem Dei esse spiritualem, nos autem carnales, hoc est, legem Dei non esse contentam externa operum iustitia, sed exigere totum hominem spiritualem, & perfectè iustum ac sanctum: Diliges, inquit, Deum ex TOTO corde, ex TOTA anima, & ex TOTA fortitudine tua, & proximum sicut TE IPSUM, & Non concupiscas. Nos autem sumus carnales, & affectu carnis, qui est inimicitia aduersus Deum, (legi enim Dei non subditur, siquidem ne potest quidem) inebriati, & suffocati. Quare fieri non potest, vt legem Dei, quæ est spiritualis, operibus nostris perfectè impleamus. Quid igitur lex profuerit? Prodest, vt agnoscamus peccatum, & iram Dei propter peccatum, & vt re ipsa comperiamus, nos esse natura iniustos, & æterna damnatione dignos. Quare ad agendam pœnitentiam, & ad assequendam iustitiam

Rom. 8.

& salutem

& salutem, primus omnium gradus est, non vt sacrificemus boues & vitulos, aut alia Leuitica sacra faciamus, sed vt suscipiamus agnoscendum peccatum, & cum animis nostris serio considerandum meritum æternæ nostræ damnationis, cui propter peccatum sumus obnoxij. Sed quid? Nihil ne aliud ad iustitiam & salutem requiritur? hinc ne resistendum est? Minimè omnium. Qui hinc resistit, & non amplius ire pergit, necesse habet perpetuò interire. Progrediendum igitur est longius, & audiendum Evangelion de DOMINO nostro Iesu Christo, vt credamus, & firma fide teneamus, ipsum esse expiatorem peccatorum nostrorum, propter quem Deus Pater recipiat nos in gratiam, condonet nobis peccata nostra, & faciat nos hæredes æternæ vitæ. Ad hunc gradum cum peruenerimus, ibi tum licet, in Mosaisca quidem politia, seu in veteri testamento, sacrificare boues, non vt merito huius operis expientur peccata, sed vt de fide in semen Abraham (hoc est) in Christum admoneamur, & fidem confirmemus: in nouo autem Testamento cœnam DOMINI sumere, idq; non eo consilio, vt hoc opere iram Dei mitiget, & peccata expies, sed vt confirmata, hoc Sacramento, fide in Christum, certissimus de iustitia in Christo, & de salute tua in cœlesti regno, reddaris. Hanc pœnitentiæ normam secutus, fieri non potest, quin exciteris à Spiritu sancto, vt & bona opera iuxta legem Dei obedienter facias, & mala aduersa, quæ Deus immittit, patienter feras, idq; non, vt iam primum incipias Deo placere, (places enim propter solum Christum per fidem) sed vt testificeris tuam

gratitudinem, & facias tuum, ad quod vocatus es, officium. De qua re admonent nos etiam postremi versiculi huius Psalmi, qui sequuntur.

22. *Intelligite, quæso, hoc, qui obliuiscimini Dei, ne forte rapiam, & non sit, qui eripiat.*
 23. *Qui sacrificat laudem, honorat me, & hæc est via illa, qua ostendam ei salutem Dei.*

Conclusio Psalmi, in qua continetur adhortatio, ut impij hypocritæ non sectentur sacra, vel à se ficta & excogitata, vel etiam legitima, impia autem opinione sorditata: Vos, inquit, qui obliuiscimini Dei, (hi sunt hypocritæ, qui etsi gloriantur de Deo, & appropinquant Deo ore suo, tamen cor eorum longe est ab eo,) intelligite, quæso, hoc. Quid intelligant? Quod videlicet paulò antè dictum est, Deum rejicere sacrificia, & abominari cultus, qui suscipiuntur sine vera pœnitentia. Quò mihi multitudo victimarum vestrarum, dicit DOMINVS? Et mox:

Esaiæ 1. Cum extenderitis manus vestras, auertam oculos meos à vobis, & cum multiplicaueritis orationem, non exaudiam. Quid ita? Quia manus vestræ plene sunt sanguine, (hoc est) sacrificatis & oratis, sine vlla vera pœnitentia. Quòd si aut volueritis veram agere pœnitentiã, agite, lauamini, mundi estote (id quod fit per fidem in Christum) auferte malum cogitationum vestrarum ab oculis meis, quiescite agere puerse: & quæ sequuntur, describuntur enim in eo Esaiæ loco fructus veræ pœnitentiæ. Similiter apud

Michæam:

Michæam: Quid dignum (inquit) offeram **D O M I N O** *Mich. 6.*
N O: Curuabo genu Deo excello: & nunquid offeram
 ei holocaustomata, & vitulos anniculos: Ac mox: In-
 dicabo tibi, ô homo, quid sit bonum, & quid **D O M I N U S**
 requirat à te. Vtiq; facere iudicium, & diligere
 misericordiam, & sollicitum ambulare cum Deo tuo,
 (hoc est) veram agere pœnitentiam, hoc demum re-
 quirat Deus, hoc placet Deo. Vos igitur hypocritæ
 (qui, etsi multum de Deo sermonibus vestris loqui-
 mini, tamen obliuiscimini eius cordibus vestris, quia
 caretis vera peccati agnitione, & fide in Christum)
 considerate hæc cum animis vestris, & reponite alta
 mente, vt veram agatis pœnitentiam. Nisi enim
 hanc egeritis, futurum est, vt Deus abripiat vos in
 æternum Gehennæ incendium, nec sit, qui eripiat.
 Hoc prorsus illud est, quod Ioannes Baptista apud
 Matthæum ait: Facite fructus, qui deceant pœnitentiam, *Matth. 3.*
 & ne sitis hac mente, vt dicatis intra vos ip-
 sos: Patrem habemus Abraham. Et mox: Iam securis
 ad radicem arborum posita est. Omnis igitur arbor,
 quæ non facit fructum bonum, exciditur, & in ig-
 nem mittitur. Ac iterum: Ventilabrum in manu eius
 est, & repurgabit aream suam, & congregabit tritici-
 cum suum in horreum, paleam autem exuret igni in-
 extinguiibili, (vel vt Psalmus dicit) rapiet, & non
 erit, qui eripiat. Quæ omnia dicta sunt, & impleta, in
 abiectiōe Israelitarum, ne sint amplius Ecclesia **D O M I N I**,
 & in vocatione Gentium, quæ facta est per E-
 uangelio Christi, in toto orbe terrarum. Quid ergo fa-
 ciant Israelitæ, vt reuertantur ad Ecclesiam? Dona em
 & vocatio Dei eiusmodi sunt, vt eorum illi pœnitere *Rom. 11.*
 non.

non possit. Quid item faciant Gentes, vt maneant in Ecclesia DOMINI: Audi postremum Psalmi versiculum: Qui sacrificat laudem, honorat me, & hæc est vna illa via, qua fit, vt reponam illum, quisquis fuerit, in salutem Dei, & conferam in eum omnia cœlestis salutis beneficia. Dictum est suprà, quòd in hoc Psalmo, pro laude, intelligendum sit sacrificium laudis. Et hoc exigit Deus præ omnibus alijs sacrificijs. Significat enim fidem & confessionem Christi, vt postquam agnoueris peccatum tuum, confitearis ore tuo DOMINUM Iesum, & credas, quòd Deus illum excitauit à mortuis: nam corde creditur ad iustitiam, ore autem fit confessio ad salutem. Quare si vel tu Israelita, qui iam ex Ecclesia Dei abiectus es, volueris pristinam maiorum tuorum iustitiam & salutem recuperare, vel tu Ethnice, qui iam ad Ecclesiam Dei vocatus es, volueris in Ecclesia Dei perseuerare, & consistere, necesse habes, corde tuo in Christum credere, & ore tuo confiteri. Præter hanc, non est alia via aut ratio, qua veram & æternam salutem consequaris.

Rom. 10.

VSVS HVIVS PSALMI.

Nihil à condito orbe vſitatus fuit in humano genere, quàm mactare pecora in diuinū cultum. Nam & Abel, qui primus iusti cognomen reportauit, obtulit Deo de primogenitis gregis sui, idq; non humana prudentia, sed diuino oraculo, (dicitur enim, iuxta Epistolam ad Hebræos, obtulisse PER FIDEM. Fides autem est ex auditu. Auditus verò per VERBVM Dei) & Noha egressus ex arca, obtulit DO-

Genes. 4.

Heb. 11.

Rom. 10.

MINO holocausta de pecoribus & volucribus. Ac *Gen. 8.*
mox propagatus est, per filios Nohe, mos sacrificandi
di **D O M I N O**, in vniuersum mundum. Et si autem
plurimæ Gentes degenerauerunt in idolomaniam,
tamen mos ipse sacrificandi, vt summus Dei cultus,
retentus est tam apud pios, quàm apud impios, ac
publico consensu & vsu ita confirmatus videbatur,
vt donec hic mundus staret, nulla humana vel indus
tria, vel potentia abrogari posset. Interea autem
Prophetæ diuinitus excitati, qui de ventura in nos
(vt Petrus loquitur) gratia vaticinabantur, perspi
cùe docuerunt, hunc Dei cultum, nec fore perpetuū,
nec esse summum, nec valere coram Deo ex operis
sui merito & dignitate, sed tantum adumbrare, quòd
futurum sit sacrificium **D O M I N I** nostri Iesu Christi,
quo peccatum humani generis verè coram Deo ex
piaretur, & quotquot in Christum crederent, in gras
tiam Dei reciperentur. Quare, cum re ipsa videamus
impletum, quòd & Christus per Prophetas promissus,
in hunc mundum aduenerit, & sacrificium suum
peregert, ac omnia veterum sacrificia, non tantum
inter Ethnicos, verum etiam inter Iudæos, prædica
tione & diuulgatione Euangelij Christi, in toto orbe
abrogata, & e medio sublata sint, obscurum non est,
in quem vsum hic Psalmus nobis sit propositus. Pri
mum enim, confirmatur è lectione & meditatione
eius veritas Prophetarum vaticiniorū, vt sciamus,
quòd prophetia, sicut Petrus ait, non sit allata volumi
tate hominis, sed quòd sancti Dei homines locuti
sint è Spiritu sancto impuls. Deinde, cum hic Psal

mus vaticinetur Leuitica sacrificia, in diuulgatione Euangelij abrogata iri, & re ipsa comperiamus, hoc iam ante mille quingentos annos impletum esse, perspicue testificatur, non esse alium Christum, iuxta Iudæorum vanitatem & impietatem, expectandum, sed illum esse verum Christum, seruatorem nostrum, quem nobis sacrificiorum in toto orbe terrarum abrogatio demonstrat, & extra quem nulla est hominis salus. Ad hæc, quia hic Psalmus concionatur de vocatione Gentium in communionem Ecclesiæ Dei, docet, quod quemadmodum Gentes iustificatæ, (hoc est) condonationem iniustitiæ suæ consecutæ sunt, nullis prorsus operum suorum meritis, sed tantummodo gratis, ex proposito, & gratuito fauore Dei, per fidem, propter Iesum Christum, ita & nos adhuc hodieq; non iustificemur propter merita nostrorum operum, sed tantum propter meritum D O M I N I nostri Iesu Christi, per fidem: Iugum legis, inquit Petrus, neque Patres nostri, neque nos portare potuimus. Sed per gratiam D O M I N I nostri Iesu Christi, credimus nos saluos futuros, quemadmodum & illi. Præterea, abiectio Iudæorum, & assumptio Gentium in populum Dei, quæ in hoc Psalmo describuntur, admonent nos timoris Dei, vt simus grati erga Deum, ne fortè, sicut Deus nō pepercit Iudæis, naturalibus ramis, ita nec nobis Gentibus, oleastris, parcat, si quod gratuito accepimus, non studeamus gratitudine conseruare. Postremò discamus ex hoc Psalmo etiam illud, quod nulla sacra, absque vera poenitentia, sint Deo grata: & quod præcipuus Dei cul-

tus sit, immolare Deo laudem, reddere altissimo vota, & inuocare Deum in die tribulationis, (hoc est) credere corde, & confiteri ore DOMINUM nostrum Iesum Christum, & ex hac fide nomen Dei inuocare. Nam, qui sic colit Deum, vno hoc cultu absoluit omnia sacrificiorum genera, quæ quondam maioribus per Spiritum sanctum tradita fuerunt.



~~2nd~~
~~1880~~
~~1881~~

